

भद्रवाही भद्रवाही बाइबिल

The Open Bhadrawahi Bible

This Bible is copyrighted by Free Bibles India and made available under a Creative Commons Attribution-ShareAlike 4.0 International License. Original work available at <http://www.free-biblesindia.com>.)

This Bible is provided at the cost of printing by the Digital Bible Society (dbs.org). This Bible, and many others, are available for free download in a variety of digital formats at dbs.org/bibles.

मत्ती.....	4
मरकुस	25
लूका	38
यूहन्ना	60
प्रेरितां.....	75
रोमियो.....	95
1 कुरिन्थियों	103
2 कुरिन्थियों	111
गलातियों.....	116
इफिसियों	119
फिलिप्पियों.....	122
कुलुस्सियों	124
1 थिस्सलुनीकियों	126
2 थिस्सलुनीकियों	128
1 तीमुथियुस.....	130
2 तीमुथियुस.....	133
तीतुस	135
फिलेमोन.....	136
इब्रानियों	137
याकूब.....	143
1 पतरस	146
2 पतरस	149
1 यूहन्ना.....	151
2 यूहन्ना.....	154
3 यूहन्ना.....	155
यहूदा	156
मुकाशफो	157

मत्ती

यीशु एरु खानदान

(लूका 3:23 - 38)

1 अब्रहामेरी औव्लाध, दाऊदेहेरी औव्लाध, यीशु मसीहेरी वंशावली ।
2 आब्रहमेरो ईजहाक पैइदा भोव; ते ईजहाकेरो याकुब पैइदा भोव; ते याकुबेरे युहुदा ते तैसेरे दूला पैइदा भुए । 3 ते युहुदेरो फारस, ते ज़राहा पैइदा भुए; ते तैन्केरी हैईयरु नोव तंभ्र थुं, ते तै फार्सेरो हस्रौना पैइदा भोव, ते हस्रौनेरो राम पैइदा भोव? 4 ते रामेरो आमिनादाब पैइदा भोव; ते आमिनादाबेरो न्हस्रौना पैइदा भोव, ते न्हस्रौनेरो सल्मौना पैइदा भोव । 5 ते सल्मौनेरो बौईज पैइदा भोव, ते बौईजेरी अम्मारु नोव राहब थुं; ते बौईजेरो औबेद पैइदा भोव, ते जैसेरी अम्मारु नोव रुत थुं ते औबेदेरो याशी पैइदा भोव । 6 ते याशीएरो दावद बादशाहा पैइदा भोव,
दावदेरो सुलेमान पैइदा भोव, ते तैसेरी हैई येनी अम्मा जै पेहिली उरियाएरी कौन्श थी? 7 ते सुलेमानेरो रूहुबाम पैइदा भोव, ते रूहुबामेरो आबीया पैइदा भोव, ते आबीयाएरो आसा पैइदा भोव । 8 ते आसाएरो युस्फत पैइदा भोव, ते युस्फतेरो युराम पैइदा भोव, ते युरामेरो उजिया पैइदा भो । 9 ते उजियाएरो युतांम पैइदा भोव; ते युतांमेरो आखज पैइदा भोव; ते आखजेरो हजकिया पैइदा भोव । 10 ते हजकियाएरो मनसी पैइदा भोव, ते मनसीएरो आमौना पैइदा भोव, ते आमौनेरो युसिया पैइदा भोव । 11 ते युहुदुयेरे मुल्खे मैरां जलावतना भोइतां बाबलेरी गुलैमी मां गहने तगर युकुनिया ता तैसेरे दूला पैइदा भुए ।

12 बाबले मैरां जलावतना भोनेरां पत्ती याकुनियाएरो सियालतीएहेल पैइदा भोव, ते सियालतीएहेलेरो ज़ौरोबाबल पैइदा भोव । 13 ते ज़ौरोबाबलेरो आबीहुद पैइदा भोव, ते आबीहुदेरो आलियाकिम पैइदा भोव; ते आलियाकिमेरो आजवर पैइदा भोव । 14 ते आजवरेरो सादुक पैइदा भोव, ते सादुकेरो आखीम पैइदा भोव, ते आखीमेरो आलीहुद पैइदा भोव । 15 ते आलीहुदेरो आलीजर पैइदा भोव, ते आलीजेरो मत्तांन पैइदा भोव; ते मत्तांनेरो याकुब पैइदा भोव । 16 ते याकुबेरो युसफ पैइदा भोव, जै मरियमारो मुन्श थु, ते मरियमारो यीशु पैइदा भोव, जैसजो बादे मां मसही ज़ोने लगे ।

17 ते आब्रहामे कैरां ते दावदे तगर चौवधे पीडी भुई, ते दावदेरे युहुदी केरे जालावतन भोइतां बाबलेरी गुलैमी मां गहने तगर चौवधे पीडी भुई, ते बाबलेरे जालावतन भोने कैरां देइतां यीशु मसही तगर चौवधे पीडी भुई ।

यीशु एरु ज़रम

लूका 1:26-38; 2: 1- 7

18 ते यीशु मसीहेरु ज़रम ऐंचरे भोव, की ज़ैखन तैसेरी अम्मां मरियामारी कुडमाई युसफै सेहीं भेवरी थी, ते इलाहे कैरां पेहिले तै पाबित्र आत्माइं सेहीं दोजिंती भुई । 19 ते तैसारो मुन्श युसफ ऐल्हेरलेइ तैनी तै चुप चारे शारनेरे लेइ सोचु, किजोकी तै तैस बदनाम केरनी ना थु चहतो । 20 हेजु तै ऐन सोचने लोरो थु ता परमेशरे एकी फरिशते सुपने मां एइतां ज़ोव, औ युसफ दोदरी औव्लाध अपनी कौन्श मरियम अपने घरे आंन्श कैरां ना उर, किजोकी ज़ैन मडु तैसारे पेटे मांहे तैन पाक रुहारी कुद्वती सेहीं भेवरुए । 21 मरियांमी मडु भोनुए, ते तु तैसेरु नोव यीशु रेखां, किजोकी तैहे अपने लोकन तैनकेरे पापण कैरां तैन छुटालहो ।

22 एन सभ किछ ऐल्हेरलेइ भोव, की परमेशरेरो तै हुकम जै तैनी अपने नेबी केरे ज़िरये सेहीं दितोरो थु, पुरो भोए की । 23 अक आइलाही कुई पेटे भारी भोली, ते तैस अक मडु भोलु, ते तैरुजो एमांनुएइल ज़ोल्हे, जैसेरो

मतलबे परमेश्वर ऐसन सेहीं साथीये । 24 युसफ ज़ैखन निडलारां बींजौ त तैनी परमेशरेरे फरिशतेरु ज़ोनु मनु, ते मरियम अपनी कौन्श अपने घरे आंन्हीं । 25 पण ज़ां तगर तैस मडु ना ज़रु तां तगर तैसकैरां दुर राहु ते ज़ैखन मडु ज़रु ता युसफै तैस मडैरु नोव यीशु रखु ।

जोषटी केरु एजनु

2 ज़ैस यीशु हिरोदेस बादशाहेरे जमाने मां युहुदियेरे शहरे बैतलहंमे मां पैइदा भोव त पुबेरां किछ जोषी लोक युरोशलमे मां पुजै ते पुछने लगे । 2 युहुदी केरो बादशाहा जै ज़रमोरोए तै कौदीये? किजोकी असैइं पुबे मां तैसेरो तारो लाहोरोए ते आसां तैसका मथौ टेकने एवरेम । 3 ज़ैखन हिरोदेस बादशाहं ऐह गल शुंनी त तै ते तैसेरे साथी ते युरोशलमेरे सारे लोक डेरी जे । 4 हिरोदेसें मन्दिरे मां सेवा केरने बाले सेवक पुरेहूत ते कौमरे सियांने लोक अकोड़े केरतां पुछने लगे: की मसही कौदी पैइदा भोनांए । 5 तैनेइं तैस सैहीं ज़ोव: युहुदियेरे शहरे बैतलहंमे मां पैइदा भोनांए किजोकी नेबेइं एंचरे ज़ोवरुए की ।

6 एह बैतलहंम तु जै युहुदी केरे आलाके माहंस, युहुदी केरे हाकमन कैरां घट नैइं, किजोकी तीं मैरां अक एरहो हाकम निसैल्हो जै मेरी कौम इस्त्राएलेरी हेरगैश केरल्हो ।

7 तैखन हिरोदेस बादशाहं जोषी चुपचारे कुजेइतां तैन कैरां तारो निस्नेरो पत्तो कियो । 8 ते तैना ऐन जोइतां बैतलहंमे मांजो भेजे की गाथ: ते तैस मडैरो रोडे चारे पत्तो केरा ते ज़ैखन तुसंन पत्तो लगे त मिम्हीं पत्तो देइयथ ताके अम्हीं तैसका गैहीतां मथौ टेकीं ।

9 तैना बादशाहेरी गल शुनतां चले जे: ते तै तारो जै तैनेइं पुबे मां लाहोरो थु, तैन अगरी अगरी चलो ते तैस ठैरी गैहीतां खेइहु जैडी तैन मडु थुं । 10 तै तारो लैहितां तैन बडी खुशी भुई । 11 चाल्ही तैना घरे अंतर जे ते तैन मडु तैसेरी अम्मा मरियमी का लाहुं, ते तैसका मथौ टेको; ते अपने उबे खौल्तां सौनु लुबांन ते मुर तैसका चहदू । 12 ते सुपने मां ऐह बिसतार मैल्हो की वापस हिरोदेसे का न गैहीयथ, तैना वापस केंची होरी बत्तां अपने देशे जो चले जे ।

मिस्र मुल्खे जो गहनू

13 तैनकेरे गहनेरां पत्ती प्रभु परमेशरेरो अक सुवर्गदूत युसफै सुपने मां मैल्हो ते ज़ोने लगे: उठ; मडु ते तैसेरी अम्मा साथी नैहीतां मिस्र देशे जो नश; ते मेरे ज़ोने तग्र तैडी रैहियां किजोकी हिरोदेस बादशाह ऐस तौसां मारने चहतै ।

14 युसफ निडलारां उठो ते मडु ते तैसेरी अम्मा साथी नैहीतां रतो रात मिस्र देशे जो चलो जेव । 15 ते हिरोदेस बादशाहेरे मरने तग्र युसफ तैडी राहु; ताके तै गल जै नेबेइं जेवरी थी पुरी भोए की मीं मिस्रे मैरां अपनु मडु कुजाऊं ।

16 ज़ैखन हिरोदेसे जोषी केरे धोखे बैजरो पत्तो लगे, त तैस बडी सर्क आई: तैनी बैतलहंम ते तैसेरे दुर दुर आलाकन मां सिपाही भेजतां सारां मडुं जैना दुई सालां कैरां थियां सारां मारां: तैन दुई सालां केरे हिसाबे सैहीं इल्ल्हा मैल्हने पुड कियोरो थु जै जोषन कैरां पत्तो लगोरो थु । 17 एंचरे जै गल यरमियां नेबे जेवरी थी पुरी भुई की ।

18 रांमा शहारे मां अक आवाज शूनी: बेड़ी लेरां केरी शौर ते बड़े मातमेरी शोरे, राखल अपने मट्टां केरेलेइ लेरां लोरी देने, तैसारो दिल ठांडो न भोए किजोकी तैना मैरी जेवरन।

मिस्र मुल्खेरॉं वापिस एजनु

19 हिरोदेसेरी मौऊतरां पत्ती प्रभु परमेशरेरो अक सुवर्गदुत मिस्रे मां युसफै सुपने मां लाहु ते तै जौने लगे। 20 उठ, मट्टु ते तैसेरी अम्मा साथी नैहीतां इस्राएलेरे देशे जो चलो गा; किजोकी जैना लोक मट्टे मारने चहते थिये, तैना मैरी जेवरेन। 21 फिरी युसफ निडलारां उठो, ते मट्टु ते तैसेरी अम्मा साथी नैहीतां इस्राएल देशे जो चलो जेव। 22 पण ऐन शुनतां की अरखलाउस अपने बाजेरी हिरोदेसेरी ठैरी बादशाह बनोरोए तैड़ी गहने कैरां डेरतां ते सुपने मां पत्तो लेगतां गलिलेरे अलाके जो चलो जेव। 23 ते तैड़ी पुजतां नसरत नोवेरे शाहरे मां रहने लगे: ताके तै गल जै नेबेइ जेवरी थी पुरी भोए की तैसजो नासरी जौलहे।

यूहन्ना बपतिस्मो देने बालो

(मरकुस 1: 1-8; लूका 3:1-18 यूहन्ना 1:6-8, 15-34)

3 तैन दिहेडन मां यूहन्ना बपतिस्मो देने बालो आव ते युहूदियेरे बियाबांने मां गैहितां ऐह मनादी केरने लगे की। 2 तोबा केरा किजोकी अस्मानेरी बादशाही लूशी एजने बालिए। 3 ऐह यूहन्ना नबी तैहे जैसेरे बारे मां इसाया नेबें ऐन जोवर थु: की बियाबांने मां जौने बालेरी आवाज एजने लोरिए, की परमेशरेरे लेइ बत्त तियार केरा ते तैसेरी बत्तां सिधी केरा।

4 यूहन्ना ऊंटेरे बालां केरो चोगो लातो थियो ते अपने लख्खे सैहीं अक चमडरो पट्को बंधतो थु, ते तै बनेरां टिटां ते गंनेरु माछी खातो थु। 5 युरोशलम, ते युहूदिया ते यरदनरे सारे अलाकन मैरां लोक यूहन्ना नेबी का गहते थिये। 6 ते जैखन तैना अपने पापां केरो अंगिकार केरते थिये ते यूहन्ना तैन दरियाए यरदनने मां बसिसमो देतो थु।

7 पण जैखन तैनी हेरु की बड़े फरिसी ते सदुकी बसिसमो नैनेरे लेइ तैसका ऐजने लोरेन ते तैनी तैन जो जौव: तुस सपैरी औवलाधथ ते तुसंन केनी जौव की एजने बालाऊ हेरतां नशशा। 8 अपने तोबा केरनेरे हिसाबे सैहीं किछ फल भी बनाथ। 9 ते तुस ऐस गुमाने मां न राथ की आसां अब्रहामेरी औवलाधी मैरम: किजोकी आव तुसंन सैहीं जौतां की परमेशर इन घोडन मैरां अब्रहामेरे लेइ औवलाध पैइदा केरी सखते। 10 हुनी बुट्टेरे जिल्लन पुड मैकु रखोरोए एल्हेरेलेइ जैस बुट्टे रोडो फल न लगे ते तै केटतां अग्गी मां फुक्नोए।

11 आव ते तुसंन मन फरांनेरे लेइ पैनी सैहीं बसिसमो देताइ: पण जै मेरे पत्ती ऐजने बालोए तै मीं कैरां जादे निगै: आव ते तैसेरी जुट्टेरो तस्मो खोलनेरे काबले भी नैइ, पण तै तुसंन पाबित्र आतमाइ सैहीं ते अग्गी सैहीं बसिसमो दैल्हो। 12 तैसेरु छज तैसेरे हथे माहें ते तै आपनु अन्न खुब रोडे चारे छट्टैल्हो: तै गैहुं अपने कौठारे मां रखैल्हो: पण झाझ तैस अग्गी मां फुकैल्हो जै कथै हिशनेरी न भौल्ही।

यूहन्नेरे जिरीये यीशु मसीहेरो बपतिस्मो

(मरकुस 1: 9-11; लूका 3:21-22 यूहन्ना 1:31-34)

13 तैस मोके यीशु गलिले मैरां दरियाये यरदनरे बन्ने पुड पुजो ताके यूहन्ना कैरां बसिसमो नै। 14 पण यूहन्ना नेबें यीशु जो त्रा जौव: किजोकी मीं तीं कैरां बसिसमो निहीयोरो लोडते ते तु मीं कैरां बसिसमो नैने एवरोस? 15 पण यीशुए जुवाब दितो: यूहन्ना तु एचरे भोने दे, किजोकी रोडु ते ऐन थुं की आस सारी धर्मैरी सचाई एचरे सैहीं पुरी केरम, ताल्ही यूहन्ना नबी खुशी भोव। 16 यीशु जैखन बसिसमो नैहीतां पैनी कैरां बेइर निस्सो ते हेरा आम्बर खुल्ही जेव ते तैनी परमेशरेरी आत्मां कुबूतरेरी जैरी एपु पुड एइती लाही। 17 ते तैखन आम्ब्रे मैरां एह आवाज आई की ऐन मेरु ट्लारु मट्टुए ऐस पुड आव बड़ो खुशी।

यीशु एरी आजमेइश

(मरकुस 1: 12-13; लूका 4:1-13)

4 तैस मोके आत्मां यीशु जंगले मां नियो ताके शैतान तैसेरी आजमेइश केरे। 2 चैल्ही दिहाडे ते चैल्ही रातन फाको देनेरां पत्ती यीशुए दलुख लगी। 3 ते तैखन अजमाने बाले शैताने यीशु का एइतां जौव: अगर तु परमेशरेरु मट्टुस ते इन घोडन जो जो की ऐना रौडी बन्न। 4 यीशुए जुवाब दितो: पाबित्र शास्त्रे मां लिखेरुए की मैन्हुं सिर्फ रौडेइं सैहीं जितो न राहे बलके हर गल्ली सैहीं जै परमेशरेरी जबांन निसचे तैस्सैहीं जितो रहते।

5 फिरी शैताने यीशु बुजूरुग बादशाहां केरे शहरे युरोशलमे मां नियो ते मन्दिरेरी ऊची छम्पी पुड नैहितां खडो कियो। 6 ते शैतान यीशु सैहीं जौने लगे: अगर तु परमेशरेरु मट्टुस ते इठां छाल मार किजोकी शास्त्रे मां लिखेरुए की परमेशर तेरे बारे मां अपने सुवर्गदूतन हुकम दैल्हो, ते तैना तीं अपने हथन मां छुल्हे ताके तेरे पाऊन केची घोडन सैहीं ठौकर न लगे। 7 पण यीशुए जौव: ऐन भी शास्त्रे मां लिखेरुए की तु अपने परमेशरेरी आजमेइश न कैरां।

8 तैखन शैताने यीशु एक्की ऊचे पहाडे पुड नियो ते तैड़ी दुनियारी सैरी बादशैही ते तैनकेरी शानो शौकत हैराइ। 9 ते जौव: अगर तु मिका जैंधु तल्ले लेइतां मथौ टेक्स ते आव इन सभ किछ तीं दैल्हो। 10 तैखन यीशुए शैताने जो जौव: एह शैतान दुर भो किजोकी लिखेरुए की तु सिर्फ अपने परमेशरे का मथौ टेकां ते तैसेरी आराधना केरां।

11 तैखन शैतान यीशु कैरां चलो जेव ते सुवर्गदूते एइतां तैसेरी सेवा केरने लगे।

यीशु एरे सेवारे कम्मेरी शुरुवात

(मरकुस 1: 14-15; लूका 4:14-15, 31)

12 जैखन यीशुए ऐन शूनु की यूहन्ना नबी कैद कियोरोए ते यीशु गलिले मां जेव। 13 ते नासरत शैरतां कफून्हुमे मां रहने लगे जै डल्हेरे बन्ने येनी झिलरे बन्ने जैबलुंन ते नैफतैलेरे अलाके मां हैं। 14 ताके तै गल्ल जै इसाया नेबें जेवरी थी पुरी भोए की।

15 जैबलुंन ते नैफतैलेरे अलाके डल्हेरे पार येनी झिलरे ऊस पासे यरदनरे पार ते गलिलेरो तै अलाको जैसमां गैर युहूदी बसतन। 16 ते जैना लोक आंधरे मां ऊग्र गुजारते थिये तैनेइ अक बड़ी लो लही: ते जैस मुल्खे मां मौऊतरा सैयो पैउरो थु: तैठेरे रहने बालन पुड बड़ी लो आई।

17 ते तैइसेरु दंतु यीशुए ऐन जौनु शुरु कियुं की तोबा केरा किजोकी अस्मानेरी बादशाही नेडे पुजोरीए।

पेहिले चेलां केरु कुजानु

(मरकुस 1: 16-20; लूका 5:1-11; 31; यूहन्ना 1:35-42)

18 एक्की दिहाडे यीशु जैखन झिलरे बन्ने चल्लोरो थियो ते तैनी दुइ दला, शमौन जैसजो पतरस जौते थिये ते तैसेरो दला आंद्रियास लाहु: तैखन तैना डल्हे मां जाल लोरे थिये छडने, किजोकी तैना झिरां केरु येनी मैछली ट्लानेरु कम्म केरते थिये। 19 यीशुए तैन सैहीं जौव: मीं सैहीं साथी चला आव तुसंन मैन्हुं ट्लाने बाले बनैइल्हो। 20 तैनेइ तैखने अपन जालां तैड़ी जैरे छड्ठां ते यीशु सैहीं साथी चले जे।

21 जैखन यीशु थौडो जैरो आग्र जेव ते तैनी याकुब ते यूहन्ना दुइ दला लाहे जैना जैबदेरां मट्टां थियां: तैना किशती मां अपने बाजी सैहीं साथी जालां बुनते थिये, यीशुए तैना कुजाए। 22 ते तैना भी तैखने किशती ते अपने बाजी तैड़ी जैरे छेडतां यीशु सैहीं साथी चले जे।

यीशु बिमारण बड्जाते

(लूका 6: 17-19)

23 यीशु सारे गलिले मां हंठतो फिरतो राहु: तै तैन्केरे प्राथना भवने मां शिक्षा दंतो राहु ते बादशैहीयरी खुशखबरी शुनातो थु, ते लोकां केरी हर किस्मेरी दुख बिमैरी ते कमजोरी दुर केरतो थु। 24 ते यीशुएरी बड़ी मूशुरी भोई

जेइ, ते लोक सैभी मरीज़न जैना हर किस्मेरी बिमैरी ते तकलिफन मां फसोरे थिये, ते जैना मिरगरे मरीज़ थिये अधरंगी थिये, ते जैन मां दुष्टात्मां थी तैना यीशु का आन्हें ते यीशुए तैना बज्झाए।²⁵ ते गलिल, दिक्पुलुस, युरोशलम, युहूदिया, ते दरियाए यरद्रेरे पैरी अलाकां केरे बड़े लोक यीशु सैहीं साथी चले जे।

यीशु एरो पहाड़े पुड़ उपदेश

5 यीशु तैन हछे लोकन हेरतां एकी पहाड़े पुड़ चलो जेव: ते जैखन तैड़ी बिशो त तैसेरे चेले भी तैसका आए।² तैखन यीशु अपनी जबांन खौलतां तैन एंचरे ज्ञान देने लगे।

मुबारक वचन (लूका 6:20-23)

3 मुबारकन तैना लोक जैना दिलेरे गरिबन: किजोकी आसमानेरी बादशाही तैन्केरीए।

4 मुबारकन तैना लोक जैना मायुसन: किजोकी तैन निस्चो भोनोए।

5 मुबारकन तैना लोक जैना नर्म दिलेरेन: किजोकी तैना जमीनरे मालक भोनोए।

6 मुबारकन तैना जैन परमेशरेरी दलुख टलीशश: किजोकी तैना रजनेन।

7 मुबारकन तैना जैना रेहेम दिलन: किजोकी तैन पुड़ भी परमेशर रेहेम कैरेल्हो।

8 मुबारकन तैना जैनकेरे साफ दिलन: किजोकी तैना परमेशरे लाहेले।

9 मुबारकन तैना जैना सुल्हा केरतन: ते एकेकी सैहीं पियारे सैहीं मिलतन किजोकी तैन जो परमेशरेरां मड्डां जौल्हे।

10 मुबारकन तैना जैना परमेशरे नोवें पत्ती सताए गहतन: किजोकी असमानेरी बादशाही तैनकेरीए।

11 मुबारकथ तुसां लोक जैखन लोक तुसन मेरे नोवें सैहीं लानतान केरन ते स्तान ते बुरी गल्लां तुशै बहरे मां जांते रहन।¹² तुसां खुशी रहियथ ते नैचथ: किजोकी असमाने मां तुशै लेइ बड़ो फले: किजोकी लोकेइं पुराने जमाने मां नबी भी एंचरे स्तेऊरे थिये।

लओ ते लून (मरकुस 9: 50 ; लूका 9:34, 35)

13 तुसां धेरतर लुनथ: पण अगर लुनेरो लुनार मुकी गाहे त तैन कौस्सैहीं लुनु बनते फिरी तैन कोंची कम्मेरु न राहे: सुवाए बैरोहुं शारनेरां ते लोकेरे पावेइं सैहीं दलेंचोंतु राहे।¹⁴ तुस दुनियारी लोअथ: पहाड़े पुड़ चमकतो शहारा कधै छैपी न सखे।¹⁵ दियो बैलता ओडकतां न छडन: पण तैस उची ठैरी रखतन ताके तै घररे सैरी मैन्ह लो पुजे।¹⁶ ते एंचरे तुशी लो मैन्हुं केरे सामने एरही चमके, ताके तैना तुशां रोड़ां कम्मा हेरतां तुशै असमानी बाजेरी तारिफ केरन।

व्यवस्थारी तालीम

17 ऐन न बुझथ की आंव तुवारित या नैबन रद्द केरने एउरोइं: आंव तैन रद्द केरने नैइं बलके जैन नेबैइं जौवरु थुं, तैन पुरु केरने एवरोइं।¹⁸ किजोकी आंव तुसन सैहीं सच्च जोताइं की जां तत्र धरती आम्बर खतम न भोए, तां तत्र बचनेरो लिखोरो अक लफज भी न टलेल्हो? जां तत्र सभ किछ लिखेरु पुरु न भोए।¹⁹ एल्हेरेलेइ जै कोई इन निकडे जैरे हुकमन मैरां केंची एकी जैरे टलोडते ते होरन भी एन्ने केरनु शिखालते तै परमेशरेरी बादशैही मां सैभन कैरां निकडो भौल्हो, पण जै तैन हुकमन पुड़ अमल केरते ते होरन भी एन हुकमन पुड़ चलनेरु ज्ञान देते त तै असमानेरी बादशैही मां सैभन कैरां बड्डो भौल्हो।²⁰ किजोकी आंव तुसन जोतां की जां तत्र तुशी जिंदगी व्यवस्था मन्ने बालन ते फ्रिस्न कैरां रोडी न भोए: तां तत्र तुस असमानेरी बादशैही मां दाखल न भोई सखथ।

सरक ते मौत

21 तुसैहीं शुनेरु थुं की पुराने जमानेरे लोकन सैहीं जौवरु थुं, की खुंन नैइं केरनो अगर जै खुंन कैरेल्हो त तैस आदालत सजाह दैल्ही।²² पण मेरु जौनु ऐने की जै कोई अपने दूलाए पुड़ बिलाउजा क्रोध केरते त तैस भी आदालती मां सजहा मैल्हेली: ते जै कोई अपने दूलाए जो गैई देते त तैसभी आदालती मां जुवाब देनो पेनोए ते जै कोई अपने दूलाए जो बुरु जौल्हो त तै भी नर्केरी अगरो हकदार भौल्हो।²³ अगर परमेशरे का तीं अपनी चडतल चहडते बार याद एजे की मीं अपने दूलाए सैहीं किछ गिलोए।²⁴ त तु अपनी चडतल तैड़ी जैरे छेडतां पैहिले अपने दूलाए सैहीं मलाप कैरां फिरी अपनी चडतल चैहदां।²⁵ अगर कोई मैन्हुं तीं पुड़ दाओ केरतां तीं आदालती मां नैनो चहते त तु बत्ते तैस्सैहीं सुल्हा कैरां ना त तैनी तु मुन्फे का खडो केरनोस ते तैनी तु सिपैहीएरे हवाले केरनोस ते सिपैहिए तु कैद केरतां छडनोस।²⁶ आंव तुसन सैहीं सच्च जोतां की जां तत्र तु अपनो जुमानो अक अक पैइंसो न दैल्हो तां तत्र तैठां छुटी न बटेल्हो।

जनाह

27 तुसैइं शुनेरु थुं की जौउरु थुं की जन्हा नैइं केरनो।²⁸ पण आंव तुसन सैहीं जोतां की जै कोई केंची कौन्शी पुड़ गैन्दी नजरां सैहीं तकते तैनी अपने दिले मां पैहिले तैस्सैहीं जन्हा केरी छड्डो।²⁹ एल्हेरेलेइ अगर तेरी दैहिनी अछ तेरे लेइ पापरी ठोकर बन्चे त तैस कैदतां छड, किजोकी तेरे लेइ एन्ने रोडुए, की तेरी जानी मैरां अक अक पापरी ठोकर घटती गाहे ते तेरी जान नर्के मां गहने कैरां बन्चे।³⁰ अगर तेरो दैहिनो हथ पाप केरते त तैस केदतां छड: किजोकी तेरे लेइ एन्ने रोडुए की तेरी जानी मैरां अक अक पापरी ठोकर घटती गाहे ते तेरी जान नर्के मां गहने कैरां बन्चे।

फारखति

(मत्ती 19: 9; मरकुस 10: 11,12; लूका 16:18)

31 ऐन भी जेवरु थुं की जै कोई अपनी कौन्श शारे त ऐन जरुरीए की फारखती लिखतां हावाले केरे।³² पण आंव तुसन सैहीं जोतां की जै कोई अपनी कौन्शी बगैर केंची गैल्तरे फारखती लिखतां देते त तै तैस सैहीं जन्हा केरते या जै कोई शैरोरी कौन्शी सैहीं डलहा केरते त तै भी तैस्सैहीं जन्हा केरते।

कसम

33 तुसैहीं शुनेरु थुं की पुराने जमाने मां लोकन सैहीं जौवरु थुं की झुठी कसम नैइं केरनी: अगर परमेशरेरी कसम खाथ त तैस पुरी केरथ।³⁴ पण आंव तुसन सैहीं जोतां की कधै कसम न केरथ: न असमानेरी किजोकी तै प्रभु परमेशरेरो तखते।³⁵ न जमिनरी किजोकी तै परमेशरेरी पावां केरी चौक्कीए ते न युरोशलमेरी किजोकी तै बुजुर्ग बादशाहां केरो ते नेबी केरो शाहरे।³⁶ ते न अपने दौगैरी कसम केरथ किजोकी तुस अपनो अक बाल भी छीतो या कालो न केरी सखथ।³⁷ पण हांपरी ठैरी हां ते नापरी ठैरी न जोथ: किजोकी एस्केरां जादे जौनु शैतानी कम्मे।

बदलो

(लूका 6 : 29, 30)

38 तुस्सैहीं शुनेरुए की जौवरु थुं की: अछरे बदले अछ ते दंतरे बदले दंत।³⁹ पण आंव तुसन सैहीं जोतां की जानरो मुकाबलो न केरथ: अगर कोई तेरे दैहिनी खैखोडी पुड़ थपुड बाहेलो त तु बाओं पासो भी तैसेरे पासे रेख्खां।⁴⁰ ते अगर कोई दाओं केरतां तेरी कमिच नैनी चाहे त तु कोट भी तैसेरे हवाले कैरां।⁴¹ अगर कोई तुसन भारो छूने अक मील नैने चाहे त तुस दुई मील गैहीयथ।⁴² जै कोई तुसन कैरां किछ मग्गे तैस जरुर दैइयथ ते जै कोई तुसन कैरां पैइंसे मग्गे त तुत्र न फरेइयथ।

दुशमन सैहीं प्यार (लूका 6 : 27, 28, 32-36)

43 तुसैइं शुंनरु थुं की जोवरु थुं: की अपने पुड़ौसी सैहीं मुहाबत केरथ ते दुशमने सैहीं बैर रेखथ। 44 पण आंव तुसन सैहीं जोतां की अपने दुशमने सैहीं मुहाबत रेखथ ते जैना तुसन सतातन तैन केरे लेइ दुआ केरथ। 45 ताके तुस अपने असमानी बाजी केरां मड्डां बेनी सखथ जै अपनो दिहाडो अपने रोड़े लोकन पुड़ चमकाते ते बुरे लोकन पुड़ भी ते धेर्मी लोकन पुड़ झड़ी देते ते बुरे लोकन पुड़ भी। 46 अगर तुस सिर्फ तेने सैहीं मुहाबत रखतथ जैना तुसन सैहीं मुहाबत रखतन त तुसन कुन फल मैल्लोए? कुन सुद खाने बाले भी ऐने न कमान?

47 अगर तुस अपने दूलांन जो नमसकार केरतथ त कुन तुस होरन केरां जादे केरतथ? कुन गैर युहूदी भी ऐन न केरन? 48 बसा तुस पबित्र साफ बना किजोकी तुशौ असमानी बाजी भी पबित्र साफे।

दान

6 खबरदार अपनो धर्मो फर्ज सिर्फ लोकन हरानेरे लेइ न केरा किजोकी तुशौ प्रभु परमेशर तुसन कोई फल न दैल्लो।
2 पण जैखन तु बंदगी दैस त तु दुंदूरो न देइयां जैचरे होरे लोक मन्दिरन मां ते गेलन मां केरतन ताके लोक तैन्केरी तारीफ केरन, आंव तुसन सैहीं जोतां की जै फल तैन मैल्लो थु त तै तैन मैल्लो जेव। 3 दान दैते बार जैन किछ तु अपने दैहिने हथे सैहीं दैस त बाएं हथे पत्तो न लोड़े। 4 ताके तेरी बंदगी सुफल भोए: तैखन तेरो प्रभु परमेशर जै हर बखत तीं तक्तो, रहते तीं फल दैल्लो।

प्रार्थना

(लूका 11: 2-4)

5 जैखन तु दुआ केरस त होरी लोकां केरो जैरो न बेना: जैना मन्दिरन मां ते बजारां केरे मोड़न पुड़ खेड़ौहितां दुआ केरनी सुखात्न ताके लोक तैन तकन: ते आंव तुसन सैहीं जोतां की जै फल तैन मैल्लो लोड़तो थु, त तै तैन मैल्लो जेव। 6 पण जैखन तु दुआ केरस त अपने अंत्र गैहियां ते दार बंद केरतां अपने प्रभु परमेशरे का जै नजरी केरां बेइरे तैसका दुवा केरां, तैखन तेरो परमेशर जै अलैहियांते परमेशरे, जै हर बखत तीं तक्तो रहते तीं फल दैल्लो। 7 ते जैखन तु दुआ केरस त गैर युहूदी केरु जैरु बक बक न केरां, ते बेड़ी हेछी गल्लां बार बार न दौरेहियां, किजोकी लोक ऐन बुझतन की ऐनकेरे हछु जौने सैहीं परमेशर ऐनकेरी जादे शुंनते। 8 तैनकेरे जैरे न बेनथ: किजोकी तुशौ प्रभु परमेशर तुशौ मगने केरां पैहिले तुशी जुरुरतां जानते।

9 पण तुसां एंचरे दुआ केरथ: एह मेरे बाजी, तु जै आस्माने महांस, तेरु नोवं पबित्र मन्नु गाहे।

10 तेरी बादशाही एजे: तेरी मर्जी जैरी असमाने मां पुरी भोचे, इस जमिनी पुड़ भी भोए।

11 इशी रोजैरी रौट्टी आज्ञ असंन दे।

12 ते जैचरे असां अपने कर्जदारन कर्जो माफ केरतम, तु भी इशो कर्जो माफ केरां।

13 इशी आज्ञमैइश न केरां, पण बुरैई केरां बचैयां, किजोकी बादशाही कुदरत ते महिमा सादा तेरी भौती राहे आंमीन"।

14 अगर तुस लोकां केरे कुसुर माफ कैरेल्ले त तुशौ अस्मानी बाजी भी तुशौ कुसुर माफ कैरेल्लो। 15 ते अगर तुस लोकां केरे कुसुर माफ न कैरेल्ले त तुशौ अस्मानी बाजी भी तुशौ कुसुर माफ न कैरेल्लो।

बरत

16 जैखन तुस ब्रत रखेले त होरी लोकां केरु जैरु आपनु तुत्र न बगोइथ: ताके लोकन पत्तो न लगे की ऐनेइं अज ब्रत रखेरुए, आंव तुसन सैहीं सच्च जोतां की जै फल तैन मैल्लो थु तैन मैल्लो जेव। 17 बलके जैखन तु ब्रत रखस त अपनु तुत्र धौइयां ते दौगे तेल मेल्लां। 18 ताके लोकन नैइं पण तेरो

अस्मानी बाजी, जै नजरी न एजे तै लाहे की ऐनी ब्रत रखेरुए तै तीं फल दैल्लो।

सुवर्गारी दौलत

(लूका 12: 33, 34)

19 एपु जेइ जमिनी पुड़ जैइदात जमहां न केरां, जैड़ी कीडो ते मोरचो लगते, ते चौर चौराी केरतां घिनी गहते। 20 बलके अपने लेइ असमाने पुड़ जैइदात जमहां केरां जैड़ी न कीडो लगे ते न मोरचो लगे ते न चारे चोरी केरोए। 21 ते जैड़ी तेरो माल ते जैइदात भोली, तैड़ी तेरो दिल भी लगेल्लो।

जिसमेरी लो

(लूका 11: 34-36)

22 अछ जानरो अक दियोए: एल्लेरेलेई अगर तेरी अछ रोड़ी साफे त तेरी सारी जान जैचरे अक दिहाडोए। 23 अगर तेरी अछ खराबे त सैरी जानी मां अंधरुए: बस अगर तेरे अंत्र लोए अंधरु बेनी गाहे त तैन कैनु बडु अंधरु भौल्लु।

परमेशर ते दौलत

(लूका 16: 13; 12: 22-31)

24 कोई मैनुं दुई मालकां केरी सेवा न केरी बटे: या त एकी सैहीं दुशमनी कैरेल्लो ते होरी सैहीं दौस्ती रखेल्लो या एकेरो बेनतां राहेलो या होरी सैयां न सुखाल्लो तुस परमेशरेरी ते दौवलतरी दुइयां केरी सेवा न केरी सखथ। 25 एल्लेरे लेई की आंव तुसन सैहीं जोतांइ की न तुस एपनी जानरी फिक्र केरा की तुस कुन खाल्ले या कुन पिल्ले, ते न एपनी जानरी की कुन लामैल्ले? कुन जान रौट्टी केरां ते कुन जिस्म लिगड़े केरां बैधतां नैइं? 26 उडरने बाले चूडोलन हेरा; जैना ना किछ बेंन ते ना किछ केरतां आंन्ह जांमहां केरतां रखन, फिरी भी तुशौ परमेशर तैन कैरी हेर गैश केरते; कुन तुशी कदर तैन केरां जादे नेही? 27 तुसन मां कौन एरहो जैरोए जै फिक्र केरतां अपनी ऊमर अक घडी भी बधैई सखते?

28 लिगड़े लेइ कीजो फिक्र केरतथ? जंगले मां सोस्नेरे फुडू केरां हेरा की तैना कैचरे बेडोतन; न तैना मैहन्त केरन ते न तैना कत्तन। 29 फिर भी आंव तुसन सैहीं जोतांइ की सुलैमान भी एपनी सैरी शानो शोकतरे बावजुद भी तैन केरो जैरो न थु। 30 जैखन परमेशर मैइदानेरो घास जै अजै ते कालां लौउने मां फुकनोए; एरहु लिगड़ दैल्लो; घट विश्वासे बालाव कुन तुसन लिगड़ न दैल्लो।

31 किजोकी तुस फिक्र केरतां ऐन न जोयथ, की कुन खामैल्ले, या कुन पिंमैल्ले, या कुन लामैल्ले? 32 किजोकी होरी कौमां ऐन गल्लां केरी फिकरी मां रेहिचन, ते तुशो असमानी बाजी जानते, की तुस्न इन गल्लां केरी जरुरते। 33 पण पैहिले परमेशरेरी बादशैहीयरी ते रहस्बेजारी तलाश केरा त बाकी चीजां भी तुसन मैल्लो गैहेली। 34 ते कालेरे लेई फिक्र न केरथ, किजोकी कालेरो दिहाडो अपने लेई एपू फिक्र केरेलो; अजैरे लेई अजैरो दुःख बडोए।

होर्न पुड़ दोष नैइं लानो

(लूका 6: 37, 38, 41, 42)

7 केंची दोष न लैइयथ तुसन भी दौष न लगैल्लो। 2 किजोकी जैचरे तुस होरी दौष लाएल्ले तैचरे तुसन भी दौष लगनोए ते जैस हैटी सैहीं तुस नापतथ तैस्से हैटी सैहीं तुशे लेइ भी नापु गाहेल्लु।

3 तु अपने दूलाएरी ऐछी मां कुडो कीजो तकतां ते तेरी ऐछी मां त बडी कडीए तैसेरो तु खियाले न केरस? 4 जद तेरी ऐछी मां कडीए त तु कौस ऐशी सैहीं अपने दूलाए जो जौइ सखतां की ई आंव तेरी ऐछी मैरां कुडो कैदी? 5 औ मैन्हां पैहिले एपनी ऐछी मैरां कुडो कढ फिरी अपने दूलाएरी ऐछी मैरां रोड़े चारे तेकतां कुडो कैदी सखत्स।

6 पबित्र चीज कुतरन न देथ ते अपने मौती सुसन अगर न छेडथ एरहु न भोए की तैना पाउन हैठ दलोतन ते तुसन भी दलन।

मगले त मैल्लेहू (लूका 11 : 9-13)

7 मगलेह त तुसन दीतु गाहेल्लु, ते तौपैल्लेह त तुसन मैल्लेहगाहेल्लु, ते दार गुडकाल्लेह त तुशे लेइ खोलु गाहेल्लु। 8 किजोकी जै कोई मगते तैस मैल्ले, जै कोई तौसे तैस मैल्लेह गहते ते जै कोई दार गुडकाते त तैसरे लेइ खोलु गहते।

9 तुसन मां ऐरहो कौने; की अगर तैसरु मड्डु रौड्डी मगते त तैस घाड दे। 10 ते या अगर मछली मगते त सप दे? 11 तुस बुरे भोनेरे बावजुद भी अपने मड्डुन रोडी चिजां देनी ज्ञानतथ त तुशौ परमेशर तैन जैना तैस कैरां मगत्न त तुसन रोडी चीजां की न दैल्लो ? 12 बस्सा जेरु तुस चहतथ की लोक तुसन सैहीं केरन, तुस भी तैन सैहीं तैरु केरा किजोकी शैस्त्री केरी त नेबी केरी एहे शिक्षा थी।

सुन्कडी बत ते खुल्लेह बत (लूका 13: 24)

13 तंग दारेरां बत्तां अंतर गाथ किजोकी तैन दार खुल्लुए ते बत्त भी बडी हेरनी रोडीए, जै मौउतरे पासे गहचे ते तैस बत्तां गहने बाले बडेन। 14 किजोकी तैन दार साँकडुए ते तै बत्त आसुखतीए जै जिन्दगरे पासे गहचे ते तैरां गहने बाले भी थौडेन।

जेरहो बुट तेरहो फल (लूका 6:43,44 , 46; 13: 25- 27)

15 झुठे नेबन कैरां खबरदार रहियथ: तैना तुसन का भैदां केरे रुपे मां एइतन पण असली मां मारने बाले गिदां भोतन। 16 तुसां तैनकेरे फले सैहीं तैन पशानैल्लेह: कुन लोक झलन सैहींयेरां दाछ कढतन ते बुटन सैहींयेरां फेगु टलोडतन? 17 एल्लेरेलेइ हर एकी रोडे बुट्टे रोडो फल लगते ते हर एकी बुरे बुट्टे बुरो फल लगते। 18 न रोडे बुट्टे बुरो फल लगते ते न बुरे बुट्टे रोडो फल लगते। 19 ते तैस बुट्टे जैस रोडो फल न लगते तै केटतां लोउने मां फुकतां छडतन। 20 बस्सा तुस झुठे नेबन तैनकेरे फले सैहीं पशानैल्लेह।

21 मीजो एह परमेशरे हे परमेशर जौने बाले सारे मैन्हुं सुमरी बादशैही मां दाखल न भौल्लेह; पण जै, मेरे असमानी बौवेरी मेर्जी पुड चलने बाले जुरुर दाखल भौल्लेह। 22 तैस दिहेडी काही लोक मीं सैहीं जौल्लेह की एह परमेशरे हे परमेशर कुन असैइं तेरे नोवें सैहीं नुबुत नैइं कियोरी? ते तेरे नोवें सैहीं दुष्टात्मां नैइं केडौरी ते तेरे नोवें सैहीं अजीब अजीब चमत्कार नैइं हैरवरे? 23 तैखन आंव तैन जो साफ जौल्लेहो आंव तुसन कधै न जैनी: एह बैइमानव मेरे तुत्र अग्र दुर भौथ।

घर बनाने बाले दुइय मैन्हुं: अकमन्द ते बेवकूफ (लूका 6: 47- 49)

24 पण जै मेरी गल्लां शुंनते ते तैन पुड अमल केरते तै तैस अकलमंद मैन्हेरो जैरो भौल्लेहो; जैनी अपनु घर पैक्की ठैरी बनेवरुए। 25 झड्डी लग्गी ते हडाई आई अंधगुबारी भुई ते हडाई तैस घरे पुड पुजी; पण तैन घर न डुल्लू: किजोकी तैसेरी मुनियाद पैक्की शाफडी पुड कड्डीरी थी। 26 पण जै मेरी गल्लां शुंनते ते तैन पुड अमल न केरे, त तै तैस बैउकूफ मैन्हेरो जैरोए भौल्लेहो: जैनी आपनु घर रैती पुड बनैवरु थुं। 27 झड्डी लग्गी हडाई आई अंधगुबारी भुई ते हडाई तैस घरे का पुजी ते तैन घर डुल्लू जेवं ते बरबाद भोवं।

28 जैखन यीशुए एना सैरी गल्लां शुंनते झड्डी त सारे लोक तैसेरी शिक्षाई सैहीं हेरान रेही जे। 29 किजोकी यीशु तैन तैनकेरे धर्म गुरु केरो जैरो नैइं बलके बडे आख्तीयारे सैहीं तैन शिक्षा देतो थु।

कोडी बज्जानो (मरकुस 1: 40 - 45 लूका 5: 12-16)

8 जैखन यीशु पहाडे पुडेरं ऊन्डौ आव त बडे लोक तैस सैहीं साथी सपती चले। 2 तैखन एके कौदें यीशु का एइतां मथौ टेको ते जौव: एह प्रभु: अगर तु चहस त मीं साफ केरी सखतस। 3 यीशुए अपनो हथ तैससैहीं

लाऊ ते जौव: आंव चहतां की तु साफ भोस, ते तै कौद्वी तैखने साफ भोई जेव। 4 तैखन यीशुए तैसजो जौव: खबरदार केंची सैहीं न जौइयां बलके अपनो आप परमेशरेरी सेवा केरने बाले पुरैहुते हेरेयां जै चढतल मुसै रखोरी थी तैस हवाले केर ताके लोकां केरेलेइ शाहादत भोए।

एकी सूबेदारो विश्वास (लूका 7: 1-10)

5 जैखन यीशु कफ्रनुहूम शहरे मां पुजो त रूमी फौउजरो आक आफसर यीशु का एइतां मिनत केरने लगो। 6 एह परमेशर मेरो नोकर फाल्जेरो मरीज घर बिमार भोवरोए ते तै बेडी तकलिफि मां हैं। 7 यीशुए तैस सैहीं जौव: आंव ऐजेल्हो ते तैस बड्डीइल्लो। 8 पण आफसर जौने लगो: एह परमेशर आंव एस काबले नैइं की तु मेरे अंत्र एजी सखस, पण तु अगर सिर्फ जबांन सैहीं जोस त मेरो नोकर बेझोइ सखते। 9 किजोकी आंव एपु होरीकेरे आधिने मां कम्म केरताइं ते सिपाही मेरे आधिने माहांन: ते जैखन आंव एकी जो जौतां की तु गा, त तै गहते ते होरी जो जौतां एई त तै ऐइते ते जैखन अपने नोकरे सैहीं किछ करने जो जौतां त तै केरते।

10 यीशु एन शुनतां बडो हैरान भोव ते पुतोरां एज्ने बाले मैन्हुं सैहीं जौने लगो आंव तुसन सैहीं सच जौतां की मीं ईस्त्राएले मां भी एत्रे विश्वासे बालो मैन्हुं नैइं लाहोरो। 11 आंव तुसन सैहीं सच जौतां की बडे लोक मशरकेरां ते मगबेरां एइतां आब्रहाम इजहाक ते याकुबे सैहीं साथी असमानी बादशैहीयरी धामी मां शामल भौल्लेह। 12 पण असमानी बादशैहीयरे बारस बैइर आंधरे मां छड्डील्ले जैडी तैना लेरां दंते ते दंत चापते राहेले। 13 ते यीशुए तैस आफसरे जो जौव: गा जैरो तेरो विश्वासे तेरे लेइ तैरहु भौल्लु, ते तैखने तैसेरो नोकर बैझोइ जेव।

बडे बिमैरे केरे रोगी बज्जाने (मरकुस 1: 29- 34 लूका 4: 38-41)

14 जैखन यीशु पतरसेरे घरे जेव त पतरसेरी शिख भुखारे सैहीं कैसरोरी खट्टी पुड झुलोरी मैल्लेह। 15 यीशुए तैसारो हथ टलातो ते तैखने तैसारो भुखार उत्री जेव; ते तै खडी उठतां यीशुएरी सेवा केरने लगो। 16 जैखन ड्लौवझ भुई त लोकेइं काही बिमार: जैन मां दुष्टात्मां थी ते तैसका आन्हें ते यीशुए तैना सारे बिमार बज्जाने। 17 ताके इसाया नैबेरी जौवरी तै गल पुरी भोए की तैनी एपु इशी कमजोरी हटेई ते इशी बिमैरी भी मुकेइ।

यीशु एरे चले बननेरो मतलब (लूका 9: 57-62)

18 यीशुए अपने चौवरे पासन हछे लोक लैहितां अपने चलन डल्लेरे पार गहनेरो हुकम दितो। 19 ते अक बडो मैन्हुं धर्म शास्त्र जांने बालो तैसका एइतां जौने लगो: एह गुरु तु जैरहां भी गाल्लो त आंव तेरी सेवा केरेल्लो। 20 यीशुए तैसजो जौव: लौई केरी कुड्ढां ते चडौलु केरे आल्ले भोत्न, पण मैन्हेरे मट्टेरे लेइ कोई ठार नैइं जैडी तै करोडी छपैइ बटे। 21 चलन मेरां एके यीशु सैहीं जौव: औ प्रभु मीं हुकम दे आंव गैहीतां अपने बाजी देबतां ऐर्जी। 22 यीशुए तैसजो जौव: तु मीं सैहीं साथी चल ते मुडदन अपने मुडदे एपु दबने दे।

तूफान रोकनो (मरकुस 4: 35 - 41; लूका 8:22-25)

23 ते जैखन यीशु किशती पुड चडौ त तैसेरे चले भी तैससैहीं साथी चले। 24 ते अचानक झिली मां अक बडो तौफान आंव ते किशती छेल्हेइं सैहीं छेपी जेई ते यीशु तैसमा झूलोरो थु। 25 चेलेइ एइतां यीशु बिज्जाने ते जौव: औ प्रभु: असन बचा असां त डूबने लोरंम। 26 यीशुए जुवाब दितो: औ घट विश्वासे बालाउ: तुस कीजो डरतथ तैखन तैनी खडे उठतां हवाई त तौफानेरी छेल्ह जो धमकैइतां जौव: रुकी गाथ तैखने तौफान रुकी जेव। 27 लोक हैरान भोइतां जौने लगे: एह कौस किस्मेरो मैन्हुंए की हावा त पानी भी ऐसेरो हुकम मनतन।

दुष्टात्माई बालो मैंन्हू बझानों (मरकुस 5: 1 - 20; लूका 8:26-39)

28 ज़ैखन तै झिली पार गदरेंनी केरे अलाके मां पुजो त दुई मैंन्हू जैन मां दुष्टात्मा थी, कब्रस्ताने मैरां निस्तां तैनका आए: तैना एतरे निग्र थिये की कोइ तैस बत्तां निसी न थु बटतो। 29 तैना जोरे जोरे चिंटां लगे मारने ते ज़ोने लगे: एह परमेशेरा मट्टा: तीं असन सैहीं कुन कम्मे? तु मोके कैरां पैहिले असन क्रके मां छडने एवरोस? 30 तैन्केरां दुर अक बडो घांन सुरां केरो चरने लोरो थु। 31 दुष्टात्माएइं यीशु का मिनत केरतां ज़ोव: अगर तु असन कढने चहतां त उन सुरां केरे घांने मैझो भेज। 32 तैखन यीशुएं ज़ोव: गाथ, ते तैना दुष्टात्मा तैटां निस्तां तैन सुरां केरे घांने मां जेइ ते सुरां केरो सारो घांन उछडतो उछडतो डल्हे मां गैहीतां सारे सुर मैरी जे। 33 तैखन सुर चारने बालेइं शहरे मां गैहितां लोकन सैहीं सारो बिस्तार दितो ज़ैन मां दुष्टात्मा थी तैन्केरो हाल भी शुंनाव। 34 तैस शाहरेरे सारे लोक यीशु सैहीं मिलनेरे लेइ आए ते यीशु लैहितां लोक मिनत केरतां ज़ोने लगे ईशै अलाके मैरां चलो गा।

अधरंगी मैंन्हू बझानो

(मरकुस 2: 1 - 12; लूका 5:17-26)

9 फिरी यीशु किशती मां चैदतां देरयाए पार जो जेव, ते अपने शहरे मां पुजो। 2 किछ मैंन्हेंइ अक अधरंगी मैंन्हू खटी पुड़ छुइतां आन्हों: ज़ैखन यीशुए तैनकेरो विश्वास हेरो त तैस आध्रंगी मैंन्हू जो ज़ोव: मट्टा, गा विश्वास रख तेरे पाप माफ़ भुए। 3 ऐस गल्ली पुड़ धर्म गुरु अपने दिले मां ज़ोने लगे की एह त परमेशेरी तौहिन केरते। 4 यीशुए तैनकेरी दिलेरी गल्लां बुझतां तैन जो ज़ोव: तुसां अपने दिले मां बुरी गल्लां किजो सोचतथ? 5 ऐन ज़ोनु कुन सुखतुए की गा तेरे पाप माफ़ भुए: या ऐन ज़ोनु की उठ ते चल? 6 पण तुसन पत्तो लगे की मैंन्हेरे मट्टे जमिनी पुड़ पाप माफ़ केरनेरो अख्तीयारे; तैखन तैनी तैस आध्रंगी मैंन्हू जो हुक्म दितो अपनी खट सलह ते घर जो चलो गा। 7 तै आध्रंगी मैंन्हू अपनी खट सैलहतां घरजो चलो जेव। 8 ज़ैखन लोकेइं एह तमाशो हेरो त तैना डेरी जे ते परमेशेरी तरीफ केरने लगे: की ज़ैनी मैंन्हू एत्रो अख्तीयार दितोरोए।

मत्ती कुजानो

(मरकुस 2: 13- 17; लूका 5:27-32)

9 ज़ैखन यीशु तैट्ठां अग्रोहू चलो त तैनी अक मैंन्हू मत्ती नोवेरो धडत घिन्ने बालो एपनी चौक्की पुड़ बिशोरो लाहू: ते यीशुए तैसजो ज़ोव; की तु मीं सैहीं साथी चल; मत्ती तैखने यीशु सैहीं साथी चलो जेव। 10 ज़ैखन यीशु मैत्तरे घरे मां गैहितां रौट्टी खाने बीशो त काही धडत घिन्ने बाले ते पापी लोक भी आए ते यीशु त तैसेरे चलन सैहीं साथी रौट्टी खाने बिशै। 11 ज़ैखन फ़िसैइं ऐन हेरू त यीशुएरे चलन सैहीं ज़ोव; की तुशो गुरु धडत घिन्ने बाले ते पैपी लोकन सैहीं साथी रौट्टी किजो खाते। 12 यीशुए तैनकेरो सुवाल शुनतां ज़ोव; सझर लोकन दुवैइयरी ज़रुरत न भोए; पण बिमारन दुवैइयरी ज़रुरत भोचे। 13 फिर भी तुस गैहितां एस गल्लरो मत्तलब कडा की; आंव सूखन नैइं बलके रेहेंम दिल पसंद केरतांइ; किजोकी आंव धैर्मन नैइं बलके पैपन कुजाने एवरोइं।

बर्तेरो सुवाल

(मरकुस 2: 18- 22; लूका 5:33-39)

14 तैखन युहात्रेरे चले यीशु का एइतां ज़ोने लगे की कुन वजाहे की आस फ़िसी त ब्रत रखतम, पण तेरे चले न रखन? 15 यीशुए तैन सैहीं ज़ोव; कुन ज़ैन लाडो साथी भोए त शौग बनैइ सखत्न? पण तै मोको भी ऐजैल्हो की लाडो तैन्केरां अलग भौल्हो त तैखन तैना शौग बनैइ सखत्न। 16 पुराने लिगड़े पुड़ नोवें कपडेरी टलोई कोई न लान; किजोकी नोवों कपडो तैस पुराने कपडे मैरां किछ खिचते ते तै जादे छिंदोते। 17 एचरे नोवों दाखरस पुरेनी दाखरसी मां न छडन किजोकी मस्क फैट्टी गहचे ते दाखरस ज़ैया भोई

गहते ते मस्क भी कौंची कम्मेरी न राहे; एल्हेरेलेई नोवों दाखरस नोवीं मसकी मां छडतन ताके दुइये सैथी रहन।

फटरी कूइय ते बीमार कौन्श

(मरकुस 5: 21- 43; लूका 40-56)

18 यीशु ऐन गल्लां हेजु मस्सां ज़ोने लोरो थु, त प्राथना भवनेरो आक सेवक आव ते यीशु का मथौ टकतां ज़ोने लगे; मेरी कुई हुन्ना मैरी जेवरिए; पण तु अगर एइतां तैस पुड़ हथ रखस त तै हुन्ना बेझांचे। 19 यीशु तैस्सैहीं साथी चलो जेव, ते चले भी तैस्सैहीं साथी जे। 20 ते एरहु भोव की अक कौन्श ज़ैस बहरे सालां केरो देंतो खुन चलतो थु; तैसां यीशु पतपत्ती एइतां तैसेरे चोगे सैहीं हथ लाव। 21 किजोकी तै अपने दिले मां ऐन जोती थी की अगर आंव यीशुएरे लिगड़े सैहीं हथ लाएल्ही त आंव ठीक भोइ गहनी। 22 यीशुएरे पेरतोइतां तैस कौन्शरे पासे तक्कु ते ज़ोव; कुईये विश्वास रख; तेरे विश्वासे सैहीं तु ठीक भोउरिस; ते तै तैखने ठीक भोई जेइ। 23 ज़ैखन यीशु तैस सेवकेरे घरे पुजे त नगारो बजाते ते लोक लेरां देंते लाहे। 24 यीशुए ज़ोव; दुर भौथ किजोकी कुई मुऔरी नैइं, पण झूलोरीए; ते तैना लोक हसन लगे। 25 ज़ैखन लोक तैट्ठां दुर कढे त यीशुए अत्र गैहितां कुईयोरो हथ ट्लाव त तै खडी उट्टी। 26 ते एस गल्लरी खबर सारे अलाके मां फैली जेई।

दूइय अंधे मैंन्हू बझाने

27 ज़ैखन यीशु तैट्ठां आग्रोहू चलो त दुई काने तैस पत्ती चिंटां मारते ज़ोने लगे; ऐह दाउदेरा मट्टा असन पुड़ तरस केर। 28 ज़ैखन यीशु घरे अत्र जेव त तैना काने तैसका आए ते तैनी तैन पुछू; कुन तुसन यकीने की आंव तुसन ठीक केरी सख्ताइं? तैनेइं जुवाब दितो हां परमेशर"। 29 तैखन यीशुए तैनकेरी एछन सैहीं हथ लाव ते ज़ोव; तुशै विश्वास केरने सैहीं तुस ठीक भौथ। 30 ते तैनकेरी ऐछी खुल्ही जेई; ते यीशुए तैन रोडे चारे समझैइतां ज़ोव; खबरदार एस गल्लरो पत्तो केंची न लोडे। 31 पण ज़ैखन तैना बेइर निसे त तैनेइं सारे अलाके मां एस चमतकारेरे बारे मां ज़ोव।

अक लट्टो बझानो

32 ज़ैखन यीशु बेइर चलोरो थियो त लोकेइं अक लट्टो तैसका आन्हों ज़ैसमां दुष्टात्मा थी। 33 ते ज़ैखन दुष्टात्मा तेस्मेरां कढी ता लट्टो गल्लां केरने लगे, लोक बडे हेरान भोई जे ते ज़ोने लगे; एरहो जेरहो माजरो इसराइले मां पेहिले कधे नेहीं लाहोरो। 34 पण फ़िसी ज़ोने लगे: की एह त दुष्टात्मा केरे गुरेरी करतूती सैहीं दुष्टात्मा कढते।

मज़दूर थोडेन

35 यीशु सारे अलाके मां ते डलांवन मां ते मन्दिरन मां गैहितां परमेशेरी बादशैहीयरी खुशखबरी शुनतां थु, ते लोकन तैनकेरी बिमैरन कैरां छुटातो थु। 36 ज़ैखन यीशुए बडे एरहे ज़ैरे लोक लाहे त तैस तैन पुड़ बडी तरस आई; किजोकी तैना तैन भैड्डां केरे ज़ैरे थिये ज़ैनकेरो कोई पुहाल न भोए; तैनकेरो बडो बुरो हाल ते छिछलारे थिये। 37 तैखन यीशुए अपने चलन सैहीं ज़ोव; फसल त बडीए, पण मुजुर थौडेन। 38 एल्हेरेलेई तुस फसलरे मालके का मिनत केरा की तै अपनी फसल कटनेरे लेइ होरे मुजुर भेजे।

यीशु एरे बहरे चले

(मरकुस 3: 13-19; लूका 6: 12- 16)

10 फिरी यीशुए अपने बहरे चले एपु का कुजाए ते तैन दुष्टात्मा कढनेरो ते हर बिमैरी ते तकलिफां दुर केरनेरो आधिकार दितो।

2 ते बहरे चलां कैरां नोवां इन थियां शुमौन ज़ैसजो पतरस जोते थिये, ते तैसेरो द्ला अन्ड्रियास जेबदेरु मड्डु याकुब तैसेरो द्ला युहन्ना। 3 फिलपुस तोमां मत्ती धडत घिन्ने बालो। 4 हँल्फेरु मड्डु याकुब ते तद्दी ते शुमौन ते कणानी ते युहूदा आस्क्रयुती ज़ैनी यीशु टलुवेउरो थु।

बहरे चैलां केरु सेवारु कम्म

(मरकुस 6: 7-13 ; लूका 9: 1-6; 10: 4-12)

5 ऐन बहरे चैले ऐन जोइतां भेजे की गैर युहूदी कौमा केरे पासे न गैहियथ ते कने सैमरी केरे केंची शहरे मां न गैहियथ। 6 बल्के ईसाएलेरे घरांनेरी हैरोरी भैडुन का गैहियथ। 7 ते चलते चलते ऐन जोते गैहियथ की अस्मानेरी बादशाही नेडे एवरीए। 8 बिमारन शिफा देइयथ ते मुडदन जिंते केरथ ते कौदी केरु कौढ साफ केरथ; ते दुघाल्मा कैढथ; तुसन ऐन सभ किछ मुफ्त मैल्हेरुए ते मुफ्त देइयथ। 9 अपने लख्खे मां साथी सौन्नु चांदी ते पैइसे न रेखथ। 10 ते न बत्तरे लेइ झोलो नैहियथ ते न दुई दुई लिगड़ां ते न बूट ते न सोटी; किजोकी मुजुर अपनी मुजुरारो हकदार भोते।

11 जैखन तुस केंची शहरे मां या ड्लोउवें मां गाथ त तुस एरहे मैन्हेंरो पत्तो केरथ जैस पुड तुसन अतबार भोए: तैड्डां जां तग्र गहंनेरो मोको न एजे त तां तग्र तैडी तैस्से का रेहियथ। 12 केंची घरे मां अंत्र गहंते बार तैन जो आश्रिवाद देइयथ। 13 अगर तैन घर तुशै काबल भौलु त तुशु आश्रिवाद तैन पुजैल्हु: ते अगर तैन घर तुशै काबले न भौलु त तुशु आश्रिवाद तुसन का वापस एजैल्हु। 14 अगर कोई तुसन न सुखाल्हो ते तुशी गल्ल न मन्नैल्हो त तैस घरे या शहरे मैरां बेरोहु गहंते बार अपने पावां केरी धुड तैडी झैडथ। 15 आंव तुसन सैहीं सच जोतां की आदाल्तरे दिहाडे तैस शहरेरो हाल सादुंम अंमुरा अलाकेरे हाले कैरां जादे बुरो भौल्हो।

एजने बाली मसीबत

(मरकुस 13: 9-13; लूका 21-12-17)

16 हेरा आंव तुसन भैडडन डलाघन मां भेजने लोरोइ; एल्हेरेलेई तुस सप्पां केरे जैरे हुशियार ते कुबूत्रां केरे जैरे सादे बेनथ। 17 मैन्ह कैंरां हुशियार रेहियथ तैना तुसन टलेइतां आदालतन मां पैश कैरेल्हे ते मन्दिरेन मां तुसन कौडां केरी मार दैल्हे। 18 ते तुसन मेरी वजाही सैहीं हाकमन का ते बादशाहां केरे सामने हाजर कैरल्हे; ताके तैन मां ते गैर कौमन मां मेरे गुवाह बन्थ। 19 पण जैखन तैना टलुवेइतां हावाले कैरेल्हे त तुस फिक्र न केरथ; की आस कुन ज़ोमैल्हे ते केंचरे ज़ोमैल्हे किजोकी जैन किछ जांनु भौलु तैखने आंव तुसन जोइल्हो। 20 किजोकी जौने बाले तुस नैइं, बल्की तुशो बाजीएरी आल्मा तुसन मां जौल्ही।

21 द्दला, द्दलाए ते बाजी मड्डे, मारनेरे लेई सौंफेल्हे, ते मड्डां अपने अम्मा बाजी केरे खलाफ भोइतां तैन माराल्हे। 22 मेरे नोवेरे वजाही सैहीं सब लोक तुसन सैहीं बैर कैरल्हे, पण जै आखरी तग्र बरदाशत कैरेल्हो तैस्से मुखती मैल्हेली। 23 जैखन लोक तुसन केंची शहरे मां सताल्ले, त केंची होरि शहरे मैडो नैशी गैहियथ: आंव तुसन सैहीं सच जोतां की ऐस कैरां पैहिले तुस इस्राएलेरे सैरी शहरन मां गैहियथ, त मैन्हेरु मड्डु एजी गाहेलो।

24 चेलो अपने गुरु कैरां बडो नैइं; न नोकर अपने मालके कैरां। 25 चेलेरे लेइ त एन्ने बडुए की तै अपने गुरेरो जैरो भोए, ते नोकरेरे लेइ त एन्ने बडुए की तै अपने मालकेरे बराबर भोए; अगर तैनेइं मालके जो बुरु जौव; त तैसेरे घरे बालेइं त जादे बुरु जौनुएं।

कैस कैरां डरु लोडे ?

(लूका 12: 2-7)

26 तुस तैन कैरां न डेरथ, किजोकी कोई चिज ओडकोरी नैइं, जै खोल्ही न गाहेली; ते कोई चीज छप्पौरी नैइं जै बांदी न भौल्ही। 27 जैन किछ आंव तुसन सैहीं अंधेरे मां जोताइं, तुस तैन दिसां जोइयथ; ते जैन किछ तुशे कन्ने पत्र बल्हे सैहीं शुनावं गहते: तुस लाए पुड गैहितां तैसेरो प्रचार केरथ। 28 तुस तैन कैरां न डेरथ जैना जानी त मारतन, पण आल्मा न मैरी बटन, तैस कैरां डरा, जै आल्माइं ते जानी दुईने नाश केरी बटते। 29 कुन दुई पैइसां केरी चडोली न बिकन? फिरी भी तुशो बाजेरी मेरजरे बगैर तैन मैरां अक भी धेरती पुड न झेडी बटन। 30 तुशे दौगरे बाल भी गन्नोरेन। 31 एल्हेरेलेई डरा न; तुशी कदर बेडी चडोलन कैरां भी बडी जादे।

यीशु कबूल केनो या न कबूल केरनो

(लूका 12: 8-9)

32 जै कोई मैन्हुं केरे सामने मेरो ईक्रार केरते, त आंव भी अपने असमानी बाजी केरे सामने तैसेरो ईक्रार कैरेल्हो। 33 पण जै कोई मैन्हुं केरे सामने मेरो इनकार केरते; त आंव भी तैसेरो अपने असमानी बाजी केरे सामने इनकार कैरेल्हो।

यीशु एरे एजनेरे निशान

(लूका 12 : 51 -53 ; 14 : 26 , 27)

34 इन न सैमझथ कि आंव धेरती पुड मेल कराने एवरोइं; मेल केरने नैइं बल्के तलवार चलाने एवरोइं। 35 किजोकी आंव एल्हेरेलेई एवरोइं की मड्डे बौव्हे कैरां ते कुईये अम्मा कैरां ते नूशी शिखी कैरां अलग केरीं। 36 मैन्हेंरे दुश्मन त तैसेरे अपने घरेरे लोक भौनेन।

37 जै कोई अम्मा या बाजी मीं कैरां जादे टलारे समझते, तै मेरे काबले नैइं ते जै कोई मड्डे या कुईये मीं कैरां जादे समझते, तै मेरे काबल नैइं। 38 ते जै अपनी सलिब छुइतां मीं पत्ती न चले तै मेरे काबल नैइं। 39 जै अपनी जान बचानी चहते, तै तैस गुवांल्हो; ते जै मेरे वजाही सैहीं अपनी जान गुवांते, तै तैस हासल कैरेल्हो।

फल मैल्हो

(मरकुस 9: 41)

40 जै तुसन कुबूल केरते, तै मीं कुबूल केरते; ते जै मीं कुबूल केरते, तै मेरे भेजने बाले कुबूल केरते। 41 जै नेबी नबी सैमझतां कुबूल कैरेल्हो, तैस नेबेरो फल मैल्हेलो, ते जै धर्मी सैमझतां कुबूल केरते, तैस धर्मरो फल मैल्हते। 42 जै कोई इन निकडन मैरां एकी मेरो चेलो बुझतां सिर्फ अक कोटोरो ठडू पानी पियाल्हो, आंव तुसन सैहीं सच जोतां तै अपनो फल कधी न गुवांल्हो।

यीशु ते यूहन्ना बपतिस्मो देने बालो

(लूका 7 : 18 -35)

11 जैखन यीशुए अपने बहरे चेलन सभ किछ समझांव त तै तैड्डां चलो जेव ताके तैनकेरे होरी शहरन मां भी गैहितां प्रभु परमेशरेरो वचन शुनाए।

2 युहन्ना नेबें जैल्ही मां मसहीएरे कम्मा केरे बहरे मां शुनु त तैनी अपने चले भेजे। 3 मसही पुछने भेजे की एजने बालो मैन्हुं तुए थु: की आसां केंची होरी बलगम। 4 यीशुए तैन जुवाब दितो; की जैन किछ तुस लहत्तथ तैन शुनाथ गैहितां युहन्ने सैहीं जोइ छडा। 5 की कांने लहत्तन ते टोने चलतन ते कौदी केरु कौढ साफ भोते ते टोऊने शुंनतन ते मुडदे जिंते भोतन ते गरीबन परमेशरेरी खुशखबरी शुंनतन। 6 मुबारके तै मैन्हुं जैस मेरे जौने सैहीं ठोकर न लगे।

7 जैखन युहन्नेरे चले तैड्डां चले जे त यीशु लोकन सैहीं युहन्नेरे बारे मां जौने लगे; की तुस बियाबाने मां कुन हेरने जेवरे थिये? कुन हवाई सैहीं हिलते सरकण्डेरे डाल। 8 अगर ऐन नैइं त फिरी होरु कुन हेरने जेवरे थिये? रोडां लिगड़ां डेबतां कोई? जै मट्टां लिगड़ां डेबतां केंची बडे मैलहे मां रहते। 9 अखर तुस कुन हेरने जेवरे थिये? केंची नेबी? हां पण आंव तुसन सैहीं जोतां की नेबी कैरां भी बड्डे हेरने जेवरे थिये। 10 युहन्ना तै मैन्हुए जैसेरे बारे मां परमेशरेरे वचने मां लिखेरुए की हेर आंव अपनो पैगांम्बर ती अगरी अगरी भेजताइं; जै तीं अगरी अगरी तेरी बत्त तियार कैरेल्हो। 11 आंव तुसन सैहीं सच जोतां की जै कौन्शी कैरां जरमोरोए तैनमां युहन्ना बपतिस्मो देने बाले कैरां बड्डो कोई नैइं; पण जै अस्मानेरी बादशैही मां सैभन कैरां निकडोए तै युहन्ना कैरां भी बड्डोए। 12 युहन्ना बपतिस्मो देने बालेरे दिहेडन मां तैईस तग्र परमेशरेरी बादशैहीयरी बडी सखत खिलाफत भौती राही, ते बडे बडे नीग्र तैस दबाते राहे। 13 किजोकी सारे नबी ते व्यवस्था भी युहन्ने तग्र हेराती थी। 14 अगर तुस मन्नेरे लेइ तियार भौथ त तै ऐलिय्याह जै एजने बालो थु तै ऐहे थु। 15 जैसका शुंनेरे लेइ कंन भौन त तै शुंने।

16 आंव इस जमानेरे लोकन केंचरे सेहीं बियांन केरीं? तैना तैन मड्ठां केरे जैरेन जैना बजारन मां बिशतां एपनी जबांन सेहीं जोंते रहतन की। 17 असैइं तुशे लेइ बेशोई बजाई ते तुस न नचूचै; ते असैइं शौग बनव ते तुसैहीं छाती न कुट्टी। 18 किजोकी युहन्ना न खांतो आव ते न पितो आव ते लोक तैसजो जोते थिये की तैस्मां दुष्टात्माएं। 19 ते मैन्हेरु मड्डु खांतो पितो आव ते लोक जोते थिये की खांन बालो शराबी कबाबीए बल्के धडत धिन्ने बाले ते पैपी कैरो दौस्ते; पण अक्लमेंदरे कम्मेइं सेहीं धर्मी जोतन।

अविश्वासे पुड़ आफसोस (लूका : 10 - 13 - 15)

20 तैखन यीशु फिरी तैन शहरन मां गैहितां जौने लगे; जैन मां तैनी बड़ां आजीब कम्मा कियोरां थियां पण तैनेइं तोबा न थी कियोरी। 21 एहे खुरार्जीन तीं पुड़ अप्सोस, एह बैतसैदा तीं पुड़ अप्सोस, ऐन अजीब कम्मा मीं तुसन इडी हेरां अगर मीं ऐन कम्मा सुर ते सैइदा मां हरेवरां भौथां; त तैना लोक कैइसेरे देंते टाट पलैटतां ते दौंगेपुड़ मांजन छैडतां कैइसेरी तोबा कियोरी भौथी। 22 पण आंव तुसन सेहीं जोतइं की फैसलेरे दिहाड़े सुर ते सैइदेरो हाल तुशे हाले कैरां रोड़ो भौनोएं। 23 ते एह कफरनहूम; कुन तु अम्ब्रे तग्र न चह्दौ? ते त्रा त ब्रके मां गा; किजोकी जैन कम्मा मीं तुसन इडी हेरां अगर मीं ऐन कम्मा सादुंमे मां हरेवरां भौथां त आज तग्र सादुंम शहेर बंचोरो रहंनो थु। 24 पण आंव तुसन जोतां की फैसलेरे दिहाड़े सादुंमेरो हाल तुशे हाले कैरां रोड़ो भौनोएं।

बोझे मां दबारे लोकां केरे लेई आराम (लूका 10 : 21 - 22)

25 तैखन यीशुएं जौव; एह जमीन अस्मानेरे परमेशरा आंव तेरु शुक्र केरतां की तीं ऐन गल्लां बड़े बड़े अक्लमंदन कैरां छपेइतां रेखी ते निक्के मड्डन का बेंदी की। 26 हां बाजी तेरी मर्जी एहे थी।

27 मेरे बाजेरां तरफां सभ किछ मेरे सुपुर्द कियेरुए; कोई होरो मैन्हुं मड्डु न जाने सुवाए बाजेरां ते न कोई बाजी जाने सुवाए मड्डुं या तैस मैन्हुं जैस पुड़ मड्डु जैहीर केरने चाहे।

28 एह मेहेनत केरने बाले ते भारे सेहीं थकोरे लोकव मिका एज्जा; आंव तुसन आराम देईल्हो। 29 ते मेरु वचन शुंना ते मीं कैरां शिखा किजोकी आंव बड़ो त्रम आंहीं ते मेरो दिल साफे ते तुशी आत्माइं आराम मैल्होएं।

30 एल्हेरेलेई की मेरु फरमान सुखतुए ते मेरो भारो पौलो ऐ।

सबतेरो प्रभु (मरकुस 2 : 23 - 28)

12 तैस यीशु त तैसेरे चेले सबतेरे दिहाड़े ऊडारन मन्हेइं एक्की बत्तां चलोरे थिये, ते तैसेरे चेले नियन्ने थिये; ते तैन दलुख लग्गोरी थी; ते तैना गैहूं कैरां शिल्पां टलोडतां खाने लगे। 2 जैखन फ्रिसैइं ऐन लाहूं: त तैना जौने लगे; तक तेरे चेले तैन कम लोरेन केरने जैन सबतेरे दिहाड़े न भोए केरनु। 3 यीशुए जुवाब दितो; कुन तुसैइं कधै नैइं पढेरु की जैइस दाऊद त तैसेरे साथी दलुखोरे थिये त तैनेइं कुन कियेरु थुं। 4 दाऊद परमेशरेरे घरे मां जेव; ते जैना चैदोरी रौट्टी थी तैह्वां एन्तां एपू भी खैई, ते अपने सैथन भी दिती, ते तैनेइं भी खैई हालांकी तैना रौट्टी खैनी तैनकेरे लेइ रस्मरे मुतबक ठिक न थी; किजोकी तैना रौट्टी सिरफ मन्दिरे मां सेवा केरने बाले पुरैहुत खैई सखते थिये। 5 या तुसैइं शासत्रे मां ऐन भी नैइं पढेरु; की पुरैहुत सबतेरी बेजती केरतां भी बेकुसुर भोतन। 6 पण आंव तुसन सेहीं जोताइं की इडी तै खडोए, जै मन्दिरे कैरां भी बडोए। 7 अगर तुस ऐलहेरो मतलब जानेथे की आंव रेहंम केरनो सुखनी कैरां जादे पसंद केरतां; त तुस बेकुसुरन सलीबी पुड़ न चह्दथे। 8 किजोकी मैन्हेरु मड्डु सबतेरी दिहैडारो भी मालके।

सुकोरे हथे बालो मैन्हु बज्जानो (मरकुस 3 : 1 - 6 ; लूका 6 : 6 - 11)

9 यीशु तैठां निस्तां तैनकेरे प्राथन भवने मां जेव। 10 तैडी अक मैन्हुं थु; जैरो हथ शुकोरो थु, तैनेइं यीशु गलती लांनेरे बहाने सेहीं तैस पुछू कुन सबतेरे दिहाड़े शिफा देनी जैइजे। 11 यीशुए तैनजो जौव: अगर तुसन मैरां कैस्केरी भेड सबतेरे दिहाड़े गत्ते मैज्जा बिछडचे, त तुस कुन तैस तैठां बेइर न कढैल्हे। 12 मैन्हेरी कदर त भैडी कैरां बडी जादे; ऐलहेरे लेई सबतेरे दिहाड़े रोडु कम्म केरनु बडु जुरुरीए। 13 तैखन यीशुए तैस मैन्हुं जो जौव; अपनो हथ अग्रौवं सीधो रख: तैनी हथ अग्रौवं सीधो रखो, त तैसेरो तै हथ होरी हथेरो जैरहो भोई जेव। 14 पण फ्रिसी बेइर गैहितां यीशु मारनेरी साजस केरने लगे।

परमेशरेरे चूनोरे सेवक

15 यीशु पत्तो लग्गो, ते तै तैठां निसी जेव; ते बड़े लोक तैस पत्ती चले, ते तैनी तैना सब बज्ज्जाए। 16 ते यीशुए तैन छंदे केरतां जौव: की मेरे बारे मां केंची सेहीं न जोइयथ । 17 ताके ईसाया नेबेरी जोवरी तै गल पुरी भोए" की ।

18 एह मेरो चेलोए जै मीं चुनोरोए; एह मेरो ट्लारोए जैस पुड़ मेरो दिल खुशे; आंव अपनी आत्मा तैस मां छैडैल्हो; ते तै गैर कौमन मां गैहितां इन्साफेरु एलान कैरेल्हो। 19 एह न लडाई कैरेलो; ते न शौर: ते बत्तां चलते भी कोई तैसेरी शोर न शुनेल्हो।

20 ते एह दलैंचोरे सरकण्डे येनी त्राठी न टलोडैल्हो; ते न बलतो दियो हिशाहो जां तग्र सचूचैरी जीत न भोए। 21 ते तैसेरु नोवं गैर युहूदी कौमां केरेलेइ अक बडी ऊमीद भौली।

यीशु ते बालजबूल

(मरकुस 3 : 20 - 30 ; लूका 11 : 14 - 23)

22 तैखन लोकेइं अक मैन्हुं यीशु का आन्हां जै लड्डो थु; ते कानो भी थु; यीशुए तै ठीक कियो; ते तै लहंने भी लगे ते गल्लां भी केरने लगे। 23 ते लोक हेरां भोइतां जौने लगे: की पत्तो नैइं की एन्ने दावदेरु मड्डु भोए? 24 पण फ्रिसैइं एह गल शुंनतां जौव; एह दुष्टात्मा केरे प्रधानेरी मदती सेहीं दुष्टात्मा कढते। 25 यीशु तैनकेरी दिलेरी गल जानतो थु; एल्हेरे लेइ तैनी तैन जो जौव; अगर केंची हुकुमती मां फुट पेचे, त तै हुकुमत बेरांन भोचे ते तै न राहे।

26 अगर शैतान शैताने कढने लगे, त तै अपनो मुखालफ एपु भुवो त फिरी तैसेरी हुकुमत कैन्चरे रेही सख्चे। 27 अगर आंव दुष्टात्मा केरी मदती सेहीं दुष्टात्मा कढतां त तुशे अपने मैन्हुं किसेरी मदती सेहीं कढतन? तैना तुशो फैसलो केरने बाले जैज भौल्हे। 28 पण अगर आंव परमेशरेरी आत्मांरे मदती सेहीं दुष्टात्मा कढतां त परमेशरेरी बादशाही तुशे नेडे पुजोरीए। 29 कोई केंची निग्र मैन्हेरे घरे मां कोइ गैही सखते; ते तैसेरो माल सबाब लुट्टी सखते; पैहीले जां तग्र तैस निग्र मैन्हुं बंधे त्रा? बन्धनेरे बाद तै तैस घरे लुट्टी सखते। 30 जै मीं सेहीं साथी नैइं तै मेरे खलाफे, ते जै मीं सेहीं साथी अकोटु न केरे तै इरहां उरहां बिटलते। 31 ऐलहेरेलेई आंव तुसन सेहीं जोताइं की; मैन्हुं केरे सारे पाप ते बुरु बकेरु माफ भौलु पण परमेशरेरी आत्मांरे खलाफ बकेरु माफ न भौलु। 32 अगर कोई मैन्हेरे मड्डेरे खलाफ किछ जोते, त तैस भी माफ भौल्हु, पण जै परमेशरेरी आत्मांरे खलाफ बकते; त तैस मैन्हुं न इस दुनियाई मां माफ भौलु ते न एजने बैली दुनियाई मां माफ भौलु।

बुट ते तैसेरो फल

(लूका 6 : 43 - 45)

33 या तुस बुट्टे जो रोडु जोथ ते तैसेरे फले जो भी रोडु जोथ; ते नता तुस तैस बुट्टे जो बुरु जोथ; ते तैसेरे फले जो भी बुरु जोथ किजोकी बूट अपने फले सेहीं पशेनोते। 34 औ सप्येरे बच्चाव तुस बुरे भोइतां रोडी गल केंचरे जोई सखतथ? किजोकी जैन दिले मां भोते तैन्ने जबांनी पुड़ एइते। 35 रोडो मैन्हुं रोडे खज्जाने मैरां रोडी चीजां कढते; ते बुरो मैन्हुं बुरे खज्जाने मैरां बुरी चीजां बेइर कढते। 36 ऐलहेरे लेई आंव तुसन सेहीं जोता: की फैस्लेरी दिहेडी

लोकन एपनी हर एकी बुरी गल्लरो हिसाब देंनो भौल्हो । 37 किजोकी तुस एपनी कर्मैई, ते एपनी गल्लेइं सैहीं घर्मी या पापी भोनेथ।

आसमानी निशानेरी माँग

(मरकुस 8 : 11 -12 ; लूका 11 : 29 - 32)

38 ते तैखन किछ फ्रिसी, ते किछ तैन्करे गुरु जॉने लगे; हे गुरु असां तीं कैरां कोई निशान हेरनो चहतम। 39 पण यीशुए तैन जुवाब दितो; इस जमानेरे बुरे, ते हेरमी लोक निशान हेरनो चहतन; पण तैन युहन्ना नेबेरां अलावा होरो कोई निशान न हेरहव गाहेलो। 40 किजोकी जैचरे युहन्ना नबी ट्लाई दिहाडे ते ट्लाई रातन मैछलरे पेटे मां राहु; तैन्करे मैन्हेरू मडू भी ट्लाईही दिहाडे, ते ट्लाई रातन जमीनी मां रहलो। 41 नैणवाएरे लोक आदालतरे दिहाडे इस जमानेरे लोकन साथी खडे भोइतां मुर्जम बनाल्हे; ऐलहेरे लेई की तैनेइं युहन्ना नेबेरे जॉने सैहीं तोबा त कियोरी थी; ते हेरा इडी तैहे, जै युहन्ना कैरां भी बडोए। 42 दखनेरी रहनी मालिका आदालतरे दिहाडे इस जमानेरे लोकन सैहीं साथी खडी भोइतां मुर्जम बनाल्ही; किजो की तै बडे दुरेरां सुलेमानेरू ज्ञान शुनेरे लेइ ऐवरी थी; पण ते हेरा इहीडी तैहे, जै सुलेमाने कैरां भी बडोए।

आधूरे सुधारे सैहीं विपत्ति

(लूका 11 : 24 - 26)

43 जैखन केन्वी मैन्हुं मैरां दुष्टात्मा निसी गहचे, त तै अपने आरामेरे लेइ बेरान ठारां हंठचे; पण जैखन तैस ठार न मैल्हे। 44 त तै जौचे की आंव वापस अपने तैस्से घरे मां गहवां; जैस मैरां निसोरी थी; ते जैखन तै वापस एइचे, ते तैस तैन घरे खाली ते साफ सुथरू मैल्ते। 45 फिरी तै गहचे, ते एपू सैहीं साथी होरी सत दुष्टात्मा आंहन्चे, ते तैन सब तैस्मां रेहीचन; ते तैस मैन्हरो हाल पैहिले हाले कैरां भी जादे बुरो भोते; तैन्करे इस जमानेरे बुरे लोकां केरो हाल भी एरो भोनें।

यीशु एरी अम्मा ते इलाह

(मरकुस 3 : 31 - 35 ; लूका 8 : 19 - 21)

46 हेजु मस्सां यीशु मैन्ह सैहीं गल्लां केरने लोरो थु; त बेइर तैसेरी अम्मा ते दूला आए; तैना तैस सैहीं गल केरनी चहते थिये। 47 कंचे गैहीतां यीशु सैहीं जॉव; बेइर तेरी अम्मा ते दूला खेदौरेन; तैना तीं सैहीं गल केरनी चहतन। 48 यीशुए पत्तो देने बाले जो जॉव; कौने मेरी अम्मा, ते कौने मेरे दूलाए? 49 तैखन यीशुए अपने चेलां केरे पासे इशारो केरतां जॉव; हेरा मेरी अम्मा, ते मेरे दूला इन्न। 50 किजोकी जै कोई मेरे असमानी बोव्वेरी मेर्जी पुड चलते तैहे मेरो दूला ते मेरी बैहिन्न, ते मेरी अम्माए।

बीज बने बालेरू दृष्टान्त

(मरकुस 4 : 1 - 9 ; लूका 8 : 4 - 8)

13 तैस दिहाडे यीशु घरेरां बेरोहुं निस्सो, ते उल्हेरे बन्ने गैहितां बीशो। 2 तैसेरे चोवरे पासन लोकां करी एत्री भीड थी, की फिरी यीशु एकी किशती मां गैहीतां बीशो, ते सारे लोक बन्ने पुड खडे राहे। 3 तैखन तै तैन सैहीं कैहेनी केरे तरीके सैहीं गल्लां केरने लगे की हेरा: की अक मैन्हुं बीज बने बालो बीज बने घरेरां निसो। 4 बीज बंते बार किछ बीज बत्तरे बन्ने बीछडु; ते तैन चुडौलेइं एइतां चुनु। 5 ते किछ बीज घोडांगले मां बीछडु ते तैडी मित्ती न थी ता तैन लुशी लग्गु। 6 पण जैखन धूप निस्सी त तैन फुकोई जेवं; ते ज्रील डुगधु न भोनेरी वजाही सैहीं शुक्की जेवं। 7 ते किछ बिज झलन मां बीछडु; ते तैन झलेइं बहन्हेइं फैलतां तैन दबेई छडु। 8 पण जैन रोडी जमीनी मां बीछडु, त तैस फल भी लग्गो केन्वी शौव गुन्हा केन्वी शठ गुन्हा, ते केन्वी ट्लही गुन्हा। 9 जैसेरे कन शुन्ने बाले भोन त तै शुने।

दृष्टान्तां केरो मकसद

(मरकुस 4 : 10 - 12 ; लूका 8 : 9 - 10)

10 तैखन चेलेंइ यीशु का एइतां पुछ: तु लोकन सैहीं कैहेनी केरे तरीके सैहीं गल्लां किजो केरतां? 11 यीशुए जुवाब दितो: तुसंन त अस्मानेरी बादशैहीयोरो

भेत समझनेरे लेइ अकल दितोरीए: पण तैन नैइं। 12 किजोकी जैसका आहे तैस होरू भी मैलहेलु; ते तैस का सुधी भोनुं: ते जैसका सैइयां नैइं तैस कैरां तैन भी धिनी गाहेले जैन भौलु भी त। 13 आंव तैन सैहीं ऐलहेरेलेई कैहेन्न मां गल्लां केरतां की: तैन तकने त तकत्तन पण पशैनी न बटन; ते शुन्ने त शुनतन पण समझन न्ना। 14 ईसाया नेबे" भी जैन जौवरु थुं, एस्से बारे मां तैनी भी जौवरु थुं; की तुस शुन्ते त रहले पण समझले न्ना: तकते त रहले पण पशानैल्हे न्ना। 15 किजोकी ऐस कौमरे दिले पुड चरभी भेरोरीए: ते ऐना उकडु शुनतन; ते ऐनेइं एपनी ऐछी तुंमतां रेखोरीन: कथे एरू न भोए की तैना एछेइं सैहीं लहन ते कन्नेइं सैहीं शुन्न ते दिले सैहीं समझन ते मेरे पासे फिरन ते आंव तैन शिफा देइं। 16 पण तुशी ऐछी मुबारकन किजोकी तुस लहतथ ते तुशे कन्न मुबारकन किजोकी तुस शुनतथ। 17 किजोकी आंव तुसंन सैहीं सचूच जौतां की बडे नबी, ते परमेशरेरे लोक चहते थिये: की जैन तुस हेरने लोरेथ तैना ऐन हेरनू चहते थिये, पण न हेरी बटु, ते न शुनी बटु जैन तुस शुन्ने लोरेथ।

बीज बने बाले दृष्टान्तेरो मतलब

(मरकुस 4 : 13 - 20 ; लूका 8 : 11 - 15)

18 हुनी तुस बीज बने बालेरी कैहेनरो मतलब शुना। 19 जैखन कोई बादशैहीयोरो बिसतर शुनाते, पण समझे न्ना: किजोकी शैतान एइते, ते जैन बीज तैसेरे दिले मां बेवरु थुं तैन कैदतां धिनी गहते एह तैस बीजेरो जैरोए जैन बत्तरे बने झद्रेरु थुं। 20 जैन बीज घोडांगले मां डुल्लू: तैस मैन्हेरू जैरूए, जैना प्रभु परमेशरेरो बचन शुनते खुशी सैहीं कुबुल केरतन। 21 पण सैही तरीके सैहीं पक्को न भोए: पण बचनेरे जॉने सैहीं जैखन सताव या दु:ख मसीबत एइचे, त तै बिछडी गहते। 22 झलन मां बीज झडनेरो मतलब की जैना बचन त शुनतन: पण दूनियारो फिर ते दौलतरो फरेब तैस दबेई छडते, ते तै बेफल ररेही गहते। 23 पण रोडी जैरी जमीनी मां बेवरे बीजेरो जैरो तैहे; जै वचन शुनते ते समझते ते तैस फल भी लगते केन्वी शौव गुन्हा केन्वी शठ गुन्हा, ते केकी ट्लीही गुन्हा।

जंगली बीजेरू दृष्टान्त

24 यीशुए तैन अक होरी कहांनी शुनाइ, की अस्मानेरी बादशाही तैस मैन्हरी जैरीए जैनी अपने ऊडारे मां रोडु बीज बेवं। 25 पण जैखन तै झूलोरो थु, त तैसेरे दुश्मने एइतां तैसेरे ऊडारे मां जंगली बीज बेवं। 26 जैखन पट्लां शिल्वां लगां लगने त तैन जंगली बीज भी साथी लग्गु। 27 मालकेरे नोकरेइं एइतां तैस सैहीं जॉव: कुन तीं अपने ऊडारे मां रोडु बीज न थुं बेवरु। 28 तैनी जुवाब दितो: ऐन केन्वी दुश्मनेरू कम्मं: नोकरेइं पुछ कुन तु चहतां की असां गैहीतां तैन पुडी छडम। 29 पण तैनी जॉव न्ना: एरू न भोए की तैससैहीं साथी तुस गैहू भी पुटथ। 30 फसल लून्ने तत्र दुइये साथी बेडोने देथ ते लूनते बार आंव एपु लून्ने बालन सैहीं जौइल्हो; की पैहिले जंगली बीज लून्ता अग्गी मां फुकनेरे लेइ अकौडु केरा: ते फिरी तुस गैहू मेरे खाते मां जम्हां केरतां रखा।

रेइयारे बीजेरू दृष्टान्त

(मरकुस 4 : 30 - 32 ; लूका 13 : 18, 19)

31 यीशुए तैन अक होरी कहांनी शुनाइ की अस्मानेरी बादशाही रेइयारे बीजेरी जैरीहे: जैन एके मैन्हें आन्हूं ते अपने ऊडारे मां बेवं। 32 ऐन बीज सैभी बीजन कैरां निकु भोते, पण जैखन बेडोते त जैरो बूट बनते एडी तत्र की चूडोल् भी तैसपुड बिशतन।

खमीरेरू दृष्टान्त

(लूका 13 : 20, 21)

33 यीशुए तैन अक होरी कहांनी शुनाइ की अस्मानेरी बादशाही: अम्लटेरी जैरीहे जैन एक्की कौन्शां आन्हूं; ते हछे अट्टे मां मलावं ते सारू अडु अम्लडु बेनी जेवं।

दृष्टान्तां केरो इस्तमाल (मरकुस 4 : 33 - 34)

34 ऐन सैरी गल्लां यीशुए कैहेंनी केरे तरीके सैहीं शुंनेइ: ते यीशु कैहेंनी केरे बगैर किछ न थु शुंनातो। 35 ताके नेबी केरी ज़ोवरी तै गल्ल पुरी भोए की: आंव कैहेंनी केरे लेइ अपनी ज़बान खोल्लेहो: ते तैना गल्लां ज़ौइल्लहो ज़ैना दुनिया बन्ने केरां पैहीली छैप्योरी थी।

जंगली बीजेरो मतलब

36 तैखन यीशु लोकन केरां अलग भोइतां घरे अंत्र चलो जेव; ते तैसेरे चेले तैस का एइतां ज़ौने लगे: की तु असन जंगली बीजेरी कैहेंनरो मतलब समझा। 37 यीशुए जुवाब दितो: जै रोडु बीज बते: तैन मैन्हेरु मड्डुए। 38 ऊडार ईही दुनियाए, ते रोडु बीज परमेशरेरी बादशाही हासल केरने बाले लोक: ते जैन जंगली बीजे तैन शैतानेरे लोकां केरे बारे मां हैं। 39 ते तै दुशमन ज़ैनी तैन बेवरु थुं तै शैताने: ते लून्नेरो मतलब इस दुनियारो अंत भोनोए ते लून्ने बाले परमेशरेरे सुवर्गदूतन। 40 जैचरे जंगली बीजेरी पैदावार अग्गी मां छैडतां फुकत्तन तैचरे इस दुनियारो अंत भोनोए। 41 मैन्हेरु मड्डु अपने सुवर्गदूतन भेजैल्लहो ते तैन तैनकेरी बादशैही मां पापेरे वजाही सैहीं बन्ने बैली सैरी चीजां ते पापी लोक आकौठे केरेल्ले। 42 ते तैन अग्गी भैठी मां छडैल्ले, जैडी तैना लोक लेरां दंते ते दंत चापते राहेले। 43 तैस धर्मी लोक अपने बाजेरी बादशैही मां दिहाडेरै जैरे चमकैल्ले: जैस कन्न भोन त तै शुने।

छपोरे खजानेरु दृष्टान्त

44 अस्मानेरी बादशाही तैस दौल्लतरी जैरीहे: जै एक्की ऊडारे मां दब्बोरी थी, जै एक्की मैन्हे तौप्पी; ते तैस मैल्ली भी; ते फिरी छपैइतां छडी: ते फिरी खुशी सैहीं अपने घरे जेव; ते अपनु सब किछ बेचतां तैन ऊडार घिनु।

अनमोल मोरेरु दृष्टान्त

45 अस्मानेरी बादशाही तैस सोवदागरेरी जैरीहे, जै कीमती मोती तौसो थु। 46 जैखन तैस अक कीमती मोती मैल्लो, त तैनी आपनु सभ किछ बेचतां तै मोती घिने।

जालेरु दृष्टान्त

47 अस्मानेरी बादशाही तैस जालेरी जैरीहे, जैन डल्ले मां छडु ते तैस मां हर किस्मेरी मैछली लैगी। 48 ते जैखन जाल भरोइ जेवं त लोकेइं खीचतां कनारे कदू: ते बिशतां रोडी रोडी मैछली टोकरन मां रेखी ते बुरी बुरी मैछली शैरी छैडी। 49 दुनियारे अंते मां भी एरहू भोनो हैं: की सुवर्गदूते एजनेण, ते तैनेइं पापी लोक धर्मी लोकन केरां अलाग केरनेण। 50 ते तैना अग्गी भैठी मां छडनेण जैडी तैन लोक लेरां दंते, ते दंत चापते राहेल्ले। 51

पुरानी ने नोवे तालीमरो महत्त्व

यीशुए ज़ौव: कुन तुसैइं ऐन सैरी गल्लां सैम्झी? तैनेइं ज़ौव हां असैइं सैम्झी। 52 तैखन यीशुए तैन सैहीं ज़ौव: व्यवस्था हर गुरु जैस अस्मानेरी बादशैहीयरो भेद मैल्लोरोए एक्की एरे मुकान मालकेरो जैरोहे, जै अपने खजाने मौरां नोवीं ते पुरेनी दुइये किस्मां केरी चीजां कदते।

नसरते मां यीशु एरी निन्द

(मरकुस 6 : 1 - 6 ; लूका 4 : 16 - 30)

53 जैखन यीशुए ऐना सभ कैहेंनी शुंनेइं त तै तैह्वां आग्रोहुं चलो जेव। 54 ते अपने शहारे मां एइतां तैठेरे प्राथन भवने मां गैहीतां शिक्षा देने लगे: ते लोक तैसेरी शिक्षा शुन्तां हेरान भोइतां ज़ौने लगे: ऐह अकल बुधी ते ऐना चमत्कार एस कौइतां हासल भुए। 55 कुन ऐन तैस ठठारेरु मड्डु नैइं? ते कुन ऐसेरी आमरु नोवं मरियम नैइं, ते कुन याकुब युसफ शुमान ते युहूदा ऐसेरे द्ला

नैइं। 56 ते ऐसेरी सभ बैहीना इशै इडी न रहन? फिरी ऐस्मां ईही करतुत कौइतां आई।

57 ते ऐनेइं सैभेइं ऐसेरी वजाही सैहीं ठोकर खई: पण यीशुए तैन सैहीं ज़ौव: नबी सिर्फ अपने मुल्ले मां ते अपने रिशतेदारन मां बैजत भोते: होरो कोंच न्ना। 58 ऐलहेरेलेइं यीशुए तैडी तैन केरी बैकेदरी वजाही सैहीं जादे चमत्कार न हेराए।

यूहन्ना बपतिस्मो देने बालेरो कल्ल

(मरकुस 6 : 14 - 29 ; लूका 9 : 7 - 9)

14 तैस हिरादेस जै मुलखेरे चोवरोवं हिस्से पुड हुकूमत केरतो थु: तैनी यीशुएरी तारीफ शुनी। 2 हिरादेसे अपने नोकरन सैहीं ज़ौव: ऐह युहन्नाए जै बपतिस्मो देने बालो थु, ऐह मुडदन मौरां ज़ौतो भोवरोए, ऐलहेरेलेइं तै चमत्कार हेराते।

3 असलित्ती मां हिरादेसे युहन्ना टलेइतां जैल्ले मां छडरो थु: ऐसेरी वजाही सैहीं तैसेरो द्ला फिल्पुसेरी कौन्श हिरादियास थी। 4 किजोकी युहन्ने हिरादेसे सैहीं ज़ोवरु थु: की फिल्पुसेरी कौन्श रखनी तेरे लेइ ठीक नैइं। 5 ते हिरादेस युहन्ने कतल केरनो चहतो थु: पण लोकन केरां डरतो थु, किजोकी लोक युहन्ने नबी मनते थिये।

6 हिरादेसेरी जर्म दिहैडी मां हिरादियासरी कुईयां मैम्हाना केरे सामने नैचतां हिरादेस खुश कियोरो थु। 7 ते हेरोदेसे तैस सैहीं वैहीदो कियोरो थु: की तु जैन मगैल्ले आंव तैने देल्लो। 8 कुईयां अपनी अम्मारे ज़ौने पुड ज़ौव: की मीजेइं युहन्ना बपतिस्मो देने बालेरी करोडी थाले मां मग। 9 ऐन शुन्तां हिरादेसे बडो आफसोस भोव: पण अपने मैम्हान केरे सामने कस्म खानेरी वजाही सैहीं हुक्म दितो की कुईये युहन्नेरी करोडी केटतां देथ। 10 ताली तैनी मैन्हु भेजतां युहन्नेरी करोडी कट्टाई। 11 युहन्नेरी करोडी थाले मां रेखतां कुईये का दिती: ते तै तैसां अपनी अम्मां का घिनतां जेई। 12 तैखन युहन्नेरे चेले आए: ते तैनेइं तैसेरी लाश छुइतां निही ते देबतां छडी ते गैहितां यीशुए पत्तो दितो।

पंच हजार मडदन रोटी खुवैनी

(मरकुस 6:30-44 ; लूका 9 : 10 - 17 ; यूहन्ना 6 : 1 - 14)

13 जैखन यीशुए ऐन शुंनू त तै किशतरे ज़िरये एक्की बेरान ठैरी जो जेव: ते लोकन पत्तो लगो त शहरे शहरेरे लोक तैना पैदल तैस पती चले जे।

14 जैखन यीशु किशती मौरां औस्हो त तैनी बडे लोक पुतोरं एइते लाहे: ते तैस तैन पुड बडी तरस आई; ते तैनी तैन्केरे बिमार लोक बज्झाए।

15 जैखन डलोवझ भोई त यीशुएरे चेले एइतां ज़ौने लगे: की इही ठार बेराने ते ठड भी भेवरिए: ते ऐन लोकन भेजी छड ते कोस्कौई इल्लोवं मां गैहीतां किछ खाने जो किछ घिन्न। 16 यीशुए ज़ौव: ऐन भेजने ज़ुरुरी नैइं, तुस्सै ऐनकेरे लेइ किछ खाने जो आन्हां। 17 चेलेइं जुवाब दितो: इडी असन का सिर्फ पांच रौट्टी ते दुी मैछलीन। 18 यीशुए ज़ौव: तैन इरहां मिका आन्हां। 19 जैखन तैनी लोकन घासे पुड उंढे बिशनेरो हुक्म दितो त पांच रौट्टी ते दुई मैछली हथे मां रेखतां अम्ब्रेरे पासे तेकतां बर्कत दिती? फिरी तैनी रौट्टी टलोडतां अपने चलन का दिती ते चेलेइं तैन लोकन दिती। 20 सैभेइं रेजतां रौट्टी खई: ते चेलेइं टलुटोरे टूकां केरी बहरे टोकरी सैल्ली। 21 रौट्टी खाने बाले लोकां केरी तैधात कौन्शां ते मड्डां केरे अलावा कोई पांच हजार थी।

यीशु एरु पैनी पुड चलल्लू

(मरकुस 6 : 45 - 52 ; यूहन्ना 6 : 15 - 21)

22 ते तैसेरां बाद यीशुए अपने चलन हुक्म दितो की: तुस किशती मां बिशतां झिली पार जो गाथ ते आंव ऐन लोकन वापस भेजतां एइतां।

23 जैखन यीशुए तैन लोक वापस भेजे त एपु अकैल्लो प्रार्थन केरने एक्की पहाड़े पुड जेव: रात भोवरी थी ते यीशु अकैल्लो थु। 24 एतरे मां किशती बन्ने केरां दुर पुजोरी थी ते हछी हवा चलने सैहीं किशती झुटे खाती थी। 25 रातरे चौवरोवं पहरे यीशु झिली पुड मैइं चलतो चलन का नेडे पुजो। 26 जैखन चेलेइं यीशु झिली पुड मैइं चलतो लाहु त तैना डेरी जे: तैनेइं बुझू ऐह भुत

एवरोए, ते डेरतां चिन्डां लगे मारने। 27 पण यीशुए तैन जो लुशी जाँव: डरा च्हा हिमंत रखा। 28 पतरसे तैस जुवाब दितो: औ प्रभु अगर तुएस: त मिम्हीं हुकम दे ते आंव भी पैनी पुड़ मैइं चलतो तीका एर्जी। 29 यीशुए जाँव: एई, ते पतरस किशती मैरां औसतां यीशु का गहनेरे लेइ पैनी पुड़ मैइं चलने लमगो। 30 पण जैखन हावा जोरे सैहीं चलने लगी त पतरस डेरी जेव: ते डूबने लमगो, तैखन तैनी चिन्डां मारते जाँव: औ प्रभु मीं बच्चा। 31 यीशुए लुशी अपने हथे सैहीं झफ देइतां पतरस ट्लातो ते जाँव: घट भरोसे बाला तीं शक कीजो की। 32 जैखन दुईये किशती मां बीशे त हावा रुकी जेई। 33 तैखन जैना किशती मां बीशोरे थिये त तैनेइं यीशु का मथौ टेको ते जाँने लमगो: तु सचे परमेशेरु मडुस।

गनेसरते मां बीमार बझाने

(मरकुस 6: 53- 56)

34 जैखन तैना झील लेंघतां पार गनेसरत अलाके मां उतरे। 35 त तैठेरे लोकेइं यीशु पशानो ते आस पासेरे अलाकन मां खबर दिती: ते लोकेइं सारे बिमार यीशु का आन्हें। 36 ते तैन मिनत केरने लगे की असंन सिर्फ अपने लिगडे सैहीं हरने दे ते जैत्रेइं तैसेरे लिगडन सैहीं हथ लाव तैत्रे ठीक भुए।

रीती रुवाज मन्ने बारे मां सुवाल

(मरकुस 7 : 1 -13)

15 तैस किछ फ्रिसी ते किछ धर्म गुरु युरोशलमे मैरां यीशु का आए ते जाँने लगे। 2 तेतेरे चले सियांन केरी रस्मरे खलाफ किजो चलतन तैना रौट्टी खाने कैरां पैहिले हथ न धोन? 3 यीशुए जुवाब दितो: तुस किजो अपनी रस्मीं सैहीं परमेशेरु खलाफत केरतथ? 4 किजोकी परमेशेरु जोवरुए, की अपने हाज बोवेरी इजत केरा: ते जै कोई अपने हाज बोवे जो बुरु जाँलहो तै जरुर मारो गालहो। 5 पण तुस जोतथ की अगर कोई हाज बोवे सैहीं जोए की मेरी जैस चीजी सैहीं तुसंन फैइदो भोतो थु, तै परमेशेरु जो दितो। 6 त एस गल्ली पुड़ अपने हाज बोव्वेरी इजत केरनी फर्ज नैइं, एचरे त तुसैइं अपने रुवाजे सैहीं प्रभु परमेशेरु वचन रद्वी कियुं। 7 ओ दुनियारे लोकाव ईसाया नेबे खुब रोडे चारे नबुत कियोरी थी की।

8 ऐन लोक जबांना सैहीं त मेरी इजत केरतन: पण ऐन केरो दिल मीं कैरां बडो दुरे।

9 ऐना लोक बेफैइदी मेरी स्तुति केरतन: किजोकी ऐना मैन्हुं केरे हुकमेरी शिक्षा देतन।

नपाक केरने बैली गल्लां

(मरकुस 7 : 14 - 23)

10 यीशुए मैन्हुं एपु का कुजेइतां जाँव: शुंना ते समझा। 11 जै चीज मैन्हेरे ऐशी मां गहचे तैस्सैहीं तै गन्दो न भोए: पण जैन तैसेरे ऐशी मैरां बेरोहुं निस्ते: तैत्रे तैस गन्दे केरते। 12 तैखन चेलेंइ यीशु का एइतां जाँव: कुन तु जानतां की फ्रिसैइं एह गल शुनतां ठोकर खाई? 13 यीशुए जुवाब दितो: जै बुट मेरे असमानी बाँवें नैइं लेवरो: तै जिलना पुटतां छडनोए। 14 तैन केरी पर्वहा न केरा: तैन काने रखवालेन: अगर अक कानो होरी काने छुईतां चलाए त दुइये ढढे उंढे न बिछडैलहे।

15 पतरसे जाँव: एह कहानी असंन समझा। 16 यीशुए जाँव: कुन तुस हेजु भी बे समझाथ। 17 कुन तुस न जानथ की जैन किछ ऐशी मां गहते तैन पैटे मां गहते: ते फिरी पैटे मैरां मन्बे सैहीं बेइर निस्ते। 18 पण जैना गल्लां ऐशी मैरां निसचंन: तैना दिले मैरां निसचंन ते तैना गल्लां मैन्हुं गन्दे केरचन?

19 किजोकी बुरे खियाल: कतल जन्हा बदचलनी झुठी शहादत, गेब्त दिले मैरां निसचे। 20 ऐन एरही गल्लन जैना मैन्हुं गन्दे केरचन: पण हथ धोने बगैर रौट्टी खाने सैहीं मैन्हुं गन्दे न भोए।

कनानी कौमरे कौन्शरो विश्वास

(मरकुस 7 : 24 - 30)

21 यीशु तैइं चलो जेव, ते सुर ते सैइदरे अलाके मां चलो जेव। 22 तैस अलाकेरी आक कनानी कौन्श यीशु का आई: ते फुकैरतां जाँने लगी एह प्रभु दाऊदरेरा मड्डा: मीं पुड़ रेहेंम केर मेरी कुइये मां दुष्टात्माए, तै तैस बडी स्ताचे। 23 पण यीशुए जुवाब न दितो: एलहेरे लेइ यीशुएरे चले नेडे एइतां तैसका मिनत केरने लगे: की एस भेजी, दे किजोकी, एह चिंटां मारचे ते ईशो पीछो न छडे। 24 यीशुए जुवाब दितो: आंव सिर्फ ईसाएलेरी हेरोरी भैडन का भेजोरोइं। 25 पण तै कौन्श आई, ते यीशु का मथौ टेकतां जाँने लगी: प्रभु मेरी मदत केर। 26 यीशुए जुवाब दितो: बचां केरी रौट्टी नैइतां कुतरन देंनी ठीक नैइं। 27 तैस कौन्शां जाँव: औ पर्भु" ऐन त ठीके, पण जैन टुकडे मालकेरी मेजी पुडैरां बिछडतन तैना कुतरां भी खातन। 28 कौन्शरे ऐन जाँने पुड़ यीशुए जुवाब दितो: एह कौन्श तेरो विश्वास बडोए: तेरी मिनत कुबूल भुई ते तैसारी कुई तैखने ठीक भोई जेई।

अलग अलग किस्मरे रोगी बझाने

29 यीशु तैठां निस्तां गलीलेरी झिलारे बन्ने पुजो: ताल्ही तै एक्की पहाडे पुड़ गैहीतां बिशी जेव। 30 बडे लोकेइं काने टोंटे लट्टे टोंवने ते होरे कही एरहे जैरहे साथी एन्हतां यीशुएरे पाउन का छड्डे ते यीशुए तैना सभ बज्जाए। 31 जैखन लोकेइं हेरु की लट्टे गल्लां केरतन कमजोर तकडे भोतन टोंटे चलतन ते काने लहतन त तैना बडे हेरान भोई जे ते ईसाएलेरे परमेशेरु तरीफ केरने लगे।

चेवर हजार लोकन रौट्टी खुवैनी

(मरकुस 8 : 1 - 10)

32 यीशुए अपने चले एपु का कुजेइतां तैन सैहीं जाँव: मीं ऐन लोकन पुड़ बडी तरस एइचे: ऐना मैन्हुं टलेई दिहेडी केरे देंते बराबर मीं सैहीं साथी चलोरेन ऐनका खाने जो किछ भी नैइं: ते आंव ऐन नियन्त्रे भेजने न चैहीं: कोस्कोही एरहु न भोए की ऐना बत्ती मां रेहीगहन। 33 यीशुएरे चेलेंइ जुवाब दितो: असां इस बियाबांने मां ऐत्रे लोकां केरे लेइ रौट्टी कौड्यां अहंन्म: जैना सैभी केरे लेइ पुरी भोन? 34 यीशुए पुछ: तुसंन का कैत्री रौट्टीन? तैनेइं जुवाब दितो: सत रौट्टीन ते किछ निकी निकी मैछली भी आन्ह। 35 यीशुए तैन लोकन तल्ले मां बिशनेरे लेई जाँव। 36 तैखन यीशुए तैना सत रौट्टी ते मैछली टलेई, ते परमेशेरु शुक केरतां टलोडी: ते अपने चलन का दिती ते चेलेंइ तैना मैन्हुं दितो। 37 सैभेइं रेजतां रौट्टी खैई: ते बादे मां चेलेंइ टलुटोरे टूकां केरी सत टोकरी सैल्ली। 38 रौट्टी खाने बालां केरी तैधात कौन्शां ते बचां केरे आलावा चोवर हजार थी। 39 यीशुए सब लोक भेजे ते एपु किशती मां चैइतां मगदंन आलाके जो चलो जेव।

आसमानी निशानेरी माँग

(मरकुस 8 : 11 - 13 ; लूका 12 : 54 - 56)

16 किछ फ्रिसी ते किछ सुदुकी यीशु का आए: ते तैस अजमानेरे लेइ तैस कैरां कोई अम्ब्रेरो निशान हेरानेरे लेइ जाँव। 2 यीशुए जुवाब दितो: जैखन डलोवझ भोचे त तुस जोतथ की मौसम रोडोए किजोकी अम्ब्रे लाले। 3 ते झैझां जोतथ की अज झडी लगनियें ते बिदलार लमोरिए तुस अम्ब्रे टलडेरु हेरतां मौसमेरो अंदाजो लातथ, पण जमानेरो निशान न पशैनी सखथ। 4 इस जमानेरे बुरे ते जालम लोक निशान मगतन: ते तैन युहन्ना नेबेरां आलावा होरो कोई निशान न दितो गाहेलो: ते युहन्ना नबी तैन शैरतां चलो जेव।

फ्रिसी के सदूकी केरे तालीमरु खमीर

(मरकुस 8 : 14 - 12)

5 यीशुएरे चले झिली पार पुजी जे: पण रौट्टी साथी नैनी बिसरोरी थी। 6 यीशुए तैन सैहीं जाँव: खबरदार फ्रिसी केरे त सुदुकी केरे अंम्लटे कैरां हुशार रहियथ। 7 ते तैन एपु मम्हेइ बँस केरने लगे, की असेइं रौट्टी नैइं

आन्होरी। 8 यीशुए एस गल्लरो पत्तो थु, एल्हेरेलेई तैनी जॉवः बै अकलाव एपुमम्हेंड कीजो बंस केरतथ की असन का रौट्टी नैइं। 9 कुन तुसैइं हेजु नैइं बुझेरु? तुसन पांच हजार मैन्हुं केरे लेइ तैना पांच रौट्टी ते दुई मैछली याद नैइं: ते होरी टुकां केरी कैत्री टोकरी सैल्होरी थी? 10 ते तैन चौवर हजार मैन्हुं केरे लेइ सत रौट्टी ते टुकां केरी कैत्री टोकरी सैल्होरी थी? 11 तुस की न समझथ की मीं तुसन फ्रिसी केरे त सुदुकी केरे अंम्लटे केरां हुशार रहनेरे लेइ जोवरु थुं: रौट्टी केरे लेइ न थुं जोवरु? 12 तैखन तैनकेरी समझी मां आंव की यीशुए फ्रिसी केरे त सुदुकी केरे रौट्टी केरे लेइ नैइं बल्के असन ऐनकेरी शिक्षाई केरां हुशार रहनेरे लेइ जोवरु थुं।

पतरस यीशु ए मसीह कबूल केरते
(मरकुस 8 : 27 - 30 ; लूका 9 : 18 - 21)

13 जैखन यीशु कैसररे फ़िल्पी अलाके मां आव त तैनी अपने चलन पुछुः मैन्हेरु मडु कौने लोक एस बारे मां कुन ज़ोतन? 14 चेलेंइ जॉवः किछ ज़ोतन युहन्ना बपतीसमों देने बालोए, ते किछ ज़ोतन इलिया, ते किछ ज़ोतन यरमियां नबी ते किछ ज़ोतन नेबन मैरां कोई अक ज़ैरोए। 15 यीशुए तैन पुछुः पण तुस मीं जो कुन ज़ोतथ? 16 शुमोन पतरसे जुवाब दितो: तु ज़ितो प्रभु परमेशेरु" मडु मसही" आस। 17 यीशुए जुवाब दितो: एह युहन्नेरे मडु शुमोन तु मुबारकस किजोकी एह गल केंचे नैइं बल्के मेरे असमानी बोंवें तीं पुड़ ज़ेहीर कियोरि। 18 ते आंव तीं सैहीं ज़ोताइं: की तु पतरस आस ते आंव इस पक्की शफ़ड़ी पुड़ अपनी कलीसिया बनैइल्हो ते मौऊत भी तैस पुड़ असर न कैरेल्ही। 19 आंव अपने असमानी बौवैरी चैबी तींका दैइल्हो: ते जैन किछ तु ज़मीनी पुड़ बंधैल्हो तैन अंम्ब्रे मां बंधौलु ते जैन किछ तु ज़मीनी पुड़ खोल्लेहो तैन सभ किछ अंम्ब्रे मां खोल्लोलु। 20 तैखन यीशुए चलन जो ज़ोवः की एह गल केंची सैहीं न ज़ोइयथ की आंव मसही आंइ।

अपने मौतरे बारे मां यीशु भविष्यवाणी केरते
(मरकुस 8 : 31 - 33 ; लूका 9 : 22)

21 एसेरे बाद यीशुए अपने चलन पुड़ ज़ेहीर केरनु शुरू कियुं: की तैसेरु युरोशलमें मां गहनु ज़रुरी थुं, ताके ते सियांने ते परमेशेरु सेवा केरने बाले मन्दिररे पुरैहूत ते व्यवसथारे गुरु केरे हथेइं बड़ो दुःख झेले, ते कतल कियो गाहे ते टलेइयव दिहाड़े फिरी ज़ितो भौल्हो। 22 पतरसे तै कनारे ज़ैरहे नियो ते तैस समझांने लगे, की एह प्रभुएन कथै न भोए: तीं सैहीं एरहु कथै न भौल्हु। 23 यीशुए मुडतां पतरसे सैहीं ज़ोवः एह शैतांनः मेरे तुत्तरे अगारां नशः तु मेरी बत्ती मां मेरे लेई रुकावट लोरोस बन्ने, तीं परमेशेरु गल्लां केरो नैइं बल्के मैन्हुं केरी गल्लां केरो खियाल रहते।

यीशु ए पत्ती चलनेरो मतलब
(मरकुस 8 : 34 ; 9 : 1 लूका 9 : 23 - 27)

24 तैखन यीशुए अपने चलन सैहीं ज़ोवः अगर कोई मेरी सेवा केरनी चहते, त तैसेरे लेइ ऐन ज़रुरीए की तै एपनी जानरो इनकार केरे ते अपने लेइ फंसी साथी चलाए ते मीं पत्ती चले। 25 किजोकी ज़ै कोई अपनी जान हफाज़ती सैहीं रखनी चहलो: त तै तैस गुंवाल्हो: ते ज़ै अपनी जान गुंवाल्हो: त तै नोर्वी ज़िंदगी हासल कैरेल्हो। 26 अगर कोई सारी दुनिया हासल केरे ते एपनी जानरो नुकसान कमाए; त तैस कुन फ़ैइदो भौल्हो? या मैन्हुं एपनी जानरे बदले कुन दैल्हो? 27 किजोकी ज़ैखन मैन्हेरु मडु अपने बौवैरी मैम्हाई मां अपने सुवर्गदूतन सैहीं साथी एजैल्हो: तैखन तै हर केंची अपने अपने कियोरे कम्मा केरो फल दैल्हो। 28 आंव तुसन सैहीं सचच जोताइं की किछ लोक ज़ैन इडी खडखडेन, ज़ां तत्र मैन्हेरे मड्डे एपनी बादशैही मां ऐइंते न लाहेले, तां तत्र मौवतरो मजो न चखैल्हे।

यीशु एरु रूप बेदलोनु
(मरकुस 9 : 2 - 13 लूका 9 : 28 - 36)

17 शैई दिहेडन बाद यीशुए" पतरस याकुब ते याकुबेरो दला युहन्ना एपु सैहीं साथी नैइंतां एक्की उचे पहाड़े पुड़ जे। 2 तैडी तैसेरी शकल

बेदलोई जेई: तैसेरु तुत्र दिहाड़ेरु ज़ैरु चमकने लगु ते तैसेरां लिगाड़ां हींवेरां ज़ैरां छीतां सुफैद भुआं। 3 तैखन तैनेइं मुस्सो ऐलया यीशु सैहीं गल्लां केरते लाहे।

4 पतरसे यीशु सैहीं ज़ोवः इशु इडी रहनु रोडुए, अगर तु चहतस त आंव टलाई डेरे बनाताइं, अक तेरे लेइ ते अक मुसैरे लेइ ते क ऐलियारे लेइ। 5 पतरस एह गल मस्सां हेजु ज़ोने लोरो थु त: आक बडी उजली चमकती बिदलार तैन पुड़ एइतां टिकी ते तैस बिदलारी मैरां ईही आवाज़ आई: ऐन मेरु टलार मड्डुए: आंव एस पुड़ खुशीं तुस एसेरी शुंन। 6 ज़ैखन चेलेंइ एह आवाज़ शुंनी ते तैना डेरतां तुत्रेरे भारे बिछड़ी जे। 7 पण यीशुए एइतां तैन सैहीं हथ लाव ते ज़ोवः उठा डरा त्रा। 8 ज़ैखन तैनेइं ऐछी खौल्ही; त यीशुएरे अलावा होरो कोई न लाह।

9 ज़ैखन तैना तैस पहाड़े पुड़रां उंढे एवरे थिये त यीशुए तैन ताकिद केरतां ज़ोवः की ज़ैन किछ तुसैइं लाहेरुए मैन्हेरु मडु ज़ां तत्र मुडदन मैरां ज़ितो न भोए तां तत्र केन्ची सैहीं न ज़ोइयथ। 10 चेलेंइ तैस पुछु की धर्म गुरु किजो ज़ोतन की ऐलिया नबी ज़रुरी पैहिलो एजोनोए। 11 यीशुए जुवाब दितो: ऐलिया नबी ज़रुरी एजेलहो ते सभ किछ बहाल कैरेल्हो। 12 पण आंव तुसन सैहीं ज़ोतां की ऐलिया त पैहिलो एवरोए ते हुनी तैना तैस पशैनी न बटन: बल्के ज़ैन चाहूं तैससैहीं तैत्रे कियु एन्वेरे मैन्हेरु मडु भी तैन साथी दुःख भोगेल्हु। 13 तैखन चेलेंइ बुझू की यीशु तैन सैहीं युहन्ना बपतिसमो देने बालेरे बारे मां ज़ोने लोरोए।

अक मड्डु बड़ाव ज़इस मां दुष्ट आत्मा थी
(मरकुस 9 : 14 - 29 लूका 9 : 37 - 43)

14 ज़ैखन यीशु हछे लोकन मां पुजो त अक मैन्हुं यीशु का आव ते ज़ेणु तले लेइतां ज़ोने लगे। 15 हे प्रभु मेरे मड्डे पुड़ रेहेंम केर; तैस मिरगरी वजाही सैहीं दोवरे एइतन ते तैन मड्डु जादे केरतां अग्गी ते पैनी मैड्डो खिरकते। 16 मीं तैन मड्डु तेरे चलन का आन्हेरु थुं: पण तैनेइं तैन मड्डु ठीक न केरी बटु। 17 यीशुए ज़ोवः औ बैअकल लोकां; आंव कैइस तगर तुसन सैहीं साथी भोनोइं, आंव कैइस तत्र तुशो दुःख झैलतो रेइल्हो? तैन मड्डु इरहां मीं का आन्हां। 18 यीशुए दुष्टात्मा झीडकाई ते तै तैस मड्डे मैरां निसी ते तैन मड्डु तैखने ठीक भोई जेवं।

19 तैखन चेलेंइ नराले ज़ैरहे यीशु का गैहितां पुछुः असन केरां तै दुष्टात्मा की न कैढोही। 20 यीशुए जुवाब दितो: तुशो विश्वास घट्टे: आंव तुसन सैहीं सचच जोताइं की अगर तुसन मां सीवलरे गलैहुवे ज़ैत्रो भी विश्वास भौल्हो; त तुस उस पहाड़े जो ज़ौल्हे की इड्डां घिसतां ऊड़ी गा; त तैन गाहेलु: ते तुशे लेइ कोई भी कम्म असुख्तु न भौल्हु। 21 पण इस किसमेरी दुष्टात्मा बर्ते ते उपुवासे बगैर न निसै।

अपने मौतरे बारे मां यीशु एरी दूबारा भविष्यवाणी
(मरकुस 9 : 30 - 32 लूका 9 : 43 - 45)

22 ज़ैखन तैना गलिले मां अकौठे भुए त यीशुए तैन सैहीं ज़ोवः मैन्हेरु मड्डु भी मैन्हुं केरे हवाले कियुं गाहेलु। 23 तैना तैस मैरी छडैल्हे: ते तै टलेइयां दिहाड़े फिरी ज़ितो भौल्हो चले ऐन शुंनतां बडे परेशान भुए।

मन्देरी धडत

24 ज़ैखन तैना कफ़नहुंमे मां पुजे त हेकलरे चुंगी धडत घिन्ने बाले पतरसे का एइतां पुछने लगे, की तुशो गुरु हेकरी चुंगी धडत न दे? 25 पतरसे जुवाब दितो: हां देते: ज़ैखन पतरस घरे मां पुजो त यीशुए पैहिले ज़ोवः शमोन तेरो कुन हाले? दुनियारे बादशाह कोन लोकन केरां धडत घिनतन अपने मड्डन केरां या होरी लोकन केरां? 26 ज़ैखन तैनी ज़ोव की होरन केरां त यीशुए ज़ोवः फिरी त मड्डां बरी भोई जेआं। 27 पण तैन शकैइतरो मोको न मैल्हे त तू झिली पुड़ गैहितां कंटो लेइतां मैछली टलेइयां; ते ज़ै मछली पैहीली लागैल्ही, त तैसारु आशी खोलां, ते तीं चौवर सिक्के मैलनैण, ते तैन सिक्के नैहीतां इहीशो दुइये जनहां करी चुंगी (धडत) देइयां।

स्वर्ग एरे बादशैही मां बडडो कौन ?

(मरकुस 9: 33 - 38, लूका 9: 46 - 48)

18 तैखन चले यीशु का आए ते पुछने लगे: की अस्मानेरी बादशैही मां सैभन कैरां बडो कौने? ² यीशुए अक निकडु मड्डु एपु का कुजाव ते तैन मुझाटे खडु कियुं। ³ ते जॉने लगे: की सची गल्ल त इहे की तुस अपनो आप बदलतां निकडे मड्डे जैरे न बनथ त तुस परमेशेरी बादशैही मां कधी दाखल न भौल्ले। ⁴ एलेहेलेइ जै कोई अपनो आप एक्की मड्डे बराबर बनल्लो; त तै अस्मानेरी बादशैही मां सैभन कैरां बडो भौल्लो। ⁵ ते जै कोई एरे जैरे निकडे मड्डे मेरे नोवें सैहीं कुबूल केरते; त तै मीं कुबूल केरते।

पाप केरनेरी आजमेइशां

(मरकुस 9 : 42 - 48 ; लूका 17 : 1, 2)

⁶ ते जै कोई ऐन निकडन मैरां जै मीं पुड विश्वास केरते; त कैसकेरे लेइ अक बडी ठोकर बन्चे त तैसेरे लेइ एने ठीके की दूलाटेरो दूलेइटोल तैसेरे गले ऊंढो ढंढेहीतां डुघे सुमुन्द्रे मां डोबतां छडोरो लोडते। ⁷ ठोकरां केरी वजाही सैहीं मीं अपसोसे, इस दुनियाइ पुड ठोकरां त जरूर लैगनिण पण तैन पुड अपसोसे जैनकेरी वजाही सैहीं ठोकर लगे। ⁸ अगर तेरो हथ या तेरो पाव तेरे लेइ ठोकरारो जिरयो बनते; त तु तैस कैटतां छड; किजोकी तेरु टोटु या कांनो बेनतां जिंदगी मां दाखल भोनू रोडुए; ते तेरे दुइये हथ पाव सथे भोने सैहीं अगर तु नर्केरी अग्नी मां गास त तैल्लां केरतां तु टोटु या कांनो बेनतां रोडोस। ⁹ अगर तेरी अछ तेरे लेइ पापेरो जिरयो बनते; त तु तैस कैटतां शैरी छड: एक्की ऐछी सैहीं जिंदगी मां दाखल भोनू रोडुए ते तेरी दुइये ऐछी भोने सैहीं तु क्रकेरी अग्नी मां गास त तैल्लां केरतां तु कानू बेनतां रोडोस।

हेरोरी भैडरू दृष्टात

(लूका 15 : 3 - 7)

¹⁰ खबरदार इन मेरे नीके नीके हुकमन मैरां तु केन्ची एरे न बुझां: किजोकी आंव तीं सैहीं जोतां की तैनकेरे सुवर्गदूते हर बख्त मेरे असमानी बोवेरे तुत्रेरां तकते रहतन। ¹¹ किजोकी मैन्हेंरे मड्डे हेरोरे लोकन तोप्ने ते मुखती देने एवरोए।

¹² तुशो खियाल कुने? की केसकौई का शैव भैदां भोन, ते तैस मैरां अक हेरोए; त कुन तै पुहाल नदनुवें भैदां तैडी जैरे पहाडे पुड छैडतां तैस हेरोरी भेडी तोप्ने न गाहे? ¹³ ते जैखन तैस तै हेरोरी भैद तोसां मैले; त आंव तुसंन सैहीं जोतां की बडी खुशी बनाल्लो। ¹⁴ ऐलहेरे लेइ तुशो असमानी बोव ऐन न चाहे की ऐन निकन मैरां भी कोई जेया न भोए।

अपरैधन सैहीं बरताव

¹⁵ अगर तेरो दूला तीं सैहीं बुरयाई केरते; त तु अकैल्ले मां तैस समझा: अगर तैनी तेरी गल्ल शूनी, त तीं तै अपनो दूला मत्रो। ¹⁶ अगर तै तेरी गल्ल न शूने, त तु एपु सैहीं साथी अक या दुई मैन्हें नैइयां: किजोकी हर गल्ली मां दुई या दूलाई मैन्हें शहात भोतन। ¹⁷ अगर तै तैनकेरी भी न शूने; त तु किलिस्यारे लोकन पतो दे: अगर तै किलिस्यारे लोकां केरी भी न शूने; त तु तैस चुंगी घिन्ने बाले ते बुत पूजा करने बालेरे बराबर बुझां।

रुकनू ते मौको देनो

¹⁸ आंव तुसंन सैहीं सच्च जोताइ की: जैन किछ तुस जमीनी पुड बंधेले त समझा की असमाने पुड बंधेरुए; ते जैन किछ तुस जमीनी पुड खोल्लेले त समझा की असमाने पुड खोल्लेरुए। ¹⁹ फिरी आंव तुसंन सैहीं सच्च जोताइ, कि अगर तुसंन मैरां दुइय जने धेरती पुड कोची गल्ल तैना मगन तैन केरे लेई तै भोल्ली। ²⁰ किजोकी जैडी दुई या दूलाई मैन्हें मेरे नोवें सैहीं अकौठे भोतन: आंव तैनकेरे मुझाटे भोताइ।

बे रहंम सेवकेरू दृष्टात

²¹ जैखन पतरसे यीशु का एइतां पुछ: परमेशर अगर मेरो दूला मीं सैहीं बुरयाई केरतो राहे त आंव कैत्रे बार माफ केरी? कुन सत बार। ²² यीशुए जुवाब दितो: आंव तीं सैहीं जोतां की सत्तेरे सहत्र बार माफ केरतो रेहीयां।

²³ बस्सा अस्मानेरी बादशाही तैस बादशाहेरी जैरीए जैनी सोचु की आंव अपने नोकरन कैरां हिसाब घिनी। ²⁴ जैखन तै हिसाब घिन्ने लगे: त अक मैन्हें तैसका हाजर कियो: जैनी लखैइं रुपैइए बादशाहे कैरां नियारे थिये। ²⁵ किजोकी तैसका कर्जो मुकाने जो किछ न थु: तैसेरे मालके हुकम दितो की एसेरे बाल बच्चे कौन्श ते जैन किछ भी आए सब बेचतां कर्जो ऊसुल केरा। ²⁶ पण तै नोकरे मालके का मिनत केरतां जॉने लगे: की मीं किछ मोको दे, ते आंव तेरो सारो कर्जो मुकाल्लो। ²⁷ मालके तैस नोकरे पुड बडो तरस आव: ते तैनी तै छैडी दितो ते तैस कर्जो भी माफ कियो।

²⁸ जैखन तै नोकर तैठां चलो जेव; त तैस अक एरो नोकर मैल्लो, जै तैसेरो खास दौसत थु, ते तैस तैनी शौव दीनर दितोरे थिये: तैनी तै गलेरां दूलाव ते जॉने लगे मेरो कर्जो कड। ²⁹ तैसेरो दौसत तैसेरे पांवन पैइतां जॉने लगे: मीं किछ मोको; दे ते आंव तेरो सारो कर्जो मुकाल्लो। ³⁰ पण तैनी तैसेरी अक गल्ल भी न शूनी: ते तैनी तै दैमां छडो की जां तगर कर्जो न देस तां तगर दप्पोरो राह। ³¹ जैखन होरी नोकरेइं ऐन शूनू; त तैना बडे परेशान भुए: ते मालके का गैहीतां सारो बिस्तार शूनाव। ³² तैखन मालके तै नोकर कुजेइतां जौव: औ बेइमान नोकरा मीं तेरो सारो कर्जो माफ कियो; किजोकी तीं मीं का मिनत मगोरी थी। ³³ कुन तेरे लेइ जरुरी न थु: की जैन्चरे मीं तीं पुड तरस आव तैन्चरे तु भी अपने दौस्तन पुड तरस खाथो? ³⁴ मालके सरक आई; ते तैनी तै नोकर जलादां केरे हवाले कियो: की जां तग्र मेरो सारो कर्जो न देस तां तग्र दप्पोरो भोए।

³⁵ तैखन यीशुए जौव: अगर तुसंन मैरां हर अक अपने दूलाए दिले सैहीं माफ न केरे त मेरो असमानी बोव भी तुसंन सैहीं एंचरे पैश एजैल्लो।

फैखतरे बारे मां यीशु एरी तालीम

(मरकुस 10 : 1 - 12)

19 जैखन यीशुए ऐन गल्लां जोइ छैडी: त तै गलिले मैरां गैहीतां दरियाए यरदनरे पार युहुदियेरे अलाके मां चलो जेव। ² बडे लोक यीशु पत्ती चले जे; ते यीशुए तैन शिफा दिती।

³ किछ फ्रिसी लोक अजमानेरे लेइ यीशु का आए; ते जॉने लगे: कुन मैन्हें अपनी कौन्श केन्ची भी एबेरे लेइ फारखती देनी जैइजे। ⁴ यीशुए जुवाब दितो: कुन तुसैहीं नैइं पदरू की सैभन कैरां पैहीले परमेशरे मडद ते कौन्श बनेवरां थियां।

⁵ ते जौव: मडद अपने हाज बोवे कैरां कनारे बिशतां एपनी कौन्शी सैहीं साथी राहेलो; ते तैन दुइये अक जान भौल्ले। ⁶ ऐलहेरेलेई तैना दुई नैइं बल्के अक जान भौल्ले? ऐलहेरेलेइ जैस परमेशर जोडे तैस मैन्हें अलग न केरे। ⁷ फ्रिसैइं यीशुए पुछ: फिरी मुसै एह हुकम किजो दितो की तलाकनामां लिखतां छैडी देथ? ⁸ यीशुए जुवाब दितो: की मुसै तुशै कठोर दिलां केरी वजाही सैहीं एपनी कौन्शन छडनेरी इजाजत दितोरी थी: पण शुरु मां ऐन न थुं। ⁹ पण आंव तुसंन सैहीं सच्च जोताइ की: जै कोई एपनी कौन्शी बदमेशरे बगेर केन्ची होरी गल्ली पुड शारते; ते तै केंची होरी सैहीं डूलाह केरते; त तै जन्हा केरते; ते जै शैरोरी कौन्शी सैहीं डूलाह केरते, त तै भी जन्हा केरते।

¹⁰ चेलेंइ यीशु सैहीं जौव: अगर मुन्शेरो ते कौन्शारे रिशतेरो ईही हाले त डूलाह न लोडे बनेवरो। ¹¹ यीशुए जुवाब दितो; ईही गल्ल सैभी केरे काबले कुबुल नैइं: इन तैना केरतन जैन एरही जैरही अक मैल्लोरी भोए। ¹² किछ त जर्मनेरे खस्सी भोतन ते किछ डूलाहेरे न काबले भोतन: ते किछ एरे भी आन्ह; कि जैन अस्मानेरी बादशैयरे लेइ डूलाहे न केरन, ते जै कोई तैस कुबूल केरी सखते त केरे।

बचन बरकत देनी

(मरकुस 10 : 13 - 16 लूका 18 : 15 - 17)

13 तैल्लां पत्ती लोकेइं निकां मड्डां यीशु का आंन्हां: ताके यीशु तैन पुड़ हथ रखतां दुवा केरे, पण चेलेंइ तैन लोक धमकाए। 14 यीशुए जॉव: निकां मड्डां मीका एजने देथ, किजोकी अस्मानेरी बादशाही ऐना करीये। 15 यीशुए तैन निके मड्डन पुड़ हथ रखतां तैठां अगरोहूं चलो जेव।

दौलत मंद जवान ते हमेशरी जिन्दगी

(मरकुस 10 : 17 - 31 लूका 18 : 18 - 30)

16 अक मैन्हुं यीशु का आव ते पुछने लगे: हे गुरु आंव कुन रोडु कम्म केरीं की जैस्सेहीं परमेशरेरी बादशाही हासल केरीं? 17 यीशुए जुवाब दितो: तु मीं रोडे कम्मरे बारे मां किजो पुछतां: रोडो त सिर्फ अक्के; अगर तु जिंदगी हासल केरनी चहतां त हुकमन पुड़ अमल केर। 18 तैनी मैन्हें पुछ: कौस जैरे हुकमं पुड़: यीशुए जुवाब दितो: खुन नैइं केरनो, जन्हा नैइं केरनो, ते चोरी नैइं केरनी, ते झुठी शाहात नैइं देनी। 19 अपने हाज बांवां केरी सेवा केर; ते अपने पड़ौसी सैहीं अपने बराबर प्यार केर। 20 तैनी नोजुवाने जुवाब दितो; ऐन सैभी हुकमन पुड़ आंव अमल केरतो एवरोहीं: हुनी मीमा कौ कमीए? 21 यीशुए जुवाब दितो: अगर तु पबित्र भोनु चहतां; त गा आपनु सभ किछ बेचतां गरीबां केरी मद्दत केर, त तीं असमाने मां खजानो मैल्लनोए, ते एइतां मीं सैहीं साथी चल। 22 जैखन तैनी नोजुवाने ऐह गल्ल शुनी; त बड़ा परेशान भोइतां चलो जेव: किजोकी तै बड़ो अम्बीर थु।

23 तैखन यीशुए अपने चलन सैहीं जॉव: ऐन सत्रे की अम्बीरेरु अस्मानेरी बादशाही मां दाखल भोनु मुशक्के। 24 फिरी आंव तुसनं जोतां की ऊंटेरु सुईयेरु नाके मन्हेइं निसनु सुखतुए; ते अम्बीरेरु अस्मानेरी बादशाही मां दाखल भोनु असूखतुए। 25 जैखन चेलेंइ ऐह गल्ल शुनी त तैना बड़े हेरान भोइजे: ते यीशुए पुछने लगे की फिरी कसैरी मुखती भोईं सख्चे। 26 यीशुए तैनकेरे पासे तैकतां जॉव: मैन्हुं केरे लेइ त ऐन मुशक्के पण परमेशरेरे लेइ किछ मुशकल नैइं। 27 पतरस खडो भोइतां जॉने लगे: हेर असां सभ किछ शैरतां तीं पत्ती चलोरेम: ते असन कुन मैल्लुए? 28 यीशुए तैन जुवाब दितो; की आंव तुसनं सैहीं सच्च जोतां: की जैखन मैन्हेरु मड्डु अपने पबित्र तख्ते पुड़ बिशैल्हो; त तुस भी मीं पत्ती चलने बाले; ते बहरे तखतन पुड़ बिशतां इस्आएलेरे बहरे कबीलां केरो इन्साफ कैरेल्हे। 29 ते जैनी कंचे अपन घरां ते द्ला, बेहीन, हैई बोव, बाल बचे, मेरे लेइ तैडी जैरे छडेरुए: तैस शौव गुनहा फल मैल्हेलो; ते हमेशारी जिन्दगरो बास भौल्हो। 30 पण बडेन" जैना अगरी अगरी थिये तैना पत्रावं रहनेण; ते जैन पत्रावं थिये तैना अग्रोवं भोनेण।।

बागरु दृष्टान्त

20 किजोकी असमानेरी बादशाही तैस जिमदारेरी जैरीए जै झैझां उठतां बेइर निसते; ते अपने दाछरी बागी मां मुजुरन कम्मे लाते। 2 तैनी अक दीनार रोज मुजुरी देनेरे लेइ तैना बागी मां भेजे। 3 कोई द्लाई घैन्टन बाद फिरी बेइर निस्सो: ते हेरने लगे ते किछ मुजुर बजारे मां बेकार खेडौरेन। 4 तैनी तैन सैहीं जॉव: तुस भी मेरी बागी मां एजा ते जैन किछ जैईज भौलु आंव तुसनं देई दैल्हो। 5 बस्सा तैना चले जे: ते फिरी दुपहरेइं ते ड्लौवझरे मोके बेइर गैहीतां फिरी एन्ने कियूं। 6 दिहाडी डुबने केरां थोडे जैरे पैहीले भी तैनी बेइर निसतां किछ होरे भी खडखडे लैहीतां तैनी तैन पुछ: तुस झैझैरे देंते किजो खेदोरेथ? 7 तैनेइं जुवाब दितो: असां कंचे कम्मे नैइं लेवरे: तैनी तैन सैहीं जॉव: तुस भी मेरी बागी मां एजा ते कम केरा।

8 जैखन ड्लौवझ भोई, त तैनी बागरे मालके अपने मुन्शी सैहीं जॉव: की पैहीले लगोरे मुजुरन दे पत्ती कम्मे लगोरे मुजुरन सैभन दिहैडारे पैइंसे दे। 9 जैन ड्लौवझरे मोके मुजुर कम्मे लगोरे थिये; तैन अक अक दिनर मैल्हो। 10 जैन मुजुर झैझां कम्मे लगोरे थिये तैनकेरी बारी आई त तैनेइं सोचु की असन जादे मैल्नेण: पण तैन भी अक अके दिनर मैल्हो। 11 तैस मलकेरे बारे मां तैन एपु मन्हेइं बुन बह गल्लां केरने लगे। 12 पत्ती लेवरे मुजुरेइं सिर्फ अक घैन्टो कम कियेरुए: ते असैइं सैरी दिहेडी धुपी पुड़ कम कियेरुए: पण तीं तैन

भी अस्ने बराबर मुजुरी दित्ती। 13 तैनी तैन मैरां एक्की सैहीं जॉव: मीयां मीं तीं सैहीं कोई बै इन्साफी नैइं कियोरी कुन तीं सैहीं अक दिनार दिहैडारी गल्ल नैइं कियोरी? 14 ऐलहेरेलेईं जैन तेरुए तैन द्ला ते चलो गा: ऐह मेरी मर्जीए की पत्ती लगोरे मुजुरन भी एत्रे देइं। 15 कुन मीं ऐन हक नैइं की अपने माले मैरां जैन चैहीं तैन केरीं: ते तीं मेरी गल्ल बुरी लगोरीए लगने? 16 बस्सा जैना पत्ती थिये तैना पैहीले; ते जैना पैहीले थिये; तैना पत्ती भोनेण।

अपने मौतरे बारे मां यीशु एरी द्लाइयोंव भविष्वाणी

(मरकुस 10 : 32 - 34 लूका 18 : 31 - 34)

17 युरोशलमें जो गहंते बार यीशुए अपने बहरे चले अलग नैइतां बत्ती मां तैन सैहीं जॉव। 18 हेरह अस युरोशलमें जो चलोरेम मैन्हेरु मड्डु पुरैहूतां ते ध्रम गुरु केरे हवाले केरी दैल्हे; ते तैना कतलेरो हुकम तैसेरे लेइ शुरु कैरेल्हे। 19 तैस गैर युह्दी केरे हवाले कैरेल्हे तैन मैन्हेरे मड्डेरी हासी बनाल्हे; ते तैस बेंतेइं बाहेले, ते फिरी मैरी छडैल्हे; ते तै दलेइयांव दिहाडे फिरी जिंतो भौल्हो।

एकी अम्मरी बिनती

(मरकुस 10 : 35 - 45)

20 तैखन जैबदेरे मड्डां केरी अम्मा अपने मड्डन साथी यीशु का आई; ते तैस्सका मथौ टेकतां चहती थी की किछ मिनत केरीं। 21 यीशुए तैस पुछ: तु कुन चहचां? तैसां जुवाब दितो हुकम दे की तेरी बादशाही मां मेरे मड्डन मैरां अक तेरे दैहीने, ते दुइयांव बांए पासे बिशै। 22 यीशुए तैस जो जॉव: तुस न जानथ की कुन लोरेथ मगने: ते कुन तुस तै कटोरो पी सख्तथ जै आंव पीने बालोइ तैनेइं जुवाब दितो: हां अस पी सख्तम। 23 यीशुए तैन सैहीं जॉव: तुस मेरे कटोरो पी सख्तथ; पण ऐन मेरु कम्म नैइं की एक्की दैहीने पासे ते होरी बांए पासे बिशैल्हीं: ऐह ठार जैसेरे लेइ मेरे बोवेरी तरफां रखोरिए तै तैसेरे लेइए।

24 जैखन होरी दश चेलेंइ एन शुनु; त तैना बड़े नाराज भोईजे। 25 पण यीशुए तैना नेडे कुजाए; ते तैन सैहीं जॉव: होरी कौमां केरे खदपैच तैन पुड़ हुकुमत केरतन; ते तैनकेरे आफसर तैन पुड़ अखतियार रखतन। 26 तुसन मां ऐरहु न लोडे भवरु: बलके तुसनं मां जै बडो बन्नो चहते तै सैभी केरी सेवा केरे। 27 जै सैभन केरां बडो दर्जा हासल केरनो चहते; तै सैभी केरो गुलांम बने। 28 किजोकी मैन्हेरु मड्डु ऐलहेरे लेई नैइं एवरु की सेवा केराए; बल्के ऐलहेरे लेई की सेवा केरे, ते अपनी जान बड़ां केरे लेइ बलिदान केरे।

दूइय कानां केरु दृष्टान्त

(मरकुस 10 : 46 - 52 लूका 18 : 35 - 43)

29 जैखन यीशु त तैसेरे चले यरीहोए मैरां चलोरे थिये, त बड़े लोक तैस पत्पती आए। 30 दुई काने बत्ती मां बिशोरे थिये: जैखन तैनेइं ऐन शुनु की यीशु इस बत्तां एवरोए; त तैना चिंटां मारने लगे: औ दऊदरा मड्डा असन पुड़ रेहेंम केर। 31 लोक तैन कांन्र धमकाने लगे; की चुप रहथ, पण तैना मंन चिंटां मारने लगे: औ दऊदरा मड्डा असन पुड़ रेहेंम केर। 32 यीशु खेडौहु ते तैन कुजेइतां पुछने लगे: जौथ आंव तुशे लेइ कुन केरीं? 33 तैन कानेइं जुवाब दितो; हे प्रभु अस चहतम की ईशी एछन लो एजे। 34 यीशुए तैन पुड़ बडो तरस आव, ते तैनी तैनकेरे एछन पुड़ हथ रखो ते तैन लहने लगे, ते दुइये काने यीशु पत्ती चले जे।।

यरुशलमे मां जीत दाखल

(मरकुस 11 : 1 - 11; लूका 19 : 28 - 40 यूहन्ना 12 : 12 - 19)

21 जैखन तैना युरोशलमेरे नेडे पुजे; त जैतून पहाडे पुड़ बैतफिगे मैरां अपने दुइ चले ऐन जोइतां अग्रोहुं भेजे की। 2 सामने उस ड्लौवें मां गाथ: ते तैडी पुजैल्हे, त तुसनं अक गधी बंधोरी मैल्हीयें, ते तैस साथी तैसेरो अक बचो भी भोनेए: तैस खोल्लां मीं का आंन्हां। 3 अगर कोई तुसनं किछ पुछे त तुस जोइयथ, की प्रभु परमेशरे ऐसेरी जरुरते: ते तै लुशी तैस वापस

भेजलहो। 4 इन सभ किछ ऐलहरे लेई भोंव; की नेबेइं जैन ज़ोवरु थुं; तैन पुरु भोंव की।

5 सिवनेरी कुइये सैहीं ज़ोथ की तेरो बादशहा तीं का एवरोए, ते तै बड़ो हालिमें ते तै गैधी पुड़ चैढतां एवरोए: बल्के गैधरे बचे पुड़। 6 तैइं चले चले जे ते जैन्चरे यीशुए हुकम दितोरो थु: तैन्चरे कियूं। 7 तै गधी ते तैसारो बच्चो एन्तां पुजे: ते तैस पुड़ लिगडां छडां: ते यीशु तैस पुड़ चैढतां चलो। 8 हछे लोकन मारां बड़े लोकेइं अपन लिगडां बत्ती मम्हेइं बछेवरां थियां, ते किछेइं बुडा केरे डाल केटतां बत्ती मम्हेइं छडोरे थिये। 9 ते तैना लोक जैना यीशु सैहीं साथी अग्री अग्री पत्ती चलारे थिये: तैना नहरे देते थिये; की दावदेरे मड्डेरी रीफ भोए: मुबारके तै जै परमेशरे नोवें सैहीं एदते: सैरी दुनियाईं मां तैसेरी तारीफ भोए। 10 जैखन यीशु युरोशलमे मां पुजो; त सारे शहरे मां हलचल मैची जेई: ते लोक पुछने लगे को एह कौने? 11 सारे लोकेइं ज़ोव: की ईही गलिलेरे शहर नस्रतेरो नबी यीशुए।

मन्दरेरे बुपारी कढने

(मरकुस 11 : 15 - 19 लूका 19 : 45 - 48; यूहन्ना 2 : 13 - 22)

12 यीशु प्राथना भवने मां जेव, ते जैना तैडी बपारी बपार केरते थिये सभ तैठां कढे: तैनी सुनरां केरी दुकान ते कुबूतर बेचने बालां केरी ठारां टलोडी। 13 ते तैनी तैन जो ज़ोव: लिखेरुए की एस जो मेरु घर दुवा केरनेरु घर ज़ोल्हे: पण तुसैहीं त एह डैकू केरो अड्डो बनेवरोए।

14 तैखन काने टोटे प्राथन भवने मां यीशु का आए: ते तैनी तैना सभ बज्जाए। 15 पण जैखन मन्दिरेरे पुरैहूत ते व्यवसथारे गुरुएइं ईही तमाशा हेरो ते हेकली मां मड्डन केरां नहरे देते शुने की दावदेरे मड्डेरी तारिफ भोए: ऐन हेरतां तैन बडी सर्क आई। 16 तैनेइं यीशुए पुछू: की तु शुन्ने लोरोस की ऐन कुन ज़ोने लोरेन? यीशुए तैन सैहीं ज़ोव: हां आव शुन्ने लोरोइं तुसैइं कधे नैइं पढेरु की तीं दुध पीते बचन केरां भी तीं अपनी पुरी तारीफ वमावाइ। 17 ते जैखन तै शहर छेडतां बैरोहुं चलो जेव त: बैतनियां डलोवें मां रात गुजारी।

बे फल अंजीरेरो बूट

(मरकुस 11 : 12 - 14, 20 - 24)

18 झैझां जैखन यीशु शहरे मैझो एवरो थु; त तैस डलुख लगी। 19 तैनी बत्तरे डलैखी अक फैगोरो बूट लाहु: ते जैखन तै नेडे पुजो त पटलां केरे आलावा तैस पुड़ किछ न लाहु: तैलहरे लेई तैनी बूटे जो ज़ोव: कधे भी तीं पुड़ फल न लगलहो ते तैखने ते बूट शुकी जेव। 20 चेलेंइ ऐन लाहुं त हेरान भोइतां पुछने लगे: एह फैगोरो बूट अक दम कैन्चरे शुकी जेव? 21 यीशुए जुवाब दितो: आव तुसंन सैहीं सच्च ज़ोताइं की अगर तुसंन विश्वास पक्कोए ते तैसमां कोई शक नैइं त ज़ैन फैगोरे बूटे सैहीं भोंव तैन तुस भी केरी सखतथ: बल्के ऊस पहाडे जो ज़ोल्हे की एठां उखडतां सुमुद्रे मां गा: त तैने भोल्हु। 22 अगर तुसंन विश्वास पक्कोए त ज़ैन किछ तुस प्राथनाइं मां मगैल्हे; तैन तुसंन मैल्ही गहु?

यीशु एरे इखतियारे पुड़ सुवाल

(मरकुस 11 : 27 - 33 ; लूका 20 : 1 - 8)

23 जैखन यीशु प्राथन भवने मां ज्ञान शुन्ने लोरो थु; त मन्दिरेरे पुरैहूत, ते युहुदी सियांने यीशु का एइतां पुछू: तु ऐन कम्म कसेरे अखतियारे सैहीं केरतस; ते तीं ऐन कम केरनेरो अखतियार कैनी दितोरोए? 24 यीशुए जुवाब दितो: आव भी तुसंन अक गल्ल पुछताइं: अगर तुस तैलहेरो जुवाब देल्हे; त आव भी ज़ोइल्हो की आव ऐन कम कसेरे अखतियारे सैहीं केरताइं। 25 युहुन्ना जै बपतिसमां देने बालो थु; तै कौडैरो थु? अस्मानेरी तरफां थु, या की इन्सानेरी तरफां थु? तैना एपु मम्हेइं बँस केरने लगे, की अगर अस ज़ोतम की अस्मानेरी तरफां थु; त फिरी तैनी ज़ोनुए की फिरी तुसैइं तैसेरु यकीन की नैइं कियेरु। 26 पण अगर अस ज़ोतम की इन्सानेरी तरफां थु: त लोकां केरो भी डरे किजोकी लोक युहुन्ना नबी मनते थिये। 27 ऐलहरेलेई: तैनेइं यीशुए जुवाब दितो: अस केंची न ज़ानम: यीशुए भी तैन सैहीं ज़ोव: त आव भी तुसंन सैहीं न ज़ोइ की आव इन कम्मा कसेरे अखतियारे सैहीं केरताइं।

दुइय मड्डां केरु दृष्टान्त

28 हुनी तुशी राई कुने? केंची मैन्हेरां दुई मड्डां थियां; तैनी बडे मड्डे का गैहीता ज़ोव: अज्र दाछरी बागी मां गा ते कम्म केर। 29 तैनी जुवाब दितो: आव न गैहीं, पण बादे मां पशतेइतां चलो जेव। 30 फिरी बोवें होरी मड्डे का भी गैहीतां एन्ने ज़ोव: तैनी जुवाब दितो: हछा खरी जनाब: पण जेव न्ना। 31 ऐन दुइने मारां केनी अपने बोवेरो हुकम मन्त्रो? तैनेइं जुवाब दितो बडे हुकम मन्त्रो: यीशुए तैन सैहीं ज़ोव, की आव तुसंन सैहीं सच्च ज़ोतइं की चुंगी धड़त घिन्ने बाले ते बदचलन कौन्शां तुसंन केरां पैहिले परमेशरेरी बादशाही मां दाखल भौल्ही। 32 किजोकी युहन्ना तुसंन धर्मैरी ते परमेशरेरी बत्त हेराने एवरो थु: ते तुसैइं तैसेरु यकीन न कियूं; पण चुंगी घिन्ने बाले ते बदचलन कौन्शेइं तैसेरु यकीन कियूं ते; ऐन हेरतां भी तुसैइं पसतां न्ना की तैस पुड़ विश्वास केरेथे।

दुष्ट ज़मीबदारेरु दृष्टान्त

(मरकुस 12 : 1 - 12 ; लूका 20 : 9 - 19)

33 अक होरी कहांनी शुना: एकी ज़िम्दार अक दाछरी बाग लाई ते तैसेरे ज़ोवरे पासन बाड़ दितो; ते दाछरो रस कढनेरे लेइ अक हौवज बनाव; ते तैस बागरी हेर गैश केरनेरे लेइ अक उची कुडी बनाई ते फिरी तै काशत केरने बालन ठेके पुड़ देइतां कौच दुर प्रदेशे जो चलो जेव। 34 जैखन दाछ टलोइनेरो मोको आव त तैनी अपनो हेसो नैनेरे लेइ अपने नोकर तैन ठेकेदारन का भेजे। 35 ते ठेकेदारेइं तैसेरे नोकर कोई झूसो कुटो कोई मारो ते केंची जेई घोडेइं दिती। 36 तैखन मालके किछ होरे नोकर भेजे जैना पैहिलन केरां जादे थिये: पण ठेकेदारेइं तैन सैहीं भी तैरहो जैरहो सुलूख कियो। 37 आखर कार तैनी अपनु मड्डु तैन का भेजु: ते सोचु की मेरे मड्डेरो त लिहाज केरल्हे। 38 पण जैखन ठेकेदारेइं तैसेरु मड्डु लाहुं: त एपु मम्हेइं मशोरो केरने लगे: की एजा एस सेवां मारम ते ऐसेरी बागी पुड़ कब्जो केरम। 39 चाली तैनेइं तैन मड्डु बागी केरां बेइर नैइतां मैरी छडु। 40 ते जैखन बागरो मालक एपु एजैल्हो, त तैन ठेकेदारन सैहीं कैरो सुलूख केरल्हो? 41 तैनेइं जुवाब दितो: तै तैन बदमाशन बुरे तरीके सैहीं मैरतां बागरो ठेको होरी ठेकेदारन देल्हो: जैना मोके पुड़ तैसेरो हेसो तैस देन। 42 यीशुए तैन सैहीं ज़ोव: की तुसैइं पबित्र बचने मां नैइं पढेरु की: जै घोड मिस्त्रेइ रद्वी कियोरो थु, तैहे कुनेरो घोड भौल्हो: ऐन कम परमेशरे कियेरुए, ते ईशी नजरी मां ऐन अजीब? 43 ऐलहरे लेइ आव तुसंन सैहीं सच्च ज़ोतइं: की परमेशरेरी बादशाही तुसंन केरां घिनी गाहेले: ते तैन लोकन जैना फल देल्हे तैन दिती गाहेली। 44 ते जै कोई इस घोडे पुड़ खिरकेल्हो त तैसेरे टुकडे टुकडे भोई गाहेले: पण जै एस उंढो बिछडेल्हो त तैस पिहतां छडेल्हो। 45 मन्दिरे पुरैहूत ते फ्रिसैइं यीशुएरी एह कहनी शुन्तां सैम्झी जे की यीशु ऐन गल्लां इशे बारे मां ज़ोने लोरोए। 46 तैनेइं यीशु ट्लानेरी कौशीश की पण लोकन केरां डरते थिये किजोकी तैना यीशु नबी मनते थिये।

डलाहरे धामरु दृष्टान्त

(लूका 14 : 15 - 24)

22 यीशु फिरी कहनेरे तरीके सैहीं ज़ोने लगे। 2 अस्मानेरी बादशाही एकी बादशाहेरी ज़ैरीए; ज़ैनी अपने मड्डेरे डलाहे मां। 3 अपने नोकर भेजे की तैन लोकन ज़ैन जेई डलाहरी धाम बनेवरी थी: तैन कुजान पण तैना न आए। 4 तैखन तैनी अपने नोकर ऐन ज़ोइतां भेजे की ज़ैन जेई डलाहरी धाम बनेवरी थी, तैन ज़ोथ की रौट्टी बनोरीए मीं बडां बडां गब्बां मारोर्न: ते सभ किछ तियार भौवरुए, ते डलाहरी धामी मां शामल भौथ। 5 पण तैनेइं कोई परवहा न की, कोई अपने उडारे मां चलो जेव; ते कोई अपने कारोबहरे मां लगो ते कोई कौरां चलो जेव। 6 किछेइं तैसेरे नोकर टलाइतां तैनकेरी बेजती की: ते जाना भी मैरी छडु। 7 बादशाहे बडी सर्क आई: ते तैनी अपने सिपाही भेजतां तैना कातली भी मैरी छडु ते तैनकेरे शहरे अग लेइतां छडी। 8 तैखन तैनी अपने नोकरन सैहीं ज़ोव: डलाहरी धाम तियारे पण ज़ैन कुजेवरे थिये तैन एस काबले नैइं। 9 ऐलहरेलेइ तुस चुबत्ती मां गाथ ते ज़ैने तुसंन मैल्हत्तन, तैना सभ इरहां कुजाथ। 10 चाली तैना नोकर चले जे, ते ज़ैने

खरे बुरे तैन मैल्ले: सब अकौट्टे ड्लाहे मां आन्हें ते मेंहानेइ सैहीं घर भेरतां भोवं।

11 ते बादशाह मेंहान तकने अंत्र आव: त तैसेरी नजर एकी मैन्हुं पुड़ पैई जै ड्लाहे मां रोड़ां लिगडां लेइतां न थु एवरो। 12 बादशाह तैस पुछू मियां; तु ड्लाहेरे लिगडन मां की नैइ एवरो: पण तैसेरी जबान बंद भोई जेई। 13 ऐस गल्ली पुड़ बादशाहें अपने नोकरन सैहीं जांवं: ऐसेरे हथ पाव बंधतां बेइर अंधरे मां छड्डा जैडी लेरां देंतो राहे, ते दंत चापतो राहे। 14 किजोकी कुजेवरे त बडेन पण चुनारे थौंढेन।

कैरे जो धडत देनी

(मरकुस 12 : 13 - 17 लूका 20 : 20 - 26)

15 तैखन फ्रिसी तैठ्ठां चले जे: ते एपु म्हेइं मशारो केरने लगे की एसेरी कोई गल्ल ट्लानेरे लेइ किछ करवाई की गाहे। 16 एल्हेरेलेई तैनेइं अपने किछ चले ते हिरोदेसेरे किछ मैन्हुं यीशु का भेजे: ते तैनेइं जांवं: की एह गुरु अस जानतम की तु सच्च जोतस ऐन सोचनेरे बगैर की कौन कैरोरे सच्चै सैहीं परमेशेरी बत्तां चलनेरी शिक्षा देतस। 17 एल्हेरेलेई असन जाँ की तेरी रेई मां कैसरे जो टेक्स येनी मैलियो देनो ठीके की नैइं? 18 यीशु तैनकेरी चाल सैमझी जेव: ते जांने लगे: एह लोकांवं मीं कीजो अजमातथ? 19 जै सिक्को टेक्सेरे हिसाबे मां देतथ मीं हेराथ: तैनेइं अक दिनार तैसका आंन्हों। 20 यीशुए तैन पुछू: इस पुड़ कसेरी मोहरे, कने कसेरु नोवं लिखेरुए? 21 तैनेइं जुवाब दितो: कैसरेरु, तैखन यीशुए तैन सैहीं जांवं जैन कैसरेरुए तैन कैसरे जो देथ ते जैन परमेशेरेरुए तैन परमेशेरे जो देथ। 22 तैना ऐन शुनतां हेरान रेही जे, ते तैस तैडी छेडतां चले जे।

कयामत ते ड्ला

(मरकुस 12 : 18 - 27 लूका 20 : 27 - 40)

23 तैस्से दिहैडी किछ सुदुकी जैना जोते थिये की कियामत नैइं भोनी: यीशु का आए। 24 ते तैस सैहीं ऐह सुवाल कियो की मुसै नेबें जोवरुए की अगर कोई मैन्हुं बैओवलाध मैरी गाहे त तैसेरो दला तैसेरी कौन्शी सैहीं ड्लाह केरे ताके अपने दलाएरे लेइ औवलाध पैइदा केरे। 25 ईशे इडी सत दला थिये: पैहिले ड्लाह कियो; ते तै मैरी जेव, किजो की तैस औवलाध न थी तैनी अपनी कौन्श अपने दलाएरे लेइ छेडी दिति, ताके तै तैसेरी कौन्श बेनी गाहे। 26 ऐहे वजा तैसेरे दुईयां टलेइयां बल्के सत्ते दलांन सैहीं एन्ने भोतु राहू। 27 आखर कार तै कौन्श भी मैरी जेई। 28 हुनी जो तै कौन्श कियामतरे दिहाडे तैन सत्ते दलांन मैरां तै कसेरी कौन्श भौल्लो? किजो की तै सैभी केरी कौन्श बनोरी थी। 29 यीशुए तैन जुवाब दितो: की तुसनं मां गलतीए तुस पबित्र बचने ते न परमेशेरी शक्ती जानतथ: ते एस्से वजाही सैहीं तुस टेप्लोरथ। 30 किजो की जिते भोनेरां पत्ती तैना ड्लाह न कैरल्ले: पण तैन सुगों मां परमेशेरे सुवर्गदुतां केरे जैरे भोनेण।

सेभना बड्डो हुकम

(मरकुस 12 : 28 - 34 ; लूका 10 : 25 - 28)

31 ते जैडी तगर कियामतरो येनी मुडवन मैरां जिते भोनेरो सुवाले: कुन तुसैइं तैन नैइं पढेरु जैन परमेशर जोते की, 32 आंव अब्रहामेरो परमेशर: ते इजाकेरो परमेशर ते याकुबेरो परमेशरांइ तै मुवोरां केरो परमेशर नैइं बल्के जितं केरो परमेशर। 33 लोक तैसेरी ऐह शिक्षा शुनतां हेरान रेहिजे। 34 जैखन फ्रिसैइं ऐन शुनु की तैनी सुदुकी केरु आशी बंद कियेरुए: त तैना तैस्का सभ अकौट्टे भुए। 35 तैन मैरां अक जै व्यवस्था जांने बालो गुरु थु, ते तै अजमानेरे लेइ यीशुए पुछने लगे। 36 हे गुरु शासने मां सैभन कैरां बड्डो हुकम कौन जैरो हे? 37 यीशुए जुवाब दितो: पभुं अपने परमेशरे सैहीं अपने सारे दिले सैहीं ते एपनी सैरी जानी सैहीं ते एपनी सैरी आवल्ली कैरां जादे मुहाबत कैरां। 38 सैभन कैरां बड्डो ते पैहिलो हुकम इहे। 39 जै दुईयांवे तै इहे की अपने पुडौसी सैहीं अपने बराबर मुहाबत रख। 40 सैरी व्यवस्था नबी ते सहाफी एन्ने दुई हुकमन पुड़ जादे जोर देतन।

मसीह केसेरु मड्डु ?

(मरकुस 12 : 35 - 37 लूका 20 : 41 - 44)

41 जैखन होरे फ्रिसी भी तैडी जम्हां भोई जे, त यीशुए तैन पुछू। 42 मसहीएरे बारे मां तुशो कुन खियाले: की तैन कैसेरु मड्डुए, तैनेइं जुवाब दितो: दाऊदेरु? 43 यीशुए तैन सैहीं जांवं: त फिरी दावद पबित्र आतमांइ सैहीं तैसजो परमेशर कीजो जोते जैन्चरे। 44 पभुं परमेशरे मेरे पभुं परमेशरे सैहीं जांवं: मेरे देहीने पासे बिश जां तगर आंव तेरे दुशमन तेरे पावंन हैठ न दलेंचीं। 45 बस्सा अगर दाऊद तैसजो पभुं जोते त तैन तैसेरु मड्डु कैन्चरे सैहीं भोई सखते? 46 तैन मैरां केंचे भी एक्की गल्लरो जुवाब न देइ बटो ते न केंचे तैल्लां बाद होरे सुवाल पुछनेरी हिमत की, की तैस्सैहीं सुवाल केरन।

शास्त्रन ते फरीसन कैरां खबरदार

(मरकुस 12 : 38 - 39; लूका 11 : 43, 46 ; 20 : 45, 46)

23

तैखन यीशुए बडे लोकन सैहीं, ते अपने चलन सैहीं ऐन जांवं। 2 व्यवसथारे बडे बडे गुरु ते फ्रिसी मुसैरी गेदी पुड़ बिशोरेन।

3 ऐल्हेरेलेई जैन किछ तैना तुसनं शिखालन तैस पुड़ अमल केरथ: पण तैनकेरी नकली पुड़ न चेलथ; किजो की तैना जांने त जोतन पण केरन न्ना। 4 तैना एरहो गिरको भारो जै केन्ची छुइयोए न्ना बंधतां होरी केरे कंधे पुड़ छडतन, ते एपु अंग्लोइ भी न हुरांन। 5 तैना जैन किछ केरतन सिर्फ मैन्हुं मां हेरहंनेरे लेइ केरतन: किजोकी तैन बडे बडे जन्नां ते खुल्ले कुरते लातन। 6 तैन मजलसी मां बिशनेजेई बडी रोडी, ते उची गैदी तोमन: प्राथन भावने मां बिशने जेई एमीं कुरसी तोमन। 7 ते तैना चहतन की लोक असन का झुकतां नमसकार केरन: ते असन जो रबी जांन। 8 पण तुस अपने आपे जो रबी न जुवेइयथ, किजोकी तुशो अक्के गुरुए, ते तुस सभ द्लाथ। 9 ते जमीनी पुड़ केन्ची जो बाजी न जोइयथ: किजोकी तुशो अक्के बाजीए जै सुगों मां हैं। 10 ते न केन्ची जो सुवामी जोइयथ किजोकी तुशो अक्के सुवामीए जै मसहीए। 11 पण जै तुसनं मां बड्डो भौल्लो; त तै तुशो सेवक बने। 12 ते जै कोई अपनो आप बड्डो बनल्लो; त तै निकडो बनाव गाहेलो: ते जै कोई अपनो आप निकडो बनल्लो त तै बड्डो बनाव गाहेलो।

शास्त्री ते फरीसी के पाखण्डे पुड़ मलामत

(मरकुस 12 : 40 ; लूका 11 : 39 - 42, 44, 52 ; 20 : 27)

13 ओ फरेबी व्यवसथारे गुराऊ, ते औ फ्रिसाव; तुसनं पुड़ अफसोसे: किजोकी तुसैइं अस्मानेरी बादशाही लोकां केरे दाखल भोनेरे लेइ बंद केरतां रखोरीए; किजोकी न त तुस एपु दाखल भोथ; ते न तैन दाखल भोने देथ। 14 ओ व्यवसथारे गुराऊ ते औ फ्रिसाव, ते औ फरेबाव मीं तुसनं पुड़ अफसोसे: किजोकी तुस रेंडी कौन्शां केरे घरन पुड़ कब्जो केरतथ: ते लोकन हेरांनेरे लेइ लेमीं लेमीं प्राथना केरतथ: तुसनं जादे सजाह मैल्लियें।

15 ओ व्यवसथारे गुराऊ; औ फ्रिसाव, ते औ फरेबाव तुसनं पुड़ अफसोसे: किजोकी तुस अक मैन्हुं एपनी मेर्जी पुड़ चलने बालो तोप्नेरे लेइ पैनी मां ते खुशकी मां तोपतथ: ते जैखन तै मैल्लते त तैस्से एपु कैरां दुगानो ब्रकी बनातथ।

16 ओ कांने रखवालालाव तुसनं पुड़ अफसोसे: की तुस जोतथ की अगर कोई मन्दिरेरी कसम केरे त कोई हर्ज नैइं: पण अगर मन्दिरेरे सौन्नेरी कसम केरे; त तै कसमरो पाबंद भौल्लो। 17 ओ कांनाव ते औ बै अक्काव बड्डु कुने सौन्नु या मन्द्र: जैसेरी वजाही सैहीं सौन्नु पाबित्र समझू गहते? 18 तुस जोतथ की अगर कोई मण्डैईयरी कसम केरे; त कोई हर्ज नैइं: पण चैदोरी चीजरी कसम केरे त तै कसमरो पाबंद भौल्लो। 19 एह कांनाव बडी चीज कौ जैरीए चैदोरी चीज या मण्डैई: जैसेरी वजाही सैहीं चैदोरी चीज पबित्र समझी गहचे? 20 अगर जै कोई मण्डैईयरी कसम केरते; त तै सैभी चैदोरी चीजां केरी कसम केरते। 21 जै कोई मन्दिरेरी कसम केरते त तै मन्दिरे मां रहने बालेरी कसम केरते। 22 ते जै कोई सुवर्गएरी कसम केरते, तै परमेशेरे तखतेरी ते तैस पुड़ बिशने बालेरी कसम केरते।

23 ओ व्यवसथारे गुराऊ: ते ओ फ्रिसाव, ते ओ फरेबाव तुसंन पुसुन पुड अफसोस: किजोकी तुस पुत्नेरो ते सॉफरो, ते जीरेरो दाशांव हेसो त परमेशरे जो देतथ: पण व्यवसथारी जादे गिरकी गल्लां जेंचरे इन्साफ रेहेंम दिली, ते इमान बिस्मतां छडेरुए: जुरुरी थुं तुस ऐन भी कैरथे ते तैन भी न शारथे।

24 ओ काने रखवालाव तुस मशशौ त छानंतथ पण सथथौ ऊंत निकृतथ।

25 ओ फरेबी व्यवसथारे गुराऊ तुसंन पुड अफसोस तुस कुटोरो त थाली बेरमेइं खुब मांजतथ पण अन्त्रमेइं गन्दगी भरतां। 26 ओ काने फ्रिसाव पैहिले कुटोरो ते थाली अन्त्रमेइं मांजा, ते फिरी बेरमेइं भी साफ भोए।

27 ओ व्यवसथारे गुराऊ; ओ फ्रिसाव, ते ओ फरेबाव तुसंन पुड अफसोस: किजोकी तुस तैन कब्रां केरे जैरेथ जैन सफैदी केरतां बेरमेइं बेडी रोडी लेहीयोचन, पण अन्त्रमेइं मुडदां केरी हड्डी, ते गैदी मुशकां सैहीं भरतां भोइचन।

28 ऐन्चरे तुस बेरमेइं, लोकन बडे धर्मी लेहीयोतथ; पण अन्त्रमेइं दुनियारी बेइमैनी सैहीं भरतथ।

शास्त्रन ते फरीसन पुड सजाहरी भविष्यवणी

(लूका 11 : 47 - 51)

29 ओ व्यवसथारे गुराऊ, ओ फ्रिसाव, ते ओ फरेबाव तुसंन पुड अफसोस : किजोकी तुस नेबी केरे कब्रां आसथान सुवांततथ ते धर्मी केरी कब्रां बनातथ।

30 ते जोतथ कि अग्र अस अपने बाजी दादरे जमाने मां भौथे त नबी मारने मां तैनकेरु साथ न देथे। 31 ऐन्चरे तुस एपु मनतथ की तुस नेबी केरे कत्ल केरने बालां केरी ओवलाधथ। 32 हुनी तुस तैनकेरी राहोरी कसर भी पुरी केरा।

33 ओ सप्पाव; ओ अफीकेरे बघाव: तुस नर्केरी अग्गी कैरां केन्चरे बंचैल्हे?

34 ऐलहेरेलेईं आंव नेबन, ते अक्कमदां, ते व्यवसथारे गुरु तुसंन का भेजने लोरोइं: तुस तैन मैरां किछन कत्ल कैरेल्हे, ते किछन सलेबी पुड टंगैल्हे: ते किछन अपने प्राथन भवने मां कोडेइं सैहीं मैरी दैल्हे: ते हर शहरे शहरे मां तैन पत्ती लगारे राहेले। 35 ताके सारे धर्मी केरो खुन जै धैरती पुड बगेवरोए, तै तुसंन पुड एजे: धर्मी हाबलेरे खुने कैरां लेइतां, ते बरकियाएरे मड्डे

जकरियेरे खुने तगर जै तुसैइं मन्दिरे मां सुखनरी ठैरी कत्ल कियोरो थु। 36 आंव तुसंन सैहीं सच्च ज़ोताइं की इस जमानेरे लोकन ऐना सैरी गल्लां केरे जिमबार बनाए गाहेले।

यरुशलमेरे लेईं शोग

(लूका 13 : 34, 35)

37 ओ युरोशलम, ओ युरोशलम: तीं नबी कत्ल किये, ते जैना तीं का भेजे तैना तीं मारे कुटे, ते मीं केही फेरेइं सोचु की तेरे बघन जम्हां केरीं जैन्चरे कुकडी अपने बघन अपने फघन हैठ रखचे: पण तुसैइं न सुखावं। 38 हेरा तुशु घर तुशे लेइ बैरान भोई गहते। 39 किजोकी आंव तुसंन सैहीं सच्च ज़ोताइं: की तुस मीं हुन्ना कैरां तैस बेले तग्र कथे न लैही बटल्हे, ज़ां तग्र न ज़ोल्हे मुबारके तै जै परमेशरेरे नोवें सैहीं एइते।

मन्दिरे बरबैदरी भविष्यवणी

(मरकुस 13 : 1 - 2 ; लूका 21 : 5 - 6)

24 यीशु मन्दिरे मैरां निस्तां चलोरो थु: ते तैसेरे चेले तैस का आए; ताके तैस मन्दिरेरी रंगब्रेंगी आमारतां हेरांम। 2 यीशुए तैन सैहीं ज़ोव: कुन तुस ऐन सब किछ हेरने लोरेथ? आंव तुसंन सैहीं सच्च ज़ोताइं की इडी कोई घोडे पुड घोड न राहेलो; बलके बघौइतां छड्डैल्हे।

मसीबत ते दु:ख

(मरकुस 13 : 3 - 13 ; लूका 21 : 7 - 19)

3 जैखन तै जैतुंन पहाडे पुड बिशोरो थु; त तैसेरे चेले अलैहिदे जैरे तैसका एइतां तैस सैहीं ज़ोने लगे: की असंन ज़ो की ऐन गल्लां कतह्नी भौनीण, ते तेरे एज्नेरो ते दुनियारो अंत भौनेरो कुंन निशान भौनोए? 4 यीशुए तैन सैहीं ज़ोव: खबरदार कोई तुसंन टपलाए त्रा। 5 किजोकी बडे मेरे नोवें सैहीं एज्नेण ते तैनेइं ज़ोनुए; की मसही आंवेइं; ते तैनेइं बडे लोक टप्लानेण। 6 लडैईं भौनीण ते लडैईं केरी अफुवां शुनोल्ही, खबरदार डेरथ त्रा: किजोकी ऐन गल्लां जुरुरी

भौनीण पण हेजु खातमो नैइं भौनो। 7 किजोकी कौमी पुड कौम, ते बादशैही पुड बादशाही चढहाईं केरेल्ही, ते ठैरी काल पैल्हो, ते भुंजल एज्नेल्हे।

8 मसिबतां केरी शुरुआत भी ऐन्ने गल्लेइं सैहीं भौनीए। 9 तैखन लोक तुसंन टलेइतां बडी सख्त सज्हा दैल्हे; ते कत्ल कैरेल्हे: ते मेरे नोवेंरे कारण सब कौमां केरे लोक तुसंन सैहीं बै रखेले। 10 तैस मोके बडे लोक विश्वासे कैरां दुर भोइतां एकी हारी टलुवाल्हे, ते एपु मन्हेइं भी बेर रखेल्हे। 11 ते बडे झुटे नबी दुनियाईं मां निस्नैण ते तैनेइं बडे लोक टप्लानेण। 12 बेइमानी बधने सैहीं बडे लोकां केरो प्यार ठणदौ भोई गहंनोए। 13 ते जै कोई अखरी दम्मं तग्र सारे दु:ख बरदाशत कैरेल्हो, त तैस्से मुखती मैल्हीये। 14 ते बादशैहीयरी खुशखेबरहरो सुसमाचार सैरी दुनियाईं मां शुनाव गाहेलो; ताके सैरी कौमां केरे लेइ गुवाही भोए तैखन दुनियारो खातमो भौनोए।

भारी मसीबतरी शुरुवात

(मरकुस 13 : 14 - 23 ; लूका 21 : 20 - 24)

15 जैखन तुस तैस ऊज्जडने बैली भिटी चिजी: जैसेरे बहरे मां दानिएल नेबें ज़ोवरु थुं: पबित्र ठैरी लाहेले; त पढने बालो भी समझे। 16 की तैस मोके जैना युहुदिये मां भौल्हे त तैना पहाडन पुड जो नशान। 17 ते जैना लाए पुड भौल्हे, त तैना उंढे न एजन; ते न हारी कोई चीज़ नैण अंत्र न एजन। 18 ते जै मैन्हुं उडारे मां भौल्हो, त तै लिंगां नैण अंत्र न एजे।

19 पण अफसोसे तैन पुड जैना तैईस गल्हे बिशने बैली भौल्ही ते जैन केरे तैईस निक्के बचे दुध पिते भौल्हे। 20 ते प्राथन केरा की तुसंन हिंवादे या सबतेरी दिहेडी नशान न पै। 21 किजोकी तैईस एत्री बडी मसीबत भौल्ही की: एत्री मसीबत कधी दुनियाईं मां एवरी न भौल्ही; ते न कधी दुनियाईं मां एज्नेल्ही। 22 अगर तैन दिहाडां केरी तैधात घटेवरी न भौथी: त कोई न थु बंचनो: पण किछ खास मैन्हुं केरे लेइ तैना दिहाडे घटेवरेन। 23 अगर तैईस कोई तुसंन ज़ोए की मसही इडीए या उडीहे त तुस यकीन न केरथ।

24 किजोकी झुटे मसही ते झुटे नबी दुनियाईं मां निस्नैण: ते तैनेइं एत्रां अजीब अजीब कम्मा केरन्; ते अजीब नशान हेरानेण ते भोई सखे त चुनोरे लोक भी टप्लोनेण। 25 हेरा मीं तुसंन पैहिलु ज़ेवरुए। 26 अगर कोई तुसंन सैहीं ज़ोए की हेरा तै बियाबाने मां हैं त तुस बेइर न गैहीयथ या कमरे मां हैं त तुस यकीन न केरथ।

27 किजोकी जैन्चरे बिजली एक्की पासेरां चेमकतां हारी पासे लैहीयोचे: तैन्चरे मैन्हेरु मड्डे भी एज्नेल्हु। 28 जैडी जीग भोते तैडी ईल्लां जम्हां भोइचन।

मैन्हेरे मड्डेरु दुबारां एजनु

(मरकुस 13 : 24 - 27 ; लूका 21 : 25 - 28)

29 तैन दिहाडन बाद दिहाडो कालो भौनोए; ते चंदनरी लो भी खतम भौनीए: ते अम्ब्रेरां तारे बिछडनैण ते सारु अम्ब्र हिलनुए। 30 तैखन मैन्हेरे मड्डेरु निशान अम्ब्रे मां लैहियोनोए: ते दुनियारी सैरी कौमां छाती कुटैल्ही; ते मैन्हेरु मड्डे अम्ब्रे मैरां बिदलारी पुड बेडी अजीब कुदरुती सैहीं एइते लाहेले। 31 ते तै अपने सुवर्गदूत ते बड नर्शीगिरी अवाजोरे ज़ोर शोरे सैहीं साथी भेजैल्हो: ते तैन परमेशरेरे लोकन चेवरे पासन येनी अम्ब्रेरे एक्की पासेरां देइतां हारी पासे तग्र सैभन जम्हां कैरेल्हे।

अंजीरेरे बुटेरी मिसाल

(मरकुस 13 : 28 - 31 ; लूका 21 : 29 - 33)

32 हुनी तुस फेगेरे बुटे कैरां ईही सबक शिखा: जैरेहे तैसेरे डाल नर्म भोतन ते पट्लां निस्तांन त तुस बुझतथ की गेर्मरो मौसम एजनें बालोए। 33 ऐन्चरे जैखन तुस ऐन गल्लां भौती लाहेले: त तुस बुझेल्हे की तै नेडे बल्के दारे पुड पुजोरोए। 34 आंव तुसंन सैहीं सच्च ज़ोतां की ज़ां तग्र ऐना सभ किछ पुरु न भोए: तां तग्र एस कौमरो खातमो न भोए। 35 असमान ते ज़मीन टेली गाहेलु पण मेरी गल्लां कथे न टेलैल्ही। 36 तै दिहाडी ते तै घडी कैखन एजनिए: तैस कोई न ज़ाने ते न तैसरो पत्तो अस्मानेरे दूते ते न मड्डे पण सिर्फ बोवे पत्तोए। 37 जैचरे नुहेरे जमाने मां भोवरु थुं: तैन्चरे मैन्हेरे मड्डेरु एजनेरे बेले भोनुए। 38 किजोकी तौफान एजने कैरां पैहिले भी लोक खाते पिते थिये: ते डल्हा भी

केरते रहते थिये: ते नुहरे किशती मां गहने तग्र ऐन सभ किछ भोंतु राहूं।
 39 तैन पत्तो भी न थु की कुन भोने बालुए: एडी तग्र की तौफान आव ते तैनी सब किछ रुद्धेहितां नीहूं: ते मैन्हेरे मड्डेरु एज्नु भी एरहु भोंनुएं। 40 तैखन उडारे मां दुई मैन्हुं कम्म केरते भोल्ले ते अक नियो गाहेलो, ते दुईयां तैडी राहेलो। 41 ते दुई कौन्शां द्लाहटे पिहंती भौल्ले त अक निगाहैल्ले ते होरी तैडी राहेल्ले। 42 तुसां बिन्ने राथ किजोकी तुस न जानथ की तुशो प्रभु कैईस एज्नुएं। 43 पण याद रखा की अगर घरेरे मालके पत्तो भोए की चौर कताल्ले एज्नुएं: त तै बिन्ने बीशे ते अपने घरे चोरी न भोने दे। 44 एल्लेरेलेई तुस भी तियार राथ: किजोकी जैखन तुसन शक भी नैइं भोनी त मैन्हेरु मड्डु एजी गहंनुएं।

वफादार दास ते दुष्ट दास (लूका 12 : 41 - 48)

45 फिरी तै इमानदार ते हुशियार सेवक कौने जै तैसेरे मालके अपने नोकरन पुड़ पुछ्नुो ग्नो रखे ताके मोके पुड़ रौंटी दे। 46 तै नोकर बडो मुबारके: अगर तैसेरो मालक एइतां तैस्करां एरु जैरु केरतो लाहे। 47 त आं तुसन सैहीं सच्च जोताइं की तै मालक अपने घरेरो सारो अख्तियार तैसेरे सुपुर्द कैरेल्लो। 48 पण अगर तै नोकर बुरो निसे त तै अपने दिले मां ऐन जोए की मेरे मालकेरे एज्ने हेजु बडु चीरे। 49 ते अपने सैथन मारने कुटने पै ते शरैपण सैहीं खानु पिनु शुरु करे। 50 ते तैसेरो मालक कौस्कोही एरही दिहेडी एजे जैईस तैस नोकरे उमीदे न भोए: ते तैसेरो मालक एजी गाहे। 51 मालक तैस लाठैइं सैहीं मार दुवेइतां जैल्ले मां कैद केरतां छड्डैल्लो जैडी तैनी लेरां देंनी ते दंत चापतु रहंनुएं।

दश कुवैरी केरु दृष्टान्त

25 तैस मोके अस्मानेरी बादशाही तैन दश ऐडलैही कुईयां केरी जैरी भौल्ले: जैना अपनी लालटेन बैलतां लाडे सैहीं मिलनेरे लेइ निसी।
 2 तैन मां पांच बेवकुफ थी, ते पांच बेडी अकलमंद थी। 3 जैना बेवकुफ थी तैनेइं लालटेना त निही; पण तेल साथी न नियो। 4 पण जैना अकलमंद थी तैनेइं लालटेना केरे अलावा कुपण मां होरो तेल साथी निहीयो। 5 लाडो एज्ने चौर लग्गु, ते तैना सभ बलगत बलगत झूली जेई।
 6 अधी रात भुई त शौर मची की लाडो एवरोए: ते तैस सैहीं मिलनेरे लेइ एजा। 7 तैखन सैरी अडलैही कुईयां बिन्नी; ते एपनी एपनी लालटेना बालने लेगी। 8 बेवकुफ कुईयेइं अकलमंद अडलैही कुईयन सैहीं जौव; अपने तेले मेरां थौडो जैरो तेल असन भी देथ: किजोकी इशी लालटेना हिशने लोरीन। 9 अकलमंद अडलैही कुईयेइं जुवाब दीतो; असन का एत्रो तेल नैइं: तुस दुकानी पुडहेरां आन्हा। 10 जैखन तैना तेल घिन्ने दुकानी पुड चेलोरी थी त तैने मां लाडो पुजी जेव: जैन अडलैही कुईयां तियार थी तैना लाडे सैहीं साथी अत्र डलाहे मां चेली जेई, ते दार बंद केरतां छड्डु। 11 बादे मां तैना होरी अडलैही कुईयां भी पुजी ते जौने लेगी: ओ प्रभु ओ प्रभु इशे लेइ दार खोल्ला। 12 पण तैनी जुवाब दीतो: सच्च त एने की आंव तुसन जैनी न्ना। 13 एल्लेरे लेई बीन्ने राथ: किजो की तैस दिहैडारो न तुसन पतोए, ते न तैस घेडारी कोई खबरे।

तोडां केरु दृष्टान्त (लूका 19 : 11 - 27)

14 इही तैस मैन्हेरो जैरो हाल भोनुएं: जै दुर प्रदेशे गहने बालो थु: तैनी अपने नोकर कुजाए ते सारु घर बार तैनकेरे सुपुर्द कियु। 15 तैनी सैभन तैनकेरी क्रतुत्रे हिसाबे सैहीं रकम दीती: एक्की पांच तोडे दिते होरी दुई तोडे दिते, ते एक्की आके तोडो दितो, ते एणु प्रदेशे जो चलो जेव। 16 जैस नोकरे पांच तोडे मैलोरे थिये: तैनी गैहीतां, ते कारोबार केरतां पांच तोडे होरे कमाए। 17 ऐन्चरे जैस नोकरे दुई तोडे मैल्होरे थिये: तैनी दुई होरे कमाए। 18 पण जैस नोकरे अक तोडो मैल्होरो थु: त तैनी गत घेडतां मालकेरी रकम छपैइतां छडी।

19 बडे चीरेरां पत्ती तैसेरो मालक वापस आव: ते नोकरन सैहीं हिसाब केरने लगो। 20 जैस नोकरे पांच तोडे मैल्होरे थिये: तैनी गैहीतां पांच तोडे हाजर कमाए ते जौने लगो: ओ मालिक तीं पांच तोडे दितोरे थिये: ते हेर तीं पांच तोडे होरे कमाए। 21 मालके तैस्सैहीं जौव: शाब्बाश इमानदार नोकरा तीं थोडी जैरी रकमी पुड इमानदेरी सैहीं कम कमाव: आंव तीं बेडी चीजां केरो मुख्तियार बनल्लो: ते अपने मालकेरी खुशी मां शामल भो।

22 ते जैस दुई तोडे मैल्होरे थिये, तै भी आव ते जौने लगो: ओ मालिक तीं तीं दुई तोडे दितोरे थिये: ते हेर तीं दुई तोडे होरे कमाए। 23 मालके तैस सैहीं जौव: शाब्बाश इमानदार नोकरा तीं थोडी जैरी रकमी पुड इमानदेरी सैहीं कम कमाव: आंव तीं बेडी चीजां केरो मुख्तियार बनल्लो: ते अपने मालकेरी खुशी मां शामल भो।

24 ते जैस अक तोडो मैल्होरो थु, त तै भी हाजर भोव ते जौने लगो: ओ मालिक आंव जानतो थु, की तु बडो बुरो मैन्हुंस जैडी तीं फसल नैइं बेवरी तू तैतां फसल कटतां ते जैडी तीं अक गलैव भी नैइं बछोडोरो तू तैतां आंन जम्हां केरतां। 25 ऐल्लेरे लेई तीं तीं कैरां डेरतां तेरी रकम गत्ते मां देबतां छडी: ते हेर इहे तेरी रकम। 26 तैसेरे मालके जुवाब दीतो: ओ बेईमान ते निकम्मां नोकरा अगर तीं पत्तो थु, की आंव जैडी बिज न बेइं तैडी फसल कटतां ते जैडी तीं अक गलैव भी नैइं बछोडोरो त तैतां आंन जम्हां केरतां। 27 त तीं ऐन लोडतु थुं कमेवरु की मेरी रकम शौहुकारां केरे हवाले केरनी थी: ताके आंव वापस एइतां अपनी रकम सुते समेत उसुल केरेथो। 28 हुनी ऐन केरा की एस केरां तै तोडो नैइतां तैस देथ जैसका दश तोडेन। 29 ऐल्लेरे लेई जैसका आए, तैस होरो भी दितु गहलु, ते तैसका जादे भोइ गहलु: ते जैसका किछ भी नैइं, तैस केरां तैन भी घिन्नी गाहेले जैन तैसक आए भी। 30 ते ऐस नकम्मे नोकरे बेइर आंधरे मां छड्डा, जैडी ऐह लेरां देंतो ते दंत चापतो राहे।

इन्साफेरी दिहाडी

31 जैखन मैन्हेरु मड्डु एपनी मेम्हाई मां अपने सुवर्गदुतन सैहीं साथी एज्नेल्लो त अपने मेम्हारे तखते पुड बिशैल्लो। 32 ते सैरी कौमा तैसका जम्हां भौल्ले, ते लोक ऐन्चरे एक्की केरां अलग केरनेण, जैन्चरे पुहाल भैदन छैलन मेरां खंडातन। 33 तै भैदन अपने देहीने पासे, ते छैलन अपने बांए पासे खेडी कैरेल्लो। 34 तैखन बादशाह अपने देहीने पासेरे लोकन सैहीं जौल्लो: एजा मेरे बाजेरे मुबारक लोकां ईही बादशाही, जै दुनियारे शुरु मां तुशे लेइ तियार कियोरिए: हीस्से मां नैथ। 35 किजोकी आंव नियनो थु: ते तीं तीं रौंटी खुवाई, आंव टलीशोरो थु: ते तीं तीं पानी पियाव आंव परदेशी थु, ते तीं अपने घरे मां रखो। 36 आंव नग्गो थु, ते तीं तीं लिंगडां दितां; ते आंव बिमार थु: ते तीं मेरी हैरगैश की आंव कैद थु: ते तुस मिलने आए।

37 तैखन तै घर्मी मैन्हुं जौल्लो की ओ प्रभु तीं कैखन तू नियनो लाहु: ते तीं तीं रौंटी खुवाई या तु टलीशोरो थु, ते तीं तीं पानी पियाव। 38 असैइं कैखन परदेशी सैमझतां तु अपने घरे मां रखो; या तु नग्गो थु, ते तीं तीं लिंगडां दितां? 39 ते अस कत्ताल्ले तीं बिमार या कैद लैहीतां तीं सैहीं मिलने आए? 40 तैखन बादशाह जुवाब दैल्लो: की आंव तुसन सैहीं सच्च जोतां की जैखन तुसैइं मेरे इन निकडे दलान मेरां एक्की जैरे सैहीं एरो जैरो सुलुख कियो त ऐन बुझा की ऐन मीएं सैहीं कियुं।

41 तैखन तै बांए पासे बालन सैहीं जौल्लो: ओ लांनती लोकां मेरे तुत्रे अग्रां दुर भौथ, ते तैस हमेशारी बैल्लती अग्गी मैन्नुो गाथ जै शैतानेरे त तैसेरे दूतां केरे लेइ तियार कियोरिए। 42 एल्लेरेलेई जैखन आंव नियनो थु, ते तीं तीं रौंटी न खुवाई आंव टलीशोरो थु, ते तीं तीं पानी न पियाव। 43 आंव परदेशी थु, ते तीं आंव अपने घरे मां न रखो: आंव नग्गो थु, ते तीं तीं लिंगडां न दितां ते आंव बिमार थु, ते तीं मेरी हैरगैश न की ते आंव कैद थु, ते तुस तीं सैहीं मिलने न आए।

44 ताल्ले तैना लोक भी जौल्ले: की ओ प्रभु असैइं कत्ताल्ले तू नियनो टलीशोरो परदेशी नग्गो बिमार या कैद लाहु ते असैइं तेरी मदत न की। 45 ताली तै तैन जुवाब दैल्लो: आंव तुसन सैहीं सच्च जोतां की जैखन तुसैइं मेरे इन निकडे दलान मेरां एक्की जैरे सैहीं एरो जैरो सुलुख न कियो त ऐन

बुझा की ऐन मीएँ सैहीं कियूं। 46 ऐलहेरे लेइ ऐन लोकन हमेशारे लेइ सजाह भौल्ही, पण धर्मन हमेशारी ज़िंदगी भौल्ही।

यीशु एरे खलाफ साजिस

(मरकुस 14 : 1 - 2 ; लूका 22 : 1 , 2 ; यूहन्ना 11 : 45 - 53)

26 ज़ैखन यीशुए एन गल्लां की त तैनी अपने चलन सैहीं ज़ोंव। 2 तुसंन पत्तोए की दुई दिहैडना बाद फसहा तिहारे: ते मैन्हेरु मड्डु ट्लुवांव गाहेलो ताके तै मारो गाहे।

3 तैखन मन्दिरेरे परैहुतैइं ते कौमरे सियांनेइ कैडफेरी हावेली मां जम्हां भोइतां। 4 मुशोरहो कियो की यीशु धोखे सैहीं टलेइतां मैरी छडम। 5 पण ज़ौने लगे की फसहा तिहारेरे मोके नैइं: एरहु न भोए की लोक हंगामो शुरु केरन।

बैतनिय्याह मां यीशु एरे दपनेरी तीयारी

(मरकुस 14 : 3 - 9 ; यूहन्ना 12 : 1 - 8)

6 तैस मोके यीशु बैतनीयां मां शुमौन कौढेरे घरे मां थु। 7 त अक कौन्श शंखमरमरी बोतली मां अत्र अक किमती तेल घिनतां यीशु का आई: तैखन तै रौट्टी खानेरे लेइ बिशोरो थु, त तैसरे दौंगेरे बालन तै तेल मल्लो। 8 चले ऐन लैहीतां बडे नाराज भुए ते ज़ौने लगे: की अत्र तेल बरबाद केरनेरी कुन ज़रुरी थी? 9 अगर ऐह तेल बंचोरो भौथो; त बडी किमत मैल्ही थी; ज़ै गरीबन बेन्टतां देथे। 10 यीशुए ऐन शूनतां तैन सैहीं ज़ोंव: तुस ऐस कौन्शी कीजो तंग लोरेथ केरने? एसां त मीं सैहीं रोडु कियेरुए। 11 गरिब गुरबे त हमेशां तुसंन सैहीं साथी भोनेण: पण आंव तुसंन सैहीं साथी हमेशां नैइं भौनो। 12 एसां पैहिले मेरे दबने केरां मेरी जानी अत्र तेले सैहीं मेलतां ते मस्हा केरतां छाडोरीए। 13 आंव तुसंन सैहीं सच्च ज़ोतां की सैरी दुनियार्ई मां ज़ैडी भी अंजिलारो सुसामाचार शुनाव गाहेल्हो: तैडी तैसेरी यादगैरी मां एस गल्लारो भी ज़िक्र कियो गाहेलो।

युहूदा इस्करियोतेरो विश्वासघात

(मरकुस 14 : 10 , 11 ; लूका 22 : 3 - 6)

14 फिरी बहरे चलन मैरां अक ज़ैसेरुव नोवं युहूदा आस्क्रयुती थु: मन्दिरेरे परैहुतन का जेव। 15 ते तैन सैहीं ज़ौने लगे: की अगर आंव यीशु तुसंन ट्लुवेइतां देइं ;त तुस मीं कुन दैल्हे? 16 ते तै तैइसेरो दँतो यीशु ट्लुवानेरे बारे मां मोको तकने लोरो थु।

चेलन सैहीं साथी फसहरु आखरी भोइ

(मरकुस 14 : 12 - 21 ; लूका 22 : 7 - 13 , 21 - 23 ; यूहन्ना 13 : 21 - 30)

17 फसहा तिहारे केरां पैहिले दिहाडे चले यीशु का एइतां पुछने लगे की: तु फसहा तिहारे लेइ रौट्टी कोडी खानी चहतां; ताके अस गैहीतां तियारी केरम। 18 यीशुए जुवाब दितो की: शहरे मां अक फुलानो मैन्हुंए; ते तुस तैसका गाथ ते तैस ज़ोथ की, गुरु ज़ौने लगेरोए, मेरो मोको नेडे पुजोरोए ते आंव अपने चलन सैहीं साथी फसहा तेरे घरे मां मनेइल्हो। 19 बसा ज़ैरो यीशुए अपने चलन हुकम दितोरो थु: तैनेइं तैन्चरे फसहा तिहारेरी रौट्टी तियार की।

20 ज़ैखन इलोवज़ भुई त यीशु अपने चलन सैहीं साथी रौट्टी खाने बिशो। 21 ते रौट्टी खांते बार यीशुए तैन सैहीं ज़ोंव: आंव तुसंन सैहीं सच्च ज़ोतइं की तुसंन मैरां अक मीं ट्लुवाल्हो। 22 चेलन बडो दु:ख भोव: तैना बैरी बैरी सैहीं तैस पुछने लगे: ओ प्रभु कुन आंवे त नैइं? 23 यीशुए जुवाब दितो: ज़ै मैन्हुं मीं सैहीं साथी थैली मैरां रौट्टी खाने लोरोए: तैहे मीं ट्लुवाल्हो। 24 मैन्हेरे मड्डेरे त ज़ैरु तैसरे बारे मां लिखेरुए तै ज़ानते, की अपसोसे तैस मैन्हुं पुड ज़ैसेरी वजाही सैहीं तै ट्लुवाव जेव: तैसरे लेइ एन्ने रोडु थुं की तै ज़मौरो न भौथो। 25 तैखन युहुदो ज़ै ट्लुवाने पुड थु: ज़ौने लगे :ओ रबी आंवे त नैइं? तैनी तैस सैहीं ज़ोंव, तीं एपू ज़ोंव |

प्रभु भोइ

मरकुस 14 : 22 - 26 ; लूका 22 : 14 - 20 ; 1 कुरिन्थियों 11 : 23 - 25)

26 रौट्टी खांते बार यीशुए रौट्टी टलाती; ते बर्कत देइतां टलोडी, ते चलन का देइतां ज़ोंव हियांथ खाथ ईही मेरी जाने। 27 फिरी यीशुए कटोरो टलातो, ते परमेशारेरु शुक्र केरतां चलन का दितो ते ज़ोंव हियांथ तुस सभ इस मैरां पिया। 28 किजो की ईही मेरे नोवं ऐहेदे मां मेरो तै लैहुए ज़ै बडं केरे पापां केरी मैफरे लेइ दितो गहते। 29 आंव तुसंन सैहीं ज़ोताइं की: आंव दाछरो ईही रस फिरी कधे न पियेल्हो ज़ां तग्र परमेशारेरी बादशैही मां तुसंन सैहीं साथी नोवों न पीं। 30 तैखन तैनेइं अक गीत ज़ोंव: ते फिरी ज़ेतुन पहाडे पुड जो चले जे।

पतरसेरे इन्कारेरी भविष्यवाणी

(मरकुस 14 : 27 - 31 ; लूका 22 : 31 - 34 ; यूहन्ना 13 : 36 - 38)

31 तैखन यीशुए तैन सैहीं ज़ोंव: तुस तैस राती मेरी वजाही सैहीं डामाडोल भौल्हे: किजोकी लिखेरुए की आंव पुहाले मारेल्हो ते धनेरी भैडं तित्र बित्र भौल्ही। 32 पण आंव ज़ितो भोइतां तुसंन केरां पैहिले गलीले मां पुज्जैल्हो। 33 पतरसे जुवाब दितो: भावें तेरी वजाही सैहीं सारे डामाडोल भौन, पण आंव डामाडोल न भौइल्हो। 34 यीशुए ज़ोंव: आंव तुसंन सैहीं सच्च ज़ोतइं की अज राती कुकड बांक देने केरां पैहिले तु मेरो टलेइं फेरेइं इनकार कैरेल्हो। 35 पण पतरसे ज़ोंव: अगर तीं साथी मीं मरनु भी पै त तां भी आंव तेरो इनकार न कैरेल्हो ते सैरे चलेइं भी एन्ने ज़ोंव।

गतसमनी मां प्रार्थना

मरकुस 14 : 32 - 42 ; लूका 22 : 39 - 46)

36 तैखन यीशु अपने चलन सैहीं साथी एक्की ठैरी पुजो: ज़ैट्टेरु नोवं गस्तमनी थु: यीशुए तैन सैहीं ज़ोंव: तुस इडी बिशा, ते आंव उडी अग्र गैहीतां प्राथना केरताइं। 37 तैनी पतरस ते ज़ैबदेरां दुईये मड्डं साथी नियां, ते तै मायुस ते बेचेन भौने लगे। 38 फिरी यीशु तैन सैहीं ज़ोंव: इस दुखेरे वजाही सैहीं मेरे प्राण निसने लोरेन इडी बिन्डै बिशा। 39 फिरी थौडो ज़ैरहे अग्र गैहितां तल्ले मां मथो टेकतां खिरको ते प्राथन केरने लगे: ओ बाजी अगर भोई सखे त ईही कटोरो मीं केरां टेली गाहे: फिरी भी आंव चहतां, बल्के ज़ैन तु चहतां त तैन्ने भोए। 40 ज़ैखन तै चलन का वापस आव त तैना झूलोरे लाहे त पतरसे सैहीं ज़ोंव: कुन तुस एकी घंटे भी मीं सैहीं साथी बिन्डै न बीशी सखथ। 41 बिन्डै बिशा ते दुवा केरते राथ किजोकी अज़मैइशी मां न राथ: आत्मां त निग्रे पण जान कमज़ोरे। 42 यीशु फिरी जेव ते प्रार्थना केरने लगे: ओ मेरे बाजी ईही कटोरो मेरे पिनेरे बगैर टेली न सखे: फिरी भी मेरी नैइं बल्के तेरी मर्जी पुरी भोए। 43 ज़ैखन तै चलन का वापस आव, त तैना झूलोरे लाहे: किजोकी तैनकेरी ऐछी ओइले सैहीं ग्रिकी भोवरी थी। 44 ऐलहेरे लेइ तै तैन तैडी छैडतां चलो जेव: ते फिरी प्रार्थन केरने लगे ज़ै पैहिली कियोरी थी। 45 तैसेरां बाद तै चलन का वापस आव, ते तैन सैहीं ज़ौने लगे: की तुस हेजु भी तैस्से आरामेरी निड्ली मां झूलोरेथ? बस्सा हेरा तै मोको नेडे पुजोरोए की मैन्हेरु मड्डु पैपी केरे हवाले कियो गाहेलो। 46 उठा चला तक्का मेरो ट्लुवाने बालो नेइं पुजोरोए।

यीशु एरु धोखे सैहीं टलाव गहन

(मरकुस 14 : 43 - 50 ; लूका 22 : 47 - 53 ; यूहन्ना 18 : 3 - 12)

47 यीशु ऐना गल्लां ज़ौने लोरो थु: त युहूदा ज़ै बहरे चलन मैरां थु तैडी पुजो: तैस्सैहीं साथी बडे मैन्हुं थिये ज़ैना तलवारं ते लड्डां घिनतां एवरे थिये तैना मन्दिरे मां सेवा केरने बाले पुरैहुतैइं ते कौमरे सियांने लोकेइ भेजोरे थिये। 48 तैसेरे ट्लुवाने बाले तै इही निशान दितोरो थु: की ज़ैस आंव फूमडी दैइल्हो त तैहे यीशु भौनोए: ते तुस तैस टलेइयथ। 49 युहुदे यीशु का एइतां ज़ोंव: हे गुरु तींजो नमसकारे, ते एइतां फूमडी देने लगे। 50 यीशुए तैसजो ज़ोंव: मेरे दूला ज़ैस कम्मेरे लेइ तु एवरोस तैन कम केर:ताल्ही लोकेइं एगोइतां यीशु टलातो ते अपने कबजे मां कियो। 51 यीशुए सैथन मैरां एक्के अपनी तलवार कडी, ते मन्दिरेरे पुरैहुतेरे नोकरे पुड बाही ते तैसेरो कन

कटो। 52 यीशुए तैस जो जॉवः तलवारी मियाने मां रख किजोकी जैना तलवार चलातन तैना तलवारी सैहीं मारे गाहेले। 53 तीं पत्तो नैइं की अगर आंव अपने बाजी कैरां मद्दत मैगीं त तै हुन्ना सुवर्गदुतां केरी बहरे फौवजां बल्के तैस कैरां भी जादे भेजते। 54 पण फिरी तैना पबित्र बचनेरी गलां केंचरे पुरी भौनीण जैनकेरु पुरु भौनु जरुरीए? 55 फिरी यीशुए तैन हछे लोकन सैहीं जॉवः आंव कुन कोई डैकूइं ते तुस मीजो डांग सोटे ते तलवारां टलेइतां मीं ट्लाने एवरेथ? आंव त रीज मन्दिरे मां बिशतां शिक्षा देतो थु ते तैखन तुसैइं आंव नैइं टलातोरो? 56 पण ऐन सभ किछ ऐलहेरे लेइ भोवः की पबित्र बचने मां नेबी केरी लिखोरी गलां पुरी भौनः तैखन सारे चले तैस तैड़ी छैउतां चले जे।

महा सभा मां यीशु

(मरकुस 14 : 53- 65 ; लूका 22 : 54, 55 , 63 - 71 ; यूहन्ना 18 : 13 -14 , 19 -24)

57 जैन लोकेइं यीशु टलातोरो थु तैना तैस मन्दिरेरे पुरैहुत कैइफे का घिन्तां जेः जैड़ी तैनकेरे धर्मी लोक ते बूढे अकौट्टे भेवरे थिये। 58 ते पतरस भी यीशु दुरेरां देतो पत्पती मन्दिरेरे एंरीं अंग्रे तग्र पुजोरो थुः ते तैड़ी पेरहेदारन सैहीं साथी बिशतां सुर लोरो थु हेरने की कुन केरतन। 59 मन्दिरेरे पुरैहुत ते आदालत आलियारे सभ लोक एरहे झुटै शहात तोपने लगेः की जैस सैहीं यीशु कल्ल कियु गाहे। 60 पण कोई शाहात न मैल्लोः हालांकी बड़े झुटे शाहात भी पैश भुएः अखर कार दुई शाहात पैश भुए। 61 ते जॉने लगेः एनी जवोरु थुं की आंव परमेशरेरु घर डोलतां टलेंइयाव दिहाड़े फिरी खडु केरी सखताइं। 62 ताली मन्दिरेरे पुरैहुत खडो भोइतां यीशु पुछने लगेः तीं का एस अलजामेरो कुन जुवाबे? 63 पण यीशु चुप राहुः मन्दिरेरे पुरैहुते फिरी पुछुः तीं जिंते परमेशरेरी कसम भोए की असन जो, की तु परमेशरेरु मडु मसही आस? 64 यीशुए जुवाब दितोः तीं एपु जोइ छडु ते हुनी आंव भी जौतइं की अजैरे बाद तुस मैन्हेरे मड्डे परमेशरेरे देहीने पासे बिशोरे लाहेले, ते बिदलारी मां एइते लाहेले। 65 तैखन मन्दिरेरे पुरैहुते अपन लिगां छिंदा, ते जॉने लगेः ऐनी त बडू झुट जॉव हुनी असन कैची शाहतेरी जरुरत नैइं, तुसैइं हुन्ना एसेरु झुट शुनेरुए। 66 तुशी कुन राईए? तैनेइं जुवाब दितो एह कतलेरे काबले? 67 तालही तैनेइं तैसेरे तुत्रे पुइ थुकु ते तैस घुसैइं मुकैइं देने लगे। 68 ओ मसही अगर तु नबीस त जो, तीं केंनी बाहोरीए?

पतसेरु इन्कार केरनू

(मरकुस 14: 66- 72; लूका 22 : 56 - 62; यूहन्ना 18: 15- 18 , 25- 27)

69 पतरस बेइर अंगने मां बिशोरो थुः ते अक कौन्श तैसका आई ते जॉने लगी की तुभी यीशु गलिली सैहीं साथी थु। 70 पण पतरसे सैभी केरे सांमने इन्कार कियो ते जॉवः मीं नैइं पत्तो तु कुन लोरिस जॉने? 71 तैखन पतरस बेइर फाटकेरे पासे जेव त अक होरी कौन्श पतरसे लैइतां तैन लोकन सैहीं जॉने लगीः ईही मैन्हुं भी यीशु नैसरी सैहीं साथी थु। 72 पण पतरसे सैभी केरे सांमने कसम केरता इन्कार कियो, ते जॉवः की आंव एस मैन्हुं सैइयां न जैनी। 73 थोड़े चीरेरां पत्ती तैना लोक जैना तैड़ी खडखडे थिये पतरसे का आए ते जॉने लगेः तुभी तैन्ने मैरंस किजोकी तेरी बोली सैहीं बुझोते की तु तैसेरो साथीस। 74 तालही पतरस तैस्जेई गैई देइतां जॉने लगे, ते कसम केरतां जॉने लगेः की आंव एस मैन्हुं सैइयां न जैनी तालही कुकडे बांक दित्ती। 75 तैखन पतरसे यीशुएरी तै गल्ल याद आईः जै तैनी जेवरी थी की कुकडेरे बांक देने कैरां पैहिले तु टलेइ बार मेरो इन्कार कैरेल्होः ते पतरस बेइर गैहीतां हुस्बुकैइं हुस्बुकैइं लेरां देने लगे।

पिलातुसेरे सामने यीशु

(मरकुस 15 : 1 लूका 23 : 1 , 2 ; यूहन्ना 18 : 28 -32)

27 ते झैझ भौते सारे लोक ते मंद मन्दिरेरे पुरैहुत, ते कौमरे सयानेइं मशौरो कियो की यीशुएरे कल्ल केरनेरो फेसलो कियो। 2 ते यीशु बंधतां नियो, ते रूमी हाकम पिलातुसेरे हवाले कियो।

यहूदा खुदकशी केरते (प्रेरतां केरां कम्मा 1 : 18 -19)

3 जैखन यहूदे हेरु जैनी यीशु टलुवेवरो थु, की यीशु मुर्जम बनेवरोए त तैनी बडू पशतावः ते तैना चेंद्रे टल्ही सिक्के मंद्रेरे पुरैहुतन का वापस आंन्हें। 4 ते जॉने लगेः मीं पाप कियो की अक बेकुसुर कल्लेरे लेइ टलुवावः ते तैना जॉने लगे असन कुने? तु जॉन ते तेरु कम जॉने? 5 तैखन यहूदे तैना चेंद्रे टल्ही सिक्के मन्दिरे मां शैरतां छडे, ते एपु गैहितां अपने आपे फासी दित्ती।

6 मन्दिरेरे पुरैहुतैइं तैना सिक्के सल्हेः ते जॉने लगे की इन सिक्के त खुनेरे तैप्पूण; ऐन मन्दिरेरे खजाने मां रखने ठीक नैइं। 7 ऐलहेरे लेई तैनेइं मुशौरहो केरतां तैस रकमी सैहीं कुम्हारे कैरां अक उडार घिन्नुः ताके परदेशी केरे लेइ कब्रस्तान बनावं गाहे। 8 तांए त अज तग्र भी तैस उडारे जो लैहुहेरु उडार जौतन। 9 तैखन तै गल पुरी भौई जै यरमियां नेबे जवोरी थीः की तैनेइं तैसेरी पुरी किमत चेंद्रे टल्ही सिक्के निये, ऐह किमत बनी इस्राएलेरे लोकेइं कियोरी थी। 10 ते तैन चेंद्रे टल्ही सिक्केइं सैहीं कुम्हारेरु उडार घिन्ने जो दिते जैन्चरे परमेशरे मीं हुक्म दितोरो थु।

पिलातुसेरे सुवाल

(मरकुस 15 : 2 - 5 ; लूका 23 : 3 - 5 ; यूहन्ना 18 : 33 - 38)

11 यीशु हाकमेरे तुत्रे अगर खडो थु, ते हाकम तैस पुछने लगेः तु यहूदी केरो बादशाहस? यीशुए जुवाब दितो तु एपु जॉने लोरोस त। 12 ते जैखन मन्दिरेरे पुरैहुत ते बूढे सियांने तैस पुइ अलजाम लाने लोरे थिये त यीशुए कोई जुवाब न दितो। 13 तैखन पिलातुसे यीशु सैहीं जॉवः हेर ऐना तेरे खलाफ कुन कुन जॉने लोरेन तु शुन्तां की नैइं। 14 पण यीशुए एकी गल्लारो भी जुवाब न दितो; ते पिलातुस बडो हेरान भौई जेव।

मौतरे सजारो हुक्म

(मरकुस 15 : 6 - 15 ; लूका 23 : 13 - 25 ; यूहन्ना 18 : 39 ; 19 : 16)

15 बादशाहेरो अक कानुण थुः की फस्हा तिहारेरे मोके पुइ अक कैदी जैस लोक चहते थिये तैस हथरां छडतो थु। 16 तैस मोके तैनकेरो अक मैन्हुं कैद थु; जै बरहबा नोवेंरो बडो मुशुर थु। 17 जैखन तैना लोक पिलातुसे का जम्हां भुए; त पिलातुसे तैन पुछुः तुस कुन चहतथ; आंव कैस हथरां छैडीं; बरहबे की यीशु जैसजो मसही जौतन। 18 किजोकी तिलातुसे एपु पत्तो थुः की तैनेइं सिर्फ जलनी सैहीं तै टलातोरोए। 19 जैखन तै आदालतरी कुसीं पुइ बिशोरो थु; त तैसेरी कौन्शां तैसजो समाद भेजोरो थुः की तु एस रोडे मैन्हेरे बारे मां किछ न कैरां, किजोकी मीं अज राती ऐसेरी वजाही सैहीं सुपने मां बडो दुःख भेवरोए।

20 पण मन्दिरेरे पुरैहुतैइं ते सियांने लोकेइं लोक बमकाएः की तैना पिलातुसे कैरां बरहबा हथरां छडान ते यीशु मारन। 21 जैखन हाकमे तैन लोकन पुछुः की तुस ऐन दुईन मेरां कैस चहतथ; आंव तैस हथरां छैडीं; तैनेइं लोकेइं जॉवः बरहबे हथरां छैडां। 22 पिलातुसे तैन लोकन सैहीं जॉवः फिरी आंव यीशु जैसजो मसही जौतन तैस कुन केरी? सब लोक जॉने लगे एस सलीब देथ। 23 हाकमे जॉव कीजो? ऐनी कुन बुरयाई कियोरि? पण तैना मना जोरे जोरे जॉने लगे की एस सलीब देथ। 24 जैखन पिलातुसे हेरु की किछ भी बन्ने बालु नैइं बल्के उलटो फसाद भौने बालोएः त तैनी पानी मेगतां तैन मैन्हुं केरे सामने हथ धोए ते जॉवः की आंव एस एक्की धर्मी मैन्हेरे खुने कैरां बरी भौताइं; तुस जॉन; ते तुशु कम जॉने। 25 ते सारे लोकेइं जुवाब दितोः की ऐसेरो खुन असन पुइ ते इशी औवलाधरे गले पुइ भोए। 26 तैखन पिलातुसे बराबो हथरां छडो ते यीशुए कोडे बहवैहितां तैनकेरे हवाले कियोः ताके तैना तैस सलीब दें।

सिपाहियां केरे जिये यीशु एरी निन्दा

(मरकुस 15 : 16 - 20 ; यूहन्ना 19 : 2, 3)

27 ते तैखन पिलातुसेरे सिपैहीयेइं यीशु शाही किले मां अन्तर नैइतां सारे फौव्जी सिपाही यीशुएरे चुफुरतां जम्हां भुए। 28 तैनेइं तैसेरां लिगां खोल्लां ते

तैस अक धोती जैरी प्लेटी। 29 फिरी कन्टां केरु ताज तैसरे दौगे पुड रखु ते तैसरे देहीने हथे मां अक सोटी दिती: ते तैसरे सामने खेडोइतां तैसरी हासी बनाने लगे की एह युहूदी केरे बादशाह: तीजो नमसकारे। 30 तैना तैसपुड थुकते थिये ते उण्डेइ सैहीं तैसरे दौगे पुड बहते थिये। 31 तैसरी हासी बनाने बाद तैसरी धोती खोली: ते तैस तैसरां लिगड़ां लुवां ते तैहां चले, ताके तैस सलीब देंन?

यीशु एरु कुसे पुड चाडु गहनू

(मरकुस 15 : 21 - 32 ; लूका 23 : 26 - 43 ; यूहन्ना 19 : 17 - 27)

32 जैखन तैना तैहां चलारे थिये; त तैन कुरेनेरो अक मैन्हुं मैल्हो: जैसेरु नोवं शुमोन कुरेनी थु: तैन लोकेइ टलातो ताके यीशुएरी सलीब छुइतां चलाए। 33 ते गुल्युत्ता नोवेरी ठैरी पुजे: जैसेरो मतलबे खोपडारी ठार। 34 तैडी तैनेइं यीशु अक नर्म जैरी शराप पिने जेई दिती: पण तैनी एशी सैहीं हुरेइतां इनकार कियो। 35 जैखन तैनेइं यीशु सलिबी पुड चहढो त शर्त रेखता तैसरां लिगड़ां भी एपु मम्हेइं बंटां। 36 ते तैडी बिशतां तैसेरो पैरो केरने लगे। 37 ते तैनेइं तैसेरो जुर्म एक्की पैखडी पुड लिखतां तैसेरे दौगे कैरां बह लाई जैसपुड ऐन लिखेरु थु: एह युहूदी केरो बादशाह? 38 तैखन यीशु सैहीं साथी दुई डैकन भी सलिबी दिती: अक यीशुएरे देहीने पासे, ते होरो बांए पासे। 39 तैहां गहने बाले सारे लोक दोग हिलैहितां गहते थिये ते ऐन ज़ोते थिये। 40 इस मन्दिरे डोलने बाला ते टलेई दिहड़न मां बनाने बाला: अपनो आप त बचा: अगर तू परमेशरेरु मडुस त एस सलीबी पुडरां ऊंढो ओस। 41 ऐन्चरे मन्दिरे पुरेहूत ते बुढे सियांने भी तैसरी हासी बनाते थिये: ते ज़ोते थिये। 42 ऐनी होरे बचाए पण अपनो आप न बचेईं बटो: इही त इस्राएलेरो बादशाह: अगर हुन्ना भी तु सलिबी पुडरां ऊंढो औसतां त अस तीं पुड विश्वास केरतम। 43 एसेरो भरोसो परमेशरे पुडए: अगर परमेशरे एस चहते त हेजु भी एस बचाए: किजो की ऐनी ज़ोवरु थु की आंव परमेशरेरु मडुइं। 44 ते दुई डैकू भी जैन तैससैहीं साथी स्लेब दितोरी थी: तैना भी तैस्रजो खरु बुरु ज़ोते थिये।

यीशु एरे प्राण देने

(मरकुस 15 : 33 - 41 ; लूका 23 : 44 - 49 ; यूहन्ना 19 : 28 - 30)

45 बहरे बज़न कैरां देंतु ते टलेई बज़न तग्र सारे मुल्खे मां अंधरु भेवरु थुं। 46 ते टलेई बज़ां केरे क्रिब यीशुए बडे ज़ोरे सैहीं ज़ोव एली एली लमां शफकैनी: जैसेरो मतलब भोते औ मेरे प्रभु औ मेरे प्रभु तीं आंव किजो शारो? 47 जैन लोक तैडी खड खडे थिये: तैन मैरां किछ शुनतां ऐन ज़ोने लगे, की एह त इलिया फुकारने लोरोए। 48 तैखन अक मैन्हुं दौवडतां जेव, ते अक गलास पैनीं मां डोबतां ते सरकण्डे पुड येनी नाघालेरी सौटी पुड टकेइतां पीनेरे लेइ तैसेरे ऐशी सैहीं हुराव। 49 किछ ज़ोने लगे ठैरा बलगा हुनी हेरतम की एलिया एस बचाने एइते की नैइं। 50 ते यीशुए फिरी ज़ोरे सैहीं चिंड मारी ते अपनी जान भी दिती। 51 तैखन हेकुरो पडदो बहं, ते बुन तग्र छींदोइतां दुई हिस्से भुओ ते पहाड़ां ते सारी ज़मीन हीलने लगी। 52 कब्रां फेटी जेई ते परमेशरेरे बडे पबित्र लोक ज़ैना मौवतरी निडला मां झूलोरे थिये: ज़िते भोइजे। 53 ते कब्रन मैरां निस्तां ज़िते भोनेरां पत्ती पबीत्र शहारे मां दाखल भुए: ते तैडी बडे होरी लोकेइं भी लाहे। 54 तैखन तैनी अप्सरे ते तैसेरे सैथेइं जैन यीशुएरी निगरानी केरने लोरे थिये: भुंजल गहंतो हेरो; त तैना डेरी जे; ते ज़ोने लगे: सच्चे ऐह मैन्हुं परमेशरेरु मडुए। 55 तैडी बेडी कौन्शां ज़ैना गलिले मैरां यीशु सैहीं साथी तैसरी सेवा केरती तैस पत्ती एवरी थी: ते दुररां तकने लोरी थी। 56 तैन मां मरीयम मगदलिनी याकुब त युसेसएरी अम्मा मरियम ते ज़ैबदेरे मड्डां केरी अम्मा साथी थी।

यीशु एरु दबू गहनू

(मरकुस 15 : 42 - 47 ; लूका 23 : 50 - 56 ; यूहन्ना 19 : 38 - 42)

57 जैखन डलोवड भुई त आरमितरो अक अम्बीर युसफ नोवेरो मैन्हुं ज़ै एपु भी यीशुएरो चेलो थु। 58 तैनी पिलातुसे का गैहितां यीशुएरी लाश मगी: ते पिलातुसे हुकम दितो की लाश एसेरे हवाले केरा। 59 युसफे लाश नैहीतां एक्की रोडी जैरी चादरी मां प्लेटी। 60 ते तै लाश एक्की नोवीं कूडी मां ज़ै शफडी मां

घडोरी थी तैडी लाश छड्डी: ते तैस कूडी आग्रोरां अक बड्डो घोड तैस ऊब्रो छडो। 61 ते मरियम मगदलिनी ते होरी मरीयम तैडी तैस कूदरे सामने जैस्मां यीशुएरी लाश रखोरी थी बिशोरी थी।

कबरी पुड पेरहो

62 होरसां फस्हा तिहारेरे दिहाड़े बाद मन्दिरेरे पुरेहूत ते फ्रिसी मिलतां पिलातुसे का पुजे। 63 ते ज़ोने लगे प्रभु असन यादे की तैनी धोखेबाजे अपने जिते सासैइं ज़ोवरु थु: की मीं टलेईयां दिहाड़े फिरी ज़ितु भोई गहनूए। 64 ऐलहेरेलेइ हुकम दे ताके टलाई दिहाड़न तग्र कब्रारी निगरानी की गाहे, कधे एरु ना भोए की तैसेरे चले एइतां तैसरी लाश छपाण, ते लोकन सैहीं ज़ोन की तै मुडदन मैरां ज़ितो भोवरोए, ऐह धोखो पैहिले धोखे कैरां भी जादे बुरो भौल्हो। 65 पिलातुसे जुवाब दितो, तुसंन का पेरहो देंने बाले आन्ह ता तैना नैथ ते ज़ैडी तग्र भोई सखते ता पेरहो देथ। 66 तैखन तैनेइं गैहीतां घोडे पुड अपनी मौहोर लाई: ते कब्रारी निगरनेरे लेइ पेरहेदार रखे।

यीशु एरु ज़ीतू भौनू

(मरकुस 16 : 1 - 10 ; लूका 24 : 1 - 12 ; यूहन्ना 20 : 1 - 10)

28

सबतेरां बाद हपतेरे पैहिले दिहाड़े टलेकडोते टलेकडोते मरियम मगदलिनी ते होरी मरियम ज़ैडी यीशुएरी लाश कुडी मां रखोरी थी: हेरने ऐई। 2 अचानक अक बड्डो भूजल आव: किजोकी प्रभु परमेशरेरो सुवर्गदूत अम्ब्रे मैरां आव; ते तैस कूडी ऐग्रियों घोड ऊंढो बछोइतां तैस पुड बिशी जेव। 3 तैसरी शकुर सुरत बडी रोडी दिहाड़ेरी जैरी थी: ते तैसरां लिगड़ां हीवेरां ज़ैरां छीतां सुफेद थीयां। 4 पेरहेदार डेरतां थर थर कम्बने लगे ते ज़ैरे मुडदे भुए। 5 सुवर्गदूते कौन्शन सैहीं ज़ोव: आंव जानताइं की तुस यीशुए तोप्ने लोरिथ: जैस सलीब दितोरी थी। 6 तै इडी नैइं बल्के जैन्चरे तैनी ज़ोवरु थु, तै ज़ितो भोवरोए एजा तै ठार हेरा ज़ैडी तै थु। 7 ते तैनेइं जल्दी गैहितां तैसेरे चलन पत्तो देथ: की तै मुडदन मैरां ज़ितो भोवरोए, ते तुसंन कैरां पैहिलो गलिले मां पुजोरोए: ते तुसेइं तै लहनांए हेरा मीं तुसंन ऐन ज़ोवरुए।

8 चाल्ही तैना कौन्शां डेरतां भी ते खुशी सैहीं भी कूडी मैरां बेइर ऐई: ते दौवडती दौवडती जेई ताके चलन पत्तो देंम। 9 अचानक यीशु तैन मैल्हो, ते तैनी ज़ोव तुसंन शांती मैल्हे: ते तैनेइं तैसेरे पाव बांते, ते तैसका मथो टेको। 10 तैखन यीशुए तैन ज़ोव: डरा त्रा ते गाथ ते मेरे दूलान सैहीं ज़ोथ की गलिले मैड्डो गहंन: तैन मीं तैडी लाहेले।

पेरदारां केरी बिसतार

11 हेजु तैना कौन्शां बत्ते थी, त पेरहेदारन मैरां किछ शहारे मां जे ते मन्दिरेरे पुरेहूतन सैहीं सारो बिस्तार शुनाव। 12 चाल्ही मन्दिरेरे पुरेहूतेइं ते सियांनेइं मिलतां मशौरो कियो की ते सिपैहीन खरी रकम दिती। 13 ते तैन ज़ोव: की जैखन अस राती झूलोरे थिये त तैसेरे चले अए ते तैनेइं तै नीयो। 14 अगर ऐह गल हाकमेरे कन्न तग्र पुजी त अस तैस सम्झामैल्हे ते तुसंन खतरे कैरां बचांमैल्हे। 15 तैखन सिपैहियेइं रकम नि ते ज़ैन्चरे तैनेइं ज़ोवरु थु तैन्चरे कमाव: ते अज़ तग्र ऐह गल युहूदन मां मुशूरे।

यीशु एरु लेइहोनू ते आखरी हुकम

(मरकुस 16 : 14 - 18 ; लूका 24 : 36 - 49 ; यूहन्ना 20 : 19 - 23 ; प्रेरतां कम्मां 1 : 6 - 8)

16 तैखन यारहे चले गलिले मां जे ते तैस पहाड़े पुड अकौठे भुए ज़ैडी गहनेरी यीशुए तैन हदैइयत दितोरी थी। 17 जैखन तैनेइं यीशु लाहु त तैसका मथो टेको: ते किछन हेजु भी शक थी। 18 तैखन यीशु तैन का नेइं आव ते तैन सैहीं ज़ोने लगे: मीं ज़मीनी पुड ते अम्ब्रे पुड पुरो अखतीयार दितोरोए। 19 ऐलहेरेलेइ तुस गहथ ते सैरी कौमां केरे चले बनाथ: ते तैन बाजी, मड्डेरे, ते पाबित्र आत्मारोनेोवें सैहीं बसीसमो देंथ। 20 ते तैन ऐह शिक्षा दैइयथ कि तैना तैन सैभी गल्लन पुड अंमल केरन जैनकेरो मीं तैन हुकम दितोरोए, ते हेरा आंव दुनियारे आखरी तग्र तुसन सैहीं साथी।

मरकुस

यूहन्ना बपतिस्मो देने बालेरो प्रचार

(मत्ती 3 : 1 -12 ; लूका 3 1 -18 ; यूहन्ना 1 : 19 - 28)

1 परमेशेरे मठै यीशु मस्हीएरी सूसमाचारेरी शुरुआत। 2 जेन्चरे यसाया नेबेरी कितबी मां लिखेरुए तक्का "आंव अपनो दूते तीं अग्री भेझतइ जे तेरे लेई बत्त तियार करेल्हो। 3 जंगले मां हक देने बालेरी आवाज शूनोने लगेरीए की "परमेशेरी बत्त तियार केरा ते तैसेरी सडकां सिधी केरा।"

4 यूहन्ना नबी आव जे जंगले मां बसिसमो देतो ते पापां केरे मैफरे लेई मन बदलनेरो प्रचार करतो थू। 5 सारे यहूदिया शहरेरे ते यरुशलमेरे रहने बाले निसतां तैस का जे ते अपने पाप मेन्त सैभेइं यरदन दरीयाए मां तैस कैरां बपतिस्मो नियो।

6 यूहन्ना ऊंटेरे बालां कैरां लिगडां लातो थु: ते चमडेरु पटको बंदधतो थू ते तै टिटां ते जंगली माछी खातो थियो। 7 ते तै ईही प्रचार करतो थु: की जे "मीं पत्ती एजने बालोए तै मीं कैरां बड्डोए आंव ऐस काबल नैइं कि लिकतां तैसेरे बूटां केरे तसमें खौल्ही सैखीं। 8 मीं त तुसन पैनी सैहीं बपतिस्मो दितोरोए पण तै तुसन पावत्र आत्माइं सैहीं बपतिस्मो दैल्हो।"

यीशु एरो बपतिस्मो ते अजमैइश

(मत्ती 3 : 13 - 14 ; लूका 3 : 21 , 22 ; 4 : 1 -13)

9 तैन दीहडन मां यीशु गलीलेरे नसरतेरां एइतां यरदन दरयाए मां यूहन्ना कैरां बपतिस्मो नियो। 10 ते जतल्ही तै पैनी मैरां निसतां बह अव त तली तैनी आसमान खुल्हु लाहुं ते आत्मा कबूतरेरी शकली मां एपू पुड एंडती लाही। 11 ते अम्ब्रे मैरां ईही आवाज आई "तु मेरु टलारु मडूस तीं पुड आंव खुशीं।" 12 तल्ही आत्मां तै बियाबान जंगले मां भेजो। 13 जंगले मां चैल्ही दिहाडन तत्र शैतान तैस आजमांतो राहु।

यीशु एरे सेवरु कम्म शुरु

(मत्ती 4 : 12 - 17 ; लूका 4 : 14 , 15)

14 यूहन्नारे टलेयोनेरां पत्ती यीशुए गलीले मां एइतां परमेशेरे राजेरी खुशखब्री शुनई। 15 ते जोंव: "बेलो पूरो भोउरोए ते परमेशेरी बादशाही नेडे एवरीए मन बदला ते इन रोडी गलन पुड विश्वास केरा।"

मछली टलाने बाला केरु कुजानू

(मत्ती 4 : 18 - 22 ; लूका 5 : 1 -15)

16 गलीलेरे डलेरे कंढे कंढे गहंते तैनी शमोन ते तैसरो द्लाह अन्ड्रियास डले मां जाल छडते लाहे किजोकी तैन मैछली टलने बाले थियो। 17 यीशुए तैन सैहीं जोंव, "मीं पत्ती एजा आंव तुसन मैन्हुं टलाने बालो बनल्हो।" 18 तैन तैखने जालां शैरतं तैस पत्ती जे।

19 थोडे जेरे अग्र तैनी जैबदेरु मडू याकूब त तैसरो द्लाह यूहन्ना किशती पुड जाल ठीक केरते लाहे। 20 तैनी तैन कूजाए ते तैन अपनो बाजी ज़बदी मजूरन सैहीं साथी किशती पुड छेडतं तैस पत्ती जे।

दुष्ट अमताई बालो मैन्हु बझानो

(लूका 4 : 31 - 37)

21 तली तैन कफरनहुमें मां आए ते सबतेरी दिहैडी मंढे मां गैहीतं शिक्षा देने लगे। 22 ते लोक तैसेरी शिक्षाई सैहीं हेरान भुए, कीजोकी तै शैस्त्री केरी जैरी

नैइं बल्के आधीकैरी केरी जैरी शिक्षा देतो थु। 23 तली तैनकेरे मंढे मां अक मैन्हुं थु, जैस मां बुरी आत्मा थी तै चिंडां लगे मारने। 24 औ यीशु नसरी असन तीं सैहीं कुन कम? कुन तु असन मारने ऐवरोस? आंव तीं ज्ञानतंइ तु कौन्स? पमेशेरो पवित्र मैन्हुं। 25 यीशुए तैस धमकैइतं जोंव: "चुप भो ते ऐस मैरां निसी गा।" 26 तली बुरी आत्मा तैस मरोडतं ते ज़ोरे सैहीं चिन्डां मैरतं तैस मैरां निस्सी जेई। 27 ते सब लोक हेरान भुए ते एपू म्मेहीं बेंस केरने लगे "ईही कून गल्ले? एह त कोई नोवीं शिक्षाए! ते तै बुरी आत्माइं भी हुकम देते ते तैन तैसेरो हुकम मेनचन।" 28 ते तैसेरु नोवं गलीलेरे आसे पासेरे सैभी ठैरन फैली जेवं।

बडे बिमार बझाने

(मत्ती 8 : 14 - 17, लूका 4 : 38 - 41)

29 तै मन्दिरे मैरां निसतां याकूब ते यूहन्ना साथी शमोन ते अन्ड्रियासेरे घरे अव। 30 शमोनेरी शिखी शिलहु भुखार थु, ते जैरो यीशु तैडी पुजो त लोकेइं तैसेरे बारे मां जोंव । 31 तल्ही तैनी नेडे गैहीतं तैसरो हथ टलेइतं ऊबरी उठाली ते तैसरो भुखार ठीक भोव ते तै तैनकेरी सेवा केरने लगी। 32 इलोव्झडी पुड जतल्ही दिहडो डुब्बो त लोक सब बिमारन त तैन जैन मां बुरी आत्मां थी तैस्का आन्हें। 33 एडी तत्र की सारे शहरेरे मैन्हुं तैडी आकौड्डे भुए। 34 तैनी बडन जैन अलग अलग बिमैरन मां दुखी थियो ठीक कियो ते बेडी बुरी आत्मा कैद्वी ते बुरी आत्मान ज़ोने न दितु किजोकी तैन तैस पशैन्ती थी की तै कौने।

अलके मां यीशु एरी प्रार्थना केरनी

(लूका 4 : 42 - 44)

35 होरसां झैझां दिहडो निसते तै घरे कैरां एकी दुर बेरान ठैरी गैहितां प्रथन केरने लगे। 36 ते शमोन ते तैसेरे साथी तैस तौप्ने लगे। 37 जैखन तै तैन मैल्हो त तैस सैहीं जोंव: "सारे लोक तीं तौप्ने लगेरेन।" 38 तैनी तैन सैहीं जोंव, "एजा अस होरी आसे पासेरे इलोवन मां गहंम कि आंव तैडी भी परचार केरीं किजोकी आंव एलहेरेलेई निसोरोइं।" 39 ते तै सारे गलीले मां तैन केरे मन्दिरण मां गैहीतं प्रचार केरतो ते बुरी आत्मा कढतो राहु।

कोदहरो रोगी बझानो

(मत्ती 8 : 1 -4 ; लूका 5 : 12 -16)

40 एके कौदें तैस्का एइतां बिनती की ते तैसेरे सामने जैंधु केरे भारे बिषतं तैस जो जोंव: "अग्र तु चहस त मेरु कौद साफ केरी बटतस।" 41 तैनी तैस तैसपुड तरस खेइतं हथ अग्रोहुं कियो ते तैस सैहीं हूरतं जोंव: "आंव चहतंइ की तु साफ भुई गा। 42 ते तै तैखने तैसेरु कौद हेटी जेवं ते तै पाक साफ भोव। 43 ते तैनी तै रुडे चारे समझैइतं तैखने वापस भेजो। 44 ते तैस्सैहीं जोंव: "केंची सैहीं किछ न ज़ोइयां पण गैहीतं अपनो आप प्रैहुतन हेरा ते अपने साफ भोनेरे बारे मां जैन श्रतं मुसै रेखोरी थी साथी नै तके गुवाही भोए की तु पाक साफ भोवरोस। 45 पण तै बेइर गैहीतं ऐस गल्लरो प्रचार केरने लगे ते ईडी तत्र एह गल्ल फैलाने लगे कि फिरी यीशु खुलो शहरे मां न गैही बटो पण बेइर जंगले मां राहु ते चैऊरे पासन लोक तैसका एइते राहे।

अधरंगी बझानो

(मत्ती 9:1-8; लूका 5:17-26)

2 बडे दिहडन पत्ती तै फिरी कफरनहुमे मां आव ते लोकेइं शुनू कि अज तै घरे। 2 फिरी एत्रे लोक अकौठे भुए कि दारे मां भी ठार न थी ते यीशु तैन वचन शुनेई राहोरो थु। 3 ते लोकेइं अक अधांगी मैनुहुं चैऊर मैनुहुं कैरां छूवेइतं तैस का आन्हों। 4 पण जत्तल्ही तैन भीडारे वजाही सैहीं तैसेरे नेडे न पुजी बटे त तैनेइं तैन ला जैडी तै थु, पुटू ते जत्तल्ही तैनेइं ला पुटू त तै खट तैनेइं जैस पुड अधांगी थु, तैस बत्त खट औसाल्ही। 5 यीशुए तैनकेरो विश्वास हेरतं तैस अधांगी सैहीं ज़ोव, “ओ मझा तेरे पाप माफ भुए।” 6 तली बडे शास्त्री जैन तैडी थिये अपने अपने मने मां सोचने लगे, 7 एहे मैनुहुं एन्चरे कीजो ज़ोते? एह त परमेशरेरी तुहीन करते! पण परमेशरेरे आलावा कौन पाप माफ केरी बटते? 8 यीशुए तैखने अपने आत्माइं मां बुझतं कि ऐन अपने अपने मने मां ऐन सोचने लगेरेन ते तैन सैहीं ज़ोव, “तुसा अपने अपने मने मां ऐन किजो लगेरेथ ज़ोने? 9 आसान कुने? अधांगी सैहीं ऐन ज़ोनु कि तेरे पाप माफ भुए या ऐन ज़ोनु कि उठ अपनी खट छू ते चल फिर? 10 पण तुसंन पत्तो लगे कि मैन्हेरे मट्टे ज़मीनी पुड पाप माफ करनेरो भी आधीकारे।” तैनी अधांगी सैहीं ज़ोव। 11 “आंव तीं ज़ोतंइ उठ अपनी खट छूइतं घरजो गा। 12 तै खडो ऊडो ते तैखने खट छूइतं सैभी केरे सामने चलो जेव ऐस पुड सभ हेरान भुए ते परमेशरेरी तरीफ केरने ते ज़ोने लगे आसैइं एरहो तमाशौ कथै नैइं लाहोरो।

लेवी कुजानो

(मत्ती 9:9-13; लूका 5:27-32)

13 तै फिरी निसतां डल्हेरे कन्डे जेव ते सारे लोक तैस्का आए ते तै तैन शिक्षा देने लगे। 14 ज़ैखन तै चलोरो थु, त तैनी हेलफेरू मट्टू लैवी केरे चुंगरे चौकी पुड बिशोरू लाहु ते तैस्सैहीं ज़ोव, “मीं पत्ती चल” ते तै तैखने उठतं तैस पत्ती चलो जेव। 15 जत्तल्ही यीशु लैवी घरे मां रौट्टी खाने बिशो त तल्ही बडे चुंगी नैने बाले ते पापी यीशु त तैसेरे चलन साथी रौट्टी खाने बिशे किजोकी तैन बडे थिये ते कहीं तैसपत्ती चलते थिये। 16 शास्त्री ते फ़िरी ऐन हेरतं कि तै पैज ते चुंगी नैने बालन सैहीं साथी रौट्टी खाने लगेरोए तैसेरे चलन सैहीं ज़ोव, “तै त चुंगी नैने बालन ते पैज सैहीं खाते पिते?” 17 यीशुए ऐन शुन्त ज़ोव, “तंदरुसतन हकिमेरी ज़रूरत न भोए पण बिमारन भोचे आव धर्मी मैनुहुं नैइं पण पैज कुजाने एवरोइं।”

बरतेरो सुवाल

(मत्ती 9:14-17; लूका 5:33-39)

18 यूहन्नेरे चले ते फ़िरी ब्रत रखते थिये ते तैनेइं एइतां यीशुए पुछने लगे “यूहन्नेरे चले ते फ़िरी केरे चले किजो ब्रत रखते थिये पण तेरे चले ब्रत किजो न रखन?” 19 यीशुए तैन सैहीं ज़ोव, “जां तग्र लाडो जैनी सैहीं साथी रहते, कुन तैन ब्रत रेखी बटतन? पण जां तग्र लाडो तैन सैहीं साथीए, तां तग्र तैन ब्रत ना रेखी बटन। 20 पण तै दीहाडी एजनीए जत्तल्ही लाडो तैन कैरां अलगा केरनोए, तैस मोके तैना ब्रत रखवैले।”

21 “नोवें कपडेरी टलोईं पुराने लीगाडे पुड ना लान, नता तै टलोईं तैस मैरां होरो भी छिंदेल्ही, मतलब नोवीं, पुराने सैहीं, ते तै पैहिले कैरां जादे छींदोल्ही। 22 नोवीं दाछरो रस पूरेनी मसकी मां कोई ना रखन, नता दाछरो रस मसकन छींदते, ते दाछरो रस ते मसका दूईये बरबाद भुई गहन, पण नोवीं दाछरो रस नोवीं मसकन मां रखतन।”

सबतेरो प्रभु

(मत्ती 12:1-8; लूका 6:1-5)

23 एरू भोवं कि तै सबतेरे दिहाडे उडरन म्मेइं चलोरो थु, ते तैसेरे चले चलते चलते शिला लगे टलोइने। 24 ताली फ़िसेइं तैस सैहीं ज़ोव, “तक, ईना सबतेरे दीहैडी तैन कम केरतन ज़ैन केरनू जैईज नैइं?” 25 तैनी ज़ोव, “कुन तुसेइं कधी नैइं पड़ेरू कि जत्तल्ही दाऊदे ज़रूरत पैई, ते जत्तल्ही

तैस ता तैसेरे सैथन दलुख लगी, ताली तैनी कुन कियुं? 26 तैनी कैचरे अबियातारेरे जमाने मां मंद्रेरे मां सेवा केरने बाले परैहुतेरे बेले, परमेशरेरे भवने मां गैहीतां चैडोरी रौट्टी खेई, जैसेरी रौट्टी परैहुतां केरे आलावा होरो कोई ना थु खेई बटतो, ते तैनी ऐपु भी खेई ते अपने सैथन भी दिती?” 27 ताली तैनी तैन सैहीं ज़ोव, “सबतेरी दीहाडी मैनेरे लेई बनेवरीए, ना कि मैनुहुं सबतेरे दिहाडे लेई। 28 ऐलहेरलेई मैनेरू मट्टू सबतेरे दीहैडारो भी मालके।”

शुकोरे हथे बालो मैनुहु बझानो

(मत्ती 12:9-14; लूका 6:6-11)

3 तै फिरी मंद्रे मां जेव, तैडी अक मैनुहुं थु ज़ैसेरो हथ शुकोरो थु। 2 ते तैना तैस पुड दोष लहनेरे लेई मोको तकते थिये, कि तै सबतेरे दिहाडे एस बझाते ता एस पुड अलजाम लाम। 3 तैनी तैस शुकोरे हथे बाले मैनुहुं सैहीं ज़ोव, “तै मझाटे खडो भो।” 4 ते तैनी तैन सैहीं ज़ोव, “कुन सबतेरे दिहाडे भलाई केरनी जैईजे की बुराई केरनी, जान बचानी कि जान नैनी।?” पण तैना चूप भुए। 5 तै तैन केरे सखत दल हेरतां उदास भोव ते, तैनी सरकी सैहीं चैवरे पासन तकू, ते तैस मैनुहुं सैहीं ज़ोव, “अपनो हथ अग्रोवं केर।” ते तैसेरो हथ ठीक भोव। 6 ताली फ़िरीसी बैईर गैहीतां होरन सैहीं तैसेरी खलाफत केरने लगे कि तैस कैचरे खत्म केरम।

भीड यीशु पत्ती

7 यीशु अपने चलन सैहीं साथी डलेरे पासे चलने लगे, ते गलीलेरां अक बडी भीड तैस पत्ती चली, 8 ते यहूदिया, ते यरोशलम, ते यरदनरे पार, ते सूर ते सैईदेरे आसे पासेरां बडे लोक ऐन शुन्तां कि तै कैरहां कैरहां कम्मा केरते, तैस का आए। 9 तैनी अपने चलन सैहीं ज़ोव, “हच्छे लोकां केरी वजाही सैहीं मेरे लेई अक निकडी ज़ैरी किशती तियार केरा, ताके एना मीं दलैची ना छडन।” 10 किजोकि तैनी बडे लोक ठीक कियोरे थिये, ऐलहेरेलेई ज़ैरे लोक भीमार थिये, तैस्सेहीं हुरनेरे लेई तैस पुड बिछडते थिये। 11 गैदी आत्मा भी, जत्तल्ही तैस लैती थी, ता तैस का बिछडती थी, ते चिन्डां मेरता ज़ोती थी कि तु परमेशरेरू मडुस, 12 ते तैनी तैन बडू ज़ोव कि मीं बांदे ना केरथ।

बहरे चले ठेराने

(मत्ती 10:1-4; लूका 6:12-16)

13 फिरी तै पहाडे पुड जेव, ते ज़ैन तै सुखातो थु एपू का कुजाए, ते तैना तैस का आए। 14 ताल्ही तैनी बहरे मडद चुने कि तैना तैस्सेहीं साथी रहन, ते तै तैन भेजे कि तैना प्रचार केरन। 15 ते गैदी आत्मान कढनेरो आधीकार रखन। 16 तैना इन्न, शमौन ज़ैसेरू नोवं तैनी पतरस रखू। 17 ते ज़ैबदेरू मडु याकूब ते तैसेरो दला यहून्ना ज़ैसेरू नोवं तैनी बुअन्नगिस मतलब गुडनेरू मडु रखू। 18 ते अन्नदियास, ते फिलिप्पुस, ते ब्रतुल्माई, ते मत्ती, ते तोमा, ते हेलफेरू मडु याकूब, ते तद्दी, ते शमौन कनाणी, 19 ते यहूदा अस्क्रयुती जैनी तै दलुवेवरां भी थु।

यीशु ते बालजबूल

(मत्ती 12:22-32; लूका 11:14-23; 12:10)

20 ताली तै घरे आव, ते एत्रे हच्छे लोक थिये की तैनी रौट्टी भी ना खेई बटी। 21 जत्तल्ही तैसेरे डलोवें बालेइं ऐन शुनु ता तैस ट्लानेरे लेई निसे, किजोकी तैना ज़ोते थिये कि एह अपने आपे मां नैइं।

22 शास्त्री भी ज़ैना यरोशलमेरां एवरे थिये, ऐन ज़ोते थिये, “ऐस मां शैताने,” ते एह गैदी आत्मां केरे सरदाररे मट्टी सैहीं गैदी आत्मा कढते। 23 ऐलहेरेलेई तै तैन नेडे कुजेइतां कहानी शुनाने लगे, शैतान कैचरे शैताने केडी बटते? 24 अग्र केन्चेरे राजे मां अन बन भोए ता तै कैचरे आमन चैन करेइ बटते? 25 अग्र कैची घरे मां अन बन भोए, ता तैस घर मां कैचरे आमन चेंने भोई बटते? 26 अग्र शैतान अपनो विरोधी भोए ता अपने मां बगाड केरे, ता तै कैचरे रेही बटते? तैसेरो ता खातमो भोई गहते।

27 “पण कोई मैनुहुं कैची तकडे मैनेरे घरे मां गैहीतां तैसरो माल ना लुटी बटे, जां तग्र कि तैस निग्र मैनुहुं ना बंधे, ते फिरी घर लुटेल्हो। 28 आंव तुसन

सैहीं सच जोताइ, मैनुं केरे सभे पाप ते निन्दा जै तै केरते माफ कीये गाल्हे, 29 पण जै कोई पवित्र आत्माही तौहीन केरे, तैस कधे माफ ना कीयूं गाल्हु, बलके तै हमेशारे पापेरो जुर्मदार भोलो। 30 किजोकी तैना ऐन जोते थिये ऐस मां गंदी आत्माएं।

यीशु एरी अम्मा ते इलाह

(मत्ती 12 : 46 - 50 ; लूका 8 : 19 - 21)

31 चाली तैसरी अम्मा ते तैसरे दूला आए, ते बेइर खडे भुए ते तैस जो बिसतार भेजो। 32 लोक तैसरे आसे पासे बिशारे थिये, ते तैनेइ तैस जॉव, "तक बेइर तेरी अम्मा ता तेरो दूला तीं पुछने लगेरेन।" 33 तैनी तैन जुवाब दितो, मेरी आम्मा ता मेरे दूला कौनण? 34 ते तैनकेरे जैना तैसरे आसे पासे बिशारे थिये, तेकतां जॉव, "तका मेरी अम्मा ता मेरे दूला इनण। 35 किजोकी जै कोई परमेशरेरी मेरजी पुड चलते तैहे मेरो दूला ते बेहीनण ते अम्माएं।

बीज बेने बालेरु दृष्टान्त

(मत्ती 13 : 1 - 9 ; लूका 8 : 4 - 8)

4 तै फिरी डल्हेरे बन्ने शिक्षा देने लगे, ते एनी भीड तैस्का आकोठी भोइ कि तै डल्हे मां एकी किशती पुड चैइतां बिशो, ते सारी भीड डल्हेरे बन्ने खडी राही | 2 तै तैखन तैन मुसाला केरे जिरये सैहीं बेडी गल्लां शिखालने लगे, ते एपनी शिक्षाई मां तैन जो जॉव, 3 "शूना! अक भीज बेने बालो भीज बेने चलो | 4 बेंते बार कीछ भीज बत्तरे आसे पासे झडू ते चडोलेंइ एइतां चुनू | 5 किछ भीज घोडांगले मां झडू जैडी तैस डुघी मित्ती ना मैल्ही ते तैन जल्दी लगू | 6 ते जत्ताल्ही दिहाडो निसो, ता फुकोइ जेवं, ते जील ना लग्रेरे वजाही सैहीं शुकी जेवं | 7 ते किछ बिज झल्लन मां झडू, ते तैन बिज लगने ता लगू पण झल्लां केरी ओदी मं रुं, ते तैस पुड कोई फल ना लगे | 8 पण किछ रोडी ठैरी जमिनी मां झडू, ते तैन लगू ते बेडोइतां तैस पुड फल लगो, केंची पुड टलीही गुन्हा केंची पुड शठ गुन्हा ते केंची पुड शौव गुन्हा | 9 तैखन यीशुए जॉव, जैस का शुन्नेरे कन भोन तै शूने |

दृष्टान्तां केरो मकसद

(मत्ती 13 : 10 - 17 ; लूका 8 : 9 - 10)

10 जत्ताल्ही तै अकैल्हो थु, ता तैसरे सैथेइ तैन बहरन सैहीं साथी ऐन कहैनी केरे बारे मां पुछने लगे | 11 तैनी तैन सैहीं जॉव, तुसंन ता परमेशरेरे राजेरे भेतेरी समझ दितोरीए, पण बेइरीन जो सब गल्लां कहेंन मां भुईचन | 12 एहेरेलेई "कि तैना तकने ता तकतन पण तैन समझ ना एजे, ते शुन्ने ता शून्तन, पण तै तैन समझ ना एजे, एरु ना भुए कि तैना बेदलोन, ते तैन माफी मैल्हे | "

बीज बेने बालेरु दृष्टानतेरी तपसील

(मत्ती 13 : 18 - 23 ; लूका 8 : 11 - 15)

13 फिरी यीशुए तैन सैहीं जॉव, "कुन तुसां ऐह कहांनी ना समझथ? ते फिरी तैना सैरी कहैनी केंचरे समझलेहे? 14 14 बिज बेने बालो वचन बेते | 15 किछ लोक जैन वचन शुंनाव गहते, बत्तरे बन्ने बाले तैत्र, जैखन तैनकेरे दिले मां परमेशरेरु वचन बेवं गहते, ता शैतांन ऐइतां तैनकेरे दिले मैरां तै वचन धिनी गहते | 16 ऐंचरे किछ लोक घोडेंगली जमिनरे जैरेन, जैन पुड वचनेरु बिज डुलते तै परमेशरेरो वचन शुंनते बार कुबुल केरतन | 17 पण तैन मां वचनेरु बिज पक्कु ना भोए, तांए तैन थोडे दिहाडे रहते, ते जैखन तैस पुड तैस वचनेरे जॉने सैहीं तैस पुड दुख मुसिबत ऐइये ता तैना बिछडी गहतन | 18 ते जैन झल्लन मां बिज डुल, तैना तैन लोकन, जैना वचन ता शुंनतन | 19 पण ईस दुनियारी फिकर ते दौवलतरो धौखो फ्रेब ते होरी चिजां केरु लालच तैस वचने दबेई छडते, ते तैस बिजे कोई फल ना लगे | 20 ते जैन रोडी ठैरी बिज बेंव, इना तैत्र जैना वचन शुंनतन ते कबूल केरतन ते तैन फल भी लगते, केंची टली गुन्हा, केंची शठ गुन्हा ते केंची शौव गुन्हा | "

दीयेरु दृष्टान्त

(लूका 8 : 16 - 18)

21 तैखन यीशुए तैन सैहीं जॉव, तुस कुन दियो बैलतां ऐलहेरलेई आन्हत्तथ की तैस केंची खडी हैठ छपैइतां रखम, ते ऊची ठैरी ना रखम? 22 किजोकी अगर कोई चिज छप्पौरीए ता तैस बांदी केरम, ते अगर कोई चिज ओडकोरीए ता तैसपुडेरां ओडकुनु खडु केरम | 23 जैस शुन्ने बाले कन्न भॉन ता तै शुंने | " 24 फिरी यीशुए तैन सैहीं जॉव, जैन किछ तुस शुंनतथ तैन रोडे चारे शुना, जैस हैटी सैहीं तुस मिनतथ तैस्से हैटी सैहीं तुसनभी मिनतां दैल्हे, ब्लके थौडु जादे" | 25 जैसका आहे तैस होरु भीदैल्हे, पण जैसका सैइयां नैइ, तैसकेरां तैन भी नियुं गाहेलु जैन तैसका भौलु भी ता | "

उगाने बालेरु दृष्टान्त

26 फिरी यीशुए जॉव, परमेशरेरी बदशाही तैस मैनेरी जैरीए, जै जमिनी मां बिज बेते | 27 रात दिहाडी भावें तै झुल्ले ते भावें बिंझौ बिशौ, बिज बल्हे बल्हे बेडोतु रहते, ते तैस पत्तो भी ना भोए कि तैन केंचरे लगते ते केंचरे बेडोते | 28 जमिनी मां ऐपु फल पैते, पैहिले पटलां लगतन ते फिरी डाल बनते ते फिरी गलेव भेरोतन | 29 जैखन आंन् पकते ता तै फिरी डलात आन्हत्ते, किजोकी फसल पक्कोरी भोचे |

राइयरे दानेरु दृष्टान्त

(मत्ती 13 : 31 , 32 , 34 ; लूका 13 : 18 - 19)

30 फिरी यीशुए जॉव, अस परमेशरेरी बादशाही किसेरी जैरी जॉम, या कैस केहेंने जिरये सैहीं जॉम? 31 तैन रेईयरे गलेवेरु जैरुए जैन उडारे मां बेतन ते जैखन बेतन ता सैभी बीजन मैरां निकडू भोते | 32 पण बेंनेरां पत्ती जैखन तैन लगते ता सैभन केरां बड्डो डाल बनते, ते तैसरे ऐरे बड्डे डाल भोतन कि हवारां चडोल्लु तैस हैठ छावी बिशतन | 33 यीशु तैन सैहीं ऐस किसमेरी केहेंनी केरे जिरये सैहीं तैनकेरी समझारे मुताबक गल्लां केरतो थु | 34 ते बगैर मुसालारे तैन सैहीं किछ भी ना थु जोतो, पण जैखन यीशु ते तैसरे चले आकैल्हे भोते थिये ता तै तैन मुसालां केरो मतलब समझातो थु |

तोफान रोकनो

(मत्ती 8 : 23 - 27 ; लूका 8 : 22 - 25)

35 तैस्से दिहाडे जैखन डलौवझ भुई ता तैनी अपने चलन जो जॉव, ऐजा ईस तलाऐरे पार गहंम | 36 चाल्ही तैनी बडे लोक भेजी छड्डे, ते यीशु जैस हिसाबे मां तै किशती मां थु, साथी चले जे, ते होरी भी बेडी किशती तैन सैहीं साथी थी | 37 अचांनक हवा चली ते पैनैरी छैल्ही किशती सैहीं बजने लेगी, ते किशती मां पानी भेरोंने लगु | 38 यीशु किशतरे पैत्रीं पासे ऐक्की गैदी पुड झुल्लोरो थु, चलेइ तै बिंझाव ते जॉव, औ गुरु असां ता डुबने लगेरेम, कुन तीं ईशी कोई परवाह नैइ? 39 तै बिंझौ" ते तैनि हवाई जो धमकी दिती ते तलाऐ जो जॉव, चुप भौ ते रुकी गा ते हवा रुकी जेई ते बडी शांती भुई | 40 तैखन तैनी अपने चलन सैहीं जॉव, तुस ऐरे किजो डरतथ? तुस विशवास कि ना रखथ | 41 पण तैना हद्दी केरां जादे डेरी जेवरे थिये ते ऐक्की होरी सैहीं जॉने लगे, की ऐह कौने की हवा ते डल्ह भी ऐसेरो हुकम मन्तन?

दृष्टातमाई बाले मैनुं बज्जानों

(मत्ती 8 : 28 - 34 ; लूका 8 : 26 - 39)

5 तैना तलाऐरे पार ग्रैसिनीऐरे आलाके मां पुजे | 2 जैरो तै किशती मैरां औस्सौ ता अक मैनुं जैस्मां दुषटाल्मां थी, कब्रासतांन मैरां नितां तैस्का आव | 3 तै कब्रसताने मां रहतो थु, ते हुंनी तै शांगलेंइ सैहीं भी बांधनो मुशकल भोइ जेवरो थु | 4 किजोकी तै पैहिले कैही फैरेइं बैडेइं ते शांगलेंइ सैहीं बंधौरो थु, पण तै शांगलन भी टलोडतो थु ते बैडी केरे टोटे बनातो थु, ते कोई तैस कैबु ना थु केरी बटतो | 5 ते रात दिहैडी कब्रन ते पहाड़न मां चिडां मारतो ते अपनो आप घोडेइं सैहीं जखमी केरतो रहतो थु |

6 जैखन तैनी यीशु दुरेरां लाहु ता तै दौवडतो तैसका आव, ते तैसेरे तुत्रे अगर मथौ टेकते खिरको | 7 ते बडे जोरे सैहीं चिडां लगे मारने, एह यीशु" परमेशेरेरा मड्डा" तीं मीं सैहीं कुन कम्मे? तीं प्रभु परमेशेरेरी कसम भोए मीं त्रके मं ना छड | 8 गल दरासले मां एह थी की यीशुए तैससैहीं जोवरु थु, एह दुषटातमां ऐस मैन्हुं मेरं बेईर निसी गह | 9 यीशुए तैस पुछु, तेरु नोवं कुने? तैनी जुवाब दितो मेरु नोवं लैशकरे, किजोकी आसां खासै जनेम | 10 तैखन तै मैन्हुं यीशु का हथ जोडतं जौने लगे, असन ईस आलाके मेरां बेईर ना भेजां |

11 तैडी पहाडे पुड सुरां केरो अक बडो घांन चरने लोरो थु | 12 ते दुषटातमां यीशु का मिनत केरतां जौने लेगी, असन ईन सुनन मां भेज ताके असां तैन मां गैहितां बिशम | 13 चाल्ही तैन दुषटातमां यीशुएरो हुकम मैल्हे सैहीं तैस मैन्हुं मेरां नितां तैन सुनन मां चेली जई, ते तैन सुरां केरो घांन कोई दुई हजारा थु, ते ऊत्रेई ऊंढे सारे सुर दौवडते दौवडते तलाए मैझौ छालां मारते जे ते सभ सुर तलाए मां डुबतां मैरी जे |

14 चाल्ही सुर चारने बाले तैड्डा नैशातां डलोवन मम्हेइं शहारे मां जे, ते ऐस गल्लरी खब्र फैलाई, ते लोक एस गल्लरो तमाशो हेरने दौवडते तैडी आए | 15 ते जैखन तैना यीशु का पुजे ते कने तै मैन्हुं जैस मेरां दुषटातमां निसोरी थी, लिगडां लमगोरां लहं ते कने होशी मां बिशोरो लाहु ता तैना बडे डेरी जे | 16 जैन मैन्हुं एह तमाशो लाहोरो थु ता तैनेइं दुषटातमाइं बाले मैनेरो हाल भी ते सुरां केरो सारो हाल तैन सैहीं शुनाव | 17 चाल्ही तैना लोक यीशुएरे छंदे केरने लगे, की ईशै आलाके मेरां चलो गा |

18 जैखन यीशु किशती मां चडने लगे ता तै मैन्हुं जै पैहिले दुषटातमां केरे कब्रज मां थु, यीशु का छंदे केरतां जौने लगे, मिम्हीं ऐपु सैहीं साथी नै | 19 पण यीशुए तै ऐपु सैहीं साथी एजने ना दितो, ब्लके तैस ऐन जौव, की अपने घरे गा, ते अपने लोकन जो, की परमेशेरे इन कुन कमेवरुए मीं पुड बडी दिया कमेवरीए, ते सभ लोक बडे हेरांन राहे | 20 तै घरे जेव, ते दिकपलुसै मां गैहितां एह सारो बदसतार शुंनाने लगे, की यीशुए मेरे लेई कैत्रु बडु कम कियेरुए, ते सभ लोक तजब केरते थिये |

याइरेरी कुइय ते अक रोगी कोन्श

(मत्ती 9 : 18 - 26 ; लूका 8 : 40 - 56)

21 फिरी यीशु किशती मां वापस भोव, ते जैखन तै तलाएरे पार पुजो ता बडे लोकां केरी भिड बन्ने पुड जम्हां भुई | 22 तैखन युहुदी केरो तैठेरे प्राथना भावनेरो अक परैहुत, जैसेरु नोवं यायेर थुं, तैडी आव" तैनी यीशु लाहु ता तैसेरे पांउन पुड पव | 23 ते मिनत केरतां जौने लगे, मेरी निकडी कुई मरने बालीए, छंदौ तु ऐई ते तैस पुड हथ रख ताके तै बैझौए ते जिती राहे | 24 यीशु तैससैहीं साथी चलो जेव, ते लोकां केरी ऐत्री भिड थी की लोक तैस ऊंढे खिरकते थिये |

25 तैन मां अक कौन्श थी जैस बहरे सालां केरी देंती लैहु बग्रेरी बिमारी थी | 26 तै कैही बैइदन ते हकिमन केरां आलाज केरते केरते परेशान भोवरी थी, ते अपनो बडो पैइंसो लूट्टेवरो थु, पण बैझौनेरे बजाए हछी जादे बिमार भोती जई | 27 तैसां यीशुएरे बारे मां बडु किछ शुंनेरु थुं, ऐलहेरलेई तैसां हछै लोकां केरी भिडी म्महेइं घुसडतां यीशुएरे चौगे सैहीं हथ लाव | 28 किजोकी तै जोती थी, की अगर आव यीशुएरे लिगडन सैहीं हथ लाएली ता आव बैझौनी | 29 तैखने तैसारो लैहु बगरो बंद भोई जेव, ते तैसां ऐपनी जानी मां हिमत आई ते तैसां तैखने बुझू की अज मेरी सारी तकलिफ मुक्की जई | 30 यीशुए तैखने बुझू की मीं मेरां सांग्रथ निसोरीए, ते लोकां केरे पासे मुडतां जौने लगे, मीं सैहीं कौन हुरोरोए? 31 तैसेरे चलेइं यीशु जो जौव, तु हेरने लागोरोस, की लोक तीं ऊंढे कैत्रे बिछडने लागोरेन, ते फिरभी तु असन पुछतस की मीं सैहीं कौन हुरोरोए? 32 पण यीशु चौवरे पासन तकने लगे, की आव हेरी की कौन मीं सैहीं हुरोरोए | 33 पण तै कौन्श ऐन बुझतां की तैस यीशु सैहीं हथ लांनेरो कुन आसर भौवरोए, डरती डरती यीशु का आई ते तैसेरे पांउन पुड करोडी रेखतां सारो बिसतार जौने लगी | 34 यीशुए तैसजो जौव, कुइये तेरे विशवासे सैहीं तु बैझौरि, खुशी सैहीं गा, हुंनी ऐस बिमैरी केरां बेची जई |

35 यीशु हेजु मस्सां ऐन जौने लगेरो थु, ता प्राथना भावनेरो अक परैहुत ते किछ मैन्हुं घरेरे पुजी जे ते जौने लगे, तेरी कुई मैरि जेवरिये, ते हुंनी गुरु जिंन तकलिफ देनेरो कोई फैइवो नैइं | 36 यीशुए ऐन शुंनतां प्राथना भावनेरे परैहुते सैहीं जौव, डरा नन्ना स्त्रिफ विशवास रखा | 37 फिरी यीशुए याकुब ते तैसेरो दला युहन्नारे आलावा होरो कोई ऐपु सैहीं साथी एजने ना दितो | 38 जैखन तैना प्राथना भावनेरे परैहुतेरे घरे पुजे ता तैनी हेरु की तैडी ता बडी शौर मचूचोरिये, ते लोक लेरां लागोरेन देने | 39 जैखन यीशु आंत्र जेव ता तैनी जौव, तु लोक किजो ऐत्री लेरां लागोरेथ देने, कुई मुओरी नैइं ब्लके झुलोरिये | 40 यीशुएरी ऐस गल्ली पुड लोक हसने लगे, पण यीशुए तैना सभ तैड्डां बेरोहं कदै, ते कुईयेरे हैई बौव ते अपने साथी नैइतां कुईये का जेव | 41 यीशुए कुईयेरो हथ टलेइतां कुइये जो जौव, तलिता कोमीं" तैसेरो मतलबे, ओ कुइये आव तीं जो जोताइ, खडी ऊठ" | 42 कुई अक दम खडी ऊठी ते चलने फिरने लगी, किजोकी तै बहरे सालां केरी थी, ऐन लैहितां तैना हेरांन रेहिजे | 43 यीशुए तैन सैभन ठाकु की ऐस गल्लरो पत्तो केची ना दैइयथ, ते होरु ऐन जौव की कुइये कुखुं खाने जो दैथ |

नासरते मां यीशु एरु अपमान

(मत्ती 13 : 53 - 58 ; लूका 4 : 16 - 30)

6 फिरी यीशु तैड्डां निसतां अपने शहरे जो चलो जेव, ते तैसेरे चले भी तैससैहीं साथी चले जे | 2 जैइस सब्बेरी दिहाडी आई ता यीशु तैड्डेरे प्राथना भावने मां जेव, ते तैडी शिक्षा देने लगे, ते बडे लोक हेरांन रेही जे, ते जौने लगे, एह कैरी अक्के जै ऐस मैल्होरीए? ते एसेरे हथेइं सैहीं कैरे कैरे चमतकार भोतन? 3 कुन एह तै ठंठार नैइं, जैन मरियमरु मडु याकुब, ते युस्स, ते युहुदा, ते शुमौनेरो, दलाए? ते ऐसेरी बैहिना ईशै ईडी रेहिचन? ते ऐसेरे वजाही सैहीं तैना भी बदनाम भुए | 4 यीशुए तैन सैहीं जौव नबी अपने मुलखे ते अपने रिशतेदारन ते अपने घरेरे अलावा कोन्ची ठैरी बैजत ना भोए | 5 ते तै हछे चमतकार ना केरी बटो, सिरफ थोडे जैरे बिमारन पुड हथ रेखतां तैना ठीक केरनेरे आलावा होरो कोई बडो चमतकार ना हेरेई बटो | 6 तै तैठेरे लोकां केरे आविशवासे पुड हेरांन भौव, ते तै तैड्डां निसतां आसे पासेरे डलोऊन मां ते शहरन मां गैहितां शिक्षा देने लगे |

बारहे प्रेरत भेझने

(मत्ती 10 : 5 - 15 ; लूका 9 : 1 - 6)

7 ते तैनी तैना बहरे चले एपू का कुजेइतां दुई दुई भेजने शुरु कीये ते तैन दुषटातमांन पुड आधीकार दितो | 8 ते तैन एह भी हुकम दितो कि बत्तारे लेई सोटरे अलावा होरु किछ ना नैहीयथ, ना रौडी, ना झोलो ते ना अपने मज्झै मां पैइसे नैइयथ | 9 जुडी लाथ पण दुई दुई कुरते ना लेइयथ | 10 तैनी तैन ऐन भी जौव, की जैडी भी तुस केची घरे मां गाहेले ता तैडी बिशथ, जां तगर तैड्डां गहनेरो मोको ना ऐजे | 11 ते अगर कोची जगाई लोक तुसन ना सुखांन ते तुशी गल ना शुंन्नी ना चहंन ता तैड्डां गहते बार अपने पांवां केरी धुड तुडकथ, ताके तै तैनकेरे खलाफ शहात दे | 12 चाल्ही तैना चले जे ते एह प्रचार केरने लगे, की तोबा केरा | 13 तैनेइं बेडी दुषटातमां कैदी, ते कैही बिमार तेल मेलतां बज्झाए |

यूहन्ना बपतिस्मो देने बालेरी मौत

(मत्ती 14 : 1 - 12 ; लूका 9 : 7 - 9)

14 हिरोदेस बादशाहे यीशुएरे बारे मां शुंनु, किजोकी तैसेरु नोवं बडु मुशुर थुं, ते किछ लोक जोते थिये, की युहन्ना" बपतिसमो देने बालो मुडदन मेरां जिता भोवरोए, तांए ता ऐसमां चमतकार हेरांनेरी क्रामाते | 15 पण किछ जोते थिये, एह ईलियाए" ते किछ लोकां केरु जौनुए की पुरांने नेबन मेरां कोई अक नबीए | 16 जैखन हिरोदेसे ऐन शुंनु ता तैनी जौव, युहन्ना" बपतिसमो देने बालेरी क्रोडी ता मीं कट्टेवरी थी, ते तै फिरी जिता भोवरोए | 17 आसलिते मांहिरोदेस बादशाहे युहन्ना टलेइतां जैल्ही मां छड्डोरो थु, गल्ल एहे थी की हिरोदेस बादशाहे अपने दलाए फिलपुसेरी कौन्श हिरोदियासी सैहीं डलाह बनेवरो थु | 18 ते युहन्ना हिरोदेसे जो जोतो थु, की तेरे लेई

अपने दूलाएरी कौन्श रखनी जैईज नैइं | 19 तांए ता हिरोदियास भी युहन्ना सैहीं दुशमुनी रखती थी, ते तैस माराने चहती थी, पण तैस मोको ना थु मैल्लो | 20 ऐलहेरलेई की युहन्ना हिरोदेसेरी नज़ी मां अक ध्रमी ते भलेमान्स मैन्हुं थु, ते तै तैसेरी बडी ईजत केरतो थु, ते तैसेरी हिफाजत केरनी अपनो फ़ज समझतो थु, तै युहन्नेरी गल्लां शुन्तां परेशानं ता ज़रुर भोतो थु, पण शुन्तो बडे पियारे सैहीं थु |

21 पण हिरोदेसे अक दिहाडी मौको मैल्लही जेव, जैखन हिरोदेसे अपनी ज़ूम दिहैडी पुड़ खुशी मां अपमने सारे दरबारी ते फौजी आफसर ते गलिलेरे किछ खास लोकन जो धांम की | 22 तैखन हिरोदियासरी कुइयां मैफली मां ऐइतां खुब नच्यु ते हिरोदेस ते तैसेरे मैम्हान ऐरे खुश किये की बादशहा तैसका खडो भोइतां ज़ोने लगे" तु ज़ैन चहवां ता तैन मिक्कां मग, आंव तैने तिं दैइल्लो" | 23 ब्लके तैनी कसम केरतां ज़ोव, तु ज़ौण किछ मीं कैरां मगैल्लही, आंव तैने तीं दैइल्लो" भोवें तैन मेरु आध्दु राज कि ना भोए" | 24 कुइयां बेइर गैहितां अपनी आम्मा पुछ, आंव कुन मेगीं? तैसारी आम्मा जुवाब दितो, युहन्ना बपतिसमो देने बालेरी कुरोडी" | 25 तै कुई लुशी ऐपनी आम्मा का वापस आई, ते ज़ोने लगी, मी हुंन्ना ऐक्री थाले मां युहन्ना बपतिसमो देने बालेरी क्रोडी लोइचे" |

26 चाल्ही बादशाहे बडो अफसौस भोव, पण तैनी मैम्हाना केरे सामने तैस कुइये सैहीं ज़बांन कियोरी थी, ते तांए तैनी नन्ना ना ज़ोई बटु | 27 तैखने तैनी ऐकी सिपैही जो हुकम दितो तु गा" ते युहन्नेरी क्रोडी कैटतां आन्ह, ते तैखने सिपैहीये जैल्लही मां गैहितां युहन्नेरी क्रोडी कट्टी | 28 ते ऐकी थाले मां ऐन्तां कुइये का दिति, ते कुइयां गैहितां अपनी आम्मा का दिति | 29 जैखन युहन्नेरे चलन पतो लगे ता तैना आए ते तैसेरी लाश नैहितां कब्री मां दैबी छडी |

प्रेरतां केरी वापसी ते एकेलू वास

(मत्ती 14 : 13 - 14 ; लूका 9 : 10)

30 यीशुएरे चले तैसका आकौठे भुए ते ज़ैन किछ तैनेइं कियुं ते शिखालेरु थुं, सभ तैस्सैहीं शुनावं | 31 यीशुए तैन सैहीं ज़ोव, ऐजा असां कोच बैरांन ठैरी गहंम, ते धकसेरी सैइती आरांम केरम, गल्ल ऐह थी की तैसका मैन्हुं केरी आओ जा लगोरी रहती थी, ते तैस रौट्टी खाने भी मोको ना थु मैल्लतो | 32 ऐलहेरलेई तैना किशती मां बिशतां दुर ऐकी बैरांन ठैरी चले जे |

पंच हज़ार मडदन रोटी खुवैनी

(मत्ती 14 : 15 - 21 ; लूका 9 : 11 - 17 ; यूहन्ना 6 : 1 - 14)

33 लोकेइं तैना गहंते लाहे ते बुझू की ऐना कौरां चलारेन, ऐलहेरलेई कैही शहरां केरे लोक आकौठे भोइतां दौवडे ते शुकोरी बत्तां गैहितां तैनकैरां पैहिले तैडी पुजे | 34 जैखन यीशु किशती मैरां औस्से ता तैनी हछछे मैन्हुं लाहे, ते तैस तैन पुड़ बडी तरस आई, किजोकी तैना तैन भैददां केरे ज़ैरे थिये, ज़ैनकेरो कोई पुहाल ना भोए, ऐलहेरलेई तै तैन बेडी गल्लां समझाने लगे |

35 तैखन डलोवन्न लोरी थी भोने, ते यीशुएरे चेलेइं तैसका ऐइतां ज़ोव, ईही बैरांन ठारें ते दिहाडी भी डुब्बोरीए | 36 ऐन लोकन भेजी छड, ताके ऐना आसे पासेरे डलोवन मां गैहितां खाने जो किछ घिन्तां आन्हन? 37 पण यीशुए जुवाब दितो, तुस्सै ऐन खाने जो किछ दैथ, तैसेरे चेलेइं ज़ोव, कुन असां गहंम ते दुई शौव दिनारां केरी रौट्टी घिन्तां आन्हन? 38 यीशुए पुछ, तुसंन का कैन्नी रौट्टीन? गाथ हेरा" चेलेइं हेरतां ज़ोव, की पांच रौट्टी ते दुई मैछलीन |

39 तैखन यीशुए लोकन निकी निकी हुंडन मां घासे पुड़ बिशनेरो हुकम दितो | 40 ते तैना शौव शौव ते पांज्हा पांज्हा केरी हुंडी मां बिशी जे |

41 यीशुए तैना पांच रौट्टी ते दुई मैछली टलेती ते अन्नेरे पासे तेतां ब्रकत दिति, ते फिरी तैनी रौट्टी टलोइतां चलन का दिति ते ज़ोव, कि ऐना लोकन खाने जो देंते गाथ, एंचरे तैना दुई मैछली भी तैन लोकन बैंटी छैडी | 42 ते सब लोक रौट्टी ते मैछली खेइतां रज्जे | 43 ते बादे मां जैखन तैनेइं मैछली ते रौट्टी केरे टलुटोरे टुकडे सल्ले ता बहरे टोकरी भेरोई जेई | 44 ज़ैन मैन्हुं रौट्टी खेवरी थी, ता तैनकेरी तैधात कोई पंच हज़ार थी |

यीशु एरू पैनी पुड़ चल्लन

(मत्ती 14 : 22 - 33 ; यूहन्ना 6 : 15 - 21)

45 लोकन वापस भेजने कैरां पैहिले तैनी अपने चलन पुड़ ज़ोर दितो, तुसां लूशी किशती मां चैइतां तलाएरे पार बैतसद्दा मैझो चले गाथ, ताके आंव ईन लोकन ईड्डां भेजी छैडी | 46 तैन लोकन भेजनेरां पत्ती यीशु प्राथना केरनेरे लेई पहाडे पुड़ जो चलो जेव | 47 जैखन डलोवन्न भुई ता किशती तलाएरे मुझाटे पुज्जोरी थी, ते यीशु अकैल्लो बन्ने पुड़ थु | 48 तैनी तैड्डां हेरु की चलन बातेरे ज़ोने सैहीं किशती खिंचनी बडी असुखती भोवरीए, ऐलहेरलेई तै रातरें तक्रिबण पैत्रीए पहरे तलाए पुड़ मैइं चलतो चलतो तैन का पुजो, ते तै ऐन चहतो थु की आंव ऐन कैरां आग्रोहुं गैहीं | 49 पण चेलेइं तै पैनी पुड़ मैइं चलतो लाहु ता तैनेइं तै भूत बुझौ, ते चिंडां लगे मारने | 50 गल्ल ऐह थी की तैनेइं तै सैभेइं लाहोरो थु, तांए तैना हछछे डेरी जेवरे थिये, पण तैनी लूशी तैनसैहीं गल की ते ज़ोव, विश्वास रखा आवेइं डरा नन्ना | 51 तैखन तै किशती मां तैन सैहीं साथी बिशी जेव, ते बात बंद भोई जेव, ते तैना अपने दिले मां बडे हेरांन परेशान रेही जे | 52 किजोकी तैनेइं रौट्टी केरे चमतकार हेरतां भी कोई सबक ना थु शिखोरो, ते तैनकेरे बदिल शुरेरो शुरो ही रैही जेव |

गन्नेसरते मां रोगी बझाने

(मत्ती 14 : 34 - 36)

53 तलाएरे पार गहंनेरे बाद तैना गनैसत आलाके मां पुजे, ते किशती बन्ने पुड़ लाई | 54 जैखन तैना किशती मैरां औस्से ता लोकेइं यीशु अक दम पशांनो | 55 बस्सा लोक तैसेरी पुजनेरी खन्न शुन्ता सैरी पासना दौवडे ते बिमारन खट्टी पुड़ छुइतां तैसका आन्ह लगे | 56 डलोवन शहरन ते बैसतन मां ज़ैडी कोच यीशु गहतो थु ता लोक बिमारन बज़ारां केरी बत्ती मां छडते थिये, ते तैसका ज़ोवले हथ केरते थिये, की ऐन बिमारन सिर्फ अपने लिगडे सैहीं हथ लाने दे, ते ज़ैरे तैस्सैहीं हथ लाते थिये, सभ बैझोते थिये |

रीती रुवाज गन्नेरो सुवाल

(मत्ती 15 : 1 - 9)

7 ऐकी बर युरोशलमेरे किछ खास धर्म गुरु यीशु का आकौठे भुए | 2 तैनेइं तैडी हेरु की तैसेरे किछ चले गदे हथेइं येनी आधौए हथेइं रौट्टी खातन | 3 आसलित्ती मां फ्रिस्सी ब्लके सभ युहुदी अपने बुजुर्गा केरे रुवाजोरे ऐत्रे पाबंद भोतन की ज़ां तग्न अपने हथ खुंदन तग्न ना धौन रौट्टी ना खान | 4 ते जैखन भी बज़ारेरां ऐइतन ता ज़ां तग्न कुलुली ना केरन तां तग्न रौट्टि ना खान, एंचरे सैहीं होरे भी बडे रुवाजन्न ज़ैना सियांन कैरां लाहोरे, ज़ैनकेरी तैना पाबंदी केरतन ज़ैचरे" कोवल" लोटे ते ट्लामेरां भांडां रोडे चारे धौना | 5 ऐलहेरलेई फ्रिसेइं ते धर्म गुरेइं यीशु पुछ, कुन गल्ले की तेरे चले सियांन केरे रुवाजे पुड़ ना चलन ते गंदे हथेइं सैहीं रौट्टी खातन?" 6 यीशुए तैन जुवाब दितो, ईसाया नेबें तुशे लोकां केरे बारे मां खुब रोड चारे नुबुत केरतां ज़ोवरु थुं, ज़ैचरे लिखेरुए, ईही कौम ता ज़बांनी सैहीं ता मेरी बडी तारिफ केरचे, पण ऐन केरो दिल मीं कैरां बडो दुरे |

7 ऐना लोक बेफेइदी मेरी आराधना केरतन, किजोकी ऐना मैन्हुं केरे हुकमां केरी शिक्षा देतन | 8 तुसां परमेशरेरो हुकम टलोइतां मैन्हुं केरे रुवाजे पुड़ चलतथ |

9 फिरी ऐन भी ज़ोव, तुसां अपने रिती रुवाज रखनेरे लेई परमेशरेरो हुकम कैतरें रोडे चारे टैली छडतथ | 10 ज़ैचरे मुसे नेबें" ज़ोवरु थुं, अपने हैइये बौवेरी सेवा केरा, ते ज़ै कोई हैइये बौवे जो बुरु ज़ौल्लौ तै जाना मारो गाहेलो | 11 पण तुस ऐन ज़ोतथ की ज़ैन चाहे ऐपनी ज़रुरतेरे लेई हैइये बौवे जो ज़ोई सखतथ, की मेरी ज़ैस चिज़ी सैहीं तुसन फेइदो ना पुजी सखे, ता तै कुबानी परमेशरे मंजुर भोई जेई | 12 ता तुस तैस्सैहीं अपने हैई बौवेरी किछ भी मद्दत ना केरने दैथ | 13 एंचरे तुस अपने रुवाजे सैहीं ज़ै तुसैइं चलेवरोए, तैस्सैहीं परमेशरेरो वचन सैइयां टैली छडोरोए, तुस ऐस किसमेरां होरां भी काही कम्मा केरतथ |

मैन्हू अशुद केरने बैली गलां

(मत्ती 15 : 10 - 20)

14 फिरी यीशुए तैना लोक एपु का कुजेइतां जाँव, तुसां सभ मेरी गल शुंना ते समझनेरी कौशिश केरा । 15 जै चिज बेरोरां मैनेरे आंत्र गहचे तैस्सैहीं तै भिड्डो भाते । 16 जैस शुंने बाले कन भॉन ता तै शुंने । 17 जैखन तै हछै लोकन केरां अलग भोइतां घरे मां जेव ता तैसेरे चेलेइ तैस मुसालरो" मतलब पुछौ । 18 यीशुए तैन सैहीं जाँव, कुन तुस भी ऐरहे बैसमझथ, ऐनु भी ना समझथ की जैचिज बेरोरां मैनेरे आंत्र गहचे तैससैहीं तै भिड्डो ना भोए? 19 किजोकी तै तैसेरे दिले मां नेहिं बलके तैसेरे पेटे मां गहचे, ते तैइतां मलबे मां बेरोहुं निसचे, ऐन जोइतां तैनी सैरी खानेरी चिजन जो पबित्र जाँवरुए । 20 फिरी यीशुए जाँव, आसलिली मां जैन किछ मैनेरे आंत्रां बेरोहुं निसते तैस्से सैहीं तै भिड्डो भाते । 21 किजोकी तैसेरे आंत्रां बुरे खियाल बेइर एइतन जैचरे बदमाशी चौरै ते खुंन केरने । 22 जन्हा लालच ते बुरयाई मकर फ्रैब धोखो रिशपत खौरै बद्रजर चोगली छल कपट गैबत आभिमान ते निदया । 23 ऐना सभ बुरी चिजां मैनेरे आंत्रां निसचन ते तैस गंदे केरचन ।

सुरुफिनीकी जातर कौन्शरो विश्वास

(मत्ती 15 : 21 - 28)

24 ते यीशु तैइतां गैहितां सुर ते सैइदेरे आलाके मां जेव, ते तैडी ऐकी घरे मां जेव, तै ऐन चहतो थु की मेरो केंची पत्तो ना लोड़े लग्गोरो, पण तै छपौरा ना रेही बटो । 25 किजोकी तैडी अक कौन्श थी ते तैसारी कुइये मां दुषटातमा थी, ऐन शुंनतां की यीशु ईडीए तैसका आई, ते तैसेरे पाऊन पुड़ पैई । 26 ऐह गैर युहूदी कौन्श सूर फैनिकी कौमरी थी, तै यीशु का जावले हथ केरतां जौने लगी, मेरी कुइये मैरां दुषटातमा कैडी छढ । 27 यीशुए तैस्सैहीं जाँव, पैहिले निके बचन पेट भैरतां रौट्टी खाने दे, किजोकी बचां" केरी रौट्टी बड्डे कुत्रन देंनी रोडी नैइं । 28 पण तैस कौन्शां यीशु जुवाब दितो, हां परमेशर" पण कुत्रां भी मेजे हैठोरां बिछडोरे टुके खातन । 29 यीशुए तैस कौन्शी जो जाँव, अगर ऐह गल्ले ता, तु अपने घरे गा दुषटातमा तेरी कुइये मैरां निसी जेवरीए । 30 जैखन तै घरे पुजौ ता हेरचे की कुइयां खड्डी पुड़ लेटोइ दितोरीए, ते दुषटातमा भी तैस मैरां निसोरीए ।

टावने ते लैटे मैन्हू बझानो

31 फिरी यीशु सुर आलाके मैरां निसतां सैइदेरी बत्तां दिकपुलूस आलाके मम्हेइ निसतां गलिलेरे डल्हेरे पार पुजो । 32 किछ मैन्हूइ अक टोऊनो मैन्हू जै जबांनरो भी खैखो थु, यीशु का आन्हो ते मिनत केरतां जौने लगे, ऐस पुड़ अपनो हथ रख । 33 यीशुए तै मैन्हू हछछे लोकन मैरां किनारे नियो, ते ऐपनी ऐंगलौई तैसेरे कन्न मां छैड्डी ते अपनु आशी तैसेरे ऐशी सैहीं हुरां । 34 ते अम्ब्रेरे पासे तेकतां जांमनी दिती ते जाँव, आफता" येनी खुल्ही गा । 35 तैखने तैसेरे कन भी खुल्ही जे ते तैसेरी जबांन भी खुल्ही जेई, ते तै रोडे चारे गल्लां केरने लगे । 36 यीशुए तैन लोकन सैहीं जाँव, ऐह गल केंची सैहीं ना जोइयथ, पण तै जैनु मैन्हू ठाकतो थु, ता लोक मन्ना जादे लोकन सैहीं शुंनाते थिये । 37 लोक शुंनतां हेरान भाते थिये ते जोते थिये, तै जैन भी केरते रोडु केरते, टोऊन्न शुंनेरी ते लइन गल्लां केरनेरी ताकत देते

चेवर हजार मैन्हन रोटी खुवैनी

(मत्ती 15 : 32 - 39)

8 तैने दिहाइन मां ऐकी फेरे फिरी हछछे लोक जम्हां भुए, ते तैन का खाने जो किछ भी ना थुं, तां यीशुए अपने चले ऐपु का कुजाए ते तैन जो जाँव । 2 मी ऐन लोकन पुड़ तरस ऐइचे, किजोकी ऐना टलेई दिहैडी केरे देंते मी सैहीं साथी चलोरेन ते ऐन का खाने जो किछ नैइं राहेरु । 3 अगर आंव ऐना नियन्ने घरे जो भेजौ ता ऐना बत्ते रेही गहनैण, किजोकी ऐन मां किछ बडे दुरेरेण । 4 तैसेरे चेलेइ तैस जुवाब दितो, ईडी इस बियाबांने मां ऐरे

मैन्हू केरे लेई ऐरी रौट्टी कौन कौइतां आन्हेलो? 5 यीशुए अपने चलन पुछ, तुसन का कैत्री रौट्टीण? तैनेइं जुवाब दितो, सत रौट्टीण ।

6 तैखन यीशुए लोकन जो जाँव, सभ लोक तल्ले मां बिशा, ते यीशुए तैना सत रौट्टी टलेइतां परमेशरेरु धनियांबाद कियुं, ते रौट्टी टलोइतां लोकन खाने जो चलन का देने लगे, ते चले लोकन खाने जो देने लगे । 7 तैन का किछ निकी निकी मैछली भी थी, यीशुए तैन पुड़ भी बर्कत मग्गी ते चलन जो जाँव, ऐना भी लोकन खाने जो दैथ । 8 सैभेइ रैजतां रौट्टी खाई ते जैखन टलुटोरे टुके अकौट्टे किये ता सत टोकरी भरोई जेई । 9 हालांकी लोक कोई चोउर हजार थिये, तैखन यीशुए तैना लोक भेजे । 10 ते ऐपु अपने चलन सैहीं साथी किशती मां चैइतां दलमनौता आलाके जो चलो जेव ।

फ्रिसी के माँग सुवगेरें निशान

(मत्ती 16 : 1-4)

11 किछ फ्रिसी यीशु का ऐइतां बैस केरने लगे, ते तैस आजमानेरी गरजी सैहीं तैसकेरां कोई आसमानेरो निशान मग्गे लगे । 12 यीशुए अक बडी जहंम्नी दैइतां जाँव, इस जमानेरे लोक किजो निशान मगतन? आंव तुसंन सैहीं सचूच जोताइ की इस जमानेरे लोकन कोई निशान ना हेरेइल्हो । 13 तैखन तैनी तैना तैडी जैरे छैइतां फिरी किशती मां चैइतां झिलरे पार चलो जेव ।

फ्रसी आसमानी निशान मगतन

(मत्ती 16 : 5-12)

14 ते ऐरहु भांव की चेलेइ रौट्टी आन्हनी बिस्ती छड्डी, ते तैन का ऐकी रौट्टी केरां जदे किछ भी ना थुं । 15 यीशु तैन बडी ताकिद केरतां समझाने लगे, की हेरा" फ्रिसी केरे ते हिरोदेसेरे आम्मलटे केरां हुशियार रैहियथ । 16 ऐस गल्ली पुड़ तैनकेरी बैस शुरु भोई जेई, ते तैना जौने लगे, हेरा आसैइं रौट्टी आन्हनी बिस्सोरीए । 17 यीशुए पतो लग्गो ता तैनी तैन पुछ, तुस किजो बैस केरने लोरेथ की असन का रौट्टी नैइं? कुन तुसैइं हेजु नैइं बुझैरु? कुन तुशै दिल सखत नैइं भैवरे? 18 कुन तुस ऐछैइं लहते भी ना लाथ ते कन्नैइं शुन्ते भी ना शुन्थ? कुन तुसंन याद नैइं । 19 की जैखन मी पंच हजार मैन्हू केरे लेई पंच रौट्टी केरे टुके कियेरे थिये ता तुसैइं बंचोरे टुकां केरी कैत्री टोकरी सैल्होरी थी । 20 ते जैखन मी चोउर हजार मैन्हू सत रौट्टी केरे टुके कियेरे थिये, ता तुसैइं टलुटोरे टुकां केरी कैत्री टोकरी सैल्होरी थी, तैनेइं जाँव, सत" । 21 तैखन यीशुए तैन सैहीं जाँव, कुन तुशी समझी मां हेजु भी किछ नैइं ऐवरु?

बैतसैदा अक काणो बझानो

22 तैना बैत सद्दा मां पुजे तैडी किछ लोकेइं अक कांनो मैन्हू यीशु का आन्होरो थु, ते यीशु का जोउले हथ केरतां जौने लगे, तु ऐस्सैहीं हथ ला । 23 यीशुए तै मैन्हू हथेरां टलेइतां डलोवें केरां बेईर नियो ते तैसेरी ऐछन पुड़ थुक्तां हथ रखे ते पुछ, कुन तीं लैहियांने लोरुए? 24 तैनी मैन्हू तेकतां जाँव, मी किछ लोक ता लैहियोतन पण जैचरे बुट फिरने लोरेन । 25 यीशुए फिरी अपने हथ तैसेरे ऐछन पुड़ रखे ते जैखन तैनी तक्कु ता तैस लैहियांने लगे ते तैस सभ किछ साफ साफ लैहियांने लगे । 26 तैखन यीशुए तैस सैहीं जाँव, ऐह गल इस डलोवें मां केंची सैहीं ना जोइयांते सिधो अपने घरे जो चलो गैहियां ।

पतरस यीशु ए मसीह कबूल केरते

(मत्ती 16 : 13 - 20 ; लूका 9 : 18 - 21)

27 तैसेरे बाद यीशु ता तैसेरे चले कैस्त्रिया फिलपीएरे आलाकेरे पासे जो चले, यीशुए बत्ते अपने चलन पुछ, जौथ लोक मी जो कुन जोतन? 28 तैनेइं जुवाब दितो, किछ ता तीं जो बपतिसमां देने बालो जोतन, ते किछ ऐलिया जोतन, ते किछ जोतन नेबन मैरां कोई अक जैरोए । 29 यीशुए तैन फिरी पुछ, पण तुस जोथ, की आंव कौन आंही? पतरसे जुवाब दितो, तु जिंतो मस्ही

अस | 30 एस गल्ली पुड़ यीशुए तैन ताकिद केरतां जॉव, मेरे बारे मां केंची सैहीं ना ज़ोइयथ |

अपने मौतरे बारे मां यीशु एरी भविश्वदाणी

(मत्ती 16 : 21 -23 ; लूका 9 : 22)

31 फिरी तै अपने चलन शिक्षा देने लगे, की अबने आदमेरो दुख झूलनो ज़रूरीए, ते ऐन भी की तै बुजुरगां ते बड़े परैहुतां केरे ते धर्मएरे मन्ने बालां केरी तरफां तैसेरी बैजती की गाहे, ते मारो गाहे, ते फिरी टुलेंइयउं दिहाडे जितो भोए | 32 यीशुए ऐह गल रोडे चारे ज़ोइ, तैखन पतरसे यीशु अलग नियो ते तैस ठिडकने लगे | 33 पण तैनी फिरतां तक्कु ते तैनी अपने होरे चले लाहे, ते पतरस झिडकाव ते जॉव, ऐह शैतान मेर तुत्तरे अग्रां दुर भो, तीं प्रभु परमेशेरी गल्लां केरो खियाल नैइं ब्लके मैन्हुं केरी गल्लां केरो खियाल रहते |

यीशु पत्ती चल्नेरो मतलब

(मत्ती 16 : 24 - 28 ; लूका 9 : 27)

34 तैखन तैनी सारे लोक ते अपने चले एपु का कुजाए ते तैन सैहीं जॉव, अगर कोई मेरी सेवा केरनी चहते ता अपने आपरो इनकार केरे, ते अपनी सलीब छूए ते मीं पती चले | 35 किजोकी जै कोई अपनी जान बचांनी चहते ता तै तैस गुंवाल्हो, पण जै कोई मेरी आंजिलरे लेइ अपनी जान गुंवाल्हो, ता तै तैस बंघाल्हो | 36 मैन्हुं अगर सारी दुनिया हासल केरे ते ऐपनी जान गुंवाए ता तैस कुन फैइदो भौलो? 37 या मैन्हुं ऐपनी जानरे बदले मां कुन दैल्हो? 38 ते जै कोई इस बदचलन ते पैपी कौमीं मां मीं कैरां ते मेरे वचने कैरां श्रमाल्हो, ता आबने आदम भी जैखन तै अपने बाजेरी मेम्हाई मां सुवर्ग दुतन सैहीं साथी ऐजेल्हो ता तै भी श्रमाल्हो |

यीशु एरु रूपान्तर

(मत्ती 17 : 1 - 13 ; लूका 9 : 28 - 36)

9 तैखन यीशुए तैन सैहीं जॉव, आंव तुसन सैहीं सच जोताइ की किछ लोक जैना इडी खडेन, ज़ां तगर तैना परमेशेरी बादशाही कुदरुती सैहीं साथी पुरी भौते ना लहंन तां तगर तैन पुड़ मौउत भी आस्र ना केरेल्ही | 2 शैइ दिहेइना बाद यीशुए पतरस ते याकुब ते युहन्ना ऐपु सैहीं साथी ऐकी ऊचे पहाडे पुड़ निये जैडी कोई ना थु, तैडी चेलां केरे सामने तैसेरी शकल बैदलोई जेई | 3 ते तैसेरो चोगो चमकने लगे, ते तै चोगो ऐतरो छितो सुफैद भोई जेव की दुनियारो कोई भी धौबी ऐतरु छितु सुफैद ना केरी बटे | 4 तैखन मूसौ ता ईलिया चलेइं यीशु सैहीं साथी गल्लां केरते लाहे | 5 पतरसे यीशु सैहीं जॉव, ऐह रबी इशू इडी रहनु रोडुए, की नन्ना असां इडी ट्लाइ डेरे बनाम, अक तेरे लेई ते अक मूसैरे लेई ते अक ईलियारे लेई" | 6 दरसले मां तै ऐन ना थु, ज़ानतो की आंव होरु कुन ज़ोइ, किजोकी तैना बड़े डेरी जेवरे थिये | 7 तैखन तैन पुड़ बिदलारां छाहोइ बनाई ते तैस बिदलारी मैरां अक आवाज़ आई, की ऐन मेरु टलारु मडुए तुस ऐसेरी शुंना | 8 ताल्ही तैना चौवरे पासन तकने लगे, पण तैन यीशुएरे आलावा होरो कोई ऐपु सैहीं साथी ना लैहियेव |

9 जैखन तैना पहाडे पुडेरं ऊन्हें ऐवरे थिये ता यीशुए तैन ताकिद केरतां जॉव, की ज़ां तगर अबने आदम मुडदन मैरां जितो ना भोए, जैन किछ तुसैइं लाहेरुए केंची सैहीं ना ज़ोइयथ | 10 चलेइं ऐह गल अपने दिले माम रखी, पण तैना ऐपु मम्हेइं बेंस केरते थिये की मुडदन मैरां जिते भौनेरो कुन मतलब भोई सखते? 11 ऐलहेरलेई तैनेइण यीशुए पुछू, धर्म गुरु किजो जौतन की ईलियाएरु पैहिलु एजनु ज़रूरीए? 12 यीशुए तैन जुवाब दितो, एन ज़रूरीए की ईलिया पैहिले ऐजेल्हो ते सभ किछ सुधारेल्हो, पण पबित्र शासने मां अबने आदमेरे बारे मां ऐन किजो लिखेरुए की तै बड़ो दुख भोगैल्हो ते ज़लिल कियो गाहेलो? 13 पण आंव तुसन सैहीं जोताइ की ईलिया ता पैहिले ऐवरोए ते जैचरे तैसेरे बारे मां लिखेरुए, तैनेइं तैस्सैहीं जैन चाहुं तैने कियुं |

दुघातमा सैहीं भेरोरु मडू बझानू

(मत्ती 17 : 14- 21 ; लूका 9 : 37- 43)

14 जत्ताल्ही तै चलन का अव, ते तैनकेरे चौवरे पासन भडीए भीड थी, ते ज्ञानी तैन सैहीं बेंस केने लगेरे थिये | 15 तैस लैहीतां सब हेरान भुए, ते तैस का एइतां तैस जो नमसकार कीयुं | 16 तैनी तैन पुछू, "तुस ऐन सैहीं कुन बेंस केरने लगेरेथ?" 17 भीडी मैरां एके जुवाब दितो, "हे गुरु मीं अपनु मडू, जैस मां लट्टी आत्माए, तीं का आन्होरु थु तैस्सां तैन लडू बनेवरुए | 18 तै तैस जैडी मरजी तैडी बछोइचे ते दुखी केरचे, ते तैन ऐशौं मां शैम्फ आन्हते, ते दन्त चापते, ते तैसेरु अंग लकड़ भोइगहते | मीं तैन तेरे चलन का आन्हुं ते जॉव कि ऐस मैरां दुशटातमा कढा, पण तैनेइं ना केडी बटी | " 19 ऐन शुनतां तैनी जुवाब दितो, हे आविश्वासी लोकाव आंव कैइस तग्र तुसन सैहीं साथी भोनोइं? ते कैइस तग्र तुशी झेलएल्हो? तैस मीं का आंन्हां | " 20 ताली तैनेइं तै तैसका आंन्हां, ते जत्ताल्ही तैनी तैन मडू लाहुं, ते तैस आत्मा तैन मडू तैखने मरोडू, ते तैन मडू ताल्ले बिछडू, ते ऐशैरां बत्तां शैम्फ निस्ने लगी | 21 तैनी तैसेरे बाजी पुछू, ऐसेरी ईही हालत कैइसेरी देतीए? 22 तैनी जॉव, बचपनेरी देतीए, ऐस बरबाद केरनेरेलेइ कथे आगी मां कधी पैनी मां बछोइचे, पण अग्र तु किछ केरी बटस ता, असन पुड़ त्रस खेइतां असन पुड़ रेहंम केर | 23 यीशुए तैस सैहीं जॉव, अग्र तु केरी बटस, ऐनकुन जोतस, विश्वास केरने बालां केरेलेइ सब किछ भुई बटते | 24 मडूरे बाजे छन्दे केरतां जॉव, हे प्रभु, आंव विश्वास केरताइ, मेरे अविश्वासरो आलाज केर | 25 जत्ताल्ही यीशुए हेरु, कि लोक दौवडतां भीड लगेरेन लाने, तैनी गंदी आत्माइं ऐन जोइतां डांटी, हे लट्टी, टौवनी आत्मा, आंव तीं हुकम देताइ, ऐस मैरां निसी गा, ते दूबारां एसमां कथे ना एजां | 26 ताल्ही तै चिन्द मैरतां, ते तैस मरोडतां निसी, मडू जैचरे फटेरु भोव, इडी तग्र कि लोक जौने लगे, कि मडू फटेरुए | 27 पण यीशुए हथ टलेइतां ऊटालु, ते तैन खडू भोव | 28 जत्ताल्ही तै घरे अव, तैसेरे चलेइं एकेले मां पुछू, अस एस गंदी आत्माइं किजो ना कडी बटे? 29 तैनी तैन सैहीं जॉव, कि एरही जैरही दुशटातमां बगैर प्राथना ते बगैर ब्रतेरां ना निसे |

अपने मौतरे बारे मां यीशु एरी होरी भविश्वदाणी

(मत्ती 17 : 22 , 23 ; लूका 9 : 43 - 45)

30 फिरी तैना तैठां चले, ते गलीले मम्हेइं चलोरे थिये, तै ना थु चहतो कि केंची पत्तो चले | 31 किजोकी तै अपने चलन शिक्षा देतो ते तैन सैहीं जोतो थु, कि मैनेरु मडू मैन्हुं केरे हथे टलुवाव गाल्हो, ते तैना तैस मारेल्हे, ते तै मारनेरां टलाई दिहेइना पत्ती जीतो भोलो | 32 पण ऐह गल तैनकेरे समझी मां ना आई, ते तैना तैस पुछने कैरां डरते थिये |

सैभा बडडो कौन

(मत्ती 18 : 1 - 5 ; लूका 9 : 46 - 48)

33 फिरी तै कुफ्रनाहूमे मां अव, ते घरे एइतां तैन पुछू कि बत्तां कोस गल्ली पुड़ बेंस केरते थिये? 34 तैना चुप भोइजे, किजोकि तैनेइं बत्तां एपु मम्हेइं ऐहे बेंस कियोरी थी, कि असन मां बडो कौने? 35 तैखन तैनी बिषतां तैन बहरे चले कुजाए ते तैन सैहीं जॉव, अग्र कोई बडो बन्नु चहते, ता सैभन कैरां निकडो बने, ते सैभी केरो सेवक बने | " 36 ते तैनी अक मडू तैन केरे मझटे खडू कियुं, ते तैन कुमें मां रेखतां जॉव | 37 "जै कोई मेरे नोवें सैहीं एरे बचन मैरां केंची एकी भी कबूल केरे, तै मीं कबूल केरते, ते जै कोई मीं कबूल केरते तै मीं नैइं बलके मेरे भेजने बाले कबूल केरते | "

जै खलाफल न केरे तै हके मां ए

(लूका 9 : 49-50)

38 तैखन यहून्ना लगे जौने, "हे गुरु असेइं तेरे नोवें सैहीं अक मैन्हुं गंदी आत्मा कढतो लाहु, ते असेइं तै ठाको किजोकी तै असन पत्ती ना चले | " 39 यीशुए जॉव, "तैस ना ठाका, किजो एरो कोई नैइं कि जै मेरे नोवें सैहीं बडां कम्मा केरे ते लुशी मींजो बुरू जौने लगे | 40 किजोकी जै इशे खलाफ नैइं, तै

इशौ साथीए | 41 जै कोई तुस्न अक कटोरो पानी ऐलहेरलेई पीयाए, कि तुसां मसहीएरेथ, ता आंव तुस्न सैहीं सच जोताइं, कि तै अपनो फल कधी ना गुंवाल्हो |

ठोकरारी वजा बन्नू

(मत्ती 18 : 6 - 9 ; लूका 17 : 1 - 2)

42 जै कोई इन निकडन मैरां जैना मीं पुड़ विश्वास केरतन, ठोकर खाए ता तैसेरे लेई ऐन रोडूए कि अक बडो द्वालाटोरो द्वालेइटोल तैसेरे गले उन्दो टेंगतां तै समुन्दरे मां छडो गाहे | 43 अग्र तेरो हथ तीं ठोकर खूवाए ता तु तैस केटी छड डोन्डो भोइतां जिन्दगी मां दाखल भोनू तेरे लेई इस कैरां रोडूए कि दुईये हथ भोते संते तु न्रकेरी आगी मां छडो गास जै कधी ना हिशें | 44 (जैडी तैन केरो कीडो ना मरे ते अग भी ना हिशें) 45 ते तेरो पाव तीं ठोकर खवाए ता तैस केटी दे | 46 टोन्टो भोइतां जिन्दगी मां दाखल भोनू तेरे लेइ, ऐस कैरां रोडूए, कि दुईये पाव भोते संते तु न्रके मां छडो गास | 47 ते अग्र तेरी अछ तीं ठोकर खूवाए, ता तैस कड, कांनो भोइतां परमेशरेरे राजे मां दाखल भोनू तेरे लेइ इस कैरां रोडूए कि तु दुईये एछी भोते संते न्रके मां छडो गास | 48 जैडी तैनकेरो कीडो भी ना मरे, ते आग भी ना हिशें | 49 किजोकी हर अक मैन्हुं अगी सैहीं लूनो कीयो गाल्हो | 50 लून रोडूए, पण अग्र लूनरो लूनार गाहे, ते तैन कोस चीजी सैहीं सुवेदलु केरेल्हे? अपने मां लून रखा, ते एपू म्मेइं मेल मलापे सैहीं राथ |

फारखेतेरे बारे मां यीशु एरी गुवाही

(मत्ती 19 : 1 - 2 ; लूका 16 : 18)

10 फिरी तै तैड्डां चलो ते दरयायेरे यरदनेरे पार तैना तैटां यहूदयेरे अलाके मां आए, ते भीड़ तैसका जम्हां भुई, ते तै जैचरे शिक्षा देतो थु अपने दसतुरेरे मुताबक शिक्षा देने लगे |

2 ते किछ फिरी ते फिकही नेडे एइतां तैस आजमानेरे लेई तैस पुछने लगे, कुन इन जैइजे, कि मडद अपनी कौन्श शारे? 3 यीशुए तैन जुवाब दितो, कि मुसै तुस्न कुन हुकम दितोरोए? 4 तैनीइं जोंव, मुसै ता अजाजत दितोरीए, कि तलाक नामो लिखतां देथ | 5 यीशुए तैन सैहीं जोंव, मुसै तुशे सखत मन्न केरे वजाही सैहीं तुशे लेई ऐहे हुकम लिखोरोए | 6 पण परमेशरे पैहिले मडद ते कौन्श बनां | 7 ऐलहेरलेई मडद अपने अम्मा बाजी कैरां अलग भोइतां अपनी कौन्शी सैहीं साथी राल्हो | ते तै ता तैसेरी कौन्श अक जान भोले, 8 पण तैना दुईये नैइं बलके अक जिसम भोल्हे | 9 ऐलहेरलेइ जैना परमेशरे जोडोरेन तैन मैन्हुं अलग ना केरन |

10 जैखन तै घरे आव ता चलेइं फिरी ऐस बारे मां पुछ | 11 तैनी तैन सैहीं जोंव, जै कोई अपनी कौन्श शारे ते होरी सैहीं ड्ला बनाए ता तै पैहिलेरे खलाफ जन्हा केरते | 12 ते अग्र कौन्श अपने मुन्शे शैरतां होरी सैहीं ड्ला केरे ता तै भी जन्हा केरचे | "

बचन बरकत

(मत्ती 19 : 13 - 15 ; लूका 18 : 15 - 17)

13 फिरी लोक बचन तैसका आंन्हेने लगे, ताके तै तैन पुड़ हथ रखे, पण चले तैन धमकाने लगे | 14 यीशुए ऐन हेरतां, सेरकोइतां जोंव, बचन मीं का एजने देथ, ऐन ना ठाका, किजोकी परमेशरेरु राज एरां जैरां केरए | 15 आंव तुस्न सैहीं सच जोताइं, कि जै कोई परमेशरेरे राजे बचेरु जैरु कबूल ना केरे ता परमेशरेरे राजे मां कधी दाखल ना भोल्हो | 16 ते तैनी तैना कुम्मे मां रखां, ते तैन पुड़ हथ रेखतां तैन बरकत दिति |

दौलत मंद जवान ते हमेशरी जिन्दगी

(मत्ती 16 : 19 - 30 ; लूका 18 : 18 - 30)

17 ते जत्ताल्ही तैना निस्तां बत्तां गैहीराहोरे थिये, अक मैन्हुं दौवडतो तैस का अव, ते तैसका मथो टेकतां जोंव, हे रोडे गुरु, हमेशारी जिन्दगारे लेई आंव कुन केरी? 18 यीशुए तैस सैहीं जोंव, तु मीं रोडो किजो जोतस? कोई रोडो नैइं, सिरफ अक मतलबे परमेशर | 19 तु हुकम ता जानस, खूना नैइं

केरनो, जन्हा नैइं केरनो, चोरी नैइं केरनी, झुठी गुवाही नैइं देनी, धोखो नैइं केरनो, अपने अम्मा बाजी केरी आदर केरनी | 20 तैनी जोंव हे गुरु ऐनां हुकम ता आंव बचपनेरे देते मनतो एवरोइं | 21 यीशुए तैसेरे पासे तेकतां पियारे सैहीं जोंव, तीं मां एकी गल्लरी कमीए, जैना किछ तीं का आहे तैन सब गरीबन बेटतां दे, ते तीं सुवर्गे मां खजानो मैल्हेलो, ते एइतां मीं पत्ती चल | 22 ऐस गल्लरी पुड़ तैसेरु तुने बुरु भोवं, ते तै दुःख बुझतां चलो जेव, किजो तै बडो आमीर थु |

23 यीशुए चैवरे पासन तेकतां अपने चलन सैहीं जोंव, दौलतमन्देरु परमेशरेरे राजे मां गहनू मुशकले | 24 चले तैसेरी गल्लां शुनतां हेरान भुए, ऐस पुड़ यीशुए तैन जुवाब दितो, हे बच्चाव, जै दौवलती पुड़ भरोसो रखते, तैन केरे लेई परमेशरेरे राजे मां गहनू मुशकले | 25 पण परमेशरेरे राजे मां दौलतमन्देरु दाखल भोनू मुशकले ते ऊंटेरु सांधत्रे पाहरे बत्तां निसनू आसाने | 26 तैना बडे हेरान भोइतां जौने लगे, "फिरी कैस मुखती मैल्ली बटचे | " 27 यीशुए तैनकेरे पासे तेकतां जोंव, मैन्हू कैरां ता ऐन ना भुई बटे पण, परमेशरे कैरां भोई बटते, किजोकी परमेशरे कैरां सब किछ भोइ बटते | 28 पतरस तैस सैहीं जौने लगे, कि तक असां ता सब किछ छेडतां तीं पत्ती चलोरेम | 29 यीशुए जोंव, आंव तीं सैहीं सच जोताइं, कि एरो कोई नैइं, जैने मेरे ता सुसमाचाररे लेइ घर या दूला या बेंहीन या अम्मा बाजी या बचे या उडारां मेरे ते सुसमाचाररे लेइ छडोरन | 30 तैना इस दुनियाई मां दुख मुसिबतरे जौने घर दूला या बेंहीन या अम्मा बाजी या बचे या उडारां शौव गुनहा जादे मैल्हेलां, ते एजने बाली दुनियाई मां हंमेशरी जिन्दगी हासल केरेल्हे? 31 पण बडे जैना पैहिलेन, तैना पत्रोवं भोनेण, ते जैना पत्रोवांन, तैना पैहिले भोनेण |

अपने मोरे लेइ यीशु एरी ट्लाएइयो भविश्वाणी

(मत्ती 20 : 17 - 19 ; लूका 18 : 31 - 34)

32 ते युरोशलमं जो गहंते बार, यीशु तैन अग्री अग्री चलोरो थु, ते तैना हेरान लगे भोने कि जैना तैस पत्ती पत्ती चलते थिये डरने लगे, तैखन तै फिरी तैन बहरन नैहीतां तैन सैहीं गल्लां केरने लगे, जैन किछ तैससैहीं भोने बालु थुं | 33 कि हेरा अस युरोशलमं जो चलोरेम, ते मैनेरु मडू, मंद्रे परेइत ते ज्ञानी लोका केरे हथे टलुवाव गाल्हो, ते तैना तैस मारनेरे काबल ठैराले, ते होरी कोमां केरे हथे देल्हे | 34 ते तैना तैसेरो मजाक बनाल्हे, ते तैस पुड़ थुकेल्हे, ते तैस कोडे मारेल्हे, ते तैसेरो कतल केरेल्हे, ते टलेइ दिहडना पत्ती फिरी जीतो भोल्हो |

याकूब ते यूदारी बिनती

(मत्ती 20 : 20 - 28)

35 तैखन जब्दरे मड्डे याकूब ते यहून्ना नेडे एइतां जोंव, हे गुरु, अस चहतम कि जैन किछ असां तीं कैरां मगम, तैन तु इशे लेइ कमा | 36 तैनी तैस सैहीं जोंव, तुसां कुन चहतथ कि आंव तुशे लेइ कमेइं? 37 तैनेइं तैस्सेहीं जोंव, कि असन इन दे, कि मैमाही मां असना मैरां अक तेरे देहीने पासे ते होरो बाएं पासे बिशे | 38 यीशुए तैन सैहीं जोंव, तुसां ना जानथ कि कुन मगतथ? जै कटोरो आंव पीने बालोइं, कुन तुस पी बटतथ? ते जै बपतीसमो आंव नैने बालोइं, कुन तुस नैही बटतथ? 39 तैनेइं तैस सैहीं जोंव, असन कैरां भुई बटते, यीशुए तैन सैहीं जोंव, जै कटोरो आंव पीने बालोइं, तुस पील्हे, ते जै बपतीसमो आंव नैने बलोइं नैल्हे | 40 पण जैन केरे लेई तियार कियेरुए, तैन केरे अलावा केंची अपने देहीने ते अपने बाएं बिशालनू मेरु कम नैइं |

41 ऐन शुनतां होरे दश ज्ञान्हें याकूब ते यहून्ना पुड़ नाराज भोने लगे | 42 ते यीशुए तैन नेडे कुजेइतां जोंव, तुस जानतथ, कि जैना होरी कोमां केरे हाकम समझे गहतन, तैना तैन पुड़ राज केरतन, ते तैन मैरां जैना बडेन, तैन पुड़ हुकम चलातन | 43 पण तुस्न मां एरु नैइं, बलके जै कोई तुस्न मैरां बडो बन्नू चहते तै तुशो सेवक बने | 44 ते जै कोई तुस्न मां प्रधान भोनू चाहे, तै सैभी केरो नोकर बने | 45 किजोकी मैनेरु मडू ऐलहेरलेइ नैइं एवरु, की तैसेरी सेवा टेहेल की गाहे, पण ऐलहेरलेइ एवरोए, कि एपू सेवा टेहेल केरे, ते बडां केरे छुटकारां केरे लेइ अपनी जान दे |

काने बरतिमेइयेरू दृष्टान्त
(मत्ती 20 : 29 - 34 ; लूका 18 : 35 -43)

46 ते तै यरीहो मां अव, ते जैखन तै ता तैसेरे चलेइं, अक बडी भीड़ यरीहोएरां निसी ता अक कांनो मांगतो ब्रतमाई, येनी तमैइयेरू मडू बत्तारे बन्ने बिशोरो थु | 47 तै ऐन शुनतां कि यीशु नासरी इडीए, हकां देइतां जोने लगे, यीशु नासरी मीं पुड़ रहेम केर | 48 बडेइं तै हमकाव कि चुप भो, पण तै मना चिन्डां मारने लगे, हे दावदेरी औवललाध मीं पुड़ रहेम केर | 49 तैखन यीशुए ठैरतां जोंव, ऐस इरहां कुजाथ, ते लोकेइ तै कानो कुजेइतां तैस सैहीं जोंव, हिमत केर, उठ तै तीं कुजाने लगेरेन | 50 तै अपनू लिगड़ शैरतां जलदी उठो, ते यीशु का अव | 51 ऐस पुड़ यीशुए तैस सैहीं जोंव, तु कुन चहतस कि अवं तेरे लेइ केरीं? कांने तैस सैहीं जोंव, हे रब्बी, इन की आंव लैहीं | 52 यीशुए तैस सैहीं जोंव, चलो गा, तेरे विश्वासे तु ठीक कियोरोस, ते तैखने कांनो लहने लगे, ते बत्तां तैस पत्ती चलो जेव |

यरूशलेमे मां जीत दाखल

(मत्ती 21 : 1 -11 ; लूका 19 : 28 -40 ; यूहन्ना 12 : 12 - 19)

11 जैखन युरोशलमेरे नेडे जैतुन पहाडे पुड़ ता बैतफिगे ते बैतनियारे नेडे पुजे, ता तैनी अपने चलन मैरां दुई ऐन जोइतां भेजे | 2 कि अपने सामने डलोवें मां गाथ, ते तैडी पुजते तुस्न अक गैधारो बचो जैस पुड़ कधी कोई नैइं चडोरो मैल्हनाए, तैस खोलता आंन्हां | 3 अग्र तुस्न कोई पुछे, ऐन किजो केरतथ? ता जोइयथ, कि प्रभु प्रमेशरे ऐसेरी जरूरते, ते तैस इरहां लुशी भेजेल्हो | 4 तैनेइं गैहीतां तै बचो बेइर चौके मां लाहु, ते खोलने लगे | 5 तैन मैरां जैना तैडी थिये, किछ जोने लगे, ऐन कुन लगेरेथ केरने, गैधारे बचे किजो लगेरेथ खोलने? 6 तैनेइं जैन्चरे यीशुए जोवरू थुं, तैन्चरे तैन सैहीं जोंव, तैखन तैनेइं तैना गहने दिते | 7 ते तैनेइं बचो यीशु का ऐनतां तैस पुड़ अपना लिगड़ां रखां ते यीशु तैस पुड़ बिशो | 8 ते बडेइं अपना लिगड़ां बत्ती म्हेइं बछां ते किछेइं उडरन मैरां डैलडी केटी केटी बछेइ | 9 ते जैना तैस अग्रोहुं गहते, ते पत्ती पत्ती एंडते थिये, ते जोरे जोरे जोते थिये, कि होशन्ना, मुबारके तै जै प्रमेशरेरे नोंवें सैहीं एइते | 10 मुबारके इशो बाजी दाऊदेरू राज एजी राहेरूए, आसमाने मां होशन्ना भोए |

11 ते तै युरोशलमे मां एइतां मंद्रे मां अव | ते चैवरे पासन सब चीजां हेरतां बहरन साथी बैतानिय्यां जो जेव किजोकी डलोवझ भोवरी थी |

बे फल अंजीरेरो बुट

(मत्ती 21 : 18 - 19)

12 दुईयव दिहाडे जैखन तै बैतानिय्यां जो चलोरो थु ता तैस डलुख लगी | 13 तै दूररां अंजीरेरो नीलो बुट हेरतां नेडो जेव, कि हेरीं कि तैस मां किछ फल आए, पण पटलां केरे अलावा किछ ना मैल्हु, किजोकी फलेरो मौसम ना थु | 14 ऐस पुड़ तैनी तैस जो जोंव इठां पत्ती कोई तेरो फल ना खेइ बटेलो | ते तैसेरे चले शुनी राहोरे थिये |

मन्दरेरे बुपारी कढने

(मत्ती 21 : 12 - 17 ; लूका 19 : 45 - 48 ; यूहन्ना 2 : 13 - 22)

15 फिरी तैना युरोशलमे मां आए, तै मंद्रे मां जेव, ते तैडी जैना लेन देंन केरी राहोरे थिये तेन्न बेइर कढने लगे, ते बपैरी केरे तखत ते कबूत्र बेचने बलां केरी चैवकी उलटेई | 16 ते मंद्रे म्हेइं केंची सामान नेइतां एजने गहने ना दिते | 17 ते तैन सैहीं जोंव, कुन ऐन नैइं लिखोरू, कि मेरे घरे जो सैभी कोमां केरे लेई प्राथनारू घर जोल्हे? पण तुसेइं ऐह डैकू केरो आड्डो बनेवरोए | 18 ऐन शुनतां मंद्रेरे परैहुत ते शास्त्री तैस खतम केरनेरो मोको लगे तकने, किजोकी तैस कैरां डरते थिये, ऐलहेरलेइ कि सब लोक तैसेरी शिक्षाई कैरां हेरान भोते थिये |

19 ते जैखन डलोवझ भुई ता तैठां अपने चलन सैहीं साथी शहरे कैरां बेरोहुं चलो जेव |

शुकोरे अंजीरेरू दृष्टान्त

(मत्ती 21 : 20 - 22)

20 फिरी झेझां तैना तैठां गैही राहोरे थिये ते तैनेइं तै अंजीरेरो बुट शुकोरो लाहु | 21 पतरसे तै गल्ल याद आई, ते तैनी तैस्सेहीं जोंव, हे रब्बी तक, ईही बुट जैस तीं फिटकार दितोरो थु शुकोरोए | 22 यीशुए तैस जुवाब दितो, कि परमेशरे पुड़ विश्वास रख | 23 आंव तुस्न सैहीं सच जोताइं कि जै कोई इस पहाडे सैहीं जोए, ते समुद्रए मां गा, ते अपने मने मां शक ना केरे, बलकी याकीन केरे, कि जैन जोताइं तैन भोलू, ता तैसेरे लेई भोलू | 24 ऐलहेरलेइ आंव तुस्न सैहीं जोताइं, कि जैन किछ तुस प्राथनाईं मां मगले ता याकीन रखले ता तैन तुस्न मैल्हेलु, ते तुशे लेई तैन भुई गहलु | 25 ते जैखन तुस खडे भोइतां प्राथना केरतथ, ता तुस्न याद एजे कि तुशे मने मां केंचरे लेई नफरत भुए ता माफ केरा, ऐलहेरलेइ कि तुशो आसमानी बाजी तुशे गुणह माफ केरे | 26 ते अग्र तुस माफ ना केरथ ता तुशो बाजी भी जै सुवर्गे मां हें, तुशे गुणह माफ ना कैरेल्हो |

यीशु एरे आधी कारे पूड़ सुवाल

(मत्ती 21 : 23 - 27 ; लूका 20 : 1 - 8)

27 तै फिरी युरोशलमे मां अव, ते जत्ताल्ही तै मंद्रे मां हंठने लगेरो थु, मंद्रेरे परैहुत ते शास्त्री ते बजुरग तैस का आए ते तैस पुछने लगे | 28 कि तु ऐन कम्म कोस आधीकारे सैहीं केरतस? ऐह अधीकार तीं केनी दितोरोए कि तु ऐन कम केरतस? 29 यीशुए तैन सैहीं जोंव, आंव भी तुस्न अक गल्ल पुछताइं, मीं जुवाब देथ, फिरी आंव भी तुस्न जोईलो की इन कम अंव कोस आधीकारे सैहीं केरताइं | 30 यहूनेरो बपतीसमो कोठां थु, सुरगेरां थु की मैन्हुं केरे त्रफां थु? मीं जुवाब देथ | 31 तैखन तैना एपू म्हेइं बैस लगे केरने कि अग्र असां ज़ोम, सुवर्गेरां, ता तैनी ज़ोनुएं, फिरी तुसेइं तैसेरू यकीन किजो ना कियु? 32 ते अग्र असां ज़ोम, मैन्हुं केरे त्रफां ता लोकां केरो डरे, किजोकी सब लोक जानते थिये कि यहून्ना सच नबीए | 33 ते तैनेइं यीशुए जुवाब दितो, कि असन नैइं पत्तो, यीशुए तैन सैहीं जोंव, आंव भी तुस्न ना जोइं, कि ऐन कम अंव कोस आधीकारे सैहीं केरताइं |

दुष्ट ज़मीनदारेरू दृष्टान्त

(मत्ती 21 : 33 - 46 ; लूका 20 : 9 - 19)

12 फिरी तै कहेन्न मां तैन सैहीं गल्लां केरने लगे, कंचे मैने दाछरी बाग लाई, ते तैसेरे चैवरे पासन बाड़ दितो, ते रस कडनेरे लेई अक कुन्डू बनावं, ते अक बडो उचो चौवक बनाव, ते बागारो ठैको ज़मीनदारन देइतां होरी मुलखे जो जेव, 2 फिरी फल पकनेरे मोके तैनी बागबात्र का अक नोकर भेजो, ताके बागबात्र कैरां आपनो हिसो आंन्हें | 3 पण तैनेइं टलेइतां तै मडो, ते खाली हथेइ भेजो | 4 फिरी तैनी अक होरो नोकर तैन का भेजो ते तैनेइं तैसेरो दोग भंनो ते तैसेरी बेइजती की | 5 फिरी तैनी अक होरो नोकर भेजो, ते तैनेइं तै मारो, बादे मां तैनी बडे भेजे, ते तैन मैरां तैनेइं किछ मडे, ते केतरे मारे | 6 हूनी अके राहुरो थु, जैन तैसेरू टलारू मडू थुं, आखीरी तैनी तैन भी तैन का ऐन सोचतां भेजू, कि तैना मेरे मड्वेरी आदर केरल्हे | 7 पण तैन बागबानेइं एपू म्हेइं जोंव, ईही बागारो बारसे, एजा, अस ऐस मारम, फिरी सब किछ इशू भोई गहनुएं | 8 ते तैनेइं तै टलेइतां तै मारो, ते दाछरे बागारे बेईर शारो | 9 ऐलहेरलेइ दाछरे बागारो मालिक कुन जोलो? ते एइतां तैन बागबांनां केरो केंचरे खातमो कैरेल्हो, ते दाछरी बागा होरन देलो | 10 कुन तुसेइं पवित्र शास्त्रे मां ईन वचन नैइं पडेरू, कि जै घोड राज मिस्त्रेइं निकमो ठैरहुरो थु, तैहे कूनेरो घोड भोव?

11 ऐन परमेशरेरे त्रफा भोव, ते इशी नज़री मां एन बडू आजीबए |

12 जैखन तैनेइं एन शुनु ता तैस टलानेरी कौशीश केरने लगे, किजोकी तैना बुझी जेवरे थिये, कि तैनी इशे खलाफ ऐह कहानी जोई, पण तैना लोकन कैरां डरे सैहीं तैस शैरतां चले जे |

कैसेरे धड़त देनी

(मत्ती 22 : 15 - 22 ; लूका 20 : 20 - 26)

13 फिरी तैनेइं किछ फ्रिसेइं तैस गलन मां फसांनेरे लेई बडे फ्रिसी ते हेरोदेसेरे मैन्हुं तैस का भेजे ताके तैसेरी कोई गल हथे एजे । 14 ते तैनेइं एइतां तैस सैहीं जोंव, हे गुरु, असां ज्ञानतम, कि तु सचोस, ते कंचेरी प्रवा ना केरस, किजोकी तु मैन्हुं केरु तुत्रे अग्रां हेरतां गल्ल ना केरस, पण परमेशरेरी बचत सचैई सैहीं हेरतस । 15 कुन चुंगी कैसेरे जो देनी जैइजे कि नैइं? असां देम की ना देम? तैनी तैन सैहीं जोंव, मीं किजो प्रखतथ? अक दीनार मीं का आंन्हां, ते आंव तैस हेरीं । 16 तैनेइं आंन्हां, ते तैनी तैन सैहीं जोंव, ईही शकल ते नोवं किसेरुए? तैनेइं जोंव कैसेरु नोवं । 17 यीशुए तैन सैहीं जोंव, जैन कैसेरुए तैन कैसेरे, जो देथ ते जैन परमेशरेरुए तैन परमेशरे जो देथ ।

कयामत ते ड्ला

(मत्ती 22 : 23 - 33 ; लूका 20 : 27 - 40)

18 फिरी सदूकेइं भी, जैना जोते थिये, फटरन मैरां जीतु भोनू अथी नैइं, तैस का एइतां पुछू । 19 कि हे गुरु, मुसै इशे लेई लिखोरुए, अग्र कंचेरो दूला बगैर आवलादां मैरी गहते ता तैसेरी कौन्श राहे, ता तैसरो दूला तैस सैहीं ड्ला केरे, ते अपने दूलाएरे लेई औवलाध पैइदा केरे, सत दूला थिये । 20 पेहीलो दूला ड्ला बनेईतां बगैर आवलाधां मैरी जेव । 21 ते फिरी दुईयवं दूलाए तैस कौन्शी सैहीं ड्ला बनाव ते बगैर आवलाधां मैरी जेव, ते तैचरे होरे टलेइयवं भी । 22 ते सतां केरी आवलाध ना भुई, सैभनां पत्ती तै कौन्श भी फटी । 23 ते जीती भोने पुड तै कैसेरी कौन्श भोनीए? किजोकी तै सतां केरी कौन्श बनोरी थी ।

24 यीशुए तैन सैहीं जोंव, कुन तुस इस वजाही सैहीं धोखे मां नैइं पेवरे, कि तुस ना पाबित्र शास्त्र ज्ञानथ ते ना परमेशरेरी शखती । 25 किजोकी जैइस तैना फटरन मैरां जीते भोले, ता तैन मां ड्ला ना भोले, पण मैन्हुं स्वर्ग मां फरिश्तां केरे जैरे भोले । 26 ते जैडी तग्र कियामत्रो येंनी मुडदन मैरां जिंते भोनेरो सुवाले, ता तुसेइं मुसैरी किताबी मां नैइं पडेरु कि परमेशरे मुसै सैहीं जोंव, आंव इब्रारहमेरो परमेशर, ते इजहाकेरो परमेशर, ते याकूबेरो परमेशर आंहीं । 27 परमेशर मुवोरां केरो नैइं, जीतां केरो परमेशरे, ते हेरा' ते तुस बडे धोखे मांथ ।

सैभना बडो हुकम

(मत्ती 22 : 34 - 40 ; लूका 10 : 25 - 28)

28 ते शैसत्रन मैरां अक तैडी थु तैनी तैन सैहीं बंस केरती शुनी, ते तैस यीशुएरो जुवाब बडो पसंद आव ते यीशुए पुछने लगे की सैभना बडो हुकम कोहे? 29 यीशुए जुवाब दितो, सैभना बडो हुकमन मैरां बडो हुकम ईहीए इस्राएल शुन, ईशो परमेशर अके प्रभु परमेशरे । 30 ते तु प्रभु अपने परमेशरे सैहीं अपने सारे मने ते अपने सैरी जानी सैहीं, अपने सैरी अकली सैहीं, ते अपने सैरी ताकती सैहीं पयार रख । 31 ते दुईयवं ईहीए, तु अपने पडोसी सैहीं अपनों जैरो पयार केर, ऐस कैरां बडी होरो कोई हुकम नैइं । 32 शास्त्री तैस सैहीं लगे जोने, हे गुरु बडू ठीका! तीं सच जोंव, कि तैह अके, ते तैसेरे अलावा होरो कोई नैइं । 33 ते तैस सैहीं सारे मने ते सैरी जानी सैहीं, ते सैरी अकली सैहीं, ते सैरी ताकती सैहीं पयार रखनो, ते पडोसी सैहीं अपनों जैरो पयार केरनो सारे हुकमन ते सैरी कुबेन्न कैरां बेधताएं । 34 जैखन यीशुए हेरु की तैनी समझी सैहीं जुवाब दितो, ते तैस सैहीं जोंव, तु परमेशरेरे राजे कैरां दूर नैइं, ते फिरी केंची तैस पुछनेरी हिमता ना भुई ।

मसीह कैसेरु मडू ए?

(मत्ती 22 : 41 - 46 ; लूका 20 : 41 - 44)

35 फिरी यीशुए मंटे मां शिक्षा देंते जोंव, शास्त्री किजो जोतन कि मसही दाऊदेरु मडूए? 36 दाऊद ता एपू पाबित्र आत्माइं मां तैस जो प्रभु जोते, कि परमेशरे मेरे प्रभु सैहीं जोंव, मेरे देहीने पासे बिश, जां तग्र की आंव तेरे दुशमन तेरे पांवन हठ ना दलेंची । 37 दाऊद ता एपू तैस जो प्रभु जोते, फिरी

तैन तैसेरु केंचरे मडू भोवं? ते भीडारे लोक तैसेरी गल्ल आंन्दे सैहीं शुनते थिये ।

शास्त्रन कैरां हुशियार

(मत्ती 23 : 1 - 36 ; लूका 20 : 45 - 47)

38 तैनी अपने शिक्षाई मां जोंव, शैत्रन कैरां हुशार रेहीयथ, जैना लम्मा लिगडां लेइतां फिरतन । 39 ते बजारन मां नामसकार, मंटे मां खास खास तखत ते धामन मां बडी ठार भी चहतन । 40 तैना रन्डां कैरां घरां लुटतन, ते हेरानेरे लेई बडे चिरे तग्र प्रार्थना केरतन, ऐन जादे सजह मैलनीए ।

गरीब बेवारु दान

(लूका 21 : 1 - 4)

41 ते तै मंटेरे खजानेरे सामने बिशतां तकने लगेरो थु, कि लोक तैसमां कुन कुन छडतन काही आमीर लोक तैसमां बडे पैइसे छडने लोरे थिये । 42 एत्रेरे मां अक गरीब कौन्शां एइतां दुई देमडी, जैना एकी अधले बराबर भोईचन, छेडी । 43 तैखन तैनी अपने चलन नेडे एइतां तैन सैहीं जोंव, आंव तुस्न सैहीं सच जोताइं, की मंटेरे खजाने मां देने बालन मैरां इस गरीब रन्डां सैभन कैरां जादे दितो । 44 किजोकी सैभेइं एपनी फैलतु रकमी मैरां दितु, पण इस गरिब कौन्शा सभ किछ दितु जैन किछ एसका थुं येंनी सारी कमाई एसमां छडी ।

मन्दरेरे बरबैदरी भविश्वाणी

(मत्ती 24 : 1 - 2 ; लूका 21 : 5 , 6)

13 जैखन तै मंटेरे मैरां बेरोहुं निसने लगेरो थु, ता तैसेरे चलन मैरां एके तैस सैहीं जोंव, हे गुरु, तक, केरे केरे घोड, ते कैरी कैरी हावेलीन । 2 यीशुए तैस सैहीं जोंव, कुन तुसां इन बेडी बेडी अमारतां हेरतथ, इडी घोडे पुड घोड भी नैइं राल्हो जै भछोडो ना गाल्हो ।

दुःख मसीबत

(मत्ती 24 : 3 - 14 ; लूका 21 : 7 - 9)

3 जैखन तै जैतुन पहाडे पुड बिशोरो थु, ता पतरस ते याकूब ते यहून्ना ते अनिद्रयासे अलग गैहीतां तैस पुछू । 4 कि असन जो कि ऐना गल्ल कैंइस भोत्र ते जैइस इना गल्लो पूरी भोनी भोली तैस बेलेरो कुन निशाने? 5 यीशुए तैन सैहीं जोने लगे, हुशार राथ की कोई तुस्न गुमरह ना केरे । 6 यीशुए तैन सैहीं जोंव, बडे लोक मेरे नोवं सैहीं एजनेण ते बैशुमार लोकन जोले, कि आंव मसहीं, ते बडे लोकन टपलालहे । 7 ते जैखन तुस लडाई ते लडैई केरी अखवा शुनेल्हे, ता डेरथ नन्ना, किजोकी ऐन कैरु भोनू जरुरीए, पण तैस मोके खातमां नैइं भोनो । 8 किजोकी कौमी पुड कौम पुड, ते मुलख मुलखे पुड चडाई कैरेल्हो, ते भुन्जल एजेल्हे, ते काल पेले, एने गल्लेइं सैहीं मुसीबतां केरी शुरुवात भोली

9 पण तुसां हुशार राथ, किजोकी लोक तुस्न अदालतन मां नैल्हे ते प्राथना भावन्न मां कोडैइं सैहीं कुटालहे, ते मेरे वजाही सैहीं तुस्न हाकमन ते राजन का खडे केरल्हे, ताके तैन केरेलेई गुवाही भोए । 10 पण जरुरे कि पेहीलो सुसमाचारेरो प्रचार सैभी कोमन मां भोए । 11 जैखन तैना तुस्न टलेइतां तुसंन आदालतरे हावाले केरल्हे, ता तुस पैहिले फिकर ना केरथ, कि असेइं कुन ज़ोनुएं, पण जैन किछ तुस्न तैखने जोंव गालू, तैजे ज़ोइयथ, किजोकी ज़ोने बाले तुस नैइं बलकी पावन्न आत्मा भोली । 12 ते दूलाए दूला, ते बाजी मडू मारनेरे लेई देल्हे, ते मडून बाले अम्मां बाजीकेरे खलाफ भोइतां तैन माराले । 13 ते मेरे नोवैरे वजाही सैहीं सब लोक तुस्न सैहीं नफ़त केरल्हे, पण जै अखीरी तग्र ब्रदाशत केरल्हो ता तैस्से मुखती मैल्हेली ।

बडी मसीबत ते काल

(मत्ती 24 : 15 - 28 ; लूका 21 : 20 - 24)

14 पण जैइस तुस उजडने बाली गंदी चीज जैडी जेइज नैइं तैडी लालहे, (ता पडने बालो समझे) तैखन जैना यहूदीया मां भोले, ता तैना पहाडे पुड जो

नाशन | 15 ते जैना लाए पुड़ भोल्हे, तैना अपने घरे मां किछ नैने अंत्र ना एजन ते अंटल ना गहन | 16 ते जैना उडारे मां भोले, ता तैना अपनां लिगडां नैने पत्रों ना एजेन | 17 तैन दीहडन मां जैना दोर्जीती ते निके बचन दुध पीयेंती भोल्ही, तैन केरे लेई बडो आफसोसे! 18 ते प्रार्थना केरा की ऐन हींवाडांरे दिहाडन मां ना भोए | 19 किजोकी तै दिहाडी बडे दुखेरी भोले, की संसाररे शुरू केरां देंती जैन परमेशरे बनेवरुए अज तग्र ऐरही ना एवरी भोली, ते ना फिरी कधी एजेल्ही | 20 ते अग्र प्रभु परमेशर तैन दिहाडे ना भोथे घटेवरे, ता कोई जानादार ना थु बचनो, पण तैनी अपने खास पियारे लोकां केरे लेई तैना दिहाडे घटेवरेन | 21 तैस मोके अग्र कोई तुस्न सैहीं ज़ोए, तका, मसही इडी, या उडीए, ता याद रेखथ | 22 किजोकि झुटे मसही ते झुठे नबी खडे भोनेण, ते निशान ते चमतकार हेराले की भोई बडे ता चुनोरे लोकन भी टपलाल्हे | 23 पण तुसां हुशार राथ, हेरां मीं तुस्न सैरी गल्लां पेहीली ज़ोवरीन |

मैन्हेरे म्थेरी कयामत

(मत्ती 24 : 29 - 31 ; लूका 21 : 25 - 28)

24 तैन दिहाडन मां, तैस सतावेरां पत्ती दिहाडो आंधरो भोनोएं ते चेंदनरी लौ भी खतम भोनिये | 25 ते आसमानेरां तारे झडनेण, ते आसमानेरी ताकत भी हिली गहनीएं | 26 तैखन लोक मैनेरे मट्टे बेडी शेखती ते मेम्हाई सैहीं साथी बिदलारी मां एंडते लाहेले | 27 तैस मोके तै अपने फ्रिशतन भेजतां, धेरत्रे एकी कुनेरां ते होरी कुने तग्र अपने खास ट्लारे लोकन जम्हां कैरेल्हो |

अंजीरेरे बुटेरी मसाल

(मत्ती 24 : 32 - 35 ; लूका 21 : 29 - 33)

28 अंजीरेरे बुटे केरां इही कहानी शिखा, जैखन तैसेरे डालन पुंगे निसतन, ते पट्लां लगतन, ता तुस बुझथ कि ग्रमी नेडी एवरीए | 29 ऐंचरे तुस भी ऐन गल्लां भोती हेरेले, ता बुझथ, कि तै नेडोए बलके दारेपुडए | 30 आव तुसंन सैहीं जोताइं, कि जां तग्र ऐन गल्लां ना भोली, तां तग्र इस कांमरो खातमां ना भोलो | 31 असमान ते जमीन टेली गाहेली, पण मेरी गल कधे ना टलेल्ही |

बीझे राथ

(मत्ती 24 : 36 - 44)

32 तैस दिहाडरे बारे मां कोई ना ज़ाने, ना सुरगेरे फरिशते ते ना मडू, सिरफ बाजी | 33 हेरा, प्रार्थना केरते राथ, किजोकी तुस ना ज़ानथ कि तै मोको कताल्ही एजनोएं | 34 ऐन तैस मैनेरु ज़ैरुए, जै परदेशे गहंते अपनु घर शारे, ते अपने नोकरन आधीकार दे, ते हर एकी तैसेरु कम याद कराए, ते सेन्त्री बीजे बिषनेरो हुकम दे, कि तै हुशार राहे | 35 ऐलहेरलेई बींजोरे राथ, किजोकी तुसां ना ज़ानथ की घरेरो मालक काली एजनोएं, डलोवझी या एधी राती, या कुकडेरे बांक देंनेरे मोके या झेझां | 36 एरु ना भुए कि तै एजे ते तुस झुलोरे भोथ | 37 ते जैन आव तुस्न सैहीं जोताइं, ते तैन सैभन सैहीं जोए, की बींजे राथ |

यीशु एरे खलाफ साजिस

(मत्ती 26 : 1 - 5 ; लूका 22 : 1, 2 ; यूहन्ना 11 : 45 - 53)

14 दुई दिहाडन पत्ती फसह ते अखमीरी रौट्टेरु तीहार एजने बालू थुं, ते मंद्रेरे परैहृत ते शास्त्री ऐस गल्वरी तोपी मां थिये, कि तैस केंचरे सैहीं टलेइतां कतल केरम | 2 पण ज़ोते थिये, कि इस तीहारे मां नैइं, किजोकी एरु ना भुए लोकन मां हंगामो भोए | 3 जैखन तै बैतनियां मां शमौन कौडेरे घरे रौट्टी खाने बिशोरो थु तैखन अक कौन्श संगे मरमरी बोतली मां अक मागो अत्र तेल गिनातां आई, ते इत्र दान टलोडतां तैसेरे दोगे पुड उलटाव | 4 पण किछ लोक अपने मने मां चेखोइतां दिले मं ज़ोने लगे, ऐह इत्र तेल किजो बगाडो | 5 किजोकी ऐहे इत्र टलेई शौ दीनारे केरां भी जादे कीमती मां बेचतां गरीबन देइतां बंटते थिये, तैना तैस कौंशी जो खरु बुरु ज़ोने लगे | 6 यीशुए ज़ोव, ऐस रहंने देथ, ऐस किजो सतातथ? ऐसां ता मीं सैहीं भलगी कियोरीये | 7 गरीब गुरबे ता तुसंन सैहीं साथी हमेशां रहंनेण, ते

तुस जेइस चाथ तैन सैहीं भलगी केरी बटतथ, पण आव तुस्न सैहीं साथी हमेशा नैइं रहंनो | 8 जैन किछ ऐहे केरी बटती थी, ऐसां कियुं, तैसां मेरे दबनेरी तियेरी केरां पैहिले मेरी जानी पुड इत्र मल्लोरोए | 9 आव तुस्न सैहीं सच ज़ोताइं, कि सारे संसारे मां ज़ैडी भी इस रोडी खबररो परचार भोलो, तैडी ऐसारे इस कमे भी याद केरेल्हे |

यूहदरु विशवास घात

(मत्ती 26 : 14 - 16 ; लूका 22 : 3 - 6)

10 तैखन यूहूदा असक्रयुती ज़ै बहरन मेरां अक थु, सरदार कारीन्ना का जेव, कि तैस तैन केरे हथे टलुवाए | 11 तैना ऐन शुनतां खुश भुए, ते तैस जो पेइसे मन्ने, ते एरो मोको तकने लगे कि तैस कोन्ची बहाने सैहीं ट्लाम |

चेलन सैहीं साथी फशरी आखरी घाम

(मत्ती 26 : 17 - 25 ; लूका 22 : 7 - 14, 21, 23 ; यूहन्ना 13 : 21 - 30)

12 अखमीरी रौट्टेरे तिहाररे पैहिले दिहाडे, जैस मां तैना फसह कुर्बानी केरते थिये, तैसेरे चलेइं तैस पुछू तु कोडि चहतस, कि अस गैहीतां तेरे लेई फसहा खानेरी तियारी केरम? 13 तैनी अपने चेलन मेरां दूई ऐन ज़ोइतां भेजे, कि शहरे मां गाथ, ते अक मैन्हुं पैनेरो घडो छुवरो मैल्होए, तैस पत्ती गैहीयथ | 14 ते जैस घरे मां तै गाल्हो तैसेरे मालके सैहीं ज़ोइयथ, गुरे ज़ोवरुए, कि मेरो महंमान खानो जैस मां मीं अपने चेलन साथी फसहा खानीएं कोडीये? 15 तै एपु तुसंन बहा नैहीतां तियार कियोरो कमरो हेराल्हो, तैडी इशे लेई तियारी केरथ | 16 ते चेले निस्तां शहरे मां आए ते ज़ैरु तैनी ज़ोवरु थु, तैन तैरु मैल्हू ते फसहा तियार की |

17 जैखन डलोवझ भुई, ता तै तैन बहरन सैहीं साथी अव | 18 ते जैखन तैना बिशतां रौट्टी खाने लगे, ता यीशुए ज़ोव, आव तुस्न सैहीं सच ज़ोताइं, कि तुस्न मेरां अक, जै मीं साथी रौट्टी लगोरोए खाने, मीं टलुवाल्हो | 19 तैना ऊदास भुए ते अक अक भोइतां तैस ज़ोने लगे, कुन आव आई? 20 तैनी तैन सैहीं ज़ोव, तै बहरन मेरां अके, जैनी मीं साथी थैली मां हथ छडोरोए | 21 किजोकी मैनेरु मडू ता, जैचरे तैसेरे बारे मां लिखोरुए तैस सैहीं भोते, पण तैस मैन्हुं पुड अफसोस जैसेरे वजाही सैहीं मैनेरु मडू टलुवां गहते! अग्र तै ज़रमोरो ना भोथो, ता तैसेरे लेई रोडू भोथु |

प्रभु भोज

मत्ती 26 : 26 - 30 ; लूका 22 : 14 - 20 ; 1 कुरिन्थियों 11 : 23 - 25)

22 ते जैखन तैना रौट्टी खाने लगोरे थिये ता तैनी रौट्टी निही, ते ब्रकत मेगतां टलोडी, ते तैन दिती, ते ज़ोव, इही मेरी जाने | 23 फिरी तैनी कटोरो टलातो ते शुकर कियुं, ते तैन दितो ते तैनेइं सैभेइं तैस मेरां पीवं | 24 ते तैनी तैन सैहीं ज़ोव, इही नोवो एहेदेरो मेरो लैहुए, जै बडां केरे लेई बहाव गहते | 25 आव तुस्न सैहीं सच ज़ोताइं, कि दाछरो रस तैस दिहाडी तग्र फिरी ना पील्हो, जां तग्र परमेशरेरे राजे मां नोवो ना पील्हो |

26 फिरी तैनेइं अक भजन ज़ोवं ते फिरी तैना ज़ैतुन पहाडे पुड चले जे |

पतरसेरे इनकारी भविश्वाणी

(मत्ती 26 : 31 - 35 ; लूका 22 : 31 - 34 ; यूहन्ना 13 : 36 - 38)

27 तैखन यीशुए तैन सैहीं ज़ोव, तुसेइं सैभेइं ठोकर खानीए, किजोकी लिखेरुए, आव पूहाले मारेल्हो, ते भेडां तित्र बित्र भोनिण | 28 पण आव अपने ज़ोते भोनेरे पत्ती ते तुसंन केरां पैहिले गलीले मां भोनोंइं | 29 पतरसे तैस सैहीं ज़ोव, अग्र सभ ठोकर खान ता खान, पण आव ठोकर ना खेइल्हो | 30 यीशुए तैस सैहीं ज़ोव, आव तीं सैहीं सच ज़ोताइं, कि अजे इसे राती कुकडेरे दुई बार बांक देने केरां पैहिले, तु ट्लाई बार मेरो इनकार कैरेल्हो | 31 पण तैनी मना ज़ोर देइतां ज़ोव, अग्र मीं तीं सैहीं साथी मरनु भी पैलु ता फिरी भी तेरो इनकार ना कैरेल्हो, एचरे सैभेइं ज़ोव |

गतसमनी मां प्रार्थना

(मत्ती 26 : 36 - 46 ; लूका 22 : 39 - 46)

32 फिरी तैनां गसतमनी नोवेंरी ठैरी आए, ते तैनी अपने चलन सैहीं जॉव, इडी बिशोरे राथ, तां तग्र आंव प्रार्थना केरताइं । 33 ते तैनी पतरस ते याकूब ते यहुन्ना एपु सैहीं साथी नीये, ते बड़ो हेरान ते परेशान भोने लगे । 34 ते तैन सैहीं जॉव, मेरो मन बड़ो उदासे, इडी तग्र कि मरने पुड आंहीं, तुस इडी बलगा, ते बींझे राथ । 35 ते तै थोड़ो अग्र जेव, ते जमीनी पुड बिषतां प्रार्थना केरने लगे, कि भुईं सखे ता ईही घड़ी मीं पुडेरं टले । 36 ते जॉव, हे अबा, हे बाजी, तीं केरां सभ किछ भुईं बटते, इस कटोरे मीं केरां दूर केर, फिर भी जैरु आंव चहताइं तैरु नैइं, पण जैरु तु चहतस तैरु भोए । 37 फिरी तै अव, ते तैना झूलोरे थिये, ते तैनी पतरसे सैहीं जॉव, हे शमौन तु झूलोरोस? 38 बींझे बिशा ते प्रार्थना केरते राथ ताकि अजमैइशी मां ना पैथ, आत्मा ता तियारे, पण जिसम कमजोरे । 39 ते फिरी चलो जेव, ते तैहे प्रार्थना की जै पैहिले कियोरी थिये । 40 ते फिरी अव ते तैना झूलोरे थिये, किजोकी तैन केरे एछन मां निडल थी, ते ना थिये जानते कि तैस कुन जुवाब देंम । 41 फिरी टलेइयवं बार तैनी एइतां जॉव, हेजु भी झूलोरेथ ते आराम केरा, बसा, घड़ी पुजोरीए, हेरा मैनेरु महु पैपी केरे हथे टलुवांव गहते । 42 उठा, चला, तका मेरो टलुवांने बालो नेडे पुजोरोए ।

यीशु एरु धोखे सैहीं टलावाव गहनू

(मत्ती 26 : 47 - 56 ; लूका 22 : 47 - 53 ; यूहन्ना 18 : 3 - 12)

43 तै एन जोई राहोरो थु, ता यहूदा जै बहरन मैरां अक थु, एपू सैहीं साथी मंद्रे परेहुत ते शास्त्री ते बजुर्गा केरो अक बड़ो जथौ तलवारां ते सोटी गिनातां तैस का पुजे । 44 ते तैसेरो टलुवांने बाले तैन सैहीं पतो दितोरो थु, कि जैस आंव फुमडी देइं तैए, तैस टलेइतां नैइयथ । 45 ते तै यहूदा असक्रयुती अव, ते यीशु का एइतां जॉव, हे रब्बी ते तैस बेडी फुमडी दिती । 46 तैखन तैनेइं तै टलाव । 47 तैन मैरां जैना नेडे थिये, एके तलवारी सैहीं मंद्रे मां सेवा केरने बाले परेहुत नोकरेरो कन कटो । 48 यीशुए तैस सैहीं जॉव, कुन तुसां मीं डैकू बुजतां मीं टलानेरे लेई तलवारां घिनतां एवरथे? 49 आंव रोज मंद्रे मां तुसन सैहीं साथी रेहीतां शिक्षा देतो थु, ते तैखन तुसेइं ना टलाव, पण इन ऐलहेरलेई भोवं कि पावत्र शास्त्रेरी गल्लां पूरी भोन । 50 चाल्ही सारे चेले तैस शैरतां चले जे ।

51 ते अक जुवान अपने नेगी जानी चादर पलटतां तैस पत्ती चलो, ते लोकेइं तै टलाव । 52 पण तै चादर शैरतां नगो नशो ।

महा सभारे सामने यीशु

(मत्ती 26 : 57 - 68 ; लूका 22 : 54, 55, 63 - 71 ; यूहन्ना 18 : 13, 14, 19 - 24)

53 फिरी तैनेइं यीशु सरदार काहींन का नियो, ते सब मंद्रे परेहुत ते बजुर्गा ते शास्त्री तैस का अकौठे भुए । 54 पतरस दूर दूर तैस पत्ती पत्ती मंद्रे मां सेवा केरने बाले परेहुत अंगने अंत्र तग्र जेव, ते प्यादन साथी बिशतां अग लगेरो थु तपने । 55 मंद्रे परेहुत ते सारी पन्चायत यीशुए मारनेरे लेई तैसेरे खलाफ गुवाही लगे तोपने, ना मैल्ही । 56 किजोकी बडे तैसेरे खलाफ झूठी गुवाही लगेरे थिये देने, पण तैन केरी गुवाही अक जैरही ना थी । 57 तैखन केरेइं उठतां तैसेरे खलाफ ईही झूठी गुवाही दिती । 58 की असेइं ऐस इन जांते शुनेरुए कि मीं इन हथेरु बनेवरु मन्दर बुछोडनुएं ते टलेई दिहाडन मां फिरी खडू केरनुएं, जैन हथेरु बनेवरु ना भोए । 59 चाल्ही तैन केरी गुवाही अकां जैरी ना निसी ।

60 तैखन सरदार काहींने मझाटे खडे भुईंतां पुछू, की तु कोई जुवाब ना देस? इना लोक तेरे खलाफ कुन गुवाही देतन? 61 पण तै चुते राहु, ते किछ जुवाब ना दितो, सरदार काहींने तैस फिरी पुछू, कुन तु प्रमप्रधानेरु महु मसहीअस? 62 यीशुए जॉव, हां आंव अंहीं, ते तुस मैनेरे मडे सर्वशक्तिमानेरे देहीने पासे बिशोरे, ते आंब्रेरी बिदलारी पुड एइते लाहेले । 63 तैखन सरदार काहींने अपना लिगडां छीन्दां ते जॉव, हुनी असन गुवाहां केरी कुन जरूरते? 64 तुसेइं ईही निन्दा शुनी, तुशी कुन राईये? तैन सैभेइं जॉव, ऐह

मारनेरे काबले । 65 तैखन किछ तैस पुड थुकने लगे, ते किछ तैसेरे तुत्रे अग्रां ढकने लगे ते घूसे मारने लगे, कि भविष्याणी केर, कि प्यादन मैरां केने थप्पड बाहोरोए ।

पतरसेरु इन्कार

(मत्ती 26 : 69 - 75 ; लूका 22 : 56 - 62 ; यूहन्ना 18 : 15 - 18, 25 - 27)

66 जैखन पतरस बुन अंगने मां थु, ता मंद्रे मां सेवा केरने बाले परेहुत नोकरेन मैरां अक तैडी थी । 67 तैसां पतरस अग तपतो लाहु ता तै जौने लगी । तु भी तैस नासरी यीशु सैहीं साथी थु । 68 तैनी इनकार कियो, ते जॉव, कि आंव ना जैनी ते ना समझी की तु कुन लगेरिस जौने, फिरी तै बेइर डेवढी मां जेव, ते कुकडे बांक दिती । 69 तै नोकरानी तैस लेइतां जैना तैस का नेडे थिये तैन सैहीं जौने लगी, कि ऐहे तैन मैरां अके । 70 पण तैनी फिरी इनकार कियो ते थोड़े चीरेरां पत्ती जैना तैडी थिये फिरी पतरसे सैहीं जॉव, पक्को तु तैन मैरां अक्कस, किजोकी तु गलीली भी आस । 71 तैखन तै तैस जो लान तान केरने ते कसम खेइतां जौने लगे, कि आंव ऐस मैनुहुं जैसेरी तुस गल्ल लगेरेथ केरने, ना जैनी । 72 तैखन दुइयोवं बार कुकडे बांक दिती, पतरसे तै गल्ल जै यीशुए तैस सैहीं जैवरी थी याद आई, कुकडेरे दुई बार बांक देनेरे पैहिले तु टलाई बार मेरो इनकार कैरेल्हो, ते ऐस गल्ली सोचतां लेरां देने लगे ।

पीलातुसेरे सामने यीशु

(मत्ती 27 : 1, 2, 11 - 14 ; लूका 23 : 1 - 5 ; यूहन्ना 18 : 28 - 38)

15 ते झेझ भोते मंद्रे परेहुतेइं, ते बजुर्गेइं, ते शैस्तरेइं बलके सारे लोकेइं सल्ला केरतां यीशु बन्धाव, ते नैहीतां पिलातुसेरे हथे सांफो । 2 ते पिलातुसे तैस पुछू, कुन तु यहूदी केरो राजोस? तैनी तैस जुवाब दितो, तु एपू लगेरोस जौने । 3 ते मंद्रे परेहुत तैस पुड बेडी गल्लां केरो दोश लगे लाने । 4 पिलातुसे तैस फिरी पुछू, कुन तु जुवाब ना देस, हेर ऐना तीं पुड केरी गल्लां केरो दोश लातन? 5 यीशुए फिरी जुवाब ना दितो, इडी तग्र कि पीलातुस बड़ो हेरान भोव ।

मौतरे सजाहरो हुक्म

(मत्ती 27 : 15 - 26 ; लूका 23 : 13 - 25 ; यूहन्ना 18 : 39 - 19 ; 16)

6 ते तै तैस तीहारे मां केंची एकी कैदी आजाद केरतो थु, जैस तैना चहते थिये, तैन केरे लेई हथरां छडतो थु । 7 ते बराबा नोवेंरो अक मैनुहुं तैन डैकन सैहीं साथी कैद थु, जैनेइं हंगामे मां कतल कियोरो थु । 8 ते लोक गैहीतां तैसेरे छन्दे केरने लगे, कि जैचरे तु इशेलेई केरतो एवरोस तैचरे केर । 9 पिलातुसे तैन ईही जुवाब दितो, कुन तुस चहतथ, कि आंव तुशे लेई यहूदी केरे राजे हथरां छेडी? 10 किजो तै जानतो थु, की मंद्रे परेहुतेइं दुशटे सैहीं टलुवेवरो थु । 11 पण मंद्रे परेहुतेइं लोक भटकाए, कि तै बराबा तैन केरे लेई हथरां छेडे । 12 ऐन शुनतां पिलातुसे फिरी पुछू, ता जैस जो तुस यहूदी केरो राजो जोतथ, तैस आंव कुन केरी? तैना फिरी किचकने लगे, की तैस सलीबी पुड चहडा । 13 पिलातुसे तैन सैहीं जॉव, किजो, ऐनी कुन बुराई कियोरिये? 14 पण तैना मना शौर लगे केरने, कि ऐस सलीबी पुड चहडा । 15 तैखन पिलातुसे भीडी खुश केनेरे लेई, बराबो आजाद कियो, ते यीशुए कोडे लेइतां सांफो, कि सलीबी पुड चहडां गाहे ।

सुपेही केरे जिरिये यीशु एरी बे इजती

(मत्ती 27 : 27 - 31 ; यूहन्ना 19 : 2 - 3)

16 ते सिपेहीयेइं तै किले मां अंत्र नियो जैस जो शाही किलौ जौतन, ते सारी पलटन अकोठी की । 17 तै तैनेइं यीशुए अक चोगो लवाव ते कन्टां केरु ताज लवावं । 18 ते इन जौइतां तैना नमसकार केरने लगे, कि यहूदी केरे राजा नमसकारे! 19 ते तैना तैसेरे दोगे पुड डंडेइं सैहीं बहने लगे, ते तैस पुड थुकते, ते जैथु केरे भारे बिषतां मथो टेकेने लगे । 20 ते जैखन तैनेइं तैसेरो मजाक बनाव, ता तैसेरां लिगडां खोलेहीतां तैस होरां लिगडां लूवां, ते तैखन तै तैनेइं सलीबी पुड चहडनेरे लेई नियो ।

यीशु क्रुसे पुड चाडो

(मत्ती 27 : 32 - 44 ; लूका 23 : 26 - 43 ; यूहन्ना 19 : 17 - 27)

21 ते सिकन्दर रूफुसेरो बाजी, शमौन नोवेंरो अक कुरेनी मैन्हुं थु, जै इलोवेंरा एजी राहोरो थु तैठां निसो, तैनेइं तै टलाव, कि यीशुएरो क्रुस छूए | 22 ते तैनेइं तै गुलगुता नोवेंरी ठैरी पुड जैसेरो मतलबे खोपडी आन्हो | 23 ते तैस ब्रम जैरी शराप देने लगे, पण तैनी ना पी | 24 तैखन तैनेइं तै सलीबी पुड चहडो, ते तैसेरे लिगडन पुड चिठी छडी, कि केस कुन मैलते, ते तैनेइं तैना लिगडां बंटां | 25 ते जैखन तैनेइं यीशु सलीबी पुड चहडोरो थु ता झेझारे नोव बजोरे थिये | 26 ते तैसेरो दोश लिखतां बह लाव कि एह, "यहूदी केरो राजोए" | 27 ते तैनेइं तैस साथी दुई डैकू, अक तैसेरे देहीने पासे ते होरो खिशडे पासे सलीबी पुड चहडे | 28 तैखन धरम शास्त्रे तैन वचन पुरु भोवं कि तै पैन् सैहीं साथी गणों जेव पूरो भोवं | 29 ते बत्तां गहने बालेइं करोडी हीलेइतां इन जोते थिये तैसेरी निन्दा केरते थिये, कि वह वह मंद्रेरो बछोने बालो | 30 सलीबी पुडेरं ओस्तां अपनो आप बचा | 31 ऐन्चरे मंद्रेरे परैहुत भी, ते शास्त्री भी एपू म्मेइं अकौठै भोइतां जोते थिये, कि ऐनी होरे बचाए, पण अपनो आप ना बचेइं बटो | 32 इस्राइलेरो राजो मसही सलीबी पुडेरं ओस्से कि अस्सां हेरतां विश्वास केरम, ते जैना तैस सैहीं साथी सलीबी पुड चहडोरे थिये तैना भी तैसेरी निन्दा केरते थिये |

यीशु ए जान दिती

(मत्ती 27 : 45 - 56 ; लूका 23 : 44 - 49 ; यूहन्ना 19 : 28 - 30)

33 ते दुपहर भोने बाले थिये, सारे मुलखे मां आंधरु भोवं, ते टलेइयवं पहरे तग्र राहुं | 34 टलेइयोवं पहरे यीशुए बडे जोरे सैहीं हक देइतां ज़ोव, इलोई, इलोई, लुमा शबत्केनी जैसेरो मतलबे, हे मेरे परमेशर, हे मेरे पमेशर, तीं आंव किजो शारो? 35 जैना नेडे थिये, तैन मैरां किछेइं शुनतां ज़ोवं, तका ईही इलिय्याए जो लगेरोए हक देने | 36 एके दौडतां इस्पंज सिरके मां डोबतां, ते डांगे पुड रेखतां तैस पियावं, ते ज़ोवं, बलगा, हेरा, इलिय्या ऐस ऊसालने एइते की नैइं | 37 तैखन यीशुए बडे जोरे सैहीं चिन्ड मैरतां प्रान दिते | 38 ते मंद्रेरो पुडदो बां देंतो बुन तग्र फेटतां टुकडे टुकडे भोव | 39 जै सुबेदार तैस का खडो थु, जैखन तैनी चिन्ड मैरतां प्रान देने लगे, ता ज़ोवं, सचे ईही मैन्हुं, परमेशरेरु महु थुं |

40 किछ कौन्शां भी दूरेरां हेरी रेहोरी थी, तैन मैरां मरियम मगदलीनी ते निकडे यकूबेरी ते योसिसेरी अम्मां मरियम ते सलोमी थी | 41 जैखन तै गलीले मां थु, ते इना तैस पत्ती चेलोरी थी, ते तैसेरी सेवा टहल केरती थी, ते होरी भी बेडी कौन्शां थी, जैना युरोशलमेरां तैस सैहीं साथी एवरी थी |

यीशु दबो

(मत्ती 27 : 57 - 61 ; लूका 23 : 50 - 56 ; यूहन्ना 19 : 38 - 42)

42 जैखन इलोवझ भुई, ता ऐलहेरलेई की तियेरारी दिहाडी थी, जै सबतेरी दिहैडी कैरां अक दिहाडी पेहीली भोचे | 43 अरिमतियएरो रहने बालो यूसफ अव, जै की रोडो मन्त्री ते एपू भी परम परमेशरेरे राजेरी तीयेरी मां थु, ते हिमत केरतां पिलातुसे का जेव ते यीशुएरी लाश मगी | 44 पीलातुस हेरान भोव, कि तै एत्रे जलदी मैरी जेव, ते सुबेदारे कुजेइतां पुछू, कि कुन तैस फटरे चिर भोवरुए? 45 ते जैखन सुबेदारे कैरां सारो हाल पतां चलो, ता लाश यूसफैरे हावाले की | 46 तैखन तैनी चालही तैनी चदर गित्री, ते लाश तैस चदरी मां पलैटी, ते एकी कुडी मां मां रख्खी, ते कुडी अग्रोरां अक बडो घोड रखो | 47 ते मरियम मगदलीनी ते योसिसेरी अम्मा मरियम तैकी राहोरी थी, कि तै कौडी रखोरोए |

यीशु एरु जीतू भोनु

(मत्ती 28 : 1 - 8 ; लूका 24 : 1 - 12 ; यूहन्ना 20 : 1 - 10)

16 जैईस सबतेरी दिहाडी बीती, ता मरियम मगदलीनी ते याकूबेरी अम्मा मरियम ते सलोमा खुशबू दार चीजां घित्री, कि एइतां तैस यीशुएरी लाशी मल्लन | 2 ते हफतेरे पैहिले दिहाडी झेझां, हेजू दिहाडो भी ना थु निसोरो, तैना कब्री का एई | 3 ते एपू म्मेइं ज़ोती थी, कि इशे लेई कब्री पुडेरं घोड कौन सल्ले? 4 तैखन तैनेइं हेरु, ते घोड तैडी ना थु! किजोकी तै बडो बडो थु | 5 ते कब्री अत्र गैहीतां, तैनेइं अक फरिशतो छितां लिगडां लेइतां देंइने पासे बिशोरो लाहु, ते बेडी हेरान भुई | 6 तैनी तैन सैहीं ज़ोव, हेरान ना भोथ, तुस यीशु नासरी, जै सलीबी पुड चडोरो थु, तोपचथ, तै जीतो भोवरोए, तै इडी नैइं, हेरा, ईही तैहे ठारए, जैडी तैनेइं रखोरो थु | 7 पण तुस गाथ, ते तैसेरे चलन ते पतरसे सैहीं ज़ोथ, कि तै तुशे पैहिले गलीले गहंनोए, ज़ेचरे तैनी तुस्न सैहीं ज़ोवरु थु, तुस तैडी तैस लाहेले | 8 ते तैना निस्तां कब्री कैरां नेष्पी, किजोकी तैन थरकी सैहीं घेमरोरी थी, ते तैनेइं केंची सैहीं किछ ना ज़ोव, किजोकी तैना डेरोरी थी |

मरियम मगदलीनी यीशु लेईहोव

(मत्ती 28 : 9 - 10 ; लूका 20 : 11 - 18)

9 यीशु हफतेरे पैहिले दिहाडे झेझ भोतें जीतो भोइतां पेइलो मरियम मगदलीनी जैस मैरां तैनी सत गेन्दी आत्मा केढोरी थी, तैसां लाहु | 10 तैसां गैहीतां तैसेरे सैथन जेनां बडे परेशान थिये, ते लेरां देते थिये, बिस्तार दितो | 11 ते तैनेइं एन शुनतां कि तै जीतोए, ते तैसां तै लाहोरोए यकीन ना कियुं |

दूइय चलन यीशु लेइहोने

(लूका 24 : 13 - 35)

12 ऐसेरां पत्ती तै होरी रूपे मां तैन मैरां दुईन लेहीयोव, जैखन तैना इलोवेंरे पासे चलोरे थिये | 13 तैनेइं भी गैहीतां होरन सैहीं ज़ोव, पण तैनीइं तैनकेरी भी परवा ना की |

यहरन यीशु लेइहोने

(मत्ती 28 : 16 - 20 ; लूका 24 : 36 - 39 ; यूहन्ना 20 : 19 - 23 प्रेत1 : 6 - 8)

14 पत्रोवं तैन यहरन भी, जैना तैखन रौडी खाने लगेरे थिये लैहीयोव, ते तैन केरे आविश्वास ते सरखत मन्ना केरे लेई तैन ज़िडक दिती, किजोकी जैनेइं तै जीतो भोनेरा पत्ती लाहोरो थु, ऐनेइं तैनकेरु याकीन ना थु कियेरु | 15 ते तैनी तैन सैहीं ज़ोव, तुसा सारे संसारे मां गैहीतां सैरी दुनियई मां लोकन सुसमाचार शुनाथ | 16 जै विश्वास केरे ते बपतीसमो नै तैसे मुखती मैल्हनियें, पण जै विश्वास ना केरे तै दोशी ठैराहु गहंनो | 17 ते विश्वास केरने बालन मां इना निशान भोनेण कि तैना मेरे नोव सैहीं गेन्दी आत्मा कड्डेले | 18 नेवीं नेवीं बोली केरेले, सपन टलालै, ते अग्र कोई मरने बाली चीज भी पीले ता तैन कोई नुकसान ना भोलो, तैन बिमारन पुड हथ रखेले, ता तैना ठीक भोले |

यीशु एरु सुवर्ग गहनू

(लूका 24 : 50 - 53 ; प्रेततां 1 : 9 - 11)

19 ते प्रभु यीशु तैन सैहीं गल्लां केरनेरे पत्ती स्वर्ग पुड चलो जेव, ते प्रभु परमेशरेरे देहीने पासे बिशो | 20 ते तैसेरे चलेइं गैहीतं हर ठैरी प्रचार कियो, ते प्रभु परमेशर तैन सैहीं साथी कम केरतो राहु, ते जैना निशान तैन सैहीं साथी साथी भोते थिये वचने मज़बूत केरतो राहु | आमीन |

लूका

परिचय

1 किजोकी बड़े लोकेइं एल्हेरेलेइ तियारी कियोरी थी की जैन गलां ईशे सामने सच्चे भुई बिती तैन पत्रां देंती रोडे चारे शुनम | 2 खास केरतां तैन गलां जैन बचनेरे मैन्हेंइ जैन एस शुरु कैरां देंते एपु एस गल्लरे चशम दिद गुवहा थिये तैनेइं सुसमाचार असन तग्र पुझाऊ | 3 एल्हेरेलेइ ऐह ट्लारे थिप्लुस मीं एपु पैहिले देंती सैरी गलां केरी शुरुवात रोडे चारे लिखतां तीं केझो भेजी | 4 किजोकी जैन गलां केरी पढहाई तीं कियोरिए तैन गलां केरो तीं रोडे चारे पत्तो लगे की तैन कैत्री पैकिन |

यूहन्नरे जरमेरु ऐलान

5 युहूदियारे बादशाह हिरोदेसेरे जमाने मां अक पुरैहूत थु: जैसेरु नोंव जाक्रिया थु: तै अबिय्यारे खान्देंनी मैरां थु: तैसेरी कौन्श अलशिबा भी हारुनेरे खानदेंनी मैरां थी | 6 ते तैन दुइये परमेशरेरी नजरी मां सच्चे भगत ते परमेशरेरे हुकमन पुड़ रोडे चारे चलने बाले थिये | 7 पण तैन केरी कोई ओवलाध न थी किजोकी अलशिबा बांझ थी ते तैना दुइये बूढां थियां |

8 एकी फेरे जैईस तै जाकरियारे खानदेंनरी बैरी पुड़ परमेशरे क पुरैहूतेरु कम लोरो थु: केरने | 9 त एरु भोंव की पुरैहुतां केरे रुवाजेरे हिसाबे सैहीं तैसरु नोंव निसु की तै परमेशरेरे घरे मां गैहितां गूल बाले | 10 ते जैखन गूल बालनेरो मोको आव ते अरदास केरने बाले बेइर अकौड़े भोइतां दुआ लोरेथिये केरने | 11 त परमेशरेरो अक सुवर्गदूत जैडी तैनेइं गूजल बलोरो थु: चौकेरे दैहिने पासे खडो भोव ते सैभेइं लाहू | 12 जाक्रिया तैस लैहीतां डेरी जेव ते तै बेहोश भोई जेव | 13 पण सुवर्गदूते तैस जो जोंव: जाक्रिया डर न्ना तेरी दुआ शुनोरियेतेरी कौन्श अलशिबाई अक महु भोंनुए तू तैसरु नोंव युहन्ना रेखां | 14 तै तेरे लेइ बडी खुशरी गल्ल भोल्ही ते बड़े लोक तैसेरे जर्मने सैहीं खुशी भोल्हे | 15 किजोकी तै परमेशरेरी नजरी मां सियंनो भोनोए ते तै शरापेरे नशे कैरां उमरी दूर राल्हो ते तै एपनी हेइयरे पेटे मां पवित्रात्माइं सैहीं भेरतां भोल्हो | 16 तै बनी ईसाएली लोकन मैरां परमेशरे पासे जै तैनकेरो परमेशरे वापस तैसक आन्हेल्हो | 17 ते कने तै ईलियारे आत्मारी तकती सैहीं तैस अगरी अगरी चलेल्हो तके हाज बाँवां केरो दिल ओवलाधरे पासे ते परमेशर न मन्ने बाले लोकांकेरो दिल परमेशर मन्ने बालां केरे पासे बदलेल्हो तके परमेशरेरे लेइ अक पक्की काँम तियार भोए |

18 जाक्रियाए सुवर्गदूते सैहीं जोंव:आंव केंचरे मैत्री आंव त बुढाँइ ते मेरी कौन्श भी बूढी भोवरिये | 19 सुवर्गदूते जुवाब दितो आंव जिब्राईल अहीं आंव परमेशरे क खडो भोताइं आंव एल्हेरेलेइ भेजोरोइ की आंव तीं सैहीं गल्ल केरीं ते तीं ऐह खुशखबरी शुनेइं | 20 ते हेर जां तग्र एन्न गलां पूरी न भोन तेरी जबांन बंद भोलल्ही ते तू गल्ल न केरी बटेल्हो किजोकी तीं मेरी गलां कैरु यकिन नैइं कियेरु जैन अपने मोके पुड़ पूरी भोनी थी | 21 ते एस फेरे लोक जाक्रियाए बलगने लोरेथिये तैन बड़े परेशान भोई जे की जाक्रियाए हेक्की मां एनु चीर किजो लावं | 22 जैखन तै बेइर निसो त तै कुजी न बटो तैनेइं बुझी छडु की एनी हेक्की मां किछ दरशन लाहेरुए किजोकी तै इशारो केरतो थु: पण कुजी न थु: बटो | 23 जैईस तैसेरी सेवारु कम पुरु भोंव त तै घरजो चलो जेव |

24 तैसरां बाद तैसेरी कौन्श अलशिबा दोज्जिती भोई ते तैसां एपू पंच मिहींने तग्र छपैइतां रखु | 25 की जैखन परमेशरे मेरो कुसूर लोकन मैरां दूर

केरनेरेलेइ मैरां तकु ते तैनी मेरेलेइ एन कियुं ते लोकन मां आंव लांनती भोने कैरां बचाइ |

यीशु एरे जरमेरु ऐलान

26 शैईयवं मिहींने जिबरायल सुवर्गदूत परमेशरेरी तरफां गलिलेरो शाहर नस्रते मां एकी अडलेही कुइये क भेजो | 27 तैसारी कुडमाइ दाऊदेरे घराने मैरां एकी मडदे सैहीं भैऊरी थी जैसेरु नोंव युसफ थु: ते कुईयरु नोंव मरियम थु | 28 सुवर्गदूत तैसक एइतानमसकार जोंव तीं पुड़ परमेशरेरी बडी दिया भवरीये परमेशर तीं सैहीं साथिये | 29 मरियम सुवर्गदूतेरी गल्ल शुनतां डेरी जेई ते जोंने लगी एन कैरु नमसकारे | 30 सुवर्गदूते तैस सैहीं जोंव हे मरियम किजो कि परमेशरेरो तीं पुड़ बडो फजल भोवरोए | 31 तू दोर्जीती भोल्ही तीं अक महु भोल्हु तू तैसरु नोंव यीशु रेखां | 32 तै सियांनो भोल्हो ते परमेशरेरु महु भोल्हु ते परमेशर तैस अपने बाजी केरो दाऊदेरो तखत तैस दैल्हो | 33 ते तै याकुबेरे घराने पुड़ हमेशां बादशाही केरल्हो ते तैसरी बादशाही कधै खतम न भोल्ही | 34 मरियमां सुवर्गदूते पुछ एन केंचरे भोई सके? आंव त अड्लाहीं | 35 सुवर्गदूते जुवाब दितो पबित्र आतमा तीं पुड़ उत्रैल्ही ते परमेशरेरी कुदरुत तीं पुड़ सैयो कैरेल्ही एल्हेरेलेइ तै पाक पबित्र जै जर्मल्हो तैसजो परमेशरेरु मठतु जोल्हे | 36 ते हेर तेरी रिशतेदार अलशिबारे क भी बूढे बारे मठतु भोने बालूए तैसजो लोक बांझ जोते थिये; शैई महिन केरी देंती दोज्जितीए | 37 किजोकी परमेशरेरे लेइ कोई असुखतु नैइं | 38 मरियमां सुवर्गदूते जुवाब दितो आंव परमेशरेरी ट्लारीं जैन तीं जेवरुए परमेशर केरे त तैन्ने भोए तैखन सुवर्गदूत तैसकैरां चलो जेव |

मरियम इलीशिबा सैहीं मिलती ए

39 तैनी दिहेडन मां मरियम तियार भोइतां युहूदियारे पहाडी अलाकेरे एकी शहारे मां जेई | 40 ते जाक्रियारे घरेमां गैहितां अलशिबाई जो नमसकार कियुं | 41 जैखन अलशिबां मरियमांरु नमसकार शुनू त बच्चो तैसारे पेटे मां छालां मारने लगे ते अलशिबा पाबित्र आत्माइं सैहीं भेरोई जेई | 42 ते बड़े जोरे सैहीं जोंने लगी तू कौन्शन मां मुबारकस ते तेरे पेटेरो फल भी मुबारके | 43 ते मीं पुड़ एह दिया केंचरे भोई की मेरे परमेशरेरी अम्मा मी क एवरीए? 44 किजोकी हेर जैरही तेरे नमसकारेरी अवाज मेरे कने मां अई त बच्चे खुशी सैहीं मेरे पेटे मां छालां लगे मारने | 45 मुबारके तै जैसां विश्वास कियो की परमेशरे तैस जो जैन किछ जोंव:तैन पुरु भोइतां राहेलु |

मरियमरु स्तुति - गीत

46 ते मरियमा जोंव:मेरी जान परमेशरेरी तारिफ केरचे | 47 ते मेरी आत्मा मेरे मुखती देने बाले परमेशरे कैरां खुशी भुई | 48 किजोकी तैनी मेरी कमजोरी पुड़ नजर दिती की हेर अजैरां देइतां हरजमानेरे लोक मीजो मुबारक जोल्हे | 49 किजोकी परमेशरे मेरे लेइ बडां बडां कम्मा कियोरन ते तैसरु नोंव मुबारक भोए | 50 तैसेरी दिया तैस कैरां डरने बालन पुड़ पिडी पिडी तग्र रहचे | 51 तैनी एपनी पैखडी सैहीं अजीब कम्मा कियोरन जैन अपनो आप बडो समझते थिये तैनी तैन तित्र बित्र किये | 52 तैनी बादशाह तैनकेरी गैदी पुडेरां उन्हे बछाँडे ते जैन कमजोर थिये तैन खडे किये | 53 तैनी नियन्ने रोडी रोडी चिजैइं सैहीं रजाने ते धन दौवलती बाले खाली हथेइं भेजे | 54 तैनी अपने सेवक ईसाएल एपु तियार कियो एपनी दियारी तैस यादगारी मां | 55 जैसेरो तैनी इशै बोव दादे ते अब्रहामे सैहीं ते तैसेरी ओवलाधी सैहीं वैहिधौ कियोरो

थु: ते तैसेरी दिया तैन पुड़ हमेशां तग्र भोंती रहली | 56 ते मरियम कोई ट्लाई मिहींने तग्र अलशिबाही सैहीं साथी राही ते फिरी अपने घरजो आई |

यूहन्ना बपतिस्मो देने बालेरु ज़रम

57 ते अल्शिबारो गलल्हे बिशनेरो मोको एजी आव ते तैस मठतु ज़रु | 58 तैसारे असेपासरे रिशतेदारेइ एन शुनुं की परमेशरे तैस पुड़ बड़ी दिया कियोरिये तैससैहीं साथी खुशी मनई | 59 अट्टावं दिहाड़े तैन मठठेरी सुनत करने आए ते तैसेरु नोवं तैसेरे बौवेरे जाक्रियारे नोवं पुड़ रखनु चहते थिये | 60 पण तैसेरी अम्मा ज़ोने लगी नैइ एसेरु नोवं युहन्ना भोल्लु | 61 लोक तैसजो ज़ोने लगे तुशी खानदेंनी मां कोई भी एस नोवेंरो नैइ | 62 तैखन तैनी लोकेइ जाक्रीयाये पासे इशारे सैहीं पछु की तू मठेरु नोवं कुन रखनु चहते? 63 जाक्रीयाये पटारी मगी ते तैस पुड़ लिखु की एसेरु नोवं युहन्नाएं ते सभ लोक हेरांन रेहीजे | 64 तैखने तैसेरी ज़बान खुली ते जाक्रिया गल्लां लगे करने ते परमेशरेरी तारिफ करने लगे | 65 अपने असेपासरे लोक एस तमाशे हेरतां हेरांन रेहिजे ते युहूदीयेरे पहाडी अलाकंन मां एस गल्लरी चरचा भोने लगी | 66 ते शुन्ने बाले हेरांन रेहितां सोचते थिये की एन मडु बडु भोइतां कैरु भोनुएं किजोकी परमेशरेरी आत्मा अज़ेरी देंती तैस्सेहीं साथिये?

जकरयारु स्तुति गीत

67 तैखन तैसरो बाजी जाक्रिया पवित्र आत्माइ सैहीं भरोऊ ते नबुत करने लगे |

68 ईसाएलेरे परमेशरेरी तारिफ भोए किजोकी तैनी एइतांअपने लोकन नजात दितोरिये | 69 ते अपने दास दाऊदरे घराने मां अक बडो तकतबर खास नबी भेजोरिए | 70 ज़ैचरे तैसेरे पाक नेबी केरे जिरये जेवरु थु: ज़ैन शुरु कैरां देंते भोते एवरन | 71 ताके असां अपने दुशमन कैरां ते बैर रखने बालन कैरां छुटम | 72 ते तै ईशे बौव दादे पुड़ दिया केरे ते अपनो पाबित्र वैहिधे याद केरे | 73 तै कसम ज़ै तीं ईशे बौव दादे अब्रहामे सैहीं कियोरी थी | 74 की तै असन हिमत दैल्हो की असां अपने दुशमन कैरां बेची सखम केंची भी डरेरां बगैर | 75 ते परमेशरेरी अराधन सैरी उमरी सचूचरे दिले सैहीं केरते रहल | 76 ते एह मट्टा तू परमेशरेरो भगत भोल्लो किजोकी तू परमेशरेरे अगरी अगरी चेलतां तैसेरी बत्तां तियार केरल्हो | 77 ताके तैसेरे लोकन तैस मुखतरु ज्ञान दे ज़ैन पापां केरी मैफारे लेई मैल्हते | 78 ईशे परमेशरेरी तैस बेडी दियाइ सैहीं अक बडो रोडो दिहडो निस्नोए | 79 ताके तैनकेरे लेई ज़ैन आंधरे ते मौऊतरी छेहोई मां बिशोरेंन तैन अक बडी लौ दे ते ईशे पांवन ज़िंदगरी बत्तां लागे | 80 तैन मडु बेडोंतू जेवं ते आत्माइ मां बधतू जेवं ते ईसाएले मां बांदे भोनेरे दिहैडी तग्र बियाबांने मां राहू |

यीशु एरु ज़रम

(मत्ती 1 : 18 - 25)

2 तैन दिहैडन मां कैसरहे गैसतुस बादशाहे एलांन कियेरु थु: की रूमी हुकूमती मां रहने बाले सारे लोक अपन अपन नोवां लिखांन | 2 एह पैहिली शुरुआत थी ज़ै सुरयेरे हाकम रेनुएसएरे ज़माने मां भुई | 3 ते सारे लोक अपन अपन नोवां लिखाने अपने अपने शहर जे चले जे | 4 युसफ भी गलिलेरे शहर नसरते मैरां युहूदिये मां दाऊदरे शहर बैतलहंमे मां जो चलो किजोकी तै दाऊदरे घरानेरी ओवलाधी मैरां थु | 5 ताके तैडी एपनी कौन्श मरियमी सैहीं साथी जे दोज़िती थी नोवं लिखाए | 6 जैईस तैन बैतलहंमे मां पूजां त मरियमी गल्लहे बिशनेरो मोको आव | 7 ते तैस पैहिलु मडु ज़रु ते तैनी तैन फैल्हडी मां पलेटतां गाल्ही क राखु किजोकी तैस ध्रमशाली मां कोंच ठार न थी मैल्होरी |

फरिश्तां केरो पुहालण बिसतार

8 किछ पुहाल राती एकी ड्लबडे मां गब्बां केरो पैरहो केरते थिये | 9 त परमेशरेरो सुवर्गदूत तैन क बांदो भोव ते परमेशरेरी लौ तैनकेरे चौरवे पासन बलने लगी त तैन डेरी जे | 10 पण सुवर्गदूते तैन जो ज़ांव:डरा न किजोकी आंव तुसन अक बडी खुशखबरी शुनने एवरोइ ज़ै खुशी सैरी कौमरे लेइ

भोल्ली | 11 की अज़ दाऊदरे घराने मां अक मुखती देने बालो पैइदा भेवरोए येनी यीशु मसही परमेशर | 12 ते तैसेरो तुशे लेइ एह नशान भोल्लो की तुसन अक मडु फैल्हडी मां पलेट्टेरु गौरु केरी गाल्ही क मैल्हेलु | 13 तैखने अम्ब्रे मैरां खासे सुवर्गदूत बांदे भुए ते तैन परमेशरेरी तारिफ केरने लगे ते एन ज़ोने लगे |

14 परमेशरेरी तारिफ भोए ते जमिनी पुड़ तैन मैन्हुं ज़ैन पुड़ तै खुशै सदा शांती मैल्हे |

15 ज़ैखन सुवर्गदूत पुहालां केरे सांमने वापस अम्ब्रे मंजो चले जे त पुहाल एपू म्मैइ ज़ोने लगे एजा अस बैतलहंमे मां गहंम ज़ैलहेरो बिस्तर परमेशरे असन दितोरिए तैस हेरम | 16 एलहेरलेई तैन लुशी तैड्डां चले जे ते तैडी पुजे त सचूचरे तैडी मरियम युसफ ते निकडो बच्चो फैल्हडी मां पलेट्टेरो गौरु केरी गाल्ही क मैल्हु | 17 ते पुहाल एन हेरतां ज़ैन तैनेइ एस मठैरे बारे मां ज़ोवरी थी तै गल बडी मुशुर भोई जेई | 18 पुहालां केरी गल्लां शुनतां सारे लोक हेरांन रेहीजे | 19 पण मरियम सैरी गल्लां अपने दिले मां रेखतां सोचने लगी | 20 ते पुहालन ज़ैचरे तैनी सुवर्गदूते ज़ेवरु थु: तैनेइ एपनी एछेइ तैन सभ किछ लैहीतां परमेशरेरी तारिफ केरते वापस घर जो चले जे |

यीशु एरु नोवं रखनु

21 अट्टावं दिहाड़े ज़ैईस तैसेरो सुन्तीं बशाल्नेरो मोको आव त तैसरु नोवं यीशु रखु एन तैन नोवं ज़ैन सुवर्गदूते मरियमरे दोज़िते भोने कैरां पैहीले रखेरु थु |

मन्दरे मां यीशु एरु अर्पण

22 ज़ैखन मुसैरी रसमरे हिसाबे सैहीं तैसेरे शुच्चे भोनेरे दिहाड़े पुरे भोए त युसफे त मरियमां यीशु योरोशल्लंमे मांजो निह्यो ताके तैस परमेशरे क पैश केरम | 23 ज़ैचरे परमेशरेरे बचने मां लिखेरुए की सारां पैहिलां मट्टां परमेशरे लेइ पबित्र भोल्लां | 24 ज़ैचरे परमेशरेरे बचने मां लिखेरुए की अक जोडी कैम्री केरी ते अक जोडी कबुतरां केरे दुई बच्चे सुखनरे लेइ आन्ह

शमौनेरु गीत

25 तैईस युरोशल्लंमे मां अक मैन्हुं थु: तैसरु नोवं शुमौन थु: तै बडो रोडो मैन्हुं थु: कने परमेशर मन्ने बालो थु: ते ईसाएली लोकन रोडी बत्तां हेरने चहतो थियो ते तैस मां पबित्र आतमां थी | 26 पबित्र आतमां तैस जेवरु थु: की ज़ां तग्र तू परमेशर यीशु मस्ही न लाहेल्हो मरेल्हो न्न | 27 शामुनं रुहांनी शेक्ती सैहीं हेकाली मां अव तैखन यीशु भी तैसेरे हाज बोवेइ अत्र अन्होरो थु, की तैसेरी सुन्त कमां | 28 ता शामुने यीशु कुंमे मां टलातो ते परमेशरेरी तारिफ केरने लगे | 29 एह परमेशर तीं ज़ै अपनो वेहीधो कियोरिए अपने दासे खुशी सैहीं भेजतस | 30 किजोकी मेरी एछेइ तेरी मुखती लाहोरिए | 31 ज़ै तीं सैरी कौमा केरे सांमने तियार कियोरिए | 32 तै गैर युहूदी केरेलेइ लौ देंने बालो दिहाडो ते तेरी ईसाएली कौमरे लेइ अक बडी लौ बनेल्ही |

हन्नाहारी गुवाही

33 यीशुएरे अम्मा बाजी ऐन गल्लां शुनतां ज़ैन यीशुएरे बारे मां केरते थिये जुगती सैहीं शुन्ने लोरे थिये | 34 तैखन शुमौने तैस ब्रकत दिती ते तैसेरी अम्मा मरियमी ज़ांव:हेरा इही गल पक्कीए की एन मडु ईसाएले मां बडे लोकांकेरे खिरकने बाले ते उठने बालां केरे लेइ एह अक एरहो नशान भोल्लो की ज़ैसेरे खलाफ लोक गल्लां केरेल्हे 35 ताके बडे दिलां केरी गल्लां खुली गैनिण ते गंमेरी तलवारां तेरी जान भी ज़खमी केरनीए | 36 तैडी अक कौन्श थी ज़ै रुहांनी गल्लां केरती थी तैसारु नोवं हन्न थु: तै आशररे खानदेंनी मैरां अक मैन्हुं ज़ैसेरु नोवं फ़नोवएल थु: हन्न तैसेरी कुई थी तै बडी बुडी थी तै अपने डलाहेरां बाद सात साल अपने मुशै सैहीं साथी रहोरी थी | 37 तै रन्डी थी तैसारी उमर चूरासी साल थी तै मन्दिरेरे मैरां न थी गहती ते रात दिहैडी ब्रतां रखती ते दुवां प्राथन केरती रहती थी | 38 तैखन तै भी तैडी एइतांपरमेशरु शुकर केरने लगी ते तैन सभ ज़ैन युरोशल्लंमे गुलेमी कैरां छुटनु बलगाते थिये तैस मठैरे बारे मां गल्लां केरने लगी |

नासरते जो वापिस एज्जु

39 जैखन मरियम त युसफे रसमारे मुतबक यीशुएरी सुन्त कमाई त तैन गलिले मैरां अपने शहरे नसरते मैझो जे | 40 तैन मडु बडांतू जेवं अकलमद भांतू जेवं किजोकी परमेशरेरो तैसपुड बडो अनुग्रे थु |

बच्चो यीशु मन्दरे मां

41 यीशुएरे अम्मा बाजी हर साल बडी दिहाडी बनने युरोशलमें मां गहते थिये | 42 जैखन यीशु बहरे सालां केरो भोव त तैन बेडी दिहेडारे लेइ फिरी युरोशलमें मां जे | 43 जैखन बडी दिहाडी बिती जेई त यीशुएरां अम्मा बाजी वापस घरजो आं त मडु युरोशलमें मां रेही जेवं ते तैसेरे अम्मा बाजी कोई पत्तो न थु | 44 तैनेइं बुझू की यीशु होरी मैन्ह सैहीं अगरों जेवरोए ते तैन अपने रिशतेदारन ते दोस्तन मां तोपने लगे | 45 जैखन तैन यीशु न मैन्नो त तैना वापस तोपते तोपते यूरोश्मामे मां पुजे | 46 टलेइयवं दिहाडे तैनेइं यीशु हेकली मां सियांने लोकन सैहीं गलबात केरतो ते तैन सैहीं सुवाल जुवाब केरतो मैल्हो | 47 जैना लोक तैसेरी गल्लां शुन्ने लोरे थिये तैन यीशुएरी गल्लां शुनतां हेरांन रेहीजे | 48 जैखन तैसेरे हाज बाँवेइं यीशु लाहू त तैना हेरांन रेहीजेयां तैनेइं जाँवः मट्टा तीं असन सैहीं एन कुन कमावं? तेरां हाज बाँव तीं तोपते तोपते परेशान भाई जेअं | 49 यीशु तैन पुछने लगे तुस मीं किजो तोपने लागेरे थिये? तुसन पत्तो नैइं की मीं अपने बाजेरे घरे मां रहनुं ज़ारुरी थु | 50 पण तैनेइं न बुझू की एह असन सैहीं कुन लोरोए ज़ाँने | 51 तैखन तैन अपने अम्मा बाजी सैहीं साथी नसरते मां आव ते अपने अम्मा बाजी क राहू ते मरियमां ऐना सैरी गल्लां अपने दिले मां रेखी |

52 यीशु अकली मां भी ते कदे मां भी बेडांतो जेव ते परमेशरेरी ते ईनसानेरी नज़री मां मुशुर भाँतो जेव |

युहन्ना बपतिस्मो देने बालेरो बिसतार

(मत्ती 3 : 1 - 12 ; मरकुस 1 : 1 - 8 ; यूहन्ना 1 : 19 - 28)

3 कैसर तिबरीसैरी हुकुमतरे परनोवं साले जैखन पुन्तियुस पिलातुस युहुदियेरो गुवर्नर थुः ते गलिले मां हिरोदेसं नोर्वेरो चैवरोवं ते तैसरो दूलाह फुलपुस एतुरिया ते तिरखोनीतिसेरो ते लिसनियास अबिलनेरो हाकम चौवरोवं हिस्से पुड हुकुमत केरतो थु | 2 हन्ना ते कैईफा तैस साल पुरैहुत थिये तैईस परमेशरेरो बचन ज़ाक्रियएरे मड्डे युहन्ना पुड नाज़ल भेवरो थु | 3 ते युहन्ना यरदनेरे सैरी असे पासेरे अलाकन मां गेहितां पापां केरी मैफरो तोबा केरनेरे लेइ ते बपतिस्मोरे प्रचार केरने लगे | 4 जैचरे यशयाह नेवं बचनेरी कितबी मां लिखेरुए की बियाबांने मां फुकरने बालेरी अवाज़ एईचे की परमेशरेरी बत्त बनाथ ते तैसेरी बत्तां पैठी केरा |

5 डुघी ठारां सैरी भेरोइ गैनिण हर अक पहाड़ उन्दु घिसनुएं ते जैना टलेडी बत्तन तैना सीधी केरनीण जैना उन्दीं उबरीन तैना सीधी केरनीण |

6 ते हर अक मैन्हं परमेशरेरी मुखती हेरेल्हो |

7 ते युहन्ना तैन लोकन जैना जथन मां तैस कैरां बपतिस्मों नैणे एवरे थिये त युहन्ना तैन सैहीं जोतो थुः एह सप्येरे बचाव तुसंन केनी जाँवःकी एजने बालाव लुशी नशा | 8 बस्सा तोबा केरा ते अपने लेइ फल तियार केरा ते अपने दिले मां एन न जाँवःकी अब्रहाम इशो बाँवए किजोकी आंव तुसंन सैहीं जोतां की परमेशर इन घोडन मैरां अपने लेइ आव्लाध पैइदा केरी सखते | 9 ते हुन्ना त बूटेरे ज़ीलन पुड मैक्कू रखरोए बस्सा जै बूट रोडो फल न दे ते कटनोएं ते अगी मां छडनोएं | 10 लोकेइं तैस पुछू फिरि असां कुन केरम? 11 युहन्ने तैन सैहीं जाँवःकी जैस क दुई कुर्तेन त अक कुरतो तैस देथ जैस क अक भी नैइं ते जैस क रौट्टीए आहे ते तै भी रौट्टी बंटे | 12 ते चुंगी नैणे बाले भी बपतिस्मों नैणे एवरे थिये तैनेइं तैस पुछू की एह गुरु जी असां कुन केरम? 13 तैनी तैन सैहीं जाँवःजैन तुशे लेइ केनुणी हक रखेरुए तैस कैरां जादे न नैहीयथ | 14 ते तैखन होरी सिपेहीएइं भी तैस पुछू की असां कुन केरम? तैनी तैन सैहीं जाँवःकी केची पुड जुल्म न केरथ ते न केची कैरां बैहक न नैइयथ पण एपनी तनखुवाही पुड गुज़ारो केरथ |

15 तैखन लोक खुशी थिये ते सभ लोक अपने दिले मां युहन्नेरे बारे मां सोचते थिये की जै एवरोए तै मस्सहीए की नैइं | 16 त युहन्ने तैन जुवाबे मां तैन सैहीं जाँवःकी आंव त तुस्न पैंनी सैहीं बपतिस्मों देताइं पण जै मीं कैरां जादे ज़ोरे बालोए तै एजने बालोए आंव तैसेरी जुट्टो तसमो भी खोलनेरे कबल नैइं ते तै तुस्न पवित्रात्माइं ते अगी सैहीं बपतिस्मों दैल्हो | 17 किजोकी छज तैसेरे हथे मां हें ते तै अपनुं अण रोडे चारे बातेइंतां ते गैहू अपने कौठारे मां रखेल्हो पण झाझ तैस अगी मां फुकैल्हो जै हिश्रेरी न भोल्ही |

18 बसा तै बडे रोडे चारे लोकन समझैइंतां परमेशरेरी खुशखबरी शुनतो राहु | 19 हिरोदेस चौवरोवं मुल्खे पुड बादशाही केरतो थुः ते युहन्ने तै ठाकोरो थुः की हिरोदेसं अपने दूलाहरी फिलपुसैरी कौन्श हिरोदियास जै थी तैस सैहीं डूलाहा कियोरो थुः ते होरी भी बेडी गैलती कियोरी थी | 20 तैनी एह सैभन कैरां जादे बुरी हरकत की की युहन्ना कैद केरतां छडो |

यीशु एरो बपतिस्मो

(मत्ती 3 : 13 - 17 ; मरकुस 1 : 9 - 11)

21 जैखन सभ लोक बपतिस्मों नैणे लोरे थिये त यीशुए भी बपतिस्मों नियो ते जैखन तै दुआ लोरो थुः केरने त एरहू भोवं की अम्बर खुली जेवं | 22 ते पवित्रात्मा कुबुत्तेरी शकली मां यीशु पुड उतरी ते अम्बर मैरां ईही आवाज़ अई की ऐन मेरु ट्लारु मड्डू आंव ऐस पुड खुशीं |

यीशु एरी खानदानी

(मत्ती 1 : 1 - 17)

23 जैखन यीशुए अपनु कम शुरु कियुं त तैसेरी ऊम्र टलही साल थी ते जैन्चरे बुझाँतू थुः की एन युस्फेरु मड्डूए | 24 ते तै मत्तेरो ते तै लेवेरो ते तै मल्कियेरो ते तै यानियएरो ते तैन युस्फेरु मड्डू थु | 25 ते तै मत्तित्याहरो ते तै आमोसेरो ते तै नहुंमेरो ते तै असल्याहरो ते तैन नैगहेरु मड्डू थु | 26 ते तै मत्तेरो ते तै मत्तित्याहरो ते तै शिमेरो ते तै योसेखेरो ते तैन योदेरु मड्डू थु | 27 ते तै युहन्नेरो ते तै रेसेरो ते तै ज़रुब्बाबिलेरो ते तै शालतियेलरो ते तैन नेरीरु मड्डू थु | 28 ते तै मलकीयेरो ते तै अदीयेरो ते तै कोसामेरो ते तै इल्मोदामेरो ते तैन एडेरु मड्डू थु | 29 ते तै येशुएरो ते तै इलाजारेरो ते तै येरीमेरो ते तै मत्तेरो ते तैन लेवेरु मड्डू थु | 30 ते तै शमोनेरो ते तै यहूदाहरो ते तै युसुफेरो ते तै योननेरो ते तैन इलयाकीमेरु मड्डू थु | 31 ते तै मलेआहरो ते तै मिन्नाहरो ते तै मत्ताएरो ते तै नातानेरो ते तैन दाऊदेरु मड्डू थु | 32 ते तै यिशैरो ते तै हेबेदेरो ते तै बोअजेरो ते तै सलमोनेरो ते तैन नहशोनेरु मड्डू थु | 33 ते तै अम्मीनादाबेरो ते तै अरामेरो ते तै अरामिरो ते तै फारसेरो ते तैन यहूदहेरु मड्डू थु | 34 ते तै याकूबेरो ते तै इसहाकेरो ते तै अब्रहामेरो ते तै तिरहेरो ते तैन नाहुरेरु मड्डू थु | 35 ते तै सरुजेरो ते तै रुउरो ते तै इलिजेरो ते तै एबिरेरो ते तैन शिलहेरु मड्डू थु | 36 ते तै केनानेरो ते तै अरफक्षदेरो ते तै शोमेरो ते तै नहरो ते तैन लिमिकेरु मड्डू थु | 37 ते तै मथूशिलहेरो ते तै हनुकेरो ते तै यिरिदेरो ते तै महललेरो ते तैन कनानेरु मड्डू थु | 38 ते तै एनोशेरो ते तै शेतकेरो ते तै आदमेरो ते तै परमेशरेरु मड्डू थु |

यीशु एरी आजमैइश

(मत्ती 4 : 1 - 11 ; मरकुस 1 : 12 , 13)

4 फिरी यीशु पाबित्र आतमाइं सैहीं भेरतां यरदने मैरां वापस अव त चैलल्ही दिहाडे आतमांरे जौने सैहीं बियाबांने मां चलो जेव | 2 ते शैतांन तैस अज़मांतो राहू तैन दिहेडन मां तैनी किछ न खावं पीवं ते जैखन तैना दिहाडे पुरे भुए त तैस दूलुख लगी | 3 ते शैतांने तैस जो जाँवःकी अगार तू परमेशरेरु मड्डुस त इन घोडन जो जो की ऐना रौट्टी बन्न | 4 यीशु तैस जुवाब दितो की लिखेरुए की मैन्हं सिर्फ़ रौट्टेइं सैहीं ज़िंतो न राहे | 5 ते शैतांन तैस एकी ऊचे पहाडे पुड घीनतां जेव ते तैड्वां दुनियारी सैरी बाद्शैही हेरेई | 6 ते तैनी जाँवःकी एह सभ एखतियार मिंए ते एसेरी सारी शान शोकत आंव तीं दैल्हो एन मेरे स्पुदें आंव जैस चहतां तैस देई सखतइं | 7 बस अगार तू मीं क माथो टेकेल्हो त एन सभ किछ तेरु भोल्हु | 8 यीशुए तैस जुवाब दितो की लिखेरुए की तू सिर्फ़ अपने परमेशरे क मथो टेकं ते सिर्फ़ अपने परमेशरेरी

सेवा केरां | 9 ते यीशु मन्दिरेरी चौटी पुड नैहीतां खडो कियो ते तैस सैहीं जाँवःकी अगर तू परमेशेरु मडुस त अपनो आप इठां ऊन्ढौं बछौड | 10 किजोकी लिखेरु ए की आंव तेरे लेइ अपने फरिश्त जोलहो ते तैना तेरी हफाजत केरेलहे किजोकी लिखेरु ए की आंव तेरे लेइ अपने सुवर्गदुतन जोलहो ते तैना तेरी हफाजत केरेलहे | 11 ते एन भी आहे की तैन तीं अपने हथन पुड छुलहे किजोकी मत्ता तेरे पांउन घोडन सैहीं ठोकर लगे | 12 यीशु तैस जुवाब दितो की परमेशेरु जाँनुएं की तू अपने परमेशेरी अजमैईश न केरां | 13 जैखन शैताने अपनी सारी अजमैईश परखी त किछ चीरे तैस केरां दूर भोइजेव |

यीशु एरे सेवारु कम्म शुरु

(मत्ती 4 : 12 - 17 ; मरकुस 1 : 14 , 15)

14 फिरी यीशु पबित्र आतमाइं सैहीं भरपुर भोइतां गलिले जो चलो जेव ते सारे अलाके मां तैसेरी मुशुरी भोइ जेइ | 15 ते तै तैनकेरे मन्दिरेण मां तलींम देतो थुः ते सभ लोक तैसेरी तारिफ केरते थिये |

नासरते मां यीशु एरु अनदर

(मत्ती 13 : 53 - 58 ; मरकुस 6 : 1 - 8)

16 ते फिरी तै नासरते मां आव जैडी तै पल्लौरो थुः ते अपने मोके पुड सव्तेरी दिहेडी तै प्राथन भवने मां जेव ते वचन पडनेरे लेइ खडो भोव | 17 ते यशायाह नेबेरी कितब तैस दिति ते तैनी खोलता तै वचन कढौं जैडी लिखेरु थुः की |

18 परमेशेरी रुहु मीं पुढे एल्हेरेलेइ की तैनी आंव गरीबन परमेशेरी खुशखबरी शुननेरेलेइ चुनोरोइ की तैनी आंव भेजोरोइ की कैदन हथरां छेडीं ते कना केरी एछन ठीक भोनेरी खबर शुनेइं ते मसिबतरे लोकन आजाद केरीं |

19 ते परमेशेरी एज्जे बाले सालेरी खबर शुनेइं | 20 फिरी तैनी तै कितब बंद केरतां अपने चले क वापस देइतां बिशी जेव ते जैतरे प्राथन भवने मां थिये सभ तैसेरां तकते थिये | 21 तै तैन सैहीं जाँने लगे की अज तैन शर्त तुशै सामने पुरु भोवं | 22 ते सैभेइं तैसेरी शहादत दिति ते तैन पुड परमेशेरी मेहेरभनीए जैना गल्लां तैस्केरां शुनते थिये हेरांन भोइतां जाँने लगे की एन तैन युसफेरु मडु नैइं | 23 ते यीशु तैन सैहीं जाँने लगे की एह तमसिल मीं सैहीं जुंरु जोलहे की एह बेईद जी अपनो आप त ठीक केर जेन किछ असैइं कफरनहुमें मां केरतु शुनेरुए इडी अपने मुलखे मां भी केर | 24 ते तैनी जाँवःआव तुस्न सैहीं सचच जाँतां की कोई भी नबी अपने मुलखे मां इज्जतदार न भोए | 25 ते आंव तुस्न सैहीं सचच जाँतां की इलियारे जमाने मां जैखन साडे टलाई साल अम्बर बंद राहूं ते एडी तग्र की सैरी मुलखे मां बडो अकाल पैई जेव ते बेडी रेंडी कौन्शां इस्त्राएले मां थी | 26 पण इलिया तैन मैरां केंची क नैइं पण सैइदरे मुलख सारपत शाहरे मां एकी रेंडी क भेजो | 27 ते अलिशिया नेबेरे जमाने मां इस्त्राएले मां बडे कौढी थिये पण तैन मैरां कोई भी कौढे केरां न छुटो पण सिर्फ अक नमान कौढे केरां अजाद भोव | 28 जैतरे लोक प्राथन मन्दिरे मां थिये एना गल्लां शुन्तां सरकी सैहीं लाल लाल भोइ जे | 29 ते खडे उठतां तैस शहरे केरां बेइर निसे ते तै तैस पहाडेरी चौटी पुड घिनतां जे जैस पुड तैनकेरो शहर अबाद थुः तके तैस तैठठां उन्ढे बछौडम | 30 पण तै तैन मैरां निसतां चलो जेव |

दुष्टातमाई बालो मैन्हु बझानां

(मरकुस 1 : 21 - 28)

31 फिरी तै गलिलेरे शहर कफरनहुमें मंझो जेव ते सबतेरी दिहेडी तैन तालिम देंने लगेरो थु | 32 ते लोक तैसेरी तालिमी केरां हेरांन रहते थिये किजोकी तैसरो वचन बडो भरी थु | 33 ते प्राथन भवने मां अक मैन्हु थुः जैसमां बुरी आतमां थी तैनी बडे जेरे सैहीं चिड मारी | 34 एह यीशु नसरी तीं असन सैहीं कुन कम्मे कुन तू असन मारने एवरोस आंव तीं जानतां की तू कौन्स तू परमेशेरु पाबित्र मडुस | 35 यीशुए तैस झीडक देइतां जाँवःचुपरह ते एस मैरां दुशट अतमां निसी गाह एनु जाँने सैहीं दुष्ट आतमां तैसमैरां चुप

चारे निसी जेई | 36 ते सभ लोक हेरांन रेहितां एपु म्महेइं जाँने लगे की एन कैरु वचने की तै कोस अख्तियारे सैहीं दुशटात्मान हुकम देते ते तैना तैसमेरां निसी गैहीचन | 37 ते सारे मुलखे मां चैवरे पासन तैसेरी अखुवा फैली जेई |

पतरसेरी शिख ते होरे लोक बझाने

(मत्ती 8 : 14 - 17 ; मरकुस 1 : 29 - 34)

38 फिरी तै प्राथन भवने मैरां उठतां शुमौनेरे घरे जेव ते शुमौनेरी शिख भुखारे सैहीं बडी बिमार भवरी थी ते लोकेइं तैसारे लेइ यीशु सैहीं जाँवं | 39 तै खडो भोइतां तैसारे पासे फिरो ते बिमारी झीडकी त बमारी निसी जेई ते तै तैखने तैन्केरी सेवा केरने लगी | 40 ते दिहाडी डूबने तग्र तैना सभ लोक जैन मां रंग बरेंगी बिमेरी थी तैस क आन्हते थिये ते यीशु तैन पुड हथ रेखतां तैना सभ बझाए | 41 ते दुष्ट आत्मां भी चिडां मैरती थी ते जोती थी की तू परमेशेरु मडुस ते बडे लोकन मैरां दुष्ट आत्मा निसी जेई ते तै तैन झडकतां तैन गल न थुः देतो केरने किजोकी तैन जैनती थी की एह मस्हीए |

इबादत खान्न मां प्रचार केरनो

(मरकुस 1 : 35 - 39)

42 जैखन झेझ भोई त तै तैड्यां निसतां एकी बेरांन ठैरी जेव ते पतारां सारे लोक तैस तोपते तोपते तैस क पुजे ते रोकने लगे की तू असन केरां न गा | 43 यीशुए तैन सैहीं जाँवःमीं होरी शहरन मां भी परमेशेरी खुशखबरी शुननिएं जरुरीए किजोकी आंव एल्हेरेलेइ भेजोरोइ | 44 ते तै गलिलेरे मन्दिरेण मा प्रचार केरतो राहु |

पेहिले चले कुजाने

(मत्ती 4 : 18 - 22 ; मरकुस 1 : 16 - 20)

5 एकी दिहाडे यीशु गनेसरतेरे डल्हेरे बन्ने खेडहोरो थुः ते बडे लोक तैसका परमेशेरु वचन शुन्नेरे लेइ दौवडते थिये | 2 तैनी दुई किशती बन्ने लेगोरी लैही मैछली टलाने बाले किशती डलेखी छैडतां जालां धौने लगारे थिये | 3 यीशु एकी किशती मां चैढी जेव ते किशतरे मालके शुमौने सैहीं जाँने लगे तुस किशती ईठां नैइतां होरी ठैरीलाथ ते फिरी तै किशती मां बिशतां तैन लोकन तालिम देंने लगे | 4 जैखन तैनी तालिम शुनाई त तै शुमौने सैहीं जाँने लगे तुसां किशती डुघी ठैरी चलाथ ते मैछली केरेलेइ जाल छडा | 5 शुमौन आगरां कुन जुवाब देते हे गुरु असैइं सैरी राती त्रले कीयोरेन ते अक मछली भी नैइं टलेइयोरी पण असा तेरे जाँने सैहीं जाल छडतम | 6 आखर कर तैनेइं जालां छेडी दीतां ते एनी मैछली जालन मां लेगी की जालां खीचोने न लगां | 7 तैखन तैनेइं होरी किशती बालन जो इशारे कियो की एजा इशी मद्दत केरा ते तैना भी आए ते दुइए किशती मैछलेइं सैहीं एनी भेरोई जेई की किशती डूबने लेगी | 8 शुमौन पतरसे एन हेरतां यीशुरे पांऊन पुड पैइतां जाँने लगे एह परमेशर आंव पापी मैन्हुइं तुस मीं केरां दूर भोथ | 9 गल्ल एह थी की ते त तैसेरे साथी एनी मैछली लैहितां हेरांन भोई जेवरे थिये | 10 एहे हाल जेबदेरे मड्यां केरो याकुबेरो त युहन्नारो भी थुः जैना शुमौने सैहीं साथी थिये यीशु शुमौने सैहीं जाँने लगे डरा न्ना अजैरे बाद तु मैन्हु टलालहो | 11 तैनेइं किशती डलेखी एन्हतां लेइ ते अपनु सभ किछ छैडतां यीशु पती चले जे |

कोढी बझानो

(मत्ती 8 : 1 - 4 ; मरकुस 1 : 40 - 45)

12 एकी बार तै तैस अलाकेरे एकी शहारे मां थुः ते एरु भोवं की अक मैन्हु थुः जैसेरे सैरी जानी कौढ थुः तैनी यीशु लाहु त पांउन पुड पैइतां जोउले हथ केरतां जाँने लगे एह परमेशर तुस चहथ त मेरु कौढ साफ केरी सखतथ | 13 ते यीशुए अपनो हथ तैस पुड रखो ते जाँवःआंव चहतां की तेरु कौढ साफ भोए ते तैखने तैसरु कौढ साफ भोई जेव | 14 तैखन यीशुए तैस मैन्हु जाँवःएह गल केंची सैहीं न जोइयां पण तू सीधो पुरैहुत्न क गैहितां ते अपनो आप तैन हेरेइयां ते तै रसम भी साथी नैहीयां जै मुसे नेबे रखोरी थी तके

लोकां केरे लेइ अक शहादत भोए। 15 पण यीशु केरे बारे मां सैभन पतो लगे ते लोक दुबेरां देते एजने लगे तके यीशुएरी गलां शुन्म कंने एपनी बिमैरी भी मुकाम। 16 पण यीशु जादे केरतां बेरान ठैरी चलो गहतो थियो ते दुआ केरतो थियो।

आधरंगी बझानों

(मत्ती 9 : 1 - 8 ; मरकुस 2 : 1 - 12)

17 एकी दिहेडीहेडी एरु भोवं की यीशु ज्ञान शुनाने लगेरो थियो ते तैखन किछ फिरसी तैडी आए तैन जो धर्म गुरु ज्रोते थिये तैना ते युहूदियेरे सैरी अलाकंन मैरां युरोशलमे मां एवरे थिये ते परमेशरेरी कुदरुत यीशु सैही थी की बिमार बेझोइतां गहते थिये। 18 किछ मैन्हेंइ अक अधरंगी मैन्हुं खटी पुड़ छूइतां आन्होरो थु: ते कोशीश लगे केरने की एस अंत्र नैहितां यीशु क पुजाम। 19 पण अंत्र एनी तंगी थी की तैना अंत्र न गैही बटे फिरी तैनेइ लाए पुड़ गैहितां ला पुटू ते खटांसने तै अधरंगी मैन्हुं अंत्र यीशु केरे तुत्रे अगर हेसाल्हो। 20 यीशु तैसरो विशवास हेरतां जोंव: मिट्ला तेरे पाप माफ भुए। 21 धर्म गुरु ते फिरी लोक सोचने लगे की एह कौन मैन्हुं जै झुट जोते परमेशरेरे बगैर कौन पाप माफ केरी सखते? 22 यीशुए तैनकेरी गलां बुझी ते तैन जुवाब दितो तुस अपने दिले मां एरही गलां किजेई सोचतथ? 23 एन जौनु कुन सुखतुए की तेरे पाप माफ भुए या एन जौनु की तु चल हुंन? 24 पण तुसन पत्तो लगे की अब्ने आदमे जमिनी पुड़ पाप माफ केरनेरो अखतीयारे फिरी यीशु बिमारे जो जोंव:अपनी खट सलह ते घर जो गा। 25 तै अधरंगी बिमार मैन्हुं सैभी केरे सामने ते खडउठो ते जैस खटी पुड़ तै झुलतो थु: अपने दौगो पुड़ छुइतां परमेशरेरी तारिफ केरतो केरतो घर जो चलो जेव। 26 तैना सारे लोक हेरान राहे ते परमेशरेरी तारिफ केरने लगे कंने जौने लगे एह त असेई अज नोवीं गल लाही।

लेवी कुजानो

(मत्ती 9 : 9 - 13 ; मरकुस 2 : 13 - 17)

27 एन बितनेरां बाद यीशु तैझां नीस्से ते एकी धडत घिन्ने बाले क चले जे तैसेरु नोवं लावी थु: धडत घिन्नेरी चुबत्ती मां बिशोरो लाहु ते यीशुए तैस जो जोंव:मी सैही तू साथी चल। 28 ते तैखने यीशु सैही साथी चलो जेव। 29 ते फिरी लैवे यीशुरे लेइ अपने घरे अक बडी धाम दिती ते तैडी धडत घिन्ने बाले ते होरे भी बडे लोक थिये। 30 फिरी त तैन केरे धर्म गुरु यीशु केरे चलन सैही जौने लगे की तुस धडत घिन्ने बालन सैही साथी किजो खात्तथ पीतथ? 31 यीशुए तैन सैही जोंव:बिमारन दुवेइयरी जरुरत भोचे पण सझरे न भोए। 32 आंव पुंन्नी लोकांनैइ पण पैन् पापै केरां छुटांनैरे लेइ कुजाने एवरोइ।

बरतेरो सुवाल

(मत्ती 9 : 14 - 17 ; मरकुस 2 : 18 - 22)

33 तैतैन लोक यीशु सैही जौने लगे युहूनेरे चले त ब्रत भी रखतन ते प्राथन भी केरतन ते एन्चरे फिरी भी केरतन पण तुशे चले त खाते पीते रहतन? 34 यीशु तैन सैही जोंव:कुन लाडो साथी भोते संते जंन शोग रेखी सखतन? कधे नैइ। 35 पण तै दिहाडी भी एज्नीए की लाडो इस दुनियाइ मैरां चलो गहनोए तैईस तैना शोग बनेइ सखतन। 36 फिरी यीशु तैन अक होरी मसाल दिती की नोवुं लीगड छींदतां पुराने पुड़ टलोई न देन नता नोवीं भी छींदोचे कंने पुराने सैही ते मिले भी झा। 37 नोवं श्रबत पुरेनी मसकी मां कोई न छडे झा त नोवं श्रबते सैही मस्क भी फैटी गहचे ते श्रबत भी डुल्ली गहते ते तै मस्क भी बरबाद भोचे। 38 किजोकी नोवं श्रबत नोवीं मसकी मां भरेरु लोडते। 39 कोई मैनु परानी श्रब पीयतां नोवीं न चाहे किजोकी तै जोते की पुरानी रोडीए।

सबतेरो प्रभु

(मत्ती 12 : 1 - 8 ; मरकुस 3 : 23 - 28)

6 एकी फेरे यीशु सबतेरे दिहाडे उडारन म्मेही चलारे थिये ते तैन केरे चले गैहू केरां शिलां हथेइ सैही प्रोइतां खाने लगेरे थिये। 2 एन

लैहितां फिरी जौने लगे तुसां एन कुन केरतथ जैन सबतेरे दिहेडी न भोए केरनु? 3 यीशु तैन जुवाब दितो तुसैइ कधे नैइ पढेरु की जैईस दाऊदेरे साथी नियाने थिये त तैनेइ कुन कमेवरु थु? 4 तैनेइ कंचेरे परमेशरेरे घरे मां गैहितां चैडोरी रौड्टी खेवरी थी ते अपने सैथन भी दितोरी थी एना रौड्टी खेनी सिर्फ पुरैहूतां केरु हक भोतु थु। 5 फिरी ते तैन सैही जौने लगे परमेशरेरु महु सबतेरी दिहेडारो भी मालके।

शुकोरे हथे बालो मैन्हू बझानों

(मत्ती 12 : 9 - 14 ; मरकुस 3 : 1 - 6)

6 एकी बार यीशु प्राथन भवने मां गैहितां ज्ञान शुनेइ राहोरो थु: ते तैइस भी स्वतेरी दिहाडी थीतैडी अक मैन्हुं थु: जैसेरो देहीनो हथ शुकोरो थु:। 7 धर्म गुरु त फिरी यीशुरी ताकी मां थिये की अगर यीशु स्वतेरी दिहाडे केची बज्जालो त असन अल्जाम लंनेरो मोको मैल्होए। 8 पण यीशु तैन्केरे बारे मां सैम्झी जेव यीशुए तैस शुकोरे हथे बाले जो जोंव:खडो उठ ते तै खडो भोव। 9 तैखन यीशु तैन सैही जोंव:आंव तुसन पुछतां की सबतेरे दिहाडे भलाई केरनी रोडीए की बुराई केरनी रोडीए ब्यानु की मारनु? 10 फिरी यीशुए सैभी केरां तक्कु ते तैस मैन्हुं जो जोंव:अपनो हथ हरा तैनी अपनो हथ अगरोवं रखो ते तैसरो हथ तैखने बेज्झोव। 11 धर्म गुरन त फिरिन बडी सरक अई तैना एपु म्मेही जौने लगे असां यीशु कुन केरम?

बहरे प्रेरत ठेराने

(मत्ती 10 : 1 - 4 ; मरकुस 3 : 13 - 19)

12 तैईस एरु भों की यीशु दुआ केरने एकी पहाडे पुड़ चलो जेव ते सैरी राती दुआकेरतो राहु। 13 जैखन टलेकडोने लगे त तैनी अपने चले एपु क कुजाए ते तैन मैरां बहरे चले चुने ते तैन अक गुरु केरो दर्जो दितो। 14 अक शुमौन जैस्जो पतरस भी जोते थिये तैसरो दला इद्रियास याकूब युहन्ना फिल्पुस ब्रत्माली। 15 मत्ती तौमा हेलफेरु महु याकूब ते एकी मैईदाने मां खेडोव ते तैडी तैसेरे होरे भी चले अकोठे भेवरे थिये ते सैरी युहूदियारे ते युरोशलमेरे ते सुर ते सैइदेरे बन्ने पुडेरां बडे लोक तैडी एवरे थिये। 16 ते याकूबेरु महु यहूदा ते यहूदा असकिरयुती जै तैसरो टलुवाने बालो बनो।

तालीम देनी ते बझाने

(मत्ती 4 : 23 - 25)

17 तैखन तै तैन सैही साथी मैदाने मां खडो भोव ते तैसेरे चले भी तैडी अकोठे भुए ते सारे यहूदिया ते यरुशलमेरे ते सुर ते सैइदेरे समुन्दरेरे बन्ने बडे लोक जैना तैडी थिये। 18 एन लोक यीशु केरां ज्ञान शुन्ने ते एपनी एपनी बिमैरी तैसका बझाने एवरे थिये ते जैन लोक परछांवीं सैही दुखे मां थिये तैना भी बेज्झोए। 19 सभ लोक तैस्सेही हथ लानेरी कौशिश केरते थिये किजोकी तैस्मां शखती थी जैस्सैही तैना बेज्झोते थिये।

बरकत ते दुखेरे वचन

(मत्ती 5 : 1 - 12)

20 यीशु अपने चेलां केरे तकने लगे ते जौने लगे मुबारकथ तुस जैना गरीबथ किजोकी सुवर्गेमां बादशाही तुशिए। 21 मुबारकथ तुस जैना नियन्ने भत्तेथ किजोकी तुस रजनेथ ते मुबारकथ तुस जैना अज लेरां देतथ किजोकी तुसैही हस्नुए। 22 मुबारकथ तुस जैखन परमेशरेरे नोवेंरे वजाही सैही लोक तुसनसैही बेर रखल्हे ते तुसन भाईचारे केरां कनारे छडेल्हे ते तुशी बेजती केरले ते तुशु नोवं नशान मटेइ छडेल्हे। 23 तैस दिहाडे खुशी भोइतां उछडथ किजोकी हेरा तुशे लेई सुवर्गे मां बडो फले तैन केरे बौव दादेइ नेबन सैही साथी भी एरो जैरो बरतव केरते थिये।

24 पण अपसोसे तुसां जैना अंम्मीरथ किजोकी तुसन सभ किछ मैल्हेरुए।

25 अपसोसे तुशां तुसां जैन अज रजोरेथ किजोकी तुस नीयन्ने रहनेथ अपसोसे तुसां जैना अज हसतथ किजोकी तुसैइ लेरां देनिण तुसैइ शोग बनानोए। 26 पण अपसोसे तुसन पुड़ जैखन लोक तुसन जो भलु जौन

किजोकी तैन लोकांकेरे बोव दादेईं भी झुठे नेबन सैहीं एरहो बरतव करते थिये।

दुश्मन सैहीं प्यार (मत्ती 5 : 38 - 48 ; 7 : 12)

27 आंव तुसन शुन्ने बालन सैहीं जोताइं की अपने दुश्मन सैहीं हमदरदी केरा जैना तुसन सैहीं बैर रखतन तैन्केरु भलु केरा। 28 जैन तुसन जो बुरु ज़ोतन तुस तैनकेरे लेइ ब्रकत मग्गा जैन तुशी बैजती केरन तुस तैकेरे लेइ दुआमग्गा। 29 अगर कोई तुशे तुत्रे पुड़ एकी पासे थप्पड़ बाहे त होरो पासो भी तैसेरे पासे रखा ते अगर कोई तुशु कोट नैते त कमीज़ भी तैस देथ। 30 जे कोई तुसन कैरां किछ मग्ते त तैस देथ अगर कोई तेरो सबाब नैते त तैस कैरां वापस न मग्गा। 31 ते जैचरे तुस चहतथ की लोक तुसन सैहीं रोडु केरन तैचरे तुस भी तैनसैहीं रोडु केरा। 32 अगर तुस तैनी सैहीं हमदरदी रखतथ जैन तुसन सैहीं हमदरदी केरतन त तुशु कुन एवसाने? किजोकी बुरे पापी लोक भी अपने हमदरदी केरने बालन सैहीं हमदरदी केरतन। 33 अगर तुस तैनकेरु भलु केरतथ जैन तुशु भलु केरतन त तुशु कुन एवसाने? किजोकी बुरे पापी लोक भी अपने हमदरदी केरने बालन सैहीं हमदरदी केरतन। 34 अगर तुस तैत्रे पैइंसे देतथ जैन कैरां तुसन वापस भी मैलतन त तुशु कुन एवसाने? किजोकी बुरे लोक भी अपने हमदरदी केरने बालन पैइंसे देतन तके तैन कैरां वापस मैलहन। 35 पण तुस अपने दुश्मन सैहीं हमदरदी रखा तैन्केरु भलु केरा पैइंसे देइयथ पण तैन कैरां वापस मैलहनेरी उमीद न रखतथ एलहेरो सुगें मां तुशे लेइ अक बड़ो फले तुस परमेशरेरां मड्डां भोलां किजोकी तै परमेशर न मन्ने बालन पुड़ ते ज़ालमन पुड़ भी दीया करते। 36 जैरहो रहमदिल तुशो परमेशरे तैरहे रहमदिल तुस भी भोथ।

इलजाम न लाथ (मत्ती 7 : 1 - 4)

37 तुस होरी केंची अलजाम न लेइयथ फिरी तुसन भी होरेइं केंचे अलजाम नैइं लानो तुस होरी केंची माफ़ केरलहे त तुसन भी माफ़ भोलु। 38 तुस होरी किछ देल्हे त तुसन भी किछ दीतु गहू तुशु ब्रकतरु भांड जैचरे आंत्रेरी हाटी हिलेइतां देतां तैन भी तैचरे जैस हैटी सैहीं तुस होरी केरेलेइ मीनतथ तैस्से सैहीं तुशे लेइ भी मिनेल्हे।

39 यीशुए तैन अक मसाल दिती की कंनो कंने बत्त हेरेई सखते? कुन तैन दुईये न बिछाडन? 40 चेलो अपने गुरु कैरां बडो न भोए पण हर एकी गल्ली मां जैखन सभ शीखेलो त अपने गुरेरो जैरो भोलहो। 41 तु किजो अपने द्वाएरी एछी मां कुडो हेरत्स ते एपनी एछी मां कंडेल न लैहीयोए? 42 तु अपने द्वाए केंचरे जोइ सखतां की तेरी एछी मैरां कंडेल कैडीं? हे लोकव पैहीले एपनी एछी मैरां कंडेल कढ फिरी अपने द्वाएरी एछी मैरां कुडो कैदी सखतस।

जेरो बूट तेरहो फल (मत्ती 7 : 16 - 20 ; 12 : 33 - 35)

43 किजोकी केंची भी रोडे बूटे बुरो फल न लग्गे ते न केंची बुरे बूटे रोडो फल लग्गे। 44 हर बूट अपने फले सैहीं पशेंनोते किजोकी न झलन सैहीं पैगु लगन ते न क्रेरी सैहीं दाछ लगे। 45 रोडो मैन्हुं अपने दिलेरे रोडे खाते मैरां रोडी चीजां कढते ते बुरो मैन्हुं अपने दिलेरे खाते मैरां बुरी चीजां कढते किजोकी जैन दिले मां भ्ररेरु भोते तैत्रे जबांनी पुड़ एईते।

घर बनाने बाले दूइय मैन्हुं (मत्ती 7 : 24 - 27)

46 जैखन तुस मेरे ज़ोने पुड़ अमल न केरथ त मीजो परमेशर परमेशर किजो ज़ोतथ? 47 जै मीक एईते ते मेरी गल्लां शुन्तां तैनपुड़ अमल करते त आंव तुसन ज़ोतां की तै कैसेरो जैरो भोलहो। 48 तै तैस मैन्हेरो जैरहोए की जैनी अपनु घर डूधी खाई कैढतां पैकी ठैरी घर बनव जैखन आंधी तौफन आव त तैस घरे किछ न भोवं किजोकी तैसेरी मुनियाद पैक्की ठैरी थी। 49 पण

जै मेरी गल्लां शुन्तां तैन पुड़ अमल न केरे त तै तैस मैन्हेरो जैरहोए जैनी अपनु घर रेती पुड़ बनव तै जैखन हडाई अई त तैन घर डुली जेवं ते तब्बा भोइ जेवं।

एकी सुबेदारो विश्वास (मत्ती 8 : 5 - 13)

7 जैखन यीशु लोकन एपनी सभ गल्लां शुनेई छैडी त ते कफरनहुमे मां अव। 2 तैडी अक रुमी आफसररो नोकर जै तैस ट्लारो भी थु: ते बिमैरी सैहीं मरने बालो थु:। 3 तैस यीशुएरो पत्तो लगे त तैनी युहुदी केरे किछ सियांनो मैन्हुं तैस क भेजो ते तैन सैहीं मिनत केरतां ज़ोव:की तै आइतां मेरो नोकर बज्झा। 4 तैन यीशु क आए ते तैस क मिनत केरने लगे की तैसेरी हालत एरही जैरीहे ते तु तैसेरे लेइ किछ केर। 5 किजोकी ते ईशी ज़ाती सैहीं बडी मुहाबत रखते ते इशु प्राथन भवन तैत्री बनेवरुए। 6 यीशु तैन सैहीं साथी चले जे पण जैखन तैस घरे नेडे पुजे त सुबेदारो होरी दौस्तन सैहीं समाद भेजो की एह परमेशरे तकलीफ न दे आंव एस कबल नैइं की तु मेरे अंत्र एजी सखस। 7 एस्से वजाही सैहीं आंव भी अपनो आप भी तीक एजनेरे कबल न बुझीं बलके एपनी जबांनी सैहीं जोस त मेरो नोकर बेज्झोइ सखते। 8 तै मैन्हुं ज़ोने लगे की आंव भी केंचरे अदिकरे मां कम केरतां ते सिपाही मेरे आधींन ते जैखन अक होरी जो ज़ोतां तु गा त तै गहते ते होरी जो ज़ोते एई त तै एईते ते अपने नोकरे जो ज़ोतां इन कम केर त तै केरते। 9 यीशु एन शुन्तां हेरांन रेही जेव ते पत्रावं लोकेरे पासे लगे तकने जैना तैस पत्ती एवरे थिये तैन जो ज़ोने लगे की अवं तुसन सैहीं सचच ज़ोतां की मीं एरहो जैरो विश्वास इस्त्राएले मां नैइं लाहोरो। 10 ते जैना लोक यीशु क भेजोरे थिये वापस जैखन घरे आए त तै नोकर बेज्झोरो लाहु।

बेवारु मड्डु जीतू केरनु

11 होरसां एरु भोवं की यीशु नायन नोवें शहारे मां चलो जेव कंने तैसेरे चले ते होरे भी बडे लोक तैन सैहीं साथी थिये। 12 जैखन तैना शाहरेरे फाटके पुड़ नैडे पुजे त हेरतन की अक मुडदो फुकने जो चलेवरोए ते तैन एपनी हेईयरु आके मड्डु थु: ते शहरेरे बडे लोक तैस रेंडी कौन्शी सैहीं साथी थिये। 13 यीशु एन लैहितां तैसेरी हेईये पुड़ बडी त्रस अई ते तैस जो ज़ोव: लेरां न दे। 14 फिरी यीशु नैडे एइतां मुडदेसही हथ लाव ते मुडदो छुंने बाले खडे भुए ते यीशुए ज़ोव:एह जुवान खडो उठ। 15 तैन फटेरु मड्डु गल्लां लगे केरने ते यीशुए तैन फटेरु मड्डु तैसेरी हेईये सौपतां छुड। 16 सभ लोक हेरांन परेशान राहे ते परमेशरेरी तारिफ केरने लगे की अक बडो नबी असन मां एवरोए ते परमेशरे इशी मद्दत केरने एवरोए। 17 एस्से गल्लरी वजही सैहीं एह खबर युहुदियेरे चैवरे पासन फैली जेई।

यूहन्ना बपतिस्मो देने बालेरो सुवाल (मत्ती 11 : 2 - 19)

18 ते युहन्नारे चलेइं एन सैरी गल्लां केरी खबर दिती त तैनी अपने चलन मैरां दुई चले एपु क कुजाए। 19 यूहन्ना एन शुन्तां दुई चले यीशु क पुछने भेजे की एजने बालो मस्सही तुएस की असां होरी बलगम? 20 तैन चलेइं यीशु क एइतां पुछ की असां यूहन्ना तिका पुछने भेजोरेम की एजने बालो मस्सही तुएस की असां होरी बलगम? 21 तैखन यीशुए बडे लोक बिमैरन कैरां ते दुष्टअत्मान कैरां छुटाए ते बडे कंने लोकन एछन लौ दिती। 22 यीशु तैन चलन जुवाब दितो की जैन किछ तुसैइं लाहेरुए ते शुनेरुए गैहितां युहन्ना सैहीं बियांन केरा की काने लहतन ते टोटे चलतन दे कौडी केरे ज़ख्म साफ भोल्न ते टोऊने शुन्तन ते मुडदे जीते भोतन ते गरीबन खुशखबरी शुनाई गहचे। 23 ते मुबारके ते जै मेरे नोवें सैहीं ठोकर न खाए।

24 जैखन युहन्नारे भेजोरे चले वापस चले जे त यीशु युहन्नेरे हके मां गुवहाई देने लगे की तुस बियाबाने मां कुन हेरने जेवरे थिये? कुन हवाई सैहीं हिलते सरकण्डे? 25 तुस फिरी होरु कुन हेरने जेवरे थिये? कुन रोडां लग्गोरां लिगडन बालो मैन्हुं? तैन चमकते लग्गोरे लीगडन बाले मैन्हुं? जैन अन्दे सैहीं बादशाही मैल्हन मां रहतन। 26 त फिरी तुस होरु कुन हेरने जेवरे थिये? कुन

अक नबी? हां आंव तुसन सैहीं जोतां की नेबी कैरां बड्डे। 27 एह तैहे जैसेरे बारेमां लिखु जेवरुए की हेर आंव अपनो दूत तीं अगरी अगरी भेजताइं जै तेरी बत्त अगरोव तियार केरलहो। 28 यीशुए जाँव: आंव तुसन सैहीं सच्च ज़ोतां की ज़ैना कौन्शन कैरां पैइदा भेवरेन तैन मां युहन्ना बसिस्मो देंने बाले कैरां बडो कोई नैइं पण जै परमेशेरी बादशेही मां निकडोए ते तै युहान्न कैरां बड्डोए। 29 जैखन सैभी आम लोकेइं एन गल्लां शुनी त (चुंगी) धडत (टेक्स) नैणे बाले भी युहन्नारो बसिस्मो नैहितां परमेशेर सच्चो मन्नो। 30 ते यीशुएरे बडे बडेइं तैस्केरां बसिस्मो न नैहितां परमेशेरो रोडो ईरादो टैली दितो। 31 बस्सा इस ज़मानेरे लोकन आंव किसेरु नोवं देइं की एन किसेरे जैरेन? 32 तैना तैन मड्डां केरे जैरेन ज़ैना बजारे मां बिशोरां एकी होरी जो हक्कां देइतां ज़ोतन असैइं तुशेलेइं बेशोई बजाइं ते तुस न नचचै असैइं शौग मनाव पण तुसैइं लेरां न दितो। 33 किजोकी युहन्ना बसिस्मो देंने बालो न रौट्टी खांतो आव न शराब पिंतो आव ते तुस ज़ोतथ की एस्मां दुष्टात्माए। 34 मैन्हेरु मड्डु खांतो पिंतो आव ते तुस ज़ोतथ ते हेरा तै शराबी मैन्हुं कंने धडत नैणे बाले पैपी केरो दौस्ते। 35 पण अक्कल अपने सैभी मड्डां कैरां जादे रोडी साबत भुईं।

फ़्रिसेरे घरे पैपी कौन्शी माफी

36 फिरी केंचे फ़्रिसे यीशु क द्रखुवास की की मींसैहीं साथी रौट्टी खाबस्सा तै तैस्सेहीं साथी तैसेरे घरे जेव ते तैस्सेहीं साथी रौट्टी खाने लगे। 37 त हेरा अक बदचलन कौन्श जै तैस शहरेरी थी एन बुझतां की यीशु फ़रिसेरे घरे रौट्टी खाने बिशोरोए शंखमरमरी एकी बोतली मां अक माघो तेल अत्र आंन्हो। 38 ते यीशुए पांउन क नैडे लेरां दैती खडी भुईं ते तैसेरे पाव एंखेइं सैहीं सेले ते अपने दौंगेरे बालेइं सैहीं पौछने लगी ते तैसेरे पावं फुमडी देंने लगी कंने पावंन पुड अत्र तेल मलने लगी। 39 जैनी फ़्रिसें यीशु कुजेवरो थु: तैनी एन लाहुं त ज़ोने लगे अगर एह मैन्हुं नबी भोथो त बुझेथो की जै कौन्श तैसकाहे तै कौने ते एह केरी कौन्शे किजोकी एह ब्दचलने। 40 यीशु तैस सैहीं जाँव हे शुमौन मीं तींसैहीं किछ ज़ोनुए फ़्रिसें जाँव:एह गुरु ज़ो। 41 केंची शोहुकरेरो केंची दुई ज़न्न क क्रजो थु: एकी क पंच शौव दिनर ते होरी क पंजह दिनर थिये। 42 जैखन तैन क देंने जो किछ न राहू त तैनी शोहोकरे दुईने क्रजो माफ़ कमाव बस्सा कौन तैन मैरां जादे शोहुकारे सैहीं मुहाबत रखेल्हो? 43 शुमौने जुवाब दितो की मेरे हिसाबे सैहीं त जैसक पंच शौव दिनर थु: यीशु जाँव: तीं सैहीं फ़ैस्लो कियो। 44 यीशु तैस कौन्शरे पासे तैकतां शुमौने जाँव: इस कौन्शरां तक? आंव तेरे घरे आव? तीं मीं पाव धोने जो पानी न दीतु पण ईस्सां मेरे पाव एंखेइं सैहीं धोए ते अपने दौंगेरे बालेइं सैहीं पौछे। 45 तीं मीं फुमडी न दितो पण एसां ज़तल्लेरो आंव इडी एवरोइं मेरे पाव पौछने न छडे। 46 तीं मेरे दौंगे पुड तेल न छडो पण एसां मेरे पावंन पुड अत्र तेल मल्लो। 47 एएल्हेरेलेइं आंव तीं सैहीं ज़ोतां की एसांरे पाप ज़ैना जादे थिये माफ़ भुए की एसां जादे मुहाबत की पण जैसेरे थोडे पाप माफ़ भोतन त तै थोडी मुहाबत केरते। 48 तैस कौन्शी जो जाँव:गा तेरे पाप माफ़ भुए। 49 एस गल्ली पुड ज़ैन तैस्सेहीं साथी रौट्टी खाने बिशोरे थिये अपने दिले मां ज़ोने लगे की एह कौने जै पाप भी माफ़ केरते? 50 पण यीशुए तैस कौन्शी सैहीं जाँव तेरे विशवासे तु ठिक कियोरिस खुशी सैहीं गा।

यीशु एरी तातीम

8 थोडे चीरेरां बाद एरहू भोवं की यीशु अपने तैन बहरे चलेन सैहीं साथी शहारे शहारे डुलोवं डुलोवं हंठने लगे ते परमेशेरी खुशखबरी शूनतो राहु। 2 ते किछ कौन्शां भी तैन सैहीं साथी थी ज़ैन मैरां बेडी दुष्टात्मा ते बिमैरी निसोरी थी तैना कौन थी मरियम त मगदलिनी थी ज़ैन मैरां सत दुष्टात्मा निसोरी थी। 3 लियोना जै हिरोदेसेरे एहेलकार खोजेरी कौन्श ते सोसनाह ते होरी भी कही कौन्शां थी ज़ैना अपनु सभ किछ देइतां तैन्केरी सेवा केरती थी।

बीज बने बालेरु दृष्टान्त

(मत्ती 13 : 1 - 9 ; मरकुस 4 : 1 - 9)

4 फिरी जैखन बडे लोक तैस क अकौट्टे भुए जैस्मां सैभी शहरां केरे लोक एवरे थिये यीशुए तैन मुसाल देइतां जाँव। 5 अक बिज बने बालो बिज बने निसो ते बेंते बार किछ बिज बत्तरे आसे पासे झडु ते किछ दलेंचोवं ते किछ चुडोलेइं चुनतां खावं। 6 ते किछ घोडांगले मां झडु ते लेगतां शुकु एल्हेरेलेइं की तैस पानी न मैल्हु। 7 ते किछ झलन मां झडु ते झलेइं तैन हदी मां दबेई छडु। 8 ते किछ बिज रोडी ज़मिनी मां झडु ते लगे ते शौव गुन फल लगे एन शुनेइतां तैनी तैन सैहीं जाँव: जैस शुनेरे कन भोन त ते शुने।

दृष्टातां केरो मकसद

(मत्ती 13 : 10 - 17 ; मरकुस 4 : 10 - 12)

9 तैसेरे चलेइं यीशु पुछु की एस मुसालरो कुन मतलबे? 10 यीशुए तैन जाँव:तुसन परमेशेरी बादशेहीयरे भेतेरी समझ दितोरी पण होरन मसाल देइतां ज़ोतन ताके हेरतां भी न लहंन ते शुनतां भी न शुन्न ते न समझन।

बीज बने बालेरे दृष्टातेरो मतलब

(मत्ती 13 : 18 - 23 ; मरकुस 4 : 13 - 20)

11 एस मसालरो एह मतलबे की बिज परमेशेरे वचने। 12 बत्तरे बनेरु बिज तैने ज़ैनेइं वचन शुनु ते शैतांन एइतां दिले मैरां तै वचन घीनी गहते की एरु न भोए की विशवास केरे ते मुखती भोए। 13 ते घोडांगले मेहींयू बिज तैने ज़ैनेइं वचन शुनतां खुशी सैहीं मनतन पण दिले सैहीं पक्के न भोन ते किछ चीरेरां पत्ती अजमैइशरे मोके मुडी गहतन। 14 ते झालन मेहींयू बिज तैने ज़ैनेइं वचन शुनतां भी इस जहानरी फिक्र ते दौवलतरो फरेब ते एशो अशरती मां फैसी गहतन ते तैन्केरो फल न पक्के। 15 पण रोडी ज़िमिनी मेहींयू बिज तैने ज़ैना वचन शुनतन ते अमल भी केरतन ते रोडे चारे दिले मां बसातन ते सबरी सैहीं फल भी लगते।

दीयेरु दृष्टान्त

(मरकुस 4 : 21 - 25)

16 कोई मैन्हुं दियो बैलतां केंची भांडे हैठ हेडकतां न रखन ते न खट्टी हैठ रखन बलके उची ठैरी रखतन तके दियो अत्र एजने बालन लौ दे। 17 किजोकी कोई एरही चीज छप्पौरी नैइं जै बंदी नैइं भेवरी ते न कोई एरु राजे जैसारो केंची पत्तो न भोए लगेरो जै बांदु न कियुं गाहे। 18 बस्सा हुशार राथ की तुस केंचरे शुनतथ किजोकी जैसका आहे तैस होरु भी दीतु गालहु जैसक नैइं तैस्केरां तैन भी नियुं गालहु जैन तै अपनु बुझते।

यीशु एरी अम्मा ते इलाह

(मत्ती 12 : 46 - 50 ; मरकुस 3 : 31 - 35)

19 फिरी तैसेरी अम्मा ते तैसेरे दूलाह तैसका आए पण हछै मैन्हुं केरी वजाही सैहीं तैसका न पुजी बटे। 20 ते यीशुए पत्तो दितो की तेरी अम्मा ते तैसेरे दूलाह बेइर खेडोरेन ते तीं सैहीं मिलनु चहतन। 21 यीशुए तैन जुवाब दितो की मेरी अम्मा ते मेरे दूलाह इनण ज़ैना परमेशेरे वचन शुनतन ते तैस पुड अमल भी केरतन।

तोफान रोकनो

(मत्ती 8 : 23 - 27 ; मरकुस 4 : 35 - 41)

22 फिरी एकी दिहाडे एरु भोवं की यीशुए अपने चलन सैहीं जाँव:एजा डाले पार गहंम ते तैना किशती मां चैइतां डले पार चले जे। 23 पण जैखन किशती मां चले त यीशुए निडल अई ते तै झूली जेव ते डल्ले पुड बडो आंधी तौफान आव ते किशती पैनी सैहीं भेरोई जेई ते तैन खतरो भाई जेव। 24 चलेइं एइतां यीशु बिंझाव ते ज़ोने लगे असां मैरी गहतमयीशु खडउठो ते हवाई जो ते पैनी जो जाँव:रुकीगाथ ते आंधी तौफान रुकी जेव। 25 यीशु तैन जो जाँव:तुशौ

विश्वास कौरां जेव? तैना डेरी जे ते हेरान भोइतां एपु म्महेइं ज़ोने लगे की एह कौने एह हवाई त पैनी हुकम देते ते तैना एसेरो हुकम मनतन।

दुष्टातमाई बालो मैन्हू बझानो

(मत्ती 8 : 28 - 34 ; मरकुस 5 : 1 - 20)

26 फिरी ते ग्रासेनयुंएरे अलाके मां पुजे जै गलिलेरे झिलारे सांमने पारे।
27 जैखन ते बन्ने पुड हेस्सो त तैस शहरेरो अक मैन्हू तैस मैल्हो जैसमां दुष्टात्मां थी ते तै लिंगडां न थु: लातो ते तै घरे न्ना ते मुशांन पुड मैहीं रहतो थियो। 28 तैनी मैन्हें यीशु लाहू त चिंटां लगे मारने ते ज़ोरे सैहीं ज़ोने लगे एह यीशुपरमेशरेरा मट्टा तीं मीं सैहीं कुन कम्मे? आंव तींका माफ़ी मगतां तू मीं दुखे मां न छड। 29 गल एह थी की यीशु तैस दुष्टात्माइं हुकम देतोरो थु: की एस मैन्हू मैरां निसी गा एलहेरलेइ की तै मैन्हू दुष्टातमां बडे बुरे त्रिके सैहीं टलेइतां रखोरो थु: ते लोक तैस कैबु केरनेरे लेई अगरी भी रसन ते शंगलन सैहीं बंधतां रखते थिये ते तै तैन भी टलोडतो थियो ते दुष्ट आत्मां तैस बियाबांन जंगलन मां नैती थी। 30 यीशुए तैस मैन्हू पुछू तैरु कुन नोवें तैनी ज़ोव? लशकर किजोकी तैसमां बेडी दुष्टात्मां थी। 31 ते तै दुष्टात्मान बालो मैन्हू यीशु क ज़ोवले हथ केरतां ज़ोने लगे की मीं नर्के मां गहनेरो हुकम न दे। 32 तैडी पहाडे पुड अक सूरां केरो अक बडो घांन थियो ते तैन दुष्टात्माइं बालो मैन्हू ज़ोने लगे असन एन मां गहने दे यीशुए गहने दिती। 33 ते तैना दुष्टात्मां तैस मैन्हू मैरां निसतां तैन सुनन मां चेली जेई ते सूरां केरो सारो घांन उत्रेई उन्डे छालां मैरतां डल्हे मां डूबतां मैरी जेव।

34 सुर चारने बाले एह तमाशो हेरतां नैशी जे ते शहरे मां ते अलाके मां एस गल्लरी खबर शुनाई। 35 लोक तै तमाशो हेरने आए ते यीशु क जैस मैन्हू मैरां दुष्टात्मां निसोरी थी तैनी लिंगडां लां ते होशी मां एइतां यीशुरे पावंन क बिशोरो लाहू ते डेरी जे। 36 ते हेरने बालेइ तैन भी पत्तो दितो जैन मां दुष्टात्मां थी की तै मैन्हू कैचरे रोडो भोव। 37 ते ग्रेसिनयुं आलाके मां चैवरे पासां केरे लोक यीशु जो ज़ोने लगे की इठां चलो गा किजोकी तैन पुड बडो भारी आसर भेवरो थु: ते यीशु किशती मां बिशतां वापस चलो जेव। 38 पण जैस मैन्हू मैरां दुष्टात्मां निसोरी थी तै यीशु क मिनत केरतां ज़ोने लगे मीं एपु सैहीं साथी रख पण यीशुए तै भेजो ते ज़ोव। 39 अपने घरे चलो गा ते लोकन सैहीं जौ की परमेशरे मेरे लेई कुन कुन कियेरुए तल्ही तै चलो जेव ते सारे शहरे मां एस मैहेबरनरो जै यीशुए तैस पुड कियोरी थी सैसन शुंनाने लगे।

याईरेरी कूइय ते अक बिमार कौन्श

(मत्ती 9 : 18 - 26 ; मरकुस 5 : 21 - 43)

40 जैखन यीशु वापस एजी राहोरो थु: त बडे लोक यीशुए बलगते ते सुवागत केरनेरे लेई तैडी थिये ते बेडी खुशी सैहीं मिलनेरे लेई तैसेरी बत्तां तकते थिये। 41 ते हेरा यायेर नोवेंरो अक मैन्हू जै प्राथना भवनेरो खास मैन्हू थु: यीशु क आव ते तैसेरे पावंन पुड पैइतां ज़ोने लगे की तू मेरे घरे चल। 42 किजोकी तैसेरी आके कुई जै बहरे सालां केरी थी मरने बाली थी ते जैखन यीशु चलोरो थु: त लोक तैस उन्डे बिछडते थिये। 43 ते अक होरी कौन्श जैस बहरे सालां केरी दैती खुनेरी बिमारी थी ते अपनो सारो पैइंसो बेईदन ते हकिमन क अल्लाजेरे लेई खरच कियोरो थु: ते तै केंचरे हथ ठिक न भुई। 44 तै कौन्श यीशु पतारां एइतां तैसेरे चोगे सैहीं हुरी ते तैखने तैसारो खुंन बगो बंद भोई जेव। 45 यीशुए ज़ोव: ते कौने जैनी मीं सैहीं हथ लेवरोए? तैखन सभ लोक ईन्कार केरने लगे त पतरसे ज़ोव एह गुरु लोक एकेकी दलेकेइं देइतां तीं उन्डे बिछडने लोरेन। 46 पण यीशु ज़ोव: की केंचे मीं सैहीं हथ लेवरोए किजोकी मीं पत्तो लगे की मेरी शक्ति निसोरिए। 47 जैखन तैस कौन्शां हेरु की आंव छैपी न बेटीं त तै डरती डरती सामने अई ते यीशुएरे पावंन पुड पैइतां सैरी लोकां केरे सामने ज़ोने लगी मीं यीशु सैहीं एलहेरलेइ हथ लेवरोए ते जैरहो मीं हथ लेवरोए आंव तैरही बेझोरीं। 48 यीशुए तैस कौन्शी ज़ोव:कुईये तेरे विश्वासे तू बज्झाई ते खुशी सैहीं चली गा। 49 यीशु एन हेजु ज़ोतो थु: त प्राथन भवनेरे खास मैन्हू सैहीं केंचे ज़ोव:की तेरी कुई मैरी जेवरिए हुनी गुरु तकलीफ न दे। 50 पण यीशु एन शुनतां ज़ोने लगे डरा न्ना भरोसो रखा कुई बेंची गहनिये। 51 जैखन तै तैस घरे मां जेव त तैनी पतरस युहन्ना याकुब ते कुईयेरे हाज बौवरे अलावा होरो कोई अत्र एजने न दितो।

52 सभ लोक तैस कुईयेरे लेइ लेरां दैते थिये ते यीशुए ज़ोव:लेरां न देथ एह कुई मुहेरी नैइं झूलोरीए। 53 लोक एन शुनतां हसने लगे की तैना जानते थिये की कुई मैरी जेवरिए। 54 पण यीशुए तैस कुईयोरो हथ टलाव ते ज़ोव:कुईये खडी उठ। 55 तैसारी आत्मा वापस अई ते तै लुशी खडी भोई ते यीशुए तैस जो ज़ोव एस कुईये किछ खाने जो देथ। 56 तैस कुईयेरे हाज बौव हेरान रेही जे यीशुए तैन सैहीं ताकिद केरतां ज़ोव जैन किछ ईडी भोव एन केंची सैहीं न जोइयथ।

बहरे प्रेरत भेझने

(मत्ती 10 : 5 - 15 ; मरकुस 6 : 7 - 13)

9 यीशुए अपने बहरे चले एपु क कुजाए ते तैन कुदरुत ते अखतियार दितो की सैरी दुष्टात्मां कढन ते बिमैरी दुर केरन। 2 ते यीशुए तैना बहरे चले परमेशरेरी बादशैहीयरी खुश खबरी शुंनाने ते बिमार बज्झानेरे लेइ भेजै। 3 ते तैनजो ज़ोव:की बत्ते जो किछ न नैहियथ न सोटी न झोली न रौट्टी न पैइंसे ते न दुइयव लिंगडां। 4 ते जैस घरे मां गाथ त तैडी बिशी रहनु। 5 ते जैस शहरेरे लोक तुसन कुबूल न केरन त तैस शहरे मैरां गहंतेबार अपने पांवां केरी धुड टुडकनी ताके तैन पुड गुवाही भोए। 6 बस्सा तैना चले चले जे ते डलोवें डलोवें गैहितां परमेशरेरी खुश खबरी शुंनाने थिये ते लोकन बिमैरन केरां बज्झाते चले।

हेरोदेसेरी उलझन

(मत्ती 14 : 1 - 12 ; मरकुस 6 : 14 - 29)

7 ते चौवरोवें मुल्खेरो बादशहा हिरोदेस एन शुनतां डेरी जेव की किछ जोते थिये युहन्ना मुडदन मैरां ज़ितो भोवरोए। 8 ते किछ इलिया ते किछ जोते थिये नेबन मैरां कोई अक ज़ितो भोवरोए। 9 पण हिरोदेस ज़ोने लगे की युहन्नेरी करोडी त मीं कट्टाई पण एह कौने जैसेरे बारे मां एरी जैरी गल्लां शुंने मां एजने लोरीन? ते हिरोदेस यीशु तकनेरी कौशिशि मां राहु।

पंच हजार मडदन रोटी खुवैनी

(मत्ती 14 : 13 - 21 ; मरकुस 6 : 30 - 44 ; यूहन्ना 6 : 1 - 14)

10 फिरि चलेइं जैन किछ कियेरु थु: यीशु सैहीं शुंनाने ते तैनी तैना अलग नैहितां बेतसैईदा नोवेंरे शहरे जो चलो जेव। 11 ते बडे लोक तैस पती चले ते तै बडी खुशी सैहीं तैन सैहीं मिलो ते तैन सैहीं परमेशरेरी बादशैहीयरी गल्लां केरने लगे ते जैना बिमार थिये तैना बज्झाए। 12 जैखन दिहाडी डूबने लगी त तैन बहरे चलेइं यीशु ज़ोव:की एन लोकन भेजो छड एना कोस्कोई डलोवें मां बिशन ते रौट्टारो इंतजाम केरन किजोकी असां गैर आबाद ठैरीं। 13 यीशुए तैन ज़ोव:की तुस्से एन किछ खाने जो देथ? चलेइं ज़ोव: असन क पांच रौट्टी ते दुई मैछलीन केरां जादे किछ भी नैइं पण असां गैहितां एन जेई रौट्टी मुल्हे घिनतां अन्हतमा। 14 किजोकी तैन तकरीबन पांच हजार सिरफ मडदे थिये यीशुए अपने चेलन सैहीं ज़ोव:एन लोकन पांजह पांजह मैन्हू केरी हुंडी मां बिशाला। 15 ते चलेइं तैने कियुं ते तैन तैचरे बिशालहे। 16 यीशुए तैना पांच रौट्टी ते दुई मैछली निही ते अम्बरेरां तैकां तैन ब्रकत दिती? फिरि तैनी तैना रौट्टी टलोडी ते चेलन क दिती की तैन बिशालोरे लोकन खाने जो देंन। 17 सभ लोक रौट्टी खेईतां रज्जे ते बिछडोरे टुकां केरी बहरे टोकरी भेरतां सैल्ही।

पतरस ए यीशु मसीह कबूल केरते

(मत्ती 16 : 13 - 20 ; मरकुस 8 : 27 - 30)

18 एकी बार यीशु अकेल्हे दुआ केरने लोरे थिये ते तैन्केरे चले भी तैडी थिये? यीशुए तैन पुछू की लोक मेरे बारे मां मिंजो कुन जोतन आंव कौन अंही? 19 चलेइं जुवाब दितो युहन्ना बतिसम्मो देंने बालो ते किछ जोतन इलिया ते किछ जोतन पूरांने नेबन मैरां कोई अक ज़ितो भोवरोए। 20 तैखन यीशुए चेलन पुछू की तुस एस बारे मां मिंजो कुन जोतथ? पतरसे जुवाब दीतो तु प्रभु परमेशर मस्सही आस? 21 एस गल्ली पुड यीशुए तैन ताकिद केरतां ज़ोव:की एह गल केंची सैहीं न जोइयथ।

अपने मौतरे बारे मां यीशु एरी भविश्वदाणी
(मत्ती 16 : 21 - 23 ; मरकुस 8 : 31 - 33)

22 ते साथी एन भी जॉवःकी अबने आदमे कही तकलिफां केरनी पैनिण बूढे सियांने ते खास मैन्हुं पुरैहुत फकही तैस बिलकुल घेटिया संमझेल्हे तैना तैस मैरी छडेल्हे पण ते ट्लेइयवं दिहाड़े फिरी जितो भोल्हो।

यीशु पत्ती चल्नेरो मतलब
(मत्ती 16 : 24 - 28 ; मरकुस 8 : 34 - 9 : 1)

23 फिरी यीशुए तैन सैभन जॉवःकी अगर कोई मेरी सेवा केरनी चहते त अपनो आप बिस्त्री छडे ते रोज अपनी फंसी स्ल्हे ते मीं पती चले।
24 किजोकी जै कोई अपनी जान बचांनी चहते तै तैस गुंवालो पण जै मेरे लेइ अपनी जान गुंवाल्हो त तै तैस बचाल्हो। 25 मैन्हुं अगर सारी दुनिया हासल केरे ते एपनी जानरो नुक्सान केरे या अपनो आप गुंवाए ते कुन फैईदो?
26 किजोकी जै कोई मीं कैरां ते मेरे वचने कैरां श्रमाल्हो त मैन्हेरु मडु भी अपने बोवे ते सुवर्गदुतन सैहीं साथी जैखन एजेल्हो त तैन कैरां श्रमाल्हो।
27 पण आंव तुसन सैहीं सच्च ज़ोतां की किछ मैन्हुं जैना इडी खडेन जां तग्र तैना परमेशेरी बादशाही एंडीती न लांन्ह तां तग्र तैनका मौऊत न एजेल्ही।

यीशु एरु रूप बेदलोनू
(मत्ती 17 : 1 - 8 ; मरकुस 9 : 2 - 8)

28 एन गल्लां केरे तकरीबन अठ दिहाड़ना बाद एरु भोवं की यीशु युहन्ना याकूब पतरस साथी नैहितां एकी पहाड़े पुड़ दुआ केरने चले जे। 29 ते जैखन यीशु दुआ लोरो थुः केरने त तैसेरी शक्क बेदलोई जेई ते तैसरो चोगो छीतो सुफेद भोइतां चमकने लगे। 30 ते हेरा दुई मैन्हुं यीशु सैहीं गल्लां लोरेथिये केरने ते एना मैन्हुं मुसौ त इलिया थिये। 31 जै मम्हाई मां बांदो भोइतां यीशुएरी मौऊतरां जिकर केरने लोरो थुः जै सच्चे युरोशलमें मां बांदी भोने बाली थी। 32 पण पतरस ते तैसेरे सैथी केरी एछी निडली सैहीं गिरकी भेवरी थी जैखन तैना बिझे त तैनेइं यीशुरी मंम्हा लाही ते तैन मैन्ह पुड़ भी नजर पैई जैन तैस्सैहीं साथी खडखडे थिये। 33 जैखन तैना यीशु कैरां चले त पतरसे यीशु सैहीं जॉवःगुरु जी इशु ईडी रहनु रोडोए की असां ट्लाई डेरे बनाम अक तेरे लेइ ते अक मुसै त इलियाएरे लेइ तैस पतो न थुः की एह कुन लोरोए जांने। 34 तैखन तैन पुड़ बिदलार जैरी घीरी जेई ते जैखन तैना तैस घरे मां जे त तैना डेरी जे। 35 तैखन तैस बिदलारी मैरां अक आवाज अई की एन मेरु टलार मडुए तुस एसेरु जॉनुं शुना। 36 ते तैस आवाजी सैहीं साथी तैनेइं यीशु अकैल्हो लाहु ते तैना चुप राहे ते जैन किछ लाहेरु थुः तैन केंची सैहीं न जॉव।

दुष्टातमाई बालू मडु बझानू
(मत्ती 17 : 14 - 18 ; मरकुस 9 : 14 - 27)

37 होरसां एरु भोवं की जैखन तैना पहाड़े पुड़ेरां उंढे एवरे थिये त बडे लोक तैन क आए। 38 एकी मैन्हें तैन लोकन मैरां बडे जोरे सैहीं हक देइतां जॉवःएह गुरु आंव तींका जॉवले हथ केरतां की मेरु मठतु हेर तैन मेरु आक्रे मठतुए। 39 अक दुष्टात्मा तैस अपने कब्जे मां केरी गहचे ते तै अकदम चिंदां मारते ते तै कम्बने लगते ते तैसेरे एशेरां शैफ निसचे ते दुष्टात्मा तैस बडे बुरे तरिके सैहीं ज़ख्मी केरतां शारचे। 40 ते मीं तेरे चलन का बिनती कियोरी थी, कि तैस दुष्टातमाई कढन, पण तैना ना केडी बटे। 41 यीशुए जुवाब दितो हे घट विशवास केरने बालाव आंव कैईस तग्र तुसन सैहीं रेहीलो ते तुशी झेल्हेलो? अपने मडु इडी आंन्हां। 42 तै मस्सां एवरो थुः त दुष्टात्मां तैन मठतु मुरोडतां शारु? पण यीशुए दुष्टात्मां झीडकेइतां कडी ते तैन मठतु बज्झैइतां तैसेरे बोवरे हवाले कियू।

अपने मौतरे बारे मां यीशु एरी दुइयों भविश्वदाणी
(मत्ती 17 : 22 , 23 मरकुस 9 : 30 - 32)

43 ते सभ लोक परमेशेरी कुदरत हेरतां हेरांन रेहिजे ते जैखन सभ लोक तैन कमां जैन यीशु केरतो थुः हेरांन रहते थिये त तैनी अपने चलन सैहीं जॉव। 44 मेरी इन गल्लां रोडे चारे शुन किजोकी मैन्हेरु मडु मैन्हुं केरे हवाले भोने बालोएय। 45 पण तैन इस गल्ली न थिये जानते किजोकी तैन्केरां एह गल छपेइतां राखोरी थी की तैन न समझन ते चले एस बारे मां यीशु पुछने कैरां उरते भी थिये।

सैभना बडडो कौन ?
(मत्ती 18 : 1 - 5 ; मरकुस 9 : 33 - 37)

46 फिरी चलन एपु मम्हेइं बडी बेस भुई की असंन मां बडो कौने? 47 यीशु तैन केरी दिलेरी गल्लां बुझतां अक मठतु आंन्हुं ते तैन एपु क खडु कियुं। 48 ते अपने चलन सैहीं जॉवःजै इस बच्चे मेरे नोवें सैहीं कुबूल केरते त तै मीं कुबूल केरते ते जै मीं कुबूल केरते तै मेरे भेजने बाले कुबूल केरते किजोकी जै तुसनमां सैभन कैरां निकडोए तै सैभन कैरां बडोए।

जै खाफ नैइं तै हके मां
(मरकुस 9 : 38 - 40)

49 तैखन युहन्ना यीशु सैहीं जॉवःएह गुरु असेइं अक मैन्हुं तेरे नोवें सैहीं दुष्टात्मां कढतो लाहु ते असेइं तैस ठाकू किजोकी तै असन सैहीं साथी न थुः। 50 पण यीशुए तैस जॉवःतुसां तैस फिरी न ठैकथ किजोकी जै तुशे खलाफ नैइं तै तुशौ भोतोए।

सामरी केरे जिरिये यीशु एरी खलाफत

51 जैखन यीशुए उबरे गहनेरे दिहाड़े नेडे आए त तै पक्के चारे युरोशमेरे पासे चलो। 52 ते एपु कैरां अगरी अगरी किछ चले भेजे ते चले सामरी केरे एकी डलोवें मां जे ताके यीशुएरे एजनेरी तियारी केरम। 53 पण जैखन डलोवें बालेइं हेरु की यीशु युरोशलमें मंझो गहनु चहते त तै तैनेइं कुबूल न कियो। 54 एन हेरतां तैसेरे चले याकुब ते युहन्ना जॉने लगे एह परमेशर अगर तू हुकम दैस त असां इलिया नेबेरी जैरी अम्बेरेरां आग बखेनतां एन लोकन भस्म केरम। 55 यीशुए तैनकेरां तक्क ते तैना झीडकए ते जॉवःतुस न जानथ की तुस कौस आत्मारैथ। 56 किजोकी मैन्हेरु मडु लोकन मारने नैइं बल्के बचांने एवरोए तैखन तैना होरी डलोवेंरे पासे चले जे।

यीशु एरो चेलो बन्नेरो मतलब
(मत्ती 8 : 19 - 22)

57 जैखन तैना बत्तां चल्लोरे थिये त केंचे यीशु सैहीं जॉवःतू जैडी भी गाल्हो आंव तेरी हिफाजत केरल्हो। 58 यीशुए तैस्सैहीं जॉवःलोई केरी कुड्दां ते चडोई केरे आल्हे भोत्न पण मैन्हेरु मडुएरे लेइ कोई ठार न भोए जैडी ते अपनो दौग छपाए। 59 फिरी यीशु एकी होरी जो जॉवःमीं सैहीं साथी चल पण तैनी मैन्हें जॉवःपैहिले तु मीं भेज ते आंव गैहितां अपने बोवे देबीं। 60 यीशुए तैस जो जॉवःमुडदन अपने मुडदे दबने दे पण तु गा ते परमेशेरी बादशाहीयरे बारे मां लोकन मां प्रचार कर। 61 एक्के होरे मैन्हें यीशु जो जॉवःपरमेशर आंव तीं सैहीं साथी चेली पण पैहिले मीं भेज ते आंव अपने घरे बालन ज़ोइतां एज्जीं। 62 यीशुए तैन सैहीं जॉव जै हल्ली पुड़ हथ रेखतां पत्रोहुं फिरतां तकते तै परमेशेरी बादशाहीयरे कबल न भोए।

स्तर चले भेझने

10 ते इन गल्लां केरे पत्ती यीशुए होरे भी रोडे जैरे चले तियार किये ते तैना दुई दुई जनै एपु कैरां पैहिले तैन डलोवन मां ते शहरन मां भेजेजैडी तै एपु गहने बालो थुः। 2 ते तैनी तैन सैहीं जॉव फसल त बडीए पण मजदूर थौडेन ऐलहेरे लेई फसलरे मालके क बिनती केरा कि ते अपनी फसल कटनेरे लेई होरे मजदूर भेजे। 3 गाथ आंव तुसन भैडां केरे जैरहे

डुलाघन मां भेजने लोरोइं। 4 एपु सैहीं साथी न बेटवे न बूट ते न झोली नैहियथ ते न बत्तां केन्ची जो नमसकार जोइयथ। 5 जैसे घरे मां गाथ त पैहिले जोथ कि इस घरे मां शांती भोए। 6 अगर तैडी कोई शंतरे कबल भोलहो त तुशी शांती तैस पुड रल्ली नैइं त तुशी शांती तुस्न पुड एजेल्ही। 7 तैस्से घरे मां रथ्थ ते जै किछ तैन केरां मैल्हे तैन्ने खाथ किजो कि मजदूरे एपनी मजदूरारो हकदार ते घरे घरे न गैहीयथ। 8 ते जैस शहरे मां गाथ ते तैठेरे लोक तुस्न अपने घरे मां नैण त जैन किछ तुशे सामने रखू गाहे तैन्ने खाथ। 9 तैठेरे बिमारन ठीक केरा ते तैन सैहीं जोथ कि परमेशरु राज नेडूए। 10 पण जैस शहरे मां गाथ ते तैठेरे लोक तुस्न कुबुल न केरन त तैसेरे शहरन मां गैहितां जोथ। 11 कि तुशे शहरेरी धूड भी इशे पांवन सैहीं जै लागोरीए अस तुशे सामने ठुडकतम ते फिरी भी बुझा कि परमेशरु राज तुशे नेडे पुजेरुए। 12 आंव तुस्न सैहीं सच्च ज़ोताइं कि आदालतरे दिहाडे तैस शहरेरी हालत सदीम शहरेरी हालती केरां जादे बुरी भोलही।

आविश्वसी शहरन झिडक

(मत्ती 11 : 20 - 24)

13 हे खुराजीन! अफसोस बैतसैईदा आफसोस किजोकी जैन कम्मां मीं तुशे सामने कमां अगर एन कम्मां मीं सौर ते सैईदे मां कियोरां भोथां त तैन कैईसेरे टाट पलैटतां ते दौगे पुड मांजन छैडतां ते आंगारन पुड बिशतां कैईसेरी तौबा कियोरी भोथी। 14 पण फिरी भी आदलतरे दिहाडे तुशी हालत सौर ते सैईदा हाले केरां जादे बुरो भोलहो। 15 ते हे कफनहूम कुन तू अम्ब्रे तग्र उचो कीव गहल्हो? न्ना बलके तु पताले तग्र उंदौ कीव गहल्हो। 16 जै तुशी शूनते ते मेरी शूनते जै तुसन घटया समझते ते मीं घटया समझते ते जै मीं घटया समझते ते मेरे भेजने बाले घटया समझते।

स्तर चेलां केरु वापिस एज्नु

17 ते तैना रोडे चले खुशी सैहीं वापस आए ते ज़ोने लगे हे प्रभु तेरे नवें सैहीं दुष्ट आत्मा भी इशो हुकम मैन्चन। 18 यीशुए तैन सैहीं ज़ोवं मीं शैतन एंचरे बिछडतो लाहू जैंचरे चडक अम्ब्रेरां पैचे। 19 हेरा मीं तुस्न सपन ते बिचन डल्लेचनेरो ते दुशमनेरी शैखती पुड अखतियार दितोरोए ते केंची चिज़ी सैहीं तुस्न कोई नुकसान न भोलहो। 20 फिरी भी तुस इस गल्ली सैहीं खुशी न भोईयथ की दुशटातमां तुशो हुकम मैन्चन पण इस गल्ली सैहीं खुश भोईयथ की तुशु नोवं सुवर्गए मां लिखोरुए।

यीशु एरु मघन भोनू

(मत्ती 11 : 25 - 27; 13 : 16, 17)

21 तैखन यीशु पवित्र आत्मा सैहीं मस्त भोइतां ज़ोने लगे एह बाजी अम्ब्रेरे त धेरतरे परमेशरु तारिफ केरताइं की तुसैइं इन गल्लां बडे बडे लोकन ते बडे बडे अक्कमंद लोकन केरां छपैइतां रेखी ते महुन क बेंदी कीअह एह बाजी तेरी खुशी एस्से मां थी। 22 सैरी चीज़ां मेरे बाजेरी तरफां मेरे सुपुर्द कियोरिन ते सुवाए बाजेरे होरो कोई न ज़ाने की मठठु कौने ते सुवाए मठैरे कोई न ज़ाने की बाजी कौने जैस पुड मठठु तैस बांदु केरनेरो इराधो रखते।

23 तैखन ते अपने चेलां केरे पासे फिरो ते सिर्फ तैन्ने सैहीं गल्लां लागो केरने मुबारकन तैना एछी जैना एना गल्लां हेरचन जैना गल्लां तुस लातथ। 24 किजोकी आंव तुसन ज़ोतां की बडे बडे नबी ते बादशह केरी खुवाइश थी की एना गल्लां हेरम जैना तुस लातथ पण न लैही बडे ते एना गल्लां शूनम जैना तुस शूनतथ पण न शूनी बैडी।

रहम दिल सैमरेरु दृष्टान्त

25 तैखन अक कांनुनी मैन्हु खडो भोव ते यीशु अज्रमानेरे लेइ ज़ोने लगे एह गुरु मीं हंमैशरी जिमदगरो बारस बन्नेरे लेइ कुन लोडते कियेरु? 26 यीशुए तैस सैहीं ज़ोवःशैरिती मां कुन लिखेरुए? तु अंजिली कैंचरे पढतस? 27 तैनी मैन्हें जुवाब दितो परमेशर अपने प्रभु सैहीं अपने सारे दिले जानी सैहीं ते एपनी सैरी ताकती सैहीं ते एपनी सैरी अक्क बुधी सैहीं मुहाबत रख ते अपने पुडौसी सैहीं अपने बराबर मुहाबत केर। 28 यीशुए तैस जुवाब दितो तीं ठीक

जुवाब दितो एन्ने केर फिरी तु ज़ितो रहंनोस। 29 पण तैनी अपनी रास्तबाजी हेरानेरे लेइ यीशु पुछ की मेरो पुडौसी कौने? 30 यीशुए तैस जुवाब दितो की अक मैन्हें यरुशलमेरां यरीहोए जो चलरो थुः ते तै डेकू केरे हथे अव तैनेइं तैसेरां लिंगडां खोल्लां ते मरो कुट्टो ते जखमी केरतां आधमारो बनेइतां तैडी जैरे छडतां चले जे। 31 अक पुरेहुत तैस बत्तां चलरो थुः तैनी तै जखमी लाहू त डलखमेइं निसो। 32 एंचरे अक लावी भी निसो ते तैस लैहीतां तै भी डलखमेइं निसो। 33 फिरी अक सांमरी भी तैस बत्तां निसो ते तै जखमी लैहीतां तैस बडो कियास अव। 34 ते तै तैसका जेव ते तैसेरे जखमन तेल मल्लो ते तैसेरे जखमन पट्टी बंधी ते अपने गधे पुड चैहडतां एकी धर्मशाली मां सराइं मां तैसरो अल्लाज कियो। 35 होरसां तैनी दुई दिनार रुपिइये कैढतां भठ्यारे दिते ते ज़ोवःएसैरी हेर गेश केरां अगर जादे लोले त आंव वैपसी पुड दैल्हो। 36 तेरे हिसाबे मां एन ट्लेईन मैरां कौन ज़ैरहो तैसरो पडौसीए जै डेकेइं टलातोरो थियो" कौन पुडौसी निसो? 37 शैरितरे मैन्हें जुवाब दितो जैनी तैस्सेहीं हमदरदी की।

मरथा ते मरियमरे घरे यीशु

38 यीशुए तैस जुवाब दितो गा तु भी एन्ने केर। 39 यीशु त तैसेरे चले चलते चलते एकी डल्लोवं मां पुजे तैडी मरथा नोवैरी एकी कौन्शां यीशु अपने घरे नियो तैसारी अक बेहीन भी थी तैसारु नोवं मरथा थुः तै प्रभु परमेशरु पांवन क बिशतां तैसेरी गल्लां शून्ने लोरी थी। 40 पण मरथा हाछे कम्मं केरां घेमरोइतां यीशु क आई ते ज़ोने लगी प्रभु तुसन ज़रां भी खियाल नैइं की मेरी बेहीन कम केरनेरे लेइ आंव अकेली छडोरीं ते एस जोथ ते मीं सैहीं साथी कम केरे। 41 प्रभु यीशुए तैस जो ज़ोवःमरथा मरथा तु बैडी चीज़ां केरे बारे मां परेशान लोरिस भोने। 42 हालांकी अक्के चिजे जैसारी ज़ुरुरीए तै मरियमा रोडो हेसो रखोरोए जै तैस केरां केंचे न नैहीयोए।

चेलन प्रार्थना केरनी शिखालनी

(मत्ती 6 : 9 - 13)

11 एकी दिहाडे यीशु एकी जगाई दुआ लोरे थिये केरने तैसेरे चेलन मैरां एक्के ज़ोवःप्रभु परमेशर जैंचरे युहन्ने अपने चेलन दुआ केरनी शिखालोरिये तैंचरे तु भी असंन शिखाल।

2 यीशु तैन ज़ोवःकी ज़ेखन तुस दुआ केरथ त एन जोइयथ एह बाजी तेरु नोवं पावित्र मन्नु गाहे ते तेरी बादशाही एजे।

3 इशी रोज़ेरी रौट्टी असन देंतो रेइयां।

4 इशे पाप माफ़ केरां किजोकी अस भी अपने कर्जदारन माफ़ केरतम ते इशी अजमैइश न केरां।

प्रार्थनारे बारे मां यीशु एरी गुवाही

(मत्ती 7 : 7 - 11)

5 फिरी यीशु तैन सैहीं ज़ोवःफर्ज केरा तुसन मैरां केंचरो अक दौस्ते ऐधधी राती अपने दौसते ज़ोते तू ट्लेई रौट्टी मीं दे। 6 किजोकी मेरो अक दोसत बडे दुरेरां हंठतो मेरे क एवरोए ते मेरे क रौट्टी नैइं की आंव तैस रौट्टी देइ सेखी। 7 ते तै तैसरो दौसत अत्रां जुवाब देते मीं केरां न उठोए दारबदे ते मड्डां भी झूलोरन ते आंव तीं रौट्टी न देइ सेखी। 8 आंव तुसन सैहीं ज़ोतां की अगर तैसेरो दौसत ते तैस रौट्टी न दे त तैसरो दौस्तरु बार बार मिनत केरने सैहीं ज़रुर तैस रौट्टी दैल्हो ते ज़ैरी रौट्टी केरी तैस ज़रुरत भोलही देइ दैल्हो। 9 किजोकी जै मगते तैस दितु गहते जै तोषे तैस मैल्हते जै दार हिलातो रहते त तैसेरे लीइ खोल्लु गहते। 10 किजोकी जै मगते तैस मैलते जै तोषे तैस भी मैल्हते जै दार हिलाते तैसेरे लेइ दार खोल्लु गहते। 11 तुसन मैरां कौन ज़ैरो बाजी एरहो भोए की तैसेरु मड्डु मछली मगते ते तै सप्प दे? 12 या तुल मगते त तैसेरे हथे मां बिच्च दे? 13 बस्सा की तुस बुरे भोइतां भी अपने महुन रोडी चीज़ देंनी ज़ानतथ त कुन ईशो असमानी बौव परमेशर असंन पवित्र आत्मा न दैल्हो जैना तैसकेरां मग्तन।

यीशु ते बालजबूल

(मत्ती 12 : 22 - 30 ; मरकुस 3 : 20 - 27)

14 एकी बार यीशु एकी लट्टे मैरां दुष्टात्मा लोरे थिये कढने ते ज़ैखन ते दुष्टात्मा निसी त तै लट्टो गल्लां लगे करणे ते लोक हेरांन रेहीजे। 15 पण तैन मैरां किछ मैन्हुं ज़ोने लगे कि तै दुष्टात्मा गुरेरी हिंमती सैहीं दुष्टात्मा कढते। 16 ते किछ यीशु कैरां अजमानेरे लेइ कोई अक असमानेरो निशान मगने लगे। 17 ते यीशुए तैन्करी चाल बुझतां तैन सैहीं ज़ोवःजैस बादशैही मां फुट पेचे त तै बादशाही बेरान भोचे ते ज़ैस घरे मां फुट पेचे तैन उजड़ी गहते। 18 अगर शैतान अपनी खिलाफत एपु केरे त तैसरु राज केंचरे रेही सखते? फिरी तुस केंचरे ज़ोतथ की बडे शैतानेरी मद्धती सैहीं दुष्टात्मा कढते। 19 अगर आंव शैतानेरी मद्धती सैहीं दुष्टात्मा कढतां त तुशे चले कसेरे ज़ोने सैहीं कढतन? तैना तुशो फैस्लो करणे बाले जैज भोल्हे। 20 पण अगर आंव परमेशरेरी तकती सैहीं दुष्टात्मा कढतां त परमेशरेरी बादशाही तुशे नेडे पुजोरीए। 21 ज़ैखन कोई निगर मैन्हुं अपने घरेरो पैरहो केरते ता तैसरु सभ किछ बंचेरु रहते। 22 पण ज़ैखन तैसकैरां कोई निगर मैन्हुं तैसपुड हमलो केरते त तैस अपने कब्जे मां केरतां तैसेरे सारे हथियार धिनी गहते ज़ैसपुड तैसरो भरोसो थुः ते तैसेरी सारी जेईदाद लुटी गहते। 23 जै मां सैहीं साथी नैइं ते मेरो मुखाल्फे ते जै मां सैहीं साथी अकौडु न केरे ते तै बछोइते।

अधूरे सुधारे सैहीं विपत्ति

(मत्ती 12 : 43 - 45)

24 ज़ैखन केंची मैन्हुं मैरां दुष्टात्मा निसचे त तै शुक्कौरी ठारन मां आराम तोपचे ते ज़ैखन तैस तै ठार न मैल्हे त ज़ोचे की आंव वापस तैस्से घरे मां गाचां ज़ैठ्ठां आंव निसोरी थी। 25 ते तैखन तै दुशटातमां वापस एइतां तैन घर साफ सुथु रोडु लहचे। 26 तैखन ते एपु सैहीं साथी सत्त होरी दुष्टात्मा साथी धिनतां तैस्मां अत्र गैहितां बिशी गहचे ते तैस मैन्हेंरो हाल पैहिले हाले कैरां जादे बुरो भोते।

मुबारिक कौने ?

27 यीशु ऐन गल्लां मस्सां ज़ोने लगोरो थुः त हछे मैन्हुं मैरां अक कौन्श जोरे सैहीं ज़ोने लगी मुबारके तैन पेट जैसमां तु पैइदा भोव ते मुबारकन तैना चुचू जैन्केरु तीं दूध पियेरुए। 28 पण यीशुए ज़ोवःकी मुबारकन तैना लोक ज़ैना परमेशरेरु वचन शुंनतन ते अमल केरतन।

आसमानी निशानेरी माँग

(मत्ती 12 : 38 - 42)

29 ज़ैखन हछे लोक भोने लगे त यीशु ज़ोवःइस ज़मानेरे लोक बुरेन ज़ैना मां कैरां निशान मगन पण युहन्नेरे अलावा एन होरो कोई निशान न दितो गाल्हो। 30 किजोकी ज़ैचरे युहन्ना नेन्वाएरे लोकन जो निशान बनो तैचरे मैन्हेरु मडु भी इस ज़मानेरे लोकां केरे लेइ निशान बनेल्हो। 31 पण दखनेरी मल्क अदालतरे दिहाडे इस ज़मानेरे लोकन अलजाम लाल्ही किजोकी ते बडे दुरेरां सुलैमानेरी अक्क शुंनतां एवरी थी ते तै ईडी हेरा सुलैमाने कैरां भी बड्डोए। 32 नेनवाएरे लोक आदालतरे दिहाडे इस ज़मानेरे लोकन सैहीं साथी खडे भोइतां मुर्जम बनाल्हे किजोकी तैनेइं युहन्नेरे वचने सैहीं तोबा त कियोरी थी पण इडी हेरा कौने ज़ै युहन्ना कैरां भी बड्डोए।

जिसमेरो दियो

(मत्ती 5 : 15 ; 6 : 22 , 23)

33 कोई मैन्हुं दियो बैलतां भांडे हेत या हेडकतां न छडे बलके उची ठैरी रखन तके अत्र एजने बालन लौ भोए। 34 तेरी जानरो दियो तेरी अछे तेरी अछ रोडीए त तेरी जानी मां भी लौए ते अगर तेरी आछे बुरीए त तेरी जान भी आछीए। 35 खबरदार कोस्कोई एरु न भोए की ज़ै लौ तुस्न मां आहे तैन

आंधरु न भोए। 36 बस्सा अगर तुशी जानी मां लौए त कोची भी ठैरी आंधरु न भोए त सैरी जानी मां एरही लौ भोल्ही ज़ैचरे केंची दिये तीं लौ दितोरिये।

शास्त्रन ते फरीसन कैरां खबरदार

(मत्ती 23 : 1 - 36 ; मरकुस 12 : 38 - 40)

37 यीशु अपनी गल हेजु पुरी न थी जेवरी त केंचे फ्रिसे यीशु क मिनत की कि मां सैहीं साथी रौट्टी खा ते यीशु तैसेरे घरे जेव ते तैडी रौट्टी खाने बिशो। 38 फ्रिसी एन हेरतां हेरांन भोव की यीशु बगैर हथ धोने रौट्टी खाने बिशी जेव। 39 तैखन प्रभु परमेशरे फ्रिसी सैहीं ज़ोवःहे फ्रिसाव तुस थाली बेरमेइं त बडी साफ केरतथ पण तुशे अत्र बेईमानी भेरताए। 40 हे बै अक्काव ज़ैनी बेरमेइं बनेवरी तैनी आट्लमेइं नैइं बनेवरी? 41 बस्सा एत्री चीज दान केरा त सभ किछ पवित्र भोई गाल्हू। 42 पण एह फ्रिसाव तुसन पुड अफसोस तुस पुतनेरो त सेब्जारो दशावं हिंसो परमेशरे जो देतथ पण इन्साफ केरने त परमेशरेरी मुहबती कैरां दुर रहतथ लोडतु थुः की दशावं हेसे सैहीं साथी इन भी केरथे। 43 पण हे फ्रिसाव तुसन पुड अफसोस तुस लोक चहतथ की भवने मां तुसन एगरीं कुरसन पुड ब्शालह ते बज़ारन मां लोक तुसन क लिकतां नमसकार केरन। 44 पण एह फ्रिसाव तुसन पुड अफसोस तुस तैन शैडोरी कब्रां केरे ज़ैरेथ ज़ैन पुड लोक अनजान बुझतां पाव रखतन ते चलतन।

45 तैखन शैरितरे गुरन मैरां एके तैस जुवाब दितो हे गुरु ऐना गल्लां जोइतां तु इशी तौहीं लोरोस केरने। 46 यीशुए ज़ोवः शैरितरे गुराव तुसन पुड अफसोस तुस मैन्ह पुड त एत्रो भारो ल्दतथ ज़ै छुंनो असुखतो भोते ते एपु अंग्लोई भी न हुराथ। 47 तुसन पुड अफसोस तुस नेबी केरी कब्रां बनतथ ते तुशे बौव दादेइं तैना मारोरे थिये। 48 बस्सा तुस शहातथ की तुस अपने बौव दादेरे कम्मां केरी पुरी तैइद केरतथ किजोकी तैनेइं त नबी कत्ल कमाये ते तुस तैन नेबी केरी कब्रां बनतथ। 49 एलहेरलेइ प्रभु परमेशरेरी अक्कां ज़ोवःनबी त चले तैन क भेजनेण तैना तैन मैरां किछ कत्ल केरले ते किछन स्ताल्हे। 50 बस्सा इह कौम सारे नबी केरे खुनेरे ज़ै दुनियारे शुरु कैरां देंतो बगेवरोए जिमबार भोल्ही। 51 हाबलेरे खुने कैरां देंतो ते जाक्रियेरे खुने तग्र ज़ैना मन्दिरे मां कत्ल किये आंव जोतां की एह कौम तैनकेरे खुनेरी जिमबार भोल्ही। 52 पण एह फ्रिसाव तुसन पुड अफसोस तुसैहीं ज़ानेरी चाबी त अपने कबजे मां रखी तुस पण एपु भी दाखल न भोए ते ज़ैना दाखल भोनु चहते थिये तैना भी रोके। 53 ज़ैखन यीशु तैठ्ठां निसी जे त धर्म गुरेइं ते घेरो ते सर्करे मारे चोवरे पासना बडे असुखते सुवाल पुछने लगे। 54 ताके यीशुएरी जबांना कोई एरी गल निसे ज़ैस पुड तैस गलती लांन।

पाखणदेरे खलाफ खबरदारी

(मत्ती 10 : 26 - 27)

12 ऐसे फेरे हजारेइं मैन्हुं अकोठे भोइजे ते एकी होरी उंडे खिरकते थिये त यीशुए सैभन कैरां पैहिले अपने चलन खडे भोइतां ज़ोवःफ्रिसी केरे खमिरे येनी तैनकेरे रिती रुवाजे कैरां हुशार रेहियथ। 2 कोई चीज हेडकोरी नैइं ज़ै बांदी न भोए ते न कोई चिज छपोरीए ज़ै बांदी न भोए। 3 एल्हेरेलेइ ज़ैना गल्लां तुसैहीं आंधरे मां ज़ेवरिन तैना गल्लां लोइ मां शुंन्नीण ते ज़ैना गल्लां तुसैहीं सौडी मां ज़ेवरीन तैन्केरु एलांन लाए पुड भोनुएं।

कैस कैरां डरम

(मत्ती 10 : 28 - 31)

4 मिट्लाव आंव तुसन सैहीं सच्च ज़ोतां की तैन्केरां न डेरथ ज़ैना जानी नुकसान पुझातन तैसेरे बाद तैना किछ न केरी बटन। 5 पण आंव तुसन सैहीं सच्च ज़ोतां की कैसकैरां डरेरु लोडते ज़ैस जानी मारनेरे बाद तैसेरी आत्माइं नर्क मां छडनेरो अख्तियारे हां आंव तुसन सैहीं सच्च ज़ोतां की तैस कैरां डरा। 6 अगर दुई पैइसन मां टलाई चडोली बिक्चन पण परमेशर तैन मैरां केंची भी न बिसरे। 7 तुशे दौगेरे सारे बाल गंनोरेन डरा न्ना तुस त काही चडोलन कैरां भी जादे किंमतीथ।

यीशु कबूल केरनो ते न कबूल केरनो
(मत्ती 10 : 32 - 33 ; 12 : 32 ; 10 : 19 , 20)

8 आंव तुसन जोतां की जै कोई मैन्हुं केरे सामने मेरो इकरार केरेलहो मैन्हेरु मडुभी परमेशरे सुवर्गदुतां केरे सामने इकरार केरेलहो। 9 पण जै मैन्हुं केरे सामने मेरो इनकर केरेलहो त तैसरो इनकर परमेशरे सुवर्गदुतां केरे सामने कियो गालहो।

10 जै कोई मैन्हरे मड्डेरे खलाफ किछ ज़ोल्हो तै तैस माफ केरेलहो पण जै पबित्र आत्मा खलाफ किछ ज़ोल्हो तैस माफ न केरेलहो।

11 ज़ैखन तैना तुसन मन्दिरन मां ते बडे बडे हक्मन क नैल्हे त फ़िक्र न केरथ की अस कुन ज़ोम ते कैचरे जुवाब देंम। 12 किजोकी पबित्र आत्मा तुसन एस मोके पुड़ तुसन ज़ोल्ही की तुसैहीं कुन ज़ोनुएं।

एकी दौलत मंद बेवकूफेरु दृष्टान्त

13 हछे मैन्ह मौरां केंचे एकें ज़ोवःहे गुरु जी मेरे दूलाहे जो ज़ो की मेरे हेसे मौरां मेरो हेसो मेरे हवाले केरे। 14 यीशुए तैस जुवाब दितो आंव केंनी तुशो जैज फ़ैस्लो केरने बालो बनेवरोइं? 15 ते यीशु तैस सैहीं ज़ोवःहर किस्बेरे लाल्चे कैरां दूर भोइयथ ते न केंचेरी ज़ेईदाद केंचेरी जानी कैरां जादे भोए। 16 तैखन यीशुए तैस अक बार शूनाइ केंची अंबिरेरी ज़मिनी मां बडी फसल बनी। 17 तै अपने दिले मां सोचतां ज़ोने लगे की आंव कुन केरीं? मीं क ठारे नैइं की ज़ेडी आंव आन रेखी सैखीं। 18 तैखन तैनी ज़ोवःकी आंव अक कम केरतां की अपने पुरांने कोठार पुटतां हारे बड्डे कोठार बनैइं ते अपनु सारु आन तैसमां रखतां। 19 ते फिरी एपनी जानी सैहीं ज़ोनुएं की मिका त बडे सालन तग्र आन जम्मां भेवरुए आरामे सैहीं खातां ते एश केरतां। 20 पण परमेशरे तैस मैन्हुं जो ज़ोवःहे बँ अक्का अज्जे राती तेरी जान इठां चली गहनिएं ते ज़ैन किछ तीं जम्मा केरतां रखेरुए होरी केरे कम्मं एजनुएं? 21 एलहेरलेइ ज़े अपने लेइ दौवलत जम्मा केरते पण परमेशरेरी नज़री मां तै अंबीर न भोए एसेरो भी एहे हाल भोनुएं।

परमेशरे पुड़ भरोसो रखनो
(मत्ती 6 : 25 - 34)

22 तैखन यीशुए अपने चलन सैहीं ज़ोवःएहे गल्ले की आंव तुसन सैहीं जोतां की न त एपनी जानरी फ़िक्र केरा की तुस कुन खाले या पिल्हे ते एपनी जानी कुन डब्बैल्हे। 23 किजोकी जान खुराकी कैरां जादे ते जिस्म लिगडे कैरां बैद्धतां भोते। 24 कांवां केरा तक्क तैना न बेंन ते न कटन ते न तैस क गुदाम भोए ते न खाते भोन तां भी परमेशर तैस खाने जो देते ते तुस त चडोलन कैरां भी जादे किमतीथ। 25 तुसन मां कौन एरोहे की ज़े फ़िक्र केरतां सिर्फ अक घडी उम्रारी बधैईं सखते? 26 बस्सा ज़ैखन तुस एन अक निकडी ज़ैरी गल्ल भी न केरी बटथ त बाकी चीजां केरी फ़िक्र किजो केरतथ। 27 सोस्नेरे फुडु केरे तक्क की तैना कैचरे बेडोतन? तैस न मेहेनत केरन ते न कत्तन तां भी आंव तुसन सैहीं जोतां की सुलैमान बादशाह भी तैस फुडु केरो ज़ैरहो तैस कैरां घट न थुः। 28 बस्सा ज़ैखन परमेशरे मैईदानेरो घास ज़े अज़ अहे ते कलां लौवने मां फुक्नोएं एरहू लिगड लुवाते ते एह घट विश्वासे बालाव कुन ते तुसन रोडु लिगड न दैल्हो? 29 ते एस फिकरे मां न रेहियथ की तुस कुन खाले या पिल्हे ते न शक केरथ। 30 किजोकी दुनियारी सैरी जातां एस्से फिकरे मां लेगोरी रेहियन पण तुशो बाजी ज़ानते की तुसन कौल्हेरी कौल्हेरी ज़ुरुरते। 31 पैहिले परमेशरेरी बादशेहीयरी तलाश केरा फिरी तुसन एना सैरी चिजां मैल्ही गैहेली।

आसमानी दौलत
(मत्ती 6 : 19 - 21)

32 हे कम ज़बांनव उरा न्ना किजोकी तुशे बाजेरी खुशी एस्से माहें की ते तुसन बादशाही दे। 33 अपनु घरबार बेचतां धर्मरथ देथ ते एपु जो अक बेदुवा बनाथ ज़े पुरांनो न भोए सुगे मां दौवलत जम्मा केरा ज़ैन कधे न मुक्के ज़ेडी

न चौर पुजे ते न कीडो खाए। 34 किजोकी ज़ेडी तेरी दौवलत भोल्ही तैडी तेरो दिल भी लगनोएं।

बीझे राथ

35 सेवा केरनेरे लेइ रोडे चारे आडबंद लेइतां तियार भोथ ते दियो बैलतां रखा। 36 तैस मैन्हुं केरे ज़ैरे ज़ैना अपने मालकेरे डूलाहे मां प्चेईकी बलगने भोतन की ज़ैखन तै एजे ते दार गुडकान त अस दार खोल्म। 37 तैना नोकर मुबारकन ज़ैना अपने मालकेरे वापस एजने पुड़ बिंझै मैल्हत्तन आंव तुसन सैहीं जोतां की ते एपु तैस रोडे चारे एपु सैहीं साथी रौडी खाने बशालेल्हो ते तैस क एइतां तैस केरी सेवा केरेल्हो। 38 अगर मालक एधी राती एइतां अपने नोकरन बिंझै लाहे त तैसेरे लेइ कैत्री रोडी गल्ले। 39 पण याद रखा की अगर घररे मालके चौर एजनेरो पत्तो भोए त तै बिंझै बिशे ते अपने घरे चौरै न दे भोने। 40 बस्सा तुस भी तियार राथ ज़ैस घेडी तुसन खियाले नैइं भोनुं मैन्हेरु मडु एजी गहनुएं।

वफादार या बेवफादार दास
(मत्ती 24 : 45 - 51)

41 पतरसे पुछू हे प्रभुएह मुसाल ज़े तीं दिति सिर्फ इशे लेइए की सैभीकेरे लेइए? 42 परमेशर यीशुए ज़ोवःकौने दियान्न्दार अक्कमंद नोकर ज़ैसेरो मालक तैस अपने नोकरन पुड़ पुछुनो गन्नो रखे तके तैस केरी खुराक ठिक मौके पुड़ रोडे चारे बेटतो राहे? 43 तै नोकर मुबारके की ज़ैसेरो मालक एजे ते मालक तैसकैरां रोडे चारे कम केरतो लाहे। 44 आंव तुसन सैहीं सचूच जोतां की तै अपने सारे घरबारेरी हेरगेशरो अख्तियार तैसेरे सपुर्द केरेल्हो। 45 पण अगर ते नोकर अपने दिले मां जोए की मेरे मालके एजने हेजु बडु चीरे ते होरी नोकरन ते नोकरेन्न मार धाड केरनी शुरु केरे ते खेई पीतां नशे मां मस्त भोई गाहे। 46 ते तैस नोकरेरो मालक केंची एरहे दिहाडे एजे ज़ैइस तैस नोकरे एजनेरो पत्तो न भोए ते तै मालक एजी गाहे त तैस नोकरेरे टुके टुके केरतां ते तैसेरो हालत बेईमान केरी ज़ेरी भोल्ही। 47 तै नोकर ज़े अपने मालकेरी मरज़ी न ज़ाने ते न तैसेरे हुकमे पुड़ चले त अक दिहाडी तै पछताल्हो। 48 पण ज़ैनि नोकरे अपने मालकेरी मरज़ी ज़ानेरे अलावा खाने पीनेरु कम कियुं त तैस घट मार बज़ैल्ही ज़ैस जादे ज़िम्बारी मैल्हे तैस कैरां उमीद भी जादे रखैले ज़ैस क जादे जम्मा केरले तैसकैरां वापस भी जादे आंन्हेले।

यीओशु एरे एजनेरु सबूत
(मत्ती 10 : 34 - 36)

49 यीशु ज़ोवःआंव धेरती पुड़ अग लाने एवरोइं ते अगर अग खतोरी भोधी त रोडू थु। 50 पण मीं अक बसिसमां घिन्नोएं तै ज़ां तग्र न नैहीं तां तग्र आंव अपसोसै माहीं। 51 कुन तुस एन सोचतथ की आंव धेरती पुड़ सल्ला केरनेरे लेइ एवरोइं? नैइं आंव त ज़ोलहो की अलग केरने एवरोइं। 52 किजोकी अजेरे देते एकी घरेमां पंच मैन्ह एपुम्महेइं अन बन भोल्ही तैस एक्केकी सैहीं अन बने भोनिये 53 बाजी मड्डेरे खलाफ भोल्हो ते मडु बाजेरे खलाफ भोल्हु हैई कुईयरे खलाफ ते कुई हैईयरे खलाफ ते शिख नुशारे ते नुश शिखारे खलाफ भोनिये।

वकतेरी पिशान
(मत्ती 16 : 2 , 3)

54 फिरी यीशुए बडे मैन्ह मां ज़ोवःकी ज़ैखन तुस बिदलार डूबते पासेरां चलती लहतथ त तुस ज़ोतथ की झडी एजने बालीए ते तैने भोते। 55 ते जनुबेरे पासेरां हवा चली त तुस ज़ोतथ गर्मी भेवरिए ते तैने भोते। 56 एह दुनिया दाराव तुस ज़मीन असमानेरी हालत हेरतां मौस्मेरो अंदाजो केरनो ज़ानतथ पण इस ज़माने की न पशानतथ।

अपने मुद्दे सैहीं समझो (मत्ती 5 : 25 - 26)

57 तुस एपु फैस्तो की न केरथ की रोडु कुने। 58 जैखन तुस मुद्दे सैहीं साथी जैजे क गाथ त बत्ते मां तैससैहीं फैस्तो की न केरथ एरु न भोए तै तीं जैजेरे हवाले केरे ते जैज सिपैहीएरे हवाले केरे ते तू कैद भोइगास। 59 आंव तुसन सैहीं सच्च ज़ोतां की ज़ां तगर तु अक अक पाई न दैल्हो तां तगर तैड्डां न छुटैल्हो।

मनफिराथ यानाश भोध

13 तैस मोके किछ लोक तैडी थिये जैना तैस तैन गलीली केरे बारे मां ज़ोने लगे जैनकेरो लैहु पिलातुसे जानबरां केरी सुखत्रे हैहु मां मलेवरो थियो।

2 यीशुए तैन जुवाब दितो कुन तुस एन समझतथ की तैन गलीली केरो एत्रो बुरो हाल एल्हेरेलेइ भोऊ की तैना सैरी गलिलन कैरां जादे पापी थिये। 3 आंव तुसन सैहीं ज़ोतां की नैइं बल्के अगर तुस भी तोबा न केरल्हे त सभ एंचरे मुकी गहनेथ। 4 या कुन तैना अठारे जन्हें जैन ऊँढो सेलोमेरो बुर्ज बिछड़ोरो थु: ते तैना सभ तैस हैठ मैरी जे ते हारे युरोशलमेरे रहने बाले जादे कुसूरवार थिये? 5 आंव तुसन सैहीं सच्च ज़ोतां की नैइं बल्के अगर तुस भी तोबा न केरल्हे त तुस सभ एंचरे बरबाद भोई गहनेथ।

बे फल अंजीरेरु दृष्टान्त

6 तैसरां बाद यीशुए तैन अक मसाल शुनाइ केंचे मैन्हें एपनी बागी मां अक अंजीरेरो बुट लेवरो थु: ते तैस बुटे पुड़ फल तोप्ने आव पण तैस फल न मैल्हो। 7 तैखन तैनी बागबने सैहीं ज़ोव: हेर आंव ट्लाई साल पैहिले दैतो इस बुटे पुड़ फल लोरोहीं तोप्ने पण अज तग्र एस पुड़ फल न मैल्हो एस केटी छड एनी किजेई ठार चिकतां रखोरिए। 8 पण तैनी तैस जुवाब देइतां ज़ोवें मीं निदतां एसेरे चौवरे पासन खाद छडनिये। 9 अगर फिरभी फल न लगो त फिरी केटी देंनोएं।

सब्तरे दिहैडी कुबड़ी कौन्श बझानी

10 सब्तरे दिहाडी थी ते यीशु प्राथन भवने मां शिक्षा देने लोरो थु:। 11 तैडी अक कौन्श थी जैस अठारे सालां केरी दैती दुष्टात्तारे ज़ोने एत्री कमजोर भोवरी थी की कुबड़ी भेवरी थी ते केंची त्रिके तै सीधी न थी भोती। 12 यीशुए तै कुबड़ी कौन्श लाही त एपु क कुजाई ते ज़ोने लगे हे बैहींने" तु एपनी तकलिफि कैरां छुटी जेइ। 13 ते यीशुए तैस कौन्शी पुड़ हथ रखे ते तै लुशी पड्डी भोई ते परमेशरेरी तारिफ केरने लगी। 14 पण प्राथन भवनेरो पुरेहु यीशु पुड़ नराज भोव की एनी सबतेरी दिहैडी एस कौन्शी शिफा किजो दिती ते ज़ोने लगे की शा दिहाड़े क्मकाज केरनेरेलेइयन ते तैने मां शिफा भी दितोरी लोडचे ते सबतेरी दिहैडी त्रा। 15 यीशुए तैस जुवाब दितो एह दुनिया दारव कुन तुस सबतेरी दिहाडी अपने दांत गधै खोलतां पानी न पियाथ? 16 त कुन एन रोडु न भोव की जै कौन्श बेझोई तै अब्रहामेरी कुई थी जै अठारे सालां केरी दैती दुष्टात्तां बंधतां रखोरी थी त सबतेरी दिहैडी एह कौन्श छुटानी थी? 17 जैखन यीशुए एना गल्लां ज़ोइ त तैसेरे खलाफ ज़ोने बाले सैभी केरी बेजती भुई ते सारे लोक यीशुए जैन शानदार कम्मा अपने हथेइं कियोरां थियां खुशी लगे मनाने।

राइयरे दानेरु दृष्टान्त

(मत्ती 13 : 31 , 32 ; मरकुस 4 : 30 - 32)

18 तैखन यीशु तैन सैहीं ज़ोने लगे परमेशरेरी बादशाही कौस चिजारी जैरीए आंव कैस्सेहीं ज़ोइ? 19 तै सिव्लरे गलेवे बराबरे जै एकी मैन्हें एन्हतां एपनी बागी मां छडु ते लेगतां एत्रो बडो डाल भोव की चड़ौलु भी तैस पुड़ बिशने लगां।

खमीरेरु दृष्टान्त (मत्ती 13 : 33)

20 यीशुए फिरी ज़ोव:आंव परमेशरेरी बादशैहियरो बिस्तर कैस्सेहीं देइ? 21 तै अन्लटेरी जैरीए जैन एकी कौन्शां ट्लाई हैटी अट्टे मां सैनतां छडु ते सारु अट्टे अम्लटू बनु।

सुकडू दार

(मत्ती 7 : 13 , 14 , 21 - 23)

22 यीशु युरोशलमें म्मेहीं गहंते बार शहरन मां ते डलोवन मां शिक्षा दैतो च़लरो थियो। 23 केंचे यीशु पुछू हे प्रभु परमेशर कुन थोड़े ज़ैरे लोक पापे कैरां छुटेल्हे? यीशु तैन सैहीं ज़ोव। 24 सोकड़े दारेरां बत्तां गहनेरी कौशिश केरा किजोकी आंव तुसन सैहीं ज़ोतां की बडे लोक अंत्र गहनेरी कौशिश केरले पण न गैही बटेल्हे। 25 जैखन घररो मालक एकी बार अपनु दार बंद केरी छडते त तुस बेइर खड खडे दार गुडकांते रहतथ ते ज़ोते रहतथ की हे प्रभु परमेशर" इशे लेइ दार खोल ते तै तुसन जुवाब देते की आंव तुसन न जैनी तुस कौन्थ ते कौठां एवरेथ? 26 तैखन तुस ज़ोल्हे की असैइ तीं सैहीं साथी खेवरी पियोरी नैइं ते तीं इशै अंगने मां असंन शिक्षा नैइं दितोरी। 27 पण परमेशर तुसन सैहीं ज़ोल्हो आंव तुसन न जैनी तुस कौन्थ ते कौठां एवरेथ हे बेइमानव मीं कैरां दूर भोध। 28 जैखन तुस अब्रहाम इजहाक ते याकुब ते सभ नबी परमेशरेरी बादशैही मां सामने लाहेले ते अपनो आप बेरोहुं कढते लाहेले त लेरां दैते ते दंत चापते राहेले। 29 लोक मशरक मगरब जनुब ते शुमालेरां दैते परमेशरेरी बादशैही मां जैखन एइते लाहेले। 30 ते हेरा किछ एहरेन की जैना पैहिले थिये तैना पत्ती भोनेण ते जैना पत्ती थिये तैना पैहिले भोनेण।

हेरोदेसेरी दुशमनी

31 तैखने किछ फ्रिसी यीशु क आए ते ज़ोने लगे इड्डां निस ते कौस्कोई च़लो गा किजोकी हिरोदेस तीं मारने चहते। 32 पण यीशुए तैन ज़ोव:उन लोइन सैहीं गैहितां ज़ोथ की आंव अज ते कलां दुष्टात्ता कढने ते बिमारन बझानेरु कम केरने लोरोइं ते एन टलेई दिहैडन मां पुरु केरनुएं। 33 बस्सा मीं अज ते कलां ते टलेईदी चलतु रहनुएं किजोकी रोडु नैइं की नबी युरोशलमें कैरां बेइर मारो गाहे।

यरुशलमेरे लेई शोग

(मत्ती 23 : 37- 39)

34 हे युरोश्म हे युरोश्म तीं कैत्रे नबी कत्ल किये जै भी तीं क आव तै तीं माराव मीं कैही फैरेइ सोचु की तेरे मडन अकौट्टे केरीं ज़ैचरे कुकडी अपने बचन अपने फांघन हैठ रखे पण तुस राजी न भुए। 35 हेरा तुशु घर तुशै लेई छडु गहते ते आंव तुसन ज़ोतां की तुस मीं केंची त्रिके बी न लैही बटेल्हे ज़ां तग्र तुसन एन ज़ोनेरो मौको न एजेलो मुबारके तै जै परमेशरेरे नोवें सैहीं एइते।

फ्रीसेरे घरे मां यीशु

14 एकी बार यीशु एकी फ्रिसीसेरे घरे रौट्टी खाने जे त कही फ्रिसी केरी नज़र तैस पुड़ थी। 2 तैडी अक खेरडनो बिमार जैसेरी सैरी चेमडी रस पाक च़लती थी यीशु क सामने बिशोरो थु:। 3 यीशुए धर्म गुर्न ते फ्रिसीन पुछू की सबतेरी दिहैडी शिफा देंनी जैइजे की नैइं? 4 तैना चुप राहे तैखन यीशुए तैस बिमारे शिफा दिती ते घरजो भेजो। 5 ते फ्रिस्न सैहीं ज़ोव:कुन तुशो दांत या गधो ढढै ऊँढो खिरके ते सबतेरी दिहाडी भोए त कुन तुस तैस तैड्डां बेईर न कढैले? 6 ते तैन लोकेइं यीशुएरी गल्लां केरो जुवाब न देई बटो।

नग्रता ते रोडे सतकार

7 जैखन यीशुए हेरु की जैना लोक धंम बनेइतां रौट्टी खाने कुजेवरेन कौस चिजारी तलाशी माहन त यीशुए तैन अक बार शुनाइ। 8 जैखन कोई तुसन ड्लाहैरी धामी मां तुसन कुजाए जै तैनेइं ट्लाहना केरे लेइ ठार बिश्रेरे लेइ

राखोरिए तैडी न बिशथ भोई सखते की होरो कोई तुसन कैरां जादे ट्लारो ट्लाहंनो कुजेवरो भोए।⁹ ते तुसन दुईये जन कुजांने बालो तुसन क एइतां जोए एह ठार होरी केरे लेइए ते तुसन शरमेइतां खडउठनु पै ते सैभन कैरां पतर बिशनु पै।¹⁰ जैखन भी कोई तुसन धाम केरतां कुजाए त सैभन कैरां पतर बिशां तके जैखन तेरो कुजांने बालो एजे ते जोए मिट्ला अगर एइतंबिश त तैन लोकांकेरे सामने तेरी कैत्री इजत भोनीए।¹¹ किजोकी जै कोई अपनो आप बडो बनाल्हो त तै निकडो बनाव गाल्हो ते जै कोई अपनो आप निकडो बनाल्हो त तै बडो बनाव गाल्हो।

¹² फिरी यीशुए अपने कुजांने बाले सैहीं जॉवःजैखन तुस दिसैरी या रातरी धामी मां मैन्ह कुजाथ त अपने दौस्तन रिशतेदारन या अपने पुडौसन त अंमीसन जैरे न कुजेइयथ किजोकी तैना भी तीं कुजेइतां तेरु यवसान मुकेइ छडैल्हे¹³ ते बलके जैखन तु धम देस त टोंटे कने गरीब गुरबे परदेशी कुजेइयां।¹⁴ ते तुसन ब्रकत मैल्हेली किजोकी तैन क किछ भी नैइ जैससैहीं तैना तेरु एवसांन मुकेइ बटन ते तेरे एस एवसांनेरो फल धेर्मी लोकन सैहीं साथी फैस्लेरी दिहैडी मैल्हेलो।

बेडी धामरू दृष्टान्त

(मत्ती 22 : 1 - 10)

¹⁵ ट्लाहंन मैरां एक्के ऐन गल्लां शुंनतां यीशु सैहीं जॉवःपरमेशरेरी बादशैही मां रौट्टी खाने बालो मुबारक भोल्हो।¹⁶ यीशुए तैस जुवाब दितो केंचे मैन्हें अक बडी धाम दितो ते बडे लोक कुजाए।¹⁷ जैखन रौट्टी खानेरो बेलो अव त तैनी अपनो नोकर भेजो की धामैरन जो की एजा रौट्टी बंनोरिए।¹⁸ पण धामैरेइ सैभेइ मिलतां इतराज कियो ते पैहिले मैन्हें जॉवःकी मीं उडार घिनेरुए मीं तैस हेरने गहंनुए ते आंव तींक मिनत केरतां की मीं रहने दे।¹⁹ त होरो जॉने लगे मीं पंच हल्लां दांत घिनेरेन ते आंव तैन लाने चलोरोइ ते आंव तींक मिनत केरतां की मीं रहने दे।²⁰ अक होरो मैन्हें लगे जॉने मीं ड्लाह कियोरोए ते मेरु एज्नु ठीक नैइ।²¹ तैखन नोकरे वापस एइतां ऐन सैरी गल्लां अपने मालके शुनेइ मालके बडी सरक अई तैनी अपने नोकरे जो जॉवःइस शहारे मां गा ते लेंगे लुथे गरीब गुरबे न्ने नियांने भत्ते टोंटे कने इरां कुजा।²² नोकरे जॉवःएह परमेशर जैन तीं जॉवःमीं तैने कमावं पण फिरी भी ठार खालीए।²³ मालके नोकरे सैहीं जॉवःबत्तरे आसे पासे उडारन म्महेइ गा ते लोक मजबुर केरतां आंह ताके मेरु घर भरतां भोए।²⁴ किजोकी आंव तीं सैहीं जोतां की जैन पैहिले कुजेवरे थिये तैन मैरां कोई भी मेरी धामी मां रौट्टी न खेई बटेल्हो।

चेलो बन्नेरी कीमत

(मत्ती 10 : 37 - 38)

²⁵ बडे लोक यीशु पती चलारे थिये, तैनी पत्रों तक्कु ते जॉव।²⁶ बडे लोक यीशु पती चलारे थिये तैनी पत्रों तक्कु ते जॉव।²⁷ अगर कोई मींक एइते पण ते पियार जै ते अपने हेई बोव ड्लाह बेहीन ते एपनी जांनी सैहीं बराबर पियार न रखे तै मेरो चेलो नैइ।²⁸ ते जै कोई अपनी फांसी छूइतां मीं पती न चले तै मेरो चेलो न भोई सखे।²⁹ कधे एरु न भोए की खाई कटनेरे बाद तैस बनेइ न बटे ते तकने बाले हस्ते रहंन।³⁰ ते जॉन एनी मैन्हें मैहू त शुरु कियो पण बनेइ न बटो।³¹ या फर्ज केरा की कोई बादशाह होरी बादशाह सैहीं लडाई केरनेरे लेइ सोची राहोरो भोए त कुन पैहिले एन न सोचेल्हो की बिही हजार फौवजी सैहीं मुकबलो आंव दश हजार फौवजां सैहीं तैसरो मुकबलो केरी सखतां की नैइ? ³² अगर ते मुकबलो न केरी सखे त तैस बादशाह सैहीं जै दुरे मैन्हें भेजतां तैस्सेहीं सल्लारी मिनत केरे।³³ एचरे अगर जै कोई तुसन मैरां अपनु सभ किछ न छडे मेरो चेलो न भोई सखे।

बे स्वादू लूण

(मत्ती 5 : 13 ; मरकुस 9 : 50)

³⁴ लुंन रोडी चिजे पण अगर तैसरो लुंनारे मुक्को त तैन कौस्सेहीं लुंनू बनावं गहते? ³⁵ लोक तैस बैरोहुं शैरी दैल्हे जैस शुंनेरे कन भोन त तै शुंने।

हेरोरी भैडरू दृष्टान्त

(मत्ती 18 : 12 - 14)

15 बडे लोक धडत घिन्ने बाले ते पापी लोक यीशु क एइतां तैसेरी गल्लां शुंने लोरे थिये।² फ्रिसी ते धर्म गुरु शिकयत केरतां जॉने लगे की एह मैन्हें पैण सैहीं ताल मेल रखते ते तैन सैहीं साथी खाते पिते।

³ यीशुए तैन अक बार शुंनई।⁴ तुसन मां एहरो भी कोई आहे जैसक शौव भैडां भोन ते तैन मैरां अक हेरोए ते नडेंनुएं भैडां तैडी जैरे जंगले मां छैडतां तोप्ने न गाहे जां तय तैस मैल्होरी नैइ? ⁵ ते जैखन ते तैस मैल्हे त खुशी सैहीं कधे पुड छुईतां आंहें।⁶ ते घरे एइतां अपने दोसतन ते भियालन कुजेइतां जोए की अज मींसैहीं साथी खुशी मनाथ की अज मेरी हेरोरी भैड मैल्होरीए।⁷ आंव तुसन सैहीं जोतां की एचरे नडेंनुएं परमेशरेरी तलाश केरने बाले जैना तोबा केरनेरे मौताज नैइ एक्की पैपेरे तोबा केरने सैहीं सुर्गे मां बडी खुशी बनई गचे।

हेरोरे सिकेरू दृष्टान्त

⁸ कुन एहरी भी कोई कौन्श भोल्ही जैस्का चेंदरे दश सिके भोन ते अक हेरोए ते तै दियो बैलतां घरे अत्र धुनी न दे जां तय मैल्होरो नैइ तोमी न राहे? ⁹ ते तोप्नेरे बाद अपने पुडौसन ते एपनी सेहेलन कुजेइतां एन न जोए की एजा मींसैहीं साथी खुशी मनाथ की अज मेरो हेरोरो सिक्को मैलोहोए।¹⁰ बसा आंव तुसन सैहीं जोतां की एक्की पैपेरे तोबा केरने सैहीं परमेशरेरे सुवर्गदूतां केरे सामने बडी खुशी मनाई गहचे।

उडाव मडेरू दृष्टान्त

¹¹ फिरी यीशु जॉवःकेंची मैन्हेरां दुई मड्डां थियां।¹² तैन मैरां निकडे जैरे अपने बोवेवे सैहीं जॉवःहे बाजी जेईदाती मां जै मेरो हेसो बनते तै मीं दे तैनी हिसो बंटो ते दितो।¹³ थोडे दिहैडन मां निकडे मड्डे अपनु सभ किछ सामान जेईदात होरी मुल्खे जो निही ते एपनी एशो अशरती मां लुट्टाई।¹⁴ जैखन तैनी सभ किछ मुकेई छड्डु त तैस मुल्खे मां बडो काल पैव ते तै होरी केरो गुलाम बनो।¹⁵ तैखन ते तैस मुल्खेरे एक्की रहने बाले क कम तोपने पुजो त तैनी ते अपने उडारन मां सुर चारनेरे कम्मं लाव।¹⁶ तैडी तै दानो जै सुर खाते थिये तैस्सेहीं अपनु पेट भरनु चहतो थुः पण तैस तै खुराक भी खाने न थिये देते जै सुर खाते थियेथुः।¹⁷ तैखन तैस हौश आई ते जॉने लगे मेरे बाजी केरे मुजुरन हदी कैरां जादे रौट्टी मैहल्चे पण आंव इडी फाके लोरोइ मरने।¹⁸ मीं खडे ऊठतां अपने बाजी क गहंनुएं ते तैस्सेहीं जॉनुएं हे बाजी आंव परमेशरेरी नजरी मां ते तुशी नजरी मां पापी।¹⁹ हुंनी आंव एस काबल त नैइ की तुशु मड्डु भोइ पण मिमी अपने मुजुरन मां रखा।

²⁰ बसा तै उडो ते अपने बाजी कैझो चलो जेव ते हेजु ते बडे दुरे थुः ते तैसेरे बाजी तै लाहू ते तैसेरे बाजी बडो कियास आव तैनी दैवडतां तै गले लाव ते खुब खुशी भोव।²¹ मड्डे अपने बाजी सैहीं जॉवःएह बाजी आंव परमेशरेरी नजरी मां ते तुशी नजरी मां पापी हुंनी आंव एस काबल त नैइ की तुशु मड्डु जॉइ।²² पण बावें अपने नोकरन सैहीं जॉवःलुश केरा ते सैभन कैरां पैहिले रोडां जैरां लिगां एस मड्डे लुवाथ ते एस्सेरे हथे आंवटी ते पांउन जुटी लुवाथ।²³ ते अक बडो जैरो हुड मारा ताके आस सभ जाने खाम ते खुशी मनाम।²⁴ किजोकी मेरु मड्डु जैन मैरी जेवरु थुः अज जीतु भेवरुए हेरोरु थुः ते मैल्हेरुए बस्सा तैना खुशी मनाने लगे।

²⁵ तैईस बडू मड्डु जैन उडारे मां थियुं ते घरजो एवरो थियो जैखन ते घरे नेडे पुजो त तैनी गितां केरी त नचनेरी शौर शुनी।²⁶ तैनी अक नोकर कुजाव ते तैस पुछू एह शौर कीजेई लोरी भोने? ²⁷ नोकरे तैस्सेहीं जॉवःतेरो निकडो द्लाह घरे एवरोए ते तेरे बाजी अक बडो हुड मारोरोए किजोकी तै ठीक ठाक घरे पुजोरोए।²⁸ पण बुढेरो बडू मड्डु नाराज भोवं ते अत्र भी न लगे एजने पण तैसेरे बाजी तैस मिठानेरी कौशिश की।²⁹ बडे मड्डे अपने बाजी सैहीं जॉवःहेरा आंव कैत्रे सालां केरी देती तुशी सेवा केरने लोरोइ ते कधे तुशु जॉनु नैइ मोडेरु ते तुसेहीं कधे अक छेल्सरु अक छेडु नैइ दितेरु की आंहें अपने दौस्तन सैहीं खुशी मनेइ।³⁰ पण जैखन तुशु निकडु मड्डु अपनु सभ किछ

लुटेइतां वापस आंव त तैसेरे लेइ अक बडो हुड मारो। 31 तैसेरो बाजी जौने लगे मड्डा तु त मिंगकास ते जैन किछ मिकाह तैन सभ तेरुए। 32 पण असेई खुशी मनानी जरूरी थी किजोकि तेरो एह निक्डो द्वाहा मैरी जेवरो थु: अज जितो भेवरोए हेरोरो थु: ते अज मैलहोरोए।

चलाक भण्डारी

16 फिरी यीशुए अपने चलन सैहीं जॉव:की केंची अम्बीरेरो अक मुन्शी थियो? लोकेइ तैसेरी शकैइत तैसेरे मालके सैहीं लाई की एह तेरो माल खुर्द बुर्द करने लोरोए। 2 मालके तै कुजाव ते जॉव:एन कुने जैन आंव तेरे बारे मां शुंने लोरोइ? सारो हिसाब किताबे मां अजैरां बाद तु मेरो मुन्शी नैइं राहेलो। 3 मुन्शें अपने दिले मां सोचु मेरो मालक मेरे कम्मं कैरां मीं कदने लोरोए मित्ती त न घेडोए शमारिमारे भिछिया भी न मैगोए। 4 आंव जानतांइ की मीं कुन केरनुए इड्डां कदनेरे बाद भी लोक मीं खुशी सैहीं अपने घरे मां कुबूल केरतन। 5 बस्सा तैनी अपने मालकेरो अक कर्जदार तोपो पैहिले एक्की पुछू तीं क मेरे मालकेरे कैत्रे रुपैइएन? 6 तैनी जुवाब दितो तेलेरे शौव पीपां केरी किमते इना रहं तेरां काक्कां ते बिशतां शौवरां पंजहा बना। 7 फिरी तैनी होरी सैहीं जॉव:तींके कैत्रे रुपैइयेन? तैनी जॉव: गैहुं केरी शौव बोरी केरी किमते इना रहं तेरां काक्कां ते बिशतां शौवरी एशही लिखी दे। 8 मालके तैस बेईमान मुन्शैरी तारिफ की एल्हेरेलेइ की तैनी बेडी सुजेगी सैहीं कम कियेरु थु: किजोकी इस दुनियारे लोक सोव्दागरी करने बाले परमेशरेरे धेर्मी लोकन कैरां बडे हुशार भोल्त। 9 आंव तुसन जोतां की बेईमनरी कमेई सैहीं भी अपने लेइ दौस्त तियार केरा जैखन तै जगा गाहे त तुसन अपने दौस्तन कैरां तुसन आसे पासे ठार मैल्हे। 10 जै धगसेरे मां ईमानदेरी सैहीं रहते ते हछे मां भी ईमानदार रहते। 11 बस्सा अगर तुस दुनियारी झुठी धन दौवलती मां ईमानदार न भुए त अपनी सचूची दौवलत कौन तुशै हवाले केरल्हो? 12 अगर तुसैहीं होरी केरो माल खिलत बिलत कियो त जै तुशौ अपनो माले कौन तुसन दैल्हो?

13 कोई नोकर दुई मालकां केरी सेवा न केरी बटे या त तै एक्की सैहीं नफ्रत केरल्हो ते होरी सुरखल्हो या एक्की सैहीं इमानदारी केरल्हो ते होरी बुन्हीं बेहीं एछैइं सैहीं तक्कैल्हो तुस परमेशरेरी ते दौवलतरी दुयां केरी सेवा न केरी सखत।

यीशु एरे किछ उपदेश

(मत्ती 11 : 12 , 13 ; 5 : 31 , 32 ; मरकुस 10 : 11 , 12)

14 तैखन धडैलाशाही फ्रिसी एन गल्लां शुन्तां यीशुरी हासी बनाने लगे। 15 यीशु तैन जो जॉव:तुस तैनाथ जैना लोकन मां अपनो आप बडो रोडो साफ सुथरो हेरान्त? पण परमेशर तुशे दिलेरी हालत जानते किजोकी जै चीज लोकां केरे लेइ बडी रोडी ते परमेशरेरी नजरी मां किछ भी नैइं। 16 शासत्रेरी त नेबी केरी गल्लां युहाने तग्र चेलती रेही ते फिरी परमेशरेरी बादशैहीयरी खुशखबरी शुनाने लगे ते हर कोई तैस्मा दाखल भौनेरी बडी कौशिश केरने लागेरेन। 17 पण धतली अम्बर टेली गहलु पण मेरो वचन कधे न टलेल्हो। 18 जे कोई अपनी कौन्श शैरतां होरी सैहीं इलाह केरते ते जन्हा केरते ते जै छेडोरी कौन्शी सैहीं इलाह केरते ते भी जन्हा केरते।

दौलतमंद मैन्हु ते गरीब लाजर

19 अक मैन्हु बडो आम्बीर थु: ते तै बडां रोडां लिगडां लातो थु: ते बडो माघो कपडो लातो थु: ते रोज एश अशरती मां मस्त रहतो थु:। 20 अक बडो गरीब मैन्हु जैसेरु नोव लाजर थु: तैसेरे दारे मां बिशतो थु: तैसेरी सारी जान खेराडेइं सैहीं भरतां थी। 21 तै चहतो थु: की आम्बीर मैन्हेरे टुकेइं सैहीं अपनु पेट भेरीं पण तैडी कुत्रां एडतां थियां ते तैना तैसरां खेरडां भी चटतां थियां। 22 फिरी एरु भोव की तै गरीब लाजर मैरी जेव सुवर्गदूतेइं तै छुइतां अब्रहामेरे पौट्टे मां छडो ते आम्बीर मैन्हु भी मैरी जेव ते तै दैब्बी छडो। 23 जैखन तैनी चकैरी अगी मां अपनी एछी घैडी? त दुरेरां तैनी अब्रहाम लाहू ते तैसेरे कुम्मं मां लाजर लाहू। 24 तै चिडां मैरतां जौने लगे एह बाजी अब्रहाम मीं पुड रेहेम केर ऐस लाजर भेज ते एह अपनी आंग्लोई पैनी सैहीं सेल्तां मेरे ऐशी मां छडे

किजोकी आंव अगी मां तडफने लोरोइं। 25 पण अब्रहामे जॉव:मड्डा यद केर तीं त अपनी जुवेनी मां सभ रोडी चीजां मैल्ही ते इस लाजरे सिर्फ बुरी चीजां मैल्ही पण एह हुन्न इडी आरामे मां हैं ते तु तकलिफी माहंस। 26 ते एन गल्लां केरे अलावा इशे ते तुशे मुझाटे अक बडो नालोए ताके जै कोई पार गंधनु चाहे न गैही सखे ते जै वार एज्नु चाहे न एजी सखे। 27 तैनी मैन्हें जॉव:एह बाजी अब्रहाम" आंव जौवले हथ केरतां जोताइं की तु लाजरे दुनियाई मां मेरे बाजी केरे घरेभेज। 28 तैडी मेरे पांच द्वाहा आंन्ह ते तैन इही बिस्तार दे एरु न भोए ते तैना भी इस अगी मां एजन। 29 पण अब्रहामे तैस जॉव:तैन क मुसै नेबेरु शासत्रे ते नेबी केरी कितबां त आंन्ह तैना तैन केरी शुन्न। 30 तैनी मैन्हें जॉव:नैइं एह बाजी अब्रहाम अगर कोई मुडदन मैरां जितो भोइतां गाहे त तैना जरूर तोबा केरल्हे। 31 पण अब्रहामे तैस्सेहीं जॉव: अगर तैना मुसैरी ते नेबी केरी न शुन्न ते अगर कोई मुडदन मैरां जितो भोइतां गाहे त तैना तैसेरु भी यकीन न केरल्हे।

टोकरारी वजा बनू

(मत्ती 18 : 6 , 7 , 21 , 22 ; मरकुस 9 : 42)

17 तैखन तैनी अपने चलन सैहीं जॉव:एन न भोई सखे की लोकन टोकर न लगे पण अपसोसे तैस मैन्हु जो जै होरी केरे लेइ टोकर बनते। 2 तैसेरे लेइ त एन्ने रोडु थु: की द्वालाटोरो द्वालेइटोल तैसेरे गले उन्डो छेडतां ते स्मुद्रे मां शैरतां छडनो थु: ताके तै होरी निक्न जेई टोकर न बने। 3 बस्सा हुशियार राथ अगर तेरो द्वाहा पाप केरते त तैस समझाथ ते अगर तै तोबा केरते त तैस माफ केरा। 4 अगर तै एकि दिहेडी मां तेरो सत्ते बार तेरो पाप केरे त अगर तिका तै सत्ते फेरेइं तीका एइतां तोबा केरे त तु सत्ते फेरेइं तुस तैस माफ केरथ।

विश्वास

5 चलेइं परमेशरे सैहीं जॉव:की एह परमेशर ईशो विश्वास बधा। 6 परमेशर यीशुए जॉव:अगर तुशौ विश्वास सिवलारे गलेवे बराबर भी भोल्हो त तुस इस तुत्तेरे बूटे जो जोइ सखतथ की इडां उखड ते सुमुद्रे मां लंग त तै तुशौ हुक्म म्नेल्हो।

एकी दासेरो फर्ज

7 तुसन मां एरहो कौने जैसेरो नोकर उडारां बेंतो भोए ते या गोरु चारतो भोए ते जैखन तै उडारे मैरां घरे एजे त तैसेरो मालक तैस जोए की लुश केर ते बेशकी पुड बिश। 8 या एन न जोए की मेरी रौडी तियार केरथते जां तग्र आंव खेइं पीं त्रा ते जां तग्र आंव रेज्जीं त्रा तु मेरी सेवा केरतो रह ते तैल्लां पत्ती तु भी खा? 9 कुन तै एल्हेरेलेइ नोकरेरु शुकर केरल्हो की तीं तैन कियुं जैन तीं केरनेरे लेइ जेवरु थु: 10 एचरे जैखन तुस भी एन गल्लां केरी तस्दीक केरल्हे जैन केरनेरो तुसन हुक्म दितोरो थु: जोथ की अस्सां निकम्मे नोकरमम? असेई तैने कियुं जैन न थु: केरनु।

कोदहेरे दश रोगीबझाने

11 एक्की फेरे यीशु यरुशलमेरे पासे चलारे थिये ते तै सांमारिया ते गालिले मम्हेइं चलारे थिये। 12 जैखन तैना एक्की इलावें मां पुजे त तैडी दश कौडी मैल्हे जैना दुर खेडोरे थिये। 13 तैनेइं बडे जोरे सैहीं जॉव:हे यीशु हे गुरु असंन पुड रेहेम केर। 14 यीशुए तैन हेरतां जॉव:गाथ ते अपनो आप पुरेहुतन हेराथ ते सचूचै एरहू भोव की गहते बार बत्ते तैन्केरु कौद साफ भोई जेव। 15 पण तैन मैरां सिर्फ अक कौडी अपनु कौद हेरतां की तैसेरु कौद साफ भेवरोए खुशी भोइतां बडे जोरे सैहीं परमेशरेरी तारिफ केरतो वापस अव। 16 ते यीशु केरे पांउन पुड दौग रेखतां शुक्र लगे केरने? ते एह मैन्हुं सांमरी थु:। 17 यीशुए तैस पुछू कुन तैन दश कौडी केरु कौद साफ नैइं भेवरे? फिरी तैना कौरां जे? 18 कुन एस परदेशेरे अलावा तैन होरन एनी हिमत न अई की गैहितां परमेशरेरी तारिफ केरम? 19 तैखन यीशुए तैस जॉव:खडो उठ ते चलो गा तेरे विश्वासे तु ठीक कियोरोस।

परमेशरेरी बादशाही एजनी
(मत्ती 24: 23- 28, 38 - 41)

20 फ्रिसी यीशु पुछने लगे की परमेशरेरु राज कैइस एजनुएं? यीशुए तैन जुवाब दितो की परमेशरेरु राज एरु नैइं की लोक तैस एइते लेही बटन। 21 ते जॉन की हेरा इडी या उडीहे एंकरे नैइं बलके परमेशरेरु राज तुशे मुझाटे। 22 ते यीशुए अपने चलन सैहीं जॉव:तै दिहाडी भी एजनिएं की जैईस तुस परमेशरेरी दिहैइडन मैरां अक दिहाडी हेरनेरी उमीद रखेले पण न हेरी बटलहे। 23 लोक तुसन सैहीं जालहे की हेरा तै इडी या उडीए या हेरा की तै इडीए पण तुस तैरां न गैहीयथ ते न तैनकेरी सेवा केराथ। 24 किजोकी जैचरे बिजली अम्ब्रे मैरां चेन्कतां एक्की पासेरां होरी पासे चली गहचे तैचरे मैन्हेरु मडु तैस दिहैडी बांदु भोलहु। 25 पण जरूरीए की तै पैहिले दु:ख झैले ते इस जमानेरे लोक तैस घटया बुझन। 26 ते जैरु नुहेरे जमाने मां भेवरु थु: तैरहु मैन्हेरे मड्डेरे जमाने मां भी भोलहु। 27 तैईस भी लोक खाते पीते थिये ते डलाह बर भोंते रहते थिये ते जां तग्र नुहु किशती मां न थु: जेवरो तां तग्र सभ किछ भोंतु राहूं? ते फिरी तौफान आव ते सभ किछ खतम भोई जेवं। 28 ते जैरु लुतेरे जमाने मां भोंतु थु: की लोक खाते पीते थिये बपार केरते बागां लाते ते घरां बनाने मां मस्त थिये। 29 पण जैस दिहैडी लूत सुदुमें मैरां बेइर निसो त पत्रोंहुं अम्ब्रेरां गंधकेरी अग बैखतां सभ किछ खतम केरी छडु। 30 ते परमेशरे अबन आचरे एजनेरे दिहाडे भी एरहु भोंनुएं। ते परमेशरे मड्डेरे एजनेरे दिहाडे भी एरु भोंनुएं।

31 तैस दिहैडी जै लाए पुड भोलहो त तैसेरो माल सबाब घरे मां भोलहो त तैस नैणे अत्र न एजे ते जै उडारे मां भोलहो तैभी वापस न गाहे। 32 लुतेरी कौन्श याद रेखाथ। 33 जै अपनी जान बचांनेरी कौशिश केरेलहो तै तैस गुंवाल्हो ते जै तैस गुंवाल्हो तै तैस बचालहो। 34 आंव तुसन जोतां की तैस राती दुई जन्हे एक्की खटी पुड झुल्लोरे भोलहे अक नैनोएं ते अक छडनोएं। 35 दुई कौन्शां हिटलाट पिहती भोलही त अक नैनीएं ते अक तैडी छडनीएं। 36 दुई मैन्हुं उडारे मां भोलहे त अक नैनोएं ते अक तैडी छडनोएं। 37 एन शुनतां तैनेइं यीशुए पुछ असंन जौ एन कौडी भोलहु? यीशुए तैन जॉवं जैडी जिग भोते तैडी इलां भोईचन।

अधर्मी न्यायी ते बेवरु दृष्टान्त

18 यीशु चहते थिये की चलन पत्तो लगे की हिमत हारनेरे बाँर दुआ केरतु राहेरु लोडते एल्हेरेलेइ तैनी तैन अक बार शुनाई। 2 एक्की शहरे मां अक काजी रहतो थु: ते तै न परमेशरे केरां डरतो थु: ते न मैन्हेरी परवा केरतो थु:। 3 तैस शहरे मां अक बैच्वा कौन्श रहती थी जै तैस कैजी क एइंती रहती थी ते तैस क मिनत केरती रहती थी की मीं मुद्देईं केरां छुटा। 4 पैहिले त तैनी एजो खियाल न कियो पण जैखन एह हिसाब चलतो राहु त तैनी अपने दिले मां जॉव:सचुचै की न आंव परमेशरे केरां डेरीं ते न मैन्हेरी परवाह केरीं। 5 पण एह बैच्वा कौन्श मीं परेशान केरती रहचे एल्हेरेलेइ आंव एसारो इन्साफ केरेलहो ना त एसां मेरे न्के मां दम अन्हनोएं। 6 परमेशरे जॉव: शुना एह बेइनसाफ काजी कुन लोरोए जॉने। 7 बस कुन परमेशर अपने चुनोरे लोकां केरो फैस्तो केरने मां चिर लालहो जैना रात दिहैडी फराघ केरते रहतन? 8 आंव जोतां की तै तैनकेरो फैस्तो केरेलहो ते लुशी केरेलहो फिरी भी जैईस मैन्हेरु मडु एजेलहो त कुन धेरती पुड विश्वास मैल्हेलो?

फ्रिसी धड़त नेने बालेरु दृष्टान्त

9 यीशुए किछ एरहे लोकन अक बार शुनाई की जैन अपनो आप बडो धर्मी बुझते थिये ते होरन किछ न थिये बुझते। 10 दुई मैन्हुं दुआकरने प्राथन भवने मां जे अक फ्रिसी थु: ते होरो धड़त (टेक्स) घिने बालो थु:। 11 फ्रिसं खडे भोइतां अपने दिले मां एह दुआ की की एह परमेशर आंव तेरु शुक्र केरतां की आंव होरी मैन्हुं केरो जैरहो नैइं जैना लुंड लफंगे बदमाशन ते इस धड़त घिने बालेरो जैरहो भी नैइं। 12 आंव हफते मां दुई बार ब्रत रखतां ते एपनी कर्माईयरो दशावं हिस्सो परमेशरे जो देतां।

13 पण तै फ्रिसी धड़त घिने बालो जै दूर खड़खड़ो थु: तैनी एनु भी न केरी बटु की उबरु तक्के बलके छाती कुटतां जॉने लगे की हे परमेशर मीं पैपी पुड रहम केर। 14 आंव तुसन सैहीं सचुच जोतां की एह मैन्हुं तैस होरी केरां रोडो निसतां अपने घरे जो जेव किजोकी जै कोई अपनो आप बडो बनालहो तै निकडो बनाव गालहो ते जै अपनो आप निकडो बनालहो तै बडो बनाव गाहेलो।

बचन बरकत देनी

(मत्ती 19 : 13 - 15 ; मरकुस 10 : 13 - 16)

15 फिरी किछ लोक निके मड्डन यीशु क अन्हने लगे तके यीशु तैन पुड दुआकेरे चेलेइं तैन लाहूं त तैन धमकए ते ठाकु। 16 पण यीशुए मड्डां एपु क कुजां ते चलन सैहीं जॉव:मड्डां मीं क एजने देथ एन न ठाका किजोकी परमेशरेरी बादशाही एरहां जैरहां केरीए। 17 आंव तुसन सैहीं सच जोतां की, जै कोई परमेशरेरी बादशाही मां गहनेरे लेइ अपनो आप निके बचन बराबर ना बनाए, तां तग्र परमेशरेरी बादशाही मां दाखल ना भोई सखे।

दौलतमन्द मैन्हुं ते सदा रहने वाली जिन्दगी

(मत्ती 19: 16- 30; मरकुस 10: 17- 31)

18 केंची युहुदी यीशुए पुछ एह रोडे गुरु आंव कुन केरीं की हमेशरी जिन्दगरो बारस बेनी सैखी? 19 यीशु जुवाब दितो तु मींजो रोडो किजो जोतां रोडो त सिर्फ अक्के परमेशरे। 20 तु एन हुक्म त जानतां की बदमाशी नैइं केरनी खुन नैइं केरनां चोरी नैइं केरनी झुठी शाहात नैइं देनी ते अपने अम्मा बाजी केरी सेवा केरनी। 21 तैनी युहुदें जॉव:आंव एन सैभी गल्लन पुड निकडारेरो देतु अम्ल केरतो राहोरोइं। 22 जैखन यीशुए एन शुनु त तैनी जॉव:एक्की गल्ली पुड अम्ल केरनु राहेरु आपनु सभ किछ बेची छड ते तै पैइंसो गरीबन बेटतां दे तीं सुगं मां दौवलत मैल्हीए फिरी एइतांमीं पत्ती चल। 23 एह गल शुनतां ते बडो उदास भोई जेव किजोकी तै बडो अम्बीर थु:। 24 यीशुए तैस हेरतां जॉव:अम्बीरां केरु परमेशरेरी बादशाही मां दाखल भोंनु केनु आसुखतुए। 25 ऊंटेरु सुलरे नाके म्महेइं निन्सु सुखतुए अम्बीरेरु परमेशरेरी बादशाही मां दाखल भोंनु असुखतुए। 26 जैनेइं एह गल शुनी त तैना पुछने लगे फिरी कसेरी मुखती भोई सखचे। 27 यीशु जुवाब दितो जै गल मैन्हुं केरेलेइ आसुखतीए तै परमेशरेरे लेइ सूखतीए। 28 पतरसे यीशु सैहीं जॉव:हेर असां त सभ किछ छैडतां तीं पत्ती चलोरें। 29 यीशु तैन सैहीं जॉव:आंव तुसन जोतां की एरहो कोई नैइं की जैनी परमेशरेरी बादशाहीयरे लेइ अपनु घर बार ते कौन्श ते हाज बाँव ते बाल बचे शारोरे भॉन। 30 पण तैस इस दुनियाई मां किछ न मैल्हे ते एजने बैली दुनियाई मां हमेशरी जिंदगीए।

अपने मौतरे बारे मां यीशु एरी टलाइयोंव भविश्वानगी

(मत्ती 20 : 17 - 19 ; मरकुस 10 : 32 - 34)

31 यीशु बहारे चले एपुसैहीं साथी निये ते तैन जॉने लगे हेरा अस यरुशलम जे चलोरेम ते नेबेइं जैन किछ मैन्हेरे मड्डेरे बारे मां लिखेरुए तैन पुरु भोलहु। 32 तै गैर युहुदी केरे हथे देनोएं ते तैसरो मजाक बन्हांनोएं ते तैसेरी बेजती केरनीएं ते तैसेरे तुत्रे पुड थु:कनुएं। 33 तैस कोडे मारेल्हे ते तैस मैरी छडेल्हे पण तै टलेइयावं दिहाडे फिरी जितो भोलहो। 34 तैनेइं एह गल न संमझी बटी ते यीशुएरी एस गल्लरो मतलब तैन केरां छप्पोरो राहु।

काने भूखैरु दृष्टान्त

(मत्ती 20 : 29 - 34 ; मरकुस 10 : 46 - 52)

35 ते एरु भू की जैखन तैना यरीहोएरे नेडे पुजे त अक कांनो मैन्हुं बत्तरे डलेखी विशोरो पैइंसे मगतो थु:। 36 जैखन तैनी हछे मैन्हुं केरी छेड शुनी त तै पुछने लगे की एह कौल्हेरी शोर लोरी भॉने। 37 लोकेइं तैस जॉव:की यीशु नासरी कोस्कोई चलरोए। 38 तै चिंदां मैरतां जॉने लगे हे यीशु नासरी दाऊदेरा मड्डा मीं पुड रहेंम केर। 39 यीशुए सैहीं साथी चलने बाले लोक तैस कने मैन्हुं धमकाने लगे, की चुप रह, पण तै मना जादे जोरे जोरे चिंदां मैरतां जॉने लगे, औ यीशु नासरी अबन दावद मीं पुड रहेंम केर। 40 यीशुए तैस

खेड़ोइतां जॉव: एस मीक अन्हां ज़ैखन तै तैसका अव त यीशु तैस पुछू। 41 ज़ो आंव तेरेलेइ कुन केरी? तैनी काने मैन्हें जॉव:हे परमेशर आंव चहताइं की एपनी एछेइं सैही लैही बेटी। 42 यीशु तैस्सेही जॉव:रोडो भोई गा तेरे विश्वासे तु बेझैवरोस। 43 तै तैखने बेझौव ते लहंने लगे ते परमेशररी तारिफ करतो यीशु पत्ती चलो जेव एन हेरतां लोक परमेशररी तारिफ करने लगे।

धड़त नेने बालो जक्काई

19 यीशु यरहोए म्महेइं निसतां चलारे थिये। 2 तैड़ी अक मैनु थु: जैसरु नोवं जकैई थु: तै धड़त धिन्ने बालां केरो आफसर थु: तै बड़ो अम्बीर थु:। 3 तैस यीशु हेरनेरो चाकू थु: पण तैसरु कद छोदू थु: ताए तै हछे मैन्ह मारां लैही न थु: बटतो। 4 एल्हेरेलेइ तै दैचडतां अगर जेव ते गोलरेरे बूट्टे उबरो गुस्सो किजोकी जैखन यीशु एजनाएं त तै तैस रोडे चारे लैही बटे। 5 जैखन यीशु तैस ठैरी पुजे त तैनेइ उबरु तेकतां जॉव:जकैई लुशी उन्दो हेस किजोकी अज मीं तेरे घरे टलाहंन चारेई एजनुएं। 6 जकैई तैखने ऊन्दौ हेस्सौ ते यीशु बेड़ी खुशी सैही अपने घरे नियो।

7 एन हेरतां सब लोक ज़ोने लाए कि यीशु त एक्की पेपी मैन्हेरो मैहंन बनारोए।

8 जकैई खडो भोइतां प्रभु सैही ज़ोने लगे हे प्रभु तक्क आंव अपनी अधी जैइदात कंगालन देताइ अगर केन्चेरु किछ खेवरु भोलहु त तैस चैप्रर हिस्से वापस दैइल्हो। 9 तैखन यीशु तैस सैही जॉव अज इस घरे मां मुखती एवरिए ऐलहेरे लेई इन भी अब्रहामेरु अक मडूए। 10 किजोकी मैन्हेरु मडू हेरोरन तोपने ते मुखती देने एवरुए।

दश मोहरां केरु दृष्टान्त

(मत्ती 25 : 14 - 30)

11 जैखन लोक यीशुरी गल्लां शुन्ने लगारे थिये त तैनी तैन अक बार शुनाइ किजोकी तैन यरुशलमरे नेडे पुजारे थिये ते लोकां केरो खियाल थु: की परमेशररी बादशाही लुशी एजनीएं। 12 तैनी तैन जॉव:अक बड़ो अम्बीर मैनु होरी मुल्खे मां गाहे ताके तैस मुल्खेरो मंत्रेरो औहुदो धीनतां वापस एजे। 13 तैनी अपने सेवादारन मारां दश जन्हें कूजाए ते तैन दश अश्रेफी देइतां जॉव: मेरे वापस एजने तग्र इस पैइसे सैही करोबार करथ। 14 पण तैस ठैरी लोक तैस सैही नफ्रत करतें थिये तैनेइ पतारां तैस जो समाद भेजो की अस न चहंम की एह मैन्हुं असन पुड़ हुकुमत केरे।

15 जैखन तै हुकुमतरो औहुदो हासल केरतां वापस अव त तैनी अपने सेवादार जो समाद भेजो की जैना तैनी करोबाररे लेइ पैइसे दितारे थिये तके सैभी केरो पतो केरे की केनी केनु कमेवरुए। 16 पैहिले मैन्हें एइतां जॉव:हे परमेशर मीं तेरी दश अश्रेफेइं सैही दश होरी कमेई। 17 तैनी तैस सैही जॉव:तीं दश अश्रेफेइं सैही इमेनदेरी सैही कम कियुं गा तीं दश शहरन पुड़ अख्तीयार दीतु गहते। 18 दुइयांवे मैन्हें एइतां जॉव:हे मालिक मीं तेरी पांच अश्रेफेइं सैही पांच होरी कमेई। 19 तैनी तैस सैही भी जॉव:तीं भी पांच शहरन पुड़ अख्तीयार दीतु गहते। 20 तैखन एक्की मैन्हें एइतां जॉव:इना रेही तेरी अश्रेफी मीं एन रुमाले मां बंधतां रखोरी थी। 21 किजोकी तु सख्त मैन्हुंस ते आंव तीं केरां डरतो थु: किजोकी तु तै चीज जै तीं न भोए रखोरी तु तैस भी नैतस ते जैन न भोए बेवरु तु तैन भी लुनतस। 22 तैनी तैस सैही जॉव:हे निकम्मे मैन्हां आंव तेरी गल्लेइ सैही तींए मुर्जम बनताइ जद तीं पत्तो थु: की आंव बड़ो सख्त मैनुइं ते जै चीज मीं नैइं रखोरी आंव तैस भी सल्हता ते जैन नैइं बेवरु आंव तैन भी लुनतां। 23 फिरी तीं मेरे रुपेइये केन्ची क किजो नैइं रखोरे ताके आंव वापस एइतां तैस केरां सुते समेत उसुल केरेथो? 24 तैखन तैनी तैन सैही जॉव:जैन तैड़ी खडखडे थिये एस्कैरां एन अश्रेफी ऐनतां उस देथ जैसका दश अश्रेफीन। 25 तैना ज़ोने लगे हे परमेशर एसका पैहिली दश अश्रेफीन? 26 तैनी तैन जुवाब दितो आंव तुसन सैही जोतां की जैस केन्ची क किछ पल्लै भोलहु तैस होरु भी दीतु गाल्हू ते जैसक किछ भी पल्लै न भोलहु तैस केरां तैन भी निव गाल्हू। 27 पण मेरे इन दुश्मन जैन मीं न थिये सुखाते की एह असन पुड़ हुकुमत केरे एन इरहां अन्हां ते मेरे सामने एन मैरी छड्डा।

यरुशलमे में मां जीत दाखल

(मत्ती 21 : 1 - 11 ; मरकुस 11 : 1 - 11 ; यूहन्ना 12 : 12 - 19)

28 एना गल्लां जोइतां यीशु अग्रोहुं निसे की यरुशलमे में मां पुजी गहंम। 29 जैखन तैना जेतुनेरे पहाडे बेत फिमो ते बैल्लियां मां पुजे त यीशुए दुई चले एन जोइतां अग्रोहुं भेजे। 30 तुस सामने उस डूलोवें मां गाथ ते तैड़ी तुसन अक गैधरो बचो बन्धोरो मैल्लनोए जैस पुड़ अज तग्र कोई नैइं चडोरो तैस खोलतां इरहां आन्हां। 31 ते अगर कोई तुसन पुछेल्हो की तुस एस किजो लोरेथ खोलने त तुस जोइयथ की प्रभु परमेशर ऐसैरी जरुरते।

32 अग्रोहुं गहने बाले चलेइं तैन्ने कियुं जैन यीशुए तैन जेवरु थु:। 33 जैखन तैना गैधरो बचो खोलने लगारे थिये त तैसेरो मालक तैन पुछने लगे तुस एस बचे किजो लोरेथ खोलने? 34 तैनेइं जुवाब दितो प्रभु परमेशर ऐसैरी जरुरते। 35 तैनेइं तै बचो खोलतां यीशु क आन्हां ते तैस पुड़ अपना लिगां छेडतां यीशु तैसपुड़ चैइतां चले जे। 36 जैखन तैना चलारे थिये त लोकेइं बत्ती म्महेइं कमलां बछेइतां छाडोरां थियां।

37 जैखन तैना तैस ठैरी नेडे पुजे त जैतां बत्त जैतून पुडेरं ऊंढी गहती थी तैड़ी सारे चलेइं एह तमाशो हेरतां ते खुशी भोइतां परमेशररी तारिफ करने लगे की।

38 मुबारके तै बादशहा जै परमेशर नोवें सैही एइते सुर्गे मां मेन्हा ते अम्ब्रे मां शांती भोए।

39 तैन मैन्ह मां किछ फ्रिसी भी थिये तैना यीशु सैही ज़ोने लगे हे गुरु अपने चलन जो की चूप करन। 40 यीशुए तैन जुवाब दितो आंव तुसन जोतां की अगर एन चूप करन त इन घौड़ चिन्डां मारेल्हे।

यरुशलमेरे लेई शोग

41 यरुशलमे में मां पुजतां यीशु यरुशलमेरो हाल हेरतां तैस लेरां छुटी। 42 ते ज़ोने लगे कुन रोडू भोथु: तु तैईसे तैना रोडी गल्लां जानेथो पण तैन हुनी तैन तेरी एछन केरां छेपी जेवरिन। 43 तीं तैना दिहाडे हेरने पैनेण जैईस तेरे दुश्मन तेरे चैवरे पासन मोरचो बंधतां ते तीं घेरो देइतां तीं पुड़ हमल्हो केरेल्हे। 44 ते तीं त तेरे बचन जैना तीं मां आन्हां मिती मां मिलेल्हे ते तीं मां घोडे पुड़ घोड़ बाकी न रहलो किजो कि तीं तै मोको जैइस तीं पुड़ दिया भोवरी थी न बुझु।

मन्दरेरे बुपारी कढने

(मत्ती 21 : 12 - 17 ; मरकुस 11 : 15 - 19 ; यूहन्ना 2 : 13 - 22)

45 तैखन तै प्राथना भवने मां जेव ते तैड़ी तै बिपैरन ते गहक बेरोहुं कढने शुरु किये। 46 तैनी तैन सैही जॉव की मेरु घर प्राथनरु घर भोलहु पण तुसैइं त डेकु केरो आड्डो बनेइतां रखोरोए।

47 ते रोज भवने मां ज्ञान शुनातो थु: पण पुरैहुतेइं ते युहूदी बजुर्गेइं यीशु मारनेरी कौशिशि मां लागारे थिये। 48 पण तैन एन केरनेरो मोको न थु: मैल्लतो किजोकी सारे लोक यीशुएरी गल्लां शुन्ने चोवरे पासन बिशारे रहते थिये।

यीशु एरे अधिकारे पुड़ सुवाल

(मत्ती 21 : 23 - 27 ; मरकुस 11 : 27 - 33)

20 एक्की दिहाडे जैखन तै प्राथन भावने मां ज्ञान लोरो थु: देंनेते तैन अंजील लोरो थु: शुनाने त पुरैहुत ते मैहेजबी लोक ते युहूदी बुजुर्ग यीशु क पुजे। 2 ते तैन ज़ोने लगेतु एन सैरी गल्लां कसेरे अख्तीयार सैही केरतसया तीं ऐह अख्तीयार केनी दितोरोए? 3 यीशु तैन जुवाब दितो आंव भी तुसन अक गल्ल पुछताइं मीं जोथ। 4 युहन्नेरो ब्यतिसमो सुर्गेरी तरफां थु: की मैनु केरे तरफां थु: 5 तैना एपु म्मेही बस केरने लगे की अगर अस जॉम की अम्ब्रेरी तरफां थु: त तै पुछेल्हो की फिरी तुसैही यकीन की नैइं कियेरु? 6 पण अगर अस जॉम की मैन्हुं केरे तरफां थु: त लोकेइं अस मारनेम किजोकी तैना युहन्ने नबी मनते थिये। 7 तैनेइं जुवाब दितोकी अस न ज्ञानम की किसेरी तरफां थु:। 8 यीशु तैन सैही जॉव:त अम्हीं तुसन सैही न ज़ोइं की एना कम्मा कसेरे अख्तीयारे सैही केरताइं।

दुष्ट जमीनदारों केरु दृष्टान्त (मत्ती 21 : 33- 46 ; मरकुस 12 : 1- 12)

9 फिरी यीशुए तैन लोकन अक कहानी शुनाने लगे एक्की मैन्हें दाछरी बाग लाई ते तै ठैकेदारन ठैके पुड देइतां एपु खरे च़ीरे कौस्कोई दुर् प्रदेश च़लो जेव। 10 जैईस दाछ पक्नेरो मोसम अव त तैनी अपनो हिस्सो नैनेरे लेइ अक नोकर भेजोपण तैनेइ तै खुब झूसो कुटो ते खाली वापस भेजो। 11 ते फिरी तैनी अक होरो नोकर भेजो पण तैनेइ तैसेरी भी बेजती कीते तै भी झूस कुट केरतां तै भी खाली वापस भेजो। 12 फिरी तैनी अक टलेइयंव होरो नोकर भेजो पण तैनेइ तैसेरी भी बेजती की ते ज़ख्मी केरतां कढौ। 13 तैखन बागारे मालके ज़ोव:आंव अपने मड्डे भेजताइ शैह्द तैना तैसेरो लिहाज केरलहे। 14 पण ज़ैखन ठैकेदारें तै लाहू त एपु म्मेहीं मशोरो केरने लगे एहे मालके एजा एस्से मारम ताके जेइदात ईशी भोइगाहे। 15 तैनेइ तैन मड्डु बागी मैरां बेइर केढतां मैरी छडु तुस सोचा की फिरी बागारे मालके तैन सैहीं कुन कियेरु भोल्हु। 16 ते मालक एइतां तैन मैरी छडेलोते बाग होरी केरे हवाले केरलहो तैनेइ एन शुनतां ज़ोव:की परमेशर न केरे। 17 तैनी तैन केरे पासे तेकतां ज़ोव:फिरी इन कुने ज़ैन लिखेरुए की ज़ै घोड मिस्त्रेइ रद्वी कियो तैहे घोड कुनेरो घोड भोल्हो? 18 ज़ै कोई इस घोडे पुड बिछडेल्हो तैसेरे टुके टुके भोल्हे ते ज़ैस ऊंढौ एह घोड खिरकेलो तैस एह पिहतां रखेल्हो।

कैसरे धड़त देनी

(मत्ती 22 : 15 - 22 ; मरकुस 12 : 13 - 17)

19 धर्म गुरेइं ते पुरैहूतेइं तैस टलानेरी कौशिश की किजोकी तैना बुझी जेवरे थिये की तैनी एह कहावत ऐन केरे बारे मां शुनेवरी थी पण तैन लोकन कैरां डरते थिये। 20 तैन लोक यीशुएरी ताकी मां थिये तैनेइं विशवैसी केरे रुपे मां जासुस भेजे ताके तैसेरी कोई गल्ल टलेई सखन ते फिरी बादशाहरे कब्जे मां देई देन। 21 तैनेइं यीशु पुछ्हे हे गुरु अस जानतम की तु सच्योस ते सच्यवैईयरी तालिम देतस ते केन्चेरी सहरेहीत न केरस बलके सच्यवै सैहीं परमेशररी बत्तरी तालिम देतस। 22 कुन असंन कैसरेरे राजे जो धड़त टेक्स देंनो ठीके की गलत? 23 यीशुए तैनकेरु मकड बुझतां तैन जो ज़ोव। 24 मीं अक रुपैइयो एंनतां हेराथ ते ऐस पुड किसेरी मोहोर ते किसेरु नोवें? तैनेइं ज़ोव: कैसरी। 25 यीशु तैन सैहीं ज़ोव:ज़ैन कैसरेए तैन कैसे जो देथते ज़ैन परमेशररुए तैन परमेशरे जो देथ। 26 ते तैना लोकां केरे सामने तैसेरी कोई गल्ल न टलेई सखे बलके तैसेरे जुवाबे सैहीं तैन हेरान भोइतां चुप रहेजी।

कयामत ते इलाह

(मत्ती 22 : 23 - 33 ; मरकुस 12 : 18 - 27)

27 फिरी सुदुकी ज़ैन ज़ोते थियेकी मुवारे ज़िते न भॉन ते फिरी किछ यीशु क एइतांपुछने लगे। 28 हे गुरु असंन जो मुसैरो हुक्म की अगर केन्चेरो दूलाह एपनी कौन्शारे भोते संते हेईटल मैरी गाहे त तैसरो दूलाह तैस कौन्शी सैहीं इलाह केरे ताके अपने दूलाहरे लेइ ओवलाध पैईदा केरे। 29 सत दूलाह थिये पैहिले इलाह कियो ते हेईटले मैरी जेव। 30 फिरी होरें तैस्सेहीं इलाह कियो। 31 फिरी तैल्ला पत्ती टलेइयंव तै कौन्श रखी फिरी एचरे सैहीं सत्तेइं जंनेहीं इलाह कियो पण सभ बेओवलाध मैरी जे। 32 ते आखरकार तै कौन्श भी मैरी जेई। 33 नियायेरे येनी फैसलेरे दिहाडे तै किसेरी कौन्श भोल्ही किजोकी तै सत्ते जंन्हां केरी कौन्श बनोरी थी? 34 यीशुए तैन सैहीं ज़ोव:इस दुनियारे लोकन मां त इलाह बननेरो दस्तुरे। 35 पण ज़ैना लोक एजने बैली दुनियारे काबल भोल्हे ते ज़ैना मुडदन मैरां ज़िते भोल्हे तैना इलाह न बनाले। 36 तैना मरेल्हे भी त्राएल्हेरेलेइ की तैना सुगदोतां केरे ज़ैरे भोल्हे ते तैन जो कियामतरां मड्डा बेनतां परमेशररां भी मड्डा ज़ौल्हे। 37 ते ज़ैडी तत्र मुडदां केरो ज़िते भोनेरो तलके तैचरे मुसै नेबे ज़लते झल्लोवैरे बारे मां तैचरे इशारो कियो किजोकी तै परमेशर अब्रहामेरो परमेशर ईजहाकेरो परमेशर ते याकुबेरो परमेशर ज़ोइतां फुकरतो थु:। 38 पण परमेशर मुडदां केरो नैइं बलके ज़ितां केरो परमेशरे किजोकी तैसेरे नेडे सभ ज़ितेन। 39 धर्मी लोकन मैरां किछेइं

जुवाब दितोहे गुरु तीं त बडु रोडु ज़ोव। 40 फिरी तैन मैरां केची हिंमत न अई की एस होरु किछ पुछ्म।

मसीह कैसरे मड्डु ए

(मत्ती 22 : 41 - 46 ; मरकुस 12 : 35 - 37)

41 फिरी यीशुए तैन सैहीं ज़ोव:फिरी मसही जो दावदेरु मड्डु कैचरे सैहीं ज़ोतन? 42 किजोकी दाऊद त एपु ज़बुरे मां ज़ोते परमेशरे मैरे परमेशरे सैहीं ज़ोव:मेरे देंहींने पासे बिश।

43 की ज़ां तत्र आंव तेरे दुशमन तेरे पांउन हैठ न बिशैल्हीं। 44 दावद ता तैस्जो प्रभु परमेशर ज़ोते,फिरी तैन तैसरु मड्डु कैचरे भोवें? दाऊद त तैस्जो प्रभु परमेशर ज़ोतेफिरी तैन तैसरु मड्डु कैचरे भोवें?

शास्त्रन कैरां सावधान

(मत्ती 23 : 1 - 36 ; मरकुस 12 : 38 - 40)

45 ज़ैखन सभ लोक शुनी राहोरे थियेत यीशुए अपने चलन सैहीं ज़ोव। 46 ध्रम गुरन कैरां हुशियार रेहीयथ तैना लम्मं लम्मं कुरते लांने पसंद केरतन ते होरु एन चहतन की कोक बज़ारन मां तैन जो नमसकार केरन तैन प्राथना भावने मां उची कुरसी तोपतन ते धामन मां बडे खडुपैन्च बन्नु चहतन। 47 तैन बैव्वा कौन्शा केरां घरां लुटतन ते लोकन हेरानेरे लेई बडी लम्मी दुआं तैन हछछी सज़हा मैल्नीए।

कंगाल बेवरु दान

(मरकुस 12 : 41 - 44)

21 यीशु अम्बीरां केरे पासे तकने लगोरो थु: ज़ैन भावनेरे खज़ाने मां दान लोरे थिये छडने। 2 तैनी अक बडी गरीब रेंडी कौन्श लाही ज़ैसां दुई पैइंसे येनी अक धेलो चहडो। 3 तल्ही यीशु ज़ोवआंव तुसन सैहीं सच्य ज़ोताइकी भावनेरे खज़ाने मां दान देंने बालन मैरां सैभन कैरां जादे इस रेंडी कौन्शां दान दीतु। 4 किजोकी तैनेइं त एपनी दौवलती मैरां सिर्फ धगसेरे पैइंसे परमेशरे घरे मां दितोरेनपण इस कौन्शां एपनी गरीब हालती सैहीं ज़ैन किछ ऐसारे पल्लै थियुं सभ किछ देइ छडु।

मन्दर नाश भोनेरी भविष्यानी

(मत्ती 24 : 1- 2 ; मरकुस 13 : 1- 2)

5 किछ लोक प्राथन भावनेरे येनी हेक्कारे बारे मां ज़ोने लोरे थियेकी बडे माघे घोडेइं सैहीं ते पैइंसेइं सैहीं बनोरिए त यीशए ज़ोव। 6 तैना दिहाडे एजने बालेन की इन चीज़ां ज़ैना तुस इडी लहने लोरेथ इडी घोडे पुड घोड नैइं रहनो ज़ै बछोडेल्हे त्रा।

दु:ख ते मसीबत

(मत्ती 24 : 3- 14 ; मरकुस 13 : 3- 13)

7 तैनेइं यीशुए पुछ्हे गुरु जी ऐन गल्लां कैइस भोनिण? ते तैन्केरो दुनियाई मां एजनेरो कुन नशान भोनीए। 8 यीशुए तैन ज़ोवखबरदार टेपलोईयथ त्राकिजोकी कही लोक मेरे नोवें सैहीं एजनेन ते तैनेइं ज़ोनुए की आंवे मसही अंहीं ते मोको भी नेडे पुजोरोएतुस तैन पत्ती न गैहीयथ। 9 ते ज़ैखन तुस लडेइयरी त उल्झनरी आफुवां शुनेल्हे त डेरथ त्राकिजो की ऐन गल्लां कैरु पैहिले भोनु ज़रुरीए पण तैइसे खातमो नैइं भोनी।

10 तैखन यीशुए ज़ोव:अक कौम होरी कौमरे खिलाफ ते अक बादशाहा होरी बादशाहरे खिलाफ खडो भोनीए। 11 ठारी ठारी बडे बडे भूजल एजनेण ते कल पैनोए ते बिमारी फैलनिए ते बुरी बुरी गल्लां भोनिण ते अम्बरे मां अजीब नशान लेहियोनेण। 12 ऐन सब गल्लां भोने कैरां पैहिले तुशै दुशमन तुसन सिर्फ मेरे नोवेंरे वजाही सैहीं दप्यैल्हे ते तुसन सताल्हे ते प्राथन भावनेरी अदालती मां हाज़र केरले ते जैली मां छडेल्हे ते बादशाहन ते गुवरनेरे क पैश केरेल्हे। 13 तैखन तुसन मेरी गवाई देंनेरो रोडो मोको मैल्हेलो। 14 पण तुसन कोई ज़रुरत नैइं की पैहिले तुस फिकर केरने लगथ की अस कुन ज़ोमेल्हे। 15 किजोकी आंव तुसन एरी ज़बांन ते अकल देइल्होकी कोई भी मुखालफ

तुशै सांमने खडो न भोई सखेल्हो ते न कोई तुशै खलाफ किछ जोइ सखेल्हो। 16 ते तुशै हाज बाँव ते रिशतेदार ते दौसत तुसन सैहीं बेईमानी केरेल्हे ते तुसन मैरां किछन मारेल्हे भी। 17 ते मेरे नोवरे वजाई सैहीं सारे लोक तुसन सैहीं नफ्रत केरेल्हे। 18 पण तुशै दौगेरो कोई बाल बांको न भोल्हो। 19 सब किछ झेलतां तुस एपनी जान बचैई साखेल्हे।

यरुशलमेरे विनाशेरी भविष्यवाणी

(मत्ती 24 : 15 - 21 ; मरकुस 13 : 14 - 19)

20 ते ज़ैईस तुस युरोशलमेरे चैवरे पासन फौजेइ सैहीं घेरु लाल्हे त बुझथ की एस बेरांन भोनेरे दिहाडे नैडे एवरेन। 21 तैस मोकै जैन युहुदिये मां भोल्हे तैना पहाडे पुड़ जो नैशी गहनते जैना यरुशलमेमां भोल्हे त तैन बेरोहुं निसन ते जैना डलोवंन मां भोल्हे त तैना शहारे मांझो न एजन। 22 किजोकी ऐना बदलेरे दिहाडे भोल्हे ऐन मां तैन सभ किछ जैन पैहिले लिखेरुए तैन पुरु भोनुए। 23 तैन कौन्शंन पुड़ अप्फोसे की जैना तैईस बच्च दूध पियेती भोल्हीकिजो की धरती पुड़ बडी मसीबत एजनिए ते एस कोमीं पुड़ बडी आफत एजनीए। 24 तैना सभ तलवारी सैहीन मारे गाहेले ते गुलाम बेनतां सैभी कौमन मां पुजैल्हे ते गैर कौमां केरो मोको पुरोभोने तग्र यरुशलम गैर कौमेइ सैहीं पस्त भोतो राहेलो ।

मैन्हेरे मठेरु जौतू भोनु

(मत्ती 24 : 29 - 31 ; मरकुस 13 : 24 - 27)

25 दिहाडे चेंदेनी ते तारन मां निशांन बांदे भोनेण ते धरती पुड़ कौमन बडी तकलीफ पुजनिये किजोकी सुमुन्देरी लैहेरां केरी शोरी सैहीं तैना डेरी गहनेण। 26 डररे मारे एजने बैली मिसिबतरो इंतजार केरते केरते तैनकेरे होशहुवास उडी गहनेण किजोकी अम्बरेरी ताकत भी हिली गहनिये। 27 तैखन लोक मैन्हेरे मठु बेडी कुदरती सैहीं बिदलारी मां एइंतु लाहेले। 28 जैखन ऐन गल्लां भोनी शुरु भोल्ही त सीधे खडे भोइतां उबरु तैकथ किजोकी तुशी मुखती भोने बालीए।

अंजीरेरे बुटेरी मसाल

(मत्ती 24 : 32 - 35 ; मरकुस 13 : 28 - 31)

29 तैतैखन यीशुए तैन अक बार शुनइतुस फौगेरो बूट ते होरी बुटंन भी हेरतथ। 30 जैरी तैस गुडी लेगनी शुरु भोइचन? त तुस हेरतां बुझतथ की नैल्हा एवरोए। 31 एचरे तुस जैखन ऐन सभ किछ सच्च भोतु लाहेले त तुस बुझेल्हे की परमेशरेरी बादशाही नैडे एवरीए। 32 आंव तुसन सैहीं सच्च जोतां की जां तग्र ऐन गल्लां पुरी न भोनऐस ओव्लाधरो खातमां न भोल्हो। 33 धरती अम्बर टेली गाल्हु पण मेरी गल्लां कधे न टेलेल्ही।

बीझे राथ

(मत्ती 24 : 36 - 44 ; मरकुस 13 : 32 - 37)

34 बस्सा खबरदार भोथ कोस्कोई एरु न भोए की तुशौ दिल नशेमां मस्त भोइतां इस जिंदगारे फिगरे सैहीं कमजोर भोएते तैस दिहाडे तुशै लेइ अक मसिबत बने। 35 किजोकी तै इस सैरी धरती पुड़ जैत्रे लोकन तैन सैभन पुड़ एचरे एजनीए। 36 बस्सा हर बख्त तियार रहथते प्रार्थन केरते रहथताके तुस ऐन गल्लन कैरां जैना भोने बैलीनऐन कैरां बेंचतां परमेशरेरे मठै क खडे भोनेरे कबल भोथ।

37 यीशु रोज प्राथना भावने मां तालिम देंतो थियोते राती जैतून पहाडे पुड़ रहतो थियो। 38 झेझां सारे लोक यीशुएरी गल्लां शुनेरे लेइ प्रार्थन भावने मां तैसका एइते थियो।

यीशु एरे खलाफ साजिस

(मत्ती 26 : 1 - 5 ; मरकुस 14 : 1 , 2 ; यूहन्ना 11 : 45 - 53)

22 बडी दिहाडी जैसजो फसाह ज़ोतन नेडे एवरी थी। 2 पुरैहुत ते धर्म गुरु मोको तोपने लोरे थियो की यीशु कैचरे सैहीं बने लाम किजोकी तैना लोकन कैरां डरते थियो।

यहुदेरो विश्वासघात

(मत्ती 26 : 14 - 16 ; मरकुस 14 : 10 , 11)

3 ते शैतान यहुदे मां बेस्सी जेवतैस्जो आस्क्रयुती भी जोते थियो ते तै यीशुए बहरे चलन मां शुमार भोतो थुः। 4 दे तै पुरैहुतन ते प्राथना भावनेरे किछ खास पुछने गन्ने लोकन क जेव ते तैन सैहीं मुशोरो केरने लगे की कैचरे सैहीं यीशु तैन केरे हवाले केरोए। 5 तैना बडे खुशी भुए ते तैस पैडसे देंनेरो वाहिदो कियो। 6 तैनी तैन्केरी गल्ल मनी ते मोको तोपने लगे की यीशु कैचरे सैहीं तैनकेरे हावाले केरे ते केंची पतो न लगे।

चेलन सैहीं साथी फसहरु अखरी भोझ

(मत्ती 26 : 17 - 25 ; मरकुस 14 : 12 - 21 ; यूहन्ना 13 : 21 - 30)

7 ईद फिन्नेरी दिहाडी नेडे एवरी थीजैस्मां हुडेरी कुरबांनी देंनी जरूरी थी। 8 यीशुए पतरस ते युहन्ना ऐन जोइतां भेजे की गाथ ते इशै लेइ फसहरी रौट्टी तियार केरा। 9 चेलेइ पुछकी तु कोडी सुखातस की अस तीजो फसहरी रौट्टी तियार केरम? 10 यीशुए तैन जुवाब दिताशहारे मां गहंते तुसन अक मैन्हु मैल्लनोए जै पैनेरो घडो धिंतां चलरो भोनुए तैस पत्ती गैहीयथ ते जैस घरे मां तै गाहेलो। 11 तैसेरे मालके सैहीं जोइयथकी गुरे पुछेरुए की टलांन केरी ठार कोडीए जैडी आंव अपने चलन सैहीं साथी फसहरी रौट्टी खेई सेखी? 12 ते तुसन बहा नैहितां अक बडो कमरो हेराल्हो जै खुब रोडे चारे स्जेवरो भोनुएतैडी ईशै लेइ तियारी केरथ। 13 तैनेइ तैडी गैहितां सब किछ तैरु लाहुंजैरु तैनी जेवरु थुःते तैडी फसहरी रौट्टी तियार की।

प्रभु भोज

(मत्ती 26 : 26 - 30 ; मरकुस 14 : 22 - 26 ; 1 कुरिन्थियों 11 : 23 - 25)

14 जैखन रौट्टी खांनेरो मोको आव त यीशु ते तैसेरे चले चूफीरतां बिशोरे थियो। 15 ते यीशुए तैन सैहीं जौवमेरी एह बडी खुवाश थी अपनो दुःख झैलने केरां पैहिले एकी बार फसहरी रौट्टी तुसन सैहीं साथी खेई। 16 किजोकी आंव तुसन सैहीं जोतां की अजैरां पत्ती तां तग्र न किछ खेई सेखी जां तग्र परमेशरेरी बादशैहीयरु कम पुरु न भोए। 17 फिरी यीशुए कटोरो टलातो ते परमेशरेरु शुक्र केरतां चलन दितो ते जोव हीयांथ ते एपुम्मेइ बंटा। 18 किजोकी आंव तुसन सैहीं जोतां की अजैरां पत्ती दाछारु ऐन पानी फिरी तां तग्र न पिएल्हो जां तग्र परमेशरेरी बादशाही न एजे। 19 फिरी यीशुए रौट्टी टलाती ते परमेशरेरु शुक्र केरतां टलोडी ते तैसेरे टुके बनेइतां अपने चलन एन जोइतां दितीकी ईही मेरी जाने जै तुशै लेइ आंव देताइते तुस भी मेरी याद गैरी मां एन्ने केरते रेहीयथ। 20 एचरे रौट्टी खानेरे बाद तैनी कटोरो टलातो ते चलन क दितो ते जोव की इही कटोरो मेरो तैस खुनेरो एहेदे जै तुशै लेइ दितोरोएनोवो एहेदे। 21 पण हेरा मीं टलुवांने बालेरो हथ मेरे तुत्रे अग्रे। 22 किजो कि मैन्हेरु मठु तु हुनी चलोरोस जैचरे की तैसेरे लेइ पैहिले ऐन पक्कु भेवरुए पण तैस मैन्हु पुड़ अप्फोसे जैसेरे हथेइ तै ग्रीफतार भोए। 23 ऐन शुंनतां तैना एपु म्मेही पुछने लगेअसन मां एरो जैरो कौने जै ऐन कम केरेल्हो?

महान मौन ? ऐस पुड़ बेंस

24 तैन ऐस गल्ली पुड़ एपु म्मेइ बेंस भोई की असन मां कौन बडोए। 25 यीशु तैन सैहीं जौवःहोरी कौमन पुड़ तैनकेरे बादशाहा हुकुमत केरतन ते तैन जैन अखतियारे बाले भोतन तैन जो मैसन ज़ोतन। 26 पण तुस एरे नैइ भोनेतुसन मां जै बडोए तै निकडेरे बराबर बने ते जै हाकमं तै सेवकेरे बराबर बने। 27 किजोकी बडो कौने? जै तैसका साथी बिशोरोएया तै जै तैसरो चेलोए? कुन तै तैसका नैइ बिशोरो? पण आंव त तुसन मां अक चेलेरे बराबर आंहीं। 28 पण तुस तैनथ जैना मेरी अजमैइशरे मोकै बराबर मीं सैहीं साथी रहतथ। 29 जैचरे बाजी मीं अक बादशाही दितोरीए आंव भी तुसन अक बादशाही देताइ। 30 ताके तुस मेरी हुकुमती मां मीं सैहीं साथी बिशतां खाथ पिथ बलके बड बडे शाही तखतन पुड़ बिशतां इच्चाएलेरे बहरे कबीलां केरी आदालत केरल्हे।

पतरसेरे इन्कारेरी भविश्ववाणी

(मत्ती 26 : 11 - 35 ; मरकुस 14 : 27 - 31 ; यूहन्ना 13 : 36 - 38)

31 शमौन शमौन शैताने थर थराते इजाजत मगीनी चाही की एन गैहू करे ज़ैरे छैटीं। 32 पण मीं तेरे लेइ प्रार्थन की कि तेरो विश्वास न बिगड़े ते ज़ैखन तु तोबा केरी गासत अपने ढूलाहं केरो विश्वास भी मजबूत कैरां। 33 पतरसे यीशु सैहीं ज़ाँवःहे परमेशर तीं सैहीं आंव कैद भॉने बलके मरनेरे लेइ भी तियाराइं। 34 पण यीशुए ज़ाँवःहे पतरस आंव तीं सैहीं ज़ोतां की अज कुकड़े बांक देने कैरां पैहिले तु मेरो ट्लाई बार इनकर केरेल्होकी आंव एस ज़ैनी न्ना।

बेतवो , झोलो, ते तलवार

35 तैसरां बाद यीशुए तैस पुछू की ज़ैइस मीं तुस बगैर बेटवेंते बगैर जुड़ी ते थेले बगैर भेजारे थिये त तुस कैची चिजारे मोतज राहारे थिये? तैनेइं ज़ाँवः केंची चिजारे नैइं। 36 यीशु तैन सैहीं ज़ाँवपण हुनी ज़ैसक बेतवो भोएते साथी रखे ते एचरे झोलो भी ते ज़ैसक तलवार न भोए ते अपन लिगाइं बेचतां भी तलवार घिन्ने। 37 किजोकी आंव तुसन सैहीं ज़ोतां की इही गल्ले ज़ै लिखी जेवरिएकी तै बदकरन मां शुमार कियो जेव तैसेरु मेरे हक्के मां पुरु भौनु जरूरी थुः ऐलहेरेलेइ मेरे बारे मां लिखोरी गल्लां पुरी भौने बैलिन। 38 तैनेइं ज़ाँवःहे प्रभु परमेशर हेर ईडी दुई तलवारन तैनी तैन सैहीं ज़ाँव बैडीन।

ज़ैतूनेरे पहाड़े पुड़ यीशु एरी प्रार्थना

(मत्ती 26 : 36 - 46 ; मरकुस 14 : 32 - 42)

39 फिरी तै बेइर निसो ते ज़ैचरे तैसेरो दस्तुर थुः तै ज़ैतुन पहाड़े पुड़ जो चलो जेव ते तैसेरे चले भी तैस सैहीं साथी तैरां चले जे। 40 तैस ठैरी पुजतां तैनी तैन सैहीं ज़ाँव प्रार्थन केरा ताके तुस अजमैइशी मां न रहथ। 41 ते यीशुए तैन कैरां थोड़े ज़ैरे आग्र जेते ज़ैधन पुड़ खेडोइतां प्रार्थन केरने लगे। 42 हे बाजी अगर तेरी मरजी भोएत ईही कटोरो मीं कैरां दुर केर पण फिरी भी मेरी मर्जी पुरी न भोए बलके तेरी मर्जी पुरी भोए। 43 तैखन तैनी अंब्रेरां अक सुवर्गदूत लाहूजै तैस शक्ती देतो थियो। 44 ते निरकेबली जगाई परेशान भोइतां होरी जादे दिले सैहीं प्रार्थन केरने लगेते तैसेरो (परसो) पासिनो बुझा की खुनेरे बडे बडे तैपु तल्ले झड़ते थिये। 45 प्रार्थन केरनेरे बाद यीशु अपने चलन क वापस आव ते तैन गम्मेरे मारे झूलोरे मैल्हे। 46 यीशुए तैन सैहीं ज़ाँव तुस किजो झूलोरेथ उठा ते प्रार्थन केराताके अजमैइशी मां न रहथ।

यीशु धोखे सैहीं ट्ळावानो

(मत्ती 26 : 47 - 56 ; मरकुस 14 : 43 - 50 ; यूहन्ना 18 : 3 - 12)

47 हेजु यीशु एह गल्ल ज़ाँने लोरो थुः त मैन्हू केरो अक जथो तैडी पुजो ते बहरन मेरां अक ज़ैसेरु नोव युहूदा थुः तैन सैहीं अगरी अगरी थुः ते ते यीशु फूमडी देने अगर अव। 48 पण यीशुए तैस सैहीं ज़ाँवः युहूदा कुन तु एक्की फूमडी सैहीं मीं ट्ळुवातस? 49 ज़ैखन यीशुएरे सैथेइं एह हिसाब कितब हेरो त तैनेइं ज़ाँवःहे प्रभु कुन अस तलवार चलांम? 50 ते तैन मेरां एक्के नोकरें पुरेइतेरे नोकरें पुड़ तलवारा चलाई ते तैसरो तैनी कन उड़ाव। 51 पण यीशु जुवाब दितो बस्सा बडु भोई जेवं ते यीशुए तैसेरो कने तैखने हथ लेइतां बझाव। 52 तैखन यीशुए पुरेइत ते मन्देरे सिपाहीते बुजुर्ग ज़ैन तैस गरिफतर केरने एवरे थिये तैन जो ज़ाँव तुस कुन तलवारां ते उडे घिन्तां मीं डैकू बुझतां ट्ळाने एवरेथ? 53 ज़ैइस आंव तुसन सैहीं साथी मन्दिरे मां भोतो थुः त तसैहीं मीं सैहीं हथ न लाव पण इही त तुशै अंधरेरे मोकेरो अख्तियारे।

पतरसेरु इन्कार

(मत्ती 26 : 57 , 58 , 69- 75 ; मरकुस 14 : 53 , 54 , 66 - 72 ; यूहन्ना 18 : 12 - 18 , 25 - 27)

54 ज़ैखन तैनेइं यीशु ट्ळावते तैस तैइं नैहितां पुरेइतेरे घरे नियो पतरस भी पत्तपति बल्ले बल्ले तैरां जेव। 55 तैनेइं अंगने मां अग बालोरी थीते सब बिशतां अग तपने लोरे थियेते पतरस भी तैन मां थुः। 56 ते अक कौन्श अगी

क बिशोरी तकने लोरी थी ते पतरसेरां तेकतां ज़ाँने लगी की इही मैन्हू भी तैस सैहीं साथी थुः। 57 पण पतरसे इनकर केरतां ज़ाँव हे कौन्शे आंव एस न ज़ैनी एह कौने। 58 थोड़ी सैइत्रां पत्ती होरें एक्के पतरसेरां तेकतां ज़ाँव तु भी तैना केरो साथीस पण पतरसे ज़ाँवःन आंव नैइं। 59 कोई एक्की घेन्टेरे बाद कंचे होरे बडे यकीने सैहीं ज़ाँवःइही मैन्हू पक्को तैस सैहीं साथी थुः किजोकी एह भी ग्लीलीए। 60 पण पतरसे इनकर केरतां ज़ाँव आंव एस न ज़ैनी तु कुन ज़ोतां हेजु पतरस एह गल्ल ज़ाँने लोरो थुः त कुकड़े बांक दिती। 61 ते परमेशर फिरतां पतरसेरे पास तक्कते पतरसे परमेशरेशरी तै गल याद आई ज़ै तैनी पतरसे सैहीं ज़ेवरी थी की अज कुकड़ बांक देने कैरां पैहिले तु मेरो ट्लाई बार इनकार केरेल्हो। 62 ते पतरस बेइर गैहितां ज़ारे ज़ारे लेरां देने लगे।

यीशु एरु अपमान

(मत्ती 26 : 67 - 68 ; मरकुस 14 : 65)

63 ज़ैने मैन्हेंइं यीशु अपने कब्जे मां कियोरो थुः तैना तैसेरी हासी बनाते थिये ते कने तैस बहते थिये। 64 तैना यीशुएरी एछन पुड़ पट्टी बेन्धतां बहते थिये ते पुछते थिये ज़ो केंनी बाहोरिए? 65 ते तैनेइं तैसेरे खिलाफ बेडी बुरी बुरी गल्लां भी जोई।

महासभारे सामने यीशु

(मत्ती 26 : 59 - 66 ; मरकुस 14 : 55 - 64 , यूहन्ना 18 : 19 - 24)

66 झेइं शासत्री ते सियांने लोक ते पुरेइत ते धर्म गुरेइं यीशु अपनी अदालत आलिया मां एनतां। 67 ज़ाँने लगे अगर तु मसहीअस त ज़ोयीशुए तैन सैहीं ज़ाँवःअगर आंव तुसन ज़ाँव भी त तुस मेरु यकीन न केरेल्हे। 68 ते अगर आंव तुसन पुछीं त तुस जुवाबे न दैल्हे। 69 पण अज़रां बाद मैन्हेरु महु परमेशररे देहीने पास बिशोरो लाहेले। 70 एस गल्ली पुड़ तैना सभ ज़ाँने लगे तु परमेशररु महुस? यीशुए जुवाब दितोतुस एपु मींजो ज़ोतथ की तुअस? 71 तैनेइं ज़ाँवहुनी असन होरी शाहादतां केरी कुन जरूरीए? किजोकी असैइं एसेरी ज़बान शुनेरुए।

पिलातुसेरे सामने यीशु

(मत्ती 27 : 1 , 2 , 11-14 ; मरकुस 15 : 1 - 5 ; यूहन्ना 18 : 28 - 38)

23 तैखन तैना सभ तैइं उठे ते यीशुए पिलातुसे क घिन्तां जे। 2 ते तैसजो एन ज़ोइतां एह अलजाम लाने लगेकी एह ईशे लोकन बगाइते ते कैसर बादशाहे जो धड़त येनी मैलियो देनेरे लेइ ठाकते ते अपने आपे जो मसही ज़ोते। 3 तैखन पिलातुसे यीशुए पुछतु युहूदी केरो बादशाहास? यीशु तैस जुवाब दितो तू एप्पू ज़ोतसता। 4 पिलातुसे पुरेइल्ल ते लोकन सैहीं ज़ाँव की आंव एस मैन्हू मां कोई कुसुर न लैहीं। 5 पण तैना बडे घमन्डे सैहीं ज़ाँने लगे एह युहूदियेरे गलिले मेरां देतो इडी तग्र लोकन श्खाल्तो थुः ते भडकतो थुः। 6 ज़ैखन पिलातुसे एन शुनु त तैनी पुछकुन एह मैनु गलिलेरोए? 7 ते ज़ैरो तैस पत्तो लगे की एह हिरोदेसेरी रियास्तरो रहने बालोएत पिलातुसे तै हिरोदेसे कैझो भेजोकिजोकी तैईस तैभी युरोश्नांमे मां थुः।

हेरोदेसेरे सामने यीशु

8 ज़ैखन हिरोदेसे यीशु लाहु त बडो खुशी भोवकिजोकी तैस चरौकनी दैती यीशु हेरनेरी खुवाइश थी ते तैनी तैसेरे बारे मां बेडी गल्लां शुनोरी थीते तैस बडी उमीद थी की यीशुएरु कोई खास कम हेरी। 9 तैनी यीशुए बडु किछ पुछपण यीशुए तैस कोई जुवाब न दितो। 10 पण धर्म गुरु ते पुरेइत ते बडे बडे लोक बडे ज़ारे शोरे सैहीं यीशु पुड़ अलजाम लाने लगे। 11 तैखन हिरोदेसे भी अपने सैथन सैहीं मीलतां यीशुएरी बेजती की ते तैसेरी हासी बनईफिरी तैस अक चमकतो कुर्तो लुवेइतां पिलातुसे कैझो वापस भेजो। 12 तैस दिहैडी पिलातुस त हिरोदेसे एक्के केरे दौसत बेनी जे हालां की पैहिले तैन एक्केकी सैहीं दुशमनी थी।

पिलातुसे जिरिये यीशु मौतरी सजा

(मत्ती 27 : 15 - 26 ; मरकुस 15 : 6 - 15 ; यूहन्ना 18 : 39 - 19 : 16)

13 तैखन पिलातुसे पुरैहुत ते हाकम ते होरे लोक अकौठे कियो। 14 ते पिलातुसे तैन सैही जोंवतुसैइं ऐह मैनू मीक एन जोंतो आन्होरोए की ऐह लोकन शखालतेते मिम्ही एसैरी पुछ गन की पण जैस जुमरो अल्जाम तुस एस पुड़ लातथांवां एल्हेरो एस मां कोई कुसुर न लैहीं। 15 ते न हिरोदेसे जैनी ऐह असन क भेजोरोएहेरा असन क एरु कोई सुबुत ब्रामत न भोवं जैस सैही ऐह कतल कियो गाहे। 16 तैल्हेरेलेइ आंव एस कुट्टैइतां छैडी देतां। 17 तैईस जरुरी थुः की मुर्जमन मैरां यीशु अक हथरां छडेथे। 18 तैना सारे लोक चिंटां लगे मारने की एस मैन्हुं सजहा देथ ते ब्राबे इशे लेइ हथरां छड्डा। 19 बराबो शहारे मां गडबडी केरनेरे ते कतलेरे बारे मां पाबंद भोवरो थुः। 20 पिलातुसे यीशु हथरां छडनेरे इरादे सैही तैस दुबारु पुछ। 21 पण तैना लोक मना चिंटां लगे मारनेकी तु एस स्लेब दे एस स्लेब दे? 22 तैखन पिलातुसे तैन टलेईयावं फैरे फिरी जोंवकिजो अखर ऐनी कुन जुर्म कियोरोए? हेरा ऐसमां एरु कोई सुबुत ब्रामत न भोवंकी एह सजहाए मोवतरो हकदार भोएतेलहेरे लेइ आंव एस कुट्टैइतां छैडी देतां। 23 पण तैन चिंटां मैरी मैरी जोंने लगेकी ऐह फैंसी पुड़ चहडोरो लोडतेते तैनकेरी चिंटां मारनेरी उमीद पुरी भुई। 24 बस्सा पिलातुसे तैनकेरी दरखुवासर मुतबक मौवतरी सजहारो हुक्म दितो। 25 ते जै मैन्हुं हुकुमतेरे खलाफ ते खुनेरे जुर्म मां कैद थुः ते जैस हथरां छडनेरे लेइ तैनेइं दरखुवास कियोरी थीतै हथरां छडोपण यीशु तैनकेरी मेर्जी सैही सिपेही केरे हवाले कियो।

यीशु कुसे पुड़ चाड़ो

(मत्ती 27 : 32 - 44 ; मरकुस 15 : 21 - 32 ; यूहन्ना 19 : 17 - 27)

26 जैखन तैना यीशु नैहितां चल्लोरे थियेते तैनेइं शौमुंन कुरेनी जै एकी ड्लोवेरां एवरो थुः टलातो ते सलीब तैसका छुने जो दिति की तु इही सलिब छुइतां यीशु पत्ती चला।

27 ते बड़े लोक तैस पत्ती चल्लोरे थिये ते किछ कौन्शां भी थी जैना यीशुएरे लेइ शौग बनैती थी। 28 यीशुए तैनकेरे पासे मुडतां जोंवःहे यरुशलमेरी कुईयाव मेरे लेइ लेरां न देथ बल्के अपने मड्डां केरेलेइ लेरां देथ। 29 किजोकी तैना दिहाड़े एजने बालेंन जैखन तुसां ऐन जौल्हे की मुबारकन तैना कौन्शां जैना बैओवलाधन जैनकेरे चुचेइं दूध नैइं पियेवरु। 30 तैखन तैना पहाड़न सैही जौल्ही असन उंढे बिछड़ा ते कुदन जो जौल्ही की असन अपने आंत्र छपाथ। 31 किजोकी जैखन बुटो निलोए येंनी सब्ज हरो भरौए ते ऐन सभ किछ ऐस्सैही केरने लोरेंन ते जैखन थुकैल्हो त तैना कुन न केरेल्हे।

32 दुई मुर्जमन होरे भी थियेजैन यीशु सैही साथी चल्लेवरे थिये ताके तैना भी कतल भोई गहन। 33 जैखन तैना तैस ठैरी पुजेजैडी जो कलवरी जौतन तैडी यीशुए सलेबी मौत दिति ते तैना दुई मुर्जमन भी एक्की यीशुएरे देहीने पासे ते होरी बांए पासे सलिबी पुड़ चहडे। 34 यीशु जोंव हे बाजी ऐन माफ़ कैरांऐन न जानण की असां कुन लोरेंन केरने ते तैनेइं तैसेरे लिगडां कैरु शर्त रेखतां एपुम्महेइं बंटा। 35 लोक खडखडे ऐन सभ किछ हेरने लोरे थिये ते पुरैहुत जोरे जोरे हक्क देते थिये ते जोते थिये ऐनी होरे त बचाए ते अगर एह मसहीए ते परमेशरेरो टलारोए त अपने आपे की न बचाए। 36 सिपाही भी तैसका एइतां तैसेरी हासी बनाने लगे ते शराब पियानेरे लेइ तैस कैझो गिलास देने लगे। 37 ते जोते थिये तु अगर युहूदी केरो बादशाहस त तु अपनो आप त बचा। 38 ते तैस सलेबी पुड़येंनी यीशुएरे दौगे कैरां बहा अक पखडी लिखतां लेवरी थी ते तैस पुड़ ऐन लिखेरु थुःकी एह युहूदी केरो बादशाहए।

मन फिराने बालो कुकर्मी

39 तैन दोई डेकू जैना मारे जेतैन मैरां एक्के यीशु जो जोंवअगर तु मसहीअस त एपु भी बंच ते असन भी बचा। 40 पण होरें दुइयावं डैके तैस जो शुरे चारे जोंवःतीं परमेशरेरो भी डर नैइं हालांकी तैस भी तै सजहा मैलने लोरीए? 41 असन त अपने जुमैरी सजहा मैल्लोरीए ते ईशो त कतल केरनो ठीकेपण ऐनी त कोई गलत कम्म नैइं कियेरु। 42 तैखन तैनी जोंवःहे यीशु जैखन तु

बादशाह बेनतां एजेलहो त मीम्हीं याद कैरां। 43 यीशुए तैस्जो जोंवआंव तीं यकीने सैही जोंतां की तु अज्जै मीसैही साथी सुगें मां भोलहो।

यीशु एरे प्राण देने

(मत्ती 27 : 45 - 56 ; मरकुस 15 : 33 - 41 ; यूहन्ना 19 : 28 - 30)

44 दिसरे दुपाहर थियेते चोवरे पासन आंधारु भोई जेवं ते टलेई बजन तग आंधारु राह। 45 दिहाड़ो भी कलो भोवते मन्दिरेरो पड़वो फैटतां दुई टुकडे भुए। 46 ते यीशुए बड़े जोरे सैही जोंवःहे बाजी आंव अपनी आत्मां तेरे हथे मां सोफतां ते एन जोइतां यीशुए प्राण दिते। 47 जैखन रुमीं कपतांने ऐह तमाशो हेरोत परमेशरेरी तारिफ केरते जोंवःएह मैन्हुं सचूचै धर्मी थुः। 48 ते सारे लोक जैना तैडी थिये ऐह अनरथ हेरतां छाती पिटते चले जे। 49 पण यीशुएरे सारे जेनु पर्शेनु थिये ते तैना कौन्शां जैना गलिले मैरां यीशुए पत्पती ऐवरी थीदूर जैरे खेडोहीतां एन सभ किछ हेरी रेहोरी थी।

यीशु दबनो

(मत्ती 27 : 57 - 61 ; मरकुस 15 : 42 - 47 ; यूहन्ना 19 : 38 - 42)

50 अक मैन्हुं थुः जैसरु नोवं युस्फ थुः तै युहूदी केरी अदालतरो अक मुलाजम भी थुः ते अक बड़ो नेक नीति ते धर्मी मैन्हुं थुः। 51 तै अदालत आलियारे आफसरां केरे फैस्लेरे हक्के मां न थुः? तै युहूदी केरे शहार अरमतियरो रहने बालो थुः ते परमेशरेरी बादशैहीयरी तलाशी मां थुः। 52 तैनी पिलातुसे क गैहितां यीशुएरी लाश मगी। 53 ते लाश सलिबी पुड़हेरां ओसैलतां साफ कपडे मां पलैटता ते एकी कूडी मां रखी जै एकी शफ़डी मां बनेवरी थीतैस कूडी मां पेहीले कोई लाश न थी। 54 तै बेडी दिहेडारी तीयेरारी दिहाड़ी थी येंनी सब्तेरी दिहाड़ी शुरु भोने बाली थी। 55 ते तैना दुई कौन्शां जैना गलिले मैरां यीशुए पत्पती ऐवरी थी? युस्फे पत्पती जेई ते तैनेइं तै कूड हेरीकी यीशुएरी लाश एस्मां केचरे सैही राखोरीए। 56 तैखन तैना घरे जेई ते मुशकी मुसले ते अतर तेल तियार कियो ते सब्तेरी दिहेडी आराम कियो।।

यीशु एरु जीतू भौनु

(मत्ती 28 : 1 - 10 ; मरकुस 16 : 1 - 8 ; यूहन्ना 20 : 1 - 10)

24 हफतेरी पेहीली दिहेडी झेझां किछ कौन्शां मुशकि मूसाले नैहितां जेई जै तैनेइं तियार कियोरो थुः ऐनतां कूडी क पुजी। 2 पण तैनेइं तै घोड़ कूदरे गत्तै पुडैरां बिछडोरो लाहु। 3 जैखन तैना अंतर जेई त तैन यीशुएरी लाश न मैल्ली। 4 तैखन तैना एन हेरतां परेशान भुई त दुई मैन्हुं जैन छीतां लिगडां ल्योरां थियां तैन कौन्शन क एइतां खेडोए। 5 तैना कौन्शां डेरी जेई ते तैना तल्ले मां ठैलां लेगी देने पण तैन मैन्हेइं तैन जो जोंवःतुस जिते मुडदन मां किजो लोरीथ तोपने। 6 तै इडी नैइं बल्के जितो भेवरोए तुसन याद नैइं की जैइस तै गलिले मां थुः त तैनी तुसन जेवरु थुः। 7 की मैन्हेरु मड्डु पैपी केरे हथे देनोए ते स्लेबी पुड़ चहडोए ते फिरी टलेईयवं दिहाड़े फिरी जितो भोनो जरुरीए। 8 तैखन तैन यीशुएरी गल्लां याद एई। 9 तली तैन कूडी कैरां चेली जेई ते यीशुएरे यारहे चलन ते बाकी होरी चलन भी ऐस गल्लरो पतो दितो। 10 मरियम मगदलिनी लेवांना ते याकुबेरी अम्मां मरियम ते तैस सैही साथी होरी भी कही कौन्शां थी जैनेइं चलन ऐन गल्लां केरो पतो दितो। 11 पण तैनेइं तैनकेरु यकीन न कियुकिजो की तैनकेरी गल्लां तैन अजीब लैगी। 12 पण पतरस उठो ते तै कूदरे पासे दौवडतो तैस कूडी क जेव ते तैडी तैनी लिक्तां अन्तर तक्कते सिर्फ कफन तैडी लाहू ते एस गल्ली पुड़ हेरांन भोइतां तैड्डां चलो जेव।

इम्माऊसेरे बत्तां चलन सैहीं

(मरकुस 16 : 12 , 13)

13 फिरी एरु भोंव की तैन मैरां दुई चले तैस दिहेडी एकी ड्लोवेरे पासे चल्लोरे थिये तैस ड्लोवेरु नोवं अमावस थुः तैन यरुशलमेरां सत्त मिल दुर थुः। 14 तैन एपु म्महेइं एस्से बारे मां गल्लां केरते चल्लोरे थिये जै बितना बितोरी थी। 15 जैखन तैना गल्लन मां मस्त थिये ते एपु म्महेइं बेंस लोरे थिये केरने त यीशु एपु तैन क नेडे एइतां तैन सैही साथी साथी चलने लगे। 16 पण तैनेइं

यीशु न पशानो किजोकी तैनकेरी एछन पुड़ पडदो पवरो थु:। 17 यीशुए तैन जो जॉव:तुस लोक एपु म्महेइं कुन गल्लां केरते चलोरथ? तैना चुप राहे ते तैना बडे मायुस जैरे लैहीयोने लोरे थिये। 18 तैखन तै जैसेरु नोवं कल्पास थु: तैस सैहीं जौने लागोरुशलमे मां सिर्फ अक तु अजीब मैन्हुंस की जै तु एन भी न जानस की शाहरे मां कुन कुन भौने लोरुए। 19 यीशुए तैन पुछू कुन लोरुए भौने? तैनेइं तैस सैहीं जॉव:यीशु नासरी ते तैसेरी वारदाते ते मैन्हुं जै अपने कम्मे ते बचनेरे जीरये परमेशरेरी नजरी मां ते सैरी लोकां केरे लेइ अक बेड़ी कुदरुती बालो नबी थु:। 20 तै इशे पुरैहुतेइं ते हाकमेइं तै केंचरे सैहीं रूमी गुवरनरें हवाले कियो ते तैस जो कलेरो हुकम देइतां तैस सलीब दिती। 21 पण असन त उमीद थी की एहे मैन्हुंए जै इस्मएलन छुटकरो दैल्हो ते एसेरे अलावा ऐन गल्लां बितारे अज टलेइयवं दिहाड़ीए। 22 ते साथी इशे मैहेलेरी किछ कौन्शां झैझां कूडी क जेवरी थी तैनकेरे जौने सैहीं असां हेरांन भुए। 23 जैखन तैन लाश न मैली त तैना ऐन जौती एई असेइं सुवर्गदूत लाहते तैनेइं जॉव: की ते जितो भोवरोए। 24 तैखन किछ ईशे साथी भी कूडी क जे ते जैचरे कौन्शैइं जेवरु थु: तैरु लाहूं पण यीशु न लाहु। 25 तैनी तैन सैहीं जॉव:तुस कैत्रे सादेथ ते नेबी केरी जौवरी गल्लां मन्ने मां कैत्रे कमजोरथ। 26 कुन मसहीएरे लेइ जरुरी न थु: की दु:ख झैल्ले ते फिरी एपनी मेंमाही मां दाखल भोए? 27 ते तैनी मुसे कैरां देंते ते सैरी नेबी केरी गल्लां जैन तैसेरे बारे मां बचनेरी कितबी मां दरज थी तैन समझैई।

28 एत्रे मां तैन तैस ड्लोवें नेडे पुजे जैडी तैनेइं गहंनु थु: तैनेइं यीशुएरे चलने सैहीं बुझू की ऐनी अग्रोहुं गहंनुए। 29 पण तैनेइं ऐन जौइतां मजबुर कियो की असन क बिशकिजोकी दिहाड़ी डुबोरीए आंधारु भौने बालुए? बस्सा तै बिशनेरे लेइ तैन सैहीं साथी अत्र चलो जेव। 30 जैखन तै तैन सैहीं साथी रौट्टी खाने बिशो त तैनी रौट्टी टलाती ते शुक्र केरतां टलोडी ते तैन देंने लगो। 31 तैखन तैनकेरी एछी खुल्ली ते तैनेइं तै पशानो पण तै तैन कैरां आलोप भोई जेव। 32 तैना एपु मांमेईं जौने लगे जैखन तै बत्तां असन सैहीं साथी गल्लां लोरो थु: केरने त असन पाक बचनेरी गल्लां समझातो थु:ते असां कैरहे खुशी सैहीं मस्त थिये। 33 तैना तैखने तैझां उठे ते यरुशलमे मां आए जैडी तैन याहरे चले ते होरे तैन केरे साथी एकी ठैरी मैल्हे। 34 तैना जौने लोरे थिये की परमेशर सच्चै जितो भोवरोए ते शुमौने लाहोरोए। 35 तैनेइं दूईयेइं बत्तरी सैरी गल्लां शुनेइं ते फिरी केंचरे असेइं यीशु रौट्टी टलोडते बार पशानो।

यीशु चलन लेइहोने

(मत्ती 28 : 16 - 20 ; मरकुस 16 : 14 - 18 ; यूहन्ना 20 : 19 - 23 ; प्रेरत 1 : 6 - 8)

36 तैना गल्लां केरने लोरे थिये त यीशु तैन मुझाटे एइतां खडो भोव ते तैन जो जॉव:तुसन शांती मैल्हे। 37 पण तैना एतरे डेरी जे की तैना समझने लगे की असां किसेरी आत्मां लहंने लोरेम। 38 यीशुए तैन सैहीं जॉव:तुस किजो डरोरेथ ते तुशे दिले मां शक किजो पैइदा भेवरोए। 39 मेरे हथ पाव हेरा आंव तैहीं मीं हथ लेइतां हेरा किजोकी आत्मांइ हडी मास न भोएजैरु तुस मीं मां लहतथ।

40 ऐन जौनेरे पत्ती तैनी अपने हथ पाव हेराए। 41 पण खुशी सैहीं ते परेशेनी सैहीं तैन यर्कीन न थु: एइतु पण यीशुए तैन सैहीं जॉव:इडी तुसन क खाने जो किछ आहे? 42 तैनेइं तैस टलाडोरी ममैछलरी अक कतली दिती। 43 तैनी टलाती ते तैनकेरे सामने खाई। 44 तैनी तैन सैहीं जॉवजैखन आंव तुसन सैहीं साथी थु:त मीं तुसन ऐन गल्लां जौवरी थीकी मुसेरे शासत्रे मां ते नेबी केरी किताबन मां ते जबुरे मां मेरे बारे मां जैन किछ लिखेरुएतैसेरु पुरु भौनु जरुरीए।

45 तैखन तैनी तैनकेरी अकल खोल्ली ताके पवित्र वचन सैमझी सखन। 46 ते तैन सैहीं जॉवऐन लिखेरुए की मसही दु:ख उडालो ते टलेइयावं दिहाडे मुडदन मैरां जितो भोल्हो। 47 ते तैसेरे नोवें सैहीं यरुशलमेरां लेइतां शुरु केरतां सैरी कौमन मां तोबा ते पापां केरी मैफरी मनदी की गाहेली। 48 किजोकी तुस ऐन गल्लां केरे शहातथ। 49 मेरे बाजी जैलहेरो वेहिदो कियोरोएआंव तै तुसन पुड़ ऊतैरेल्हो पण जां तग्र अम्ब्रेरां पाबित्र आतमारु ते शैत्तरु लिगड न मैल्हे तैस्से शहरे मां रेहियथ।

यीशु एरु सुवर्ग ए जो गहनू

(मरकुस 16 : 19 - 20 ; प्रेरत 1 : 9 - 11)

50 फिरी यीशुए तैन बेतनियां तग्र बेइर नियेते अपनो हथ खडो केरतां तैन बरकत दिती। 51 जैखन तै तैन बरकत देंने लोरो थु:त तैन कैरां आलग भोई जेव ते आम्ब्रे मेंझो चलो जेव। 52 चलेइं तैस्जो मथो टेको ते फिरी खुशी सैहीं यरुशलमे जो वापस चले जे। 53 ते तैन हर बखत मन्दिरे मां एइतां परमेशरेरी तारिफ केरते थिये।।

यूहन्ना

वचन जिसमे मां आव

1 सैभन कैरां पैहीलो वचना थु, ते वचन परमेशरे सैहीं साथी थु, ते वचने परमेशर थु। 2 ते वचने सैभन कैरां पैहीलो परमेशरे सैहीं साथी थु। 3 सब किछ तैस्सेसैहीं पैईदा भोवं, ते जैन किछ पैईदा भोवं ऐस मेरां कोई भी चीज तैसेरे बगैर पैईदा ना भोई। 4 तैस मां जिंदगी थी, ते तै जिंदगी मैन्हुं केरी लो थी। 5 लो आंधरे मां चमकचे, ते आंधरे तै कधै भी मन्जूर ना की। 6 परमेशरेरे अक मैन्हुं भेजो जेव, जैसेरु नोवं यूहन्ना थुं। 7 ते तै एलहेरलेई एवरो थु की लोअरी शहादत दे, ताके सब लोक तैसेरे जिरीये सैहीं विश्वास केरन। 8 तै एपू लो ना थी, पर लोअरी गुवाही देने एवरो थु। 9 सच्ची लो जै हर एक्की मैन्हुं लो देचे, दुनियाई मां एजने बाली थी। 10 तै संसारे मां थु, ते तै संसारे ना पशानो हालां की संसार तैस्से सैहीं पैईदा भोवं। 11 तै अपने लोकन मां अव, ते तैसेरे अपनेइं तै कबूल ना कियो। 12 पण जैत्रेइं तै कबूल कियो, तैनी तैना परमेशरेरी अवलाद भोनेरु हक दितु येनी तैना जैनां तैसेरे नोवं पुड़ विश्वास केरतन। 13 तै ना लैव्हे सैहीं, ना जिसमेरी मेर्जी सैहीं, ना मैन्हुं केरे मेर्जी सैहीं ब्लके परमेशरेरी मेर्जी सैहीं पैईदा भोवरोए। 14 ते तै वचन जिसमे मां अव; ते इशैं दरमियाने मां राहु, ते असेइं तैसेरी एरी माहिमा हेरी, जैचरे बौवरे अकैल्हे मडैरी माहिमा हेरी, जै फजले ता सचैई सैहीं भैरतां थु। 15 यहुन्ने तैसेरे बारे मां गुवाही दिती, ते जोरे जोरे सैहीं जॉव, ईही तैहे, जैसेरे बारे मां मीं जोवरु थुं, की जै मेरां पत्ती एजी राहोरोए, तै मीं कैरां बड्डोए कीजो की तै मीं कैरां पैहीलो थु। 16 तै तैमां बडी दियाए ते असंन तैसेरी दियाई सैहीं बडी ब्रकत मैल्ही, येनी ब्रकती पुड़ ब्रकत। 17 किजोकी शेरित ता मूसैरे जिरये सेहिं मैल्होरी थी, पण ब्रकत ता सचैईयरु दान यीशुएरे जिरये सैहीं मैल्हु। 18 परमेशरे कधै केंचे नेहीं लाहोरो, अके मडू" जैन बौवरे कुम्मे मांहे तैनी तै हेराव।

यूहन्ना बपतिस्मो देने बालेरी गुवाही

(मत्ती 3 : 1 - 12 ; मरकुस 1 : 1 - 8 ; लूका 3 : 1 - 8)

19 युरोशलम शहरेरे यहुदी बुजुगंइं किछ परैहूत ते लावी यूहन्ना का भेजे, की तैस पुछन की तु कौवनस। 20 तैनी रोडे चारे जॉव, की आंव मसही नेहीं। 21 चाली तैनेइं तैस पुछ, तु कौवनस? कुन तु एलियास? यहुन्ने तैन जुवाब दितो आंव नेहीं, ते फिरी पुछ, कुन तु तै नबिस? तैनी जुवाब दितो नेहीं। 22 तैनेइं फिरी तैस पुछ, फिरी तु कौवनस? ताके असां अपने भेजने बालन जुवाब देम, तु अपने बारे मां कुन जोतस? 23 तैनी जॉव, जैचरे यशया नेबें जोवरुए, आंव जंगले मां हक देने बालेरी आवाजाइं कि तुसां परमेशरेरी बत तयार केरा। 24 तैखन तैना फ्रिसी जैना युहान्ने का भेजारे थिये। 25 तैनेइं तैस सुवाल पुछो, अगर तु नू मसहीअस, ना एलीयास ते ना नबी, तै फिरी बपतिस्मो कीजो देतस? 26 यहुन्ने जुवाब दितो, आंव ता पैनी सैहीं बपतिस्मो देतां, पण तुसंन मां अक एरहो मैन्हुए जैस तुस ना जानथा। 27 मतलब मेरां पत्ती एजने बालोए, जैसेरे आंव बूटा केरो तसमे खोलनेरे काबल नेहीं। 28 एनां गल्लां यरदनेरां पार बैतनियां मां भोई, जैडी यहुन्ना बपतिस्मो देतो थु।

परमेशरेरु गबडू

29 दुईयावं दीहाडे तैनी यीशु अपने पासे एंडतो लाहु तै जॉव, तक्का परमेशरेरु गबडू जैन सैरी सन्सारेरे पाप नैते। 30 ईही तैहे, जैसेरे बारे मां मीं

जोवरु थुं, कि अक मैन्हुं मीं पत्ती एजने बालोए, तै मीं कैरां बड्डोए, किजो की तै मीं कैरां पैहीलो थु। 31 आंव ता तैस एपु भी पशानतो ना थु, आंव ता पैनी सैहीं बपतीसमो देतो अव, कि तै मैन्हुं इस्राएले मां बांदो भोए। 32 ते यहुन्ने ऐह गुवाही दिती, मीं आत्मा कबूतरेरे शकली मां आसमानेरां एंडती लाही, ते तै तैस पुड़ बिशी। 33 आंव ता तैस पशानतो ना थु, पर जैनी आंव पैनी सैहीं बपतीसमो देने भेजो, तैनी मीं सैहीं जॉव, जैस पुड़ तु आत्मा एंडती ते बिशती लाहेलो, तैहे पवित्र आत्माइं सैहीं बपतीसमो देने बालोए। 34 तै मीं लाहु तै गुवाही दिती, कि इन परमेशरेरु मडूए।

यूशु एरे पेहिले चले

35 दुईयावं दीहाडे फिरी यूहन्ना ते तैसेरे चलन मेरां दुय्य जने खडे भोवरे थिये, 36 ते तैनी यीशु तेकता जै चल्नोरो थु जॉव, तक्का इन परमेशरेरु गबडूए। 37 चाली तैना दुय्य चले एन शुन्तां यीशुए पत्ती चले। 38 यीशुए बेदलोइतां तैना एईते लाए ते तैना जॉव, तुस कैस लगेरेथ तोपने? तैनेइं जॉव, ओ रब्बी (मतलब ओ गुरु)तु कोडी रहतस? 39 तैनी तैना जॉव चला तुस एपू हेरेले, चाली तैनेइं गैहीतां तैसेरे रहनेरी ठार हेरी, ते तैस दिहाडे तैना तैस साथी राहे एह डलोवझरे चोवरे बजां केरो मोको थु। 40 तैन दुई चलन मेरां जैना यहुन्नेरी गल शुनतां यीशु पती चलोरे थिये, अक अंद्रियास थु जै शुमौन पतरसेरो दला थु। 41 अंद्रियासे पैहिलु एन कम किनुं की अपने दलाए शमौने तोमां तैस सैहीं जॉव की असंन मसही मैल्होरोए, जैसेरो मतलब युनेनी मां खरसतुसे"। 42 तैखन तै तैससैहीं साथी यीशु का अव, यीशुए तैसेरे पासे तकु ते जॉव, तु यहुन्नेरु मडु शुमौनस अजैरे बाद तेरु नोवं कैइफा येनी पतरस भोल्हु।

फिलिप्पुस ते नतनएल कुजानो

43 होरसां यीशुए गलिले मं गहनेरी तियारि की, तैनी फिलिप्पुस लैहितां तैसजो जॉव, मी सैहीं साथी चल। 44 फिलिप्पुस ते अंद्रियास ते पतरस बैतसैईदा शहरे मां रहते थिये। 45 फिलिप्पुस नातनएहेले सैहीं मिलो ता जौने लगे, की जैस मैनेरे बारे मां मूसै तुवारिती मां ते नेबेइं एपनी किताबी मां जोवरुए की तै असंन मैल्होरोए, तैन युसफैरु मडु यीशु नासरीए। 46 नातनएहेले यीशुए पुछ, कुन नासरते मेरां भी ओई रोडी चिज निसी सखचे? फिलिप्पुसे जॉव, गैहीतां एपु हेर। 47 जैखन यीशुए नातनएहेल अपने पासे ऐइंतो लाहु ता तैनी तैसेरे बारे मांएन जॉव, ईही असली ऐसाएली एसमां कोई शक नेहीं। 48 नातनएहेले यीशुए पुछ, तु मीं केचरे जानतस? यीशुए तैस जुवाब दितो, फिलिप्पुसेरे कुजाने कैरां पैहिले जैखन तु अंजिरेरे येनी फेगरे बूटे हैठ थु मीतु तैडी लाहोरो थु। 49 नातनएहेले जॉव, रबी" तु परमेशरेरु मडूस, तु इस्राएलेरो बादशाहास। 50 यीशुए तैस जुवाब दितो, मीं तीं सैहीं जॉव की मीं तु फेगरे बूटे हैठ लाहोरो थु, कुन तीं तांए विश्वास कियोरो थु? तु इठां भी बेडी बेडी गल्लां लाहेलो। 51 फिरी तैनी जॉव, आंव तुसन सैहीं सच सच जोतांइ कि तुस सुवर्ग खुलू तै परमेशरेरे सुवर्गदूतन उबरे गहंते ते अबने आदमें पुड़ उत्रते लाहेलो।

गलीलेरे काना मां पेहिलो चमतकार

2 फिरी टलेइंयावं दिहाडे कानाएं गलिले मां केंचरो इलाह थु, ते यीशुएरी अम्मां भी तैडी थी। 2 यीशु ते तैसेरे चलन भी धाम कियोरी थी। 3 ज्ताल्ही दाछारो रस मुको त यीशुएरी अम्मां लगी जौने, एन का दाछारु

श्रबत मुक्करुए। 4 यीशु लगे जौने, ओ कौनशे असंन कुने? हेजु मेरो मौको नेही एवरो। 5 तैसेरी आम्मा सेवकन सैही जौव, जैन किछ एह तुसन सैही जौए तैने केरथ। 6 तैडी नेडे घौडां केरे शा घडे रखोरे थिये, जैना युहुदी केरी रसम पुरी केरनेरे कम्मे एइते थिये एन घडन मां अक सौ बी लिटरन केरां लेइतां अक शौ पंजही लिटरन तग्र पानी लगतु थुं। 7 यीशुए अपने चलन सैही जौव, घडन मां पानी भरा, तैनेइं पुरे घडे भरे। 8 चाली यीशुए तैन जौव, गाथ धामारे प्रधाने हेराथ, तैनेइं तैस का श्रबत निहुं। 9 ज्तालही धामारे प्रधाने तैन पानी पियुं, जैन दाछारो रस बनोरु थुं, तै ना थु जानतो कि एन कोठां एवरुए पण सेवक जानते थिये, जैनेइं तैन केढतां आन्हेरु थुं, एलहेरलेइ धामारे प्रधाने लडो कुजाव। 10 हर कोई मैनु पैहीलो रोडो दाछारो रस देते, तै बुरो जैरो पत्ती, जो रखते पर तीं रोडी हेजु पत्रांहुं रखोरीए। 11 यीशुएरो एह पैहीलो चमत्कार थु, जै तैनी कानाएं गलिले मां हेरेवरो थु, ते तैसेरे चलेइं तैस पुड विश्वास कियो।

12 ऐसेरां पत्ती तै ता तैरेरी अम्मां ते तैसेरे ढूला ते तैसेरे चले कुफ्रनहुंमां मां जे ते किछ दिहाडे तैडी राहे।

मन्देरे मैरां बुपारी कढने

(मत्ती 21 : 12 - 13 ; मरकुस 11 : 15 - 17 ; लूका 19 : 45 - 46)

13 जैईस युहुदी केरी बड्डी दिहाडी नेडे अई ता यीशु युरोशलमं जो चलो जेव। 14 तैनी तैडी प्राथना भावने मां गोरु गब्बां ते कुबुतर बेचने बाले लाहे, ते सुंनार भी जैना तैडी बिशोरे थिये। 15 यीशुए तैन एरहु डांग मारु की जैतरे भी हुड दांत समेत बेचने बाले बेरोहुं खदाडे, ते सुंनारां केरे मौती छैकतां छड्डे ते तैनकेरी बिशनेरी ठारां पुटी छैडी। 16 ते कुबुतर बेचने बालन जो जौव, ईना ईठां घिनी गाथ, मेरे बाजेरु घर तुसेइं बपारेरी मन्डी बनेवरीए। 17 तैसेरे चलन याद आंव की पाबित्र शासत्रे मां लिखेरुए की तेरे घरेरी शौर मीं खेईगह्नी।

18 युहुदी तैसेहीं जौने लगे की तु कोई चमत्कार केरतां हेरेई सखतस की तीं एन केरनेरु हक्के? 19 यीशुए तैन जुवाब दितो, ऐस घरे डोला, ते आंव ऐस टलेई दिहैडन मां खडे केरल्लो। 20 युहुदेइं जुवाब दितो, इन भवन बन्ने मां चैलही साल लागोरेन, कुन तु ऐस टलेई दिहैडन मां बनेई सखतस? 21 पण यीशुए जैस भवनेरी गल कियोरी थी, तै तैसेरी अपनी जान थी।

22 एलहेरलेई जैखन तै मुडदन मैरां जिंतो भोव तैखन तैसेरे चलन याद आंव की तैनी ईही गल जौवरी थी ते तैन पाबित्र शासत्रे पुड ते यीशु मसहीएरी जौवरी गल्लन पुड पुरु यकीन आंव।

यीशु मैन्हु केरे मने जानते

23 जैखन तै ईद फस्हीएरे मोके युरोशलमं मां थु ता बडे लोकेइं तैसेरे चमत्कार लैहितां तैस पुड विश्वास कमाव। 24 पण यीशु तैन पुड अतबार ना थु, एलहेरलेई तै सैभी केरो हाल जानतो थु। 25 तैस एह जरूरत ना थी, की कोई मैन्हु तैसकेची होरी मैनेरे बारे मां जौए किजोकी तै मैन्हु केरे दिलेरो हाल जानतो थु।

यीशु ते नीकूदेमुस

3 फ्रिसन मां अक मैन्हु थु तैसेरु नोवं नेकोदेंमस थुं तै युहुदी केरी अदालतरो अक मुलाजम थु। 2 एकी राती तै यीशु का ऐइतां जौने लगे, रबी" अस जानतम की तु परमेशरे तु गुरु नबेइतां भेजोरोस किजोकी जैना चमत्कार तु हेरातस, होरो कोई ना हेरेई बटे, जां तगर परमेशर तैस्सेहीं साथी ना भोए। 3 यीशुए जुवाब दितो आंव तुसन सैही सच सच जौतां की जां तगर कोई नोवं त्रिके सैही पैइदा ना भोए तै परमेशरेरी बादशाही ना लैही बटे। 4 निकोदेंमसे पुछू, अगर कोई मैन्हु बुडो भोते ता तै केंचरे सैही दुबारा पैइदा भोई सखते? एन ता ना भोई सखे की तै फिरी एपनी अम्मेरे पेटे मां गैहीतां दुबारो जरमे। 5 यीसुए जुवाब दितो, आंव तुसन सैही सच सच जौतां की जां तगर कोई मैन्हु पैनी ते आत्माइं सेहिं पैइदा ना भोए तै परमेशरेरी बादशाही मां दाखल ना भोई बटे। 6 मैन्हु सैही ता मैन्हु पैइदा भोते, पण जै आत्माइं सैही पैइदा भोते तै आत्मां। 7 हेरांन ना भौथ की मी तुसन सैही जौव, की तुसन सैभन नोवं त्रिके सैही पैइदा भौनु जरुरीए। 8 हवा जैरां चलनु चहचे तैरां

चलचे, तु तैसारी शौर ता शुंनतस पण एन ना जानंस की तै कौठां ऐइचे ते कौरां गहचे, आत्माइं सैही पैइदा भौने बाले हर मैनेरो हाल भी ऐरहो भौनोए। 9 निकोदेंमसे पुछू, एन केंचरे सैही आसांन भोई सखते? 10 यीशुए जौव, तीं ता ईस्ऐलन मां अक गुरेरो दर्जो मैल्होरोए, ते फिरी भी तु ऐह गल ना जानंस? 11 आंव ता तुसन सैही सच सच जौतां की अस जैन जानत तैने जौतम ते जैन लाहेरुए तैसेरी गुवाही देतम, फिर भी तुस लोक ईशी गुवाही ना मन्थ। 12 मीं ता तुसन सैही धेतरी गल्लां की ते तुसेइं यकीन ना कियुं ते अगर आंव अम्ब्रेरी गल्लां जौइं ता तुस केंचरे यकीन केरल्ले? 13 कोई मैन्हु अम्ब्रे मां नेही जेवरो सुवाए तैसेरे जै अम्ब्रेरां ना भोए एवरो येनी, अबने आदम"। 14 जैचरे मूसे बियाबांने मां पितलरो सप बटे पुड ऊचो टंगो, तैचरे जरुरीए की अबने आदम" भी ऊची ठैरी टंगो गाहे। 15 ताके जै कोई तैस पुड विश्वास कमाए, तैस हांमेशरी जिंदगी मैल्हे।

16 किजोकी परमेशरे दुनियाई सैही एत्रो पियार कियो की तैनी अपनु अक मडु दितु ताके जै कोई तैस पुड विश्वास केरे तै नाश ना भोए, ब्लके तैस हांमेशरी जिंदगी मैल्हे। 17 किजोकी परमेशरे मडु दुनियाई मां एलहेरलेई नेही भेजेरु की तै दुनियाई सजहरो हुकम शुंनारे, ब्लके एलहेरलेई की दुनियाई तैसेरे जिये सैही मुखती दे। 18 जै मडु पुड विश्वास केरते तैस जो सजहरो हुकम ना भोए, पण जै मडु पुड विश्वास ना केरे तैस जो सजहरो हुकम भोवरोए, किजोकी तैनी परमेशरेरे एकी मडु पुड विश्वास नेहीं कमेवरो। 19 ते सजहरे हुकमेरी वजा ऐहे की लौ" दुनियाई मां अई, पण लोकेइं तैस लौअरे बजाहे आंधरु पसंद कियुं किजोकी तैनकेरां कम्मा बुरा थियां। 20 जै कोई बुरु कम केरते तै लोई सैही नफ्रत केरते ते तैसारे नेडे ना ऐजे, कोसकोही ऐरु ना भोए की तैसेरां कमा बांदां भौन। 21 पण जैसेरी जिंदगी रोडे कम्म केरे लेई बाकमे तै लौअरे नेडे ऐईते ताके बांदु भोए की तैसेरे हर कमेरो परमेशरेरी मेजरि मुताबक फल मैल्हे।

यीशु एरे लेई यूहन्नारी गुवाही

22 एन गल्लं केरे बाद यीशु त तैसेरे चले युहुदियरे आलाके मां जे, ते तैडी रेहितां लोकन बपतिसमो देने लगे। 23 युहन्ना भी अनुणे" मां बपतिसमो देने लगे, तै ठार शालमेरे नेडे थी, वजा ऐह थी की तैडी पानी हछु थुं ते लोक बपतिसमो नैनेरे लेई ऐइते रहते थिये। 24 ऐह युहन्नेरे जैलही मां छडने केरां पैहिली गल्ले। 25 युहन्नेरे चेलां केरी ऐकी युहुदी सैही ऐस रसंमरे बारे मां जै पैनी सैही बपतिसमो दितो गहतो थियो, बंस शुरु भोई। 26 एलहेरलेई तैना युहन्ना का ऐइतां जौने लगे, रबी" तै मैन्हु जै दरया यरदनेरे पार तीं सैही साथी थु ते तीं तैसेरे बारे मां गुवाही दितोरी थी तै भी बपतिसमो देते ते सब लोक तैस्सेका गहतन। 27 युहन्ने जुवाब दितो, मैन्हु किछ ना मैल्हे, जअं तगर तैस परमेशरेरी तरफां ना मैल्हे। 28 तुस ऐपु शहातथ की मीं तुसन सैही जौवरु थुं की आंव मसही नेहीं, ब्लके आंव तैसकेरां पैहिले भेजोरोइं। 29 महरनी ता महरावेरी भोचे, पण महरावेरो दौसत जै तैसेरी आहरत बिरत केरते ते महरावेरी हर गल शुंनतो रहते ते तैसेरी गल शुंनतां खुशी रहते, बस्सा मेरी ऐह खुशी पुरी भोई जेई। 30 एन जरुरीए की तै बधे ते आंव घैटी।

31 जै बंधोरां ऐइते तै बडो ऊचो भोते, ते जै मैन्हु धेरती पिडयोए तै धेरतरौए तै धेरतरौ गल्लां केरते, पण जै अम्ब्रेरां ऐइते तै सैभना ऊचो भोते। 32 तैनी जैन किछ लाहुं ते शुंनु तैसेरी गुवाही देते, पण तैसेरी गुवाही कोई ना मन्ने। 33 पण जै कुबूल केरते तै तैसेरी तसदीक देते की तै सचोए। 34 एलहेरलेई जै परमेशरे भेजोरोए तै परमेशरेरी गल्लां जौते एलहेरलेई की तै पाबित्र आतमा खुले हथैइं देते। 35 बाजी मडु सैही मुहाबत रखते ते तैनी सभ किछ तैसेरे हावाले कियेरुए। 36 जै मडु सैही विश्वास केरते तैस हांमेशरी जिंदगी मैल्चे, पण जै मडु पुड विश्वास ना रखे तै जिंदगी केरां दुर भोई गहते ते तैस पुड परमेशरेरो क्रोध रहते।

यीशु ते सामरी कौन्श

4 फ्रिसी केरे कन्ने तगर ऐह गल पुजी की बडे लोक यीशुएरे चले बन्ने लागोरेन ते तैन केरी तैधात युहन्ना बपतिसमो देने बालेरे चलन केरां भी जादे। 2 हालांकी सच एन थुं की यीशु एपु नेहीं ब्लके तैसेरे चले बपतिसमो

देते थिये। 3 जैखन परमेशरे एस गल्लरो पत्तो लगे ता तै युहुदया छेडतां गलिले जो वापस चलो जेव। 4 किजोकी तैनी सांमरियाए मम्हैइं निसतां गहंनु थुं। 5 एलहेरलेई तै सांमरियाए सुरखार नोवैरे शहरे मं अव तै ठार" तैस जमीनरे नडे थी जै याकुबे अपने मड्डे युसफे दितोरी थी। 6 याकुबेरु खुहू भी तैडी थुं ते यीशु बत्ते हैन्ठतां ते थैकतां तैस खुहे पुड बिशौरो थु, ते तैखन दुपहरां केरो मोको थु।

7 अक सांमरी कौन्श तैडी पनी भरने आई, यीशुए तैसजो जॉव, मीं पानी पिया। 8 किजोकी तैसेरे चले रौट्टी आन्हने शहरे मां जेवरे थिये। 9 तैस सैमरी कौन्शां यीशु जो जॉव, तु युहुदिस ते आंव अक सांमरी कौन्शां, तु मीं पानी पियांनरे लेई ज़ोतस, किजोकी युहुदी सैमरन सैहीं मिलनु जुलनु ना थिये सुखाते। 10 यीशुए तैस जुवाब दितो, तु परमेशरेरु दान बुझैथी ते ऐन भी भुझैथी की कौन तीकैरां पानी मगने लोरोए ते तु तैसकैरां मगैथी ते तै तीं ज़िदगारु पानी देथो। 11 तैस कौन्शां जॉव, ओ परमेशर तींका पानी भरने लेई कोई भांड नेहीं ते खुहू बडू डुग्घूए, ते तीं ज़िदगारु पानी कौठां मैल्हु। 12 कुन तु ईशै बाजी याकुबे कैरा भी बडोस जैनी ऐन खुहू असंन दितेरुए ते तैनी एपु भी ते तैसेरी ओवलाधां ते तैसेरे गोरु गब्बेईं भी ऐस्सै मैरां पियुं। 13 यीशुए तैस जुवाब दितो, जै कोई ऐस खुहे मैरां पियेल्हो तैस फिरभी टलीश रहनीए। 14 पण जै कोई तैन पानी पिते जैन आंव देतां तैस कधै टलीश ना लगौली, सच ता एने की जैन पानी आंव तैस देल्हो तै तैसमां अक नाग बनेलो जै हांमेशां बगतो राहेलो। 15 तैस कौन्शां यीशु जो जॉव, ओ परमेशर" मिम्हीं तैन पानी दे ताके मीं ट्लिश ना लगे ते मीं बार बार पनी भरने ईस खुहे पुड ना ऐजनु पै।

16 यीशुए तैसजो जॉव, गह अपनो मुन्श कुजा। 17 तैसां कौन्शां जुवाब दितो, मेरो कोई मुन्श नेहीं, यीशुए तैसजो जॉव, तीं सच जॉव की मेरो कोई मुन्श नेहीं। 18 तीं पंच मुन्श बनेवरेन ते जैसका तु अज बिशोरीस तै भी तेरो मुन्श नेहीं, तीं जैन किछ जॉव तैन सचे ज़ोवरुए। 19 तैस कोन्शां जॉव, मीं बुझु की तु कोई नबीस"। 20 ईशै सियांने बुजुर्गेईं ईस पहाडे पुड आराधना केरते राहे, पण तुस युहुदी ज़ोतथ की युरोशलमे अक ठारे जैडी प्राथना कियोरी लोडचे। 21 यीशुए तैस कौन्शी जो जॉव, मेरु यकीन केर की तै मोको भी ऐजी राहोरोए, की तुस लोक प्रभु परमेशरेरी आराधना ना ता ईस पहाडे पुड केरेल्हे ते ना युरोशलमे मां केरेल्हे। 22 तुस सांमरी जैसेरी आराधना केरतथ तैस जान्थे नन्ना, पण अस जैसेरी आराधना केरतम तैस जान्तम, किजोकी मुखती युहुदन मैरां। 23 पण तै मोको ऐजी राहोरोए ब्लके ऐवरोए, जैखन सचे भगत दिले सैहीं बाजेरी आतमांरी आराधना केरेल्हे, किजोकी बाजी ऐरेहे जैरे सचे भगत तोसे। 24 प्रभु परमेशर आतमांए, ते तैसेरे भगतन एन जरुरीए की तैना सचे दिले सैहीं तैसेरी आराधना केरन। 25 तैस कौन्शां जॉव, आंव जानर्हीं की मसही, जैसजो खैरतुस ज़ोतन ऐजने बालोए, जैखन तै ऐजेल्हो तै सभ किछ समझाल्हो। 26 चाल्ही यीशुए जॉव, आंव जै तीं सैहीं गल्लां लागोरोईं केरने तैहे मसही आहीं।

चेलां केरी वापसी

27 ऐतरे मां यीशुएरे चले वापस आए ते तै तैनेइं ऐकी कौन्शी सैहीं गल्लां केरतो लैहितां हेरान राहे, पण कंचे तैस एन ना पुछु की तु कुन चहतस या ऐस कौन्शी सैहीं किजो गल्लां लागोरोस केरने। 28 तै कौन्श पेनेरो घडौ तैडी छेडतां वापस शहरे मं जेई ते मैन्ह सैहीं ज़ोने लगी। 29 ऐजा, ऐकी मैन्हु सैहीं मिला तैनी मीं सैहीं सभ किछ जॉव जैन मीं अज तगर कियेरु थुं, कुन ऐहे तै मसही ता नेहीं? 30 तैन मैन्हु शहरे मैरां निसतां यीशुएरे पसे चलने लगे। 31 ऐस फेरे यीशुएरे चले तैस तंग लगे केरने की ओ" गुरु रौट्टी खा। 32 पण यीशुए तैन सैहीं जॉव, मीं अक ऐरही रौट्टी खानीए पण तुसंन तैसेरे बारे मां कोई पत्तो नेहीं। 33 तैखन चले ऐपु मम्हैइं ज़ोने लगे, कुन कंचे पैहिले ऐसेरे लेई रौट्टी आन्होरीए? 34 यीशुए तैन सैहीं जॉव, मेरी रौट्टी ईहे की जैनी आंव भेजोरोईं तैसेरी मर्जी पुरी केरीं। 35 ऐन मत्ता ज़ोथ की फसल पकने हेजु चोवर मिहींने बाकिन? आंव तुसंन जो ज़ोतां की ऐपनी ऐछी घाड़ा ते ऊडारन तक्का, तैन मां फसल पैकतां तियारे। 36 हुन्ना फसल लुन्ने बाले अपनी मुजुरी मैल्चे ते हांमेशरी ज़िदगरी फसल कटते ताके बने बालो ते कटने बालो दुईये मिलतां

खुशी मनाण। 37 ऐलहेरलेई अक कहावते की बने बालो कोईए ते कटने बलो होरो कोईए, तैन सचे"। 38 मीं तुसां भेजे की गाथ तैस फसली कट्टा जै तुसेइं नेहीं बेवरी, होरेइं मैहती सैहीं कम कियुं ते तुसंन तैनकेरी मैहतरां फल मैल्हो।

सैमरी केरो विषवास केरनां

39 शहरेरे बडे लोक तैस सैमरी कौन्शरी गुवाही शुनतां, की तैनी मीं सैहीं सभ किछ जॉव, जैन मीं कियेरु थुं, तैनेइं यीशु पुड विशवास कियो। 40 जैस शहरेरे सांमरी लोक यीशु का ऐवरे थिये, मिनत केरतां ज़ोने लगे, आसंन का बिश फिरी तै दुई दिहाडे तैडी राहु। 41 होरे भी बडे लोक थिये जैनेइं तैसेरु ज्ञान शुनतां तैस पुड विशवास कमाव। 42 तैनेइं तैस कौन्शी जो जॉव, असेइं तेरी गल्लां शुनतां विशवास नेहीं कियोरो, ब्लके असेइं अपने कन्नेइं शुनेरुए ते असेइं एन हुनी बुझु की ऐह मैन्हु सचे दुनियारो दातोए। 43 दुई दिहैइंना बाद यीशु फिरी गलिलेरे पासे चलो जेव। 44 ते यीशुए एपु ज़ोवरु थुं की कोई नबी" अपने देशे मां ईजतदार ना भोए। 45 जैखन तै गलिले मां व ता तैठेरे खास गलिलेइं तै कुबूल कियो एलहेरलेई की तैनेइं तैन सभ किछ जैन तैनी ईद फसहीएरे मोके युरोशलमे मां कियेरु थुं, तैनेइं ऐपनी ऐछेइं सैहीं लाहेरु थुं तैखन तैना एपु भी तैडी थिये।

एकी आफरेरु मड्डु बझानु

46 ईही दुईयां व हैटोए की जैखन तै कानां गलिले मांएवरो थु जैडी तैनी पेनेरु बेदलतां षरबत बनेवरु थुं, ते अक बडो बडो आफसर थु तैसेरु मड्डु कुफरनहुंमे मां बिमार भोवरु थुं। 47 जैखन तैनी आफसरेरु थुं की यीशु युहुदियेरो कुफरनहुंमे मां एवरोए ता तै यीशु का पुजो ते मिनत केरतां ज़ोने लगे मेरु मड्डु मरने बालुए तु चल ते तैस बज्झा। 48 यीशुए तैस सैहीं जॉव, ज़ां तगर तुस लोक निशान ते अजिब कम्मा ना लाहेले कधै विशवास ना केरेल्हे। 49 तैनी बडे अफसरेरु जॉव, परमेशर" लूश केर ऐरहु ना भोए की मेरु मड्डु मैरी गाहे। 50 यीशुए जुवाब दितो, चल तेरु मड्डु ज़ितु भोनुए, तैनी तैसेरी गल्लरु यकीन कियुं ते तैठां चलो जेव। 51 तै हेजु बत्ते थु ता तैसेरे नोकर तैस मैल्हे ते ज़ोने लगे, तेरु मड्डु ज़ितुए। 52 तैखन तै पुछने लगे की मेरु मड्डु कत्ताल्ही जैरे बेझोने लगेरु थुं, ते तैनेइं जॉव की तैसेरो भुखार हीज सत्तोव घैन्टे ऊतरी जेवरो थुं। 53 तैखन तैसेरे बोव्वे याद आंव की तैहे मोको थु, जैखन यीशुए ज़ोवरु थुं की गा तेरु मड्डु ज़ितु भोनुए, चाल्ही तैनी भी ते तैसेरे पुरे टब्रे यीशु पुड विशवास कमाव। 54 ईही दुईयां व चमतकार थु जै यीशुए युहुदयेरां एजनेरां बाद गलिले मां हेरेवरो थु |

अठतएली सालां केरो बीमार बझानो

5 ऐन गल्लन पत्ती यहूदी केरु अक तीहार भोव, ते यीशु यरुशलमे ए जेव। 2 यरुशलमे मां भीड दारे काँ अक हावद ए जैस जो इबरेनी भाषाई माँ बेहसदा ज़ोतन, तैसेरां पंच अंग्र। 3 ऐन माँ बडे बीमार, काने, टोंटे, नीपाते [पानी हीलनेरे इंतज़ारे माँ] भोते थिये। 4 [कीजो कि टाइमे पुड परमेश्वरेरो फ्रीशतो हावदे पुड ईशता पानी हीलातो थु। पानी हिलते जै कोई पेईलो गातो तै ठीक भोतो थु, चाए तैसेरी कोई भी बीमारी कीना भोए]। 5 तैडी अक मैनु थू, जै अठेती सालाँ केरो बीमार थू। 6 यीशु ए तै तैडी भिशोरो लाव ते ऐन ज़ेनतां कि एह बडो चरोक्नो इस ह्लीती माँ ए, ते तैस पुछु, कुन तू ठीक भोनु चातस? 7 तैने बीमारे जुवाब दितो, हे प्रभू, मीं का कोईमैनु नई कि ज़ताली पानी हिलाव गए ता मीं कोई तैस कुंडे माँ छडे पर मेरे पुजते पुजते ताँतर होरो गाते। 8 यीशु ए तैस सीं जॉव, उठ अपनी खट सल ते चल फिर। 9 तै मैनु तैखने ठीक भोव, ते अपनी खट सलतां चलने फीरने लाव।

10 तै सब्तेरी दीहडी थी. एलहेरेलेई यहूदी तैस जै ठीक भोरो थू, ज़ोने लाए, अज त सब्तेरी दिहाडी ए, तीं खट छूनी जैईज नई। 11 तैने तैन जुवाब दितो, जैने अव ठीक कीव, तैने मीं सीं जॉव, अपनी खट छू तै चल फिर। 12 तैनेइं तैस पुछु, तै कौन मैनु ए जैने तीं सीं जॉव, खट छूईतां चल फिर? 13 जै ठीक भोरो थू तै न थु ज़ानतो कि तै कौन ए, कीजो कि तैस ठैरी भीड भोनेरे वजाई सीं यीशु तैस ठैराँ होरी पासे जेवरो थू। 14 ऐन गल्लनाँ पत्ती यीशु तै मंदरे माँ

मैलो.यीशु ए तैस सीं ज़ॉव, तक तू ठीक भोंवरोस.फिरी पाप न केरौं, एरु न भोए कि एस करौं बडी आफत एजे। 15 तैने मैने यहूदीन सीं ज़ॉव, कि जैने अव ठीक केरोई तै यीशु ए। 16 ऐल हेरे लेई यहूदी यीशु सताने लाए, कीजो कि तै एरौं जैरौं कम्माँ सब्तेरे दिहाडे केरतो थू। 17 एस पुड यीशु ए तैन सीं ज़ॉव, मेरो बाजी हेजु तर कम केरतोए, तै अव भी कम केरताई। 18 एस वजैई सीं यहूदी मनाँ जादे मारनेरी कोशीश करने लाए, कीजो कि तै न सीरफ सब्तेरे दिहड़ी हुकम न थू टलोतो बलकी परमेश्वर ए अपनौं बाजी जोतो थू ते अपनो आप परमेश्वरे बराबर बनातो थू।

मट्टेरो अधिकार

19 एस पुड यीशु ए तैन सीं ज़ॉव, अव तुसन सीं सच सच जोताई, मट्टु एपू किछ न केरी बटटे, सिरफ तैन जैन बाजी करौं केरतू हेते, कीजो कि जैना जैना कमाँ बाजी करौं केरतो लाते तैन मट्टु भी तैसे तरीके सीं केरते। 20 कीजो की बाजी मट्टे सीं पयार केरते तै जैना जैना कम्माँ तै एपू केरते, तैनाँ सब तैस हीराते, ते तै एस करौं भी बडडौं कम्माँ हीरालो, ताकी तुस हेरान भोथ। 21 जैचौं बाजी मुडदन उठाते ते जीताते, तैचौं मट्टु भी जैस चाते जीताते केरते। 22 बाजी केंचेरी आदालत न केरे,पर आदालत केरनेरु सारु कम मट्टे सौंफेरु ए। 23 कि सब लोक जैचा बाजी केरी आदर केरतन तैचौं मट्टेरी आदर केरन, जै मट्टेरी आदर न केरे, तै बाजी केरी जैने तै भेजेरोए तैसेरी आदर न केरे। 24 अव तुसन सीं सच सच जोतई जै मेरो वचन शुन्ताँ तौं मेरे भेजने बाले पुड विश्वास केरते, हमेशारी जंदगी तैसेरी ए, ते तैस पुड सजाओ हुकम न भोए,पर तै मौतरौं पार भोईतौं जंदगी माँ जेव 25 अव तुसन सीं सच सच जोतई कि तै बेलो एईते, ते हुना ए जस म मुडदे परमेश्वरे मट्टेरे आवाज शुनेले, ते जैन शुनेले ते तैना जईले। 26 किजो की जैचौं परमेश्वर अपने आपे माँ जंदगी रखते तैचै तैने मट्टु एह आधीकर दितोरो ए कि अपने आपे माँ जंदगी रखे ऐलहेरे लेई तै मैनेरु मट्टु ए। 27 बल्की तैस आदालत केरनेरो भी अधिकार दितोरोए, ऐलहेरे लेई की तैन मैनेरु मट्टु ए। 28 एस माँ हेरान न भोत, कीजो कि तै बेलो एईते कि जैतरे कबरन माँ तैसेरी आवाज शुन्ताँ उठनेन। 29 जैनेई भलाई केरीए ज्जिंदगरी कयामतरे लेई ज्जिंते भोनेन. जैनेई बुराई केरी ए सजाएरी कयामतरे लेई ज्जिंते भोनेन।

यीशु एरे मुतालिक गुवाही

30 अक्व अपने अपे सीं किछ न केरी बटी; जैचौं शूनताई, तैचौं अदालत केरतई, ते मेरी अदालत सचची ए, किजो कि अक्व अपनी मेरजी नेई पर अपने भेजने बालेरी मरजी चहताई। 31 अगर अक्व अपनी गुवाही एपू देई, त मेरी गुवाही सचची नैई। 32 अक होरो मेरी गुवाही देते, ते अक्व जानताई मेरी जै मेरी गुवाही देते, तै सचचौ ए। 33 तुसेई यहूना करौं पुछाव, ते तैने सचचौरी गुवाही दितोरी ए। 34 पर अक्व अपने लेई मैनेरी गुवाही न चैई, फिरी भी अक्व इनाँ गल्लौं ऐलहेरे लेई जोताई कि तुसन मुखती मैले। 35 तै त बलतो ते चमकतो दीयो थू, पर तुसन थोडे चीरे लेई तैस माँ मगन भोनू रोडू न लम्गू। 36 पर मीं का जै गुवाही तै युहनेरे गुवाही करौं भी बड्डी ए; किजो कि जैन कम बाजेई मीं केरनेरे लेई सौंफेरु ए मतलब इने कम्माँ जैना अक्व केरताई, तैना मेरी गुवाही देतन कि बजे अक्व भेजेरोई। 37 ते बाजी जैने अक्व भेजेरोई, तैने मेरी गुवाही दितोरी ए; तुसेई न कधी तैसेरी आवाज शुनोरी, ते न तैसेरी शकू लवरी ए। 38 ते तैसेरो वचन मने माँ नेई रखोरो, किजो कि जैने तै भेजेरो ए तुस तैसेरो विश्वास न केरथ। 39 तुस पवत्रशास्त्रे माँ तोपतथ, किजो कि समझतथ कि सदारी ज्जिन्दगी तैस माँ मैल्लते ए; ते ई तैए जै मेरी गुवाही देते। 40 फिरी भी तुस ज्जिन्दगरे लेई मीं का न एजनु चाथ। 41 अक्व मैत्र करौं आदर न चैई। 42 पर अक्व तुसन जानताँ तुसन माँ परमेश्वरे पयार नेई। 43 अक्व अपने बाजी केरे नक्व सीं आवरोई ते तुस मीं कबूल न केरथ; अगर होरो कोई अपने नक्व सीं एजे, त तैस कबूल केरेले। 44 तुस जैना एकी होरी करौं आदर चातथ ते तै आदर जै सिर्फ परमेश्वरे तरफाँ ए न चाथ, केन्चौं विश्वास केरी बटतथ? 45 इन न समझा कि अक्व बाजी केरे सामने तुसन पुड दोष लेईलो; तुसन पुड दोष लाने बालो ए ते मूसोए, जैस पुड तुसेई भरोसो रखोर ए। 46 किजो अगर कि तुस मूसोरो विश्वास केरथे त मेरो भी विश्वास केरथे, ऐलहेरे

लेई तैने मेरे बारे मां लिखेरु ए। 47 पर अगर तुस तैसेरी लिखोरी गल्लन पुड विवास न केरथ ते मेरी गल्लन पुड केंचौं विश्वास केरेले?

पंच हजार मडदन रोटी खुवैनि

(मत्ती 14 : 13 - 21 ; मरकुस 6 : 30 - 44 ; लूका 9 : 10 - 17)

6 एना गल्लन पत्ती यीशु गलीलेरे डलेरे मतलब तिबिरियासेरे डलेरे पार जेव। 2 ते अक बडी भीड तैस पत्ती चल्ली किजो कि जैना चमतकार तै बीमरना पुड हीरतो थू ते तैना ओरते थी। 3 तैखना यीशु पहाडे पुड चडतां अपने चलना साथी तैडी बिशो। 4 यहूदी कियुं फसहारु तीहार नेडू थउं। 5 जताली यीशुए अक बडी भीड अपने पासे एडती लाई, ते फिलिप्पुस ए सैही ज़ॉव, अस्साँ एना केरे लेई रोडूई कोठें घिनाम? 6 तैनी तै गल्ल तैस अजमानेरे लेई जोई किजो कि तै एपू जानातो थु कि तै कुन केरेलो। 7 फिलिप्पुस ए तैस जुवाब दितो, दुय्य शौ दीनारौं केरी रोडूई भी तैना केरे लेई पूरी ना भोली कि तैना थोडी थोडी मैली गैली। 8 तैसेरे चलना मैरां शमौना पतग्रसेरे दूलाए अिन्द्रयास ए तैस्से सैही ज़ोव। 9 इडी अक मट्टुए जैस कां जोआं केरी पन्च रोडूिना, तै दूय्य मछलीना; पर एतरे लोकन जो कुन तैना पूरीना? 10 यीशुए ज़ॉव, लोकन बिशाला। तैडी बडो घास थु। ताली लोक जैना तकरीबना पन्च हजार मडद थी, बिशो। 11 ताली यीशुए रौडूी टलोई, ते शुकर केरतां बिषने बलना दिती; ते तैचौं मछलना मैरां भी जैत्री तैना चहतो थी बेन्टी। 12 जताली तैना खेईता रजे त तैनी अपने चलना सैही ज़ॉव, बचोरे टुकडे आकोठे केरा ताके किछ शरु ना गाहे। 13 ते तैनेइं आकोठे केरे, ते जौं केरे रौडूी केरे टोकरना मैरां जैना खाने बालना कैरां बाँचोरे थी बारे थी। 14 ताली तै चमतकार जै तैनी करौं थु ओरतां लोक जोने लाए, तै नाबी जै संसारे मां एजने बालो थु सचचे ई ए। 15 यीशुए एना जैन्ताँ कि एना मीं राजो बनानेरे लेई टलानो चातना, फिरी आकैलो पहडे पुड जेव।

यीशु एरु पैनी पुड चल्लन

(मत्ती 14 : 22 - 23 ; मरकुस 6 : 45 - 52)

16 जताली ड्लौंझ भोई, त तैसेरे चले डलेरे पासे जे। 17 ते किशती तड चडतां कुफ्रनहुंमे चले, तैस बेले अंधरु भोवरु थु; ते यीशु ओजू तग्र तैना का ना थु आवरो। 18 एँधरे वजाई सैही डले मां लैरौं उठने लेई। 19 जताली तै तकरीबना टली चैवर मील नेडे आव, ते तैनेइं यीशु डले पुड चलतो लाहु ते किशतरे नेडे एईतो लाहु ते डरे। 20 पर तैनी तैना सैही ज़ॉव आंव एई डरा ना। 21 ते तै तैस किशती पुड चडनेरे लेई तयार भोव ते तैखने किशती तैस ठैरी पुड पुजी जैडी तैनाँ चलारे थी। 22 दुय्योव दीहाडे तैस भीडौं जै डलेरे पार खडी थी, एना हेरतां कि एकेरौं ईलावा होरी कोई किशती ना थी, यीशु अपने चलना साथी तैस किशती पुड ना थु चडरो, पर सीरफ तैसेरे चले जेवरे थी। 23 ताताली होरी किशती तिबिरियास-एरा तैस ठैरी एई, जैडी तैनेइं प्रभू एरु शुकर केरतां रौडूी खेवरी थी। 24 ऐलहेरेलेई जताली मैनेई ओरु कि इडी ना यीशु ते ना तैसेरे चले, ते तैना भी यीशु तोपते कफरनाहूमे पुजे। 25 डलेरे पार जताली तैना तैस मैल्ले त ज़ोव ओ रब्बी, तु ईडी कताली आव। 26 यीशुए तैना जुवाब दितो, आंव तुसन सैही सच सच जोतांइ मीं तुस ऐलहेरेलेई ना तोपथ कि तुसेई चमतकार लाहु बल्की ओलओरे लेई कि रौडूी खेइतँ रजे। 27 नाश भोने बेली रोडूरे केरे लेई महैन्त ना केरा, पर तैस रोडूरे लेई महैन्त केरा जै सदारे ज्जिन्दगी तग्र रानीए, जै मैनेरु मट्टु तुसन तेलो; किजो कि बाजी मतलब परमेश्वर ए तैस पुड मोहर लावरी ए। 28 तैनेइं तैस्से सैही ज़ॉव, परमेश्वरु कम केरनेरे लेई अस कुन केरम? 29 यीशुए तैना जुवाब दितो, परमेश्वरु कम इने कि तुस तैस पुड जैनी तै भेजेरो ए विश्वास केरा। 30 ताली तैनेइं तैस्से सैही ज़ॉव, फिरी तु कुन निशाना हीरातस कि अस तैस हेरतां तेरो विश्वास केरम? तु कोन जैरु कम हीरातस? 31 इशे बौऊ दादेइं जंगले मां मन्त्रो खओ; जैन्चे लिखोरु ए, तैनी तैना खानेरे लेई स्वर्ग एरौं रौडूी दिती। 32 यीशुए तैना सैही ज़ॉव, अव तुसन सैही सच सच जोतांइ कि मुसे तुसन तै रौडूी स्वर्ग एरौं ना दिती, पर मेरो बाजी तुसन सचची रौडूी स्वर्ग एरौं देते। 33 किजो कि परमेश्वरेरी रौडूी तैए जै स्वर्ग एरौं एइतां संसारे ज्जिन्दगी तेती ए। 34 ताली तैनीही तैस्से सैही ज़ॉव, ओ प्रभु ऐह रौडूी ऐसना सर्वग एरौं तेतो रा।

35 यीशुए तैना सैहीं जोंव, जिन्दगरी रौट्टी आंव अई, जै मीं का एजते तै कधी नीयानो ना भोलो, ते जै मीं पुड विश्वास केरेलो तै कधी टलीशोरो ना भोलो। 36 पर मीं तुसन सैहीं जोरु थुं कि तुसेई आंव लाहु भी फिरी भी विश्वास ना केरथ। 37 जैना किछ बाजी मीं देते तैना सब किछ मीं का एजनु ए, ते जै कोई मई के एजलो आंव तैस कधे ना केढेलो। 38 किजो कि आंव अपनी मरजी नहीं, बलकी अपने भेजने बालेरी मरजी पूरी केरनेरे लेई स्वर्गएराँ आवरोई। 39 ते मेरे भेजने बालेरी मरजी ईए कि जैना किछ तैनी मीं दितोरोए तैस मीं आंव किछ ना हीरेई, पर आखरी दिहैडी फिरी तैस जीतो केरेलो। 40 किजो कि मेरे बाजी एरी मसजी ईए कि जै कोई मडे लाए ते तैस पुड विश्वास केरे, तैस सदारी जन्दगी मैले, ते आंव तैस आखरी दीहैडी फिरी जीतो केरेलो।

41 एलहेरेलेई यहूदी तैस पुड कुडकुडाने लाए, किजो कि तैनी जोंवरु थुं, कि जै रौट्टी स्वर्ग एराँ आवरी ए तै आव्वं आँई। 42 ते तैनेई जोंव, कुन एना युसफेरु मडू यीशु नेहीं, जैसेरे ओई बाँए अस जानातम? त तै कँचरे जोते कि आंव स्वर्गएराँ एवरोई? 43 यीशुए तैना जुवाब दितो, एपू मां मेई ना कुडकुडाथ। 44 कोई मीं का ना एजी बडे जां तग्र बाजी, जैनी आंव भेजोरोई, तैस ना खिचे; ते आंव तैस आखरी दीहैडी फिरी जीतो केरेलो। 45 नेबी केरे लिखने मां ऐन लिखेरुए तैना सब परमेशरेरे तरफां शिखोरे भोनेना; जैनी केन्चे बाजी केरां शुन्नोरु ए त शिखोरो ए तै मीं का ईए ते। 46 एना नेहीं कि केन्चे बाजी लावरोए; पर जै परमेशरेरे तरफाँ तैनी बाजी लावरो ए। 47 आंव तुसन सैहीं सच सच जोताई जै कोई विश्वास केरते सदारी जिन्दगी तैसेरी ए। 48 जिन्दगरी रौट्टी आंव अई। 49 तुशै बौऊ दादेइ जंगले मां मन्नो खाऊ ते मरे। 50 ई तै रौट्टी ए कि मैनुं खाना ते ना मरना। 51 जिन्दगरी रौट्टी जै स्वर्ग एराँ आवरी ए, आंव अई, अगर कोई इस रौट्टी मीं खाए, त हमेशा जीतो रालो, ते जै रौट्टी अव संसाररे लेई तेईलो तैना मेरु मासे।

52 एस पुड यहूदी एपू मामेई लडने लाए कि ई मैनुं ऐसना अपनू मास कँचरे खाने जो तेई बटते? 53 यीशुए तैना सैहीं जोंव आंव तुसन सैहीं सच सच जोताई कि जां तग्र तुस मैनेरे मडूरु मास ना खाले, ते तैसेरो लेव ना पीथ, तुसन मां जिन्दगीजि नेहीं। 54 जै मेरु मास खाते हमेशारी जिन्दगी तैसेरी ए ते आखरी दीहैडी आंव फिरी जीतो केरेलो। 55 किजो कि हकीकीती मां मेरु मास खानेरी चीजे ते मेरो लेव हकीकीती मां पीनेरी चीजे। 56 जै मेरु मास खाते ते लेव पीते तै मीं मां बनरो राते, ते आंव तैस मां। 57 जैन्चेरे जिंते बाजी आंव भेजोरोई, ते आंव बाजी केरे कारना जीतोई, तँचे तै भी जै मीं खालो मेरे कारना जीतो रालो। 58 जै रौट्टी स्वर्ग एराँ आवरीए, तैस रोडूरी जेरी नेहीं जै बौऊ दादेइ खाई ते मरे, जै कोई ई रौट्टी खालो तै हमेशा जीतो रालो। एना गल्लाँ तैनी कफरनाहूम एरे एकी मन्दरे मां तलीम देते जोई। 59 इना गल्लाँ तैनी कफरनाहूमेरे एकी आबद्धतखाने मां जोई।

हमेशरे जिन्दगरे वचन

60 एलहेरे लेई तैसेरे चलना मीं बडेई एना शुनतां जोंव ई सखत गल्ल ए एह कौना शुनी बटते? 61 यीशु अपने मने मां एना बुझतां कि मेरे चले ऐस गल्ली पुड एपू मामेई बेंस लावरना, तैना पुछू, कुन तुसन ऐस गल्ली पुड ठोकर लगेरीए? 62 अगर तुस मैनेरु मडू जेडी तै पैहीलो थु तैडी गहतो ते एइते लाहेले, त कुन भोलू? 63 आत्मा त जिन्दगी देंने बाली ए जिसमे सैहीं किछ फेइदो नेहीं, जैना गल्लाँ मीं तुसन सैहीं जोई तैना आत्माना ते जिन्दगी भी आना। 64 पर तुसन मां किछ एरना जैना विश्वास ना केरन। कीजो कि यीशु पैहीलो जानातो थु कि जैना विश्वास ना थी केरते तैना कौना आना; ते तैस कौना टलवालो। 65 ते तैनी जोंव, एलहेरेलेई मई तुसन सैहीं जोरु थुं कि जांतग्र बाजी केरे तरफाँ एना वरदाना ना मैले तां तग्र तै मीं का ना एजी बडे।

पतरसेरो विश्वास

66 एस पुड तैसेरे चलना मीं बडे उलटे फीरे ते तैठाँ पत्ती तैस साथी ना चले। 67 यीशुए जोंव, कुन तुस भी चलू गानू चतथ? 68 शमौना पतग्रसे तैस जुवाब दितो ओ प्रभु अस केस का गाम? हमेशाएरी जिन्दगरी गल्लाँ त तीए काना; 69 ते ऐसेई विश्वास केरो ते जानू कि परमेशर एरो पवित्र मैनुं तु अस।

70 यीशुए तैना जुवाब दितो, कुन मीं तुस बारे ना चूने? फिरभी तुसन मीं अक मैनुं शौतानाए। 71 इन तैस शमौन इस्करियोतेरे बारे मां जोंव, किजोकी ई हे जै तैन बारहन मीं थू, तै टलावाने बालो थू।

यीशु ते तैसेरे ढलाह

7 एना गल्लना पत्ती यीशु गलीले मां फिरतो राव; किजो कि यहूदी तैस मारनेरी कोशीश केरी रावरे थी, एलहेरेलेई तै यहूदिया मां फिरनू ना चातो थु। 2 यहूदी कियुं झोफडी कियुं तीहार नेडू थऊं। 3 एलहेरेलेई तैसेरे ढलेई तैस जोंव। ईठाँ यहूदिया मां ग, कि जैना कम्माँ तु केरतस तैना तेरे चले भी ओरना। 4 किजो कि एरो कोई ना भोलो कि जै मशूर भोनो चाए, ते छेपतां कम केरे। अगर तु कम केरतस, त अपनो आप हीरा। 5 किजो कि तैसेरे ढला भी तैसेरो विश्वास ना थी केरते। 6 ताली यीशुए तैना सैहीं जोंव, मेरो वखत ओजू नेहीं आवरो, पर तुशै लेई सब वखते ए। 7 संसार तुसन सैहीं बैर ना केरी बडे, पर मीं सैहीं बैर रखते किजो कि आंव तैसेरे खलाफ ई गुवाही तेताई कि तैसेरां कम्माँ बूरना। 8 तुस तीहारे मां गाथ, मीं हुनां ऐस तीहरे मां नेहीं एजनु किजो कि मेरो ओजू वखत पूरो नेहीं भोवरो। 9 ते तैना सैहीं एने गल्लाँ केरता गलीले मां राव।

झोफडी केरे तिहारे मां यीशु

10 पर जताली तैसेरे ढला तीहारे मां चले जे त तै बाँदो ना पर छेपतां जेव। 11 यहूदी तीहरे मां एना जोइतां तोपने लाए कि तै कोडी ए? 12 तै लोकन मां तैसेरे बारे मां बले बले बेडी गल्लाँ भोई, किछ जोते थी, तै रोडो मैनुं ए। ते किछ जोते थी नेहीं तै मैनुं गूमर केरते। 13 फिर भी यहूदी केरे डरे सैहीं कोई भी मैनुं तैसेरे बारे मां खूलता ना थु जोतो।

तीहारे मां यीशु एरी तालीम

14 जताली तीहरेरे आधे दीहाडे बीते, त यीशु मन्दरे मां गैहीतां तालीम देंने लगे। 15 ताली यहूदैइ ओराना भोईतां जोंव, ऐस बाँर पुडने भीदया कँचरे अई? 16 यीशुए तैना जुवाब दितो, मेरी तालीम मेरी नेहीं, बलकी मेरे भेजने बालेरी ए। 17 अगर कोई तैसेरी मेरजी पुड चलनू चाए, त तै इस तालीमेरे बार मां जानेलो; किजो कि एह परमेशरेरे तरफाँ ए; कि आंव अपने तरफाँ जोताई। 18 जै अपने तरफाँ किछ जोते तै अपनी बडयाई चाते, पर जै अपने भेजने बालेरी बडयाई चाते तै सचूओए, ते तैस मां पाप नेहीं। 19 कुन तुसन मूसे व्यवस्था ना थी दितोरी? फीरी भी तुसन मीं कोई व्यवस्था पुड ना चले, कुन तुस मीं मारनो चहतथ? 20 लोकेई जुवाब दितो, तीं मां गंदी आत्मा ए! कौना तई मारनो चाते? 21 यीशुए जुवाब दितो, मीं अक कम कियुं ते तुस ओराना भोए। 22 एलहेरेलेई मूसे तुसन खतनेरो हुकम दितो (एना नेहीं कि मूसेरे तरफाँ ए बलकी बाप दादां केरां चलतो एवरोए) ते तुस सबतेरे दीहाडे खतनो केरतथ। 23 जां की सबतेरे दीहाडे मैनेरो खतनो केरो गहते ताके मूसेरे व्यवस्थारो हुकम ना टलटे, त तुस मीं पुड किजो क्रोध केरतथ कि मीं सबतेरे दीहाडे अक मैनुं रोडे चारे ठीक केरो। 24 तुतग्र ओरता आदालत ना केरा बलकी ठीक ठीक आदालत केरा।

कुन यीशु ए मसीह ए

25 ताली किछ यरुशलेम एरे राने बाले ज़ोने लाए, कुन एह तैह नेहीं जैस मारनेरी कोशीश चलोरी ए? 26 पर तका एह त खूले आम गल्लाँ केरते ते कोई ऐस किछ ना जोए। कुन सरदारैई सचे सच जानू कि एह मसही ए? 27 एस त अस जानातम कि एह कोठेरो ए; पर जैइस मसही एजेलो त कोई ना जानेलो कि तै कोठेरो। 28 तैखना यीशुए मन्दर ए मां तालीम देंते हक तेइतां जोंव, तुस मीं जानातथ; ते इना भी कि आंव कोठेरोई; आंव एपू नेहीं औरो, पर मेरो भेजने बालो सचूओए, तैस तुस ना जानाथ। 29 आंव तैस जानाताई किजो कि आंव तैसेरे तग्रफाई ते तैनी आंव भेजोरोई। 30 एस पुड तैनेई तै टलानो चाव, फिरी भी केन्चे तैस्से सैहीं हथ ना लव किजो कि तैसरो वखत ओजू ना थु औरो। 31 फिरी भी भीडी मीं बडे लोकेई विश्वास केरो, ते ज़ोने लाए, मसही जै एजेलो ते एठां जाते चमतकार हीरालो जैना एने हीराहे?

यीशु ट्लानी कोशीश

32 फरीसेई लोकन कैरां तैसेरे बारे मां बल्ले बल्ले एना गल्लाँ करते शूने; ते प्रधाना याजकेई ते फरीसेई तैस टलनेरे लेई सिपाही भेजे। 33 ऐस पुड यीशुए जोंव; आंव थोडे चीरे तग्र ओजू तुशै साथी, फिरी आंव अपने भेजने बाले का गानोई। 34 चाली तैनीहीं तैस्से सैहीं जोंव, ओ प्रभु एह रौट्टी ऐसना सर्वग एरों तेतो रा। 35 ऐस पुड यहूदी एपू मामेई जौना लाए, एह कोरा चल्लोरे जैरों अस ना गोई बटम? कुन एह तैना का गालो जैनाँ यूनाना एरेलोकना मां तितग्र बितग्रना, ते यूनाना एरे लोकन भी तालीम तेलो? 36 एह कुन गल्लए जै एने जोई, कि तुस मीं तोपेले पर आंव तुसन ना मेल्लेलो; ते जैडी आंव अई तैडी तुस ना एजी बटतथ?

जिन्दरे पैनेरे दरिया

37 तीहरेरे आखरी दीहाडे, जै खास दीहाडी ए, यीशु खडो भोव ते जौने लव अगर कोई टलाइशोरो भोए त मीं का एजे ते पीये। 38 जै मीं पुड विश्वास केरे जन्चे पवत्र शास्त्रे मां औरूए तैसेरे दले मां जिन्दगरो दरया निसेले। 39 तैनी एह वचना पवत्र आत्मारे बारे मां जोंव; जै तैस पुड विश्वास केरेने बालो तैस पुड एजने बाली थी किजो की आत्मा ओजो तग्र ना थु उतरारो, किजो की यीशु ओजू तग्र अपनी महिमा तग्र ना थु पुजोरो |

40 चाली भीडी मैरां किछेई एना गल्लाँ शुनातां जोंव, सचे ई तै नाबी ए। 41 एलहेरेलेई यहूदी तैस पुड कुडकुडाने लाए, किजो कि तैनी जोंवरु थु, कि जै रौट्टी स्वर्ग एरां आवरी ए तै आव्वं आँई। 42 कुन पवत्र शास्त्र मां नेहीं लिखोरू कि मसीह दाऊद एरे खानादैनी मैरां ते बैतलम एरे दल्लवं मैरां एजेलो, जैडी दाऊद रातो थु? 43 ते तैसेरे वजैजी सैहीं लोकन मां अनाबना भोई। 44 किछ तैना मैरां तैस टलने चाहते थी, पर केन्चे तैस्से सैहीं हथ ना लव।

यहूदी अगवां केरो अविश्वास

45 तैखना सिपाई बडे याजकना ते फरीसना का आए, तैनेइ तैना सैहीं जोंव, तुसेई तै कि ना आनो? 46 सिपेई जुवाब दितो, केन्चे मैने कधी एरी गल्लाँ ना की। 47 फरीसेई तैना जुवाब दितो, कुन तुस भी टपलोई जे? 48 कुन सरदारना ते फरीसना मैरां केन्चे तैस पुड विश्वास करो ए? 49 पर एना लोक जैना व्यवस्था ना जान्न लानातिना। 50 नीकुतेमुसे जै पैहीलो तैस का औरो थु, ते तैना मैरां अक थु तैनी जोंव। 51 कुन इशी व्यवस्था केन्ची मैन्हुं जां तग्र तैसेरे शुनाम ना कि तै कुन करते, दोषी ठहरती इ? 52 तैनेइ तैस जोंव कुन तु भी गलीलेरोस? तोप ते ओर गलीलेरा कोई नाबी त नेहीं निसने बालो? |

53 (ततैखना सब अपने अपने घरे चले जे) |

बदचलनी माफी

8 पर यीशु जैतुनेरे पहाडे पुड जेव। 2 झेझाँ फिरी मनादरे मां अव; सरे लोक तैस का आए ते तै बिश्ताँ तैना तालीम देंने लव। 3 चाली शास्त्री ते फरीसी एकी कुवानाशी जै बुरे कम्मे मां टलैयोरी थी, तै मझटे खडी केरी ते यीशु सैहीं जोंव, 4 ओ गुरु ई कुवानाश बुरु कम केरते टलोरी ए। 5 व्यवस्था मां मूसे ऐसना हुकम दितोरो ए कि ऐरी जेरी कुवानाशी घोडेई बाथ, ते तु ऐस कुवानाशरे बारे मां कुन जोतस? तैनेइ तैस प्रखनेरे लेई एह गल्ल जोई ताके तैस पुड दोष लाने जो गल्ल मैल्ले। 6 पर यीशु उन्डे लिक्तां एंगलोई सैहीं जमीनी पुड लिखने लव। 7 जताली तैना तैस पुछते राहे, त तैनी सीधे भोइतां तैना सैहीं जोंव, तुसन मैरां जैनी पाप ना भोए केरर, तैए पेइहलो घोडे बाए। 8 ते फिरी उन्डे लिक्तां एंगलोई सैहीं जमीनी पुड लिखने लव। 9 पर तैना ऐना शुन्ताँ निके बडे सारे अक अक नाशे, ते यीशु अक्को राव, ते तै कुवानाश मझटे खडी राई। 10 यीशुए सिधू भोईतां जोंव, ओ कुवानाश, तैना कोरां जे? कुन केन्चे तई पुड सजारो हुकम ना दितो? 11 तै जौती ओ प्रभू केन्चे नेहीं, यीशुए जोंव आंव भी तई सजारो हुकना ना तई, ते फिरी पाप ना केराँ।

यीशु संसारेरी लो

12 यीशुए फिरी लोकन सैहीं जोंव, संसारेरी लओ आंव आई, जै मीं पत्ती एजेलो त तै आँधरे मां ना चल्लेलो, पर जिन्दगरी लओ हासल केरेलो। 13 फरीसेई तैसैहीं जोंव, तु अपनी गूवाही एपू तेतस तेरी गूवाही सच्च्वी नेहीं, 14 यीशुए तैना जुवाब दितो, भला आंव अपनी गूवाही एपू तेताई फिरी भी मेरी गूवाही सच्च्वी ए, किजो कि आंव जानाताई कि आंव कोठां एवरोइं ते कोराँ गाताई? पर तुस ना जानाथ कि आंव कोठां एवरोइं ते कोराँ गाताई। 15 तुस शरीरेरे मुताबक आदालत केरतथ, आंव केंचेरी आदालत ना केरी। 16 ते अगर आंव आदालत केरी भी त मेरी आदालत सच्च्वी ए, किजो कि आंव अकैल्लो नेहीं, पर आंव ते मेरो बाजीए; जैनी आंव भेजोरोई। 17 तुशी व्यवस्था मां भी लिखोरो ए कि दूय्य जनाँ केरी गूवाही मिलतां सच्च्वी भोतीए। 18 अक त आंव अपनी गूवाही तेताई, ते दुईयव गूवाही जैनी आंव भेजोरोई। 19 तैनेइ तैस पुछ तेरो बाजी कोडी ए? यीशुए जुवाब दितो, ना तुस मीं जानातथ ना मेरे बाजी, अगर मीं जानाते त मेरे बाजी भी जानाते। 20 ऐना गल्लाँ तैनी मन्दरे मां तालीम देते भन्डार घरे मां जौई, ते केन्चे ना टलाव, किजो कि तैसरो मोको ओजू ना थु औरो।

अपने बारे मां यीशु एरू बीयान

21 तैनी फिरी तैना सैहीं जोंव, आंव जानाताई कि तुस मीं तोपेले ते अपने पापना मां मरेले; जैडी आंव गाताई तैडी तुस ना एजी बटथ। 22 ऐस पुड यहूदई जोंव, कुन एने अपनो आप मारनोए, जैना जोते कि जैडी आंव गाताई तैडी तुस ना एजी बटतथ? 23 तैनी तैना सैहीं जोंव, तुस बुनायेथ, आंव बेइयोई, तुस संसारेरथ, आंव संसारेरो नेहीं। 24 एलहेरेलेई मीं तुसन सैहीं जोरू थु कि तुस अपने पापना मां मरेले, किजो कि अगर तुस विश्वास ना केरेले कि आंव तैएई त अपने पापना मां मरेले। 25 तैनेइ तैस जोंव, तु कौनास? यीशुए तैन सैहीं जोंव; जैना शूरू कैरां जोतो एवरोइं। 26 तुशे बारे मां बडू किछ जोनू ए ते फेसलो केरनो ए, पर मेरो भेजने बालो सच्च्वोए, ते जैना मीं तैस कैरां शुनोरूए तैनी संसारे सैहीं जोताइं। 27 तैनेइ ऐना ना समझू कि ऐसना सैहीं बाजी केरे बारे मां कुन जोने लावरोए। 28 चाली यीशुए जोंव जताली तुस मैनेरे मड्डे उचे पुड चाडेले, त जानेले कि आंव तैएई, आंव अपने आपे सैहीं किछ ना केरी बेटी जैचरे मेरो बाजी मीं शीखालते तैन्चे ऐना गल्लाँ केरताई। 29 मेरो भेजने बालो मीं साथी ए तैनी आंव आकैल्लो नेहीं शारो रो किजो कि आंव हमेशा तैना कम केरताई जैस सैहीं तै खुश भोते। 30 तै ऐना गल्लाँ जोई रावरो थु किछ लोकेई तैस पुड विश्वास केरो।

सच्च्व तुस्न आजाद केरेलू

31 चाली यीशुए तैना यहूदन सैहीं जैनीहीं तैस पुड विश्वास केरो थु, जोंव, अगर तुस मेरे वचने मां बनरे राले, त सच्च्वे मेरे चले भोले। 32 तुस सच्च्व जानेले ते सच्च्व तुसन आजाद केरेलू। 33 तैनेइ तैस जुवाब दितो, अस त आब्रहम एरे आवलादी मरम, ते कधी केन्चेरे गुलाम नेहीं भोरे; फिरी तु केंचरे जोतस कि तुस आजाद भोले? 34 यीशुए तैना जुवाब दितो, आंव तुसन सैहीं सच्च्व सच्च्व जोताइं कि जै कोई पाप केरते तै पापरो गुलामे। 35 गुलाम हमेशा घरे ना रेई बटे, मड्डू हमेशा राते। 36 एलहेरेलेई अगर मड्डू तुसन आजाद केरे त सच्च्वे तुस आजाद भोले। 37 आंव जानाताई कि तुसा आब्रहमेरे आवलादी मरथ, फिरी भी मेरे वचने अपने दले मां ठार ना तेथ, एलहेरेलेई तुस मीं मारने चतथ। 38 आंव तैनी जोताइं जैना अपने बाजी केरे औरू ए, ते तुस तैनी केरतथ जैना तुसेई अपने बाजी कैरां शुनोरूए।

39 तैनेइ तैस जुवाब दितो; इषो बाजी त आब्रहमे; यीशुए तैना सैहीं जोंव, अगर तुस आब्रहमेरे आवराधी मैरां भोथे त आब्रहमेरां जेरां कम्मां केरेथ। 40 पर तुस मेरे जेरे मैन्हुं मारने चहतथ; जैनी तुसन तैना सच्च्वो वचना जोए जै परमेशर ए कैरां शुनू; एरू त आब्रहामे ना थु केररू। 41 तुस अपने बाजेरां जेरां कम्मां केरतथ. तैनेइ तैस्से सैहीं जोंव, अस जनाह ए सैहीं नेहीं जरमोरे, इशो अके बाजी ए मतलब परमेशर। 42 यीशुए तैना सैहीं जोंव, अगर परमेशर तुशो बाजी भोथो, त तुस मीं सैहीं पयार केरेथ; किजो कि आंव पपरमेशरेरे

तरफां एवरोई; आंव अपने तरफां नेहीं एवरो, बलकी तैनी भेजोरोई।⁴³ तुस मेरी गल्ल किजो ना समझथ? एलहेरेलेई कि तुस मेरो वचना ना शूनी बटतथ।⁴⁴ तुस अपने बाजी शौताना एरेथ ते तैसेरी मरजी पूरीकेनी चहतथ। तै त शूरू केरा खूनी ए ते सच्च पुड ना राव, किजो कि सच्च तैस मां अथी नेहीं। जताली तै झूठ जोते त अपनू जेरू जोते; किजो कि तै झूठो बलके झूठेरो बाजी ए।⁴⁵ पर आंव सच्च जोताइ तांए तुस मेरो विश्वास ना केरथ।⁴⁶ तुसन मां मीं कौना पापी ठहरते? अगर अव सच्च जोताइ त फीरीमेरो विश्वास की ना केरथ? ⁴⁷ जै परमेशरे तरफां भोते तै परमेशर एरी गल्लां केरते, ते तुस एलहेरेलेई ना शुनाथ कि परमेशरे तरफां नेहीं।

यीशु ते अब्राहम

⁴⁸ एना शुनतां युहूदैइ तैस्से सैहीं जोंव, कुन अस ठीक ना थी जोते कि तु सामरीस, ते तीं मा गदी आत्माए। ⁴⁹ यीशुए जुवाब दितो, मीं मां गंदी आत्मा नेहीं, पर आंव अपने बाजी एरी इजत केरताई, ते तुस मेरी निरादर केरतथ। ⁵⁰ पर आंव अपनी बडीयाई ना चैई, हाँ अके जै चाते ते आदालत केरते। ⁵¹ आंव तुसन सैहीं सच्च सच्च जोताइ कि जै कोई मैन्हुं मेरे वचने पुड चले तै कधे मौती ना लालो। ⁵² यहूतेई तैस्से सैहीं जोंव हुनी त ऐससेई भुझू, कि तीं मां गंदी आत्मा ए; अब्राहाम ते नाबी भी मरे, ते तु जोतस, अगर कोई मेरे वचने पुड चले त तै कधी मौतरो सूवाद ना चखेलो। ⁵³ ईशो बाजी आब्रहम मरो, कुन तु तैस केरां भी बडडोस? ते नाबी भी मरे, तु अपने आपे कुन ठहरातस? ⁵⁴ यीशुए जुवाब दितो, अगर आंव अपनी महिमा केरी त मेरी महिमा किछ भी नेहीं; पर मेरी महिमा केरने बालो मेरो बाजी ए, जैस तुस जोतथ कि तै तुशो परमेशरे। ⁵⁵ तुसेई त तै ना जानो, पर आंव तैस जानाताई; अगर आंव जोइ कि तैस ना जैनी, त तुशो जैरो झूठो भोंई; पर अवतैस जानाताई ते तैसेरे वचने पुड चलताई। ⁵⁶ तुशो बाजी अब्राहम मेरी दीहाडरे ऊमीदी पुड बडी खुख थु ते तैनी ओरो ते खुश भोव। ⁵⁷ यहूदैइ तैस्से सैहीं जोंव, ओजू तु पजा साला केरो भी नेहीं भोवरो फिरी भी तीं अब्राहम लावरो ए? ⁵⁸ यीशुए तैना सैहीं जोंव, आंव तुसन सैहीं सच्च सच्च जोताइ की इठां पैहीलो अब्राहम पैइदा भोव, आंव आहीं। ⁵⁹ चाली तैनेइ तैस मारनेरे लेई घोड सल्ले, पर यीशु छेपतां मन्दरे मारां निसी जेव।

जन्मेरे अंधे लो देनी

⁹ गहंते तैनी अक मैन्हुं लाहु जै जरमनेरो कानो थु। ² तैसेरे चेलेई तैस पुछू, ओ रब्बी केने पाप केरो कि एह कानो जरमो, एने मैने की ऐसेरे अम्मां बाजे? ³ यीशुए जुवाब दितो, ना एने पाप केरो ना ऐसेरे अम्मां बाजे, पर एना एलहेरेलेई भोव कि परमेशर एरां कम्मां ऐस मां लेईहोना। ⁴ जैनी आंव भेजोरोई, ऐसेइ कम दीहैडना मां केरनू जरूरी ए, तै रात एजने बाली ए जैस मां कोई भी कम ना केरीबटे। ⁵ जां तग्र आंव दुनीयाई मां अई दुनीयारी लोअई। ⁶ एना जोईतां तैनी जमीनी पुड थुकू, ते तैस थुके सैहीं मिती सत्री, ते तै मिती कानेरे एछना पुड लाइतां। ⁷ तैस्से सैहीं जोंव ग शीलोकैरे कुंडे मां धो, (शीलोकैरो मतलब भेजरो) तैनी गेईतां धोई, ते तकतो वापस आव। ⁸ चाली पुडोसेई त जैनीहीं भीक मगतो लावरो थु; जोने लाए कुन ई तैए मैन्हुं जै पैहीलो बिशतां भीख मगतो थु? ⁹ किछ मैन्हुं जोने लाए; ई तैए, होरेई जोंव नेहीं तैसेरो जेरो कोई होरो भोना ए, तैनी जोंव, आंव तैएई। ¹⁰ चाली तैना तैस लाए पुछने लाए, तेरी एछी केन्चां खूली? ¹¹ तैनी जुवाब दितो; यीशु नावेरो अके मैने मिती सात्री; ते मेरी एछन पुड लाइतां ते मीं सैहीं जोंव; ग शीलोकै मां गाएइतां धो, ते आंव जेव ते धोई ते तकने लाहु। ¹² तैनेइ तैस पुछू; तै कौने? तैनी जोंव मीं नेहीं पतोत।

फ्रिसी चंगैयरी जंच पड़पाल केरतन

¹³ लोकेई तै जै पैहीलो कानो थु फरीसना का नेव। ¹⁴ जैस दिहाडे यीशुए मिती सेनातां तैसेरी एछी खोलोरी थी, तै स्वतेरी दीहाडी थी। ¹⁵ फीसेई भी तैस पुछू; कि तैसेरी एछी केनाचां खूली; तैनी तैना सैहीं जोंव, तैनी मेरी एछन मां मिती लाई, फीरी मीं धोई, ते हूनी लाताई। ¹⁶ ऐस पुड किछ फरीसी जोने लाए, एह मैन्हुं परमेशर तरफां नेहीं; किजो कि एह सबतेरी

दीहाडी ना मन्ने; होरेई जोंव; पापी मैन्हुं एरे चमतकार कैचरे हीरेई बटते? ते एपू मामेई अना बना भोई। ¹⁷ तैनेइ काने फीरी पुछू; जैने तेरी एछी खोलोरना; तु तैसेरे बारे मां कुन जोतस? तैनी जोंव तै नाबीए।

¹⁸ पर यहूदन विश्वास ना भोव कि तै कानो थु ते हूनी लाते; जां तग्र तैनेइ, तैसेरे अम्मा बाजी ना कूजे। ¹⁹ तैना पुछू, कुन एना तुशु मठठू-ए; जैस तुस जोतथ कि कानू जरमोरु थु? ²⁰ तैसेरे अम्मा बाजीए जुवाब दितो; असां त जानातम कि एना इशु मठठू ए; ते कानू जरमोरु ए थु। ²¹ पर अस इना ना जानाम कि आज कैचरे लाते; ते इना जानाम की केने ऐहसेरी एछी खोली; एना हूनी बडुए ऐस पुछू; एह अपने बारे मां एपू ज़ोलो। ²² एनां गल्लां तैसेरे अम्मा बाजी ए एलहेरेलेई जोई तैना यहूदन केरां डरते थी; किजो कि यहूदी सारे अक भोवरे थी कि अगर कोई जोए कि एह मसीह ए त तै मन्दरे मारां कडो गाए। ²³ एलहेरेलेई तैसेरे अम्मा बाजे जोंव; एह बडोए, ऐसे पुछा। एनां गल्लां तैसेरे अम्मा बाजी ए एलहेरेलेई जोई तैना यहूदन केरां डरते थी; किजो कि यहूदी सारे अक भोवरे थी कि अगर कोई जोए कि एह मसीह ए त तै मन्दरे मारां कडो गाए।

²⁴ चाली तैस मैन्हुं जै कानो थु; दुईयवं बार कूजेइतां जोंव; परमेशर एरी स्तूती केर। अस जानातम तैह मैन्हुं पापी ए। ²⁵ तैनी जुवाब दितो; आंव ना जैनी कि एह पापी की नेहीं; आंव अक गल्ल जानाताई कि आंव कानो थु हूनी लाताई। ²⁶ तैनेइ तैस पुछू, देने तीं सैहीं कुन कियुं? तैनी केंचरे तेरी एछी खूली? ²⁷ तैनी तैना सैहीं जोंव, मीं त तुस्न सैहीं जोंवरु ए; ते तुसेई ना शुनू; हूनी दुईयवं बार किजो शुनू चहतथ? कुन तुस भी तैसेरे चले बने चहतथ? ²⁸ चाली तैना तैस बुरु भलू जोने लाए; तुए तैसरो चेलोस; अस त मूसेरे चलेम। ²⁹ अस जानातम परमेशर ए मूसे सैहीं गल्लां की; पर ऐस ना जानाम कि एह कोठेरो ए। ³⁰ तैनी तैना जुवाब दितो; एह त बडी बडी गल्ले कि तुस ना जानाथ कि एह कोठेरो ए; फिरी भी तैनी मेरी एछी खोली। ³¹ अस जानातम की परमेशर पैपी केरी ना शूने, पर कोई परमेशर एरो भगत भोए त तैसेरे मेरजी पुड चलतो भोए; त तै तैसेरी शूनाते। ³² संसारे शूरू केरां कधे शूने मां नेहीं आवरु कि केन्चे जरमनेरे कानेरी एछी खोली; ³³ अगर एह मैन्हुं परमेशरे तरफां ना भोथो त किछ ना केरी बटेतथो। ³⁴ तैनेइ तैस जोंव तु त बिलकूल पापना मां जरमोरुस, तु ऐसना शखालतस? ते तैनेइ तै बेइरोवं कडो।

आत्मिक कैनार

³⁵ यीशुए शुनू कि तै बेइरोवं कडडोरो ए, ते जताली तैस्से सैहीं मुलाकात भोई, त तैस्से सैहीं जोंव; कुन तु परमेशरे मठे पुड विश्वास केरतस? ³⁶ तैनी तीस जुवाब दितो; ओ प्रभु तै कौने आंव तैस पुड विश्वास केरी? ³⁷ यीशुए तैस्से सैहीं जोंव, तीं तै लवरो भी आए; ते जै तीं सैहीं गल्लां केरी रावरोए तैए। ³⁸ तैनी जोंव ओ प्रभु आंव विश्वास केरताई, ते तैस का मथो टेको। ³⁹ चाली यीशुए जोंव आंव ईस संसारे मां आदालत केरने एवरोइ; जै ना लाए तै लाए; ते जैना लातना तैना काने भोना। ⁴⁰ जैना फरीसी तैस साथी थी तैनेइ जोंव; कुन अस भी कानेम? ⁴¹ यीशुए तैना सैहीं जोंव, अगर तुस काने भोथे त पापी ना भोथे; पर हूनी जोतथ कि अस लातम; एलहेरेलेई तुशो पाप बनोरो राते।

पुहाल ते भैडां केरु द्रष्टान्त

¹⁰ आंव तुसन सैहीं सच्च सच्च जोताइ, कि जै कोई दारेरे बत्तां बाडे मां ना गाए; पर होरी बत्तां गहते; तै चोर ते डैकू ए। ² पर जै दारेरे बत्तां गहते तै भैडां केरो पुहाले। ³ तैसेरे लेई दरबाना दार खोलते; ते भैडां तैसेरी गल्ल शुतिना; ते तै एपनी भैडना नोवें सैहीं कूजाते ते बेइर नेते। ⁴ जताली तै एपनी सैरी भैडां बेइर कडते; त तैना केरे अगरी अगरी चलते; ते भैडां तैस पत्ती पत्ती गैतिना; किजो कि तैना तैसेरी आवाज पिशैनचन। ⁵ पर तैना बखले पत्ती ना गैली; पर तैस केरां नाशेली; किजो कि तैना बखलेरी आवाज ना पशान्ग। ⁶ यीशुए तैना सैहीं कहैनी जोई; पर तैनेइ ना समझू कि एना कोना गल्लना जैना तै ऐसना सैहीं जोते। ⁷ तेखना यीशुए तैना सैहीं फिरी जोंव; आंव तुसन सैहीं सच्च सच्च जोताइ भैडां कियुं दार आंव आंई। ⁸ जैतरे मीं केरां पेइले आए सब चोर ते डैकूना; पर भैतेई तैना केरी ना शूनी। ⁹ दार

अवएई; अगर कोई मेरे जिरीए आन्तर गालो; त मुखती पालो, ते आन्तर बेईर एईतो गालो ते खुराक पालो। 10 चोर होरी कोन्ची कमेरे लेई ना एजे; बलकी चोरी करेने ते मारने ते खतम करेने एईते; आंव एलहेरेलेई औरोंई कि तैना जिन्दगी मैल्ले ते हछछी मैल्ले। 11 रोडो पूहाल अवएई; रोडो पूहाल भैंडां केरे लेई अपनी जाना देते। 12 मजदूर जै ना पूहाल ए ना भैंडां केरो मालक ए गीदाँ एइतां लेईतां नाशते; ते गीद तैना टलते ते तितग्र बितग्र केरते। 13 तै एलहेरेलेई नाशते कि तै मजदूर; ते तैस भैंडां केरी फीकर नेई। 14 रोडो पूहाल आंव आंई; आंव एपनी भैंडना पिशानाताई; ते मेरी भैंडां मीं पिशैतिना। 15 जैन्चाँ बाजी मीं जानाते, तैन्चे आंव भी तैस जानाता; ते आंव भैंडां केरे लेई अपनी जाना तेताई। 16 मेरी होरी भी भैंडना; जैना इस बाडे मां नेहीं; मीं तैना भी ऐनी ज़रूरीना; तैना मेरी आवाज शूनेली; फिरी आके डेरो ते आके पूहाल भोनाए। 17 बाजी एलहेरेलेई मीं सैहीं पयार केरते कि आंव अपनी जाना तेताई कि तैस फिरी नेहीं। 18 कोई तैस मीं केरां थसोडे ना; पर आंव ऐस एपू तेताई; मीं तैस तेनेरु भी हके ते नेनेरु भी हके; एह हकम मीं मेरे बाजी केरां मैलोरोए। 19 एना गल्लना पत्ती यहूदन मां फिरी अना बना भोई। 20 तैना मेरां बडे जोने लाए; तैस मां गंदी आत्मा ए; ते तै पागल ए; तैसेरी किजो शुनातथ? 21 होरे लोकई ज़ोवं; एना गल्लॉ एरे मैनेरी नेहीं जैस मां गंदी आत्मा भोए; कुन गंदी आत्मा कांना केरी एछी खोली बटतीए।

यहूदी केरो अविश्वास

22 यरूशलेम मां तीहार भोवं; ते हीवतडेरो मोसम थु। 23 यीशु सूलीमानी मन्दरेरे ब्रामतेरे अंगने मां हंठने फिरने लगोरो थु। 24 ताली यहूदैई तै घेरो ते पुछु; तु केईस तग्र इशे दले डामाडोल केरतस? अगर तु मसीहस त ऐसना सैहीं साफ साफ ज़ओ। 25 यीशुए तैना जुवाब दितो; मीं तुसन सैहीं ज़ोवं पर तुस विश्वास ना केरथ। जैनाँ कम्माँ आंव अपने बाजी केरे नोवं सैहीं केरताई तैना मेरे गूवाह अना। 26 पर तुस एलहेरेलेई विश्वास ना केरथ कि मेरी भैंडना मरा नेहीं। 27 मेरी भैंडां मेरी आवाज शुनातीना; आंव तैना जानाताई, ते तैना मीं पत्ती पत्ती च़लतीना। 28 ते आंव तैना हमेशारी जिन्दगी तेताई; तैना कधी खतम ना भोली; ते कोई तैना मेरे हथे मेरां थसोडी ना बटे। 29 मेरो बाजी; जैनी तैना मीं दितोतिना; सैभना केरां बडोए; ते कोई तैना बाजी केरे हथे मेरां ना नेई बटटे। 30 आंव त बाजी अकेम ए।

31 यहूदैई तैस घोडैव देनेरे लेई घोड सल्हे। 32 ऐस पुड़ यीशुए ज़ोवं; मीं अपने बाजी केरे तरफां बडॉ रोडॉ कम्माँ हीराँ; तैना मेरां कोस कम्मेरे लेई घोडैव तेतथ? 33 यहूदैई तैस जुवाब दितो; रोडॉ कम्माँ केरे लेई अस तीं पुड़ घोडैव नेहीं केरने लावरे; पर परमेशर एरी निन्दा केरनेरे लेई; एलहेरेलेई कि मैन्हुँ भोइइतां अपनो आप परमेशर बनातस। 34 यीशुए तैना जुवाब दितो; कुन तुशी व्यवस्था मां एना नेहीं लिखोरु; मीं ज़ोवं तुस ईश्वरथ? 35 अगर तैनी तैना ईश्वर ज़ोवं जैना का परमेशर एरो वचना पुजो (ते पवित्रशास्त्र एरी कोई भी गल्ल ना टल्ले)। 36 त जै बाजे पवित्र ठैरेहीता संसारे मां भेजो; तुस ज़ोतथ; कि, तु निन्दा केरतस, एलहेरेलेई मीं ज़ोवं, आंव परमेशरेरु मडूई। 37 अगर आंव अपने बाजी कियुं कम ना केरी; त मेरो विश्वास ना केरा। 38 पर आंव केरताई; त चाए मेरो विश्वास ना भी केरा; पर तैना कम्मां केरा, ताके तुस जानाथ ते समझथ कि बाजी मीं मां ए ते आंव बाजी मां। 39 तैनेई फिरी तैस टलनेरी कोशीश केरी पर तै तैना मांमेई निसी जेव।

40 फीरी तै यरदनेरे पार तैस ठैरी जेव; जैडी यहून्ना पेईले बपतीसमं तेतो थु; ते तैडी राव। 41 बडे लोक तैस कां एइतां ज़ोते थी; यहूनाए त कोई नीशाना ना हीराव; पर जैना किछ यहूनाए ऐसेरे बारे मां ज़ोवं; तैना सब सच थुं। 42 ते तैडी बडेई यीशु पुड़ विश्वास केरो।

लाज़रेरी मौत

11 अक मैन्हुँ जेसेरु नोवं लाज़र थुं ते बेतनिया मां रातो थु ज़ेह मरयम ता तेसारी बेहिना मरथारु ड़लाव थुं 2 एह मरियम जेसारे दूला लाज़र थुं बीमार भेवरो थु एह तैहे काँश थी ज़ेसां परमेशरे दोगे फिरी पुड़ अतग्र छाडरो थु अपने दोगे सैहीं तैसेरे पाव पाँछारे थिये | . 3 तैना दिओडेई यीशु का अक बिस्तार भेजो एह परमेशर जेसैहीं तु पियार केरतां

बीमार भेवरोए 4 ज़ैखन यीशुए एना शुनु ता ज़ोने लगे एह बमारी मरनेरे लेई नेहीं बल्के परमेशरी मेम्हा रे लेईए ताके ऐसेरे जिरयओ परमेशरे मडैरी मेम्हा बंदी भोए

5 यीशु मरथा मरियम ते लाज़रे सैहीं पियार केरतो थु 6 फिरी भी ज़ैखन यीशुओ शुनु की लाज़र बमारे ते दुई दिहाडे फिरभी ना जेव तैडी बीशो 7 फिरी तैनी अपने चलन सैहीं ज़ोवं एजा अस वापस यहूदिए गल्ल 8 तैना ज़ोने लगे पण एह गुरु जी थोडे च़ीर पेहिले यहूदी तुस्न झुसने चाते थिये ते तु फिरी तैडी गनु चातां 9 यीशुए ज़ुब दितो कुन दिहैडी मां बारओ घंटे ना भोना ज़ै मेनु दिसां च़लते तैस ठोकर ना लगे एलहेरेलेई की तै दुनियारी लौ हेरी सकते . 10 पण अगर तै राती च़लते ता अंधरे मां तैस ठोकर लगचै 11 ज़ैखन तैनी एना गल्लॉ ज़ोई छैडी ता ते अपने च़ेलेना सैहीं ज़ोने लगे ईशो दोस्त लाज़र झुलोरोए पण आंव तैस बीझाने च़ालोरों 12 तैसेरे च़ेले ज़ोने लगे एह परमेशर अगर तैस निडल अई ता ते बेझोई गहते 13 यीशुए लाज़रेरे मरनेरे बारे मां ज़ैवरु थुं पण तैसेरे च़ेलेई बुझु की तेलओरो मतलब आरामेरी निडलएह 14 एलओरेलेई तैनी तैना रोडेवारे ज़ोवं की लाज़र मैरी जेवरोए 15 आंव तुशी वजाही सैहीं बडो खुशी की आंव तैडी ना थुओ हुनी तुस मीं पुड़ अतबार केरले इजा हुनी असां सका गांम ते. 16 तैखन तौमां हौरी च़लना सैहीं ज़ोने लगे एजा असां भी तेस्सेहीं साथी मरनेरे लेइ गांम

यीशु कयामत ते जिन्दगी

17 तैडी पुजतां यीशुए पत्तो लगे की लाज़र दबोरे च़ैवर दिहाडे भेवरेना 18 बेतिन्धा युरोश्लमेरां कोई दुई मील दुर थु 19 बडे यहूदी मरथा ते मरयमी का तैन्केरे दूला लाज़रेरे मरनेरां पत्ती तैना भरोसो देने एवरे थिये 20 ज़ैखन मरथां शुनु की यीशुएवरोए तै तेस्सेहीं मिलनेरे लेई बेइर निसी पण मरियम बेइर ना निसी 21 मरथा यीशुए सैहीं ज़ोने लगी एह परमेशर अगर तु इडी भोथो ता मेरोदूला ना थु मरनो 22 पण आंव ज़ानातीयही की ज़ैना किछ तु परमेशरे केरां मलो तै तीं तेलो . 23 यीशुए तैस ज़ोवं तेरो दूला फिरी ज़ीतो भोई गंनोए 24 मरथां जुवाब दितो आंव ज़ानाती तै अखिरी कियामतारे दिहाडे ज़ीतो भोई गंनोए 25 यीशुए तैस ज़ोवं कियामत ता जीन्दगी आंवेइ जै मीं पुड़ भरोसो रखते तै मरनेरां बाद भी ज़ीतो रांनोए 26 ते जै कोई ज़ीतोए ते जै मीं पुड़ विश्वास केरते कधे ना मरेलो कुन तु इस पुड़ विश्वास रखतिस 27 मरथां जवाब दितो हां परमेशर मेरो विश्वास तुसन पूडे की तु परमेशरेरु मडूस जै दुनियाई मां एजने बालो थुओ |

यीशु ए लेरां दिति

28 ज़ैखन तेसां एह गल ज़ोइ ता तै वापस च़ली जेई ते मरयम कनारे कुजेइतां जोने लगी गुरुजी एवरेना ते तीं कुजाने लगोरेना . 29 ज़ेखना मरियमां एना शुनु ता तै लुशी उदतां यीशु सैहीं मिलने च़ली जेई 30 यीशु ओजु ड़लौवं मां ना थु पूजोरो ओजु तेडी थु जेडी मरथा तेस्सेहीं मिलोरी थी 31 तैखन तैना यहूदी ज़ैना मरियामी भरोसो देने लोरे थिये मरियम लुशी कडी उदतां बेइर जेई ता तेनां भी तैस पाती बेइर जे की भोई स्सखते एह लेरां देने कबरी पुड़ च़लोरिए 32 ज़ैखन मरियम तैस ठारी पुजी जेडी यीशु थुओ तैस लेइतां तै तैसेरे पंवना पुड़ बिछडी जेई ते जोने लगी एह परमेशर अगर तु इडी भोथो ता मेरो दूला ना थु मरनो | 33 तैखन यीशुए तै ते तैससैहीं साथी एजने बाले यहूदी लेरां देते लाओ तैस दिले मां बडो दुःख भोव | 34 ते पुछु तुसैहीं लाज़र कोडी रखोरुए तैना ज़ोने लगे असना सैहीं साथी एई ते एपू ओर | 35 यीशुएरे एच्छना मां एंखु भेरोई जेयां | 36 एना ओरतां यहूदी ज़ोने लगे हेरा लाज़र एस केतरो दूलारो थियो | 37 पण तैना मेरां किछ ज़ोने लगे की ज़ैनी कनेरी एछी बडेइ एतरु ना केरी बट्ट की लाज़रे मरने केरां बचाथो |

लाज़र ज़ीतानाँ

38 यीशु दुखी दिले सैहीं कबरी का आव एह अक लार ज़ेरी थी जैस पुड़ बंधोरां अक घोड छाडौरो थियो | 39 यीशु जोने लगे एह घोड खडो केरा मरथा ज़ै लाज़री बेईना थी तै जोने लगी एह परमेशर एस्मेरां ता मुश्क लोरीए एजने किजोकी एस च़ैवर दिहाडे दबोरे भेवरेना | 40 यीशु जोने लगे कुन मी

तुसन ना थुं जेवरु की अगर तेरो विश्वास भोलो ता तु परमेशरी महिमा ओरेली । 41 तेनेई घोड़ खडो कियो ते यीशुए एछी उबरी केरतां जोने लगे एह परमेशर आंव तिका मीनात केरतां की तीं मेरी दुवा शुनी । 42 आंव जानाताइ की तु मेरी दुवा शुन्तास पण आंव एना लोकां केरे लेइ जैना चवरे पासना खेडोरेना एना जेवरु थुं की ऐना भी विश्वास केरन । 43 एना जोनेरां पत्ती यीशुए ज़ोरे सैहीं जॉव लाजर बेइर निस । 44 ते तै मुओरो लाजर बेइर नीसो तैसेरे हथ पाव काफने सैहीं बंधोरे थिये ते दोगे अक रुमाल बंधोरो थु यीशुए तैना जॉव एस खोल्ना ते एस गंने तेथ ।

यीशु एरे खलाफ साजिस

(मत्ती 26 : 6 - 5 ; मरकुस 14 : 1 , 2 ; लूका 22 : 1 , 2)

45 बड़े युहुदी जैना मयामी सैहीं मिलने एवरे थिये यीशुएरो एह तमाशो ओरतां तैस पुड़ विश्वास कियो । 46 पण तैना मेरां किछेइ फ्रिस्न का गेईतां सभ तगर शुनावं जैना यीशुए कियेरु थुं । 47 एह फीरी सरदार कहिना ते फ्रिसेंइ अदालत अलियारो अजलास कुजाव ते जोने लगे अस कुन लोरेम केरने एह मेनु ता इडी अजीब अजीब कमां लोरोए केरने । 48 अगर असां एस इंचरे छेडी तेमेले ता सेभी लोकेई तैस पुड़ विश्वास केरनोए ते फिरी रुमेई इडी एइतां ईशे मांदर ता इशी कोमं दुइने पुड़ कब्जो केरनोए । 49 तैखन तैना मेरां अक जैसेरु नोवं कैफा थुं जै तैस साल मांदरेरो पुजारी थु जोनेलगे तुस लोक किछ ना जानाथ । 50 तुसन एह पत्तो लोड़ तो थु की खरु कुने लोकां केरे लेइ अक मेनु मरो गाओ ना की सारी क्रोम मारी गाओ । 51 एह गल तैनी अपनी भोंती ना थी जेवरी पण तैस साल जै कहिना थु तैसेरी तग्रफां जेवरु थुं की यीशु सेरी युहुदी कोमरे लेइ अपनी जाना तेलो । 52 तै सिर्फ युहुदी कोमरे लेइ नेहीं पण एल्हरे लेइ परमेशरे सारे लोक जैना इरां उरां जेवरेना अकोटे केरतां अक बडी क्रोम बनाए । 53 बसा तैनेई तैना दिओड़ना बाद यीशुएरे कतल केरनेरी तियारी शुरु की ।

54 एसेरां बाद यीशुए युहुदीना मां चलनु फिरनु छःाडु ते बियाबानेरे अलाके अफरायम शहरे मां जेव ते अपने चलना सैहीं साथी राने लगे ।

55 तेईस युहुदी केरी ईद फसी नेडै अई ता बड़े लोक आस पसेरे आलाकना मेरां युरोश्लमे मां जो एजने लगे ताके ईद फसी केरां पेहिले एपनी सफेयरी सेरी रस्मा पूरी भोन । 56 तैना यीशु तोपते थिये तेईस तैना मांदरे मां अकोटे भुए ता एकी होरी सैहीं जोने लगे कोई पत्तोए कुन तै इदी मां एजेलो की नेहीं । 57 किजोकी सरदार कहिना ता फ्रिसेंई हुक्म दितोरो थु की अगर केंची पतो लगे की यीशु कोड़ीए ता ते पत्तो ते ताके आसां तैस ट्लाम ।

यीशु एरे पवन पुड़ इन्न उलटानो

(मत्ती 26 : 6 - 13 ; मरकुस 14 : 3 - 9)

12 ईद फसी केरां शा दिहाड़े पेहिले यीशु बेत आईना मां जो चलो जेव जेडी लाजर रातो थु जे यीशुए मुडदना मेरां जिन्तो कियोरो थुओ । 2 एडी यीशुएरे लेइ अक धामरी तियारी भोइजेइ मरथा सेवा लोरी थी केरने ते लाजर भी तैन मां थु जैना यीशु सैहीं साथी रौट्टी खाने बिशोरे थिये । 3 तैखन मरियमां अक माघो तेल अतग्र यीशुएरे पंवना मलो ते अपने दोगेरे बालना सैहीं पोंछने लगी ते सारु घर मुशकां सैहीं भेरोई जेव । 4 तैसेरे चलना मेरां अक युहुदा अस्कुर्युती जैनी यीशु टलुवेवरो थु चोगली लगे लाने । 5 अगर एह अतग्र तेल बेचेथे ता कोई ट्लई शाव दीनार डालर रुपेइए मेलने थिये जैना गरीबना तेइसकते थिये । 6 तैनी एना एलेरलेइ ना थुं जेवरु की तैस गरीबां केरो खियाल थु पण ते चौर थु झोलोी पेंसां केरी तैस का भोती थी जेस मां लोक दाना छडते थिये ते ते अपने लेइ तैस मेरां किछ छपातो थु । 7 यीशु जोने लगे तु मरियामा परेशाना ना केर ऐसांएह अतग्र तेल मेरे दबनेरे लेइ रखोरोए । 8 गरीब लोक ता तुस्न सैहीं साथी पत्ती भी रंहनेना पण आंव तुस्न सैहीं साथी पत्ती नेहीं रांनो ।

लाजरेरे खलाफ साजिस

9 एस फेरे युहुदी लोकन पत्तो लगे की यीशु बेत अनिया मां आओ तैना भी तैडी जे की अक यीशु नेहीं पण लाजर भी ओरनो चहते थिये जै यीशुए

मुडदना मेरां जीतो कियोरो थुओ 10 तैखन सरदार कहिनेइ लाजर भी मारनेरी तियारी की । 11 किजोकी तेईस बड़े युहुदी यीशुएरे पासे मस्त भेवरे थिये ते तैस पुड़ विश्वास केरते थिये ।

यरुलेमे मां जीत दाखल

(मत्ती 21 : 1 - 11 ; मरकुस 11 : 1 - 11 ; लूका 19 : 28 - 40)

12 होरसां सरे लोक जैना ईद जो तैडी एवरे थिये तैनेइ शुनु की यीशु भी युरोशलमे मां एजने बालोए । 13 त खजुरेरी डेलडी हाथे मां रखतां नेहरे देते मिल्लेरे लेइ निसे तारीफ मुबारके तै जै परमेशरे नोवं सैहीं एइते इस्राइलेरो राजो मुबारक भोए । 14 यीशुएकी निकडे गधे पुड़ चैइतां जेव जेचरे लिखेरुए ।

15 एह सियुवनेरी कुई तु डेरां न्ना ओर तेरो बादशा एजी रहारोए ते गधेरे बचे पुड़ चैइतं एवरोए । 16 पेहिले ता यीशुएरे चलेइ किछ ना समझु की कुन लोरुए भोने जताली यीशुएपनी महिमा मां आव ता तैना याद आव की ऐना गल्लां एस्सेरे बारे मां लिखुरी थी एना लोकें भी एस्सेहीं जैना किउं एने गल्लां केरे बारे मां थुं । 17 जैखन यीशुए हक तेइतां लाजर कबरी मेरां बेइर कुजेवरो थु ता ऐना लोक भी साथी थिये तेनेई एह गल सेरिओ फेलाई । 18 ते बड़े लोकेई एना शुनु की यीशुए अक बडो तमाशो ओराव तेस्सेहीं मिलने जो चलै । 19 फ्रिसी एना ओरतां एकी होरी सैहीं जोने लगे सोचा असना कुन हाथे लगु हेरा सारी दुनिया एस पत्ती चलौरीए ।

यूनानी यीशु तोपतन

20 जैना लोक ईद बनानेरे लेइ युरोश्लमे एवरे थिये तैना मां किछ यूनानी भी थिये । 21 तैना फल्पसे का एए जै गलीलएरे शहर बेतसेइदारो राने बालो थु जोवले हथ केरतां जोने लगे असां यीशु ओरनो चहतम । 22 फल्पसे इन्द्रयसे जॉवं ते दुईईए इइतां यीशु पत्तो दितो । 23 यीशुए तैना जवाब दितो अबना अदम बादो भोनेरो मोको एवरोए । 24 आंव तुस्न सैहीं सच जोतां की जां तगर गेहों केरो गलेव मित्ती मां ना मिले आके गलेव राते पण अगर ते मित्ती मां मिलते ता हछे गलेव बनातना । 25 जै अपनी जाना ट्लारी रखते ते अपनी जाना गुवाते पण जै एपनी जानी सैहीं बेर रखते ते अक लेमी उमरारी जिन्दगी बचालौ । 26 जै कोई मेरी सेवा केरनी चाते तैस जरुरीए की मेरी पैरबी केरे ताके जेडी आवइ तैडी मेरो चेलो भी भोए जै मेरी सेवा केरते मेरो परमेशर तैस इजत तेलो ।

क्रुसेरी मौतरो इशाओ

27 हुना मेरो दिल डरने लोरोए ता आंव कुन जॉइ की एह परमेशर तु मीं बचा कधेनेहीं किजोकी एल्हरेलेइ ता आंव एवरोइ की तैस मोके तगर पुजइ गेहीं । 28 एह बाबा अपने नॉवेंरी कुदरत हेरा तैखन अम्बेरां अक आवाज अई मी तुस्न लौ ओरेवरिए ते फिरी भी हरेइलो । 29 तैखन तैडी मेनु केरी बडी भीड़ थी एह आवाज शुनी ता जोने लगे अंबर गुडने लगेरुए किछ लगे जोने केंचे फरिश्ते तैस सैहीं गल कियोरिए । 30 यीशु जोने लगे एह आवाज तुशैलेई एवरीए मेरे लेइ नेहीं । 31 हुना ते मोको एवरोए की दुनियारी अदालत भोनिए हुनी इस दुनियारो सरदार बेइर कढनोए । 32 पण जेखं आंव सलेबे पुड़ उबरो छुनौइ ता तैखन आंव सेरी लोकन एपू केजो एनेलो । 33 यीशुएना जोइतां साफ चारे ओरवं की ते केरी मोवतां सैहीं मरने बालोए । 34 मेनु तैस पूछने लगे असेंइ शुनेरुए की मसीह जीन्तो रनोए फिरी तु केन्चरे जोतां की अबना अदमेरु स्लेबी पुड़ मरनु जरुरीए एह अबना अदम कोने । 35 यीशुए तैना जुवाब दितो लौ तुस्न का थोड़े चिरे तगरे लौ जां तगर तुस्न का आओ लौइ मां चाला एस केरां पेहिले मत्ता अंधारु तुस्न घिनी गाओ जै मेनु अंधारे मां चलतेते ना जाने ते कोरां चलरोए । 36 जां तगर लौ तुस्न का नेडे ता लौइ पुड़ विश्वास केरा ताके तुस लौआरी किरना बेनी सकत जैखन यीशुए ।

यहुदी केरु अविश्वासे मां बनेरो रहनु

ऐना गल्लां की ता तेठठां चलौ जेव ता तैना केरी एच्छना मां ते कांटो बेनी जेव । 37 हालंकी यीशुए तैना लोकन एतरी खेडां ओरेई फिरी भी तैनेइ

विश्वास ना कीयो | 38 जेन्चरे इसाया नाबी ज़ोतो थु पुरु भोए की एह परमेशर इशे जोने पुड़ केनी विश्वास कियो ते परमेशररी शक्ति केस पुड़ बांदी भुई | 39 एओ गल थी की तैना विश्वास ना केरी बट्टे इसाया एकी होरी ठैरी जोते | 40 तैनी तेंकेरी एच्छी केनी ते दिल भी शूरो बनेवरोए एरु ना भोए की तैना एच्छना सैहीं लाना ते दिले सैहीं बुझना ते माफ़ी मग्न ते आंव तैना बचैई | 41 इसाया नाबी तांए ज़ोतो थु की तैनी यीशुएरी महिमा लाहोरी थी ते तैसेरे बारे मां गल भी की | 42 इसेरे वजही सैहीं युहुदी सरदार यीशु पुड़ विश्वास ता केरने लगे पण फ़िसी केरे वजही सैहीं विश्वासेरो इकरार ना थिये केरते तैना उरते थिये की असना मंदरे मेरां कढैले | 43 खास केरतां तैना परमेशरी इज़त मेलनेरे बजाए मेनु केरी तग़रां इज़त मेलने मां खुशी थिये |

यीशु एरे वचन : इन्साफेरो आधार

44 तैखन यीशुए जोरे सैहीं ज़ांव ज़ै कोई मी पुड़ विश्वास केरते ते ना मी पुड़ पण मेरे भेजने बाले पुड़ विश्वास केरते | 45 ते ज़ैखन भी मेरां तकते मेरे भेजने बाले लाते | 46 आंव दुनियाई मां अक लौ बेंतां एवरोई ज़ै मी पुड़ विश्वास केरलो अंधरे मां ना रालो | 47 अगर कोई मेरी गल्लां शुनाते तैना पुड़ अम्ल केरते ता आंव तैस कुसूर ना लेइलो आंव दुनियाई कुसूर लाने नेहीं पण छुटाने एवरोइ | 48 ज़ै मी किछ ना बुझै ना मेरी गल शुने तसेरो हिसाब केरने बालो मेरु बचने ज़ै अखिरारी दिहेडी तैस मुर्जम बनेइलो | 49 किजोकी मी एपनी तरफां किच भी नेहीं ज़ेवरु पण ज़ैनी परमेशरे आंव भेजोरोई तैनी मी जोनेरो हुक्म दितोरोए | 50 आंव ज़ानतां की तैसेरो हुक्म मन्नो अक हेशारी जीन्दगीए एल्हेरलेइ आंव तैने ज़ोतां ज़ैन ज़ोनेरो हुक्म मेरे परमेशरे दितोरोए |

यीशु चेलां केरे पाव धोते

13 ईद फसी एरे पेहिले दिहाडे यीशुए बुझु की मेरो बाजी केजो गहनेरो मोको इस दुनियाई मेरां एवरोए ते अपने लोकन सैहीं पियार केरतो थु ज़ैना दुनियाई मां थिये ते तैसेरो पियार आखिरी मोके तगर बराबर रहू | 2 तैना लोक डलाई लोरे थिये खाने ते शैतांने पैहिले शमुनेरे मट्टे यहूदा अस्क़युती तैसेरे दिले मां पैहिले यीशु टलुवांनेरो खियाल छडोरो थु | 3 यीशु पत्तो थु की बाजी सेरी चीजां तैसेरे हथे मां दितोरिना कने ते परमेशरी त्रफां एवरोए कने परमेशरे पासे वापस चलरोए | 4 ते पांटी पुड़रां खडुठौ ते अपनू फिरना खोलु ते अक तोलियो अपने लखे सैहीं प्लेटो | 5 तेसेरां पत्ती तैनी अक पात्र भांड टलांवे तस्मां पानी छाडु ते अपने चेलां केरे पाव धोईतां लखे बन्धोरे तोलिये सैहीं पोंछे | 6 ज़ैखन ते शुंमौन पतग्रसे का पुजो ता पतरस जोने लगे एह परमेशर , 7 कुन तु मेरे पाव धोने चहतां | यीशुए जुवाब दितो ज़ैना आंव केरने लोरोइ तु हुन्ना ता नं बुझस पण पत्ती बुझनु | 8 पतरस लगे जोने तु मेरे पाव कधे ना धोई सकस यीशुए जुवाब दितो अगर तु पाव ना धुवास ता तु मेरो चेलो नेइ | 9 शुंमौन पतरस यीशु सैहीं जोने लगे एह प्रभु ,तुसां मेरे पाव नेइ बलकी हथ ते दोग भी धोथ | 10 यीशुए तैस्से सैहीं ज़ांव, ज़ैनी निह्ररु ए, तैस पावां केरे इलावा होरु धोनेरु किछ ज़रूरत नेइ; ते तुस साफत; पर सारे नेइ 11 यीशु पत्तो थु की कोवना तैस टलुवने बलोए एल्हेरे लेइ तैनी ज़ांव तुस सभ साफ नेइ |

12 ज़ैखन तैनी सेभीकेरे पाव धोए ता अपनू फिरना लेइतां एपनी ठैरी बिशो तैखन तैनी तैना पुछु ज़ैना भी मी तुस्न सैहीं कियो कुन तुस तेल्लेरो मत्लब सम्झतथ | 13 तुस मिजो गुरु ते परमेशर ज़ोतथ तुशु जोनु सेही साचै की वाकिया आंव तुशो गुरु ते परमेशरांइ | 14 जांता मी तुशै गुरे ते कने तुशै परमेशरे तुशै पाव धोए ता तुशो भी फर्जे की एकेकेरे पाव धोथ | 15 मी तुस्न अक इशारो दितोरोए की जेन्चरे मी पाव धोए तुस भी एकेकेरे पाव धोइयाथ | 16 आंव तुस्न सैहीं सच ज़ोतां की कोई गुरु चले कैरां बडो ना भोए ना कोई बिस्तार अन्ने बालो अपनो बिस्तार पुजाने बाले कैरां बडो भोए | 17 तुसेइ ऐना ग्लां भुझी छैडी एना गलना पुड़ अम्ल भी केरले ता तुस मुबारक भोनेथ | 18 मेरो इशारो तुशै सेभी केरे पासे नेइ ज़ैना मी चनौरथ पण पबित्र बचने गल पूरी भोनी ज़ारुरी की ज़ै मेरी रौडी खाते तओ मिजो लतां बानेरी तियारी केरते | 19 एस कैरां पैहिले की एरु भोव आंव तुस्न जोने लोरोइ की तेईस

एरु भोलू ता तुस बुझैले तै आंवेइ | 20 आंव तुस्न साचजोतां की ज़ै मेरे भेजोरे पुड़ अतबार केरते तै मी पुड़ अतबार केरते ज़ै मी पुड़ अतबार केरते तै मेरे भेजनेबाले बाले पुड़ अतबार केरते |

वीश्वासघातेरे पासे इशारो

(मत्ती 26 : 20 - 25 ; मरकुस 14 : 17 - 21 ; लूका 22 : 21 - 23)

21 ऐना ग्लां केरे बाद यीशु अपने दिले मां बडो परेशाना भोऊ ते ज़ौ ने लगे आंव तुस्न सैहीं साच ज़ोतां की तुस्न मेरां एके आंव टलुवांनोइ | 22 इसेरे चले एकेकी पुड़ शाक केरने लगे किजोकी तैना पत्तो ना थु कि एसेरो इशारो कसेरे पासे | 23 एना मेरां अक चेलो ज़ै यीशु सुखातो थु पांटी पुड़ नेइ बिशारो थु | 24 शमौन पतग्रसे एस चले इशारे सैहीं पुछु की यीशु कसेरे बारे मां जोने लोरोए | 25 एनी चले यीशुएरे पासे लिक्तां पुछु एह परमेशर तै कोवने | 26 यीशुए जुवाब दितो ज़ेस आंव पेनेरी डलाछडौ डोबतां तेलो तैहे भोनाए तैखन यीशुए डलाछडौ शोमोना अस्क़युतेरु मट्टु युहुते दितो | 27 एस पिनेरे बाद शेताना तैसमां बिशी जेवएह फिरि यीशुए तैस ज़ांव ज़ैना किछ केरनुए लुशी केर | 28 पण होरी केंची एह पत्तो ना लगे की यीशुए एना एस कीजो ज़ांव | 29 याहुते का पेंसां केरी थेलडी भोती थी तेनेई बुझुकी यीशु तैस ईदी जो सामाना ग्हिनेरे लेइ लोरोए जोने या गरीबना किछ तेइते | 30 जेरो यहूते रोटटारौ डलाछडौ खाव तेखने बेइर निसो ते रात भी भेवरी थी |

नोवो हुकम

31 तैखन युहुदो तेटठौ चलौ जेव ता यीशु जोने लगे अबना अदमें महिमा मेलोरिए उंचरे परमेशरे तैसमां महीमा मेलोरी | 32 अगर परमेशरे तैसमा महिमा मेलोरिए ता परमेशर भी तैस अपनी महिमा तेलो तै लुशी तेलो | 33 मेरे मटठौव आंव किछ चीरैतुसन सैहीं साथीं तुस मी तोपल्हे जेन्चरे मी युहुदना भी जेवरु थुं तुस्न भी ज़ोतां ज़ेरां आंव चलौरोइ तुस तैडी ना एजी सकत | 34 आंव तुस्न अक नोवो हुकम तेतां की एकेकी सैहीं महबत रखा जेन्चरे मी तुस्न सैहीं महबत रखी तुस भी एकेकी सैहीं महबत रखा | 35 अगर तुस एकेकी सैहीं महबत राखेले ता सभ लोक बुझैले की तुस मेरे चलेथ |

पतरसेरे इन्कारेरो इशारो

(मत्ती 26 : 31 - 35 ; मरकुस 14 : 27 - 31 ; लूका 22 : 31 - 34)

36 शमौन पतग्रसे तैस पुछु एह परमेशर तु कोरां चलरौस यीशुए जुवाब दितो ज़ेरां आंव चलरौही तु हुन्ना मी सैहीं साथी ना एजी सकस पण बते मां एजी सकतां | 37 पतरस पुछुने लगे एह परमेशर आंव तीसैहीं साथी किना एजी सेखीं आंव ता तेरे लेइ अपनी जाना भी देंनेरे लेइ तियार अंहि | 38 एन शुन्तां यीशु पुछुने लगे की तु सचै मेरे लेइ अपनी जाना तेलो आंव ती सैहीं सचै ज़ोतां की कुकड़बांकी कैरां पैहिले तु मेरो टलैई बार इंकार केरलो |

परमेशरे तगर पुजनेरी बत

14 डरा न्ना परमेशरे पुड़ ता मी पुड़ विश्वास रखा | 2 मेरे बाज केरे घरे मां बडां घरांअना अगर ना भोथां ता मी तुस्न जेवरु भोनु थुं आंव तुशै लेइ ठार तियार केरने चलरौइ | 3 अगर आंव तुशै लेइ ठार तियार केरीं ता वापस एइतां तुस्न एपू सैहीं साथी न्हेलो जेडी आंव भोलो तुस भी तैडी भोथ | 4 ज़ेरां आंव चलरौइ तुस तेठेरी बत ज़ानात्थ | 5 तोमै तैस सैहीं ज़ांव एह परमेशर ईशी बतरो कुन पत्तो अस ता एना भी ना ज़ान्म की तु कोरां चलरौस | 6 यीशुए जुवाब दितो बत सच ते जीन्दगी आंवेइ कोई मेरे सुवा बजी का ना गेही बटे | 7 अगर तुसैहीं सचै आंव पशानोरो भोथो ता मेरे बजी भी पशानेथे पण हुनि तुस तैस पशेनी जे कने तोसैहीं ते लाहू भी | 8 फल्पुस जोने लगे एह परमेशर असना बाजेरी महिमा हेरा तैहे इशेलेइ बडीए 9 यीशुए जुवाब दितो फल्पुस एतरे चीरैआंव तुस्न सैहीं साथी राहू कुन तु मी ना ज़ानास ज़ैनी आंव लाहू तैनी बाजी भी लाहू तु कियुं ज़ोतां असना बाजी केरी महिमा हेरा | 10 कुन ती इकिना नेहीं की आंव बाजी मांहीं ते बाजी मीमांहे

आंव जैना गल्लां तुसन सैहीं जोतां तैना गल्लां बाजी मीमां रेहितां केरते |
 11 एल्हेरलेइ आंव तुसन जोतां की आंव बाजी मांहीं ते बाजी मीमांहें तुस
 इकिना केरा घटे केरा घट मेरे कम कियुं ता इकिन केरा जैना मेरे शाह्ताथ |
 12 आंव तुसनसैहीं सच्च जोतां की जै मी पुड़ विश्वास रखते ते भी एनाचरे
 केरेलो जैना आंव करतां पण ते मी कैरां भी बडॉ बडां कमां केरेलो किजोकी
 आंव बजी का चलरौंइ | 13 जैना किछ तुस मेरे नोंवें सैहीं मोल्हे आंव तुसन
 तेल्लो की बाजी केरी महिमा मट्टैरे वजाही सैहीं बंदी भोए | 14 अगर तुस
 मेरु नोंवें सैहीं किछ भी केरनेरी मीनात केरले ता आंव जरुर एजेलो |

पवित्र आत्मारो वाइदो

15 अगर तुस मीसैहीं महबत रखताथ ता मेरो हुक्म मेनाथ | 16 आंव अपने
 बाजी की मीनात केरल्लो ते तुसन अक हिमत देंने बालो मदती भेजैलौं ते
 हमेशां तुसन सैहीं साथी रहलो | 17 इना रुहु ते सच्च जै दुनियाई ना मेल्हे
 किजोकी ना ते लेहियोए ना जेनोए पण तुस तैस जातथ किजोकी तैसेरी रुहु
 तुशै अंतरे ते तुशै दिले माराते | 18 आंव तुसन निहाज्जे ना शेरलो आंव तुसन
 का एजेलो | 19 इही दुनिया किछ चीरां बाद मी ना लेही बटैली पण तुस मी
 तकते राल्ले किजोकी आंवभी ज्रीतोहीं ते तुस भी ज्रीते राल्ले | 20 तैस
 दिहैडी तुसां बुझैलेकी आंव अपने बाजी मांहीं ते तुस मीमांथ ते आंव तुसन
 मांहीं | 21 जेस का मेरो हुक्मे ते ते मान्ते ता तैहे मीसैहीं महबत केरते ते मेरे
 बाजी करो ट्लारो भोलो आम्हीं तैस ससैहीं महबत रखेले ते अपनो आप
 तैस का बंदो केरलो | 22 तैखन [युहुदा अस्क्रियुती] युहुते जोंवें पण एह
 परमेशर कुन उजाओ की तु अपनो आप असना पुड़ बंदो केरेलो दुनियाई पुड़
 न्ना | 23 यीशुए जुवाब दितो अगर कोई मीसैहीं महबत रखते ते मेरे बचने पुड़
 अम्ल केरते मेरो बाजी भी तैस सैहीं महबत रखेले ते आस तैसका एज्मेले ते
 तैससैहीं साथी रामेले | 24 जै मीसैहीं महबत ना रखे ते मेरे बचने पुड़ अम्ल
 ना केरे इही बचना जै तुस शुन्ने लोरेथ एह मेरु आप्नु नेहीं पण मेरे बाजी
 केरुए जैनी आंव भेजोरौंइ |

25 एना सेरी ग्लां मी तुसन साथी रेहितां जोइ | 26 पण ते मद्दत केरने बालो
 पबित्र आत्मा जेस बाजी मेरे नोवेसैहीं भेजेलो तुसन सेरी ग्लां शखालेलो हर
 ग्ल जै मी तुसन सैहीं जेवरी थी याद कमवालो | 27 आंव तुसन सैहीं साथी
 अपनू इकिना तेइतां गातां जेचरे दुनिया तेचे तेचरे नेहीं पण मता घमराथ मता
 डरथ | 28 तुसैहीं मिकैरां एना जौतु शुनेरुए की आंव चलरौंइ ते आंव तुसन
 का फिरी एजेलो अगर तुस मीसैहीं महबत केरथे ता खुशी भोने थिये
 किजोकी आंव बाजी का चलरौंइ किजोकी बाजी मीकैरां बडोए | 29 मी सेरी
 ग्ला पहिले तुसन जेवरिना की जैखन तैना पूरी भोना ता तुस मीपुड़ विश्वास
 केरले | 30 हुनी आंव तुसन सैहीं जाते ग्लां ना केरीं किजोकी इस दुनियारो
 सरदार एजने बालोए तै मीपुड़ पुच्छे नो नेहीं | 31 पण दुनियाई एह पत्तो
 लोडते की आंव बाजी सैहीं महबत केरतांइ ते तैसेरे सारे हुक्म आंव मन्तांइ
 एजा हुनी असां इटठां चलम |

यीशु सच्चवी दाछ

15 आंव दाछारु असल्लही बडह अंहि ते मेरो बाजी बाग्बाने। 2 मेरी जेस
 डेलडी फल ना लगे तेह तैस केटी छडतै ते जेस फल लगते तैस
 छाटते की जाते फल लगे। 3 तु स तैस बचनेरे जोने जै मी पहिले तुसन सैहीं
 कियोरो थु तलोरेथ। 4 तुस मीमां राथ ता आंव तुसन मां रहतां केची डेलडी
 अपने आप फल ना लगे तैस अपने जिले सैहीं जुडतां रान्हू पते तुसन भी
 मीमां रानेरे अलावा फल ना लेगी सखे। 5 आंव दाछारु बडहअंहि ते तुस मेरी
 डेलडीथ जै मीमां जुडतां राते तैस खूब फल लगते मी कैरां अलाग भोइतां
 तुस किछ ना केरी सखत। 6 जै मी सैहीं जुडतां ना राहु ते तैस डेलडारौं
 जेरोओ जेस दूर शारतना ते शुकी गाचे एरी जेरी डेलडी घेरतां लांवेन मां
 फुकी छडतना। 7 अगर तुस मीमां बनोरे रातथ ते मेरु बचना अपने दिले मां
 राखेले ता जैना च्हेले मागले तुसन मैल्हेलु। 8 मेरे बाजेरी महिमा एसमांहें की
 तुस हछो फल बनाथ ते लोकन ओराथ की तुस मेरे चलेथ। 9 जेन्चरै बाजी
 मीसैहीं महबत कियोरीए तेंचरै सैहीं कियोरिए हुनी मेरी मुहबति मां बनोरेराथ।
 10 जेन्चरै मी अपने बाजेरे हुक्म पुड़ चालौं ते तैसेरी मुहबति मां राहु तेंचरै तुस

भी अगर मेरे हुक्म मानेले ता मेरी म्हाबती मां बनोरे रहले। 11 मी एना गल्लां
 एल्हेरलेइ तुसन जेवरिना की आंव तुसन पुड़ खुशी भोइ ते तुशी खुशी पूरी
 भोए।

12 मेरो हुक्म एओ की जेन्चरै मी तुसन सैहीं पियार कियो तुस भी एकेकेकी
 सैहीं मुहाबत रेखाथ। 13 एस कैरां जाते मुहाबत कोई नेहीं केरे जेकी अपनी
 जाना दोस्तां केरे तेइते। 14 तुस मेरे दोसत ता अहथ पण मेरे जोंने पुड़ अमल
 भी केराथ। 15 अजेरे बाद आंव तुसन जो नोकर ना जोइलो किजोकी नोकर
 जाने की तैसेरो मालक कुन केरते पण मी तुसन जो दोसत जेवरुए किजोकी
 जैना किछ मी बाजी कैरां सहुनेरुए तुसन भी शुनेवरुए। 16 तुसैहीं आंव नेहीं
 चुनौरी पण मी तुस चुनौरेथ ते रखोरे भी आथ की गेहितां फल अन्थ ते फल
 जे पक्को राहु ताके जैना किछ मेरे नोंवें सैहीं बाजी कैरां मथ ता तेह तुसन
 तेइते। 17 आंव तुसन हुक्म तेतां एपू मांम्हेंइ पियार रेखाथ।

संसारो बैर

18 अगर दुनिया तुसन सैहीं दुशमनी रखे ता याद रखा की तैनेइं पेइल्हे
 मीसैहीं दुशमनी कीयोरिए। 19 अगर तुस दुनियारे भोथे ता दुनिया तुसन
 अपना केरे जेरे हमददी रखेथे पण हुनी तुस दुनियारे नेहीं किजोकी मी तुस
 दुनियाई मेरां चुनातां किनारे रखोरेथ ताए दुनिया तुसन सैहीं दुशमनी रखे।
 20 मेरी एह गल याद रखा की कोई नोकर अपने मालके कैरां बडो ना भोए
 अगर दुनियां आंव स्तेवरोंइ ता तैना तुसन भी सताले अगर तैनेइं मेरी गली
 पुड़ अम्ल किउं ता तुशी गली पुड़ भी अम्ल केरल्हे। 21 तैना मेरे नोंवेरे वजही
 सैहीं एरहो जेरहो बरताव केरल्हे किजोकी तैना मेरे भेज्जनेबाले ना जानाना।
 22 अगर मी एइतां तैना सैहीं गल ना भोथी कियोरी ता तैना पापी ना थिये
 भोने पण हुनी तेन्केरे पापेरो तैना का कोई जुवाब नेहीं। 23 जै मीसैहीं दुशमनी
 रखते ते मेरे बाजी सैहीं भी दुशमनी रखते। 24 अगर आंव तेन्केरे सामने तैना
 कम ना केरथो जैना केंचे हारे नेहीं कियेरु ता तैना पापी ना थिये भोने पण
 हुनी तैना ओरनेरां पत्ती मीसैहीं ता मेरे बाजी दुईने सैहीं दुशमनी राख्त्न।
 25 पण एना एलओरलेइ भोव की तैना केरी किताबी मां लिखोरी ग्ल पुरी भोए
 की तेनेइं मीसैहीं भी खामखा दुशमनी रखी। 26 जैखन ते मद्दतगार साचीरुहु
 एजेली जेस आंव अपने बाजेरी भोंती भेज्जेलौं ता ते मेरे बारेमां शाहात
 देल्हो। 27 ते तुस भी गवाहथ किजोकी तुस भी शुरु कैरां मीं सैहीं साथी थी |

16 मी तुसन एना सेरी ग्लां एल्हेरलेइ जोइ की तुस टेपलोथ न्ना |
 2 तैनेइं तुस गिल्जे मेरां काढनेथ खास केरता एरहो जेरहो मोको
 एजी राहोरुए अगर कोई तुसन मेरतां छडैलौं ता तुस एना बुझथ की ते
 परमेशरी सेवा केरने लोरथु | 3 तैना एना सभ एल्हेरलेइ केरल्हे की ना तैनेइं
 कधी मेरो बाजी बुझौं ते ना कधी आँव | 4 मी तुसन एना सेरी ग्लां एल्हेरलेइ
 जोइ की जैखन तैना पूरी भोली ता तुसन याद एजेलू की मी तुसन एना पहिलु
 जेवरु थुं |

पवित्र आत्मारां कम्मां

पैहिले एल्हेरलेइ नेहीं जेवरु की आँव एपू तुसन सैहीं साथी थु | 5 पण हुन्ना
 आँव अपने भेज्जने बाले कह चलरौंइ पण तुसैहीं केंचे भी ना पूछ की तु कोरां
 चलरौंस | 6 किजोकी मी तुसन जोइ छाडैरुए एल्हेरलेइ तुस बडे मायूस
 भेवरथे | 7 पण आँव तुसन सैहीं सच्चजोतां की मेरु इटठं गनु तुशै लेइ बडु
 जरुरिए अगर आँव ना गेहिलो ता तेह मद्दतार तुसन का नेहीं एज्जो पण आँव
 चलौं जेव ता तैस आँव तुसन का भेज्जी तेल्लो | 8 जैखन ते मद्दतार एजेलो ता
 जेडी तगर पाप ता पुन्न ते इंसाफेरो अस्सरे ता ते दुनियाई पापी बनाल्हो |
 9 पापेरे बारेमां एल्हेरलेइ की दुनियां मीपुड़ विश्वास नेहीं केरन | 10 विश्वसेरे
 बारेमां एल्हेरलेइ की आँव वापस बाजी का चलरौंइ ते तुसैहीं आँव फिरि नेहीं
 लंहनां | 11 ते इन्सफेरे बारेमां एल्हेरलेइ की एस दुनियारो सरदार मुर्जम
 बनेइतां चलो जेवरोए | 12 मी होरु भी बडु किछ जोनुए पण हुन्ना तुसैहीं तैना
 झैलनु नेहीं | 13 पण जैखन ते साची रुहु एजेली ता ते साचैरे पासे तुशी मद्दत
 केरल्हो ते अपनू भोंतु किछ ना जोल्हो पण तुसन सिर्फ तेनें जोल्हो जैना ते
 शुनेलो ते भोंने बीतने बेली ग्लां केरो पत्तो तेल्लो। 14 ते मेरी महिमा
 ओराल्लो किजोकी ते मेरी ग्लां मेरी ज्जबानी शुन्तां तुसन तगर पुझालहौं |

15 सभ किछ ज़ैना भी बाजी करुए तैना मेरुए एओ वजाओ मी ज़ोंव की पाक रुहु मेरी ज़बानी शुन्तां तुस्न तगर पुझालहौ ।

दुःख सूखे मां बेदलोलो

16 थोड़े चीरां पत्ती तुसैहीं आँव फिरि नेहीं लंहनों ते तैसेरे थोड़े चीरां पत्ती तुसैहीं आँव फिरि लंनोही । 17 एना ज़ोंनेरां पत्ती किछ चले ज़ोंने लगे की एना ज़ोंनेरो कुन मत्लाबे की थोड़े चीरां पत्ती तुसैहीं आँव फिरि नेहीं लंहनों ते तैसेरे थोड़े चीरां पत्ती तुसैहीं आँव फिरि लंनोही ते होरु कुन की आँव बाजी का चलरौंइ । 18 पण तैना एकेकी पूछतै राहु की थोड़े चीररौं कुन मत्लाबे इशी समझी मां किछ ना एजे एह कुन लोरोए ज़ोंने । 19 यीशुए ओरु की तैना तैस एस बारे मां पूछनु चहतना तेलओरलेइ तैनी तैना ज़ोंवकी तुस एपू मांमेहीं पूछने लोरेथ की मेरो मतलब कुन थु की थोड़े चीरां पत्ती तुसैहीं आँव फिरि नेहीं लंहनों ते तैसेरे थोड़े चीरां पत्ती तुसैहीं आँव फिरि लंनोही । 20 आंव तुस्न सैहीं सच ज़ोतां की तुस लेरातेल्हे ते शोग बनालहे पण दुनियारे लोक खुशी बनालहे तुस मायूस ता भोल्हे पण तुशो गम खुशी मां बेदलोई गांनोए । 21 ज़ैखन केंची कौनाशी माटुटु ज़रम्नेरु पेट दुखते ता ते गमगीना भोचे एलओरलेइ की तेसारी दुखेरी घड़ी एवरी भोचे पण ज़ेरो ब्वओ ज़रम्ने ते एस खुशी मां की दुनियाई मां अक मेंनु पेइदा भेवरोए अपनी तकलीफ़ बिसरी गाचे । 22 एओ हाल तुशोए हुन्ना तुस म्गगीनाथ पण आंव तुस्न सैहीं फिरि मिलेलो तैखन तुस खुशी मनाल्हे ते तुस्नकरां तुशी खुशी कोई थसोडी ना बटेल्हो । 23 तैस दिहैडी तुस्न मी कोई सुवाल पुछनेरी ज़रुरत नाहीं भोनी आंव तुस्न सैहीं सच ज़ोतां की अगर तुस मेरु नाँव घिन्तां बाजिना कैरां किछ मगेलहे ता ते तुस्न तेइतेल्हो । 24 तुसैहीं मेरु नाँव घिन्तां हुन्तागर किछ नेहीं मगेरु मगेलहे ता मैल्हेलु ते तुशी खुशी पूरी भोली ।

संसार पुड़ जीत

25 अगर आँव एना ग्लां तुस्न फेरे सैहीं ज़ोतां पण मोको एवरोए की आंव मसालां तेइतां कम ना घिनेल्हो पण आंव अपने बाजी केरे बारे मां तुस्न सैहीं साफ साफ ग्लां केरल्हो । 26 तैस दीओडी तुस मेरु नाँव घिन्ता मगेलहे पण आंव वेइधो ना केरीं की आंव तुशैलेइ बाजी सैहीं सुवाल केरल्हो । 27 किजोकी बाजी ता तुस्न सैहीं एपू पियार केरते एलओरलेइ की तुसैहीं मीसैहीं महबत रखोरिए ते तुसैहीं विश्वास कियोरोए की आंव परमेशरी तग्रफां एवरोई । 28 आंव बाजी कैरां निस्तां दुनियाई मां एवरोई हुनी दुनियाई मेरां भोइतां वापस बाजी का चलरौंइ । 29 एसेरां बाद यीशुएरे चलेइ ज़ोंव हुन्ना तु साफ साफ गल लोरस केरने ते मसालां तेइतां कम नेहीं लोरो घिन्ने । 30 ते हुन्ना असैहीं बुझू की तीं सभ किछ पत्तोए ते तु केंचेरो गुलाम नेहीं की कोई तीं पूछे असां विश्वास केरतम की तु परमेशरी तग्रफां एवरोस । 31 यीशुए तैना जुवाब दितो हुन्ना ता तुसैहीं विश्वास कियोरोए । 32 पण ते मोको एजीरहोरोए बलके पुजोरोए की तुस सभ नेशतांअपने अपने घरे पुज्नेथ ते आंव इकेल्हो शारनोहीं पण फिरी भी आँव अकेल्हो नेहीं किजोकी मेरो बाजी मीसैहीं साथीए । 33 मी तुस्न एना ग्लाँ एल्हेरलेइ ज़ोइ की तुस मी पुड़ यकीना केरा तुस दुनियाई मां मसीबत ता उताताथ पण हिन्ती सैहीं कम केरा आंव दुनियाई मां आवतार एवरोई ।

यीशु एरी महायजकेरी प्रार्थना अपने लेई

17 ज़ैखन यीशुए एना सभ ग्लाँ ज़ोइ छैडी त तैनी उबरु अंब्रेरां तेकतांबाजी हुन्ना मोको एवरोओ की तु आमने मांठेरी मेहीमां बंदी केर ताके तेरु मांठु तेरी मेंमां बंदी केरे । 2 किजोकी तीं तैस सेभी मेत्र पुड़ अखतियार इही दुवा की एह मेरे दितोरोओ की तेह तैना सेभंन ज़ैना तीं तैस दितोरेना हमेशारी ज़ीन्दगी ते । 3 हमेशारी ज़ीन्दगी इओ की तैना सिरफ़ तीं सचै परमेशरे ज़ांन ते यीशु मांस्सी भी ज़ांन ज़ेओ तीं भेजोरोओ । 4 मीं तैना कम ज़ेना तीं मी दितेरु थु मुकेइतां धेरतली पुड़ तेरी मेंमां बंदी की । 5 ते हुनी एह बाजी मी अपने सामने अपनी मेंमाही सैहीं मेंमां ते ज़ेस मां की दुनियारे पेईदा भोने कैरां पेहिलो आंव तेरो साथी थु ।

अपने चेलां केरे लेई

6 मी तु तैना का बंदो कियो ज़ैना तीं दुनियाई मेरां चुनातां मी दितोरेना तैना तेरे थिये पण तीं मिजो दितोरेना ते तैनेइ तेरे बचनें पुड़ अम्ल भी कियोए । 7 हुनी तैना जान्तना की ज़ेना किछ तीं मी दितेरु तैना सभ तेरी तग्रफांहे । 8 एल्हेरलेइ ज़ै बिस्तार तीमी दितोरो थु मी तैना तगर पुझाव ते तैनेइ दिलेसैहीं मनो ते तैस गलारे बाकम भी भोइजे की आंव तेरे पासे एवरोहीं तेतेन्केरो विश्वास की आंव तीं भेजोरोहीं । 9 आंव तैना केरे लेई दुवा केरतान्ही आंव दुनियारे लेइ दुवा ना केरीं पण तेंकेरेलेइ ज़ैना तीं मी दितोरेना किजोकी तैना सभ तेरेना । 10 मेरु सभ किछ तेरुओ ते तेरु सभ किछ मेरुओ मेरी मेंमां तैना केरे ज़ोने बांदी भेवरीओ । 11 मी हुनी इस दुनियाई मां नेहीं रान्हु पण तैना ओजु इस दुनियाई मांन्हे ते आंव एह मेरे बाजी आंव तिन्केइओ एवरोहीं अपने तैस नावरी कुदरुती सैहीं ज़ेतीं मी दितोरी तैना स्महेलतां रख की तैना अक भोना ज़ेन्चरे आसां अकाम । 12 ज़ैखन आंव तैना सैहीं साथी थु मी तैना स्मेलतां रखे ते तैना तेरे दितोरे नाँवेरे ज़ोने सैहीं बचैइतां रखे तैना मेरां कोई ना मुवो सुवाए तैसेरे ज़ै मरनेरे लेइ पेईदा भेवरो थु ताके पाक बचैरु लिखेरु पुरु भोए । 13 हुन्ना आंव तीं केइओ एवरोहीं पण ज़ां तगर आंव इस दुनियाई मांहीं एना ग्लाँ ज़ोने लागोरोहीं ताके मेरी सारी खुशी तैना मेलहे । 14 मी तैना तेरु बचना पुजेवरुओ ते दुनियां तैना सैहीं दुशमनी रखी किजोकी ज़ेन्चरै आंव दुनियारो नेहीं तैना भी नेहीं । 15 मेरी दुवा एह नेहीं की तेह तैना दुनियाई मेरां न्हे पण एओकी तेह तैना शैताने कैरां बचैइतां रखे । 16 ज़ेन्चरै आंव दुनियारो नेहीं तैना भी इस दुनियारे नेहीं । 17 साचेरे ज़ोने सैहीं तैना पक्के केर किजोकी तेरु बाचना साचुए । 18 ज़ेन्चरै तीं आंव दुनियाई मां भेजोरोहीं तेंचरै मी भी तैना दुनियाई मां भेजोरेन्ह । 19 आंव अपना आप तैना केरेलेई हवाले केरताइ ताके तैना भी साचेरे ज़ोने सैहीं तैना पक्के भोना ।

सैभी विश्वैसी केरे लेई

20 मेरी दुवा सिरफ़ तेंनां करेलेइ नेहीं पण तैना करेलेइओ ज़ेन्नेहीं तेन्केरो बिस्तार शुन्तां मी पुड़ विश्वास केरल्हे । 21 कि तैना सभ अक भोना; ज़ेचौं तु बाजी मीं मां आस, ते आंव तीं मां आइ तैनाचे तैना ऐसना मां भोना, कि संसार विश्वास केरे कि तीं ए आंव भेजोरोइ । 22 ते तै महिमा ज़ै तीं मीं दितोरीए, कि ज़ेचरे अस अकम तैना भी अक भोना । 23 आंव तैना मां तु मीं मां कि तैना साफ भोइतां अक भोना, ते संसार ज़ांने कि तीं आंव भेजोरोइ, ते ज़ेन्चे तीं मीं सैहीं पयार रखो तैन्चे तैना सैहीं पयार रखो । 24 ओ धरमी बाजी, संसार ए आंव ना ज़ांनो, पर मीं तु ज़ांनो, ते तैनेइ भी ज़ांनु कि तीं आंव भेजोरोइ । 25 ओ धरमी बाजी, संसारे तु ना पिशानो, पर मीं तु पिशानो, ते तैनी भी इना ज़ांनु की तीं आंव भेजोरोइ । 26 ते मीं तेरु नाँ तैना शुनावं कि ज़ै प्रेम तीं मीं सैहीं थु, तै तैना मां राहव् ते आंव तैना मां रेई ।

यीशु ट्लावानो

(मत्ती 26: 47- 56; मरकुस 14: 43 - 50 लूका 22: 47- 53)

18 ज़ैखन यीशुए दुवा की ता तेह अपने चलना सैहीं साथी बेइर आव ते तैना सभ कद्ररुनेरी आबेदी पार लेंघतां पार एकी बागीमां चलैजे । 2 तैस टलुवाने बालो युहुदो तैस ठारारौं बाकम थु किजोकी तेह यीशु सैहीं साथी तैडी केही फेरेंड जेवरो थु । 3 ते बसा युहुदो बागीमां पुजो ते तैससैहीं साथी किछ रुमी फोवजी ते किछ ओक्कारे सिपाही भी थिये ज़ैना फ़िसी सरदार काहिना केरे भोंते भेजोरे थिये तैनेहीं अपने हथनमां मुसालां ते दिये ते सांद्रा साथी आनोरां थीयां । 4 यीशु सभ जानातो थु की तेस्सेहीं कुन कुन ग्लाँ भोनीन्हे तेल्हेरलेइ तेह बेइर आव ते पुछनें लगे तुस केस लोरेथ तोपने । 5 तैनेइ जुवाब दितो यीशु नेसरी यीशुए ज़ोंव तेह ता आंवहीं तैस टलुवाने बालो युहुदो मीं तैसैहीं साथी खड़खड़ो थु । 6 ज़ैखन यीशुए ज़ोंव की तेह आंवहीं ता तैना डेरतां पत्रां नाशे ते ताल्लमां खिरके । 7 एल्हेरलेइ तैनी फिरी पुछ की तुस केस लोरेथ तोपने । तैनेइ जुवाब दितो यीशु नेसरी । 8 यीशुए जुवाब दितो मीता ज़ोंव की तेह आंवैहहीं अगर तुस मी तोपथ ता मेरे

चेलनता गन्हें तेथ | 9 एना सैहीं एना जोनेरो एह मतलब थु की ते गल पूरी भोए जेतैनी जेवरी थी की जैना तीं मी दितोरे थिये तैना मेरां अक भी नेहीं ओरोरो | 10 शुंमौन पतग्रसे का अक तलवार थी तैनी तेह तलवार कडी ते सरदार कहिनेरे नोकरे पुड बाही ते तैसेरो तेहिना कना कटो | 11 यीशुए पतग्रसे हुक्म दितो अपनी तलवार मियानेमां रख कुन आंव तेह घुट ना पीं जै मेरे बाजी मीजो दितोरोओ |

हन्ना कानं यीशु

12 तैखन रुमी फोवजी ते तेन्केरे अफसर ते युहुदी सिपेहीयेहीं यीशु टलाव ते तैसेरे हथ बंधे | 13 ते पेहिलो हन्ना का न्हीयो जे कैफेरो शओरो थु तैस सालेरो सरदार कहिना थु | 14 तैनी युहुद्र सल्लहा दितोरी थी की सेरी कोमारेलेइ इना रोडु की अक मेनु मरो गाओ |

पतरसेरु इन्कार

(मत्ती 26 : 69 - 70 मरकुस 14 : 66 - 68 ; लूका 22 : 55 - 57)

15 शुंमौन पतरस ते अक होरो चेलो यीशु पत्पति जे एना चले सरदार कहिनेरे बाकम थिये एल्हेरलेइ तेह यीशु सैहीं साथी सरदार कहिनेरी हावेली मां जेव | 16 पण पतग्रसे बेइर दारे पुड रुकनु पेंव एह चेलो सरदार कहिनेरो बाकम थु वापस आव ते तैस कौन्शी सैहीं जै दारे पुड थी गल केरतां पतरस अंतग्र न्हीयो | 17 तैस कौनाशां दारे पुड पतग्रसे पुछू कुन तुभी तैसेरे चेलना मेरांस पतग्रसे जोंव नाहीं आंव नेहीं | 18 ठंडारे लेइ तैना स्पेहियेहीं आग बालोरी थी ते चुफुरतां खडसेक लोरे थिये देंने पतरस भी तैसेहीं साथी अग लोरो थु तपने |

महायाजक यीशु पूछ ताछ केरते

(मत्ती 26 : 59 - 66 ; मरकुस 14 : 55 - 64 ; लूका 22 : 66 - 71)

19 तैखन सरदार काहिना यिशुए चेलां केरे ता तल्लिमारे बारेमां पुछने लागे | 20 यीशुए जुवाब दितो मीता दुनियाई सैहीं खुल्ली गल्लां कियोरिना आंव ता रोज मद्रनामां ते ओक्कना मां तालीम देतो रहोरोहीं जेडी सारे युहुदी जामां भोतना मी छेपतां कधे किछ नेहीं जेवरु | 21 तु मी कीजो पुछतांजेनेहीं मेरी गल्लां शुनोरिना तैना पुछू तैना एपू जोतना की मी कुन जेवरुए | 22 यीशुएरे एना जोनें पुड स्पेहीना मेरां अक जै इलाखोरां थु तैनी थापुड बाहू ते जोंव की सरदार काहिने जुवाब तेनेरो एओ तरिकोओ | 23 यीशुए जुवाब दितो अगर मी किछ बुरु जेवरुए ता हेरा ते अगर रोडु जेवरुए ता थापुड कीजो बहतां | 24 तेसेरां बाद हान्ने यीशुएरे हथ बन्धेइतां सरदार काहिना कैफे केझो भेजो |

पतरस दुबारां इन्कार केरते

(मत्ती 26 : 71 - 75 ; मरकुस 14 : 69 - 72 ; लूका 22 : 58 - 62)

25 जैखन शुंमौन पतरस खडखडो आग लोरो थु तपने ता केंचे तैस पुछू कुन तुभी तैसेरे चेलना मेरांस पतग्रसे इनाकार केरतां जोंव नाहीं आंव नेहीं 26 सरदार काहिनेरे स्पेहीना मेरां अक जै तैस नोकरेरो रिशतेदार थु जेसरो कना पतग्रसे तलवारी सैहीं कटोरो थु पतग्रसे पुछने लागे कुन मी तु तेस्सेहीं साथी बागीमां नेहीं लाहोरो | 27 पतग्रसे फिरी त्रा जोंव ते तैखन कुकडे भी बांक दिती |

पिलातुसेरे सामने यीशु

(मत्ती 27 : 1, 2, 11 - 14, मरकुस 15 : 1 - 5 ; लूका 23 : 1-5)

28 तेनेंइ यीशु झैझां कैफे कैरां न्हेइतां रुमी गुन्नारें मेल्ले मेझो न्हीयो युहुदी मओले मां अंतग्र ना जे किजोकी तैना डरते थिये की आसां भिटे भोइंगंनमे ते ईद फसहीएरी रौट्टी ना खेईयोए | 29 तेल्हेरलेइ पितलास तैना का बेइर आव ते जोनेंलगाे तुस इस मेनु पुड कुन अल्लाम लाताथ | 30 तेनेंहीं जुवाब दितो एह मुर्जमें अगर एह मुर्जम ना भोथो ता आसैंइ एह तेरे हवाले ना थु केरनों | 31 पितलास तैना जोनेंलगाे तुस एस न्हेथ ते अपने धारमेरे हिसाबे सैहीं फेस्लो केरा युहुदी जोनें लागे आसना ता केंची भी मारनेरी अजाजत नेहीं |

32 एना एल्हेरलेइ भोंव की जैना गल्लां यीशुए जेवरी थी की तेह केरही मोवतां मरेल्हो पुरी भोंना |

33 तैखन पितलास मेल्लेमांझो चलौ जेव ते तैनी यीशु कुजेइतां तैस पुछू कुन तु युहुदी केरो बादशाहास | 34 यीशुए जुवाब दितो तु एह गाल अपनी भोती जाने लोरोस की होरेंइ मेरे बारेमां तीसैहीं जेवरीए | 35 पितलासे जुवाब दितो कुन आंव कोई युहुदी आंहीं तेरी कोमारे ते सरदार काहिनेंइ तु मेरे हवाले कीयोरोस तु जो तीं कुन कियेरुओ | 36 यीशुए जोंव मेरी बादशाही इस दुनियारी नेहीं अगर दुनियारी भोथी ता मेरे चले जंग केरथे ते मी युहुदी केरे हथे ट्लेयोने ना तेथे पण ओजु मेरी बादशाही इठेरी नेहीं | 37 पितलासे जोंव ता कुन तु बादशास यीशुए जुवाब दितो एना ता तेरु जोनुहें की आंव बादशाही असल्ही मां आंव एल्हेरलेइ पेईदा भेवरोहीं ते एस मत्लाबे सैहीं दुनियाई मां एवरोहीं की साचैरी गुवाही देइ जै साचो दोस्त भोते तेह मेरी गल शुनाते | 38 पिलातुसे पुछू साच कुने |

मौतरे सजाहरो हुक्म

(मत्ती 27 : 15 - 31 ; मरकुस 15 : 6 - 20 ; लूका 23 : 13 - 25)

एना जोंते ते फिरी युहुदना का जेव ते जोनें लागे आंव ता एस मेनु मुरजम ना सेमझीं | 39 पण तुशै रुवाजेरां ओरतां आंव इदारे मोके पुड अककेदि हथरां छडतां कुन तुस चाताथ की आंव तुशैलेइ युहुदी केरे बादशाओ हथरां छैडीं | 40 तैना फिरि चीडां लागे मारने नेहीं नेहीं तेह नान्हां इशेलेइ बराबे हथरां छाडा बराबा अक डेक थु |

19

जैखन पिलातुसे यीशु नैहितां बैतेइ बहैही | 2 ते फोव्जारे स्पेहियेइ कन्टां कियुं ताज बनेइतां यीशुएरे दोगे पुड रखु ते तैस लाल कुरतो लुवाव | 3 तैना बार बार तैसेरे सामने ग्हेते थिये ते जोते थिये एह युहुदी केरे बादशाह सलामे ते तसेरे तुतरे पुड थापुड बहते थिये | 4 पितलास एकी फेरे फिरि आव ते युहुदना सैहीं जोनेंलगाे हेरा आंव तैस तुस्न कह बेइर आणतां तुस्न पत्तो लगे की आंव कौंची भी गल्ली मां एस जुर्म ना लेइ सेखीं | 5 जैखन यीशु कन्टां कियुं ताज दोगे पुड रेखतां ते लाल कुरतो लेइतां बेइर आव ता पिलातुसे युहुदना जो जोंव इही ओ तओ मेनु | 6 सरदार काहिना ता तैसेरे सिपाही तैस लोहितां चिंडां मरने लगे एस स्लेब तेथ एस स्लेब तेथ पण पिलातुसे जुवाब दितो तुस्हे एस न्हेथ ते स्लेब तेथ जेडी तगर आंव जानातां आंव एस जुर्म लनेरो कोई बहनों ना बनेइ सेखीं | 7 युहुदी सोचने लगे की असां पक्के म्हेजबी आहम ते एना इशे म्हेजबे कैरां बेइर बुझौते किजोकी तैनी जेवरुए की आंव परमेशरेरु मांटतु अंहि | 8 जैखन पिलातुसे एना शुनू ता ते मन्ना डरने लागे ते वापस म्हेल्हे मजो चालौजेव तैडी तैनी यीशु पूछू तु कोठरोस पण यीशुए कोई जुवाब ना दितो | 9 पिलातुसे जोंव तु जोस की त्रा | 10 कुन तीं पत्तो नेहीं की मी इख्तियार नाहीं की आंव तीं छैडी की स्लेबी पुड टैगी देइ | 11 यीशुए जुवाब दितो अगर एह अख्तियार तीं बंहं ना भोथो मेलोरो ता तेरो कोई अख्तियार मी पुड ना थु भोनों पण जैनी मेने आंव तेरे हवाले कियोरोइ ते हछे पापेरो हकदार भेवरोए |

12 तेसेरां बाद पिलातुसे यीशु हथरां छाडनारी कोशिश की पण युहुदी लोक चिंडां मेरतां जोना लगे की अगर तु एस मेनु हथरां छाडल्हो ता तु केसरेरो हकदार नेहीं अगर कोई अपने बादशा बनेरु एलाना केरते ता तेह केसरेरो खलाफ बुझौते | 13 जैखन पिलातुसे एना शुनू ता तैनी यीशु बेइर कुजेइत्ता अपने अदालतारे तख्ते पुड बिशो जै अक उच्ची तैरी थु जेसजो आरामी बोली महं [गिब्ता] ज़ोल्न | 14 ईद फसेरी तियारी ते हफ्तेरी पेहिली दिहाडी थी ते इलौवझ भोनें बाली थी पिलातुसे युहुद्र जो जोंव इही राहु तुशो बादशा | 15 पण तैना चीडां लगे मरने एस इठा दूर न्हेथ ते हुक्म तेथ की एस स्लेब देंम पिलातुसे जोंव कुन आंव तैस जै तुशो बादशाओ तैस मेरीं सरदार कहिनेंइ जोंव केसरेरां अलावा ईशो कोई बादशाहा नाहीं | 16 एसेरां बाद पिलातुसे यीशु तेंकेरे हवाले कियो ताके तैना तैस स्लेब देना एलओरलेइ तैना तैस अपने कब्जे मां रेखतां तैठां चालै जे |

क्रुसे पुड गहनू

(मत्ती 27 : 32 - 44 ; मरकुस 15 : 21 - 32 ; लूका 23 : 26 - 43)

17 यीशु अपनी स्लेब छुड़ता खोपडी जो चालै जेस्जो इब्रेनी मां गुल्कुता जोतना । 18 तैडी तेनेई यीशु ते तेस्सेहीं साथी दुई डेकुन भी स्लेब दिति अक यीशुएरे तेहिने पासे होरो बांए पासे ते यीशु मुझाटे । 19 पिलातुसे अक पखडी लिखतां स्लेबी पुड लाई तैस पुड लिखेरु थुं [यीशु नासरी युहुदी केरो बादशहा] । 20 कही युहुदेंड तैस पेखडी पुड पेडतां किजोकी जेस जगाई यीशु स्लेबी पुड टांगोरो थु ते जगा शहरेरे नेडे थी ते पेखडी पुड लिखेरु इब्रानी लातिनी ते यूनानी बोली मां लिखेरु थुं । 21 युहुदी केरे सरदार कहिनेई पिलातुसे कह दरखुवास की की युहुदी केरो बादशहा ना लिखा किजोकी त्सेरु जोनु थुं की आंव युहुदी केरो बादशहाहीं । 22 पिलातुसे जुवाब दितो मी जैना लिखि छाडू तैना लिखि छाडू ।

23 जैखन स्पेहियेई यीशु स्लेब दिति ता तेनेई यीशुएरे लीगडा बांटां ते तैना केरे चैवरओसे किये ताके सेभन अक अक ओसो मेल्ले सिर्फ तैसेरो कुर्तो बाकी राहु जेह बहां ते बुना तागर आके थु । 24 तैना एपूमांमेंहीं जोने लगे की एसेरे टोट केरनेरे बजाओ शर्त रखम जैसेरे नोंवें पुड परची निसेल्ही लीगडां तैस भोलां एना एलओरलेइ भोंव की जैना पाक बचनै मां लिखेरु थुं तैना पुरु भोए की तेनेई मेरां लीगडां बांटां ते मेरे कुरतेरे लेइ लाटरी रखी ते स्पेहियेई दैने कीं ।

25 यीशुएरी स्लेबी का तैसेरी अमां ता तेसारी बेहिना मरियम जै क्लोपासेरी कोंन्श थी मरियम मगदिनी खाडखडी थी । 26 जैखन यीशुएरे अपनी अमां ते अक अपनो चेलो एपू क नेडे खाडखडो लाहु ता तैनी अपनी अमां सैहीं जोंव एह अमां अजेरां बाद एना तेरु मटडुए । 27 ते कने चले जो जोंव अजेरां बाद इही तेरी अमां तैनी चले तेखने तेह अपने घरे नेही ।

यीशु एरी मौत

(मत्ती 27 : 45 - 56 ; मरकुस 15 : 33 - 41 ; लूका 23 : 44 - 49)

28 जैखन यीशुएरे बुझुकी हुनी सेरी गल्लौ पूरी भोजेइ की एल्हेरलेइ की जेचरेपाक बचनै मां लिखेरु थुं तैना पुरु भोंव तैनी जोंव मी टलीश लगोरीए । 29 तैडी अक घडो शरापे सैहीं भेरतां रखोरो थु लोटो तैसमां डोबतां डांगे सैहीं लेइतां यीशुएरे ऐशही सैहीं हुराव । 30 यीशुएरे तैना पिते जोंव की पुरु भोंव ते करोडी टलोइतां अपने प्राण दिते ।

भालो डोबनो

31 एह ईद फसेरी तियेरारी दिहाडी थी होरसां सब्तेरी दिहाडी थी युहुदी ना थिये चाते की सब्तेरी दिहैडी लाश सलेबे पुड टंगोरी राहु एल्हेरलेइ तेनेइ पिलातुसे का गेहितां जोंव की मुर्जमेरी जन्घां टलोइतां तैसेरी लाश उनाडी उसालम । 32 तताल्ही सिपाही आए तैनेइ पैहिले तैना दुई मॅनाहू केरी जन्घां टलोइडी जैना यीशु सैहीं साथी स्लेबी पुड चाडौरै थिये । 33 पण जैखन यीशुएरी बारी अई ता तैनेइ ओरु की ते पैहिले मेरी जेवरोए तेल्हेरलेइ तैनेइ तैसेरी जन्घां ना टलोइडी । 34 पण स्पेहिनामेरां एक्के अपनो मैक्कु एन्तां यीशुएरे टलुखी मां बाही ते तैसेरी तेलोडी मां बज्जी ते लेहु ता पनी बग्ने लगु । 35 जै मेनु एस मोके पुड तैडी थु शाहदत देते की तैसेरी गवाही सच्ची थी तेह जान्तो थु की ते सच्च लोरो जोने की तुस्भी विश्वास केर्थ । 36 एना सेरी गल्लौ एल्हेरलेइ भुई की पाक बचनै मां लिखेरु पुरु भोंव की तैसेरी कोई हडी ना टलुटैलही । 37 पाक बचनै मां एकी होरी ठेरी लिखेरुए की ते तैस जैनी ते मैक्कु सैहीं काटोरोए तैस तकेल्हो ।

यीशु दबो

(मत्ती 27 : 57 - 61 ; मरकुस 15 : 42 - 47 ; लूका 23 : 50 - 56)

38 एना गल्लौ केरे पत्ती अक मेनु युसाफ नोंवेरो जै अर्मितीयरो रहने बालो थु पिलातुसे का जेव ते तैनी यीशुएरे लाश न्हेंनेरलेइ अजाजत मागी एह मेनु युहुदी केरे डारे सैहीं छैपुं यीशुएरो चेलो थु तेह पिलातुसे कैरां अजाजत घिनातां आव ते यीशुएरे लाश नेहिजेव । 39 नेकोतेम्स भी आव जैनी अक

थोडे चौरै पेहिले एकी रती यीशु सैहीं मुलाकात कियोरी थी तैनी एपुका बडे माघे मुसाले ते मुशकि बेली चिजां साथी एन्होरी थी जैना छुंने मां कोई पंजह सेर येनी दाश बेटो थिये । 40 एना दुइए ज्ञान्हेंड यीशुएरी लाश नेहीतां तैस मुशकि मुसाले लेइतां एकी उनाली चादरी मां प्लेटतां जेन्चरै युहुदी दाबते थिये । 41 जेडी यीशु मारो थु तैडी बागी मां अक नोविं कबर थी जेस मां पेहिली कोई लाश ना थी । 42 किजोकी एह युहुदी केरी सब्तेरी तियेरारी दिहाडी थी ते कबर भी नेडे थी तेनेहिं यीशु तैडी जेरे रखे ।

खाली कबर

(मत्ती 28 : 1 - 8 ; मरकुस 16 : 1 - 8 ; लूका 24 : 1 - 12)

20 हफतेरी पेहिली दिहैडी झैझां ओजु अंधारु थुं मरियम मगदिनी कबरी पुड अई तेसां ओरु की कबरी पुडरां घोड भी खडो कियोरोए । 2 ते दोवडती शुमोन पतग्रसे ते होरी चेलना का पुजी जै यीशुए सुखातो थु जोने लगी तेनेई यीशु कबरी मेरां केढतां न्हियोरो ते पत्तो नाहीं तेह कोडी रखोरोए । 3 एना शुन्तां पतरस ता आक होरो चेलो कबरारे पासे चालै । 4 दुइये तेवडतां चालौरै थिये पण ते दुइयां चेलो पतग्रसे कैरां आगरां निसि जेव ते तैस कैरां पेहिलो कबरी पुड पुजो । 5 तैनी लिकतां तकु ते उनालां लीगडां लहं ते अंतग्र ना जेव । 6 तेखने पतरस भी म्सी तैडी पुजो ते सीधो कबरी मां जेव तैनी ओरु की तैडी उनालां लीगडां तैडी थियां । 7 ते काफनेरो तेह रुमाल भी जै यीशुएरे दोगे सैहीं पलेटोरो थु उनाले लीगडना मां तह बनेवरो एकी ठेरी थु । 8 तैखन ते होरो चेलो भी जै कबरी पुड पेहिलो पुजोरो थु अंतग्र जेव तैस भी लेहितां यकीना भोंव । 9 किजोकी तैनेइ पाक बचनैरी एह गाल ना थी समझौरै जैसेरे बारे मां की यीशुएरे मुडदना मेरां जिन्तु भोनू जरुरी थुं । 10 तैखन एना चले वापस घर जो चलै जे ।

मरियम मगदलीनी पुड बांदू भोनू

(मत्ती 28 : 9 - 10 ; मरकुस 16 : 9 - 11)

11 पण मरियम काबरी कैरां बेइर लेरां दैती थी लेरां दैती दैती तेसां लिकतां कबरी मेझो तकु । 12 ता तैडी तेसां दुई फरिशते लाओ जैना छीतां लीगडां थियां जेडी यीशुएरी लाश रखोरी थी तैडी अक शरेंइते ते होरो परेंइते बिशोरे लाओ । 13 तेनेहीं मरियामी पूछु एह कोनाशे तु कीजो लोरिस लेरां दैने मरियमा जोंव मेरो परमेशर छपेवरोहै ते पत्तो नेहीं कोडी रखोरोए । 14 एना जाँते तेह पतरांहुँ बेदल्ही ता तैडी यीशु खडखडो लाहु पण तैस पशाना ना अई की एह यिथुओ । 15 यीशुएरे जोंव एह कोनाशे तु कीजो लेरां दैने लोरिस तु केस तोपने लोरिस मरियमा समझुकी कोई बागवाने तेसां जोंव की ओ मियां अगर तीं न्हियोरोए ता जो की तीं कोडी रखोरोए ते आंव तैस न्हेंई । 16 यीशुएरे तैस जोंव मरियम तैसेरे पासे फिरि ते इब्रेनी मां जोंव [रबुनी] जेसेरो मतलब एह मेरे गुरु । 17 यीशुएरे जोंव मिसैहीं ना हुरां किजोकी आंव बाजी का बाह ओजु नेहीं जेवरो ते मेरे दलान गेहितां जो की आंव अपने बाजी ते तुशै बाजी ते अपने परमेशर ते तुशै परमेशरे का बाह चालौरैहीं । 18 मरियम मागदिनी तैठां चली जेई ते चेलना का गैहीतां तैन पत्तो दितो की मीं परमेशर लाहोरोए ते तैनी मी सैहीं एना गल्लौ की ।

चेलन पुड बांदू भोनू

(मत्ती 28 : 16 - 20 ; मरकुस 16 : 14 - 18 ; लूका 24 : 36 - 49)

19 पत्तेरी पेहिली दिहैडी डलौवझारै मोके सारे चले एकी ठेहेरी थिये ते युहुदी केरे डरे सैहीं दार बन्द केरतां बिशोरे थिये यीशु आव ते तैन्केरे मुझाटेखडो भोईतां जोत्रे लगे तुसन जो मेरु सलामे । 20 एना जोइतां तैनी अपने हथ ते अपनी पाखड तैना ओराई चलेहीं एना लेहितां बडी खुशी बनाई । 21 यीशुएरे फिरी जोंव तुस्न जो सलामे जेन्चरै बाजी आंव भेजोरोहीं . तेंचरे आंव भी तुस्न भी भेजोरेथ । 22 एना जोइतां तैनी तैना जेई फुक दिति ते जोंव पाक रुहु मेल्ले । 23 अगर तुस केस्केरे पाप माफ केरेल्हे ता तुशै भी माफ भोल्हे अगर माफ ना केरेल्हे ता तुशै भी माफ नेहीं भोने ।

थोमा पुड़ बांदू भोंनू

24 जैखन यीशु अपने चलना का बांदो भोव ता तोमां जेसजो तोंम ज़ोते थिये ते तेह ज़े तैना बारहना मेरां थु तैखन तैड़ी ना थु । 25 पण होरी चलेहीं तैस ज़ेवरु थु की आसैहीं यीशु लाहोरोए पण तोमां लगे ज़ोने की ज़ां तागर आंव मेखां कैरां गतां तसेरे हथना ना ओरीं ते तैना गतना मां अन्गोली छैडतां ते अपने हथे सैहीं तसेरी पाखड ना हेरीं तां तागर यकीना ना केरीं ।

26 एकी हबतेरां बाद यीशुएरे चले एकी बार फिर तेस्से ठैरी बिशोरे थिये ते तोमां भी तेडही थु ते दारां भी बंद थियां ते यीशुएइतां तैना मुझाटे खडो भोव ते तैना जो ज़ोनें लगे तुस्न जो सलामे । 27 फिर तैनी तोमां जो ज़ोंव अपनी अंग्लोई आन्ह ते मेरो हथ ओर ते आमने हथे सैहीं मेरी दालोडी ओर शक ना कैरां मीपुड भरोसो रख । 28 तोमें तेस्जो ज़ोंव एह मेरे परमेशर एह मेरे परमेशर । 29 यीशुएं तैस जो ज़ोंव तीं आंव लेहितां तीं मीं पुड विश्वास कियो मुबारक तेन्हना ज़ेनेहीं आंव लाहोरो नेहीं पण फिरिभी विश्वास कियो ।

इस कताबरो मकसद

30 यीशुएं अपने चेलां केरे सामने बड़ां अजीब कमां कीयोरां थियां जैना इस किताबी मां नेहीं लिखोरां । 31 पण जैना लिखोराना तेनाकेरो एह मतलाबे की तुस विश्वास केरा की यीशु ही मस्सही ओ येनी परमेशरेरु मांटु ते तैस पुड विश्वास केरतां तैसेरे नोंव सैहीं जिंदगी हासल केरा ।

तिबिरियासरे झीलरे बन्ने चलन पुड़ बांदू भोंनू

21 बातेमां यीशुए एपू एकी फेरे फिरि अपने चलना का त्बियास झिलारे बन्ने एन्चरै बांदो भोव । 2 की जैखन शुंमौन पतरस तोमां [तोआम]नातनएल ज़े कांनार्ये गलीलेरो थु ते जेबदेरु मड्डु ते होरे चले भी तैड़ी थिये । 3 ता शुंमौन पतरस तैनसैहीं ज़ोने लगे आंव मैछली ट्लानै गातां तैनेइं ज़ोंव आस्भी तीं साथी चलतम तैना तैठां निसे ते किशती मां चैडतां जे पण तैस राती तैना किछ ना मैलहु ।

4 झैझां यीशु बन्ने पुड़ एइतां खडो भोव पण चलेइं ना पशानों की एह यीशुओ । 5 यीशुए तेन्जेई हक तेइतां ज़ोंव दोस्ताव कुन किछ हथे लगे तैनेइं जुवाब दितो नेहीं । 6 यीशुए ज़ोंव ज़ाल किशतारे देहिने पासे छडथ ता पेक्की मैछली हथे लेग्री आन्ह कीजोकी तैनेइं ज़ाल छाडु तेमेछली एतरी ज़ाले मां लेगी की ज़ाल खिंचोने ना लगे । 7 तैखन यीशुएरे सुखाने बाले चले पतरस सैहीं ज़ोंव एह ता परमेशरे जेरहू शुंमौन पतरस एना शुन्नु की एह परमेशरे तैनी अपनो चोगो लव ज़े तैनी खोलतां रखोरो थियो पेनी माजो छाल मारी । 8 होरे चले जैना किशती मां थिये ज़ाल जैना मेछलेइं सैहीं भेरतां थु तैनेइं खिंचतां अहंनहूँ किजोकी तैना पंजा फुटना कैरां दूर ना थुं ।

9 जैखन तैना बन्ने पुड़ ओसे ता ओरताना की अंगी पुड़ मैछली रेखोरीना ते डलेखी रौट्टी भी आन्ह । 10 यीशुए तैनसैहीं ज़ोंव जैना मैछली तुसैहीं ट्लैतौरीना तैना मेरां किछ इरहां आन्ह । 11 शुंमौन पतरस किशती मां चडो ते ज़ाल डलेखी पुड़ खिंचतां आन्हूं जैसमां की अक शोव्व तरुन्जा मैछली

लेगोरी थी ते फिरिभी ज़ाल नेहीं छींदोरु । 12 यीशुए तैनसैहीं ज़ोंव एजा किछ खाथ पण चलना मेरां केंची हिमत ना आई की पूछमकी तु कोंव्स पण तैना ज़ान्ते थिये की एह परमेशरओ । 13 यीशुए एइतां रौट्टी ट्लाली ते तैना भी दिती ते मैछली भी दिती । 14 यीशु मुडदना मेरां ज़ीन्तो भोनेरां पत्ती ट्लैइयां फेरे फिरि अपने चलना का बांदो भोई जेव ।

यीशु ते पतरस

15 जैखन तैनेइं रौट्टी खाई ता यीशुए शुंमौन पतरसे सैहीं ज़ोंव शुंमौन युहन्नेरा मांठा कुन तीं आंव इना सेभन कैरां जाते ट्लारौहीं तैनी ज़ोंव हां परमेशर तु ता मीं ज़ान्तास की मीं तु केतरो चै इना ट्लारौस यीशुए तैना सैहीं ज़ोंव मेरे गबना भाव तेथ । 16 यीशुए फिरि तैनसैहीं ज़ोंव शुंमौन युहन्नेरा मांठा कुन तीं आंव ससेभन कैरां जाते ट्लारौहीं तैनी ज़ोंव हां परमेशर तु ता मीं ज़ान्तास की मीं तु केतरो ट्लारौस यीशुए तैना सैहीं ज़ोंव मेरे गबना सम्हाला । 17 तैनी ट्लैयां फेरे फिरि पूछ शुंमौन युहन्नेरा मांठा कुन तीं आंव इना सेभन कैरां जाते ट्लारौहीं ता पतरस दुःख भोइजेव किजोकी यीशुए तैस ट्लैई बार पूछैरु थु मांठा कुन तीं आंव ससेभन कैरां जाते ट्लारौहीं तैनी ज़ोंव हां परमेशर तु ता मीं ज़ान्तास की मीं तु केतरो ट्लारौस यीशुए तेसैहीं ज़ोंव मेरी भेडां चारा । 18 आंव तीं सैहीं सन्ने ज़ोतां की जैखन तु नोजुवांन थु ता जेडी चहतो थु ता तैड़ी गहतो थु पण जेईस तु बुढो भोल्हो ता अपनो हथ होरीकैरां ट्लवाल्लो ते होरो तीं लाखेरां ट्लैइतां जेडी तु गंनहूँ भी ना सुखालो ता तीं तैड़ी छुईतां पुजहलो । 19 यीशुए एह गल जोइतां इशारो कीयो की पतरस कोसकिस्मेरी मोवतां मेरतां परमेशरी मेमां बंदी केरल्हो तैखन यीशुए पतरसे सैहीं ज़ोंव मीं पत्ती चल ।

यीशु ते तैसेरो ट्लारो चेलो

20 पतरसे फिरतां तकु की यीशु सुखाने बालो चेलो तैस पत्पती चलौरीओ एह तेह चेलो थु जैनी डलाई खानेरे मोके यीशुएरे पासे लीकतां पुछैरु थु एह परमेशर तेह कोवने जेह तीं ट्लवाल्लो । 21 पतरसे तैसेरे पासे तेकतां यीशुए पूछ एह परमेशर एस चलेरु कुन भोलू । 22 यीशुए जुवाब दितो अगर आंव चैहीं की अगर मेरे वापस एजने तगर ज़ीन्तो राहु ता एस मां तीं कुन तु मीं पत्पती चलेइं । 23 एचरे ट्लानं मां एह गल सेभिए फेली जेई की एह चेलो ना मरेल्हो पण यीशुए एना ना थुं जेवरु की तेह ना मरेल्हो पण एना जेवरु थुं अगर आंव चैहीं की अगर मेरे वापस एजने तगर ज़ीन्तो राहु ता एस मां तीं कुन ।

अखरी हिसो

24 इओ तेह चेलो ओ ज़े इना गल्लौं केरी गुवाही देते ते जैनी ऐना लिखोरी भी आन्ह असां ज़ान्तम की तैसेरी गुवाही सावीइए ।

25 यीशुए होरां भी बड़ां कम्मां कीयोरां थीयां अगर सेभी केरे बारेमां लिखनु भोथु ता आंव समझतां की तैना किताबां अज़ भोथी तैन्केरे लेइ इस दुनीयाइ मां ठार ना थी भोनी ।

प्रेरितां

तारुफ

1 जनाब थिफुस साहब मीं अपनी किताबी मां तैना सैरी गल्लां लिखोरिन, जैना यीशुएरे जिरये सैहीं अम्ले मां एवरी थी, ते जैन्केरी तै तालीम भी देतो राहु। 2 तैस दिहैडी तगर जैईस तै उबरो असमाने मैझो जेव, पण तैस कैरां पैहीले तैनी अपने चलन पाबित्र आत्माइं सैहीं किछ हादेइत भी दितोरी थी। 3 दुःख झैलनेरां बाद तैनी अपने जिंते भोनेरां काही स्बुतां भी असंन तगर पूजां, ते चैल्ही दिहाड़न तगर तैन लैहियोतो राहु, ते परमेशरी बादशैहीयरी गल्लां शुंनातो राहु। 4 एक्की फेरे जैखन तै तैन सैहीं साथी रौट्टी खाने लोरो थु, ता तैनी तैन ठाकेरु थुं, की तुस युरोशल्मे मैरां बेइर ना गैहियथ ते मेरे बाजी केरो तै वेहिदो पुरो भोनेरो इतज्जर केरथ, जैसेरे बारे मां तुसेइं मीं कैरां शुंनेरु भी आओ। 5 ते एल्हेरलेइ की तुसंन थोडे दिहैडना पत्ती पाबित्र आत्मांरो बसीसमों मैल्हेलो, जाता युहन्ना पैनी सैहीं बसीसमों देतो थु।

यीशु एरु सुवर्ग ए गहनू

6 जताल्ही तैना एक्की ठैरी अकोठे भुए, ता तैनेइं तैस पुछु, औ परमेशर कुन तु अज फिरी इझाइएले तैसेरी बादशाही देंने बालोस। 7 तैनी तैन सैहीं जौव, ऐना मोकां केरो ता ऐना कम्मां केरो पक्को पत्तो ते अख्तीयार सिर्फ इशे असमानी बोवे, ते एन सिर्फ तै जानंते तुशु कंम नेहीं। 8 पण पाबित्र आत्मां जैखन तुसन पुड़ उतरेल्ही ता तुसन जौर बाधेल्हो, ते युरोशल्मे ते सारे युहुदिये ते सामरिये मां बल्के धेरतारे कुने तगर मेरे शाहादत भोल्हे। 9 एना गल्लां जौनेरां पत्ती तै तैन केरे सामने औरते औरते उब्रो असमाने मैझो जेव ते बिदलारी मां छैपी जेव। 10 जैखन तैना चले यीशु असमाने मैझो गहतो तकने लोरे थिये, ता हेरा दुई मडद जैन छीतां लिगडां लगेरां थियां तैन का एइतां खेडोहे। 11 ते जौने लगे, की औ गलीली मैनाव तुस खडखडे आम्ब्रेरे पासे कुन तकने लोरेथ? एह यीशु जैचरे तुशे सामने आम्ब्रे मैझो चलो जेव, तैचरे फिरी एजेल्हो जैचरे तुससेइं लोकेइं आम्ब्रे मैझो गहतो लाहोरोए तैचरे फिरी एइतो लाहेले।

मत्तियाहे यहूदारो रुतबो मैल्लते

12 जैखन तैना जैतुंन पहाडे पुडेरं युरोशल्मे मां आए, ता एन पहाड युरोशल्मे कैरां कोई आधौ मील दुर थुं। 13 शाहरे मां एइतां तैना तैस ठैरी जे, जैडी पतरस युहन्ना याकुब आंद्रियास फिलपुस तौमा ब्रत्माइ मत्ती हैल्फेरु मड्डु याकुब शुमौन जैलातस ते यकुबेरु मड्डु युहुदा रहते थिये। 14 ऐना सभ मडद ते कौन्शां यैनी यीशुएरी आम्मां ते तैसेरे द्वांन सैहीं साथी अक दिल भोइतां प्राथनाइ मां मस्त रहते थिये।

15 तैत्रे दिहाड़न मां पतरस तैन द्वांन केरी जमाती मां जैनकेरी तैधात कोई अक शौव बिही थी, पतरस खडो भोइतां जौने लगे। 16 मेरे द्वांन पाक बच्नेरी तै गल जै पाक रुहां दावदेरी जबांन पैहीले जेवरी थी, पुरी भोनी जरुरी थी, तै गल युहुदेरे बारे मां जेवरी थी, जैनी यीशुएरे ट्लुवाने बालां केरी मद्दत कियोरी थी। 17 तै ईशो अक खास सेवा केरने बालो थु, तै ईशे मैन्ह मां तैसेरो शुमार भोतो थु। 18 तैनी अपनी हेरांमेरी कमेंई सैहीं अक ऊडार धिनेरु थुं जैडी तै दोगेरे भारे खिरकोरो थु, ते तैसेरु पैट फैटतां तैसेरी एटलोडी बेइर निसोरी थी। 19 युरोशल्मेरे रहने बालन सैरन एह पत्तो लागोरो थु, एडी तगर की तैनेइं अपनी जबांन तैस उडारेरु नोव हेक्कदांमां रखेरु थुं, तैसेरो मत्लब भोव, खुंनेरु उडार। 20 किजोकी भजना केरी कताबी मां लिखेरुए की,

तैसेरु घर उजडे ते तैस्मां कोई बस्ने बालो ना भोए, ते तैसेरी ठैरी कोई होरो एजे। 21 एल्हेरलेइ एन जरुरीए की यीशुएरु असंन सैहीं साथी एजने गहंनेरे मोके तगर। 22 यैनी युहन्नेरे बसीसमें कैरां लेइतां असंन कैरां उबरे गहंने तगर जैना लोक बराबर असंन सैहीं साथी थिये, तैन मैरां अक मैन्हुं चुनो गहे, जै असंन सैहीं साथी तैसेरे जिंते भोनेरो शाहादत भोए। 23 एल्हेरलेइ तैनेइं दुईये जने नामजद किये, अक युसफ जैसजो ब्रस्बा जोते थिये, जैसरो (खताब) युसीसे, ते दुईयव मत्तिया थु। 24 तै एन जोइतां दुवा की औ परमेशर तु सैभी केरे दिले जानतां ते असंन हेरा की इन दिहाड़न मां तीं कौन जैरो चुंनोरोए। 25 की तै एस कमेरे बारे मां बराबर जान्कहर भोए, जै युहुदिये कैरां लेइतां इडी तगर पुजोरो भोए, जैसेरो तै हकदार थु। 26 जैनेइं तैसेरे बारे मां शर्त रखेरु थुं, जैन मत्तियारे नोव पुड़ निसेरु थुं, एल्हेरलेइ तै बहरे चलन सैहीं साथी शुमार भोतो थु।

पवित्र आत्मारु एजनु

2 जैईस ईद पैतकुस्तेरी दिहाडी अई, ता तैना सभ एक्की ठैरी अकोठे थिये। 2 अचांनक अम्ब्रेरां आवाज आई, जैचरे बडो बात चलने लोगोरो थु, ते तैस्सैहीं सारु घर घुमने लगे जैडी तैना बिशोरे थिये। 3 ते तैनेइं अगारी लप्परी जैरही जीभां लैही, जैना तैन मैरां आलाग आलाग भोइतां तैन सैभन पुड़ एइतां टिकी। 4 ते तैना सभ पाबित्र आत्माइं सैहीं भरपुर भुए, ते आत्मारु जौने सैहीं तैना आलाग आलाग बोली केरने लगे। 5 तैईस बडे परमेशर मन्ने बाले युहुदी जैना दुनियारी हर कौमीं मैरां थिये, तैईस युरोशल्मे मां थिये। 6 जैखन तैनेइं एह आवाज शुंनी ता बडे लोक जम्हां भोए, ते सभ लोक बडे हेरान रेही जे किजोकी सारे अपनी अपनी बोली मां गल्लां केरते थुने। 7 ते सभ हेरान परेशान भोइतां पुछने लगे, की ऐना बोली बोलने बाले सारे गलीलीन? 8 फिरी एन कैचरे भोई सखते की असंन मैरां हर कोई एनकेरे जबांन अपने अपने मुलखेरी बोली शुंने लोरेम। 9 असां ता पारथिया मादीया एलांम ते मैसुपोतामियां युहुदिया कुपदकिये पैतुस ते आसियारे रहने बालेम। 10 फरोगिया ते पैम्फोलियारे रहने बालेन आस लीबियारे रहने बालेम, जैन कुरीनेरे नेडे, असंन मां किछ सिर्फ मुशाफ्रन जैना रुम शहरे मैरां एवरन, ते असंन मां किछ युहुदी भी आंन दे तैना गैर कौमंन बाले लोक भी आंन, जैनेइं युहुदी मैहेज्ब कुबुल कियोरोए, ते असंन मां किछ कुरीती भी आंन ते आरबेरे रहने बाले भी आंन। 11 ते तैसेरे आलावा भी आस तैन कैरां अपनी बोली मां परमेशरेरां आजीब कम्मां केरे बारे मां बीयांन शुंनी राहोरेम। 12 तैना बडे हेरान भोइजे ते डेरतां एक्की होरी पुछने लगे, की एन कुन भोने लोरुए? 13 पण किछ तैनकेरी हासी बनेइतां जौने लगे, की एनेइं सजरी शराप हछी पियोरीए।

पतरसेरु भाशण

14 तैखन पतरस यारह चलन सैहीं साथी खडो भोव, ते बडे जोरे सैहीं जौने लगे, की औ लोकाव औ युहुदियाव औ युरोशल्मेरे रहने बालाव मेरी गल रोडे चारे शुंन, आंन तुसन जोता की इडी एन कुन भोने लोरुए। 15 जैचरे तुस बुझने लोरेथ तैन नेहीं, ऐना मैन्हुं नशे मां नेहीं, किजोकी हून्ना ता झैझारे सिर्फ नोव बजोरेन। 16 बल्के एह तै गल्ले, जै युआईल नैब जेवरी थी।

17 परमेशर जोते की आंन आखीररी दिहैडन मां एरहु केरेल्हो, की अपनी रुहु सैभी लोकन पुड़ उतैरेल्हो, ते तुशां मड्डां कुंइयां मेरी तरफां बिस्तार देल्हां, ते तुशे नोव जुवांन ते बूढे सुपना लाहेला। 18 बल्के आंन तैन दिहैडन मां अपने सेवादार मड्डन ते कौन्शन पुड़ अपनी रुहु उतैरेल्हो, ते तैना

बिस्तार देल्ले। 19 आंव बह आसमाने मां ते बून जमीनी पुड आजीब आजीब नजारे हैरेइल्लो, येनी आग खुंन ते कालो तुं। 20 दिहाडो कालो भोई गहंनोएं, ते चांदानी खुनेरी जैरही लाल भोनिएं, ते एस्कैरां पैहीले परमेशरेरी एज्नेरी अक खास दिहाडी भोनिएं। 21 ते जै कोई परमेशरेरु नोव घिनेल्लो तैहे पापण कैरां आजाद भोल्लो, ते तैस्सेरे पाप माफ भोल्ले। 22 ओ बनी इस्त्राएलाव इना गल्लां शुना, यीशु नासरी अक मैनुं थु, जै परमेशरे तुशे लेइ भेजोरो थु, ते एस गल्लारी तस्दीक तैसेरे खास खास कमा केरे स्बुतेइ सैहीं भोचे, जैना परमेशरे तैसेरे जिरये सैहीं ईशे सामने हेरां, जैचरे की तुस एपु भी जानतथ। 23 जैखन तै परमेशरेरे इन्जामेरे पुरे मोके पुड ज्ञान इल्मेरे हिसाबे सैहीं टलुवाव, ते तुसैहीं तै गैर युहुदी केरे हथे सलेबी पुड टंगेइतां माराव। 24 पण परमेशरे तै मौवतरे सकेजे मेरां छुटेइतां जितो कियो, किजोकी एन भोई ना थुं सख्तु, की तै मौवतरे कब्जे मां राहे। 25 किजोकी दावद एस बारे मां एन जोते, की आंव हर बख्त अपने सामने लहंतो रहताइ, किजोकी तै मेरे देहींने पासे, एल्हेरलेइ मीं कोई हालहुज्त ना भोल्ली। 26 तांएं मेरो दिल खुशीऐ ते मेरी जबांन भी त्रमे, ते बल्के मेरी सारी जान एक्की उमीदी पुड टिकोरीए। 27 किजोकी तु मीं कब्री मां रहने ना देल्लो, ते ना अपने टलारे भगते शडने देल्लो। 28 तीं मीं जिंदगारी बत्त हेरेवरिए, तु अपने दिलेरी खुशी सैहीं मीं भरपुर केरेल्लो।

29 ओ मेरे टुलाव आंव कौमारे बुजुर्ग दावदेरे बारे मां तुसन सैहीं साफ साफ जोई सख्तां, की तै मैरी भी जेव, ते दब्बो भी ते तैसेरी कब्र आज भी ईशे सामने माजुदे। 30 पण तै नबी थु; ते तै जानतो थु, की परमेशरे तैस्सैहीं कसम कियोरिए, की तैसेरी ओवलाधि मेरां अक मैनुं तैसेरे तख्ते पुड बिशेल्लो। 31 तैनी पैहीले मुडदन मेरां जिते भोनेरे बारे मां बीयांन कियोरु थु; की ना तै कब्री मां रहने दितो ते ना तैसेरी जान शडने दितो। 32 तैहे यीशु परमेशरे जितो कमाव जैसेरे आस सभ शहातंम। 33 तै बाजी परमेशरे देहींने पासे बिशो ते बाजी परमेशरे कैरां पाक रुहु हासल की जैसेरो वेहिदो कियोरो थु, एह तैस्से रुहुरो अक हीस्सोए, जै तुस लहतथ ते शुंनतथ। 34 किजोकी दावद ता एपु आम्बरे मां नेहीं जेवरो, पण फिरभी तै एपु जोते, परमेशरे मेरे परमेशरे सैहीं जौवं, मेरे देहींने पासे बिशोरो रह। 35 ज़ा तगर आंव तेरे दुशमन तेरे पांवन हेत ना दलेंची। 36 एल्हेरलेइ की इस्त्राएलेरे सारे लोकन पत्तो लग्गे, की परमेशरे यीशु, जै तुसेइं स्लेबी पुड चहडो तै परमेशर भी मन्त्रो ते मसही भी मन्त्रो। 37 ऐना गल्लां शुंनतां तैनकेरे दिले पुड जख्म भुए, तैखन तैनेइं पतरसे ते होरी चेलन सैहीं जौवं, ओहो ईशे टुलाव आस कुंन केरम? 38 पतरसे तैन सैहीं जौवं; तोबा केरा ते तुसन मेरां सारे अपने अपने पापां केरी मैफारेलेइ यीशु मसहीऐरे नोवें सैहीं बपतीसमों घिन्ना ते पाबित्र आत्मा तुसन इनामे मां मैल्हेली। 39 एल्हेरलेइ की एह वेहिदो तुस्न ता तुशी ओवलाधि सैहींएं ते तैन सैभन सैहीं जैना तैस कैरां दुरन, ते जैन ईशो परमेशर एपु का कुजाल्लो। 40 पतरसे होरी भी बेडी गल्लां केरी शहादत दितो, ते तैन समझावं, की आपनो आप एस टपलांन बेली कॉर्मी कैरां बचैइतां रेखथ। 41 जैनेइं तैसेरु बचन कुबुल कीयूं, तैन बपतीसमो दितो ते तैस दिहैडी तकरीबन कोई टलाई हज़ार मैनुं तैन मां शामल भुए। 42 ऐना लोक चेलन कैरां शिख्शा शिखते थिये ते मिलते जुलते रहते थिये, ते रौट्टी टलोडने ते दुवा केरने मां मस्त रहते थिये।

विश्वैसी केरी संगती

43 चेलां केरे जिरये सैहीं बडां आजीब आजीब कंमा भोतां थियां, ते हर मैनुं डर जैरो लगतो थु। 44 यीशु मसही पुड विश्वास रखने बाले सारे मडद अकोठे रहते थिये, ते सेरी चीजन मां एक्की होरी बराबर हिस्सेदार रखते थिये। 45 ते तैना अपनी जैइदात ते माल सबाब बेचतां एक्की होरी ज़रूरतारे मुताबक रकम बेंटतां सेभी केरी ज़रूरत पुरी केरते थिये। 46 तैना रोज अक दिल भोइतां ओक्की मां अकोठे भोते थिये, ते घरन मां रौट्टी टलोडते थिये, ते अकोठे भोइतां खुशी सैहीं खाते थिये। 47 तैना परमेशरी तारीफ केरते थिये, तैना सेरी केरी नज़री मां रोडे थिये ते परमेशर पापण कैरां छुटकारो मैल्हने बालां केरी तैधातक रोज बधातो रहतो थु ।।

टोंटो भिखारी बझानों

3 एक्की दिहाडे पतरस ते युहन्ना दुवा केरने दिसरे टलेई बज्जेइं मंद्रे मांझो चलोरे थिये। 2 ते मैन्हेइं अक ज़रमनेरो टोंटो छुइतां आंन्हारो थु, ते तैस मंद्रेरे दारे पुड छडते थिये, जैसेरु नोव बडु "रोडु थुं", ताके अंतर गहने बालन कैरां भिछिया मग्गे। 3 जैखन तैनी पतरस ते युहन्ना मंद्रे मैझो गहते लाहे ता तैन कैरां पैइंसे मग्ने लगे। 4 पतरस ते युहन्ना तैसेरे पासे खेडोहीतां जौने लगे, ईशे पासे तक। 5 तैस उमीद भोईजेई की एन कैरां किछ पैइंसे मैल्हेले, तै तैन केरे पासे तकने लगे।

6 तैखन पतरसे जौवं, सौनु चांदी ता असंन का आथी नेहीं, पण जैन मीका आहे ता तैन आंव तीं देतांइ, तु यीशु नैसररे नोवें सैहीं खडो उठ ते चल फिर। 7 पतरसे जैरो तैसेरो देहींनो हथ टलेईतां खडो कियो, ता तैसेरी जांघन मां ताकत आई। 8 दे तै तैखने खडो भोव ते चलने फिरने लगे, ते फिरी छालां मारतो ते परमेशरेरी तारीफ केरतो तैन सैहीं साथी मंद्रे मैझो चलो जेव। 9 ते जैना लोक तैडी थिये, ते जैनेइं तै चलतो फिरतो लाहु, ते परमेशरी तारीफ केरतो लाहु ता पशांनो। 10 की इही ता तैहे, जै मंद्रेरे रोडे जैरहे दारे पुड बिशतां भिछिया मगतो थु, ते जै चमतकार एन लोकां केरे सामने भोव, ता तैना लोक बडे हेरान राहे।

मन्दरे मां पतरसेरी तालीम

11 औजु तै मैनुं पतरस ते युहन्ना टलेईतां खडखडो थु, ता सभ लोक जैना तैडी खडखडे थिये, बडे हेरान भोइतां सुलेमानी ब्रान्दे मां दोवडतां तैन का आए। 12 पतरसे एन हेरु ता तै लोकन का एंचरे खडो भोव, ते जौने लगे, औ इस्त्राएली लोकाव तुस एस गल्ली पुड कीजो हेरान भेवरेथ, ते असंन एंचरे कीजो तकने लोरेथ, असेइं ता एपनी कुदरुतारी ताकती सैहीं एह टोंटो मैनुं चलने फिरनेरे काबल बनेवरोए। 13 अब्रहाम इजहाक ते याकुबेरे परमेशरा ते ईशे सियांने बुजुर्गां केरा परमेशरा अपने दासे रौशनी दे, पण तै तीं टलुवाव ते पिलातुसे का खडो केरतां मुर्जम बनाव हालां की पिलातुसे तै हथरां छडनेरो इराधो कियोरो थु। 14 तुसेइं यीशु अक एरहो धर्मी मैनुं रद कियो, ते पिलातुसे का दरखुवासत की की तै तुशे लेइ अक कातली हथरां छडे। 15 तुसेइं ता जिंदगारो मालके मैरतां छडो, पण आस शाहातम, की परमेशरे तै मुडदन मेरां जितो कियो। 16 यीशु नोवेरी कुदरुतां एस टोंटे, जै तुशे सामने ते जैस तुस जानतथ, शिफा दितोरिये ते एनी तैस्सेरे नोवें पुड विश्वास कियोरोए, ते तुशे सामने बेझोरोए।

17 मेरे टुलाव आंव जानताइं की जैन किछ तुसेइं ते तुशे सरदारेंइं यीशु सैहीं कियो, तैन तुशी गेलती सैहीं भोवरु थुं। 18 पण परमेशरे ऐना सेरी गल्लां जैना तैनी अपने नेबी केरी जबांनी ज़ोवरी थी, की मसही दुःख उठाळो ते तै तैस पुरो केरतां हेराल्लो। 19 बस्सा तोबा केरा ते परमेशरेरे पासे फिरा ते तै तुशे पाप माफ केरेल्लो, ते परमेशरेरी तरफां तुशे लेइ रहंनरे रोडे दिहाडे एज्जेल्ले। 20 ते तै मसही येनी यीशु जै तैनी मुकरा कियोरोए तुशे लेइ भेजेल्लो। 21 पण ज़ां तगर तैना सेरी चीज़ां जैनकेरे बारे मां परमेशरे पुराने जमाने मां अपने पाक नेबी केरी जबांनी कियोरुए, बहाल ना भोल्ली, किजोकी यीशुएरु आम्बरे मां रहनु बडु ज़रुरीए। 22 मुसै भी एस बारे मां ज़ोवरु थुं, तुशो परमेशर तुसन का अक नबी भेजेल्लो, जैचरे तैनी आंव तुसन का भेजोरोहीं ते तै नबी तुशे टुलांन मेरां भोल्लो, ते तुस तैसेरी हर गल्ली पुड कंन लेइयथ। 23 जै तैसेरी गल ना मन्त्रेल्हो ते परमेशरेरे लोकन मेरां कडो गाहेल्लो। 24 सैम्युल नेबी कैरां देइतां पैहीले तमाम नेबेइं ऐना गल्लां केरे बारे मां खबर दितोरी थी। 25 तुस नेबी केरी ओवलाधाथ ते जै वेहिदो परमेशरे ईशे बुजुर्ग दादन सैहीं कियोरो थु, तैस्मां तुस सभ शामलथ, परमेशरे अब्रहामे सैहीं ज़ोवरु थुं, की आंव तेरी ओवलाधारे जिरिये सैहीं दुनियारी तमाम कौमन ब्रकत देल्लो। 26 परमेशरे अपनो सेवक चुंनतां पैहील्लो तुसन का भेजो, ताके तुसन एह ब्रकत मैल्हे, की तुसन मेरां हर कोई एपनी बुरी आदती कैरां बाज एज्जे ।।

पंचाङ्गीत मां यीशु

4 हेजु पतरस ते युहन्ना लोकन सैहीं गल्लाँ करते थिये, ता किछ कहींन ते मंद्रे पुजारी ते किछ सुदुकी तैड़ी पुजे। 2 तैना बड़े परेशान थिये, की चले लोकन तै तालीम देते थिये, की जेचरे यीशु मुडदन मैरां जितो भेवरोए, तैचरे सभ लोक मौवतरे बाद जिते भोल्ले। 3 तैनेइ पतरस ते युहन्ना गरिफ्तार किये, ते तैखन डलोहुझारो मोको थु, ते तैना होरसां तगर गरिफ्तार केरतां टैपतां छडोरे थिये। 4 फिरभी केही लोकेइं तैन केरां सुसमाचार शूनतां विश्वास कियो, ते तैनकेरी तैधात बधते बधते पांचहजारन तगर पुजी जेई।

5 होरसां युहुदी केरे सरदार बुजुर्ग ते शैरितरे लोक युरोशल्में मां जम्हां भुए। 6 हन्ना सरदार कहींन तैड़ी थु, ते कैफा ते युहन्ना अस्केदर ते सरदार कहींनेरे खानदेंनरे होरे लोक भी तैड़ी थिये। 7 तैनेइ पतरस ते युहन्ना अपने सामने कुजाए ते तैन पुछ, तुसेइं कसेरी कुदरती या कसेरे नोव सैहीं एन कम कियेरुए? 8 तैखन पतरस पाबित्र आत्माइं सैहीं मस्त भोईतां तैन एंचरे सैहीं जांने लगे, औ कौमेरे सरदाराव ते बुजुर्गाव। 9 अगर आज असां एल्हेरलेइ तल्ब कियोरैम, की असां एक्की रोडे कमेरे जुवाबदहम, जैन असेइं एक्की टॉटे मैनेरे लेइ कमाव ते तैस शिफा दिती। 10 ते तुसन ते सारे इस्त्राएलीन एह पत्तो लगे, की एह मैनुं यीशु नैसरेरे नोवैरी कुदरति सैहीं बेझोईतां तुशे सामने खडोए, जै यीशु तुसेइं मारोरो थु, पण परमेशरे ते मुडदन मैरां जितो कियोरुए। 11 एह तैहे घोडे, जै तुसेइं मिस्त्रेइं रद्दी कियोरु थु, पण तैहे घोड कुनेरो घोड भोइजेव। 12 पापां केरी माफ़ी केचरे होरेरे जांने सैहीं नेहीं, किजोकी अस्मानेरां ऊंढू कोई होर दुइयाव नोव नेहीं दितेरु, जैनकेरे जांने सैहीं ईशे पाप माफ़ भोन।

13 जैखन तैनेइ पतरस ते युहन्नेरी करतुत हेरी, ते तैखन तैन पत्तो लगे, की एना ता आनपुड ते मामुली मैनुंण ते तैना बड़े हेरान भुए, ताल्ही तैनेइं बुझू की एना लोक यीशु सैहीं साथी राहोरें। 14 तैनेइं पतरस ते युहन्नेरे खलाफ किछ ना जोइ बट, एल्हेरलेइ की जैस मैनुं शिफा मैल्होरी थी, तै मैनुं तैन सैहीं साथी खडखडो थु। 15 तित्ताल्ही तैनेइं पतरस ते युहन्ना आदालती केरां बेइर नैनेरे लेइ जांव, ते एपुम्मेहीं मुशोरो केरने लगे। 16 असां एन लोकन कुन केरम? युरोशल्मेंरे सभ लोक जानतन की एन लोकेइं अक बडो चमत्कार हरेवरोए, जैसेरो आस भी इनकार ना केरी बटम। 17 फिर भी आस एन ना चाहंम की औ गल लोकन मां जादे मुशुर भोए, रोडु ता एन्ने की आस एन धम्केइतां जांम की आजेरे बाद यीशुएरु नोव घिन्तां केची सैहीं गल ना केरथ। 18 ताल्ही तैनेइं पतरस ते युहन्ना अंतर कुजेइतां हुकम दिती, की यीशुएरु नोव घिन्तां केची सैहीं गल ना केरथ ते ना तालीम देइयथ। 19 पण पतरस ते युहन्ने तैन जुवाब दिती, तुस एपु एह फैस्लो केरा, की कुन एह गल परमेशरेरी नजरी मां ठीके, फिरी आस तुशी गल मन्म कि परमेशरेरी? 20 किजोकी एन नेहीं की जैन किछ आसेइं शंनु ते लाहूं, ते तैसेरु आस जिक्र ना केरम। 21 तैखन तैनेइं पतरस ते युहन्ना डरेइतां धम्केइतां हथरां छडे द्रासले मां तैना फैस्लो ना केरी बटे, की एन सजहा ता दंम पण केचरे दंम, किजोकी तमाम लोक एह माजरो हेरतां परमेशरेरी तारीफ केरते थिये। 22 ते जै मैनुं शिफा मैल्हतां रोडो भोवरो थु, चैल्ही सालन केरां जादे थु।

विश्वास केरने बालां केरी प्रार्थना

23 पतरस ते युहन्ना तैठां छुटनेरां बाद अपने लोकन का चले जे ते जैन किछ सरदार कहींनेइं ते बुजुरगेइं तैन जोवरु थुं, तैन सैहीं शुनाव। 24 जैखन तैनेइं एना गल्लाँ शूनी ता बड़े जोरे सैहीं परमेशरे का दुवा केरने लगे; ईशे जमीन ते आस्मानेरे खालक ते माल्क तीं जमीन ते आसमान ते सुमुद्र ते जैन किछ एस्मां आहे तीं बनेवरुए। 25 तीं पाबित्र आत्मांरे जीरये सैहीं अपने सेवक ईशे बाजी दावदेरी जबांनी जेवरु थुं, की कौमा तैशे मां किजोईअन ते ओवलाधां गलत खियाल दिले मां रखोरें?

26 जमीनरे बादशाहा परमेशर ते तैसेरे मसहीएरे खलाफ खडे भुए ते शुन्ने बालेइं तैनकेरी मुखालफत की। 27 एन सचै की हिरोदेस पैंतुस ते पिलातुस ते गैर युहुदी सभ मिलतां तेरे बडे सेवक यीशुएरे खलाफ खडेभुए, जै तीं मसही मुकरा कियोरु थु। 28 तैना एल्हेरलेइ अकोठे भोवरे थिये की जैन किछ तु

एपनी कूदरुतारे इराधेरे मुताबक पैहीले तैनी मुकरा कियेरु थुं, तैस पुड आम्न केरम। 29 हुन्ना औ परमेशरा तैनकेरी धेमकी तक, ते अपने बंदे हीमत दे, की तै तेरु बचन बेडी खुशी सैहीं लोकन शुनेई सखे। 30 आपनो हथ अग्रोहुं रख, ते अपने पाबित्र सेवके यीशुएरे नोवें सैहीं शिफा दे, ते चमत्कार हेरा ते आजीब आजीब कंमा केर। 31 ते जैखन तैनेइं दुवा की ता जैस ठैरी तैना अकोठे जम्हां थिये, ता तै ठार हिल्लने लगी, ते तैना सभ पाबित्र आत्माइं सैहीं मस्त भोइजे, ते परमेशरेरु बचन बेडी खुशी सैहीं शुनाने लगे।

वीशैरी केरी मंगडली जिन्दगी

32 विश्वास केरने बालां केरी जमात अक दिल ते अक जान थी, कोई भी एरहो ना थु जै अपनो माल आपनो समझतो भोए, बल्के होरन भी सैरी चीजन मां शामिल रखते थिये। 33 ते चले बेडी कुदरती सैहीं परमेशर यीशुएरे मुडदन मैरां जिते भानेरी शाहादत देते थिये, ते तैन पुड परमेशरेरो बडो सैयो थु। 34 तैन मैरां कोई भी मौताज ना थु, किजोकी जमीना केरे ता घरां केरे माल्क तैन बेची बेचतां तैनकेरी कीमत आन्हते थिये। 35 ते तै रकम चेलां केरे पांवण पुड एन्हतां छडते थिये, ते हर केंची तैसेरी जरुरतारे मुताबक बंटतां देते थिये। 36 युस्फ अक लावी थु, जै कुबूसरो रहने बालो थु, ते चलेइं तैसेरु नोव ब्रनबास रखेरु थुं, जैसेरो मतलबे समझदार मडु। 37 तैनी अपनु उडार बेच, ते किमत एन्हतां चेलां केरे पांवण पुड छडी।

हनन्याह ते सफीरा

5 हनानियां नोवैरो अक मैनुं थु, ते तैसेरी कौन्शारु नोव सफीरा थुं, ते तैनेइं एपनी जेईदातरो किछ हिस्सो बैची छडो। 2 तैनी कीमती मैरां किछ पैइंसे एपु का रखे, जैसेरो तैसेरी कौन्शी भी पत्तो थु, ते बाकी होरे पैइंसे एन्हतां चेलां केरे पांवण पुड छडे। 3 पतरसे तैससैहीं जांव, हनानियांए शैताने तेरे दिले मां एह गल केचरे छडी की तु पाबित्र आत्माइं सैहीं झुठ जोतस, ते जमीनारे पैइंसन मैरां किछ रेखी छडे? 4 कुन बेचने केरां पैहीले जमीन तेरी ना थी, पण बेचनेरां बाद तेरी ना रही? तु एन सोचनेरे बारे मां केनी मजबुर कियो? तीं मैनुं सैहीं नेहीं बल्के परमेशरे सैहीं झुठ जोवरुए। 5 हनानियां एन शूनते ऊंढो खिरकी जेव, दे तैसेरो दम निसी जेव, ते जैन लोकेइं एन शंनु ता तैन बडो डर भोइजेव। 6 तैखन किछ नोवजुवान आए ते तैनेइं तैसेरी लाश काफने मां प्लेटतां ते बेरोहुं नैहितां देबतां छडी। 7 ट्लेइं घैन्टना पत्ती तैसेरी कौन्श आई, ते तैस एस बारे मां कोई पत्तो ना थु। 8 पतरसे तैस पुछ, मीं जौ, की जमीनारी कीमत एनी मैल्होरी थी? तैसां जांव, हां कुल कीमत एनी मैल्होरी थी। 9 पतरसे तैससैहीं जांव, परमेशरेरी पाबित्र आत्मां आजमानेरे लेइ तुस केचरे सैहीं राजी भुए, ते जैन लोकेइं तेरो मुन्श दबोरुए तैन्केरे पाव दारे तगर पुजी जेवरेन, ते तैना तिमीं बेरोहुं घिनी गएल्हे। 10 तै कौन्श तैखने पतरसेरे पांवण पुड पैई, ते तैसारो भी दम निसी जेव, ते जैखन नोवजुवान अंतर आए ता तै कौन्श मुओरी लैहितां तैभी छुइतां तैसारो मुन्शे ड्लाखोरां देबतां छडी। 11 सारी कलीसिया बल्के एन गल्लाँ केरे शून्ने बालन बडो डर भोई जेव।

निशान ते बडां बडां कम्मां

12 चलेइं लोकन मां बडे चमत्कार ते अजीब अजीब कम्मा कीयां, ते सारे इमानदार अक दिल भोइतां सुलेमानी आंगने मां जम्हां भोते थिये। 13 हालांकी लोक तैन्केरी बडी इज्जत केरते थिये, पण केची हीमत ना आई की तैन मां शामिल भोन। 14 तैन्केरे जांने सैहीं केही मडदेइं ते कौन्शई विश्वास कियो, ते परमेशर मन्ने बालां केरी तेधात बधती चली। 15 ते लोक बीमारन खटन पुड ते पीठी पुड छुइतां सडकी मां रखते थिये, की पतरस जैखन तैस बत्तां निसैल्हो ता तैसेरी छव ता तैन पुड पै। 16 युरोशल्मेंरे चौवरे पासना ड्लोवां केरे बैशुमार लोक बीमारन ते जैन मां दुष्टात्मां थी, एपु सैहीं साथी आन्हते थिये, ते तैना सभ रोडे भोइतां गहते थिये।

प्रेरितां केरी गिरफ्तारी

17 चाल्ही सरदार कहींन ते तैसेरे साथी जैना सुदुकी केरे फिरके मैरां थिये, तैन बड़ी सरक आई ते तैना चेलां केरे खलाफ खड़े भुए। 18 ते तैनेइं चले टलुवेइतां जैल्ही मां छेडी दिते। 19 पण परमेशेरो फरिशतो जैल्ही मां गैहीतां दार खोलतां चेलन का जेव, ते तैना बेइर कैदतां तैन सैहीं जौने लगे। 20 गाथ ते मंद्रे अंगने मां खड़े भोइतां इस नोवीं जिंदगरे बारे मां सैरी गल्लां लोकन शुनाथ। 21 तैना झैझां मंद्रे अंगने मां पुजे ते जेचरे तैन फरिशते हुकम दितोरो थु, तैचर लोकन तालीम देने लगे, ते जैखन सरदार कहींन ते तैसेरे साथी तैडी आए, ता तैनेइं आदालत आलियारो इजलास कुजाव,

जैसमां युहुदी केरे सारे बुजुर्ग एवरे थिये, ते तैनेइं यीशुएरे चले जैल्ही मैरां कुजाए। 22 जैखन सिपाही जैल्ही मां पुजे ता तैना चले तैडी ना मैल्हे, ते वापस एइतां तैन खबर दिति। 23 असेइं जैल्ह रोड़े चारे बंद कियोरी थी, ते पैरेदार भी असन दारे मां खड़खड़े मैल्हे पण जैखन असेइं जैल्ह खोल्ही ता आंतर कोई ना मैल्हो। 24 एना गल्लां शुंनतां मंद्रेरो सरदार कहींन ते सारे की सारे लोक हेरान रेहीजे, की हूनी कुंन भोल्हु। 25 तैखन केंचे एइतां जौव, तैना मैन्हुं जैना तुसेइं जैल्ही मां छडारे थिये, तैना मंद्रे मां खड़े भोइतां तालीम देने लगेरेन। 26 तैखन मंद्रेरो सरदार अपने सिपाही साथी घिनतां जेव, ते चले कुजेइतां आन्हें पण जबरदस्ती नेहीं, किजोकी तैना लोकन केरां डरते थिये, की कोस्कोई एरहू ना भोए की एना असन मैरी छडन।

27 तैनेइं चले एन्हतां आदालत आलया मां पैश किये, ते सरदार कहींन तैन पुछू। 28 असेइं तुसन ठाकेरु थुं, की यीशुएरु नोवं घिनतां तालीम ना देइयाथ। 29 पतरस ते होरी चलेइं जुवाव दितो, असन मैन्हुं केरो हुकम मन्नेरे बजाहे परमेशेरो हुकम मन्ने जुरुए। 30 ईशे बोव दादेरे परमेशेरे एह यीशु मुडदन मैरां जितां कियो, जै तुसेइं स्लेबी पुड़ टंगतां मारो। 31 परमेशेरे अपनो हुकम मन्ने बालो मैनातां अपने देहीने हथेरे पासे बिशाल्हो, ताके तै इस्त्रेएलन पापां केरी माफी दे। 32 असां एन गल्लां केरे शाहादतम ते पीबित्र आत्मांरे भी, जै तैनी आपनो हुकम मन्ने बालन दितोरीए।

33 जैखन तैनेइं एन शुंनु ता फुकोई जे, ते तैनकेरी मर्जी लगी जौने की एन मैरी छडम। 34 पण अक फ्रिसी जैसेरु नोवं गमलीएल थुं, ते जै शैरितरो मन्ने बालो थु, ते जै सैभी लोकन मां समझदार थु, तैनी आदालती मां खड़े भोइतां हुकम दितो की एना मैन्हुं थोड़े चोरे बेइर भेजा। 35 तै एन जौने लगे, औ ईस्त्रेएलाव तुस जैन किछ एन मैन्हुं सैहीं केरनु चहतथ तैन रोड़े चारे सोचा। 36 किजोकी थोड़े चोरे पैहीले थोदास उठोरो थु, ते तैनी शर्त लेवरु थुं, की आंव बडु किछ केरतां, ते तकरीबन चौर शौव मैन्हुं तैस्सैहीं मिलोरे थिये, पण तै मारो जेव, ते तैसेरे मन्ने बाले सारे तित्र बित्र भोइजे। 37 तैसेरां पत्ती युहुदा गलीली ईस्म नुवेसरे दिहाडन मां निसोरो थु, ते तैनी काही लोक अपने पासे खींचोरे थिये; तैभी मारो जेव, ते तैसेरे जैतरे साथी थिये, सभ तित्र बित्र भोइ जे। 38 हुंनी आंव तुसन एन्ने जोतां की एन मैन्हुं केरां दुर भोथ, ते एन गहने देथ किजोकी अगर एना आजीब कम्मां मैन्हुं केरी तरफां भोलां ता एणु खत्म भोइ गहनण। 39 ते अगर एना कम्मां परमेशरी तरफां भोलां, ता तुस एन मैन्हुं केरु किछ ना बिगैडी सख्त, ते तुस परमेशेरां खलाफ लडने बाल भोले, तैनेइं तैसेरी सल्लह मन्नी।

40 ते चले अंतर कुजेइतां तैन डंडेइं बावैहीतां तैन जौवं, की अजेरे बाद यीशुएरे नोवं सैहीं कोई गल ना केरथ, ते तैना हथरां छडै। 41 चले आदालत आलया मैरां चले जे, तैना एस गल्ली पुड़ खुशी थिये, की असां यीशुएरे नोवं सैहीं बेजत भौनेरे काबल समझै। 42 तैनेइं तालीम देंनी बंद ना की, बल्के रोज मंद्रे मां गैहीतां ते घर घर गैहीतां खुश खबरी शुंनते राहे की यीशुए मसहीए।।

सत सेवक चुन्ने

6 इही गल तैईसेरीए जैईस चेलां केरी तेधात बधने लागोरी थी, युनानी युहुदी तैठेरे युहुदी केरी शकैइत केरने लगे, की पुराने जमानेरे मुताबक रौट्टी बंटनेरी तकसीमारे मोके ईशी रेंडी कौन्शां केरी घट परवहा केरतन। 2 एन शुंनतां बहरे चलेइं सारे चले अकोठे किये, ते जौवं, ईशे लेइ एन मुनासब नेहीं की आस परमेशेरी बचनेरी मुनादी केरनी छैडतां रौट्टी बंटनेरो इतजाम

केरम। 3 एल्हेरलेइ औ मेरे द्वाव, अपने लोकन मैरां सत रोड़े जैरे नेक नितरे मैन्हुं चुंन, जैना पाबित्र आत्माइं सैहीं भरपुर भौन, ताके आस तैन एस कम्मेरी जिम्बारी सोंफम। 4 पण आस्ता दुवा केरने ते बचन शुनाने मां मस्त भौनेम। 5 एह गल सारे लोकन खुशी आई, ते तैनेइं अक सैत्फुस जै पाबित्र आत्माइं सैहीं भरपुर थु, तै चुंनो ते दुईयावं होरे जैना चुंने तैन्केरां नोवां इनण फिलपुस पुरखुरुस नेकानुर तैमोन पुर्मिनास नेक्लाव्स जै इन्ताकीयारो अक खास युहुदी थु। 6 ते तैना चेलन का पैश किये, ते तैनकेरे लेइ तैनेइं दुवा की, ते तैन पुड़ हथ रखे। 7 एंचरे सैहीं परमेशेरे बचन फैलतु जेवं, ते युरोशल्म मां चेलां केरी तेधात बधती जेई, ते बड़े कहींनेइं विश्वास कियो ते मसही भोईजे।

स्तिफनुसेरी गरफ्तारी

8 सैत्फुलुस परमेशेरी पाबित्र आत्माइं सैहीं भरपुर थु, तै लोकन आजीब आजीब कम्मा ते आजीब चमत्कार हेरातो थु। 9 आजाद भोवरे युहुदी केरो अक प्राथना भावन थु, जैसमा गुरीनेरे ता आसकेंद्रयेरे किछ युहुदी लोक प्राथना केरते थिये, ते एना लोक ते क्लकियारे ता आसियारे किछ युहुदी मिलतां सैत्फुलुसे सैहीं बेंस केरने लगे। 10 पण जैस हिसाबे सैहीं सैत्फुलुस तैन सैहीं गल्लां केरतो थु, तैसेरो केंचे जुवाव ना देई बटो। 11 तैखन तैनेइं किछ लोक शिखाले, की तुस एन जोइयथ, की आसेइं सैत्फुस मुसैरे ता परमेशेरे खिलाफ बकवास केरते शुंनोरेन। 12 चाल्ही तैनेइं किछ लोक युहुदी बुजुर्ग ते शैरितरे किछ मन्ने बाले सैत्फुसेरां खिलाफ ब्मकाए ते तै टलेइतां आदालत आलिया मां पैश कियो। 13 तैनेइं बड़े झुठे शाहादत पैश किये, ते तैनेइं शाहादत दिति की एह मैन्हुं पाबित्र मंद्रेरे ता शैरितरे खिलाफ गल्लां केरने केरां बाज ना एजे। 14 ते आसेइं एस मैन्हुं केरां एन भी जौंतु शुंनु, की यीशु नासरी इस ठैरी बरबाद केरेल्हो, ते ईना रसमां जैना मुसै नेब दितोरी थी, तैन भी बदलेल्हो। 15 आदालत आलियारे मुलाज्म सैत्फुलुसेरां लुखु लुखु तकने लगे, पण सैत्फुलुसेरु तुत्र फरिशतेरु जैरु लैहीयातु थुं।।

स्तिफनुसेरी भाषा

7 तैखन सरदार कहींने सैन्तफुनुसे पुछू, कुंन एना गेल्टी सैचीन? 2 सैन्तफुनुसे जुवाव दितो, मेरे द्वाव ते मेरे बुजुर्गाव मेरी गल शुंन, परमेशेरी कुदरुत अब्राहामं पुड़ तैखन बांदी भोवरी थी, जैखन तै हाराने मां बरनेकेरां पैहिलो मैसुपोतामिये मां रहतो थु। 3 परमेशेरे तैस्सैहीं जौवं, अपने मुखे ता अपने रिशतेदारन शेरतां तैस मुखे मां गह, जै आंव तीं औरेइल्हो। 4 ताए तै कसिदी केरे मुखे शैरतां हाराने मां बसोरो थु, तैसेरे बाजी केरे मरनेरां पत्ती परमेशेरे तै तैस मुखे मां आन्हों जैसमा आज तुस बसोरेथ। 5 परमेशेरे तैस इडी किछ भी जमीन ना दिति, अक गज भी जमीन ना दिति, पण वेहिधो जुरुर कियो की इही जमीन आंव तीं ते तेरी औवलाधी कळे मां देल्हो हालांकी तैइस अब्राहामे कोई औवलाध ना थी। 6 परमेशेरे इब्राहामे सैहीं जौवं, तेरी औवलाध एकी होरी मुखे मां परदेशी केरी जैरही राहेल्ही, तैठेरे लोक तैन गुलेमी मां रखेल्हे, ते चैवर शौव सालन तगर तैन पुड़ जुल्म केरते राहेल्हे। 7 पण आंव तैस जाती जैना तैन गुलांम बनाल्हे ता आंव तैन सज्जह देल्हो, ते तैसेरां बाद आंव तेरी औवलाधारे लोकन आंव तैठां इडी एन्हेल्हो ते तैना मेरु नोवं घिनेल्हे। 8 ते परमेशेरे अब्राहामे सैहीं वेहीदो कियोरो थु, जैसेरो निशान सुंनत थी, जैखन इजहाक ज़रमो ते आठे दिहैडी केरो भोव, ता अब्राहामे तैसेरी सुंनत की ते, तैसेरां बाद इजहाकेरो याकुब पैइदा भोव, ते याकुबेरां बाद ईशी कौमरे बहरे कबीलां केरे बुजुर्ग पैइदा भुए। 9 याकुबेरे मड्डेइं धोखो केरतां आपनो द्वाला युसफ मीस्न जो बचौं, ते तैनेइं युसफ मिस्ने मां नैहीतां गुलांम बनाव? पण परमेशर युस्फे सैहीं साथी थु। 10 परमेशेरे तै सैरी मसीबतन केरां बचैइतां रखो, ते तैस बड़ी अकल दिति, ते मिस्नेरे फैरांन बादशाहेरे सामने बड़ी काबलियत दिति, ते फैरांने युसफ मिस्नेरो मंत्री बनाव, ते अपने मैहेलेरो पुछनो गन्ने बनाव। 11 एक्री साल सारे मिस्ने मां काल पैव ते बड़ी मसीबत आई, ते इशे बाजी दादे भी अन्नेरो घाटो भोव। 12 जैखन याकुबे शुंनु की मिस्ने मां अन्न मैल्ते ता तैनी इशे बुजुर्ग मिस्ने मां भेजे, तैडी तैना पैहीले बार मस्सां जेवरे थिये। 13 जैखन तैना दुईयावं फेरे

मिसे मां जे, ता युस्फे आपनो आप तैन पशानाव, ते फेरोंने भी युस्फेरी सुकूनतरो पत्तो लगे। 14 तैसेरां बाद युस्फे आपनो बाजी याकुब ते तैसेरु पचहत्र मैन्हुं केरु टबर मिसे मैझो कुजाव। 15 चाल्ही याकुब मिसे मां चलो जेव, ते तैसेरे बाव दादे तैडी मेरी जे। 16 तैनकेरी लाशां तैङ्गां सिक्मं मां एन्ही, ते तैना तैस ठैरी दफन की जैडी अब्रहामे रकम देईतां बनी हंमुरे कैरां ठार घिनोरी थी।

17 परमेशरे अब्रहामे सैहीं अक वैहीदो कियोरो थु, तैस वैहीदेरो पुरो भोनेरो मौको अव ता मिसे मां ईशै लोकां केरी तेधात भी बड़ी बेधी जेवरी थी। 18 तैस मौके अक होरो बादशाह मिसे मां हुकमरां बनोरो थु, जै युसफेरे बारे मां किछ भी ना थु जानतो। 19 तैनी ईशी कौमी सैहीं धौखो कियो, ते ईशै बुजुर्गन पुड बडे जुलम किये, तैना एत्रे मजबुर किये की तैना अपने जर्मते बच्चे बेरोहुं शारन ताके तैना मेरी गहन। 20 तैने दिहैडन मां मुसौ पैदा भोव, तै हेरनो हछो रोडो थु, ते तै टलाई मिहीने तग्न अपने बाजी केरे घरे मां पलतो राहु। 21 जैखन तै दरियाए मां शारो ता फेरोंनेरी कुईयां तै छुईतां आन्हां ते अपने मट्टेरो जैरो पालो। 22 मुसै नेबें मिस्त्री केरी सैरी तालीमारो ते तैन्केरी सैरी गल्लां केरी वाकफित भोई जेई, ते परमेशरेरे वचने मां ते तैस पुड अंमल केरने मां दुईने मां ताकतबर थु।

23 जैखन मुसौ नबी चैल्ही सालां केरो भोव ता तैसेरे दिले मां एह गल आई, की आंव अपने दूलां केरो येनी बनी ईस्रेली केरो हाल दरियाफत केरी। 24 मुसै तैन मैरां एक्की पुड जुलम भोतो लाहु ता मुसौ तैसेरी मदत केरने तैस का पुजौ, ते तै जालम मिस्त्री कतल केरतां तैसेरे जुलमैरो बदलो घिनो। 25 मुसौरो खियाल थु, की तैसेरे बदलैरी लोकन तैसेरी गल्लरो एसास भोलो, की परमेशरे तैसेरे जिरये सैहीं तैन मिस्त्री केरी गुलैमी कैरां तैन छुटाए, पण तैनेइं मुसैरो कोई एवसान ना समझु। 26 मुसै हौरसां दुई ईसाएली एपु म्मेहीं लड़ते लाहे, ते तैन समझानेरी कौशीश की, ते मुसै तैन जोंव, औ जुवांनाव तुस ता एपु म्मेहीं दूला भोतथ, ते तुस किजो एक्केकी मारने लगेरेथ? 27 पण जै मैन्हुं अपने पुडोसी मारने लोरो तु, ता तैनी मैने मुसै जो धमकी देईतां जोंव, तु कैनी असन पुड राजो या काजी मुकरा कियोरोस? 28 जैचरे तीं तै मिस्त्री हिज मारोरो थु, तैचरे तु अज्र मीं मारने चहतस? 29 एह गल शुनते मुसौ ऐङ्गां न्शौ, ते मुलख मदियाने मां परदेशी केरो जैरो रहने लगे, ते तैडी तैसेरां दुई मट्टां पैईदा भुआं।

30 चैल्ही सालना बाद तैस कौआ सेंनारे बियाबांने मां एक्की झल्लोएरी अगी मां परमेशरेरो फरीशतो लाहु। 31 मुसौ एह चमतकार हेरतां हेरांन रेही जेव, ते जैखन तै रोडे चारे हेरनेरे लेई नेडे जेव ता तैनी परमेशरेरी आवाज शुंनी। 32 की आंव तेरे बाव दादेरो येनी अब्रहामे ईजहाक ते याकुबेरो परमेशर अंही, मुसै एन लैहीतं ब्रदाशत ना लगे भोने, ते ए डेरतां कम्बने लगे। 33 तैखन परमेशरे मुसै जो जोंव, अपनी जुडी खोल, किजोकी जैस ठैरी तु खडोस तै पाबित्र ठारे। 34 मीं मिसे मां अपने लोकां केरी मुसिबत हेरी, मीं तैन्केरी आवज भी शुंनोरीए, एलहेरलेई अवं तैन छुटांनेरे लेई अवं उंडौ एवरोइं, हुंनी ऐई" अवं तीं फिरी वापस मिसे भेजने बालोइं।

35 एहे तै मुसौए जैसेरो तैनेइं ईनकार कियोरो थु, की तु कैनी असन पुड राजौ बनेवरोस, ते एहे तै मुसौ परमेशरे अपने फरिशतेरे जिरये सैहीं जै तैनी बलते झल्लोए मां लाहोरो थु, राजौ" ते छुटाने बलो बनेईतां भेजो। 36 ऐन्नी शखशै" मुसै लोक मिसे मैरां अपने लोक कडे, ते मुलख मिसे मां ते बैरे कुलजमं मां चैल्ही सालन तग्न बियाबांने मां अजिब अजिब नजारे हेरांतो राहु। 37 ऐनी मुसै बनी ईसाएले सैहीं जेवरु थु, मेरो परमेशर तुशै दूलांन मैरां मेरे लेई अक मेरो जैरो अक नबी भेजेल्हो, ते तुसां तैसेरी जोनु शुनथ। 38 एहे मुसौ" बियाबांने मां बनी ईसाएलन सैहीं साथी थु, एहे तै मुसौ थु, जैस सैहीं फरिशते कौआ सेंना पहाडे पुड गल्लां कियोरी थी, ते तैस्से जिंतां वचन दितोरो थु, ताके तै असन तग्न पुजाए। 39 पण ईशै बाव दादेइं तैसेरो हुकम ना मन्ना, बलके रडी कियो, ते तैन्केरो दिल मिसेरे पसे बेदलोने लगे। 40 तैनेइं हारुने सैहीं जोंव, तु ईशै लेई अक देबतो बना, जै असन अग्री अग्री चले, किजोकी अस ना जानम" की मुसै जैनी असां मुलख मिसे मैरां कैदतां आन्हारे थिये, तै कौरां जेवरोए। 41 तैखन तैनेइं बछडेरी शकलारो अक बुत बनाव, ते तैसका सुखना चैडी, ते अपने हथां केरे बनेवरे बुते का बड़ी खुशी मनाई। 42 पण परमेशरे तैन कैरां अपनु तुत्र फरांव, ते तैना अम्बरे तारां केरी

मिनत केरनेरे लेई छडे, जैचरे नेबी केरी किताबी मं लिखेरुए, औ बनी ईसाएलाव" कुन तुस चैल्ही सालन तग्न बियाबांने मां मींजेई सुखना देते नेहीं राहोरे?

43 बलके तुसेइं एपु सैहीं साथी मौलकेरो तैम्बु ते रफांन देबतेरे तारे छुईतां चलते थिये, ऐन्ना तैना बुत्तन जैना तुसेइं अपनी पुजारे लेई बनेवरे थिये, एलहेरलेई अवं तुसन बाबले कैरां भी दुर जलावतन केरेल्हो।

44 बियाबांने मां ईशै बाव दादन का पाबित्र तैम्बु थु, जैसेरो चमतकार मुसै लहोरो थु, ते जोंने बाले तैस हादैईत कियोरी थी, कि तु अक किबीलो तैसेरे मुताबक बना, एलहेरलेई शहादतरो तैम्बु तैस्से हिसाबे पुड बनाव जेव। 45 जैखन तै तैम्बु ईशै बाव दादन मैल्हो ता तैनेइं तै साथी नैहीतां योशुए सैहीं साथी तैस पाबित्र जमिनी पुड पुजे, जै तैनेइं तैन कौमन कैरं थुसोडोरी थी, जैना परमेशरे तैनकेरे सामने तैङ्गां कढोरे थिये, ते तै तैम्बु दावदेरे जमाने तग्न तैडी राहु। 46 दावद परमेशरेरो टलारो भोव, ते तैनी परमेशरे का मिनत मगी, की मीं याकुबेरे परमेशरेरे लेई अक घर बनानेरे लेई ईजाजत दे। 47 पण तै सुलैमान थु, जैस परमेशरेरु घर बनानेरे लेई ईजाजत मैलहोरी थी। 48 पण प्रभु परमेशर" ईनसानेरे बनेवरे घरे मां ना राहे, जैचरे नेबेइं जौवरुए।

49 किजोकी परमेशरे जौवरुए की आम्बर मेरो तख्तै ते जमीन मेरे पांवां केरी चोक्कीए ते तुस फिरी मेरे लेइ केरुजैरहु घर बनाल्हे, या मेरे आराम केरनेरी ठार कैरही जैरही भोल्ही?

50 कुंन ऐना सैरी चिजां मेरी बेंनोरी नेहीं?

51 ओ गलां कटने बालाव तुशे दिल ता कन दुइये अकडुंन, तुस पाबित्र आत्मांरी हमेशां खालफत केरते रहतथ, जैचरे तुशे बाव दादे केरते एवरंन। 52 कुंन कोई नबी एरहो भी गुजरी जेवरोए, जै तुशे बाजीं दादेइं नेहीं स्तेवरो? तैनेइं ता तैना नबी भी मारे जैनेइं तैस धैमेरे एज्नेरे बारे मां जौवरु थु, ते आज्र तुसेइं तै टलुवेइतां कतल कमवाव। 53 तुसन तै हुकम मैल्हो, जै फरिशतन कैरां मैल्होरो थु, पण तैस पुड अंमल ना कियुं।

स्तिफनुसे पुड घोडेव

54 जैखन तैनेइं ऐना गल्लां शुंनी ता तैना फुकोई जे, ते तैसजो दंत लगे चापने। 55 पण सैतफुसे पाबित्र आत्मांइं सैहीं मस्त भोइतां आम्बरे पासे तकु ता तैस परमेशरेरु दर्शन भोई जेंव, ते तैनी थीशु परमेशरेरे देहीने पासे खडखडो लाहु। 56 तैनी जोंव, हेरा आंव आम्बर खुलु लहतांइं, ते आबने आदम परमेशरेरे देहीने पासे खडखडो लहतांइं। 57 एन शुंनतां तैना ज़ोरे सैहीं चिडां मारने लगे, ते अपने कन्न मां एगोली छेडी ते अकोड्डे सैभेइं तैस पुड हंम्लौ कियो। 58 ते तै दिलतां शहरे कैरां बेइर नीयो ते तैस्जेई घौडेइं बहने लगे, तैखन शहातेइं अपने कुरते खोलतां सावल नोवैरे एकी मैन्हुं का रेखतां छडे। 59 ते जैखन तैना सैन्तफनुसे जो घोडेइं बहने लगेरे थिये, ते तै सैन्तफनुस इन जोइतां प्रार्थना केरने लगे; कि औ प्रभु थीशु, मेरी आत्मा कबूल केर | 60 फिरी तैनी ज़ेधु तल्ले लेइतां ज़ोरे सैहीं जोंव, औ परमेशर इही पाप एनकेरे जिंमे ना लेइयां, एन ज़ोनेरां पत्ती सैतफुसेरी मौवत भोई जेई, ते सावल सैन्तफनुसेरे कतल केरने मां खुशी थु।

कलीसियाई पुड जुलम

8 तैस्से दिहाडे युरोशलमेरी क्रीस्याइ पुड जुल्मां केरो सिलसिलो शुरु भोइ जेव, चले ता हारे मसही लोक युहुदिया ते सामरी आलाके मां बेंटोइ जे? 2 किछ रोडे मैन्हैइ सैन्तफनुसेरी लाश नैहीतां देबतां छडी, ते तैसेरे मरने पुड बडो मातम भोव। 3 उरहां सावले क्रीस्यां ऊजैडनी शुरु की ते तै घर घर गहतो थु, ते मडदन ते कौन्शन बेरोहुं घसीटतो थु, ते कैद केरतां छडतो थु।

सामरिया मां फिलिप्पुसेरो प्रचार

4 क्रीस्यारे लोक तित्तर बित्तर भोनेरे पत्ती जैडी जैडी जे ता परमेशरेरु बचन लोकन शुंनाते चले। 5 फिलिप्पुस सामरियारे एकी शहरे मां जेव, ते तैडी परमेशरु बचन शुंनानु शुरु कियुं। 6 जैखन तैन लोकेइं फिलिप्पुसेरी गल्लां शुंनी, ता तैनेइं आजीब आजीब कंमां लहं ता लोक बेडी खुशी सैहीं तैसेरे पासे

बेदलोंने लगे। 7 ते किछ लोक बीमार ते किछ टोंटे थिये, ते काही लोकन मां दुष्टात्मां भी थी, ते तैना दुष्टात्मां चींटां मैरती नेशी जेई ते बडे लोक आध्रांगी ते टोंटे बेझोई जे। 8 ते तैनकरे वजाही सैहीं शाहरे लोकन बडी खुशी भोईजेई।

जादूगर शमौन

9 बडे चीरें देंते शुमौन नोवेंरे एकी मैने सांमरियारे शहरे मां सारे लोक अपने जेदेइं सैहीं हेरान कियारे थिये, ते तै ज़ोतो थु, की आंव अक बडो मैन्हुंहीं। 10 नीके बडे सभ तैसेरे पासे भोइतां ज़ोने लगे की एह मैन्हुं मां बडी कुदरुते" जै सच ज़ोते। 11 किजोकी तैनी अपने जेदु सैहीं सभ हेरान कियारे थिये, एल्हेरलेइ लोक तैस बडे ईजतारे काबल समझने लगे। 12 पण जैखन फिल्पुसे परमेशरेरी बादशैहीयरी ते यीशु मसहीएरो परचार केरनां शुरु कियो ता सारे लोकेइं मडदेइं कौन्शेइं विश्वास कियो ते बपतीसमों नैने लगे। 13 शुमौने एपु भी विश्वास कियो, ते बपतीसमों नैइतां फिल्पुसे सैहीं साथी चलो ते तै बड़ां आजीब आजीब कंमा हेरतां हेरान रेही जेव।

सामरिया मां पतरस ते यूहन्ना

14 जैखन युरोशलमें मां चलेइं शुनु की सांमरियारे लोकेइं परमेशरेरु बचन कुबुल कियेरुए ते तैनेइं पतरस ता युहन्ना तैन का भेजे। 15 जैखन तैना तैडी पुज्ज ता तैनेइं तैन लोकां केरे लेइ दुवा की, की एन पुड पाक रुहु उतरे। 16 एल्हेरलेइ की तैन पुड पाक रुहु आजतगर उतरारी ना थी, तैनेइं सिर्फ परमेशर यीशु मसहीएरे नोवें सैहीं बपतीसमों निहीयोरो थु। 17 तैखन पतरसे ते युहन्ने तैन पुड हथ रेखतां दुवा की, ते तैन भी पाबित्र आत्मां उतरी। 18 जैखन शुमौने हेरु की चेलां केरे हथ रखने सैहीं पाबित्र आत्मां उतरचे, ता शुमौने पैइसे एन्हता चलन का पैश कियो। 19 ते शुमौन ज़ोने लगे, की मीम्हीं आख्तीयार देथ, की आंव भी जैस पुड हथ रेखी ता तैस पुड पाबित्र आत्मां उतरे। 20 तैखन पतरसे जुवाब दितो, तेरे रुपेइए तीसैहीं साथी गर्क भोन, किजोकी तु रुपेइयेइं सैहीं परमेशरेरी इही नियामत घिन्नी चहतां। 21 एस बारे मां तेरो कोई भी हेसो नेहीं किजोकी तेरो मन परमेशरे का साफ नेहीं। 22 तु एपनी इस ब्दनीति केरां बाज़ एई, ते तोबा केर, ते परमेशरे का दुवा केर ताके तै शैहीद तेरी इस बुरी नीतारे लेई तीं माफ़ केरे। 23 किजोकी आंव हेरतांइ की तु शैहीद केंची गलत आध्रमें मां फ्सोरोस।

24 तैखन शुमौने जुवाब दितो, मेरे लेइ परमेशरे का दुवा केरा, की जैन किछ तुसेइं ज़ोवरुए, तैन मेरे पैश ना एजे। 25 जैखन चले बचन शुनेइतां ते गुवाही देइतां वापस युरोशलमें मां आए, ता बत्ते सैमरी केरे कैही इलॉवन म्मेहीं परमेशरो सुसमाचार शुनाते जे।

फिल्पुस ते कूश मुल्के मां आधिकारी

26 फिरी एरहु भोंवं की परमेशरे एकी फरिशतें फिल्पुसे सैहीं ज़ोव, की उठ ते जुनुबेरी बत्ता गा ज़ै बियाबांने म्मेहीं उर्रजा जेई गहचे। 27 फिल्पुस उठो ते चलो जेव, ते बत्ते मां तैस अक जशी खोजो मैल्हो, जै जैशी केरी मलका कंदाकेरो बजीर थु, ते तैसेरे सारे खज़ांना केरी हेरगेश तैसेरे जिमें थी, एह मैन्हुं युरोशलमें मां प्राथना केरने एवरो थु। 28 ते हुनी तैठां वापस एइतां घरजो चलोरो थु, ते तै अपने रथे पुड चैइतां चलोरो थु, ते ईसाया नेबेरो सबक पडने लगेरो थु। 29 पाबित्र आत्मां फिल्पुसे हुकम दितो, की नेडे गैहीतां रथे सैहीं साथी चला। 30 फिल्पुस दोवडतां रथे का नेडे पुजो, ता रथे बाले कैरां ईसाया नेबेरो किसो पडतो शुनो, ते फिल्पुसे तैस पुछ, जैन किछ तु पडने लगेरोस तैन समझतां भी? 31 तैनी ज़ोव, आंव समझानेरे बगैर कैचरे संमझी सख्तां, तैनी फिल्पुसे का मिनत की की एई रथे पुड बिश। 32 पाबित्र कताबी मैरां जैन तै पुडने लगेरो थु, ता तैन इन थु, तैनेइं तै भैडारो ज़ैरो मारने जो निहीयो, जैचरे गब्बोव एपनी उन्ना बरधाने बालां केरे सामने चूप केरते, एचरे ते भी आपनु आशी ना खोल्हेलो।

33 तैसेरी कमजोरारी वजाही सैहीं तैसेरो कोई इन्साफ ना भोव, कौन तैसेरी ओवलाधरो हाल शुनाल्हो? किजोकी धेरती पुडरां तैसेरु नोव संवा मटेवरुए। 34 खोजें फिल्पुसे सैहीं ज़ोव, मेरभानी केरतां मीसैहीं ज़ो की एह नबी कसेरे बारे मा ज़ोते, अपने या होरी केंचरे बारे मां ज़ोते? 35 फिल्पुसे

किताबरे तैस सफे कैरां शुरु केरतां यीशु मसहीएरे बारे मां सुसमाचार शुनाव। 36 बत्तां चलते चलते तैना एकी एरही ठैरी पुजे जैडी पानी थु, खोजें ज़ोव, और इडी पानीएं हुंनी मीं बपतीसमों नैने कैरां कौवन रोकी सखते?

37 फिल्पुसे ज़ोव, अपने दिले जानी सैहीं विश्वास केरतस ता बपतीसमों नैही सख्तां, तैनी जुवाब दितो, आंव विश्वास केरताइं की यीशु मसही परमेशरेरु मडुए। 38 फिरी तैनी रथ रोकनेरे लेइ हुकम दितो, ते खोजो ते फिल्पुस दुईये पैनी मां जे, ते फिल्पुसे तैस बपतीसमों दितो। 39 जैखन तैना पैनी मैरां बेइर निसे ता परमेशरेरी पाक रुहां फिल्पुस तैठां स्ल्लहो, ते खोजे तै फिरी ना लाहू किजोकी तै बेडी खुशी सैहीं वापस चलोरो थु। 40 ते फिल्पुस आशदुदे म्मेहीं निसतो चलतो सारे इलॉवन मां सुसामाचार शुनातो कैसे मां पुजो।

शाऊलेरो मन बेदलों

(प्रेरितां 22 : 6 - 16 ; 26 : 12 - 18)

9 एस दोवराने मां सावल परमेशरे चलन मारनेरी धंम्की देतो रहतो थु, ते तै सावल सरदार कंहींने का जेव। 2 ते तैस कैरां दंश्केरे प्राथना भवनेरे लेइ चिड्डी मगी, की एल्हेरलेइ अगर कोई यीशुएरो चेलो या कोई होरो एन कंम केरतो लाहे, चाहे तै मडद भोए, या कौन्श, तैस टलेइतां युरोशलमें मां आन्हें। 3 जैखन तै चलतो चलतो दंश्केरे नेडे पुजो ता, आचानक आम्ब्रेरां लौ आई ते सावलेरे चोवरे पासन चमकने लगी। 4 सावल तल्ले मां खिरको ते तैस अक आवाज़ आई, औ सावल औ सावल तुमीं कीजो सत्तातस? 5 सावले पुछ औ परमेशर तु कौवनस? तैनी जुवाब दितो आंव यीशुआंहीं जैस तु सतातस। 6 उठ ते शहरे मां गा तैडी आंव तीजो ज़ोहिलो की तीं कुन केरनुए। 7 जैना लोक सावले सैहीं साथी थिये, तैना चूपचारे खडे रेहीजे, तैन आवाज़ ता शुनोती थी, पण लैहियोतु किछ भी ना थु। 8 तैखन सावल तल्ले मैरां खडउठो ता तैनी एपनी एछी घैडी ता तैस किछ भी ना लगे लैहियोने, ते तैसेरे सैथेइं हथेरां टलेइतां दंश्के मां पूजाव। 9 तैस टलेइ दिहाड़न तगर किछ ना लगे लैहियोने, ते तैनी खानु पीनु भी शैरी छडु।

10 दंश्के मां यीशुएरो अक चेलो रहतो थु, जैसेरु नोव हंनानियां थु, परमेशरे तैस आत्माइं मां ज़ोवरु थु, औ हंनानियां तैनी ज़ोव, हां परमेशर जो। 11 परमेशरे तैसजो ज़ोव, उरहां गा जैस्जो सीधी बत्त ज़ोल्ल, तु युहुदेरे घरे गा तैडी सावल नोवेंरो अक मैन्हुंए, जै तिसस शाहरेरो रहने बालोए, तु तैसेरे बारे मां पुछां, किजोकी हेरां ते दुवा केरने मां मस्ते। 12 तैनी आत्माइं मां हंनानियां नोवेंरो अक मैन्हुं एइतो लाहोरोए, ते एपु पुड हथ रखतो लाहोरोए की तै एपनी एछेंइं सैहीं फिरी लाहे। 13 हंनानियांए ज़ोव, औ परमेशर मीं एस मैनेरे बारे मां लोकन कैरां बेडी गल्लां केरती शुनोरीन, ते एन भी की एनी तेरे लोकन सैहीं युरोशलमें मां कुन कुन बुरु कियेरुए। 14 एस सरदार कंहींने कैरां आख्तीयार मैल्होरोए, की इडी भी जै तेरु नोव घिन्ते, तैस गिरिफ्तार केरे। 15 पण परमेशरे हंनानियांए सैहीं ज़ोव, गा किजोकी मीं तै मैन्हुं चुनोरोए, ताके तैसेरे ज़िरये सैहीं गैर ज़ातन मां ते बादशैहीन ते बनी इस्त्रैएलन मां मेरे नोवेंरी जेए जए कार भोए। 16 आंव तैस समझैइल्हो की तैस मेरे नोवें सैहीं केत्रो दुःख झैल्नो पैनोए। 17 तैखन हंनानियां जेव, ते तैस घरे मां दाखल भोव, तैनी अपने हथ सावले पुड रखे ते ज़ोव, एह मेरे इला सावल, जैखन तु इरहां एवरो थु ता तीं बत्ती मां परमेशर यीशु मैल्होरो थु, तैनी आंव इडी भेजोरोहीं, ताके तीं फिरी लैहियोए ते पाबित्र आत्माइं सैहीं भरपूर भोस। 18 तैखन सावलेरी एछन मैरां जैरां शेकड़ां झड़ां ते सावल लहने लगे, तैखन सावले खडउठतां बपतीसमों निहीयो। 19 ते किछ रौट्टी खेइतां तैस हीमत आई,

दिमश्के मां शाऊलेरे ज़िरिये प्रचार

ते किछ दिहाड़े तै चलन सैहीं साथी दंश्के मां राहु। 20 तैसेरां बाद सावले प्राथना भवने मां प्रचार केरनो शुरु कियो, की यीशु मसही परमेशरेरु मडुए। 21 जैत्रेइं सावलेरु नोव शुनु, ता तैना सभ हेरान भोइतां पुछने लगे, कुन एह तैहे मैन्हुं ता नेहीं जै युरोशलमें मां परमेशरेरु नोव घिन्ने बालन मारतो थु? ते तै इडी भी तैल्हेरलेइ ता नेहीं एवरो की एन लोकन टलेइतां सरदार कंहींना केरे हवाले केरे? 22 एसेरां बाद सावल मजबूत भोंतो जेव, ते एह गल की यीशु ही मसहीए ते सावल दंश्केरे रहने बाले युहुदीन भरोसो देंतो राहु।

23 जैखन बड़े दिहाड़े बीते ता युहुदेइं मिलतां सावल मारनेरो मुशोरो कियो। 24 तैना रात दिहाड़ी तैस शाहररे चौवरे पासन तोपते रहते थिये, की कौड़ी हथे लग्गे, पण सावले तैनकेरो पत्तो लगोरो थु। 25 तैखन सावलेरे चलेइं राती टोकरी मां छैडतां रस्से सैहीं टोकरी मां औसैलतां बुन पूजाव।

यरुशल्लेमें मां शाऊल

26 जैखन सावल युरोशल्लेमें मां पुजो ता तैन चलन मां शामल भोनेरी कौशिश की, पण सभ तैस केरां डरते थिये, किजोकी तैन यकीन ना थुं एडतु की तै सच्चै यीशुएरो चेलो बनोरोए। 27 पण ब्रनबासे सावल एपु सैहीं साथी चलन का आन्हों ते तैन जोंव की केंचरे सावले बत्तां चलते चलते परमेशर लाहोरोए, ते परमेशरे तैस्सैहीं गल्लां कीयोरिन, ते तैनी केतरी खुशी सैहीं दंश्के मां यीशुएरे नोवेंरो प्रचार कियोरोए। 28 तैखन सावल युरोशल्लेमें मां तैन सैहीं मीलतो जुलतो राहु ते बेडी खुशी सैहीं प्रचार केरतो राहु। 29 ते युनानी बोली केरने बाले युहुदन सैहीं भी गलबात केरतो थु, पण तैना तैस मारनेरे लेइ टिकारे थिये। 30 जैखन मसही डुलांन पत्तो लग्गे ता तैनेइं तै कैसरे मैडो निहीयो ते तैठां तिरस्से जो भेजो।

31 ता सारे युहुदिये आलाके मां ते गलील ते सांमरियारी कलिस्साई मां चेंन भोई, ते पाबित्र आत्माइं मां ते तेधाती मां बधती ते पक्की भोंती जेई, ते परमेशरे डरे मां रेहितां जिंदगी गुजारने लगे।

लुद्धा ते याफा मां पतरस

32 जैखन पतरस काही डलोवन म्मेहीं चलतो चलतो लुद्धा मां रहने बाले बुजुरग्र का पुजो। 33 ता तैस तैडी आनियस नोवेंरो अक मैन्हुं मैल्हो, तै बीमार थु, ते आठे सालां केरो देंतो खड़ी पुड़ राहोरो थु। 34 पतरसे तैसजो जोंव, औ आनियस यीशु मसही तीं शिफा देते, उठ आपनु बछान खडु केर, तै तैखने तै बेडोइतां खडो भोव। 35 तैखन लुद्धा ते शारुनेरे रहने बालेइं एन हेरतां परमेशरे पुड़ विश्वास कियो।

36 याफा डलोवें मां अक कौन्श थी, जैसारु नोंव तबिता थुं, (युनेनि मां तैसजो हिरनी जोतन) जै बिचारी रोड़े कंमन मां ते गरीबां केरी सेवाइंमां लगोरी रहती थी। 37 तैने दिहाड़न मां तै बीमार भुई, ते मैरी जेई, ते तैसारी लाश नैहीतां बह कमरे मां रखोरी थी। 38 लुद्धा याफारे नेडे थुं, ते जैखन चेलेंइं शुंनु की पतरस लुद्धा माहें, ता दुई मैन्हुं भेजे की मेरभानी केरतां जल्दी एई। 39 पतरस तैन सैहीं साथी चलो जेव, ते जैखन तैडी पुजो ता तै बह तैस कमरे मां निहीयो, सेरी रेंडी कौन्शां लेरां देती थी, ते तैस डलखमेइं खेडी थी, ते तैना लिगड़ां जैना तबितां सियारां थियां हेराने लेगी। 40 पतरसे तैना सभ कमरे मैरां बेरोहू कढां, ते एपु जेंधु केरे भारे दुवा केरने लगो, फिरी तैनी लाशारे पासे तुत्तर फरेइतां जोंव, औ तबिता उठ तबितां एपनी एछी खोल्ही ते पतरसे तेकतां खडी भुई। 41 पतरसे हथेरां टलेइतां खडी की ते विश्वासी ते रेंडी कौन्शां कुजेइतां तबिता जिंती तैनकेरे सुपुर्द की। 42 एस गल्लरी खबर सारे याफा मां फैली जेई, ते बड़े लोकेइं परमेशरे पुड़ विश्वास कियो। 43 पतरस किछ चीरे तगर याफा मां शुंमौन नोवेंरो अक मैन्हुं चमडो रंगने बालेरे का राहु।

कुरनेलियुस पतरसे कुजाते

10 कैसरे मां अक मैन्हुं थु, तैसेरु नोंव कुरनेलियुस थुं, ते तै अक इतालुवी फौवजरो कपतान थु। 2 कुरनेलियुस ता तैसेरे घरु सारु टबर परमेशरे केरां डरने बाले थिये, कुरनेलियुस लोकन बडु दान देतो थु, ते परमेशरे का लगातार दुवा करतो रहतो थु। 3 एकी दिहाड़े कुरनेलियुसे दिसां अक परमेशरेरी रुया लाही, तैनी तैस्मां रोड़े चारे हेरु की अक फरिशतो तैस्का आव, ते जोंने लगो, औ कुरनेलियुस। 4 कुरनेलियुसे डेरतां तैसेरे पासे तकु, ते पुछने लगो, औ परमेशर जौ, कुन गल्ले, फरिशते जुवाब दितो, तेरु दान ते तेरी दुवां परमेशरे का पुजोरीन। 5 तु हुनी किछ मैन्हुं याफा भेजतां तैस मैन्हुं जैसेरु नोंव शुंमौन पतरसे अपने का कुजा। 6 तै शुंमौनेरे घरे बिशोरो थु, जै चमडो रंगनेरु कंम केरतो थु, ते सुमुंदेरे बन्ने रहतो थु। 7 जैखन फरिशतो एना गल्लां केरतां चलो जेव, ता कुरनेलियुसे अपने दुई नोकर ते अपने सिपेहीन

मैरां अक भलेमांनस जैरो सिपाही कुजाव। 8 ते तैन सारो बिस्तार शुनाव जै तैनी लाहोरो थु, ते तैना याफारे पासे भेजे।

पतरसेरु दर्शन

9 होरसां जैखन तैना चलते चलते एकी शाहरे नेडे पुजे ता, तक्रौबन दुपाहरेइं पतरस बह छती पुड़ जेव, ताके दुआ केरीं। 10 तैस दलुख लगोरी थी, ते किछ खानु चहतो थु, पण जैखन मैन्हुं रौडी बनाने लगे ता तैस बैहोशी जैरही भोई जेई। 11 तरस तकने लगो की आम्बर साफे ते अक चादर चौवरे कुन्ना टेंगोरी आम्बरेरे पासेरां कुन्डी जमीनरे पासे ऐवरीए। 12 तैसमां जमीनरे सारे जानवर ते कीडे मुकोडे ते हावारां चुडौलु तैस चादरी मां थियां।

13 तैखन अक आवाज आई, औ पतरस औ पतरस उठ ते एन कट ते खा। 14 पण पतरसे जुवाब दितो, नेहीं परमेशर कधे नेहीं, किजोकी मीं आज तगर कोई भी हैराम चीज नेहीं खेवरी। 15 तै आवाज तैस्जेई फिरी आई, की तू केंची भी चीजी जो जै परमेशरे बनेवरीए, तै पाके तु तैसजो हैराम ना जौइयां। 16 टलेई बार एह आवाज आई, ते फिरी ते चादर आम्बरेरे पासे चली जेई।

17 पतरस दिले मां सोचने लगोरो थु, की एह केरही रुयाये, जै आज मीं लाही, एतरे मां कुरनालियुसेरे भेजारे मैन्हुं शुंमौनेरु घर तोपते तोपते दारे मां पुजे। 18 तैनेइं हक देइता पुछू, शुंमौन जैसजो पतरस जोतन इडी तुसांन काहे? 19 हेजु पतरस एपनी रुयारे बारे मां सोचने लगोरो थु, ता पाबित्र आत्मां तैसजो जोंव, शुंमौन टलाई मैन्हुं तीं पुछने लगोरेन। 20 खडो उठ ते बुन गह, तैन सैहीं साथी गहने केरां ना डेरां, किजोकी तैना मीं भेजोरेन। 21 पतरस बुन आव, ते तैन मैन्हू सैहीं जोंने लगो, जैस मैन्हुं तुस पुछने लगोरेथ तै आवेइं, ते तुस कीजो एवरेथ? 22 तैनेइं जुवाब दितो, असां कपतान कुरनालियुसेरे भेजारे एवरेंम, तै अक धर्मी मैन्हुंए ते परमेशर मन्ने बालोए, सारे युहुदी तैसेरी तारीफ केरतन, एकें पाक फरिशते तैस जो जोंवरुए, तु शुंमौन पतरसे अपने घरे कुजेइतां तैसेरी गल्लां शुंना? 23 तैखन पतरसे तैना आंतर कुजाए ते तैनकेरी खातरदारी की।

कुरनेलियुसेरे घरे मां पतरस

होरसां पतरस तैन सैहीं साथी चलो जेव, ते याफा मैरां भी काही दूला तैस्सैहीं साथी चले जे। 24 दुईयाव दिहाड़े तैना कैसरे मां पुजे, कुरनालियुस तैन बलाने लगोरो थु, ते तैनी अपने रिशतेदार ते अपने दोसत भी कुजेइतां आन्होरे थिये। 25 पतरस जैखन कुरनालियुसेरे घरे पुजो, ता कुरनालियुसे तैसेरी बडी आदर खातरी सैहीं ईजत की, ते करोड़ा सैहीं तैसेरे पाव बन्ते। 26 पण पतरसे तै खडो कियो ते जोंव, खडो भो किजोकी आंव भी ता अक मैन्हुंइं। 27 फिरी तै कुरनालियुसे सैहीं गल्लां केरतो आंतर जेव, तैडी बडे लोक बिशोरे थिये। 28 तैनी तैन सैहीं जोंव, तुसन प्तोए की केंची युहुदेरो गैर युहुदी सैहीं मिलनु जुलनु ठीक नेहीं, पण परमेशरे मीं सैहीं जोंवरुए की आंव केंची मैन्हुं जो गदो या नापाक ना जोंइं। 29 एल्हेरलेइ तुसेइं आंव कुजाव ता आंव चुप चारे चलो आव, कुन आंव तुसन पुछी सखतां की तुसेइं आंव कीजो कुजेवरोइं?

30 कुरनालियुसे जोंव, आंव चौवर दिहाड़े पेहीले अपने घरे मां हूनेरे मोके कोई टलेई बजेइं दुवा लोरो थु केरने, ता आचानक अक मैन्हुं चमकतो कुर्तो लगोरो मेरे तुत्तरे अगर खडो भोव। 31 ते जोंने लगो, औ कुरनालियुस परमेशरे तेरी दुवा शुंनोरीए ते तेरु दान भी कुबुल कियेरुए। 32 केंची याफा मां भेजतां शुंमौन जैसजो पतरस भी जोतन, अपने का कुजा, तै शुंमौनेरे काहे जै चमडो रंगनेरु कंम केरते, ते सुमुंदेरे बन्ने रहते। 33 एन शुंन्ते मीं तु कुजाव ते बडु रोडु भोंव की तु एज्जी जेव, ते असां सभ परमेशरे का हाजूम, ते चहतंम की जैन किछ परमेशरे तीं सैहीं जोंवरुए, तैन रोड़े चारे शुंनम।

पतरसेरी तालीम

34 जैखन पतरस जबान खोलतां जोंने लगो, ता पतरस एपु बुझी जेव, की परमेशर केंचोरो तरफदार नेहीं। 35 जै कोई परमेशरे केरां डरते, ते रोड़ां कंमा केरते, भावें तै केंची भी जातारो की ना भोए, तैस पुड़ खुशी भोते। 36 परमेशरे बनी ईस्त्रेएलन का आपनो बचन भेजो, ते यीशु मसहीएरे जिरये सैहीं जै सैभी

केरो परमेशरे सुल्हारो सुसमाचार शुंनाव। 37 युहन्नेरे बपतीसमेंरी मनादी केरने केरां देइतां जैन किछ भोंव, सारे युहुदिये मां पत्तोए, ते एनता तुस भी जानतथा। 38 केंचरे परमेशर यीशु नासरी पाबित्र आत्मांइं सैहीं ते कुदरुति सैहीं भरपुर कियो, ते ठारी ठारी गैहीतां लोकां केरु भलु केरतो राहु, तैना सभ जैना शैतानेरे जाले मां फासोरे थिये, तैन शीफा देतो थु, किजोकी परमेशर तैस्सैहीं साथी थु। 39 तैनी जैन किछ युहुदी केरे मुल्खे मां ते युरोशल्लेमां मां कमाव, असां तैसेरे शाहादतम, ते तैहे तैनेइं सलेबी पुड़ टेंगतां मारो। 40 परमेशर तैहे यीशु ट्लेंइयाव दिहाड़े फिरी जितो केरतां हेराव।

गैर कौमन पुड़ पवित्र आत्मा उत्रनी

41 तै सैरी कौमीं पुड़ नेहीं बलके तैन गुवहांन पुड़ जैहीर भोव, जैना तैनी पेहीले चुनतां रखोरे थिये, येनी असां जैनेइं तैसेरे मुड़दन मैरां जिते भोनेरां बाद तैस्सैहीं साथी रौट्टी खेवरी थी। 42 ते हुकम देंन की असंन लोकन मां सुसमाचारेरी मनादी केरने ते गुवाही देंन, की सिर्फ अक यीशुए जै परमेशर जितो कियोरो, ते मुड़दां केरो जैज बनेवरोए। 43 सारे नबी तैसेरे बारे मां गुवाही देतन, की जै कोई तैस पुड़ विश्वास केरते ता तैसेरे नोवें सैहीं पापां केरी माफी मैल्हचे। 44 पतरस हेजु एन ज़ांतो थु, ता पाबित्र आत्मां तैन पुड़ उतरी, जैना बचन शुंने लोरे थिये। 45 पतरसे सैहीं साथी एजने बाले युहुदी जैना मसही बनोरे थिये, तजब केरने लगे, की गैर युहुदन भी पाबित्र आत्मांरी नियांमत मैल्होरी। 46 किजोकी तैनेइं गैर युहुदी केरी जैरही आजीब आजीब बोली केरते, ते परमेशररी तारीफ करते शुंनोरी थी, तैखन पतरसे ज़ांव। 47 जैचरे असंन पाबित्र आत्मां मैल्होरीए तैचरे तैन भी मैल्होरीए, कुन कोई एन मैन्हु पेंनेरो बपतीसमों नैने केरां रोकी सखते? 48 एल्हेरलेइ तैनी हुकम दितो, की एन यीशु मसहीएरे नोवें सैहीं बपतीसमों देथ, तैखन तैनेइं पतरसे का मिनत की की किछ दिहाड़े असंन का हेजु बिश।।

पतरसेरे ज़िरीये कम्मैरी स्पष्टी

11 युहुदिये मां रहने बाले चलेइं ते मसही दलांइं एह खबर शुंनी ता गैर युहुदेइं भी परमेशररु बचन कुबुल कियुं। 2 ते जैखन पतरस वापस युरोशल्लेमां आव, ता सुंती बशाल्होरे युहुदी जैना मसही बनोरे थिये, ता पतरसे सैहीं बेंस केरने लगे। 3 की तु बगैर सुंती बशाहलोरे लोकन का जेव, ते तैन सैहीं साथी बिशतां रौट्टी भी खाई। 4 पतरसे तैन सैहीं सारो बिस्तार पत्रां देतो ते आखिरी तगर एंचरे शुंनाव। 5 आंव याफा शाहरे मां आंव, दुवा केरने मां मघंन थु, ता मीं किछ बेहोशी जैरही भोइजेइ, ते मीं अक सुपनु जैरु लाहू, ते हेरताइं की अक चादर जैरही चौवरे कुन्ना टेंगोईतां आंम्ब्रेरे पासरां ऊंढी ओसती ओसती मीं तगर पुजी। 6 आंव तैस्मां तकने लगे ता कुन हेरताइं की, तैस्मां जमीनारे सारे चौवरे जांघेइं चलने बाले जानबर ते कीडे मुकोडे ते उडरने बालां चुडौलु तैसमा थियां। 7 तैखन मींजेइ अक आवाज आई, जै जौने लगी, की औ पतरस खडो उठ ते इन कट ते खा। 8 मीं जुवाब दितो, औ परमेशर कधे नेहीं, किजोकी मीं आज तगर कोई भी गंदी या हैराम चीज आज तगर अपने ऐशी मां नेहीं छडौरी। 9 दुई बार तै आवाज आंम्ब्रे मैरां मींजेइ आई, ते जौने लगी, की जै चीज परमेशरे पाबित्र बनेवरीए, तू तैस्जो हैराम ना जौंइयां। 10 एह आवाज ट्लेईं बार आई, ते फिरी तै चादर आंम्ब्रेरे पास खिंचोइतां चली जेई ? 11 ठीक तैस्से मोक ट्लाईं मैन्हु जैना कैसरे मैरां मीका भेजोरे थिये, तैस घरे का सामने खडे भुए, जैडी असां बिशोरे थिये। 12 पाबित्र आत्मां मीं जौंव, बैधडक चारे एन सैहीं साथी गा, ऐना शा दला मीं मीं सैहीं साथी आए, ते असां तैस मैनेरे घरे जे। 13 तैनी असंन सैहीं जौंव, की केंचरे सैहीं तैनी अक फरिशतो घरे लाहू ते जौने लगे, याफा मां केंची मैन्हु भेजतां शुंमौन जैसजो पतरस जौतन तैस अपने घरे कुजा। 14 तै एइतां तीं अक एरहो बिस्तार देल्हो, जैसेरे जौने सैहीं तेरी खानदेंनरे सारे मैन्हु केरे पापां केरी मुखती भोल्ही। 15 जैखन मीं तैडी गैहीतां सुसमाचार शुंनानो शुरु कियो, ता पाबित्र आत्मां तैन पुड़ उतरी, जैचरे पैहीले असंन पुड़ उतरारी थी। 16 तैखन मीं तै वचन याद आव; जै तैने जौवरो थु; कि यहूना त पैनी सीं पबतीसो दितो; पर तुस्न पवित्र आत्मांइं सैहीं बपतीसमो मैल्हेलो | 17 बस्सा अगर परमेशर तैन भी तैहे नियांमत दितो, जै असंन परमेशर यीशु मसही पुड़

विश्वास केरने सैहीं मैल्ही, ता आंव कौन भोताइं की परमेशर बत्ती मां ठोकर बेंनी। 18 जैखन तैनेइं एन शुंनु ता चुप रेही जे, ते परमेशररी तारीफ केरने लगे तां ता सच्चे की परमेशर गैर युहुदन भी तोबा केरतां जिंदगी हासल केरनेरी हिंमत दितोरीए।

अन्तियाारी कलीसिया

19 ता तैना लोक जैना तैस दुखरे मारे जैसेरी शुरुवात सैंतफुसे कियोरी थी, तित्र बित्र भोईजे, ते चलते चलते फनीके कुबुसे ते इनताकिया तगर पुजे, पण तैना परमेशरो सुसमाचार सिर्फ युहुदने शुंनाते थिये। 20 तैन मां किछ कुबुसेरे ते किछ कुरेंनेरे थिये, इनताकिया मां गैहीतां युनेणन भी परमेशर यीशु मसहीएरो सुसमाचार शुंनाने लगे। 21 परमेशररी हथ तैन पुड़ थु, ते बडे लोकेइं विश्वास कियो, ते परमेशररे पास बेदलोईजे। 22 एसेरी खबर युरोशल्लेमांरी क्रीसयारे लोकां केरे कंनण तगर पुजी, ते तैनेइं ब्रनबास इनताकिया मैजो भेजो। 23 जैखन तै तैडी पुजो ता परमेशररो चमतकार हेरतां बडो खुशी भोव, ते तैन हिंमत दितो की अपने पुरे दिले सैहीं परमेशररे वफादार राथ। 24 ब्रनबास अक रोडो मैन्हु थु, ते पाबित्र आत्मांइं सैहीं भरपुर थु, ते बडे लोक परमेशररी क्रीस्याईं मां शामिल भोने लगे। 25 तैसेरां बाद ब्रनबास सावलेरी तलाशी मां त्रस्स जो चलो जेव। 26 तैनी सावल तोपतां इनताकिया मां आंन्हों, तैडी तैना एकी साले तगर दुइये ज़ांन्हें क्रीस्याईं मां लोकन तालीम देते राहे, ते मसहीएरे चलन जो इनताकिया मां पैहीली बार मसही जौने लगे।

27 एस्से दोवराने मां इनताकिया ते युरोशल्लेमां मैरां किछ नबी आए। 28 ते तैन मैरां अक जैसेरु नोव आम्बुस थुं, ते खडे भोइतां ते पाबित्र आत्मांरे जौने सैहीं एन जौंव, की सैरी दुनियाईं मां अक बडो काल पैंनोए, एरहो जैरो काल कैसर कलौदेसेरे जमाने मां भी पैवरो थु। 29 तैल्हेरलेइ चलेइं फैसलो कियो की, असंन मैरां हरकोई एपनी एपनी शिधारे मुताबक किछ दान देथ, ताके युहुदिये मां रहने बाले मसही दलां केरी मादत भोई सखे। 30 बस्सा तैनेइं किछ रकम आकोटी की ते ब्रनबास ते सावलेरे हथे युरोशल्लेमांरे बुजुर्गन केजो भेजी ।।

पतरसेरी जेलरां मुक्ति

12 तैने दिहाडन मां हिरोदेस बादशाहें कलिस्थारे किछ मैन्हु पाबंद भी किये, ताके तैन सज़ाह दे। 2 ते युहन्नेरो दला याकुब तलवारी सैहीं कल्ल कराव। 3 जैखन तैनी हेरु की युहुदन एह गल बडी खुशी आई, ता तैनी ईद फित्रारे दिहाडन मां पतरस भी पाबंद कमाव। 4 पतरस पाबंद केरनेरां बाद हिरोदेसैं तै जैल्ही मां छडौं, ते तैसेरी निगरनारे लेइ चैवर गुरुप बनाए, हर गुरुप चैवर चैवर सिपेही केरो थु, हिरोदेसेरो खियाल थु की ईद फासहीएरां बाद तै जैल्ही मैरां कैढतां लोकां केरे सामने पैश केरेल्हो। 5 पतरस ता बडे पैरहे मां थु, पण सारी कलिस्थ्या तैनकेरे लेइ परमेशर का दुवा करने लगेरी थी।

6 हिरोदेसेरे पतरस लोकां केरे सामने आंन्हने केरां पैहीले अक रात जैखन पतरस दुई पैरहेदारां केरे मुंझाटे बंधोरो झूलोरो थु, ते सिपाही जैल्हरी डेवढी पुड़ पैरहो देते थिये। 7 ता आचानक परमेशररो फरिशतो जैल्ही मां आव, ते सारी कौठी ट्लाकड ट्लांच भुईं, फरिशते पतरसे खिती देइतां बिंझाव ते जौंव, उठ ते लुश केर, ते शंगलां पतरसेरे हथन सैहींयेरां खुलोरी थी। 8 फरिशते पतरसे सैहीं जौंव, हिंमत केर ते जुटी ला, पतरसे तैन्ने कियुं, ते फिरी जौंव आपनो चोगो ला ते मीं पतपती एई। 9 पतरस फरिशते पतपती जैल्ही मैरां बेइर आव, पण तैस एह पत्तो ना थु, की फरिशतो जैन केरने लगेरोए एन सच्चे या कोई सुपनु हेरने लगेरोइं। 10 तै पैरहेदारां केरे दुई फैटकन मैरां बेइर निस्तां अव, ते लौंहेरे फाटके का पुजो, जै शहरेरे पास खुलतो थु, तै फाटक तैनकेरे लेइ अपने आप खुलो, ते तैना तैतां निस्तां दुर पुजे, फरिशतो पतरसे तैडी पुजेइतां गैईब भोइजेव। 11 पतरसे जैखन हौश आई, ता जौने लगे, हुनी मीं पुरु यकीन आंव, की परमेशर आपनो फरिशतो भेजतां आंव हिरोदेसेरे हथे मैरां छुटाव, ते युहुदेइं जैन सोचेरु थुं, तैन बन्ने ना दीतु।

12 जैखन तै एस बारे मां सोचने लगोरो थु, ता मरियमरे घरे पुजो, जै युहनेरी आम्मा थी, जैसजो मरकुस जोते थिये, तैडी बड़े लोक अकोठे भोइतां दुवा केरने लगोरे थिये। 13 पतरसे बेइरुं दार गुडकावं ता अक कुई जैसारु नोवं रुद्ध थुं, दार खोलने आई। 14 तैस कुईयां पतरसेरी गल शुनी ता बगैर दार खोलनेरां दोवडती खुशी भोइतां आई, ते जौने लगी, पतरस बेइर दारे मां एवरोए। 15 तैना मैनुं जौने लगे, तु कुन पागल भोवरीस, पण जैखन तैसां रोडे चारे जौव, की तै पतरसे, ता तैना जौने लगे पतरस ता नेहीं पण पतरसेरो फरिशतो भोल्हो। 16 ते पतरस बेइर दार गुडकांता राहु, ते जैखन तैनेइं दार खोलु ता पतरस लैहीतां हेरान रेहीजे। 17 पतरसे तैन जो हथे सैहीं इशारो कियो, की चूपरहथ, ते फिरी अंत्र एइतां सारो बिस्तार शुनाव, की आंव केंचरे परमेशरे तैस जैल्ही मैरां बेइर कढौ, ते फिरी जौव, की याकुबे ता तैसेरे होरी मसही दलान भी पत्तो देइयथ ते एपु केंची होरी जगाई जो चलो जेव।

18 जैखन झेइ भुई ता सिपेहीन एपु म्मेहीं खलबली मैची जेई, की पतरस कौरां जेव। 19 जैखन तोपनेरां पत्ती भी हिरोदेसे पतरसेरो पत्तो ना लगो, ता तैनी सिपेही केरु बियांन घिन्नेरां पत्ती तैन जो कतलेरो हुकम दितो, ते पतरस युहुदिये मैरां कैसरे जो चलो जेव, ते किछ चीरे तगर तैडी राहु।

हेरोदेसेरी मौत

20 हिरोदेस सुर ते सैइदेरे लोकन पुड बडो नाराज थु, एल्हेरलेइ तैना लोक मिलतां तैसका आए, ते तैसेरी सुपनेरी ठैरारे एकी मैनुं बलतुस आपनो दोसत बनेइतां बादशाहे सैहीं सल्लारी दरखुवास की, किजोकी तैन बादशाहेरे मुल्खेरां खरचो मैल्हतो थु। 21 ताल्ही तैनी अक दिहाडी तुवहालाइ ते आपना रोडां जैरां बादशाहेरां लिगडां लेइतां आदालतरे तख्ते पुड बिशतां लोकन सैहीं जौने लगे। 22 तैनेइं जैखन शुनु ता जौने लगे, एह मैनुं केरी आवाज नेहीं बलके परमेशरी आवाजे। 23 किजोकी हिरोदेसें परमेशरी तारीफ ना की, तैल्हेरलेइ तैस परमेशरे फरिशतेरी एरही मार पैई की तैसेरी सैरी जानी कीडे लगे, ते तै मैरी जेव।

24 पण परमेशरेरु बचन आगरोवं बधतु जेवं, ते सैरी दुनियाई मां फैलतु जेवं।

25 जैखन ब्रनबास ते सावल अपनी सेवा जै तैनकेरे सुपुर्द कियोरी थी, तैनेइं पुरी की ता युरोशलमें जो वापस आए, ते युहना जैसजो मरकुस जोते थिये, एपु सैहीं साथी आंनहां।

बरनबास ते शाऊल भेजे

13 इन्ताकियारी कलिस्पाई मां काही नबी ते गुरु थिये, जैचरे ब्रनबास; शुमौन; कालिया, लोकैस कुरेनी, ते मनाइंम, थिये, जैनी चौवरोवं मुल्खेरे हाकम हिरोदेसे ते सावले सैहीं साथी पलोरो थु। 2 जैखन तैना ब्रत रेखतां परमेशरेरी आराधना केरने लगोरे थिये, ता पाबित्र आत्मां जौव, जैस कम्मेरे लेइ ब्रनबास ते सावल कुजेवरेन, तैस कम्मेरे लेइ तैन तियार केरा। 3 तैनेइं ब्रत रेखतां दुवा की, ते तैन पुड हथ रेखतां ते दुवा केरतां तैना भेजे।

पौलसेरु प्रचारेरु पेहिलू सफर

4 तैना दुइये जैने पाबित्र आत्मांरी तरफां भेजोरे थिये, स्लोकिया पुजे ते तैठां तैना जिहाजे पुड कुब्रुसे जो चलेजे। 5 जैखन तैना सैलमीसे मां पुजे, ता तैडी तैना युहुदी केरे प्राथना भवने मां परमेशरेरो सुसमाचार शुनाने लगे, ते युहना तैनकेरी मद्दत केरनेरे लेइ तैडी थु। 6 जैखन तैनेइं सारे जजौण मां हंतु फिरु, ता तैना पाफसे मां पुजे, ता तैनकेरी मुलाकात एकी डैइंनोडे ते झुठे नेबी सैहीं भुई, जैसेरु नोवं ब्रयीथु थुं। 7 तै तैठेरे हाकमेरो सीरगैसेरो मुलाजम थु, एह हाकम अक बडो अकलमद मैनुं थु, ते तैनी ब्रनबास ते सावल कुजेवरे थिये, किजोकी तै परमेशरेरो सुसमाचार शुन्नो चहतो थु। 8 पण आलीमास डैइंनोडे तैनकेरी मुखालफत केरने लगे, तै हाकमे विश्वास केरने केरां रोकनो चहतो थु। 9 तैखन सावल जैसेरु नोवं पौलस थुं, पाबित्र आत्माइं सैहीं मस्त भोइतां तैसेरे पासे तकने लगे, ते जौने लगे। 10 औ शैतानेरे कोआ, तु हर कीसमेरी बेईमानी केरने बाला, ते नेकारो दुशमन, कुंन तु परमेशरेरी बत्त बगाडने केरां बाज ना एजस? 11 हुनी परमेशरेरो हथ तेरे

खलाफ खडो भेवरोए, तु कांनो भोईगहंनोस, ते किछ चिरे तगर तु दिहाडो ना ल्हलो, तैखने तैस आंधारु लैहीयोने लगे, ते तै इरहां उरहां तपोलने लगे, ताके कंखो तैस हथेरां टलेइतां चलाए। 12 सिरगैस हाकमे एह तमाशो हेरतां, ते चलन केरां परमेशरेरो सुसमाचार शुनतां खुशी राहु, ते मसही पुड विश्वास कमाव।

पिसिदियारे अन्ताकिया मां

13 पाफसेरां पौलस ते तैसेरे साथी जिहाजे मां पम्फोलियारे आलाके मां पुजे, जैडी युहने तैन मुबारक दिती ते वापस युरोशलमें जो चलो जेव। 14 ते तैना प्रगीयेरां निसतां प्सदियेरे शहर इन्ताकिया मां आए, ते सबतेरे दिहाडे प्राथना भवने मां गैहीतां बिशी जे। 15 नेबी केरी ता सैहेफी केरी किताब पडनेरे बाद तैठेरे सरदार तैन जौव, की अगर मैनुं केरी भालेइयारे लेइ तुस भी किछ जौनु चहतथ ता जौथ। 16 ताल्ही पतरस खडो उठो ते हथे सैहीं इशारो केरतां जौने लगे, औ बनी ईस्रैलाव परमेशरेरे लोकाव मेरी गल शुना। 17 ईशी ज्ञात इस्त्रैलेरे परमेशरे ईशे बौव दादे चुनोरे थिये, जैखन तैना मिस्रे मां प्रदेशी केरे जैरहे रहते थिये, तैन परमेशरे हिमत दिती ते अपने ज़ब्रदस्त हथे सैहीं तैठां कढै। 18 ते फिरी तै तकरीबन चैल्ही साल तैन्केरां टारां कमा झैलतो राहु। 19 तैनी कनाण देशे मां परमेशरे सत कौमां नाश केरतां तैनकेरी ज़मीन अपने इस्त्रैली लोकन दिती। 20 एना गल्लां पुरी भौने तकरीबन चौवर शौव साल लगे, तैसेरां बाद परमेशरे तैनकेरे लेइ सैम्युल नेबेरे ज़माने तगर काजी रखतो जेव। 21 फिरी लोकेइं बादशाह बनानेरे लेइ दरखुवास की, ते परमेशरे बिनयांमिनेरे कबीले मैरां कैसेरु मडु सावल बादशाह बनाव ते तैनी चैल्ही साल युरोशलमें मां हुकुमत की। 22 फिरी तैनी सावलेरां बाद दावद तैनकेरो बादशाह बनाव ते परमेशरे दावदेरे बारे मां जौवं, की मी ईशेरु मडु दावद मैल्होरोए, तैसपुड आंव खुशीं ते तैहे मेरी मर्जी पुरी केरल्हो। 23 परमेशरे अपने वेहिदेरे मुताबक दावदेरी कौम्हीं मैरां पापां केरी माफ़ी देने बालो यीशु मसही भेजो। 24 यीशुएरे एज्ने केरां पैहीले युहने बनीं इस्त्रैलेरे सैरी जातां केरे सामने प्रचार कियो, की तोबा केरा ते बपतीमो नैथ। 25 जैखन युहनेरु कम पुरु भौने बालू थुं, ता तैनी जौव, तुस मीं कुन समझतथ, आंव तै नेहीं तै मैरां बाद एज्ने बालोए, किजोकी आंव ता एस काबल नेहीं की तैसेरी जुटारो तसमां भी खोली सेखीं।

26 औ मेरे द्वाला इब्रहामेरे औवलाधारे लोकाव, इस छुटकारेरु बचन असंन का भेजेरुए। 27 पुराने युरोशलमेंरे हाकमेइं यीशु ना पशानो, पण मौवतरो फदो बनेइतां तैनेइं नेबी केरी तैना गल्लां पुरी की, जैना हर सबतेरे दिहाडे पेडतां शुनाते थिये। 28 हालांकी तैन मौवतरी सज़ाहरे काबल सबुत ना मैल्हु, पण फिरी भी तैनेइं पिलातुसे का दरखुवास की, की एह कत्ल कियोरो लोडते। 29 ते तैनेइं सभ किछ जैन तैसेरे बारे मां लिखेरु थुं, पुरु कीवं, ता तै स्लेबी पुडहेरां ओसैल्हतां एकी कब्री मां छडौ। 30 पण परमेशरे तै मुडदन मैरां भी जितो कियो। 31 ते जैना लोक गलिले मैरां तैस्सैहीं साथी युरोशलमें मां एवरे थिये, तैन काही दिहाडन तगर यीशु लैहीयोतो राहु, ते हुनी तैना लोक तैसेरे शाहादतन। 32 असां तुसन सुसमाचार शुनातम, की जै वेहिदो परमेशरे ईशे बोव दादे सैहीं कियोरो थु। 33 तैनी तैनकेरी औवलाध येनी ईशे लेइ यीशु मसही जितो केरतां पुरु कियु, ते होरी भजने मां लिखेरुए, की तु मेरु मडुस ते आज तु मीं केरां पैइदा भोव। 34 एन सचै, की परमेशरे तै मुडदन मैरां भी जितो कियो, ताके तै फिरी ना मरे, परमेशरे बचने मां एन्ने बियांन कियेरुए, की आंव तीं पाबित्र ते सैची नियामतां देल्हो, जैनकेरो वेहिदो परमेशरे दावदे सैहीं कियोरो थु। 35 ते होरी भजने मां दावद जौते, तु अपने पाबित्र कोए शडने ना देल्हो। 36 दावद ता अपने ज़माने मां परमेशरी मर्जी पुरी केरनेरां पत्ती मैरी जेव, ते अपने बोव दादन सैहीं साथी दफन भोव, ते तैसेरी जान शैडी जेई। 37 पण जै परमेशरे मुडदन मैरां जितो कियो, ता तैसेरे शडनेरी नौबत ना आई। 38 एल्हेरलेइ औ द्वालाव, बुझा की यीशुएरे जिरये सैहीं तुसन पापां केरी मैफारी खबर शुनाइ गहचे। 39 तुशे लेइ मुसै नेबेरी शैरीतारे मुताबक पापां केरी मुखती ना थी भौनी, पण यीशु पुड विश्वास केरने सैहीं हर केंची पापां केरी माफ़ी मैल्ही सख्चे। 40 हुशार रहथ कोस्कोही एरहु ना भोए की नेबी केरी एह गल तुसन पुड सचै बीते।

41 तुस जैना होरी केरी तौहीन केरतथ ता हेरा समझा तै नेष्ट भोथ, किजोकी आंव तुशे जिते जागते एरहु कम केरने बालोइं, की अगर कोई तुसन सैहीं तैसेरे बारे मां बिस्तार भी दे ता तुस कधै यार्कीन ना केरेलहे।

42 जैखन पौलुस ते ब्रनबास मंद्रे मैरां चले ता लोक तैन का मिनत केरतां जौने लगे, की होरी सब्ते भी एने गल्लां केरे बारे मां जौव गाहे। 43 जैखन लोक आराधनारे बाद बेइर निसे, ता बडे लोक तैन पत्ती चले, ते तैन मां किछ युहुदी थिये, ते किछ नोवें युहुदी शामिल थिये, चलेइं तैन सैहीं गल बात की की परमेशरे विश्वासे मां बनारे रहनेरे लेइ समझावां।

पौलसेरे जिरिये गैर कौमन मां प्रचारेरी शुरुवात

44 होरी सब्ते तकरीबन सारो शाहर परमेशरो सुसमाचार शुंनेरे लेइ आकोठो भोव। 45 जैखन युहुदेइं एतरे हछे लोक लाहे ता तैनकेरो क्लेजो फुकोई जेव, ते पौलुसेरे खलाफ बकवास केरने लगे। 46 पौलुस ते ब्रनबासे दल्लेर भोइतां तैन जौव, जुरुरी एन थुं, की असां पैहीले तुसन परमेशरु बचन शुंनाम, पण तुसता तैस केरां दुर भौने लोरेथ ते अपनो आप आखिरारी जिदगरे काबल ना समझथ, ता हेरा हुंनी असां गैर युहुदी केरे पासे गहतम। 47 किजोकी परमेशरे आसन इही हुकम दितोरोए, मीं तु गैर कौमां केरे लेइ चुंनोरोस, ताके जमीनारे कुंने तगर पापां केरी मुखती भोए।

48 जैखन गैर युहुदेइं एन शुंनु ता बडे खुशी भुए, ते परमेशरेरी तारीफ केरने लगे, ते जैना परमेशरे हमेशारी जिदगारे लेइ चुंनोरे थिये, तैनेइं विश्वास कियो। 49 ते परमेशरेरु बचन सैरी आलाके मां फैली जेवं। 50 पण युहुदेइं शाहरेरे काही मडद ते कौन्शां भडकेइ, तैना पौलुस ते ब्रनबासे सतानेरे लेइ तियार भुए, एडी तगर की तैना तैस आलाके मैरां भी कैढी छडै। 51 पौलुस ते ब्रनबासे हुकमेरे मुताबक अपने पावां केरी धुइ भी तुडकी ते तैतां ईकुनियंमे जो चले जे। 52 ते चले खुशी सैहीं पाबित्र आत्माइं सैहीं भरपुर भुए।।

इकनियुस मां पौलुस ते बरनबास

14 ईकुनियंमे मां पौलुस ते ब्रनबास दुइये ज्ञाने प्राथना भावने मां जे, ते एरहु भाषण केरने लगे ते बडे युहुदेइं ते गैर युहुदेइं विश्वास कियो। 2 जैना युहुदी बचनेरे खलाफ थिये, तैनेइं गैर युहुदी लोक भडकाए ते तैनेइं विश्वासी मैन्हुं विश्वासे केरां दुर कियो। 3 फिरभी पौलुसे ते ब्रनबासे तैडी बडो वखत गुजारो, ते नधडक चारे परमेशरे बचनेरी तालीम देते राहे, ते परमेशरे आजीब कम्मा केरे जिरये सैहीं जैना तैनकेरे हथेइं सैहीं भोतां थियां, परमेशरेरु बचन सच साबत भौतु राहूं। 4 शाहरेरे लोकन एपु म्मेहीं फुट भोई जेई, किछ लोक युहुदन सैहीं साथी थिये, ते किछ चलन सैहीं साथी थिये। 5 युहुदी ते गैर युहुदी सरदारन सैहीं मिलतां चलन सताने ते मारनेरी शुरुवात केरने बाले थियो। 6 की तैन एस गल्लारो पत्तो लग्गो, ते तैना तैठां नेशी जे, ते उनियेरे शहर लुस्र ते दरबे मां ते तैसेरे आसपासेरे आलाके मां चले जे। 7 ते तैडी तैना परमेशरेरो सुसमाचार शुंनाने लगे।

लुस्रा ते दरबे मां

8 लुस्रे मां अक मैन्हुं बिशोरो थु, जै पांवां केरो कमजोर थु, तै जरमनेरो टोन्टो थु, ते तै सैइयां ना थु चेली बटतो। 9 तै पौलुसेरी गल्लां रोडे चारे शुंने लगेरो थु, पौलुसे तैसेरे पासे रोडे चारे तक ता बुझी जेव, की एस्मां एतरो विश्वासे की एह ठीक भोई सखते। 10 पौलुसे तैस मैन्हुं जो जौव, अपने पांव पण्ड खडो भो, ते तै तैखन खडो भोव, ते चलने लगे। 11 जैखन लोकेइं पौलुसेरु एन कम हेरु ता लुकुनियारी बोली मां चिडां मारने ते जौने लगे, की ईशां देबतो असंन का मैनेरी शकली मां एगोरोए। 12 ते तैन लोकेइं ब्रनबासे जियुसेरु नोवें रखु, ते पौलुसेरु हरमसेरु नोवें रखु, किजोकी तै तकरीर केरने मां जादे माहिर थु। 13 जियुस देबतेरु मंदर शहरेरे सामने थुं, तैसेरो पुजारी फुडुकेरे हार एनतां शहरे फाटके पुड पुजो, किजोकी तैना लोक चहते थिये की असां चेलां केरेलेइ सुखन देंम। 14 जैखन चलेइं पौलुसे ते ब्रनबासे एन शुंनु ता तैनेइं आपना लिगडां छिंदां ते मैन्हुं मां जे ते जौरे जौरे जौने लगे। 15 लोकाव तुस एन कुन केरने लगेरेथ? असां भी तुशे जैरहे मैन्हुंमे ते तुसन सुसमाचार शुंनातम, ताके तुस एना फुजुल चीजां शैरतां जिते परमेशरेरे पासे

मुडथ, जैनी जमीन आसमान ते सुमुंद्र ते जैन किछ भी एस्मां आहे तैनी पैइदा कियेरुए। 16 तैनी पैहीले जमाने मां सैरी कौमन एपनी एपनी बत्तां चलने दीतु। 17 तांभी तैनी आपनो आप बैगुनाह ना बनाव अपनी शाखती हेरानेरे लेइ आम्ब्रेरां झडी दिति, ते फसलां केरे लेइ मौसम बनाए, ताके तुसन हछु आंन" भोए ते तुशे दिल खुशी सैहीं भरे। 18 एना गल्लां जोइतां तैनेइं लोक बेडी मुशक्की सैहीं रोके, की एना ईशें लेइ सुखन ना देंन।

19 तैखन किछ युहुदी इनताकिया मैरां ईकुनियंमे मां आए, ते तैना लोक अपने पासे मौडता पौलुसे पुड पथराव केरने लगे, ते तै मुऔरो बुझतां शहरे केरां बेरोवं घसीटतां निहीयो। 20 जैखन चले तैडी पुजे ता तैनेइं पौलुस धैरे मां अन्हों ते तै खडो उठो ते वापस शहरे मां अव, ते होरसां ब्रनबासे सैहीं साथी दरबे जो चलो जेव।

सीरियारे अन्तकिया जो वापिस एजनु

21 तैनेइं शहरे मां सुसमाचार शुंनाव ते हछे चले बनाए, ते तैसेरां बाद तैना लुस्रा, ईकुनियंमे, ते इनताकिया जो चले जे। 22 तैना चेलां केरी मद्धत केरते थिये, ते तैन समझाते थिये, की अपने विश्वासे मां पक्के मजबूत भोइयथ, की परमेशरेरी बादशाही मां दाखल भौनेरे लेइ बेडी मसीबतां केरो सांमनो केरनो पैते। 23 ते तैनेइं हर कलीसियाई मां सियांने लोक भी रखे, ते ब्रतां रेखतां दुवां की ते तैना परमेशरे सुपुर्द कियो, जैसपुड तैनेइं विश्वास कियोरो थु।

24 फिरी तैना पसदीया मैरां निसतां पम्फौलिया आलाके मां आए। 25 जैखन तैनेइं परगिया मां सुसमाचार शुंनाव ता आतलियारे पासे चले जे। 26 तैतां जिहाजे मां चैडतां वापस इनताकिया मां जे, ते तैडी तैनेइं तैस सेवारे लेइ जै तैनेइं पुरी कियोरी थी, परमेशरे सुपुर्द कियोरी थी। 27 इनताकिया मां पुजतां तैनेइं कलिस्यारे लोक अकोठे कियो, ते जैन किछ परमेशरे तैनकेरे जिरये कियेरु थुं, तैन लोकां केरे सामने बियांन किंव ते एन भी की परमेशरे केंचरे गैर युहुदी केरे लेइ विश्वासेरु दार खोलतां छडु। 28 पौलुस ते ब्रनबास बडे चिरे तगर तैडी चलन सैहीं साथी राहे।।

यरुशलमेरी सभा

15 किछ लोक युहुदिये मैरां इनताकिया मां पुजे, ते दूलांन एह तालीम देने लगे, अगर मुसैरी रेखोरी रस्मरे मुताबक तुशी सुंनत नेहीं भोवरी ता तुशे पापां केरी मुखती ना भोईसखे। 2 एस गल्ली पुड पौलुस ते ब्रनबासेरी तैन लोकन सैहीं बडी बेंस भुई, ते कलिस्यारे लोकेइं पौलुस ते ब्रनबास ते किछ होरे मैन्हुं चुंने की तैना युरोशलमें मां गैहितां तैडी एस मसले पुड चलन सैहीं ते लोकन सैहीं गल बात केरन। 3 तैखन कलिस्यारे लोकेइं तैना भेजे, ते तैना फनीके, ते सांमारियारे, आलाके म्मेहैइं जैखन चलारे थिये, ता तैनेइं तैठेरे मसही दूलांन जौवं, की केंचरे गैर युहुदेइं मसही पुड विश्वास कियो, ते कलिस्यारी मां शामिल भुए, एन शुंनतां सरे दूला बडे खुशी भुए। 4 जैखन तैना युरोशलमें मां पुजे, ता तैठेरी कलिस्यारे लोक ते चले ते बुजुर्ग तैन सैहीं बेडी खुशी सैहीं मिले, ते तैखन तैनेइं सभ किछ बिस्तार दितो, की परमेशरे तैन्केरे जिरये सैहीं कैत्रां कैत्रां कमा कीयां। 5 फ्रिसी फिकेरे किछ लोकेइं जैनेइं विश्वास कियोरो थु, तैना जौने लगे, की गैर युहुदन मैरां विश्वास केरने बालां केरी सुंनत लोडचे कियोरी, ते एन मुसै नेबेरी रस्मी पुड अंमल केरनेरो हुकम दितोरो लोडते।

6 एल्हेरलेइ (रसुल) चले ते बुजुर्ग एह गल बात केरनेरे लेइ अकोठे भुए। 7 बडी बेंस भौनेरे बाद पतरसे तैन खडे भोइतां जौनु शुरु कियुं, औ मेरे दूलाव तुस जानतथ की बडे चिरे पैहीले परमेशरे आव तुसन लोकन मैरां चुनो, ताके गैर युहुदी भी मेरी जबांन परमेशरो सुसमाचार शुंनण ते विश्वास केरन। 8 परमेशर जै दिलेरो हाल जानते, तैनी ईशी जैरही पाबित्र आत्मां तैन भी दितो, ते एन भी हेराव की तैना भी परमेशरी नजरी मां बडे रोडेन। 9 तैनी असंन मां ते तैन मां कोई फर्क नेहीं कियोरो, किजोकी तैनकेरे विश्वास केरने सैहीं तैनकेरे दिल भी पाबित्र कियो। 10 ता हुंनी तुस परमेशर आजमानेरे लेइ मसही पुड विश्वास केरने बालां केरे गले पुड एतरो बोझ कीजो रखतथ, जै ना असेइं छुइयोए ते ना ईशे बोव दादे छुइयोए। 11 किजोकी ईशो ता विश्वास

एहे की परमेशर यीशु मसहीएरी बदोवलयत जैचरे तैनकेरे पापां केरी मुखती भोल्ही तैचरे ईशे भी पापां केरी मुखती भोल्ही।

12 सैरी लोकन मां चुप चप खामोशी जैरही भोई जेई, ते लोक ब्रनबासेरु ते पौलुसेरु बियांन शुंने लगे, की परमेशरे केंचरे गैर युहुदन मां केरां आजीब आजीब कंमा ते निशान हेराए। 13 जैखन तैनकेरी गल्लां मुकी ता याकुब जांने लगे, मेरे द्वाव मेरी गल शुंन। 14 शुंमोने तुसन जेवरुए, की परमेशर पैहीले केंचरे गैर युहुदन पुड बांदो भोव, ताके तैन मेरां मैनुं चुंनतां अपने नोवैरी अक कौम बनाए। 15 नेबी केरु बचन भी एसेरु जैरुहे जैचरे लिखेरुए की।

16 एसेरां बाद आंव फिरी एजेल्हो, ते दावदेरु डुलेरु घर फिरी बनेइल्हो, तैसेरी ट्लुटोरेरी मरांमत केरतां तैस फिरी बनेइल्हो।

17 ताके बाकी लोक येनी सभ कौमा जैना मेरे नोवें सैहीं परमेशरे तोपण, एन तैनी परमेशरे ज़ोवरुए।

18 एह तैहे परमेशरे जैनी दुनियाारी उबता खेव्ती केरां दंतो समाचार दंतो राहोरोए। 19 एल्हेरलेइ मेरी ता सल्लह एहे की असां गैर युहुदन तक्किफी मां ना छडम, जैना परमेशरेरे पासे बेदलोरेन। 20 बल्के तैन चिठी लिखतां एन ज़ोम की बुतन का चैडौरी चीजां ते हैराम चीजन केरां दुर रहन, ते फटोरे जानबरां केरु मास ना खान ते लैहु ना पीन। 21 एल्हेरलेइ की हर शहरे मां पुराने जमाने केरां लेइतां मुसैरी रस्म शुनाते राहोरेन, कने तै हर सबतै दिहाड़े पेड़तां भी शुनातन।

गैर कौमां केरे विश्वसन चिठी

22 तैखन चले ते बुजुर्ग ते सारी कलिस्स्या मिलतां एन रोडु समझू की असन मेरां किछ मैनुं चुंनतां पौलुसे ते ब्रनबासे सैहीं साथी इनताकिया भेजम। 23 तैनेइं युहुदा जैसजो ब्रस्बा जोतन ते सैलास चुंनो, किजोकी एना दुईये सैभन मां समझदार थिये, तैनकेरे हथे चिठी लिखतां भेजी, की चेलां केरी तरफां ते सियांना केरी तरफां इनताकिया, सुर्या ककिया, ते गैर युहुदी द्वालां जो जेये मसही जोइयथ। 24 असेइं शुंनेरुए की किछ मैनुं बगैर इजाजतां तुशे इडी आए, ते तैनेइं एपनी गल्लेइं सैहीं तुशो दिल परेशान कियो। 25 एल्हेरलेइ आसेइं एन ठीक समझू की इठां दुई मैनुं अपने टलारे पौलुस ते ब्रनबासे सैहीं साथी तुसन का भेजम। 26 एना एरहे मैनुंण की जैन ईशे परमेशर यीशु मसहीएरे नोवें पत्ती एपनी जानरी भी पर्वहा नेहीं। 27 एल्हेरलेइ आसेइं युहुदा ते सैलास भेजोरेन, ते तैना जबांनी भी एना गल्लां शुंनल्हो। 28 पाबित्र आत्मां ते आसेइं एन ठीक समझू की इना जरुरी गल्लां केरे आलावा तुसन पुड होरो बोझ ना देंम। 29 बस्सा तुस बुत्तां केरी सुखनरे मासे ते लैव्हे केरां ते गलेरां मारोरे जानबरे केरां ते हैराम चीजन केरां प्रहेजज केरथ, एन चीजन केरां दुर रहनु तुशे लेइ रोडू भोल्हू।

30 बस्सा तैना मैनुं चलते चलते इनताकिया मां पुजे, तैडी तैनेइं कलिस्स्यारे लोक अकोठे केरतां एह चिठी तैनकेरे हवाले की। 31 तैना चिठी मां लिखोरी गल्लां पेड़तां बड़े खुशी भुए। 32 युहुदा ते सैलास एपु भी नबी थिये, तैनेइं तैठेरे मसही लोक रोडे चारे समझाए ते विश्वासे मां पक्के बनाए। 33 किछ दिहाडना बाद तैठेरे द्वालांएइं सलैमतरि दुवा केरतां वापस भेजे, ताके अपने भेजने बालन का वापस गहन। 34 सैलासे तैडी बिशनु रोड लग्गु। 35 पण पौलुस ते ब्रनबास इनताकिया मां रुकी जे, तैडी तैना काही हारी लोकन सैहीं मिलतां लोकन तालीम देंते राहे ते परमेशरेरु बचन शुंनते राहे।

पौलुसेरु दूइयां प्रचारेरु सफर

पौलुस ते बरनबारे मां मतभेद

36 किछ चिरेरां बाद पौलुसे ब्रनबासे सैहीं जाँव, चल असां तैन सारे शहरन मां गाम, जैडी असेइं सुसामाचार शुंनेवरो थु, ते तैन द्वालां सैहीं मुलाकात केरम, ते हेरम कि तैन केरो कुन हाले। 37 ब्रनबास युहन्ने जैसजो मरकुस ज़ोते थिये, साथी नैपो चहतो थु। 38 पण पौलुसे ठीक ना समझू की युहन्ना तैन सैहीं साथी गाहे, किजोकी तै पम्फोलिया मां कंम शैरतां आलग भोवरो थु। 39 पौलुसे ता ब्रनबासे एपुमेहीं बडी अन बन भुई, ते तैना आलग भुए, ब्रनबास ते मरकुस जिहाजे मां कुबरुसे जो चलो जेव। 40 ते पौलुसे सैलास

साथी निहीयो, ते द्वालां तैनकेरे लेइ दुवा की, ते तैना परमेशरे सुपुर्द किये ते तैना तैठां चले जे। 41 पौलुस सुर्या ते किलकिया म्मेहीं निस्तो चलतो कलीसियांन मजबूत केरतो जेव।।

पौलुस तीमुथयुसे साथी नेते

16 तैना दरबे ते फिरी लुसत्रा मां पुजे, तैडी अक चेलो तैमोथियुस नोवैरो रहतो थु, तैसेरी आम्मां युहुदी थी, ते तै मसही पुड विश्वास केरती थी, पण बाजी युनानी थु। 2 तैमोथियुस लुसत्रा मां ते ईकनुइयमेरे द्वालां मां बडो रोडो मैनुं थु। 3 पौलुस तैमोथियुसे सफरे मां एपुसैहीं साथी नैपो चहतो थु, एल्हेरलेइ पौलुसे तैमोथियुसेरी सुन्त कमाई, किजोकी तैस आलाकेरे सारे लोक जानते थिये, की एसेरो बाजी युनानीए। 4 तैना जैन जैन शाहरन म्मेहीं चलते जे, तैठेरे लोकन तैना हुकमां केरे बारे मां ज़ोते जे, जैना युरोशल्लेमां चलेइं ते सियांनेइं मिलतां शुरु कियोरो थु, ताके लोक तैन पुड अमल केरन। 5 बस्सा कलीसियां विश्वासे मां पेक्की भांती जेई, ते तैनकेरी कलीसियां केरी तैधात बधती जेई।

त्रोआसे मां : पौलुसेरु दर्शन

6 पौलुस ते तैसेरे साथी फरोगिया गलतियारे आलाके म्मेहीं निसतां जे, किजोकी पाबित्र आत्मां तैना आसिया मां बचन शुंनाने केरां रोकोरे थिये। 7 जैखन तैना मौसीयारे बन्ने पुड पुजे, ता तैना बतोनियां मां गहनू चहते थिये, पण यीशुएरी आत्मां तैना गहन ना दिते। 8 एल्हेरलेइ तैना मौसीयारे नेडेरां त्रावसेरे इलाँवें मैन्डो चले जे। 9 राती पौलुसे अक मैनुं सुपने मां लाहू, तै म्दुनीयांरो थु, तै खडो भोइतां पौलुसे का मिनत केरने लोरो थु, की पार म्दुनीयां मां एई ते ईशी मद्दत केर। 10 पौलुसेरी एह रुया (सुपनु) हेरनेरां पत्ती लुशी तैना पार म्दुनीयां मां गहनरे लेइ तियार भोईजे, किजोकी आसेइं बुझू की परमेशरेरो असां तैडी सुसामाचार शुंनानेरे लेइ कुजेवरेम।

फिलिप्पी मां : लुदियारो मन बेदलोते

11 असां त्रावसेरां जिहाजे मां जे, ते सुन्नाके मां आए, ते तैठां होरसां नियापुलुसे मां पुजे। 12 तैठां असां फिलिपी जो चले जे, जै रुमी केरी बस्तीए ते म्दुनीयारे आलाकेरो ज़िलोए, तैडी असां बडे दिहाडे राहे। 13 स्वतैरे दिहाडे असां शाहरे फाटके मेरां निसतां असां दरियाए पुड पुजे, किजोकी असन उमीद थी की तैडी दुवा केरने जेई ठार भोनीए, असां तैडी गैहीतां बिशीजे, तैडी किछ कौन्शां थी, असां तैन सुसामाचारो बचन शुंनाने लगे। 14 ईशी गल्लां शुंने बैली कौन्शन मां अक लुद्धिया नोवैरी थी, तै थोतिरा शाहरेरी रहने बाली थी, ते काले कपडां केरो बपार केरती थी, ते परमेशर मन्ने बाली थी, ते परमेशरे तैस हिमत दिते की तै पौलुसे केरां सुसामाचार शुंने ते तैस कुबल केरे। 15 जैखन तैसां ते तैसारे पुरे टबरे बपतीसमां निहीयो ता तै असन सैहीं जाँने लगी, की अगर तुस लोक मां परमेशरेरी इमानदार दासी समझतथ ता चला मेरे घरे ते बिशी राथ, ते तैसारी मिनत शुंन्तां असां खुशी भुए।

पौलुस ते सीलास जेली मां

16 एकी फेरे असां दुवा केरनेरी ठारी जो चलोरे थिये ता असन अक कुई मैल्ही जैसमा अक अजिब आतमां थी, ते तै एजने बाले जमनेरो बिस्तार देती थी, ते अपने मालकां केरे लेइ बडे पैइसे कमाती थी। 17 एह कुई पौलुसे पत्ती ते असन पत्ती चली ते जाँने लगी, की एना लोक परमेशरेरे मैनुंण, ते एना असन पापां केरी मुखतरि बत्त हेरातन। 18 तै काही दिहाडे एन्ने केरती रही, एसां पौलुसे जिच भोइतां तैस आत्माइं जो जाँव; आंव तीं हुकम देताइं की यीशुएरे नोवें सैहीं निसी गा; ते तै तैखने तैस कुइए मेरां दुष्टात्मां निसी जेई।

19 जैखन तैस कुईयरे माल्केइं हेरु की ईशी कमेइयरी उमीद ट्लुटी जेई, ता तैनेइं पौलुस ते सैलास टलेइंतां सरकारे हवाले किये। 20 तैनेइं पौलुस ते सैलास आदालती मां पैश किये; ते जाँने लगे, की एना युहुदीन ते ईशे शहरे मां बडी खल्बली मचाने लगोरें। 21 ते एरहे रुवाजेरी तालीम देतन की तैन मैनुं ईशे लेइ बिल्कुल ठीक नेहीं। 22 एन शुंन्तां सरे लोक तैनकेरे पासे बेदलोइं जे, ते पौलुस ते सैलासेरी मुखालफत केरने लगे; ते हाक्मेइं तैन

नगनो केरतां मार देंनेरो हुकम दितो। 23 सिपैहीयेइं तैन खुब बेंतेइं बैही ते जैल्ही मां छडे, ते सिपैहीन हुकम दितो, की रोड़े चारे पेरहो देइया। 24 सिपैहीयेइं एह हुकम शुंनतां तैना आंधरी कोठी मां छडे, ते तैनकेरे पांवन बैडी लेइ।

पौलस ते सीलासेरी जेल्हरां मुक्ति

25 कोई एधी राती पौलस ते सैलास दुवा करने मां मसस्त थिये, ते परमेशरी तारीफ केरते थिये; ते होरे कैदी भी शुंन्ने लोरे थिये। 26 आचानक अक भूंजल अव, ते जैल्हरे डंख हिल्ले ते जैल्हरां दारां खुल्ही जेआं; ते सैरी कैदी केरी बेडी भी खुल्ही जेई। 27 सिपाही बिंझो ते खडो उठो ते तकने लगे, ते हेरते की जैल्हरां दारां खुल्ही जेवरन; ता तैनी समझू की सारे कैदी नाशोरेन; ते तैनी अपनी तलवार खिंची की आंव आपनो आप मैरी छैडीं। 28 पण पौलसे जोरे सैहीं जॉव; आपनो आप ना मार किजोकी असां सभ इडीम। 29 सिपाही दियो बैलतां डरतो डरतो अंत्र जेव, ते पौलसे ते सैलासेरे पांवन पुड पैव। 30 फिरी तैनी तैना बेइर आंन्हें ते जॉने लगे, मर्ज आंव कुन केरीं, की मेरी मुखती भोए? 31 पौलसे ते सैलासे जॉव, अगर तु ता तेरु टबर यीशु मसही पुड विश्वास केरथ ता तुशे पापां केरी मुखती भोई गहचे। 32 तैखन पौलसे ते सैलासे तैनकेरे टबरे परमेशरो सुसमाचार शुंनाव। 33 तैखने राती सिपैहीयेइं पौलस ते सैलास अपने घरे निहीये ते तैनकेरे जखम धोए ते सैरी टबरे बपतीसमो निहीयो। 34 फिरी तैनी तैना बैहीये दोपरे निहीये ते बैशकी पुड बिशाल्हे; ते सारे टबरे बडी खुशी मनाई। 35 जैखन झैझ भुईं ता रूमी हाकमे अपने सिपाही जैल्हखानेरे सिपैही का एह हुकम देइतां भेजे की तैना मैन्हुं हथरां छैडी दे। 36 सिपैहीयेइं पौलसे जो जॉव; की हाकमे हुकम दितोरोए की पौलस ते सैलास जैल्ही मैरां हथरां छडा। 37 पण पौलसे तैन सिपैहीन सैहीं जॉव, तैनेइं असां बगैर कुसुरे मारे कुटे ते जैल्ही मां छडे; हालां की असां रूमी शैहरीम; हुनी कुन तै असंन चूप चारे छडने चहते ?पण एन ना भोइसखे, तै एपु एजे ते असंन बेइर कडे। 38 सिपैहीयेइं गैहीतां हाकमन बिस्तार दितो, की पौलस ते सैलास तैना रूमी शैहरीन ता तैना डेरी जे। 39 तैडी एइतां तैन मनाने लगे, ते फिरी तैना जैल्ही मैरां बेइर आंन्हें ते मिनत की की शहरे मैरां चले गाथ। 40 बस्सा पौलस ते सैलास जैल्ही मैरां बेइर निसे ते लुदियाके जे, ते तैडी फिल्पेरे मसही द्वांन सैहीं मिले ते तैन खुश केरतां चले जे।

थिस्सलुनीके शहरे मां

17 पौलस ते सैलास तैसेरां बाद आमफपलुस ते आप्लोनियरे शहरन म्मेही निसतां थिस्लुनिके शहरे मां आए, तैडी युहुदी केरो अक प्राथना भावन थु। 2 पौलस अपने हिसाबे सैहीं प्राथना भावने मां टूलाई हफते पाबित्र शास्त्रेरी किताबी मैरां तैन सैहीं बंस केरतो राहु। 3 पौलस तैनकेरो मतलब समझातो थु, की यीशु मसहीएरो दुःख झेलनो ते मुडदन मैरां जितु भोंनु जरुरी थु, की जैस यीशुएरो असां प्रचार केरतम; तैहे मसहीए। 4 किछ युहुदी एह तालीम शुंनतां खुशी भुए, ते पौलसे ते सैलासे सैहीं मिली जे; ते एचरे होरे भी बडे लोक परमेशर मन्ने बाले युनानी ते काही कौन्शां भी शामिल भोई जेइ। 5 पण युहुदेइं जलगे सैहीं काही शहरेरे लोक अकोटे केरतां बकवास केरनो शुरु कियो, तैनेइं यासुंनेरे घरे पुड हमलो कियो ताके पौलसे ते सैलासे तोपतां आंन्हा। 6 पण जैखन तैना ना मैल्हे ता यासुंन ता काही होरे मसही दूला घसीटतां शहरेरे हाकमे का आंन्हें, ते चिंङांमारने लगे, की एन मैन्हेंइ सारी दुनीया उल्ट पुलट की, ते आज इडी भी पुजोरेन। 7 ते एना यासुंने अपने घरे मां रखोरेन, ते एना लोक कैसररे हुकमेरी खलाफत केरतन, ते जोतन की बादशाह ता कोई होरोए येनी यीशु। 8 एह गल शुंनतां सारे लोक ते कैसररे हुकुमतेर लोक डेरी जे। 9 ते तैनेइं यासुंन ते बाकी मसही लोक जमानती पुड हथरां छडे।

बिरीया शहरे मां

10 डूलोवझां मसही द्वांन पौलस ते सैलास तैठां बैरिये जो भेजे, जैखन तैना तैडी पुजे ता तैना युहुदी केरे प्राथना भावने मां जे। 11 बैरियेरे लोक

थिस्लुनिकेरे लोकन कैरां जादे शरीफ निसे, तांए तैनेइं सुसमाचार बेडी खुशी सैहीं कुबुल कियो; तैना रोज राती एना गल्लां केरे बारे मां गलबात केरते थिये, की पौलसेरी गल्लां सैचीन की नेहीं। 12 केही युहुदेइं ते केहि होरी युनानी कौन्शेइं भी यीशु पुड विश्वास कियो। 13 जैखन थिस्लुनिकियोएरे युहुदन पत्तो लगे की पौलस बैरीना मां परमेशरो सुसमाचार प्रचार केरने लगेरो थु; ता तैना तैडी भी पुजे; ते लडाई केरनेरे लेइ लोकन भडकाने लगे। 14 ताल्ही द्वांन पौलस सुमुद्रे बन्ने भेजो; पण सैलास ता तिमाथियुस बैरीना मां रुकोरे राहे। 15 जैना लोक पौलसेरी हिफाजत केरने लगेरे थिये; तैना आन्थीने मां पुजेइतां वापस भुए, की सैलास ता तिमाथियुस लुशी पौलसे का पुज्जी गहन।

एथेस शहरे मां

16 जैखन पौलस आन्थीने मां तैन बलगने लगेरो थु; ता एन तकते की सारो शहर बुत्तैइं सैहीं भरतांए ता तैसेरो दिल बडो दुखी भोव। 17 ते ताल्ही तै युहुदी केरे प्राथना भावने मां ते परमेशर मन्ने बाले युनेन्न सैहीं बंस केरतो थु; ते तैन सैहीं भी जैना तैस रोज चोवके पुड मैल्हते थिये। 18 किछ आपकीयुरी ते किछ स्तोएकी ते किछ फ्लस्फी तैस्सैहीं बंस केरने लगे; ते तैन मैरां किछ जॉने लगे की बकवासी कुन जॉनु चहते? किजोकी पौलस यीशुएरो सुसमाचार शुंनतां थु; ते किछ जॉने लगे की एह ता आजीब देवतां केरो पत्तो देने बालो भोई सखते। 19 ताल्ही तैनेइं तै एपुसैहीं साथी आरीयुपक्से मां निहीयो; तैडी तैस्सैहीं जॉने लगे, की कुन आस जैनी सखतम की जै तालीम तु देतो चलोरोस, तै कुने? 20 असां तेरे ऐशेरां बेडी आजीब गल्लां शुंन्ने लोरेम; ते असां एन जॉन्नु चहतम की एन सैहीं तेरो कुन मतलबे? 21 द्रासले मां आन्थीनेरे लोक कुन देशी कुन परदेशी एपनी फुरस्तर सारो मोको होरी कम्मा केरे बजाहे सिर्फ नोवीं नोवीं गल्लां शुंन्ने मां गुजारते थिये।

अरियुपुसेरी सभा मां पौलसेरु भाशण

22 तैखन पौलस आरीयुपक्सेरे मुझाटे खडो भोइतां जॉने लगे; ओ आन्थीने बालाव आंव हेरताइं की तुस हर गल्ली मां देवतन बडो उच्चो द्रजो देतथ। 23 जैखन आंव तुशे शहरे मां हठतो फिरतो थु, ता मेरी नजर तुशे बुत्तन पुड ते सुखनरी ठारन भी पैई, ते एक्की सुखनरी ठारी एन लिखेरु थु; एक्की आनजॉन परमेशरेरे लेइ, बस्सा तुस जैस जॉनथे नन्ना ते तैस पुजतथ ता आंव तैसेरो पत्तो देताइं। 24 जैनी परमेशरे दुनिया मां सैरी चिजॉन पैईदा कियोरीन, तै असमानेरो ते जिमीनरो मालके, तै हथां केरे बनेवेरे मंद्रन मां ना राहे। 25 तै मैनेरे हाथेइं सैहीं सेवा ना क्मवाए; किजोकी तै केंची चिजॉरो मौहोताज नेहीं, तै सैरन जिंदगी सांस ते सभ किछ देते। 26 तैनी आदम बनाव ते तैस एक्की सैहीं हर किस्मेरे लोक पैईदा किये; ताके सर जमिनी पुड आबाद भॉन, तैनी तैनकेरी जिंदगारे दिहाडे बनाए ते रहनेरे लेइ ठार बनाई। 27 ताके तैना परमेशरे तोपन ते शैहीद तोपते तोपते तैन मैल्ही गाहे; हालांकी तै असंन केंची कैरां दुर नेहीं। 28 किजोकी असां एस्सेमां चलतम फिरतम; जैचरे की तुशे शाइरेइं भी जेवरुए, की असां ता तैसेरी ओवलाधम। 29 अगर आस परमेशरी ओवलाधम ता असेइं एन ना लोडे सोचेरु; की सैहीं ज्ञात सोने, चेंदरी, या घोडेरी मूरतरीए ते जै केंची मैनेरी या मिस्त्रेरी हाथां केरी कारीगिरीए। 30 पेमेशरे एना पुरेनी गल्लां खतम की, ते हुनी तै मैन्ह सैभी तैरन हुकम देते की तोबा केरन। 31 किजोकी तैनी अक दिहाडी दुवालेवरीए जैखन तै सचै सैहीं दुनियारी आदालत एक्की एरहे मैनेरे जिरये सैहीं केरल्हो; जै तैनी रखोरोए, ते तै तैनी मुडदन मैरां जितो केरतां एह गल सैरी मैन्ह साबत केरतां हेराइ।

32 जैखन तैनेइं मुडवां केरी आदालतारे बारे मां शुंनु ता तैन मैरां किछेइं एस गल्लरी हासी बनाई; ते किछेइं जॉव; की अस एस बारे मां फिरी कोस्कोई शुंन्मैल्हे। 33 तैनकेरी एह हालत हेरतां पौलस तैनकेरी मैफल्ही मैरां निसतां चलो जेव। 34 पण किछ एरहे लोक पौलसे सैहीं मिली जे, ते तैनेइं विश्वास भी कमाव; तैन मैरां अक देवनुसी युस ते आरीयुपक्सेरी मजलसारो मिम्त्र थु; ते अक कौन्श थी, तैसारु नोव दमरस थु; ते तैनकेरे आलावा होरे भी काही मैन्हुं थिये।

कुरिन्थुस नगरे मां

18 तैसेरां बाद पौलुस आन्थिने मैरां निसतां कुरींथिसे जो चलो जेव।
2 तैडी तैस अक युहुदी मैल्हो; तैसेरु नांव आकोला थुं; ते तै पैतुसेरो
रहने बालो थु, ते तैसेरी कौन्शरु नांव प्रसिकला थुं, ते दुईये साथी
इतालियारां एवरां थियां; किजोकी कैसर कलोदेसे हुकम दितोरो थु, की सारे
युहुदी रुमे मैरां चले गहन ते पौलुस तैनका जेव।³ आकोला ते प्रसिकलारो
पेशो तैम्बु बनानेरो थियो; ते एहे पेशो तैम्बु बनानेरो पौलुसरो भी थु
; एल्हेरलेइ पौलुस तैन सैही साथी रेहितां कम केरने लगे।⁴ पण तै हर सब्बे
प्राथना भावने मां गहतो थु; ते युहुदन ते यूनैन्ग सैही बेंस केरतो थु, ते तैना
रेही गहते थियो।

⁵ जैखन सैलास ते तिमोथियुस दुइये म्दुंनीयेरां आए, ता पौलुस बडे जोशे
सैही जैत्रो तैस मोको लगतो थु, ता सुसमाचार प्रचार केरने लगतो थु; पौलुस
युहुदी केरे सामने गवाही देतो थु; की यीशुए मसहीए।⁶ पण जैखन युहुदी
पौलुसेरे खलाफ तोहीन केरने लगे, ता पौलुसे अपना लिंगडां तुडकां ते जौने
लगे; तुशो लैहु तुशे गले पुड भोए; आंव एस गल्ली कैरां पाकआही, आजैरे
बाद आंव गैर युहुदन का गहिलो।⁷ तैखन पौलुस प्राथना भावने मैरां निसतां
चलो जेव; ते अक परमेशर मन्ने बालो मैन्हुं थु, तैसेरु नांव तितुस युतस थुं,
तैसेरे घरे जेव, जैन प्राथना भावने सैही साथी थुं।⁸ एस प्राथना भावनेरो
पुजारी (सरदार) क्रीस्पुस थु, जैनी सारे टबरे समेत परमेशरे पुड विश्वास
कमाव ते कुरिन्थिसएरे केही लोकेइ परमेशरे पुड विश्वास कमाव ते तैनेइ
बपतीसमां भी निहियो।⁹ एकी राती परमेशरे पौलुसे सैही सुपने मां गल की;
ते परमेशर जौने लगे, की पौलुस डर नन्ना ते तू गह ते चूप ना रेहीयां।
¹⁰ किजोकी आंव तीसैही साथी, ते कोई तीं पुड हमलो केरतां नुकसान ना
पुजेइबटेल्हो; एल्हेरलेइ की इस शहरे मां मेरे केही लोक हुन्ना भी आन्ह।
¹¹ तैलां बाद पौलुस तैडी डाढ साल राहु, ते तैन परमेशरो सुसमाचार
शिखाल्तो राहु।

¹² जैखन गलिल्यो सुबै आख्यारो हाकम थु, ता युहुदेइ मिलतां पौलुसे पुड
हमलो कमाव; ते पौलुस टलेइतां आदालती मां निहियो।¹³ ते जौने लगे, की
एह लोकन एस त्रिकेरी परमेशरी आराधना केरनी शिखालते, जै ईशे मैहेज्बरे
बिलकुल बरखलाफे।¹⁴ पौलुस कुंखुं जौने बालो थु; ता गलिल्युए युहुदन
सैही जांव; ओ युहुदियाव अगर केवी जुमैरी या कोई बडी शररथारी गल
भोथी ता आंव तुशी शुंनेथो।¹⁵ पण तुशो आल्जाम ता सिर्फ खाली गल्लां केरो
ते नांवां केरो ते तुशे मैहेज्बेरोए, ते आंव एन गल्लां केरो फेस्लो देने बालो ना
बैनी।¹⁶ गलिल्यो सुबै आख्यारो हाकमे तैना आदालती मैरां बेरोहू कढे।
¹⁷ तैखन तैनेइ सैभेइ सोसथिसे पुड पैई जे, जै प्राथना भवनेरो पुजारी थु, ते
तै टलेइतां आदलतारे सामने मारने कुटने लगे, ते गलिल्यो सुबै आख्यारो
हाकमे तैनकेरी कोई परवाह ना कमाई।

अन्तकिया वापस एजनु

¹⁸ पौलुस काही दिहाडे कुरींथिसे मां राहु ते फिरी तै दूलांन कैरां रुखसत
भोइतां जिहाजे मां सुरिया जो चलो जेव, ते प्रसिकला ते आकोला भी
तैस्सैही साथी थियो, ते कीखुर्ये मां तैनी अपनी मिनत पुरी केरनेरे लेइ तैनी
अपने दोगेरी टींड बनेवरी थी।¹⁹ जैखन तैना इफसुसे मां पुजे ता पौलुसे
प्रसिकला ते आकोला जो तैसेरी शुकरगुजारी दिती, ते तै एकी प्राथना भवने
मां जेव ते युहुदन सैही बेंस केरनेलगे।²⁰ जैखन तैने युहुदेइ पौलुसे का
मिनत की, की तु हेजु किछ दिहाडे असंन का बिश, ता पौलुसे तैन सैही मन्नु
।²¹ पण जैखन पौलुस तैतां चलो ता तैनी तैन सैही वेहिदो कियो, की अगर
परमेशरेरी मर्जी भुई ता आंव फिरी तुसनका एजेल्हो, ते फिरी पौलुस जिहाजे
मां चैडतां इफसुसेरां चलो जेव।²² जैखन तै कैसरे मां जिहाजे मैरां ओस्सो
ता तैनी युरोशलमे माम गैहीतां तैनकेरी कलिसयाई जो नमसकार कियुं ते
फिरी तै ईनताकियारे पासे चलो जेव।

पौलुसेरी टलाइयो सफर

²³ ईनताकिया मां किछ चिर बितनेरे बाद तै तैतां चलो जेव, ते गलतियारे
ते फरोगियारे सारे अलाकन म्महेइ निसतो चलतो सैरी चलन विश्वासे मां
मजबुत केरतो जेव।

इफिसुस शहरे मां अपुल्लोस

²⁴ एस्से फेरे अक युहुदी थु, तैसेरु नांव आपलुस थुं, ते तै सकेंद्रिया मां
जरमोरो थु, ते तै ईफसुसे मां रहतो थु, ते तैसेरी बडी मिठी ज़बांन थी, ते तै
बडो अकल्मद थु, ते धर्मशास्तररे बारे मां बडो ज्ञानकहार थु।²⁵ तैनी
परमेशरेरे त्रिकेरी तालीम शिखोरी थी, ते बडे जोशे सैही प्रचार केरतो थु, ते
परमेशरेरे बारे मां सैही तालीम देतो थु, पण तै सिर्फ युहन्नेरे बपतीस्मे तगर
बाकम थु।²⁶ तै प्राथना भावने मां निधडक चारे प्रचार केरने लगे, ते जैखन
प्रसिकला ते आकोले तैन शुंनु ता अपने घरे निहियो, ते परमेशरेरे त्रिकेरी
तालीम शिखाली।²⁷ जैखन पौलुसे सुमुंद्रे पार आखिया गहनेरो बिस्तार
कियो ता किछ दूलांन तैस हिंमत दिती ते तैठेरे चलन जो चिड्डी लिखी, की
एस सही रोडे चारे मिलाथ, ते तैनी तैडी पुजतां तैनकेरी बडी मद्दत की जैनेइ
परमेशरेरे फजलै सैही विश्वास कियोरो थु।²⁸ किजोकी तै बडे ज़ोरे शोरे
सैही बेंस केरतां युहुदन खुल्ले आम झुठे साबत केरतो थु, ते पाबित्र बचने सैही
मस्त केरतो थु, की यीशु ही मसहीए।।

इफिसुस शहरे मां पौलुस

19 जैखन आपलुस कुरींथिसे मां थु, ता पौलुस आलाकेरी एंत्रीं बत्तां
निस्तां इफसुसे मां पुजो, तैस तैडी होरे भीकाही चले मैल्हे।² तैनी
तैन पुछ, की कुन तुसन विश्वास केरते बार तुसन पुड पाबित्र आतमा उत्रोरी
थी? तैनेइं जुवाब दितो, असेइं नेहीं शुंनेरु की पाबित्र आतमा कथै उत्रोरीए।
³ तैखन पौलुसे जौंव, फिरी तुसेइं किसेरो बपतिस्मां निहियो? तैनेइं जुवाब
दितो, युहन्नेरो।⁴ पौलुसे जौंव; युहन्ने ता तोबा केरनेरो बपतिस्मां निहियो ते
जौंव, की जै मेरे बाद एज्जने बालोए तुस तैस पुड विश्वास केरा यैनी यीशु
मसही पुड।⁵ एन शुंनतां तैनेइं परमेशर यीशु मसहीएरे नोवें सैही बपतीसमां
निहियो।⁶ जैखन पौलुसे तैन पुड हथ रखे ता पाबित्र आत्मां तैन पुड उतरी,
ता तैना आजीब आजीब बोली केरने लगे, ते एज्जने बाले मोकेरो हाल शुंनाने
लगे।⁷ एना सभ कोई बहरे मैन्हुं थियो।

⁸ फिरी पौलुसे प्राथना भावने मां गहंनु शुरु कियुं, ते कोई टलेई महीन्न
तगर बडे जोशे सैही परमेशरेरी बादशैहीयारे बारे मां लोकन पाबित्र शास्त्रे मैरां
शालोख शुंनेइतां मजबूत केरतो राहु।⁹ पण तैन मैरां किछ कठोर दिलेरे
भोइजे; ते तैनेइं विश्वास केरनेरे बजाहे इनकार कमाव, ते मसहीएरे बारे मां
बुरु बुरु जौने लगे, एल्हेरलेइ पौलुस तैन कैरां कनारे भोइ जेव, ते मसही चले
भी कनारे कियो ते; त्रान्सेरे सुकुले मां गहंनु शुरु किंव, जैडी तै रोज तैन सैही
बेंस मुबासो केरतो रहतो थु।¹⁰ एह सिल्व्तो दुई सालन तगर चलतो राहु,
एडी तगर की आसियारे सुबै मां रहने बाले सारे युहुदन ते यूनैन्ग परमेशरेरु
बचन शुंनेरो मोको मैल्हो।

¹¹ ते परमेशर पौलुसेरे जिरये सैही आजीब आजीब चमत्कार हेरातो थु।
¹² एडी तगर की पौलुस जैस रुमाले सैही या दुष्टे सैही हथ लातो थु, ता
तैना बिमारन पुड छडते थियो, ता तैना बिमार बैज्ञोते थियो; ते अगर तैन मां
दुष्टात्मां भी भोती थी, ता तैना भी निसी गैहती थी।¹³ किछ युहुदी इरहां
उरहां गैहितां यीशुएरे नोवें सैही फुक फक भी देने लगे, ते तैना दुष्टात्मां
कढनेरे लेइ एन जोते थियो, यीशु मसहीएरो प्रचार पौलुस केरते ते तैस्सेरे
नोवेंरी तीं कसम देइतां नशनेरो हुकम देताइं।¹⁴ सरदार काहीं सिक्वएरां
सत मद्दां भी एन्ने कम्मां केरतां थियां।¹⁵ पण एसां दुष्टात्मां तैन कुन जौंव;
आंव यीशु मसही भी ज्ञानचाहीं ते पौलुसे भी ज्ञानचाहीं ते तुस कौवंनथ?
¹⁶ ताल्ही तै मैन्हुं जैसमां दुष्टात्मां थी, तैन्न यीशुएरे नोवें सैही फुक फक देने
बालन जो पैव, ते घुली घुली तैना अपने कब्जे मां केरतां एतरे कुट्टे की तैना
लैव्हे लैव्हान भोइतां नगनगे तैतां नशै।¹⁷ जैखन इफसुसेरे युहुदन ते युनेन्न
एस गल्लारो पत्तो लगे, ता तैना डेरी जे, ते परमेशर यीशु मसहीएरु नोवें उच्च

भोव। 18 केही लोकेइं जैनेइं विश्वास कियोरो थु, एइतां अपने बुरे कम्मां केरो दुबारा इकरार कियो। 19 केही लोकेइं जैना तंत्र मंत्र शिखते ते केरते थिये, तैना किताबां सैरेइं एनतां शरेआम फुकतां छैडी, ते जैखन तैन किताबां केरी किमतारो हिसाब लाव ता कोई पांजह हजारन केरां जादे थु। 20 एस्से वजाही सैहीं परमेशरेरो सुसमाचार बड़े तकडे चारे जिलां छडतो जेव, ते फैलतो जेव।

21 एन गल्लां केरे बाद पौलुसे पक्को इराधो कियो, की आंव म्क्दुनियां ते आखियारे आलाके म्मेहीं निस्तां युरोशल्लेमं जो चलो गैहिलो ते फिरी रूम शहरे मां गैहितां रूम शहर भी हेरेल्हो। 22 तैनी अपने सैथन मैरां तिमांथिस ते आरास्तस दुई मैन्हुं म्क्दुनियां जो भेजे, ते एपु भी किछ विरे आसियारे सुबै मां रुकोरो राहु।

इफिसुस ए मां हंगामो

23 एस फेरे मसही तरिकेरे बारे मां बडो हंगामो खडो भोव। 24 अक सुनार थु, तैसेरु नॉव दॅन्त्रुस थु, ते आर्तम्स देबारे मंद्देरी शकली पुड सॉन्ने चॅदरां मंद्दां बनावातो थु, ते एन कंम ज्ञांन्ने बाले कारिगिरन बडू कंम दुवातो थो। 25 तैनी एन कंम ज्ञांन्ने बाले सारे कारीगिर अकोठे कमाए ते जौने लगे, की औ मेरे दूलाव असां इन कंम केरतां बडे पैइसे कमातमा। 26 पण तुस हेरतथ ते शुंनतथ की एना दुई मैन्हुं पौलुसेरे जैरेहे कॅचरे इफिसुस ते तकरीबन सारे सुबै आसिया मां लोकन टपलाने लोरेन ते जौतन की हथेरां बनोरां मंद्दा बुत हरगज देबतो ना भोई सखे। 27 डर एस गल्लारो नेहीं, सिर्फ की ईशै पैशैरी बदनामी भोली, बल्के पुरानी देबी आर्तमास जै अहे तैसारी इज्त भी खत्म भौनीए; इस सारे सुबै मां बल्के सैरी दुनियाई मां एस देबारी पूजा भोचे, ते हुनी तैसारी इज्त भी खत्म भोइगनिये।

28 जैखन तैनेइं शुंनु ता तैना सरकी सैहीं लाल लाल भोइ जे, ते जोरे जोरे नारहे देंने लगे, की इफिसी केरी देबी आरतम्स बडी पुरानीए। 29 हेरते हेरते सारे शहरे मां आफरा तफरी मैचूची जेई, लोकेइं गैलुस ते आरसत्रखुसे जैना पौलुसे सैहीं साथी एवरे थिये तैना टलेइतां घसीटते घसीटते तमाशो हेरनेरी ठैरी जो दौवडते जे। 30 पौलुस भी मज्जलासिमां गहनु चहतो थु पण चेलेंइं तै रोको। 31 ते आसिया सुबैरे किछ मुलाजमेइं जैना पौलुसेरे मुलाजम थिए, ते जैना पौलुसेरे भी दोसत थिये, तैसजो बिस्तार भेजतां मिनत केरतां जौव, की तमाशो हेरने ना गैहियां। 32 तैडी पैन्चयतरी मजलिसी मां खलबली मचौरी थी, किजोकी किछ लोक नहरे देते थिये, ते किछ कुन ते बडे लोकन औ भी पत्तो ना थु की तैना तैडी कीजो अकोठे भेवरेन। 33 एन हेरतां युहुदेइं आसकॅदर अगर आन्हां ते गुरुपेरे केही लोकेइं तै घेरतां किछ किछ जौने लगे आस्कॅन्द्रे लोकन चूप केरनेरेलेइ इशारो कियो, ताके तैना अपनी सफाई एपु जोइसखन। 34 जैरो लोकन पत्तो लगे की एह युहुदिए, ता सभ जोरे जोरे नारऔ देंने लगे, की इफिसी केरी देबी आरतमास बडी पुरानीए औ एह सिलस्तो तकरीबन दुई घंटे चलतो राहु। 35 तैखन एकी मैने शाहरेरे लोकां केरी सरक ठंडी केरतां जौव; की इफिसेरे रहने बाले कौन कौन ना ज्ञाने की इफिसेरो शहर पुरानुए आरतीमास देबारू मंदरे ते एसेरे बुत्तां केरो बडो रखवालोए, जै आम्ब्रेरां बिछडोरो थु। 36 जैखन एना गल्लां केरे खिलाफ कॅचे किछ ना जौव ता ठीक थु की तुस चूप रहथ ते जल्द बेजी मां कंम ना केरा। 37 तुसेइं जैना मैन्हुं इडी आन्हारेन तैनेइं ता सिर्फ मंद्दे लुटेरुए ना ईशी देबारे खिलाफ किछ जौवरुए। 38 एल्हेरलेइ अगर दॅन्त्रुस ते एसेरे कारीगिरन कॅची पुड दाओ केरनोए ता आदालतारू दार खुलुए ते मुल्खेरे हाकम माजुदान जेडी तुस एकी होरी पुड दाओ केरी सखतथ। 39 अगर कोई होरो भी म्स्लोए भोए ता तैसेरो फैस्तो भी म्ज्लासी मां भोई सखते। 40 असन ता अन्दाजोए की अगर कोई असंन पुड मुकादमों केरे ता आजरे हंगामेरे जिमेबार ता असां ता असां कुन जुवाब दैमैल्हे, किजोकी एह हंगामो बिल्कुल बिलावाजा थु। 41 एन जौनेरां बाद तैनी पैन्चैयत खत्म कमाई।

मकिदुनिया, यूनान त्रोआसे मां पौलुस

20 जैखन बडी शौर मचूची ता पौलुसे अपने चले कुजाए ते तैना समझाए ते तैन बिशा जोइतां म्क्दुनियां जो चलो जेव। 2 पौलुस जैल्मैइं जैल्मैइं निस्तो चलो ता लोकन सुसमाचाररे बारे मां समझातो चलो

जेव, ते आखरकार युनाने मां पुजो। 3 तैडी तै टलाई मिहिने राहु, ते जैखन तै जिहाजे मां सूर्या जो चलने बालो थु, ता युहुदेइं तैस मारनेरी साजश बनाई, ते एल्हेरलेइ तैनी एन रोडु समझू की वापस म्क्दुनियां जो चलो गहतां। 4 प्रसेरु मडु सपतरुस जै बिरयेरो रहने बालो थु, ते थिस्लुनकियो शाहरेरे आस्त्रखुस ते सकेदस ते दरबैरो गैलुस ते तिमांथियुस ते आसियारो तैखिकुस ते तुर्फीमुस आसिया तगर तैसेरे साथी चलते राहे। 5 एना लोक पौलुसे केरां पैहिले निसारे थिये, ते त्रावसे मां असंन बलगने लगेरे थिये। 6 पण आस बेडी दिहाडी ईद फितरेरे बाद जिहाजे मां त्रावसे जो चले जे; ते पांचाव दिहाडे त्रावसे मां पुजे, ते तैन सैहीं मिले, ते सत दिहाडे तैडी राहे।

त्रोआसे मां युतुखुस जीतानों

7 हफतेरे पैहिले दिहाडे असां रौट्टी टलोडनेरे लेइ अकोठे भोवरे थिये, ता पौलुस लोकन सैहीं जौने लगे, की पौलुसे होरसां तैठां आगरोहुं गहनु थु, ता एल्हेरलेइ तै डलोवझां चीरे तगर सुसमाचार शुंनातो राहु। 8 बँहीयें दोप्रे जैडी असां सभ अकोठे बिशोरे थिये, ता तैडी काही दिये बलते थिये। 9 ता अक नोवजुवान दैरी मां बिशोरो थु, ते तैसेरु नॉव युतुखुस थु, तै पौलुसेरो प्रचार शुंन्ते शुंन्ते झूल्ही जेव, ते एछी निडली मां टलेइयाव छतरां उनढो खिरको, ते हेरने लगे ता तै मैरी जेवरो थु। 10 पौलुस बुन आव ते तै नोवजुवान टलेइतां तैस्सैहीं लिपटो ते जौने लगे, की डरा नन्ना एह जितोए। 11 फिरी तैनी बह गैहितां रौट्टी टलोडी ते सैभेइं मिलतां खाई, ते फिरी टलेकडौने तगर बचन शुंनाने लगे, तैखन तै तैठां चलो जेव। 12 लोकेइं तै नोवजुवान जितो घरजो निहीयो, ते तैन बडु यकीन भोइ जेव।

त्रोआसेरां मिलेतुसेरु सफर

13 असां आग्र गैहितां जिहाजे मां सुवार भोइजे ते आसुसेजो चले जे, ताके तैडी पौलुसे भी जिहाजे मां चहडम, किजोकी पौलुसे पैहिले पैदल गहनेरो बिस्तार कियोरो थु। 14 जैखन तै असंन आसुसे मां मैल्हो ता तै असेइं जिहाजे मां चहडो ते असां म्त्लूनियें मां पुजे। 15 तैठां असां जिहाजे मां सुवार भोइजे ते होरसां आस खैसरे सामने पुजे, ते टलेइयाव दिहाडे असां सामसे मां आए, ते होरसां अस मैलीतिसे मां पुजे। 16 पौलुसे फैसलो कियोरो थु, की मीं इफिसुसे मेइं गहनुए ते आसिया मां नेहीं रुकनु, ते जल्दी युरोशल्लेमं मां पुजनुए ते पैत्कुस्तेरे दिहाडे तैडी गुजारनेन।

इफिसुसेरे बुजुर्गन तालीम

17 मैलीतिसे मां पुजतां पौलुसे इफिसुसेरी क्वीस्यारे बुजुर्ग कुजाए। 18 जैखन तैना आए ता तैनी तैन सैहीं जौव, तुस जानतथ की जैइसोक्नो दॅतो मीं आसिया मां पाव रखोरोए, ता मेरो चालचलन तुसेइं केरो लाहु। 19 आंव बडे सच्रे दिले सैहीं ते लेरां देइतां परमेशरी सेवा केरतो राहु, हालाकी मीं युहुदी केरी बेडी बेडी साजशां केरो सामनो केरनो पैतो थु। 20 ते जैना गल्लां तुशे लेइ फैइदेरी थी, तैना मीं तुसन सैहीं बगैर कॅचरे डरे तुसन सैहीं जोइ छेडी, ते बल्के जैन किछ भी शिखालु दिल त्सैली सैहीं ते घर घर गैहितां शिखालु। 21 आंव युहुदी केरे ते युनैनी केरे दुइयां केरे सामने गवाही देताइं की तैना परमेशरे का तोबा केरन, ते ईशे यीशु मसही पुड विश्वास केरा। 22 हेरा आंव रुहरो गुलाम बॅनतां युरोशल्लेमं मैझो चलरोइं, ते मीं पत्तो नेहीं की तैडी मींपुड केरी केरी गुजरेल्ही। 23 आंव सिर्फ एनू जानताइं की पाबित्र आत्मा मीं हर शहरे मां एन जौती राही, की कैदी दुख मसीबत मीं बलगने लोरीन। 24 पण मेरी जान मेरे लेइ कोई कद्र कीमत ना रखे, ता बस्सा आंव एन चहतां की मेरो दोवरो पुरो भोए, ते आंव परमेशरो सुसमाचार शुंनानेरु कंम जैन परमेशरे मीं सौंफेरुए तैन पुरु केरीं। 25 हुनी आंव जानताइं की तुसेइं आंव जैन मां परमेशरी बादशैहीयारो सुसमाचार शुंनातो राहु; ता मीं फिरी ना लाहेले। 26 एल्हेरलेइ आंव तुसन साफ साफ जोइ छडतां, की जैना लोक मारे गाहेले ता आंव तैनकेरे खुने केरां बरीं। 27 किजोकी आंव बगैर कॅची डरेरां तुसन शिखालतो राहु; की परमेशरी मर्जी तुशेलेइ कुने। 28 बस्सा आपनो ते सारे विशवैसी केरो खियाल रखा, जैसेरे तुस पाबित्र आत्माारी तरफां चूनोरेथ की परमेशरेरी क्वीस्यारी पासबानी केरा, जै तैनी खास अपने खुने सैहीं धिनोरिए।

29 आंव ज्ञानताई की मेरे गहनेरां बाद मारने बाले डलाघ तुसन मां एइतां घुसडनेण, ते तैना भैडन जिती ना छडेल्हे। 30 बल्के तुसने मैरां एरहे लोक खडे भोल्हे जैना सच टलोड मरोड केरतां छडेल्हे, ताके चलन अपने पासे केरन। 31 एल्हेरलेइ खबरदार रहथ ते याद रखा, की आंव टलाई साल लेरां देंतो रात दिहैडी हर एकी तैन खतरन केरां बच्चांतो राहु। 32 हुंनी आंव तुसन परमेशरे बचनेरे सुपर्द केरताई की जै तुसन तरक्की देइसखते, ते तुसन तैस जागिरारो हकदार बनेइसखते, जै तुशे धर्मी केरेलेइए। 33 मीं केंचरे सौत्रे चेंदरु या लिगडां केरु लालच नेहीं कियेरु। 34 तुस एपु ज्ञानतथ की मीं अपने हथेइं सैहीं अपनी ते अपने सैथी केरी हर अक जरुरत पुरी कीयोरिए। 35 की असां केंचरे सैहीं कमजोरन समैल्ही सखतम? एन ता मीं तुसन केरतां भी हारेवरुए, असां परमेशर यीशु मसहीएरी गल याद रखम की देनु, आंन्हने, केरां जादे मुबारके।

36 एन गल्लां केरे बाद पौलुसे जेंधु तल्ले लेइतां सैभन सैहीं साथी दुवा की। 37 तैना सभ गले मिलतां लेरां देने लगे, ते एकेकी फूमडी देने लगे। 38 ते पौलुसेरी जैन गल्लेइं तैना गमगीन कियोरे थिये, एह गल थी, की तुस मीं फिरी ना लाहेल्हे, चाल्ही तैना पौलुसे जिहाजे तगर पूजाने जे।।

पौलुसेरु यरुशल्लेमें गहनू

21 जैखन असां तैनकेरां खींडे ता जिहाजे मां चले जे ता सिधे कौसे मां आए, ते होरसां अस रुदसे मां पुजे, ते फिरी तैठां पत्रा जो चले जे। 2 तैठां असेइं हेरु की अक जिहाजे फनिके जो चलेरुए, ता असां तैस पुड चैडतां चले जे। 3 जैखन ईशी नजर कुप्रसे पुड पैइ ता तै असेइं बांए हथे ओसैल्लां सुरिये जो चले जे, असां (सुर)सुरे मां ओसै, किजोकी ईशे जिहाजे तैडी किछ माल ओसाल्लो थु। 4 तैडी असेइं चले तोमां कडे ते तैनका असां सत दिहाडे राहे, तैनेइं पाबित्र आत्मांरे जौने सैहीं पौलुसे युरोशल्लेमां गहनेरे लेइ ठाको। 5 जैखन असंन तैडी सत दिहाडे भुए, ता असां तैठां आग्रोहुं चले ता सारे चले ते कौन्शां मड्डां शहरे बेइर तगर साथी आए, ते सुमुंदरे बंत्रे पुजतां असेइं जेंधु तल्ले लेइतां दुवा की। 6 फिरी असां तैन केरां खींडे ते जिहाजे मां चैडतां चले जे, ते तैना भी अपने घरेजो चले जे।

7 असां सुरे मैरां आग्रो चले जे, मलिमीसे मां जिहाजे मैरां औस्से, ते तैडी असेइं अपने द्वालां जो जए मसही कियुं ते तैन सैहीं साथी अक दिहाडी तैडी राहे। 8 ते होरसां असां तैठां चले जे, ते केसरे मां आए ते फिल्युस नोवैरो अक मैन्हुं थु, तैसेरे घरे राहे, जै युरोशल्लेमां सत चूनोरे बुजुरगंन मैरां अक थु। 9 तैसेरी चौवर कुईयां थी, ते तैना आइलेही थी, ते तैना एजने बाले जमानेरो बिस्तार शुनेती थी। 10 जैखन असंन तैडी काही दिहाडे भुए ता तैडी अक नबी थु, जैसेरु नोव आम्बुस थु, तै युहुदियेरां एवरो थु। 11 तैनी असंन का एइतां पौलुसेरे नाडे सैहीं अपने हथ पाव बंधे ते जौने लगे, की पाबित्र आत्मां जोवरुए की युरोशल्लेमेरे युहुदी इस नाडरे मालकेरे जैरे बंधतां गैर युहुदी केरे हवाले केरेल्हे। 12 एन शुनतां असेइं ते होरी लोकेइं पौलुसे का मिनत की, की युरोशल्लेमां मां ना गैहींयां। 13 पण पौलुसे जुवाब दितो, तुस एन कुन केरने लोरेथ? तुस कीजो लेरां देई देई मेरो दिल टलोडने लोरेथ? आंव युरोशल्लेमां परमेशर यीशु मसहीएरे नोवें सैहीं सिर्फ बंधोनेरे लेइ नेहीं बल्के मरनेरे लेइ भी तियार आंहीं। 14 जैखन पौलुसे जौनु ना मनु ता असां चूप राहे, की परमेशरी मर्जी पुरी भोए।

15 एसेरां बाद असां सफरेरी तियारी केरने लगे, ते फिरी असां युरोशल्लेमां जो चले जे। 16 ते केसरेरे किछ चले असंन सैहीं साथी चले, ते असां मनासुनेरे घरे निहीये जैडी असेइं बिशनु थु, मनासुन कुबरुसेरो रहने बालो थु, ते कने पुराने चलन मैरां थु।

पौलुसेरी याकूबे सैहीं मुलाकात

17 ते जैखन असां युरोशल्लेमां पुजे ता ईशे द्वाला बडे जोशे सैहीं असंन सैहीं मिलने आए। 18 होरसां असां पौलुसे साथी नेहीतां याकूबे सैहीं मिलने जे, तैडी सभ सियाने बुजुर्ग पैहीले अकोठे भोवरे थिये। 19 पौलुसे तैन जो जए मसही कियुं, ते सारो बिस्तार दितो की परमेशरे एनकेरी सेवारे जिरये सैहीं गैर युहुदन मां कुन कुन कमाव। 20 जैखन तैनेइं एन शुनु ता परमेशरी तारीफ

केरने लगे; ते फिरी पौलुसे सैहीं जौने लगे, मेरा द्वाला हजारेइं युहुदेइं विश्वास कियोरुए; ते तैना सभ हुकमन पुड अंमल केरने मां तकडेन। 21 एनी ता एन जोवरुए की तुस सारे युहुदन जैना युनेनी केरे मुझाटे रहतन एह तालीम देंतो एवरोस की मुसै नेबी शारा ते अपने मड्डां केरी सुनत ना केरा, ते युहुदी केरो रुवाज ना मन्ना। 22 हुन्ना ता तु इडी एवरोस, ते एह गल लोकां केरे कन्ने तगर जरुर पुजी गाहेल्ही, ते हुंनी कुन कियुं गाहे। 23 ईशी राई ता इहे की असंन का चौवर मैन्हुं जैनेइं माफी मगोरीए। 24 तु तैन एपुसैहीं साथी नै ते तैन सैहीं मिलतां अपना आप साफ केर, ते सैरी रसमां पुरी केर ते तैनकेरो खर्चो भी दे, ताके तैना अपना दौग कट्टेइ सखन, तैखन सैभन पत्तो लगनोए की जैना गल्लां तेरे खलाफ फैलेवरीन, तैना गलतन ते तु एपु भी सचै दिले सैहीं शैरीती पुड अंमल केर। 25 ते जैडी तगर तैन गैर युहुदी केरो सुवाले, की जैनेइं विश्वास कियोरुए, तैनकेरे बारे मां असेइं पैहीले फैसलो केरतां लिखतां छुडेरुए की तैना बुत्तान का चैडोरी चिजां लेहुवे केरां ते गल भानोरे जनबरां केरे मासे केरां परहेज केरन, ते हेराम कम्मं केरां बचन। 26 होरसां पौलुसे तैना मैन्हुं साथी निहीये, ते तैन सैहीं साथी अपना आप साफ केरनेरी रस्म पुरी केरतां प्राथना भावने मां जेव, ते खबर दितो की अपना आप साफ केरनेरे दिहाडे पुरे भोने पुड तैना अपनी मिनत चहडैल्हे।

मन्दरे मां पौलुस टलानां

27 जैखन साफ भौनेरे सत दिहाडे पुरे भौने बाले थिये ता आसियाएरे युहुदेइं पौलुस मंद्रे मां लाहु ता लोकन मां हलचल मचाई, ते तैस टलेइतां चिडां मारने लगे। 28 औ ईस्रैएलाव ईशी मद्दत केरा, इहे तै मैन्हुं, जै हर ठैरी लोकन ईशे खलाफ ते ईशी शैरितरे खलाफ ते प्राथना भावनेरे खलाफ तालीम देंतो रहते, ते एनी एसेरां आलावा युनानी ईशे प्राथना भावने मां एन्हतां तै पाबित्र ठार गंदी बनेवरीए। 29 तैनेइं पैहीले तुरकमस ईफसी शहरे मां पौलुसे सैहीं साथी लाहोरो थु, ते तैना सौचने लगोरे थिये की पौलुसे तै जरुरी मंद्रे मां नीयोरो भौनोए। 30 सारे शहरे मां हलचल मैचुची जेई, ते मैन्हुं दौवडतां जामां भौने लगे, तैखन तैनेइं पौलुस टलईतां प्राथना भावने मैरां घसीटतां बेइर आंन्हों ते दारां बंद कमां। 31 जैखन तैना तैस मारनेरी कौशिशी मां थिये, ता रूमी पलटनरे अफसरे खबर पुजी, की सारे युरोशल्लेमां खल्ल्बी मचौरीए। 32 ते तैखने पलटनरे अफसर ते सिपाही साथी एन्हतां तैन मैन्हुं का बुन पुजो, जैखन तैन मैन्हुं पलटनरे अफसर ते सिपाही साथी लाहे ता तैनेइं पौलुसे मार ना दितो। 33 पलटनरे अफसर नेडे गैहीतां पौलुस अपने कब्जे मां कियो, ते तैस दुई शागलैइं सैहीं बंधनेरो हुकम दितो, ते फिरी तैनी पुछू की एह मैन्हुं कौने ते एनी कुन कमेवरुए? 34 तैस गुरुपे मां किछ लोक चिडां मारते थिये, ते एतरी शौर मचौरी थी, की पलटनरे अफसर असलीतरो पत्तो ना लग्गो ते तैनी हुकमं दितो की पौलुसे किल्ले मां पुजाथ। 35 जैखन पौलुस सिपेहीयेइं पेवडन उबरो चलेवरो थु, ता लोकेइं जबरदस्ती केरतां पौलुस बंधो बांहीं उबरो छुओ। 36 सारे लोक जैना पौलुसे पत्ती पैरे थिये, तैना चिडां मारते थिये, की एस खत्म केरा।

37 पौलुसे सिपाही किल्ले मां पुजाने बाले थिये, ता पौलुसे पलटनरे अफसर सैहीं जौव, की आंव तीका किछ मिनत केरी सखतां? ते तैनी पुछू की तु युनानी ज्ञानतस? 38 कुन तु तै मिस्री ता नेहीं, जैनी किछ चीरे पैहीले खलाफत कियोरी थी, ते चौवर हजारा बगावत केरने बालन सैहीं साथी जंगले मां बिशोरो थु। 39 पौलुसे जौव, आंव ता युहुदी, ते तिरस्सैरो रहने बालोइं, जै कलकियारो मशुर शहरे, मीं लोकन सैहीं तक्रीर केरनेरी ईजाजत दे। 40 पलटनरे अफसर केरां इजाजत घिन्तां पौलुस पोवडन पुड खडो भाइतां लोकन जो हथे सैहीं इशारो कमाव, ते जैखन तैनेइं चूप कमाई ता पौलुसे इब्रेनी बोली मां जौनु शुरु कमाव।।

भीडरे सामने पौलुसेरु भाशण

22 मेरे द्वालाव ते बुजुर्गाव मेरु बियांन शुना जैन आंव एपनी सफैई मां पैश लोरोइं केरने।
2 जैखन लोकेइं तैस केरां इब्रेनी मां जौनु शुनु ता तैना चूप रेही जे, तैखन पौलुसे जौव।

3 आंव युहुदीं ते कृकिया शाहरेरो रहने बालोइं, ते तिसुसे मां पैइदा भोवरोइं पण मेरी तालीम इस शहरे मां भोवरीए, मीं गंमली एहेलैरे कदमन मां अपने बुजुर्ग दादां केरी शैरीती पुड़ अंमल केरनेरी तालीम शीखोरीए, आंव भी परमेशरे लेइ एरहो खुश थु, जैरहे आज तुसथ। 4 मीं लोक मसहीएरे तोर तरीके पुड़ चलने बाले बडे सताए, एइही तग्र की कत्ल भी किये ते, आंव मडदन ते कौन्शन बंधतां कैद खाने मां छडतो राहु। 5 सरदार कंहींन ते सभ बुजुर्ग लोक एस गल्लारे शहातन, की मीं दंमशके मां रहने बाले युहुदी द्वां केरे लेइ चिडी एन्होरी थी, ते आंव तैडी एस निति सैहीं जेवरो थु, की जैतरे मसही लोक तैडीन तैन भी बंधतां युरोशल्में मां एन्हो ते तैन सज्राह दुवेइं ।

अपनों मन बेदलोंनेरे बारे मां

6 आंव जैखन सफर केरते केरते दंमशकेरे नेडे पुजो, ता दुपाहरां केरे मोको थु ते आम्बरां अक बडी लौ भुईं ते मेरे चौवरे पासन चमकने लगी। 7 आंव तल्लै बिछडी जेव ते मीं अक आवाज शुंनी; जै मीं जो जौने लोरी थी; औ सावल औ सावल तु मीं कीजो स्तातस? 8 ता मीं पुछू औ परमेशर तु कौवनस? ता मीं जो जुवाब आव की आंव यीशु नासरीं जैस तु सतातस। 9 मेरे सैथेइं लौ ता लाही पण तैन कोई संमझ ना आई की तै आवाज मीं सैहीं कुन लोरीए जौने? 10 ता मीं पुछू औ परमेशर आव कुन कमेइं; परमेशरे जौव, उठ दंमशके मां गह तैडी तीं सभ तगर जैन तेरे केरनेरे लेइ रखेरुए तैडी तीं सैहीं जौव गाहेलु। 11 मेरे सैथेइं आंव हथेरं टलेईंतां दंमशके मां पुजाव, किजोकी तैस तैज लोंआं आंव कांनो बनेवरो थु।

12 तैडी अक मैन्हुं हन्नानियां नोवेरो मीं हेरने आव, तै बडो भलेमानस ते धर्मरो पाबंद थु, ते तैठेरे युहुदन मां बडो इज्जतदार लैहियोतो थु। 13 तै मींका एइतां जौने लगे, मेरे द्वाला, सावल, एपनी एछी खोल, ता मेरी एछी तैखने खुल्ली जेई, ते आंव तैस लहने लगे। 14 तैखन तैनी जौव, तेरे बुजुर्गां केरे परमेशरे तु चुंनोरोस, ताके तु तैसेरी मर्जा पुरी केरस ते तैस धेमी लहस ते तैसेरी जबाना गल्लौं शुंनस। 15 किजोकी तु सेरी लोकन मां तैसेरो गुवहा भोलो, ते तैन जाल्हो की तीं कुन लाहेरुए ते कुन शुंनेरुए। 16 हुंनी चीर किजोवें उठ, ते बपतिस्मों नै ते अपने पाप धौइ छड।

गैर कौमन मां प्रचार

17 ते जैखन आंव युरोशल्में मां वापस आव, ता मीं किछ बैहोशी जैरही भोजेइ। 18 मीं परमेशर लाहू ते एन जौंतु शुंनु की लुश केर, ते युरोशल्में मेरां लुशी निस, किजोकी एना मेरे बारे मां तेरी गुवाही कुबुल ना केरलेहे। 19 मीं जुवाब दितो, औ परमेशर एना लोक जानतन की आंव हर प्राथना भावने मां गहतो थु, ते कैचरे आंव तेरे मन्ने बालन आंव कैद केरतो ते कुटतो थु। 20 ते जैखन तेरे सेवके सैतफुसे मारने लोरे थिये, ता आंव भी तैडी थु, ते तैसेरे कत्ल केरने मां खुशी थु, ते आंव कैतली केरां लिगडां पहरतो थु। 21 परमेशरे मीं सैहीं जौव, गा आंव तीं गैर युहुदी लोकन का दुर दुर भेजेल्हो।

22 सारे लोक पौलुसेरी गल्लौं शुंने लोरे थिये, पण जैखन तै इडी तगर पुजो ता सारे लोक जोरे जोरे चिडां मारने लगे, की इही ठार पाबित्र केरा किजोकी एह जितो रखनेरे काबल नेहीं। 23 जैखन लोकां केरी शौर ते चिडां चैलती रेही, ता तैना लिगडां शैरतां धुड़ उडारने लगे। 24 ता पलटनरे अफसरे पौलुस किल्ले मां नैहनेरो हुकम दितो, की एस कोडेइं सैहीं मारा ते एसेरु बियांन घिना ताके पत्तो लगे, की लोक कीजो चिडां मारने लोरेन? 25 जैखन तैना कोडेइं सैहीं मारनेरे लेइ पौलुसे बंधने लगे, ता तैनी एकी अफसरे सैहीं जै तैडी नेडे थु, ता तैसजो जौव, कुन अक रुमी शहरी बगैर कुसुरे मारनो जैइजे? 26 जैखन तैनी अफसरे एन शुंनु ता तै होरी अफसरे का जेव, ते तैससैहीं जौव, की तु कुन केरतां? एह ता अक रुमी मैन्हुंए। 27 पलटनरे अफसरे पौलुसे का एइतां पुछू, कुन तु रुमीस ता पौलुसे जुवाब दितो, हां आंव रुमीं। 28 तैनी पलटनरे अफसरे पौलुसे सैहीं जौव, की मीं ता बडो पैइंसो खैरचतां रुमीं इज्जत हासल कीयोरिए, ते पौलुसे जुवाब दितो, पण आंव ता जरन्नेरो रुमीं। 29 जैना लोक पौलुसेरु बियांन घिने बाले थिये, ता तैना नैशी जे, ते पलटनरे अफसरे जैखन एह पत्तो लगे, ता तै डेरी जेव, की जै मैन्हुं मीं बंधतां रखोरिए एह ता रुमेरो रहने बालोए।

महासभारे सामने पौलुस

30 होरसां पलटनरे अफसरे पौलुस खोल्हो ते एन दरयाफत केरनेरे लेइ, की युहुदी एस पुड़ कुन आल्जाम लातन, तैनी युहुदीकेरी आदलतारे किछ मुलाजम अकोठे किये, ते सरदार कंहींन भी कुजाव, तैखन तैनी पौलुस एन्हतां तैनकेरे सामने खडो कियो।।

23 पौलुसे आदालतारे मुलाजमन पुड़ बडे रोडे चारे तेकतां जौव, मेरे द्वाला आंव बेडी नेक नीति सैहीं परमेशरेरे हुकमा केरे मुताबक जिंदगी गुजारतो एवरोइं। 2 सरदार कंहींन हनानियां पौलुसे का खडे भोजतां लोकन हुकम दितो, की एसेरे तुत्तरे मां थप्पड बहथ। 3 पौलुसे तैन सैहीं जौव, एन ठौरु धर्मार्थ, तीं पुड़ परमेशरेरी आनर्थ, तु इडी बिशोरोस की धर्मएरे मुताबक मेरो इन्साफ केरस, पण तु धर्मएरे खलाफ मीं मारनेरो हुकम देतस। 4 जैना तैडी खडखडे थिये, ता तैना जौने लगे; तीं सरदार कंहींन जो बुरु जौने जो हिंमत कैचरे भुईं? 5 पौलुसे तैन सैहीं जौव मेरे द्वाला मीं पत्तो ना थु, की एह सरदार कंहींन; शैरीती मां लिखेरुए की तु अपने सरदार कंहींन जो बुरु ना जोइयां। 6 पौलुस जानतो थु, की तैन मां किछ सुदुकी भी आंन्ह, ते किछ फ्रिसी भी आंन्ह ते तै आदालती मां जोरे सैहीं जौने लगे, की मेरे द्वाला आंव ता फ्रिसी केरु मड्डुइं; ते मीं पुड़ एनेइं एल्हेरलेइ मुकादमां चलैवरोए, की आंव उमीद रखताइ की मुडदे फिरी जिते भोल्हे। 7 पौलुसेरु एन जौते फ्रिसन ता सुदुकन एपुम्मेहीं लडाईं शुरु भोईं जेई, ते सैभन एपुम्मेहीं खल बनो। 8 सुदुकी जौतन की कियामत नेहीं भौनी, ते ना फरिशतो कोई चीजे, ते ना रुहु; पण फ्रिसी एन दुइने मनतन। 9 तैखने लडाईं शुरु भोईं जेई, शैरीतरे बुजुर्ग मेरां जैना फ्रिसी थिये, तैना खडे भोजतां लडाईं केरतां जौने लगे, की असां इस मैन्हुं मां कोई कुसुर ना लहंम, अगर केची रुहां या फरिशते कोई गल कियोरीए ता फिरी कुन भोव? 10 गल एतरी बेधी जेई, की पलटनरे आफसरे बुझांने लगे की एरहु ना भोए की पौलुसेरे टोटे टोटे ना बनान; ता तैनी सिपेहीन जो हुकम दितो की बुन गाथ ते पौलुसे जबरदस्ती किल्ले मैझो आंन्हां। 11 तैस्से राती परमेशरे पौलुसे का एइतां जौव; हिंमत रख जैचरे तीं युरोशल्में मां मेरी गुवाही दितोरीए, तैचरे तीं रुंमे मां भी गुवाही देंनी भोल्ही।

पौलुसेरे मौतरे लेई साजिस

12 होरसां झैझां युहुदेइं मिलतां फैसलो कियो, ते कसम कमाई की जां तगर असां पौलुसे कत्ल ना केरम, तां तगर किछ ना खांम दे ना पीम। 13 एस साजशी मां चैल्हीन कैरां जादे मैन्हुं थिये। 14 तैना सरदार कांहींन ते बुजुर्ग का जे, ते जौने लगे, असंन लांनत भोए, अगर असां पौलुसे मारनेरे बगैर किछ खांम या पीम ता; असेइं ता तैस खतम केरनेरी कसम कमेवरीए। 15 एल्हेरलेइ तुस सभ आदालतारे मुलाजम मिलतां पलटनरे आफसरे का दरखुवास देथ, की तै पौलुसे लोकां केरे सामने आंन्हें, ताके एस मुकदमेरी सारी हकिकत फिरी दरयाफत भोए, एस कैरां पैहीले पौलुस ईडी पेश कियो गाहे, असां तियारम, की तैस ठकाने लांम।

16 पण जैखन पौलुसेरे भनैजे, एस साजशरो पत्तो ल्गो, ता तैनी किल्ले मां गैहीतां पौलुसे पत्तो दितो। 17 तैखन पौलुसे अक आफसर कुजाव, ते तैस्सैहीं जौव; की इस जुवाने पलटनरे आफसरे का नैहथ; किजोकी एह किछ जौनेरे लेइ एवरोए। 18 बस्सा तै तैस पलटनरे आफसरे का साथी निहीयो; ते जौने लगे, की आंव पौलुस कैदी, जै आहे तैनी आंव कुजाव, ते तैनी मीं का दरखुवास कियोरीए, की इस जुवाने आंव तीं का एन्हो किजोकी एह किछ तीं सैहीं जौनु चहते। 19 पलटनरो आफसर तैस जुवानेरो हथ टलेइतां तै कनारे जैरे निहीयो ते पुछने लगे; तु मीं सैहीं कुन जौनु चहतस? 20 तैनी जुवाने जौव; की युहुदेइं अकोठे भोजतां तीं का दरखुवास देंनेरो फैसलो कियोरोए; की तु पौलुसेरी तैकिकात दरयाफत केरनेरे बहाने पौलुसे अदालत आलिया मां आंनस। 21 तु तैनकेरी गल ना मेन्ना; किजोकी कोई चैल्हीन कैरां जादे युहुदी तैसपुड़ हमलो केरनेरी ताकी मांन; तैनेइं कसम कमेवरी की जां तगर असां पौलुसे मारनेरे बगैर अगर असां किछ खांम या पीम, ता असंन लांनत भोए, हुंनी तैना तियारन; सिर्फ तेरे वेहिदेरो इंतजारे। 22 पलटनरे आफसरे तै जुवाने

वापस भेजो; ते जॉव की गा, एना गल्लाँ जैना तीं मीं सैहीं जोइ; होरी केंची पत्तो ना लोड़ी ल्गोरो।

पौलुस फेलिक्स का भेजना

23 तैखन पलटनरे आफसरे होरे दुई सुबेदार कुजाए, ते तैन सैहीं जॉव; की तुस दुई शौव सिपाही ते सहतर घोड़े सुवार ते दुई शौव बेड़छन बाले तियार रखा; तैनेइ राती नौवे बजेइं कैसरे मां गहनुएं। 24 ते फिरी तैनी पलटनरे आफसरे हुकम दितो की पौलुसेरे लेइ घोड़ेरो इंतजाम केरा, ताके तै गुवर्नर फिल्लुसे का हफाजती सैहीं पूजाव गाहे। 25 ते तैनी अक चिठी एस तरिकेरी लिखी।

26 कलोदेस लोसियारी तरफां गुवर्नर फिल्लुसे जो मेरु भोंतु जए मसही। 27 एह तै मैनुएं, जै युहदेइं टलातोरु थु; ते एस तैना मारने बाले थिये, की आंव सिपाही साथी नैहितां साथी जेव, ते तै छुटाव; किजोकी मीं पत्तो थु, की तै अक रंमेरो रहने बालोए। 28 लिहाजा एन दरयापत केरनेरे लेइ की तै तैना तैस पुड कुन आल्जाम लातन; मीं तै तैनकेरी आदालत आलिया मां पैश कियो। 29 ते पत्तो ल्गो, की तैनकेरो आल्जाम तैनकेरी शैरितरे मसलन सैहीं तालक रखते, पण एसेरे खलाफ कोई एरहो आल्जाम नेहीं की जैसेरे जरीये सैहीं असां तैस उमर कैद या मौक्तरी सजह देइ सखम। 30 मीं पत्तो ल्गोरोए की एसेरे खलाफ कोई साजश भोई राहोरीए, ते मीं एह जल्दी तीं कैझो भेजोरोए, ते मीं तैसपुड दाओ केरने बालन भी जौवरुए, की तैना भी तीं का अपनो मुकदमों पैश केरन।

31 बस्सा सिपाही पलटनरे आफसरेरे हुकमेरे मुताबक पौलुस एपुसैहीं साथी नैहितां रातो रात आंतिपत्रुसे मां पुझाव। 32 होरसां दिसां घोड़ सुवार तैससैहीं साथी अगरी अगरी गहनेरो हुकम दितो; ते एपु किल्लै मैझो वापस चलो जेव। 33 जैखन घोड़ सुवार कैसरे मां पुजे ता तैनेइ गुवर्नर का चिठी देइतां पौलुस तैस्का पैश कियो। 34 गुवर्नर चिठी पैडतां पुछ, एह कौस सुबैरो रहने बालोए? जैखन तैस पत्तो ल्गो की एह किल्लीयारो रहने बालोए। 35 ता तैनी जॉव की आंव तेरो मुकदमों तैखन शुंनेल्हो, जैखन तेरे मुदेइ भी इडी हाजर भोल्हे, तैखन तैनी हुकम दितो की पौलुसे हिरोदेसेरे किल्लै मां कैद केरतां रखा।।

हाकिम फेलिकुसेरे सामने पौलुस

1 पांचे दिहैइना बाद सरदार कंहींन हननियां किछ सियांने बुजुर्ग तीर्तुलुस बकीले सैहीं साथी कैसरे मां पुजो, ते गुवर्नर का पैश भोइतां पौलुसेरां खलाफ फरियाद कमाई। 2 जैखन पौलुस पैश कियो ता तीर्तुलुस बकीले पौलुसे पुड आल्जाम लांते जॉव, असां तेरे जॉने सैहीं बडे आराम सैहीं जिंदगी गुजारने लोरेंमे ते तेरे खियालेइं सैहीं ईशी कौमीं बडो फैइदो पूजोरोए। 3 फेलिकस बहादुरे, असां हर जगाई ते हर बखत तेरी मैहेभैनी सैहीं तेरे शुक्र गुजारंम। 4 हुनी आंव जादे चीर ना लेइं ते एनेकी मेरी दरखुवास थुन। 5 असेइ लाहेरुए की इही मैनुं बडो खतरनाके, इही दुनियारे सारे युहुदन मां फिल्लाबाजे, ते नैसरी केरे बदनाम फिकेरो मिम्ब्रे। 6 एनी ता मंद्र भी गंदु केनेरी कोशिश की, ते एल्हेरलेइ असेइ एह टलेइतां एस पुड एपनी शैरीतरे मुताबक मुकदमों चलानो चहते थिये। 7 पण पलटनरो आफसर एस असंन केरां ज़ब्रदस्ती नैही जेव, ते तैनी हुकम दितो की एसेरे मुदेइ इडी एइतां एसपुड मुकदमों दाईर केरन। 8 तु एसेरु बियांन शुंनेल्हो ता तीं एसेरी सैरी गैलती केरो पत्तो ल्गोएं, जैना गैलती असेइ एसपुड लेवरीन। 9 युहुदी भी खुशी भोइतां जॉने लगे, की एना गल्लाँ बिल्कुल सैहीयन।

पौलुसेरो एगरोरां जुवाब

10 जैखन गुवर्नर पौलुसे बियांन देंनेरे लेइ इशारो कियो, ता पौलुसे जुवाब दितो की, आंव ज्ञानतांइ की तु कैही सालां केरी देंती इस कौमरी आदालत केरने लोरोस, एल्हेरलेइ आंव अपनी सफाई तीं का पैश केरताइं। 11 तु एपु पत्तो केरी सखत्स की आंव बहरे दिहाड़े पैहीले युरोशल्लेमां मां प्राथना केरनेरे लेइ जेवरो थु। 12 मेरे मुदेइयेइं आंव मंद्रे मां केंची सैहीं भी बेंस केरतो नेहीं लाहोरो, ते प्राथना भावने मां ते शहरे मां इरहां उरहां लड़ाई केरतो नेहीं

लाहोरो। 13 हुनी एना आल्जाम जैना मीं पुड लांने लोरें, ते तेरे सामने साबत ना केरी सखे। 14 हां आंव इकरार जुवरु केरतांइ की जैस त्रिकेरी गलती मीं करार देतन; आंव तैसेरे मुताबक अपने बुजुर्ग दादां केरे परमेशेरी प्राथना केरतांइ, ते जैन किछ तुवारीती ते नेबी केरी किताबी मां लिखेरुए; तैन सैभन पुड मेरो विश्वास। 15 आंव भी परमेशेरे पुड तैहे भरोसो रखताइं, जै तैना रखतन की धेरमी केरी ते पैपी केरी, दुईयां, केरी कियामत भोल्ही। 16 ते एल्हेरलेइ मेरी एहे कौशिश रहचे, की परमेशेरे का भी ते इन्साने का भी मेरी नेकनीती राहे। 17 कैही सालां केरी गैर हैजारां बाद आंव एपनी कौमरी धर्मथेरी रक्मरी चहडतल पुजाने आंव युरोशल्लेमां मां एवरो थु। 18 तैखन एनेइं आंव मंद्रे मां लाहू, ता आंव शुध भोइतां अपनी रस्म चहडने लगेरो थु, ते ना कोई मीं सैहीं साथी हछे मैनुं थिये, ते ना कोई लड़ाई केरने लगेरो थु। 19 हां आसियारे किछ युहुदी तैडी थिये, अगर तैन मीं पुड किछ गिलो थु, ता तैनकेरु वाजब थु, की तैना इडी हाजर भोइतां मीं पुड दाओ केरेथे। 20 इना लोक जैना इडी एवरें, ता एना जॉन की जैखन आंव आदालत आलिया मां पैश भोवरो थु, ता एनेइं मीमा कुन कुसुर लाहोरो थु। 21 सुवाए इस गल्लारां की जै मीं बडे जोरे सैहीं आवाज देइतां जोवरी थी, की आज तुशे सामने मीं पुड मुडदां केरी कियाम्तरे बारे मां मुकदमों चलाने लगेरें।

22 तैखन फेलिकसे" जै मसहीएरे बारे मां बडु किछ ज्ञानतो थु, एन जोइतां मुकदमों बंद कियो की जैखन पलटनरो आफसर लोसियास इडी एजेल्हो ता आंव तुशे सामने इस मुकदमेरो फैसलो केरेल्हो। 23 तैनी फौवजरे आफसरे जो जौव, की पौलुसे पैरहे मां आराम सैहीं रखा, ते तैसेरे दौस्तन मैरां केंची भी तैसेरी सेवा केरनेरे लेइ ना रोकथ।

फेलिकस ते दुसिल्लारे सामने पौलुस

24 कैही दिहैइना बाद फेलिकसे अपनी कौन्श दरोसेला" जै युहुदी थी, साथी आंहीं तैनी पौलुसे जो समाद भेजो ते यीशु मसही पुड विश्वास केरनेरे बारे मां गल्लाँ शुनी। 25 जैखन पौलुसे धर्मएरे बारे मां ते प्रहेजेरे बारे मां ते एजने बैली आदालतरे बारे मां बियांन कियुं, ता फेलिकस डेरी जेव, ते जॉने लगे, हुनी एतरु बडूए, अगर फुर्सत मैल्हेली ता आंव तीं फिरी कुजेइल्हो। 26 फेलिकसे एह भी उमीद थी, की पौलुसेरी तरफां तैस किछ रिशपत भी मैल्हेली, एल्हेरलेइ तै पौलुसे बार बार कुजातो थु, ते तैससैहीं गल्लाँ केरतो थु। 27 पुरे दुई सालना बाद फेलिकसेरी ठैरी पुर्केस फिस्स गुवर्नर बनां, ते फेलिकसे एपु युहुदी खुश केरनेरे लेइ पौलुस कैदी मां रखो।।

पौलुस शैनशाहे कां फरयाद केरते

25 फैस्तुस सुबेदार बन्नेरे टलेई दिहैइना बाद आंव कैसरेरां युरोशल्लेमां मां जेव। 2 जैडी सरदार कंहींन ते युहुदी बुजुर्ग तैस का एइतां पौलुसेरे खलाफ फ्राध लाने लगे। 3 तैना तैसका मिनत केरने लगे, की लुशी पौलुसे युरोशल्लेमां मां हाजर भोनेरो हुकम दे, द्रासले मां तैनेइ तैस बत्ते मारनेरी साजश कियोरी थी। 4 पण फैस्तुसे जुवाब दितो, की पौलुस ता कैसरे मां कैदे, ते आंव भी तैडी लुशी पुजने बालोइं। 5 की ना भोए की तुसन मैरां भी किछ खास मैनुं मीं सैहीं साथी चलन, की अगर सत्रे तैनी कोई गलत कम कियेरु भोए ता असां तैसपुड मुकदमों दाइर केरम।

6 ते तै युरोशल्लेमां मां अठ दिहाड़े राहु, ते फिरी कैसरे जो चलो जेव; तैडी तै दुईयां दिहाड़े आदालतरी कुर्सी पुड बिशो, ते हुकम दितो की पौलुसे हाज केरा। 7 जैखन पौलुस हाजर भोव ता युरोशल्लेमां युहुदेइं तैस चुफुरतां घेरो देइतां बडे झुठे आल्जाम लांने शुरु किये; पण कोई प्कु सबुत ना मैल्हु। 8 पौलुसे अपनी सफाई देंते बार युहुदी केरे झुठे आल्जामा केरे लेइ इनकार कियो, ते जॉव, की मीं ता युहुदी केरी शैरीतरे खलाफ कोई कुसुर नेहीं कियोरो; ते ना मंद्रेरे खलाफ ते ना कैसरे खलाफ कोई कुसुर कियोरोए। 9 पण फैस्तुस एपु युहुदी खुश केरनेरे लेइ पौलुसे पुछ; की तीं युरोशल्लेमां जो गहनु मन्जुरे, ताके आंव एस मुकदमेरो फैसलो तैडी केरी? 10 पौलुसे जुवाब दितो; आंव इडी कैसरेरी आदालती मां खडोइं, ते मेरे मुकदमेरो फैसलो इस्से ठैरी भोवरो लोडते; तु एपु भी रोडे चारे ज्ञानतस की मीं युहुदी केरो कोई कुसुर नेहीं कियोरो। 11 अगर आंव कुसुरवार आंहीं ता मौवतरी सजहरे लेइकआंहीं

ता मेरो मरनेरो इनकार नहीं, पण अगर जैना झुठे आल्जाम युहुदी मीं पुड लाने लगोरें ते अगर तैना झुठेन ता केंची हक नहीं की मीं तैनकरे हवाले करे; ते आंव इडी कैसरे मां अपील केरताइं । 12 फैस्तुसे अपने सल्लाकारन केरां मुशारो केरतां जुवाब दितो; तीं कैसरे मां अपील कीयोरिए ता तु कैसरे का गाहलो।

बादशाह अग्रिप्पारे सामने पौलुस

13 किछ दिहैडना बाद अगीरपा बादशाह ते बिरनीके कैसरे मां आए, ताके फैस्तुसे सैहीं मुलाकात केरम। 14 एल्हेरलेइ तैना बड़े दिहाड़े तैडी राहे; एल्हेरलेइ फैस्तुसे पौलुसेरे मुकदमेरो सारो हाल बियांन कीयो, की इडी अक नेक मैन्हुं; जैस फैलिकस कैदी मां छेडतां चलो जेव। 15 जैखन आंव युरोशल्ले मां थु, ता सरदार कंहींन ते युहुदी बुजुर्ग मीं का फ्राध लानेरे लेइ एवरे थिये, की एसेरे खलाफ सजहरो हुकम दितो गाहे। 16 मीं तैन जवोरु थु, की रुमी दस्तुरे मुताबक कोई मैन्हुं सजह देंनेरेलेइ हवाले ना किव गाहे; जां तगर तैस अपने मुदेइ केरे सामने तैन आल्जामा केरे बारे मां अपनी सफाई पैश केरनेरो मोको ना दितो गाहे। 17 एल्हेरलेइ जैखन ऐना लोक इडी आए ता मीं तैखने होरसां अपनी आदालती मां हाजर भोनेरो हुकम दितो। 18 जैखन तैसेरे मुदेइ अपनो दाओ पैश केरनेरे लेइ खड़े भुए ता, तैनेइ कोई एरहो आल्जाम तैसपुड ना लाव; जैसेरो मीं शक थु। 19 बलके तैनकेरी लड़ाई तैन केरे अपने धमरे केंची यीशु नोवेंरे मैनेरे बारे मां थु, तै मैरी जेवरोए; पण पौलुस तैसजो जितो जितो। 20 आंव बेडी उलझनी मां राहोरोइं की कैचरे एन गल्लां केरी तैकिकात केरी; एल्हेरलेइ मीं पौलुसे पुछ; की तीं युरोशल्ले मां गहनु मन्जुरे; ताके एन गल्लां केरो फैसलो तैडी भोए? 21 पण पौलुसे आपील कमाई की इस मुकदमेरो फैसलो कैसरेरी आदालती मां भोवरो लोडते; एल्हेरलेइ मीं हुकम दितो की तै कैसरे गहने तगर इडी पाबंद राहे। 22 अगीरपा बादशाहे फैस्तुसे सैहीं ज़ोव; आंव भी एस मैनेरी गल्लां एसेरी जबाना शुंनी चहताइं; फैस्तुसे जुवाब दितो, की तू तैसेरी गल्लां कालां शुंनी सखत्स।

23 होरसां अगीरपा बादशाह ते बिरनीके बेडी शांनी सैहीं आए, ते पलटनेरे बड़े बड़े आफसर ते शाहरे खास खास लोक कचैरी मां दाखल भुए, फैस्तुसे हुकम दितो की पौलुसे हाजर केरा। 24 फिरी फैस्तुसे ज़ोव; अगीरपा बादशाह ते बाकी लोकाव तुस इस मैन्हुं लहतथ एसेरां खलाफ सैरी युहुदी कौमां मीं का युरोशल्ले मां भी ते इडी कैसरे मां लेरां देइ देइ दरखुवास कियोरी थी, की एस जिते ना छेडथ। 25 पण मीं पत्तो लगो की ऐनी कोई एरहु गलत कंम नहीं कियेरु, की एह कत्ल कियु गाहे; एल्हेरलेइ एनी इडी कैसरे मां आपील कीयोरिए, ता आंव ठीक समझतां की एस तैरां भेज्जीं । 26 पण कैसरे जो लिखनेरे लेइ मीं का कोई एरही खास गल नहीं, एल्हेरलेइ मीं तुशे खास अगीरपा बादशाहेरे सामने पैश कियोरोए ताके पुछ गंन केरनेरे बाद अगर कोई खास गल भोए ता आंव कैसरे जो लिखतां भेजी सेखीं। 27 किजोकी केंची कैदी भेजते बार तैसेरे आल्जाम अगर आंव केंची ना शुंनेइं ता तै मेरी अकलमंदी नहीं।

अग्रिप्पारे सामने पौलुसेरु बियान

26 चाल्ही अगीरपा बादशाहे पौलुसे जो ज़ोव, तीं अपने बारे मां ज़ोनेरी इजाजते, तैखन पौलुस अपनो हथ खडो केरतां अपनी सफाई पैश केरने लगे।

2 औं अगीरपा बादशाह आंव अपनो आप खुश किस्मत समझताइं की तेरे सामने खडो भोईतां युहुदी केरे आल्जामा केरे खलाफ अपनी सफाई पैश केरने लगोरोइं। 3 खास केरतां तु सारे युहुदी केरी रस्मां रुवाजेरे बारे मां बाकमस, ते एल्हेरलेइ आंव तीं का मिनत केरतां की तु सबरी सैहीं मेरो बिस्तार शुंनस।

4 युहुदी मीं रोडे चारे जानतन की पैहीले आंव अपने मुल्खे मां ते बादे मां मेरी जुवनेरो चालचलन केरहो थु। 5 तैना पैहीले देंते मीं जानतन ते अगर चहंन ता मेरे हक्के मां गुवाही देइ सखत्न, की आंव अपने कठर धरमेरे फ़िकरे मुताबक फ़िसी केरे तरीके सैहीं जिंदगी गुजरतो एवरोइं। 6 परमेशरे ईशे बौव दादे सैहीं अक वैहिधो कियोरो थु, मीं उमीदे की तै पुरो भोल्हो, तैस उमिदरी

वजाही सैहीं मीं पुड मुकदमां चलेवरोए। 7 एस वैहिदेरे पुरे भोनेरी उमीद ईशे बहरे केरे बहरे कबिलने, एल्हेरलेइ तैना दिले सैहीं रात दिहाडी परमेशरेरी आराधना स्तुति केरते रहतन, औं अगीरपा बादशाह मेरी इस उमीदेरे लेइ युहुदी मीं पुड मुकदमां दाईर केरने लगोरें। 8 कुन तुस एस गल्ली पुड की परमेशर मुडदन फिरी जिते केरेल्हो, गलत समझतथ? 9 पैहीले आमहीं समझतो थु, की यीशु नैसरेरे नोवेंरी हर तरीके मुखालफत केरनी मेरो फ़जै। 10 एल्हेरलेइ आंव युरोशल्ले मां एन्ने केरतो राहु, मीं सरदार कांहींन केरां इजाजत एन्हतां बड़े परमेशरेरे सेवक कैद केरतां छडै, ते जैखन तैन फंसी देते थिये, ता आंव भी तैडी एहे राई देतो थु। 11 आंव एकी एकी प्राथना भावने मां गहतो थु, ते तैन सजह दुवातो थु, ते लोकन यीशुएरे खलाफ गैई देंनेरे लेइ मजबुर केरतो थु, ते मसही लोकां केरी मुखालफत केरनी मीं एतरी खुशी एइती थी की आंव दुर दुर शहरन मां गैहीतां तैन स्तातो थु।

अपनों मन बेदलोंनेरे बारे मां

(प्ररितों 9 : 1 - 19 ; 22 : 6 - 16)

12 एकी बार सरदार कांहींन केरां आखतियार एन्हतां एस्से कम्मेरे लेइ दंमशकेरु सफ़र केरने लगोरो थु। 13 ता औं अगीरपा बादशाह आंव हेजु बत्ते थु, ता दुपहरां केरे मोके आंब्रेरां अक लौ एइती लाही, जै दिहाडेरी लौईं केरां भी जादे थी, ते तै इशे चौवरे पासंन चमकने लगी। 14 असां सभ तल्ले मां बिछडी जे, ते मीं अक आवाज शुंनी, जै मीं सैहीं इब्रेनी जबानी मां एन ज़ोने लगोरी थी; की औं सावल औं सावल तु मीं कीजो सतातस (आंक्स) पैने पुड लत मारनी तेरे लेइ बडी मुश्कले। 15 ता मीं जुवाब दितो; औं परमेशर तु कौवंनस; ता परमेशरे मीं जुवाब दितो आंव यीशु आंहीं जैस तु सतातस? 16 पण उठ ते अपने पावंन पुड खडो भो, किजोकी आंव तीं पुड एल्हेरलेइ जैहीर भेवरोइं की तीं आंव अपनो सेवक बनेइं, ते जैन किछ तीं लाहेरए तु तैसेरो शाहदत बनेल्हो। 17 आंव तीं तेरे लोकन केरां ते गैर कोमन केरां बचांतो राहेल्हो आंव तीं तैन मां भेजने लोरोइं। 18 ताके तु तैनकेरी एछी खोल्स ते तैन आंधरे मैरां लौईं मां आन्स ते कने शैताने केरां छुटेइतां परमेशरेरे पासे आन्स, ताके तैना मीं पुड विश्वास केरन ते तैनकेरे पापां केरी माफ़ी भोए ते परमेशरेरे खास लोकन मां शामल भोइतां अपनी जैईदात हासल केरन।

अपने कम्मां केरे बारे मां

19 ते एल्हेरलेइ औं अगीरपा बादशाह मीं एस आंब्रेरी रूयारो इनकार नहीं कमेवरो। 20 ते पैहीले मीं दंमशकेरे लोकन मां ते फिरी युरोशल्लेरे ते सारे युहुदीयेरे रहने बालन ते गैर युहुदन मां भी मीं परमेशरेरो सुसमाचार शुंनाव की तोबा केरा, ते परमेशरेरे पासे फिरा ते एपनी नेक निति सैहीं अपने दिल साफ़ केरतां परमेशरे का पैश भोथ। 21 एन्ने गल्लां केरे लेइ युहुदेइं आंव मंद्रे मां दलातो ते मारनेरी कौशिश की। 22 पण आंव परमेशरेरी किर्पाई सैहीं आज तगर जितोइं, ते सैभी निके बडन का आंव गुवाही देताइं, की जैना गल्लां आंव जोताइं तैना की जैना नेबेंइं ज़ोवरी थी, ते मुसे नेबें भी ज़ोवरी थी। 23 येनी एह की मसही बडो दुख भोगेल्हो, ते सैभन केरां पैहील्हो मुडदन मैरां जितो भोईतां युहुदी कौमीं ता गैर युहुदी लोकन (लौअरो) रौशनारो समाद देल्हो।

24 जैखन पौलुस एन ज़ोने लगोरो थु, ता फैस्तुसे जोरे सैहीं ज़ोव; तू मस्तांनो भोईजेव, जादे ज्ञाने सैहीं तु पागल भोइजेवरोस। 25 पौलुसे जुवाब दितो, जनाब फैस्तुस साहब आंव पागल नहीं भोवरो; आंव जैन किछ ज़ोने लगोरोइं तैन सचे। 26 बादशाह एन गल्लां केरो बाकम; ते आंव एससैहीं खुलतां गल केरी साख्ताइं, ते मीं यर्कीन की एन मैरां कोई भी गल तैस केरां छपोरी नहीं; किजोकी एह चमत्कार कोई एरहो नहीं भेवरो। 27 औं अगीरपा बादशाह कुन तु नेबंन मनतस; आंव जानताइं की तु मनतस? 28 अगीरपा बादशाहे पौलुसे सैहीं ज़ोव, कुन तु थोडी जैरी गल्लेइं सैहीं मीं तु मसही बनाने चहतस? 29 पौलुसे जुवाब दितो; भवें थोडी जैरी या जादे गल्लेइं सैहीं, पण आंव ता परमेशरे का दुवा केरताइं की; ना सिर्फ़ तु बलके जैतरे भी आज मेरी गल्लां शुंनी राहोरें सभ मेरे जैरे भोन, पण इन शंगलां केरे बगैर।

30 तैखन अगीरपा बादशाह खडो उठो ते तैससैहीं साथी गुवर्नर ते बिरनीके ते तैससैहीं साथी होरे भी खडे 31 ते बेइर निस्तां एकेकी सैहीं ज़ोने लगे, की एह मैन्हुं कोई एरहु कम ता नेहीं लोरो करेने, की एस सजाहे भौवत दिती गाहे, या कैदी मां रखो गाहे। 32 अगीरपा बादशाहे फैस्तुसे सैहीं ज़ोव, की अगर एनी मैने कैसरे मां आपील ना भोथी कियोरी ता एह छुटी सख्तो थु।

पौलुसेरु रोमेरु सफर : क्रेते तगर

27 जैखन एह बिस्तार बनों की असां लोक जिहाजे मां इतालिया जो गहंम ता पौलुस ता होरे कैदी शाही पलटनरे आफसरेरे सुपुरुद किये; जैसेरु नॉव युलुएस थुं। 2 असां अद्रामुतियमंरां एकी जिहाजे मां चैडतां चले जे; जै आसियारी सैहिली बंदरगहरां बत्तां अग्रोहं गहंने बालु थुं; ते थिस्लुनिकेरो इरसत्रखुस मिकदुनी असंन सैहीं साथी थु। 3 होरसां जैखन जिहाज सैइदे मां रुकु ता युलुसे पौलुसे पुड मैहरभानी केरतां तैस अपने दौस्तान सैहीं मुलाकात केरनेरी इजाजत दिती; ताके तैसरे जिरये सैहीं पत्तो लगे। 4 तैठां फिरी असां जिहाजे मां चैडतां चलै जे, ते कूबरुसेरी आडी म्मेहीं निस्से, किजोकी हवा बडी जन्नदस्त थी। 5 फिरी असां किलकिया ते पम्फोलियारे सुमुंद्रेरी बत्तां निसतां अग्रोहं चले जे, ता लोकियारे शहर मौरा मां औस्से। 6 फौवजारे आफसरे तैठां आसकेंदरयारु अक जिहाज मैल्हु, जैन इतालिया जो चलेरु थुं, तैनी असां तैस्मां चहडे। 7 असां बडे दिहाइन तगर बल्लै बल्लै अग्रोहं चलते राहे; ते किदसेरे सामने पुजे; पण तैज हवा चलैने सैहीं असंन अग्रोहं गहंनेरी मुशकल भोई जेई; ते एल्हेरलेइ असां स्लमोनेरे सामने निसतां कुरितेरी आडी मां निसे। 8 ते बेडी मुशकली सैहीं सुमुंद्रेरे बन्ने बन्ने अग्रोहं चलते हुसंन नोवेंरी बंदरगाही मां पुजे, जैठां लुसीया शहर नेडे थु। 9 तैडी असंन कैही दिहाडे रुकनु पैवं, किजोकी बरतेरी दिहाडी बितोरी थी, ते तैस मौसमं मां सुमुंदरेरु सफर भी बडु मुशकल भोइगहतु थुं, पौलुसे तैन समझांते बार ज़ोव। 10 मेरे दलाव आंव ज़ोतां की इशु सफर बडु खतरनाक भोलु, की ना सिर्फ ईशो माल सबाब ते जिहाजे बल्के ईशी जानी भी खतराए। 11 पण फौवजारे आफसरे, पौलुसेरी गल शुंनेरे बजाहे जैना परमेशर नेहीं ते कंने जिहाजेरे मालकेरी गल्लां शुंने धियानं दीतु। 12 किजोकी तै बंदरगह ठंढारो मोसम बितनेरे बाद रोडी ना थी, एल्हेरलेइ ईशो फैसलो एह थु, की असां केंची तरीके अग्रोहं निस्म ते असंन उमीद थी, की फैकिसे मां पुजतां हिंवतडेरो मौसम तैडी गुजैरी गहंमैल्हे, एह कुरितेरी अक बंदरगह थी, जै शुमाल मशरक ते जनुब मशरकेरे पासे थी।

समुंद्रे मां तोफान

13 जैखन जनुबेरे पासेरां थोडी थोडी हवा चलने लगी, ता तैनेइं समझू की ईशी मुशकल खतम भुई, ते तैनेइं लैगर तैठां खडू कियुं, ते कुरितेरे बन्ने बन्ने अग्रोहं चलते जे। 14 पण लुशी अक बडी तौफानी हवा चली जैसजो युलुन जोतन, शुमाल मशरकेरे पासेरां आई, ते। 15 जिहाज अपने पलैडे मां कियुं, ते जिहाज दलैकां खाने लगे, ते असेइं जिहाज हावारे भरोसे पुड छडू। 16 जैखन असां भी रुडते रुडते कूदा जज़ीरेरी आडी मां पुजे, ता तै डुगी जै जिहाजेरे पत्तोरां बंधोरी थी; ता बेडी मुशकली सैहीं कैबु मां की। 17 ईशे मैन्हेइं तै उब्री चैडतां जिहाज ट्लुटने कैरां बचानेरे लेइ रेस्सैइं सैहीं बंधतां छडू, किजोकी तैन डर थु, की एरहु ना भोए, की जिहाज सौरतीसेरी रेती मां डुबी गाहे, एल्हेरलेइ तैनेइं भारी सामान ओसाल्हू ते जिहाजे मां रुडते रुडते चले जे। 18 जैखन तौफानी हवाई सैहीं जिहाज जादे दलैकां खाने लगे, ता होरसां असेइं जिहाजेरो माल सुमुंद्रे मैझो शरनो शुरु कियो। 19 टलेइयावं दिहाडे तैनेइं जिहाजेरु सामान भी सुमुंद्रे मैझो शैरी छडु। 20 ता कैही दिहाडे ना असेइं दिहाडो लाहू ते ना तारे ते तौफान भी मन्ना जादे जोर केरने लगोरो थु; ते असंन बंचनेरी हुनी कोई उमीद ना रही।

21 लोकन रौट्टी खेवरे कही दिहाडे भेवरे थिये, एल्हेरलेइ पौलुसे तैन मां खडे भोइतां ज़ोव; मेरे दलाव अगर तुस मेरु ज़ोनु मन्नेथे, ते कुरिते मैरां अग्रोहं ना एवरे भोथे, ता इही नुकसान ते इही तकलीफ कीजो भौनी थी? 22 पण आंव तुसन का मिनत केरताइं की; हिंमत ना हारा तुसन मैरां कोई भी ना मरेल्हो; चाहे जिहाज डूबी किना गाहे। 23 किजोकी मेरे परमेशरेरो फरिशतो

जैसेरी आंव प्राथना केरताइं, हीज राती तै मीका एवरो थु। 24 ते तै ज़ोने लगे, औ पौलुस डर त्रा तु कैसरे मां ज़रुर पैश भोल्हो ते परमेशर तेरी वजाही सैहीं एन सैभी केरी जान बचाल्हो, जैना जिहाजे मां ती सैहीं साथीन। 25 एल्हेरलेइ जनाब तुसां अपनी हिंमत रखा की मेरे परमेशरे जैन किछ मी सैहीं ज़ोवरुए तैन्ने भोल्हु। 26 असां ज़रुर केंची टैपु पुड पुजी गहंमैल्हे।

जिहाज टलाउटनु

27 चौवधौवं राती जैखन असां सुमुंद्रे [बेर्न आद्रिया] मां इरहां उरहां फिरते थिये, ता म्लाहेंइं बुझू की असां बन्नेरे नेडे पुजी जेवरेम। 28 तैनेइं पानी रेसी सैहीं नापु ता एशही हथ निसु ते थोडे आगगर गैहीतां नापु ता शठ हथ निसु। 29 एस डरे सैहीं की कौस्कोही शफडी सैहीं ना बज्म, ते तैनेइं जिहाजेरे पैत्री पासे चौवर लैग्रां सुमुंद्रे मां छडां ते झैझरी लौअरे लेइ दुवा केरने लगे। 30 म्लाहेंइं जिहाजेरे मुझाटेरां बेरांहुं निसनेरे लेइ डोंगी ऊंकी ओसाल्हो, पण तैना जिहाजेरे एग्रीए पासेरां लैग्र पैनी मां छडनु चहते थिये। 31 तैखन पौलुसे फौवजी आफसरे ते सिपेहीन सैहीं ज़ोव, अगर इना लोक जिहाजे मां ना भोल्हे ता तुशु लोकां केरु बंचनु मुशकले। 32 एल्हेरलेइ सिपेहीयेंइं डंगारी रेस्सी केरतां सुमुंद्रे मैझेई शैरी दिती।

33 झैझ भोने कैरां पैहीले पौलुसे सैभन का मिनत कमाई, की तुस किछ रौट्टी खाथ, तैनी ज़ोव, की तुस चौवधे दिहाडी केरे देते तुस लोक बंचनेरे खियाले मां पेवरेथ, ते तुस रौट्टी सैहीं हुरोरे भी नेहीं। 34 आंव तुसन का मिनत केरताइं की तुस रौट्टी खाथ, किजोकी तुशे लेइ रोडु एन्ने की यार्कीन केरा की तुशो बाल बिगो ना भोल्हो। 35 जैखन तैनी एन ज़ोव, ता तैनी रौट्टी आंन्हीं ते सैभी केरे सामने परमेशरेरु शुक्र केरतां टलोडी ते खाने लगे। 36 तैसकैरां लैहितां होरन भी हिंमत आई, ते तैना भी रौट्टी खाने लगे। 37 असां सभ मिलतां कोई दुई शौव मैन्हुं थिये, जैना इस जिहाजे मां सुवार थिये। 38 जैखन तैनेइं रेजतां रौट्टी खाई ता तैनेइं सारे गैहुं सुमुंद्रे मैझो शारने शुरु किये, ताके जिहाज पोल्हु भोए?

39 जैखन दिहाडो निसो ता तैनेइं तै ठार ना पशानी, पण अक ठार लाही ते तै पासो साफ थु, तैनेइं बिस्तार कमाव की अगर भोई सखे ता असां जिहाज एस पुड चाडम। 40 बस्सा लैगर खोलतां सुमुंद्रे मां छैडी दितु, ते पतवारां केरी रेसी भी खोल्ही छैडी, एग्रीयां बादबांन भी बह चैडी छडो, ते एपु बन्नेरे पासे जो नशै। 41 पण जिहाज खुशकी पुड गैहीतां रेती पुड टिकी जेव, ते जिहाजेरो एग्रीयां पासो रेती मां डुबी जेव ते पैत्रीयां पासो छैलैइं सैहीं बज्मकने लगे। 42 सिपेही केरी सल्लाह थी की कैदन मारम ताके तैन मैरां कोई तारी देइतां मत्ता नेशी गहन। 43 पण फौवजी आफसरे पौलुसेरी जान बचानेरे लेइ एन ना दीतु केरने, ते हुकम दितो की जै तारी ज़ानते ता तै पैहीलो छाल मारे, ते खुशकी पुड पुजतां अपनी जान बचाए। 44 ते बाकी होरे लेकडारे तखत्न पुड ते जिहाजेरी होरी चीजां केरी म्दती सैहीं अपनी जान बचाथ, ते बस्सा सभ एस तरीके सैहीं खुशकी पुड सलांमत पुजी जे।

माल्टा द्वीपे मां पौलुस

28 जैखन असां ठीक ठाक सुमुंद्रेरे बन्ने साहिले पुड पुजे, ता असंन पत्तो लगे, की इस जज़ीरेरु नॉव मालटाए। 2 तैठेरे रहने बालेइं असंन सैहीं बडो रोडो बरताव कियो, झडी लगेरी थी, ते ठंढ भी बडी थी, तैनेइं बचारेइं अग बाली ते ईशी बडी आदर कमाई। 3 पौलुसे शुकोरे कैडु केरो अक लेगु बनाव; ते जैखन तै तैना कैडु अगगी मां छडने लगे ता अगगारे सैके सैहीं तैन केडन मैरां अक सप निसो, ते पौलुसेरे हथे सैहीं प्लेटोव। 4 जैखन जज़ीरेरे लोकेइं सप पौलुसेरे हथे सैहीं प्लेटोरो लाहू, ता एपुम्मेहीं ज़ोने लगे, एह मैन्हुं ज़रुर कोई खुनीए; एह सुमुंद्रे मां गर्क भोने कैरां ता बंचोरोए, पण इन्साफ एस ज़िंतां ना छडेल्हो। 5 पण पौलुसे सप्ये अगगी मैझो घिल देइतां टलाडो ते पौलुसे कोई किछ ना भोंवं। 6 तैना लोक बलगने लगेरे थिये, की एसेरी सारी जान एफरी गहनीए ते एह मैरी गहंनोए, ते बडे चीरे तगर बलगनेरे बाद पौलुसे किछ ना भोंवं, ता तैना सोचने लगे, की एह ज़रुर कोई देबतोए।

7 तै आलाको तैस जिजरो हाकम पुबलीयुसरी अपनी मलकीत थी; तैनी असां अपने घरे नैइतां टलाई दिहाड़े ईशी आदर खात्र केरतो राहु। 8 पुबलीयुसेरो बाजी भूखारे ते पैचसी सैहीं बड़ो बिमार भोवरो थु; ते पौलुसे तैसका गैहीतां तैसेरे लेइ दुवा की, ते तैसपुड हथ रेखतां तैस शीफा दिती, ते तै ठीक भोईजेव। 9 फिरी तैस जजिरेरे सारे बिमार लोक एज्जी एज्जी ठीक भोने लगे। 10 तैन लोकेइ ईशी बड़ी इज्जत की, ते असां तैठां अग्रोहुं गहंनेरे लेइ तियार भुए, ता तैनेइ ईशी ज़रुरतरी सैरी चिजां जिहाजे मां छेडी दिती।

माल्टा द्वीपे मैरां रोमेरे पासे

11 इशु जिहाज बिगडनेरे टलेई मिहींना बाद असां आसकेंदरीयाएरे एकी जिहाजे मां चले जे, जैन ठंड मुकने तगर तैस जजिरे मां रुकेरु थु, तैस्मां युनेनी केरी दुई अकोठी देबतेरी मुरतां बनोरी थी। 12 पैहीले असां सुरकुसे मां पुजे, ते टलाई दिहाड़े तैड़ी राहे। 13 तैठां असां चलते चलते रेगीयुमे मां पुजे, ते होरसां जनुबी हवा चलने लगी ते असां अक दिहाड़ी पत्ती पुतियुली मां पुजे। 14 तैड़ी असंन किछ मसही ढला भी मैल्हे, तैनेइ असां कुजाए ते असां तैड़ी सत दिहाड़े तैड़ी राहे, ते तैसेरां बाद असां रंमे मां पुजे। 15 तैठेरे ढलान पत्तो ल्गो, की असां एवरेंम ता तैना असंन अग्राने अप्पियुसेरे चौक्के ते टलेई सरहंन तगर आए, पौलुसे तैना लैहितां परमेशरेरु धनियाबाद कियुं ते बड़ो खुशी भोव।

16 रंम शहरे मां पुजनेरे बाद पौलुसे इजाजत मैल्ही, की तै एकी पैरहेदारी निगरेंनी मां जैड़ी चाहे गैहीसखते।

रोमे मां पौलुस

17 जैखन टलाई दिहाड़े बिते त पौलुसे युहुदी केरे सरदार कुजाए; ते जैखन तैना अकोठे भुए ता पौलुसे तैन सैहीं ज़ोव; मेरे ढलाव मीं अपनी कौमरे ते अपने बौव दादां केरी रस्मरे खलाफ कोई कंम नेहीं कियेरु ता फिर भी आंव पाबंद केरतां युरोशलमें मां रंमी केरे हवाले कियो। 18 तैनेइ पुछ गंन केरनेरे बाद आंव हथरां छडनो थु; किजोकी मीं कोई एरहु कंम ना थु कियेरु की

जैस्सेहीं मीं सज़ाहे मौवत देथे। 19 पण जैखन युहुदेइं मुखालफत की ता मीं कैसरे मां आपील की; पण एल्हेरलेइ नेहीं की आंव अपनी कौमीं पुड कोई अल्जाम लानो चहतो थु। 20 एल्हेरलेइ मीं एन रोडु समझू, की तुसन सैहीं मिलतां गल केरी, आंव इस्राएलेरी एक्की उमीदी सैहीं शांगलन मां बंधोरोइं। 21 तैनेइं जुवाब दितो, असंन युहुदियेरां तेरे बारे मां ना कोई चिठ्ठी मैल्ही ते ना तैठां एजने बाले ढलांएइं तेरे बारे मां कोई खबर दिती, ते ना तेरे खलाफ किछ ज़ोव। 22 पण असां तेरे बारे मां ज़ानु चहत्तंम, एह ता असंन प्तोए, की लोक सैभी ठैरन मसही फिरकेरे खलाफ गल्लां करतन।

23 तैखन तैनेइं पौलुसेरी गल्लां शुंन्नेरे लेइ अक दिहाड़ी तुवहलाई; जैखन तै दिहाड़ी आई, ता लोक पैहीले लोकन केरां भी जादे अकोठे भुए; पौलुसे तैन परमेशरी बादशेहीयारे बारे मां समझांवं, ते साथी युशुएरे बारे मां मुसे नेबेरी किताबन मैरां तैन रोडे चारे समझेइतां झैझेरे इलोवझां तगर गल्लां केरते राहे। 24 किछ पौलुसेरी गल्लां शुंनता मस्त भोइजे, पण किछेइं ना मन्नु। 25 जैखन तैना एपुम्मेहीं खुशी ना भुए, ता पौलुसे तैन गहंने केरां पैहीले अक गल ज़ोई, पाबित्र आत्मारें ज़िरये इसाया नेबें तुशे बुजुर्ग दादां केरे बारे मां ठीके जेवरु थु की।

26 एस कौमीं का गा, ते एन जौ; की तुस शुंन्ते ता राहेल्हे, पण समझेल्हे नन्ना, ते तकते ता राहेल्हे पण पशानेल्हे नन्ना। 27 किजोकी एस कौमरे दिले पुड चरभी भेरोरीए, एना टोंवने भोवरेंन, ते एनेइं अपनी एछी निकोल कियोरीन, कीजोकी एरहु ना भोए की एना लहंन ते कंन सैहीं शुंन्त ते दिले सैहीं समझन; ते एना मेरे पासे फिरन ते आंव एन शीफा देइं। 28 एल्हेरलेइ आंव चहतां की तुस बुझथ की परमेशरेरो सुसमाचार गैर युहुदन का भी भेजोरोए ते तैना तैस शुंनेल्हे। 29 जैखन पौलुसे एन ज़ोव, ता युहुदी एपुम्मेहीं बंस केरते तैठां चले जे।

30 पौलुसे पुरे दुई सालन तगर क्रैइयेरे मुकाने मा राहु, ते जै भी तैस्सैहीं मिलने एइतो थु, ता पौलुस तैस्सैहीं मिलतो थु। 31 तै बेड़ी खुशी सैहीं परमेशरेरी बादशेहीयरी खुशखबरी शुंनातो थु, ते परमेशर यीशु मसहीएरे बारे मां तालीम देंतो राहु, ते केचे भी तैस रोकनेरी कौशिश ना कमाई।।

रोमियो

आबिवादन

1 पौलुसेरे तरफां जै यीशु मसीहेरो दासे, ते प्रेरित भोनेरे लेई कुजवरणे, ते परमेशरेरे सुसमाचारेरे लेई अलग कीयोरोए। 2 जैसेरी तैने पेहिले अपने नेबी केरे ज़िरीए पवित्र शास्त्रे मां। 3 अपने मठे प्रभु यीशु एरे बारे मां वाइदो कियोरो थीयो, जै जिसमेरे लिहाजे सैहीं त दाऊदहेरे खानदाने मैरां पैदा भोव। 4 ते पवित्रतारे आत्माएरे भावे सैहीं फटरन मैरां जीतो भोनेरे वजाही सैहीं पमेशरेरु मठू ठेरहरुए। 5 जैसेरे जिरये असन अनुग्रह ते प्रेरिताई मैल्ही; की तैसेरे नाँवे सैहीं सब कौमां केरे लोक विश्वास केरेता तैसेरी मन्त्र। 6 जैन मैरां तुस भी यीशु मसीहेरे भोनेरे लेई कुजवरथ। 7 तैन सैभी कैरां नाँवां जैना रोमे मां परमेशरेरे टुलारेन, ते पवित्र भोनेरे लेई कुजवरणे। इशे बाजी परमेशर ते प्रभु यीशु मसीहेरे तरफां तुस्न शान्ति ते अनुग्रह मैल्हतो राहे।

धनिवदेरी प्राथना

8 पेहिलो आंव तुशे सैभी केरे लेई यीशु मसीहेरे जिरिये परमेशरेरु शुक्र केरताई, तुशे विश्वासेरी चर्चा सारे संसारे मां लवरी भोने। 9 परमेशर जैसेरी सेवा आंव अपने आत्माइ सैहीं तैसेरे मठेरे सुसमाचारे बारे केरतां, तै मेरो गवाहे; की आंव तुस्न कोस तरीके सैहीं लगातर याद केरतां। 10 ते लगातार अपने प्रार्थनान मां याद केरताई, कि केचरे हेजू भी तुस्न कां एजनेरे लेई मेरु सफर परमेशरेरे तरफां कामियाब भोए। 11 किजोकी आंव तुस्न सैहीं मिलनेरे लेई कोशीश केताई, कि आंव तुस्न कोई आतमिक वरदान देई, जैस सैहीं तुस मजबूत भोथ। 12 मतलब इन, की आंव तुस्न कां एइतां तुस्न सैहीं साथी तैस विश्वासेरे जिरिये, जै मीं मां, ते तुस्न मांए, मघन भोई। 13 ते दूलाआव, आंव न चैही, की तुस इस कैरां अनजान राथ, कि मीं तुस्न कां बार बार एजनु चाव, की जैचरे मीं होरी ठैरन फल मैलहो, तैचरे तुस्न मां भी मैल्हे, पण हुना तगर रुको। 14 आंव यूनेनी ते होरी भाषा जोने बालां, अकलमन्दां, ते बे अकलां केरो करजदारां। 15 ते आंव तुस्न भी जैना रोमे मां रहतथ, सुसमाचार शुनानेरे लेई हर बेले तयाराइ।

सूमाचारेरी शक्ति

16 किजोकी आंव सूसमाचारे सैहीं न शर्मैइ, ऐलहेरे लेई कि तै हर एकी विश्वास केरने बालेरे लेई, पेहिले त यहूदेरे लेई, फिरी यूनेनेरे लेई मुक्तेरे लेई परमेशरेरी कूदरते। 17 किजोकी तैस मां परेशरेरी धारमिकता विश्वासे सैहीं, ते विश्वासेरे लेई बांदी भोतीए; जैचरे लिखोरुए, कि विश्वासे सैहीं धर्मी मैन्हु जीतो रालहो।

मैन्हु केरो पाप

18 परमेशरो क्रोध तैन लोकां केरी अभिकती ते अधर्म पुड़ सैभना जादे स्वर्गएरां एइते, जैना सचे अधर्म सैहीं दबेइतां रखतन। 19 ऐलहेरे लेई की परमेशरेरे बारू ज्ञान तैन केरे मन्त्र मां बांदूए, ऐलहेरे लेई की परमेशरे तैन पुड़ बांदू कीयोरोए। 20 किजोकी तैसेरे आहरे गुण, मतलब तैसेरी सनातन कुदरत, ते परमेशरत्व संसारे बनानेरे बेलेरे दंतो तैसेरे कम्मन सैहीं हेरना मां एइतन, इडी तगर की तैन कोई उज्जर नैइं। 21 ऐलहेरे लेई कि तैनेइ परमेशर त पशानो, पण तैसेरी तैस काबल बडयाई न की, ते न शुक्र कीव, पण बेकार विचार केरने लाए, इडी तगर कि तैन केरो बे अक्ल मन आँधरो भोव। 22 तैना

अपने आपे अकलमंद सैमझतां बेवकूफ बने। 23 ते नाश न भोने बाले परमेशरेरी महिमा नाश भोने बाले मैन्हु, ते चडेलू ते जानवरां, ते रंगने बाले जीपां ते मूरती मां बदलो।

24 ऐलहेरे लेई परमेशरे तैना तैन केरे मनरे खुवैशां केरे मुताबिक गेंदगरे लेई शारे, की एपू मांमेहीं अपने जानां केरो आनादर केरन। 25 किजोकी तैनेइं परमेशरेरी सचाई बेदलतां झूठ बनाइ, ते स्रष्टरी पूजा, ते सेवा केरी, न की तैस बनाने बालेरी, जै की हर बेले रोडोए। आमीन।

26 ऐलहेरे लेई परमेशरे तैना नीच कम्मन मां शारे, इडी तगर कि तैन केरी कौन्शें भी स्भाविक कम्मां बेदलतां तैन केरे खिलाफ बलां। 27 तैचरे तैन केरे मडद भी कौन्शन सैहीं सुभाविक कम्मां शैरतां एपू मांमेहीं गांदां कम्मन मां मसत भोए, मतलब की मडद मडदन सैहीं गांदां कम्मां केरतां प्रभु कैरां ठीक बदलो नेव।

28 ते जैखन तैनेइं परमेशर पशान्नो न चाव, ऐलहेरे लेई परमेशरे भी तैना तैन केरे मनरे हालती पुड़ शारे; कि बूरां कम्मां केरन। 29 ते तैना हर किसमेरे अधर्म, दुष्टे, लालचे, बैरे सैहीं भरोई जे; ते जलन, ते खून केरनो, ते लडाई, ते फरेब, ते जलनी सैहीं भरोए, ते चोगलखोर, 30 बदनाम केरने बाले, परमेशरेरी नजरी मां नफरती, होरी केरी इजत न केरने बाले, घमंडी, शेखी मारनें बाले, बूरी बूरी गल्लां बनाने बाले, अम्मां बेपू केरो हुकम न मन्ने बाले। 31 बेवकूफ, विश्वावघाती, सचे प्रेमे कैरां खाली, बे रेहंम भोई जे। 32 हाँलाकि तैना परमेशरेरो ई हुकम जातन कि एरां जेरां कम्मां केरने बाले मौतरे सजाहरे लाइकन, फिरी भी न सिर्फ एपू एरां कम्मां केरतन बल्कि एरां कम्मां केरने बालन सैहीं खुश भोतन।

परमेशरेरो इन्साफ

2 ते हे दोष लाने बाला, तू कोई की न भोस; तीं कां कोई उज्र नैइं, किजोकी जैस गल्लरो तू होरन पुड़ दोष लातस, तैसे गल्ली पुड़ तू अपनां आप भी दोषी बनातस, ऐलहेरे लेई तू एपू भी तैने कम्म केरतस। 2 ते अस ज्ञानतम की, एरां कम्मा केरने बालन पुड़ परमेशरेरे तरफां ठीक ठीक सजाएरो हुकम भोते। 3 ते हे मैन्हु, तू जै एरां एरां कम्मां केरने बालन पुड़ दोष लातस, ते एपू भी तैने कम्म केरतस; कुन तू समझतस, की कुन तू परमेशरेरे सजाएरे हुकमे कैरां बचेलो? 4 कुन तू तैसेरो रेहंम, ते बरदाशती, ते सबरेरी दवलत घटिया समझतस, ते कुन इन न समझस, की परमेशरेरु रेहंम तीं मन फिरानो शिखालते? 5 पण एपनी सेखती ते बूरे मनरे मुताबिक तैसेरे करोधेरे दिहाडरे लेई, जैस मां परमेशरेरी सची आदालत बांदी भोल्ही, ते अपने लेई क्रोध लवरोस कूमाने। 6 तै हर एकी तैसेरे कम्मां केरे मुताबिक बदलो देल्हो। 7 जैना नेकी मां रेइतां महिमा, ते आदर, ते अमरताएरे तोपी मान, तैन तै हमेशारी जिन्दगी देल्हो। 8 पण जैना फिरके बनाने बालेन, ते सचे न मन्ने बालेन, बल्के अधर्म मन्ने बालेन तैन पुड़ क्रोध, ते कोप भोनाए। 9 ते मुसीबत ते तंगी हर एकी मैन्हु पुड़ एजनीए जै बुराई केरते, पेहिले यहूदी पुड़ फिरी यूनेनी पुड़। 10 पण महिमा, ते आदर सलामती हर एकी जै भलाई केरते, पेहिले यहूदी फिरी यूनेनी पुड़। 11 किजोकी परमेशर केचरी तरफदारी न केरे।

12 ऐलहेरी लेई की जैनेइं बगेर व्यवस्था मेलतां पाप कीयो, तैना बगेर व्यवस्थां नाश भोनेन, ते जैनेइं व्यवस्था मेलतां पाप केरो, तैन केरी सजा भी व्यवस्थाई सैहीं भोनीए। 13 किजोकी परमेशरे कां व्यवस्था शुनेने बाले धर्मी नैइं, बल्कि व्यवस्था पुड़ चलने बाले धर्मी ठैराए गहनेन। 14 फिरी जैखन होरी कौमां केरे लोकन कां जैन कां व्यवस्था नैइं, सुभावे सैहीं

व्यवस्थारे गल्लन पुड़ चलतन, ते व्यवस्था तैन कां न भोनेरे बावजूद भी अपने लेई एपू व्यवस्थान। 15 तैना व्यवस्थारी गल्लां अपने अपने मन्न मां लिखोरी हीरातन, ते तैन केरे जमीर भी गवाही देतन, ते तैन केरे ख्याल तैन पुड़ दोष लातन, या बेइलजाम ठैरातन। 16 जैस दिहाड़े परमेशर मेरे सुसमाचाररे मुताबिक यीशु मसहीएरे ज़िरीये मँन्हू केरी छेपोरी गल्लां केरी अदालत केरलहो।

यहूदी ते व्यवस्था

17 अगर तू यहूदिस, ते व्यवस्था पुड़ भरोसो रखतस, ते परमेशरे पुड़ घमण्ड केतस। 18 ते तैसेरी मेरजी ज्ञानतस, ते व्यवस्थारी तालीम हासल केरतां रोड़ी रोड़ी गल्लां पसन्द केरतस। 19 ते एपू पुड़ भरोसो रखतस, की आंव कानां केरो अगवो, ते जैनां आंधारे मां आन तैन केरे लेई लो। 20 ते बे अकलां केरो शिखालने बालो, ते बच्चां केरो उसतादाही, ते ज्ञान, ते सचरो नमूनाइं, जै व्यवस्थाई मां आए, मीं मैलोरोए। 21 ते कुन तू जै होरन शिखालतस, अपने आपे न शिखालस? कुन तू चोरी नैइं केरनी तालीम देतस, एपू किजो चोरी केतस? 22 तू जै जोतस, जनाह नैइं केरनो, एपू किजो जनाह केरतस? तू जै मूरतन सैहीं नफरत केरतस, एपू किजो मन्दरन लुटतस? 23 तू जै व्यवस्थाइ पुड़ घमण्ड केरतस, कुन व्यवस्था न मेनतां, किजो परमेशरेरी बेइजती केरतस? 24 किजोकी तुशे वजैई सैहीं होरी कौमन मां परमेशरेरी नोवेरी निन्दा केरी गहतीए जैचरे लिखोरुए।

25 अगर तू व्यवस्थाई पुड़ चलस, त खतने सैहीं फैइदो त आए, पण अगर तू व्यवस्था न मन्नस, त तेरो खतनो बगेर खतनेरे बराबर भोव। 26 ते अगर कोई मँन्हू जैसेरो खतनो न भोए भोवरो, त तै व्यवस्थाई पुड़ चले, ते कुन तैसेरो न भोवरो खतनेरे बराबर न गनो गहए। 27 ते जै मँन्हू जिसमेरे वजैई सैहीं बगेर खतने, अगर तै व्यवस्था पूरी केरे, त कुन तीं जै लिखने, ते खतने केरने पुड़ व्यवस्था न मन्ने, दोशी न ठैराए? 28 किजोकी तै यहूदी नैइं जै बाँदे मां यहूदीए, ते तै खतनोए जै बाँदोए, ते जिस्मानीए। 29 पण यहूदी तैए, जै मने माए; ते खतनो तैए, जै दिले ते आत्मा मांए, न की लफसां केरो: एरे लोकां केरी तारीफ मँन्हू नैइं बल्कि परमेशरेरी तरफां भोते।।

3 ते यहूदी केरी कुन बडयाई, या खतनेरो कुन फैइदो? 2 हर किसमें सैहीं बडू किछ, पहिलू त इन की परमेशरेरी वचन तैन सोंफो। 3 ते किछ धोखे बाज निसे त कुन भोव? कुन तैन केरी धोखे बैजी सैहीं परमेशरेरी सचाई बेफैइदी भोई? 4 कधे नैइं, बल्कि परमेशर सचचोए, ते हर अक मँन्हू झूठो भोव, जैचरे लिखोरुए, की जैस सैहीं तू एपनी गल्लन मां धर्मी भोस, ते आदलतारे बेले तीं ज़ीत मैलहे। 5 अगर इषो आधर्म परमेशरेरी धार्मिकता ठैराते, त अस कुन जोम? कुन कि परमेशर क्रोध केरते, ते बेइनसाफे, इन आंव इनसानेरी रीति पुड़ जोताई। 6 कधे नैइं, नैइं त परमेशर किजो संसारेरी अदालत केरेहेलो? 7 अगर मेरे झूठेरे वजाही सैहीं परमेशरेरी सचचाई तैसेरी महिमारे लेई जादे बाँदी भोई, ते फिरी किजो पैपी केरो जेरो मीं पुड़ हुकम दितो गहते? 8 ते असां किजो बुराई न केरम, कि भलाई पैइदा भोए, पण असन पुड़ दोष भी लव गहते, ते केरे जोतन, कि ऐन केरु ऐने ज़ोनूए: पण एरे जेरेन पुड़ दोष लानो ठीकए।

कोई धर्मी नैइं

9 त फिरी कुन भोव? कुन अस तैन केरांह रोडेम? कधी नैइं; ते असेइं यहूदिन ते युनेन पुड़ ई दोष लवरोए, कि तैना सारे पापे मां। 10 जैचरे लिखोरुए, की कोई धर्मी नैइं, अक भी नैइं। 11 कोई समझदार नैइं, कोई परमेशरेरे तोतने बालो नैइं। 12 सारे भटकोरेन, सारे निकम्मे बनोरेन, कोई भलाई केरने बालो नैइं। 13 तैन केरु गल खुली कब्रए: तैनेइं अपने ऐशी सैहीं धोखो दितो: तैन केरे ओठन पुड़ सपां केरु जेरेहे। 14 ते तैन केरु आषी लानती, ते ट्लाइट सैहीं भेरताए। 15 तैन केरे पव कतल केरने लेई तेजण। 16 तैन केरे बतां तुबाही, ते क्लेशए। 17 तैनेइं शैनत्री बत न पिशानी। 18 तैन केरे एछन मां परमेशरेरो डर नैइं।

19 अस ज्ञानतम, कि व्यवस्था जैन किछ जोतीए, तैनए सैहीं जोतीए, जैना व्यवस्था मनतन: ऐलहेरे लेई की हर केंचेरु आषी बंद कीव गाहे, ते सारु

संसार परमेशरेरे सजारे लायिक भोए। 20 किजोकी व्यवस्थारे कम्मन सैहीं कोई मँन्हू तैसेरे सामने धर्मी नैइं भोनों, ऐलहेरे लेई कि व्यवस्थाई सैहीं पापेरी पिशान भोतीए।

विश्वास ते धार्मिकता

21 पण हुनी बगेर व्यवस्थारे परमेशरेरी धारमिकतां बांदी भोवरीए, जैसेरी गुवाही व्यवस्था, ते नबी देतन। 22 मतलब परमेशरेरी तै धारमिकता जै यीशु मसीह पुड़ विश्वास केरने बालां केरे लेईए; किजोकी किछ भेद नैइं। 23 ऐलहेरे कि सैभेइं पाप कीयो, ते परमेशरेरी महिमा केरां दूरन। 24 पण तैसेरे अनुग्रहेरे छुटकरे सैहीं जैना यीशु मसीह मांन, मुफत धर्मी ठैराहे गहतण। 25 तै परमेशरे तैसेरे लेवहेरे वजैई सैहीं अक एरो छुटकारो ठैरव, जै विश्वास केरने सैहीं फैइदामंद भोते, कि जैना पाप पेहिले केरे, ते जैना परमेशरे अपने बर्दाशती सैहीं टाले; तैन केरे बारे मां तै अपनी धार्मिकता बांदी केरते। 26 बल्कि इसे बेले तैसेरी धार्मिकता बांदी भोए; कि जैस सैहीं तै एपू धर्मी ठैहरे, ते जै यीशु पुड़ विश्वास केरे, तैसेरो धर्मी ठैरहाने बालो भोए।

27 ते घमण्ड केरनू कोडही राव तैसेरी त ठारे नैइं: कोस व्यवस्थारे वजाही सैहीं? कुन कम्मां केरे व्यवस्थाई सैहीं? नैइं, बल्के विश्वासेरे व्यवस्थारे वजाही सैहीं। 28 ऐलहेरे लेई अस इस नितीजे पुड़ पुजोरेम, की मँन्हू व्यवस्थारे कम्मां केरे बगेर विश्वासे सैहीं धर्मी भोते। 29 कुन परमेशर यहूदी केरोए? कुन होरी कौमां केरो नैइं हां कौमां केरो भी आए। 30 किजोकी अके परमेशरे, जै खतने बालन भी विश्वासे सैहीं, ते जैन केरो खतनो नैइं भोवरो तैन भी विश्वासे सैहीं धर्मी ठैराहलो। 31 ते कुन अस विश्वासे सैहीं व्यवस्था रद केरतम? कधे नैइं; बल्कि व्यवस्था बनोरी रखतम।

अब्राहमरी मिसाल

4 ते कुन जोम, कि इषो जिशमानी बाजी अब्राहीमे कुन मैलूह? 2 किजोकी अगर अब्राहीम कम्मन सैहीं धर्मी ठैराहवरो भोथो, त तैस घमण्ड केरनेरी तार भोथी, पण परमेशरेरे सामने नैइं। 3 पवित्र शासत्र कुन जोते इन की अब्राहीमे विश्वास कीयो, ते तै तैसेरे लेई धर्मिकता गनो जेव। 4 कम्म केरने बालेरी मजदूरी देनी दान नैइं, पण हक समझू गहते। 5 पण जै कम्म न केरे बल्कि भकितहीने धर्मी ठैराने बाले पुड़ विश्वास केरते, तैसेरो विश्वास तैसेरे लेई धर्मिकता गनो गहते। 6 जैस परमेशर बगेर कम्मां केरे धर्मी ठैराते, तैस दाऊद भी मूबारिक जोते। 7 की मुबारिके तै जैसेरे पाप माफ भोए, ते जैन केरे पाप ढके जे। 8 मुबारिके तै मँन्हू जैस परमेशर पापी न ठैराए।

9 ते इन मुबारिक ज़ोनू, कुन खतने बालां केरे लेई ए, या जैन केरो खतनो नैइं भोवरो तैन केरे लेई भी आहे? कि अब्राहिमेरे लेई तैसेरो विश्वास धार्मिकता गनो जेव। 10 ते केंचरे गनो जेव खतने सैहीं की खतनेरे बगेर? खतने सैहीं नैइं पण बगेर खतने सैहीं। 11 ते तैस खतनेरो निशान मैलूहो, कि तैस धार्मिकता पुड़ छाप भोए, जै बगेर खतनेरे रखोरो थू: जैस सैहीं तै तैन सैभी केरो बाजी ठैरो, जैना बगेर खतने विश्वास केरतन, ते तैना भी धर्मी भोन। 12 ते तैन खतनो केरां केरो बाजी भोए, जैन केरो न सिर्फ खतनो कीयोरोए, पण इशे बाजी अब्राहमेरे तैस विश्वासेरी जेरई पैरवी केरतम, जै तैनी बगेर खतनेरी हालती मां कियोरी थू।

विश्वासेरे ज़िरीये वाइदो

13 किजोकी ई वाइदो कि तै संसारेरो बारस भोलूहो, न अब्राहमे, न तैसेरे औव्लादी व्यवस्थाई सैहीं दितोरी थू, पण विश्वासेरे धार्मिकताई सैहीं मैलूहो। 14 किजोकी अगर व्यवस्थाई बाले वारसन, ते विश्वास बेकार, ते वाइदो बे फैइदो भोव। 15 व्यवस्था त क्रोध पैइदा केरतीए, ते जैडी व्यवस्था नैइं, तैडी तैसेरो हुकम टालनो भी नैइं।

16 ऐसे वजाही सैहीं तै वाइदो विश्वासे सैहीं मैलूते, की अनुग्रहेरे रीति पुड़ भोए, की वाइदो सैभी औव्लाधरे लेई पक्को भोए, न की सिर्फ तैसेरे लेई जै व्यवस्था बालोए, बल्कि तैन केरे लेई भी जैना अब्राहिमेरो जेरो विश्वास केरने बालेन: तैहे त इषो सैभी केरो बाजीए। 17 जैचरे लिखोरुए, कि मीं तू बेड़ी

कौम्यां केरो बाजी बनवरोस, तैस परमेशरेरे सामने जैस पुड तैने विश्वास केरो, ते जै फटरेन जीतो केरते, ते जैना गल्ला नैइं, तैन केरु नौव एंचरे नेतन, कि मन्ना तैना आन। 18 न उमीदी मां भी तैने उमीदी रेखतां विश्वास केरो, ऐलहेरे कि तैस वचनेरे मुताबिक की तेरु कुटम एरहू भोलू कि तै बेडी कौमां केरो बाजी भोए। 19 ते तै जै एकी शौ सालेरो थू, अपने मरें जिसमेरे, ते सारारु मररु पेट एरे हालीती मां भी विश्वासे मां कमजोर न भोए। 20 ते अविश्वासी भोइतां परमेशरेरे वाइदे पुड शक न केरी, पण विश्वासे मां मजबूत भोइतां परमेशरेरी बडयाई की। 21 ते तैस पूरो भरोसो भोव कि जैस गल्लरो वाइदो तैने केरेरोए, तै तैस पूरो केरनेरी ताकत भी रखते। 22 ऐलहेरे लेई, ऐन तैसेरे लेई धर्मी गनु जेव। 23 ते ई वचन, कि विश्वास तैसेरे लेई धर्मिकता गणां जेव, न सिर्फ तैसेरे लेई लिखी जेई। 24 बल्कि इशे लेई भी जैन केरे लेई विश्वास धारमिकता गनो जेव, मतलब इशे जैनां तैस पुड केरतन, जैन इशे प्रभु यीशु मसीह फटरन मैरां जीतो केरो। 25 तै इशे पापा केरे लेई ट्लावाव जेव, ते असन धर्मी ठैरानेरे लेई जीतो भी कियो।

परमेशरे सैहीं मेल

5 ते हुनी असां विश्वासे सैहीं धर्मी भोए, त अपने प्रभु यीशु मसीहेरे जिरीए सैहीं परमेशरे सैहीं मेल मलाप रखम। 2 जैखन विश्वासेरे वजाही सैहीं अनुग्रहे तगर पुजे, जैस मां असा आम भी, ते परमेशरेरे उमीदी पुड घुमण्ड केरम। 3 सिर्फ ऐने नैइं, बल्कि मसीबतन मां भी घमण्ड केरम, इन बुझतां की, मसीबती सैहीं सबर पैइदा भीतीए। 4 सबरी सैहीं खरु निस्नो, खरु निस्ने सैहीं उमीद पैइदा भीतीए। 5 ते उमीदी सैहीं शरमिन्गी न भोए, किजोकी जै पवित्र आत्मा असन दितोरीए तैस सैहीं परमेशरेरो प्रेम इशे मने मां छडोरोए।

6 किजोकी जैखन अस कमजोरे थी, त मसीह ठीक वक्ते पुड भकितहीनां केरे लेई मरो। 7 केची धर्मी मँन्हेरे लेई भी कोई बडे मुशकली सैहीं मरे, पण शैइद केची धर्मेरे लेई कोई अपनी जान देनेरी जुरत केरे। 8 पण परमेशरे अपने प्रेमेरे भलाई एंचरे बाँदी केरते, कि जैखन असां पापी थी तैखने मसीह इशे लेई मरो। 9 ते अस, तैसेरे लेखे सैहीं धर्मी ठैरे, त तैस सैहीं क्रोधे केरां किजो न बचमेले? 10 किजोकी बैरी भोनेरे बवजूद भी तैसेरे मड्डेरे मौती सैहीं इषो मेल परमेशर सैहीं भोव, ते फिरी मेल भोने सैहीं तैसेरे जिंदगरी सैहीं किजो असन मुमुक्ति न मैलहे? 11 ते सिर्फ इने नैइं, पण अस अपने प्रभु यीशु मसीह जैस सैहीं इषो मेल भोवरोए, परमेशरेरे बारे मां घमण्ड भी केरतम।

आदमेरे जिरीये मौत - यीशु एरे जिरीये जिन्दगी

12 ऐलहेरे लेई जैचरे एकी मँन्हेरे जिरीये पाप संसारे मां आव, ते पापे सैहीं मौत आई, ते एंचरे मौत सैभी मँन्न मां फेली, ऐलहेरे लेई सैभेइं पाप केरो। 13 किजोकी व्यवस्थारे देने तगर पाप संसारे मां त थू, पण जैडी व्यवस्था नैइं, तैडी पाप गनो न गाहे। 14 फिरी भी आदमे केरां मुसे तगर मौतां तैन लोकन पुड बादशाही की, जैनेइं तैस आदमेरो जेरो पाप केरो जै एजने बालेरो निशाने, पाप न कीव।

15 पण पापेरो जै हाले, तेरहो अनुग्रहेरे वरदाने सैहीं नैइं, किजोकी जैखन एकी मँन्हेरे जिरीये पापे सैहीं बडे लोक मरे, ते परमेशरेरो अनुग्रहेरे दान एकी मँन्हू सैहीं, मतलब यीशु मसीहेरे अनुग्रहे सैहीं, बडे लोकन पुड बडो जादे भोव। 16 ते जैचरे एकी मँन्हेरे पाप केरनेरो फल भोव, तैचरे दानेरो तेरो हाल नैइं, किजोकी एकेरी वजाही सैहीं सजारो हुकमेरो फेसलो भोवरो, पण बडे पापां केरो एरो नतीजो भोव, की लोक धर्मी भोए। 17 किजोकी एकी मँन्हेरे पापे सैहीं मौतां एकेरे जिरीए बादशाही की, ते जैनां लोक अनुग्रहेरे वरदाने सैहीं जिन्दगी हासल केरतन एकी मँन्हेरे मतलब, यीशु मसीहेरे जिरीये जरूर हमेशारे जिन्दगी मां बादशाही केरेलेहे।

18 ऐलहेरे लेई की अक पाप सैभी मँन्हेरे केरे लेई सजारे हुकमेरी वजा भोई, तैचरे अक धरमेरु कम्म सैभी मँन्हेरे केरे लेई धर्मी ठैराने लेई वजा बनू। 19 किजोकी जैचरे एकी मँन्हेरे हुकम न मन्ने सैहीं बडे लोक पापी भोए, तैचरे एकी मँन्हेरे हुकम मन्ने सैहीं बडे लोक धर्मी भोए। 20 ते व्यवस्था मज्जाटे आई, कि पाप बडो भोए, पण जैडी जादे भोव, तैडी अनुग्रह तैस केरां भी जादे

भोव। 21 की जैचँ पापे मौत फैलाते बादशाही केरी, तैचरे इशे प्रभु यीशु मसीहेरे अनुग्रहे सैहीं हमेशारी जिन्दगरे लेई धर्मी ठैराने बादशाही केरन।

पापेरे लेई मरें ते मसीहेरे लेई जीते

6 ते अस कुन ज़ोम? कुन अस पाप केरते रहम, कि अनुग्रह जादे भोए? 2 कधी नैइं, अस पापेरे लेई मरे ते फिरी किजो अगरोव जो पापे मां जिन्दगी बीताम? 3 कुन तुस न जानथ, कि असेई जेतरेइं मसीह यीशुएरो बपतिस्मो नेवरोए तैसेरे मौतरो बपतिस्मो नेवरोए। 4 ते तैस बपतिस्मो सैहीं अस तैस सैहीं साथी दबे जे, ताकी जैचरे मसीह बाजीएरे महिमा सैहीं फटरन मैरां जीतो कीयो, तैचरे अस भी नोवें जिन्दगरी चाल चलम।

5 किजोकी अगर अस तैसेरी मौती मां शामिल भोए, ते याकीन्न तैसेरे जीतो भोने मां शामिल भोनेम। 6 किजोकी अस जानतम की इशी पूरानी इनिसानयत तैस सैहीं साथी सलीबी पुड चाडोरीए, ताकी पापेरो जिसम बेफाइदो भोए, ताकी अस अगरोव जो पापेरे गुलाम न रहम। 7 जै मेरी जेव, ते पापे केरां छुटतां धर्मी भोव। 8 ते अगर अस मसीह सैहीं साथी मरे, ते इषो विश्वास ई ए, की तैस सैहीं साथी जीते भी भोमेलहे। 9 किजोकी अस ऐन जानतम, की मसीह फटरन मैरां जीतो भोइतां फिरी नैइं मरनो, तैस पुड फिरी मौतरी बादशाही नैइं भोनी। 10 किजोकी जै मरो ते एकी बार पापेरे लेई मरो; पण जै जीतोए, परमेशरेरे लेई जीतोए। 11 एंचरे तुस भी अपने आपे पापेरे लेई त मारा, पण परमेशरेरे लेई यीशु मसीह मां जीते समझा।

12 ऐलहेरे लेई पाप तुशे मरने बाले जिसमे मां बादशाही न केरे, की तुस तैसेरे खुवैइशन मां राथ। 13 न अपने अंग पापेरे हथियार भोनेरे लेई सोंफा, पण अपने आपे फटरन मैरां जीते सैमझतां परमेशरे सोंफा। ते अपने अंगन धमेरे हथियार भोनेरे लेई परमेशरे सोंफा। 14 ते तुस्न पुड पापेरी बादशाही न भोल्ही, किजोकी तुस व्यवस्थारे आधीन नैइं बल्कि अनुग्रहेरे आधीनथ।

धार्मिकता ते दास

15 ते कुन भोव कि तुस ऐलहेरे लेई पाप केरथ, की असा व्यवस्थारे अधीन नैइं बल्कि अनुग्रहेरे? कधे नैइं। 16 कुन तुस न जानथ, की जैसेरो हुकम मन्नेरे लेई तुस गुलामां केरे जेरे सोफतथ, तैसेरे गुलामथ: ते जैसेरी मनतथ, चाहे पापेरी, जैसेरो अनत मौते, चाहे हुकम मन्नेरो, जैसेरो अनत धर्मिकताए। 17 पण परमेशरेरु शुक्र भोए, की तुस जैना पापेरे गुलाम थी फिरी भी मने सैहीं तालीम मन्ने बाले भोए, जैसेरे शचे मां तुस ढालोरे भी थी। 18 ते पापे केरां छुटैतां धर्मेरे गुलाम भोए। 19 आंव तुशे जिसमानी कमजोरेरे वजाही सैहीं मँन्हू केरे रिति सैहीं जोताई, जैचरे अपने अंग गंदगरे हथे, ते बुरा कम्मां केरनेरे लेई गुलाम भोनेरे लेई सोंफोरे थी, तैचरे अपने अंग रोड़ा कम्मां केरे गुलाम भोनेरे लेई सोंफा।

20 जेइस तुस पापेरे गुलाम थी, ते धार्मिकतर तरफां आजाद थी। 21 ते जैन गल्लन मां हुनी तुस शरमातथ, तैन सैहीं तुसन तैइस कुन फल मैलतो थीयो? किजोकी तैन केरो अन्त त मौते। 22 पण हुनी पापे केरां आजाद भोइतां परमेशरेरे दास बेनतां तुसन फल मैलो जैस सैहीं पवित्रताई हसिल भोतीए, ते तैसेरो अन्त हमेशारी जिन्दगी ए। 23 किजोकी पापेरी मजदूरी त मौत ए, पण परमेशरेरी बखशीश इशे प्रभु यीशु मसीह मां हमेशारी जिन्दगी।

इलावरी जिन्दगरु दृष्टान्त

7 हे ढूलाव, कुन तुस न जानथ आंव व्यवस्था ज़ान्ने बालन जोताई, की ज़ाँतगर मँन्हू जीतो रहते, तां तगर तैस पुड व्यवस्थारी बादशाही भोती? 2 किजोकी इलावरी कौन्श ज़ाँतगर तैसेरो मुन्नश जीतो ताँ तगर तैसेरी पाबंदे, पण अगर मुन्नश मेरी जेव, त तै तैस मुन्नशेरे कानूने केरां छुटी। 3 ते अगर मुन्नश हेजू जीतो ते होरी मडदेरी भोए त तै बज्जात भोतीए, पण मुन्नश मेरी गाहे, त तैसेरे कानूने केरां छुटी, इडी तगर की होरी मडदेरी भोए, फिरी भी बज्जात न ठैरहेली। 4 हे ढूलाव, तुस भी यीशु मसीहेरे जिसमे सैहीं व्यवस्थारे लेई मरए बंनोरेथ, की तैस होरे भोथ, जै फटरन मैरां जीतो भोवरोए: ताकी अस परमेशरेरे लेई फल आनहम। 5 किजोकी जेइस अस जिसमानी थी, त पापां केरी खूवाइशां जैना व्यवथाई सैहीं थी, मौत पैइदा

केरनेरे लेई इशे अंगन मां कम्म केरती थी | 6 पण जैसेरे बंधने मां अस थी, तैसेरे लेई मेरतां, हुनी व्यवस्था केरां एरे छुटोरेम, पण आत्मारे नावें तरीके पुड सेवा केरतम न की लफसन सैहीं |

व्यवस्था ते पाप

7 कुन जोम? कुन व्यवस्था पापे? कधी नैइं! बल्कि बगैर व्यवस्थारे आंव पापे न पशैनी: अगर व्यवस्था न जोथी, की लालच न केर त आंव लालचे न जैनेथो | 8 पण पापे मोको मेलतां हुकमे सैहीं मीं मां हर किसमेरू लालच पैइदा कीव, किजोकी बगैर व्यवस्थारे पाप मरौए | 9 आंव त व्यवस्था बगैर पेइहीलो जीतो थू, पण जैखन हुकम आव, त पाप जीतो भोव ते आंव मरो | 10 ते तैए हुकम जै जिन्दगरे लेई थू, मेरे लेई मौतरी वजह बनो | 11 किजोकी पापे मोको मेलतां हुकमे सैहीं आंव बटकव, ते तैस सैहीं आंव मारो |

12 ऐलहेरे लेई व्यवस्था पवित्रे, ते हुकम भी ठीक ते रोडोए | 13 ते कुन जै चीज रोडी थी मेरे लेई मौत बनी? कधे नैइं, पण पाप तैस रोडी चीजी सैहीं मेरे लेई मौत पैइदा केरतां आंव मारो, की तैसेरो पाप बाँदो भोए, ते हुकमे सैहीं पाप बडो जादे बुझोह |

मैन्हेरे अपने आपे मां लड़ाई

14 किजोकी अस बुझतम की व्यवस्था त आत्मिके, पण आंव जिसमानी ते पापेरे हथे बिकोरोइं | 15 ते जैन आंव केरताइं, तैस न जैनी, किजोकी जैन आंव चाताइं, तैन न केरी, पण जैस सैहीं मीं नफरते, तैने केरताइं | 16 ते अगर, जैन आंव न चैही तैने केरताइं, त आंव मनताइं, की व्यवस्था रोडीए | 17 ते ऐस हालती मां केरने बालो आंव नैइं, बल्कि पाप, जै मीं मांए | 18 किजोकी आंव जानताइं, की मीं मां मतलब मेरे जिसमे मां कोई रोडी चीज नैइं, खुवाइश त मीं मां आए, पण रोडो कम्मां मीं केरां न बन्न | 19 किजोकी जैस रोडे कम्मेरी खुवाइश आंव केरताइं, तैन मीं केरां न बने, पण जैस बुरेइयरी खुवाइश भी न केरी तैन केरताइं | 20 पण अगर आंव तैने केरताइं, जैसेरी खुवाइश न केरी, ते तैन केरने बालो आंव नैइं, बल्कि पाप जै मीं मांए | 21 ते मीं ई व्यवस्था मैलती, की जैस रोडे कम्मेरी खुवाइश केरताइं, ते बुराई मीं का एडतीए | 22 किजोकी आंव जमीरे सैहीं त परमेशरेरे व्यवस्था सैहीं बडो खुश भोताइं | 23 पण मीं अपने आंगन मां होरी जेरी व्यवस्था लेइहोतीए, जै मेरी अकलारी व्यवस्था सैहीं लडतीए, ते मीं पापेरे व्यवस्था मां छडतीए जै मेरे अंगन मांए | 24 आंव केरो नुभाघ मैन्हूई, मीं इस मौतरे जिसमे केरां कौन छुटालो? 25 इशे प्रभु यीशु मसीहरे ज़िरीए परमेशरेरू शुक केरताइं: ते आंव अपनी अकली सैहीं त परमेशरेरे व्यवस्थारो, पण अपने जिसमे सैहीं पापेरी व्यवस्थारो इसतमाल केरताइं |

पवित्र आत्मारे ज़िरीये जिन्दगी

8 ते हुनी जैना मसीह मांन, तैन पुड सजारो हुकम नैइं: किजोकी तैना जिसमेरे मुताबिक नैइं बल्कि आत्मारे मुताबिक चलतन | 2 किजोकी जिन्दगरे आत्मरे व्यवस्था यीशु मसीह मां आंव पापेरे, ते मौतरे व्यवस्था केरां आजाद केरोइं | 3 किजोकी जैन कम्म व्यवस्था जिसमेरे कमजोर भोनेरे वजाही सैहीं न केरी बटी, तैन परमेशरेरे किव, मतलब अपने मड्डे पापेरे जिसमेरे शकली मां, ते पापेरे कुरबैनेरे लेई भेङ्गतां, जिसमे मां पापे पुड सझहरो हुकम दितो | 4 ताकी व्यवस्थारी विधि असन मां जैना जिसमेरे मुताबिक नैइं बल्कि आत्मारे मुताबिक चलम, पूरी भोए | 5 किजोकी जिसमानी मैन्हू जिसमेरी गलन पुड मन लातन; पण आत्मिक, आत्मिक गलन पुड मन लातन | 6 जिसमे पुड मन लानो त मौत, पण आत्माइ पुड मन लानो जिन्दगी ते शान्ति ए | 7 किजोकी जिसमे पुड मन लानो त परमेशरे सैहीं बैर रखनोए, किजोकी न परमेशरेरे व्यवस्थारे अधीने, ते न भोई भटते | 8 ते जैना जिसमानी तैना परमेशरेरे खुश न केरी बटन |

9 ते तुस जिसमानी नैइं बल्कि आत्मिक, शर्त इहे कि परमेशरेरी आत्मा तुस्न मां भोहे | 10 ते अगर मसीह तुस्न मांए, ते जिसम पापेरे वजाही सैहीं मरोए, पण आत्मा धर्मेरे वजाही सैहीं जीतीए | 11 ते अगर तैसेरी आत्मा जैने यीशु मुडदन मैरां जीतो केरो तुस्न मांए; ते जै मसीह तैने मुडदन मैरां जीतो

केरो, तै तुशे भी नाश भोने बाले जिसमे अपनी आत्मा सैहीं जीतो केरेलो, जै तुसन मांए | 12 ते इलाव, असां जिसमेरे करजदार नैइं, ताकी जिसमेरे मुताबिक दिहाड़े कटम? 13 किजोकी अगर तुस जिसमेरे मुताबिक दिहाड़े कटले, त मरेले, अगर आत्माइ सैहीं जिसमेरां कम्मां खतम केरेले जीते रहले | 14 ऐलहेरे लेई जेतेरे परमेशरेरे आत्मरे चलाने सैहीं चलतन तैना परमेशरेरां मड्डन | 15 किजोकी तुसन गुलैमरी नैइं की फिरी डरथ बल्कि लेपालिक भोनेरी आत्मा मैल्लोरी, जैस सैहीं अस हे अब्बा हे बाजी जोतम | 16 आत्मा एपू इशी आत्मा सैहीं मिलतां गुवाही देतीए, की अस परमेशरेरां मड्डम | 17 ते अगर मड्डम, त वारिस भी आहम, बल्कि परमेशरेरे वारिस, ते मसीहरे साथी वारिस, ते अस तैस सैहीं साथी दु:ख झैल्लम कि तैस साथी महिमा भी मैल्लहे |

एजने बाले बेले बांदी भोने बाली महिमा

18 किजोकी आंव समझताई, की इस बेलेरे दु:ख, ते मसिबित तैस महिमारे सामने, जै असन पुड बाँदी भोने बालीए, किछ भी नैइं | 19 किजोकी सृष्टि भी परमेशरेरे मड्डेरे बाँदी भोनेरे लेई बलगेने लवरीए | 20 किजोकी सृष्टि अपने मेरजी सैहीं नैइं पण आधीन केरने बालेरे तरफां बेकारेरे, आधीन इस उमीदी सैहीं केरीए | 21 की सृष्टि एपू भी खुशीए की विनाशे केरां छुटकारो हासिल केरतां, परमेशरेरे मड्डां केरी महिमैरी अजैदी मां खुशी मनाल्ही | 22 किजोकी अस जानतम की, सारी सृष्टि मिलतां हुना तगर कर लातीए ते दुखे मां तडफतीए | 23 सिर्फ तैए नैइं पण अस भी जैन कां आत्मारे पेइहिलो फले, एपू मांमेहीं कर लातम, ते लेपालक भोनेरे, अपनी जिसमेरे छुटकारेरे लेई बलगतेम | 24 उमीदी सैहीं, त असन मुक्ति मैल्लोरीए पण जैस चीजरी उमीद की गहतीए, अगर तै लेइहोए, त फिरी उमीद कोडही राही? किजोकी जैस चीजी कोई हेरने लवरोए तैसेरी उमीद कुन केरे? 25 पण जैस चीजी अस न लहम, अगर तैसेरी उमीद रखतम, ते सबरी सैहीं तैस बलगते भी रहतम |

26 ऐंचरे आत्मा भी कमजोरी मां इशी मड्ड केरते, किजोकी अस न जानम, की प्रार्थना केंचरे केरतन; पण आत्मा एपू कर लेइतां जै बयानेरे बेइरे, इशे लेई बिनती केरतीए | 27 ते मनां केरो जाने बालो जानते, की आत्मारी मर्जी कुने किजोकी तै पवित्र लोकां केरे लेई परमेशरेरे मेर्जी सैहीं बिनती केरते |

28 ते अस जानतम, की जैना लोक परमेशरे सैहीं प्रेम केरतन, तैन केरे लेई सब गल्लां मिलतां भलाई पैइदा केरतन; मतलब तैन केरे लेई जैना तैसेरे मेरजी सैहीं कुजावरेन | 29 किजोकी तैने जैना पेइहिले जाने, ते पेहिले ठैराए भी कि तैसेरे मड्डेरे रूपे मां भोन, ताकी तै बडे दलान मां जेठो भोए | 30 फिरी जैनां तैने पेहिले ठैराए, तैना कुजाए भी, ते जैना कुजाए, तैना धर्मी भी ठैराए, ते जैना धर्मी ठैराए तैन महिमा भी दितोरीए |

परमेशरेरो प्रेम

31 ते अस ऐन गल्लां केरे बारे मां कुन जोम? अगर परमेशर इशे पासे, ते इशो विरोधी कौन भोई बटते? 32 जैने अपनो मड्डू भी न रखू, बल्कि तैन इशे सैभी केरे लेई दितो: तै तैस सैहीं साथी असन सब किछ किजो न देहेलो? 33 परमेशरेरे चुनोरन पुड कौन दोष लालहो? परमेशर तैए जै तैन धर्मी ठैराए बालोए | 34 फिरी कौने जै सजाहरो हुकम देलोहो? मसीह तैहे जै मरो बल्कि मुडदन मैरां जीतो भोव, ते परमेशरेरे देइने पासे, ते इशे लेई बिनती भी केरते | 35 कौन असन मसीहरेरे प्रेमे केरां अलग केरी बटते? मुसीबत या तंगी, या जुलम, या काल, या नगूपन, या खत्रो, या तलवार? 36 जैचरे लिखोरूए, की तेरे लेई अस सारी दिहाड़ी मारे गहतम; अस मैरोने बैली भैडी केरे जेरे गने जेवरेम | 37 पण ऐन सब गल्लन मां अस तैसेरे ज़िरीये जैने असन सैहीं प्रेम करौए, जीती केरां बेधतम | 38 किजोकी मीं पूरू यकीने, की न मौत, न जिन्दगी, न फरिशते, न हकोमतां, न जै बेलो चलोरौए, न एजने बालो बेलो, न कुदरत, न उचार | 39 न डुघार ते न कोई होरी सृष्टि, असन परमेशरेरे प्रेमे केरां, जै इशे प्रभु यीशु मसीह मांए, अलग केरी बटलेही | |

परमेश्वर रे तैसेरे चुनोरे लोक

9 आंव मसीह मां सच जोताइं, झुठ न जोइं, ते मेरो जमीर भी पवित्र आत्माइं मां गुवाही देते। 2 की मीं बड़ो दुःखे, ते मेरो दिल लगातार दुखी भोते। 3 किजोकी आंव इन चातो थू, की अपने दूलाहां केरे लेई, जैना जिसमेरे लिहाजे सैहीं मेरे कुटमेरन, एपू मसीह कैरां दूर भोथो। 4 तैना इस्राएलीन; ते लेपलक भोनैरु हक रखतन, ते महिमां, ते ऐहैद, ते व्यवस्था, ते इबादत ते वाइदे तैन केरन। 5 बुजर्ग भी तैना केरेन, ते मसीह भी जिसमेरे लीहजे सैहीं तैने मैरां अव, जै सैभन कैरां बाए परमपरमेश्वर सदाए मुबारिकए। आमीन।

6 पर इन नैइं, की परमेश्वररो वचन टलों, की जैनां इस्राएलेरे वंशन, तैना सब इस्राएली नैइं। 7 ते न अब्रहीमेरे वंश भोनेरे वजाही सैहीं सब तैसेरी औव्लाद ठैरे, पर लिखोरुए इसहाके कैरां तेरु वंश भोलहू। 8 मतलब जिसमेरी औव्लाद परमेश्वररी औव्लाद नैइं। 9 किजोकी ऐहैदेरो वचन ईए, कि आंव इस बेले एजनाई, ते सारारु मडू भोनूए। 10 ते ऐन नैइं, पण जेइस रिबका भी एकी सैहीं मतलब इसहाके सैहीं दोजीती थी। 11 ते हेजू तगर न कोई बचो जरमोरो थू, ते न तैनेइं रोडू या बरू केरू थू, की तैने जांवां, की जेटो निकडरेरो गुलाम भोलो। 12 ऐलहेरे लेई परमेश्वररी मरजी जै तैसेरे चुनोरे मुताबिके, कम्मां केरे कारन नैइं, बल्कि कुजाने पुड़ बनोरी राए। 13 जैचरे लिखोरुए, की मीं याकूबे सैहीं प्रेम कियो, पण एसावे सैहीं प्रेम न कीव। 14 ते अस कुन ज़ोम की परमेश्वर बे इनसाफे? कधे नैइं। 15 किजोकी तै मूसे सैहीं जोते, आंव जैस केंची पुड़ रेहंम केरनू चैइं, तैस पुड़ रेहंम केरेलहो। 16 ते इन न चाने बालेरी, न दौडने बालेरी पण रेहंम केरने बाले परमेश्वररी गल्ले। 17 किजोकी पवत्र शास्त्रे मां परमेश्वरे फिरोने सैहीं जांवां, की मीं तू ऐलहेरे लेई खडो केरोस, की तीं मां अपनी समर्थ हिरेइं, ते मेरे नोवेंरो प्रचार सैरी जमीनी पुड़ भोए। 18 ते जैस पुड़ तै चाते, तैस पुड़ रेहंम केरते; ते जैस चाते सखत केरते।

परमेश्वररी सरक ते क्रोध

19 ते तू मीं सैहीं जोलहो, तै फिरी किजो दोष लाते? कौन तैसेरी मेरजरो सामनो केरी बटते? 20 हे मैंन्हू, भला तू कौनस, जै तू परमेश्वररो सामनो केरतस? कुन बानोरी चीज बनाने बाले सैहीं जोई बटतीए, तीं आंव एरी किजो बनाई? 21 कुन कुम्हारे मिती पुड़ इखतीयार नैइं, की एकी लुनदे मैरां, अक भाण्ड आदरारे लेई बनाए, ते होरु नरादराए लेई बनाए? ते ऐस मां को हेरान रहनेरी गल्ले? 22 की परमेश्वरे अपनो क्रोध हीराने, ते अपनी समर्थ बाँदी केरनेरी मेरजी सैहीं क्रोधरां भाण्डां, जैना निशानेरे लेई तियार केरे थी कि बडे सबरी सैहीं झैलण। 23 ते रेहंमहेरे भाण्डन पुड़ जैना तैना पेहिले महिमारे तेई तियार केरन, अपनी मिहमारे दौलतरे तेई बाँदी केरनेरी इछा केरी। 24 मतलब असन पुड़ जैना तैने न सिर्फ यहूदन मैरां बल्कि होरी कौमन मैरां भी कुजाए। 25 जैचरे तै होशे नेबेरे किताबीं मां जोते, जैना मेरे लोक न थी, तैन आंव अपने लोक जोलहो। 26 ते एरु भोल्हू की जैस ठैरी तैन सैहीं इन जोरु थू, की तुस मेरे लोक नैइं तैसे ठैरी तैना जीते परमेश्वररी सन्तान भोहे। 27 ते यशायाह इस्राएलेरे बारे मां जोते, की चाहे इस्राएलेरी केरे कुटमेरी गिनती समुद्रेरे रेतरे बराबर भोल्ही फिर भी तैन मैरां थोडे बचेलए। 28 किजोकी प्रभु अपनो वचन जमीनी पुड़ पूरो केरतां, धर्मिकता सैहीं जल्दी सिद्ध केरहेलो। 29 जैचरे यशायाह पेहिलू भी जोरु थू, कि रबुल्लाफावाज इशे लेई इशी नसल न बाचाथो, त अस सदामेरे जेरे भोने थी, अमोरोरे बराबर ठैरथे।

इस्राएलेरो विश्वास

30 ते अस कुन ज़ोम? इन की होरी कौमां केरे लोक जैना धर्मिकता तोपते न थी, तैनेई धर्मिकता हसल की मतलब तै धारमिकता जै विश्वासे सैहीं ए। 31 पण इस्राएली; जैना धर्मेरे व्यवस्था तोपते तैस व्यवस्था कां न पुजे। 32 कोलहेरे लेई? ऐलहेरे लेई की तैना विश्वासे सैहीं नैइं, पण कम्मन सैहीं तैस तोपते थी: तैनेइं तैस ठोकर खाने बाले घोडे सैहीं ठोकर खाइं। 33 जैचरे

लिखोरुए; तका आंव सियोने मां अक ठेस लाने बालो घोड़, ते ठोकर खाने बाली चट्टान रखताइं; ते जै तैस पुड़ विश्वास केरेलो, तै शरमिन्दा न भोल्हो।

10 दूलाव मेरे मनेरी खुवाइशे, ते तैन केरे लेई परमेश्वरे कां मेरी प्रार्थनाए, की तैन मुक्ति मैल्हे। 2 किजोकी आंव तैन केरी गुवाही देताइं, की तैना परमेश्वररी धुनी मां रहतन, पण अकली सैहीं नैइं। 3 किजोकी तैना न समझ भोइतां, ते अपनी धार्मिकता बनानेरी कोशीश केरतां, परमेश्वररी धार्मिकतरे अधिन न भोए। 4 किजोकी हर कोई विश्वास केरने बालेरे लेई मसीह व्यवस्थारो नतीजोए।

मुक्ति सैभी केरे लेई

5 किजोकी मूसे इन लिखोरुए, की जै तैस धार्मिकता जै व्यवस्था सैहींए, चलते, तै ऐंचरे जीतो रालहो। 6 पण जै धार्मिकता विश्वासे सैहीं ए, तै किजो जोतीए, की तू अपने मने मां इन न जोइयां कि स्वर्ग पुड़ कौन चडोरोए? मतलब मसीह आन्ने! 7 या डुगे मां कौन जेव? मतलब मसीह जीताने, ते बआ आन्ने! 8 पण तै कुन जोतीए? की वचन तेरे नेडे, तेरे जुबानी पुड़ ते तेरे मने मां; ई तै विश्वासेरो वचने, जै अस प्रचार केरतम। 9 की तू अपने ऐशी सैहीं यीशु प्रभु जैनतां इकरार केरस ते अपने मने सैहीं विश्वास केरस, कि परमेश्वरे ते फटरन मैरां जीतो केरो, ते तीं पक्की मुक्ति मैल्हेली। 10 किजोकी धार्मिकतरे लेई मने सैहीं विश्वास केरो गहते, ते मुक्करे लेई ज़बानी सैहीं इकरार कीयो गहते। 11 किजोकी पवित्र शास्त्र इन जोते की जै कोई तैस पुड़ विश्वास केरे, तै शरमिन्दा न भोलहो। 12 यहूदन ते यूनेन्न मां किछ भेद नैइं, ऐलहेरे की तै सैभी केरो प्रभुए; ते अपने नोव घिन्ने बाला केरे लेई मुक्ति। 13 किजोकी जै कोई प्रभुहेरु नोव घिन्नेहलो, तैस मुक्ति मैल्हेली। 14 फिरी जैस पुड़ तैनेइं विश्वास न कीव, ते तैना तैसेरु नोव किजो घिन्न? ते जैसेरी न शुनी तै पुड़ केंची विश्वास केरन? 15 ते प्रचारकेरे बगैर केंचरे शुन्न? ते अगर भेजे न गहन, ते केंचरे प्रचार केरन? जैचरे लिखोरुए, की तैन केरे पव केतरे रोडेन, जैना रोड़ी गल्लां केरो प्रचार केरतण। 16 पण सैभेइं तैसेरे सुसमाचारे पुड़ कण न लव: यशायाह जोते की हे प्रभु केने इशे सुसमाचारे पुड़ याकीन केरुए? 17 विश्वास शुन्ने सैहीं, ते शुन्नू मसीहेरे वचने सैहीं भोते। 18 पण आंव जोताइं, कुन तैनेइं न शुनु? शुनु पण किजो लिखोरुए की तैन केरी आवाज सैरी जमीनी पुड़, ते तैन केरी गल्लां सारे संसारी तगर पुजोरिन। 19 फिरी आंव जोताइं, कि इस्राएली न थी जानते? पेहिलो त मूसो जोते, की आंव तैन केरे ज़िरीये जै कौम नैइं, तुशे मने मां जलन करालहो, आंव एकी नादान कौमी कैरां तुस्न सरकालो। 20 फिरी यशायाह बडे दिलेरी सैहीं जोते, की जैना मीं न थी तोपते, तैन आंव मैल्हेलो: ते जैना मीं पुछते भी न थी, तैन पुड़ आंव बाँदो भोव। 21 पण इस्राएलेरे बारे मां तै इन जोते, की सैरी दिहैडी एकी हुकम न मन्ने, ते बाद केरने बाले लोकां केरे पासे मेरो हथ राव।

इस्राएले पुड़ परमेश्वरी दया

11 ऐलहेरे लेई आंव जोताइं, कुन परमेश्वरे अपने लोक शारे? कधे नैइं; आंव भी त इस्राएली: अब्राहीमेरे खानदाने ते बिन्धमीनेरे गोत्रे मराई। 2 परमेश्वरे अपने तैना लोक नैइं शारोरे, जैना तैने पेहिले जाने: कुन तुस न जानथ, की पवित्र शास्त्र एलियाहेरे कथाई मां कुन जोते; की तै इस्राएलेरे खलाफ परमेश्वरे कां बिनती केरते? 3 की हे प्रभु, तैनेइं तेरे नबी मारे, ते तेरी कुरबानगाँ टलोडी; ते आंव ए ऐकैलो बचोरोई, हूनी मीं भी मारने चहतन। 4 पण परमेश्वरे कैरां तैस कुन जुवाब मैल्हो? की मीं अपने लेई रत हज़ार मैंन्हू रखोरन, जैनेई बाले कां मथो नैइं टेकोरो। 5 ऐंचरे इस बेले भी, अनुग्रह सैहीं चुनोरे केतरे लोक बाकिन। 6 अगर इन अनुग्रह सैहीं भोवरुए, ते फिरी कम्मन सैहीं नैइं, नैइं त फिरी अनुग्रह अनुग्रह न राव।

7 ते नतीजो कुन भोव? की इस्राएली जैसेरी तोपी मां आन, तै तैन न मैल्हो; पण चुनोरन मैल्हो, ते होरे लोक सखत कीयोरन। 8 जैचरे लिखोरुए, की परमेश्वरे तैना अज़ेरे दिहाडी तगर भारी निडलाई मां रखोरन, ते एरी एछ्छे दितोरिन, ते एरे कन जैना न शुन्न। 9 ते दाउद जोते: तैनकेरी रोडी तैन केरे

लेई जाल, ते फन्दो, ते ठोकर, ते सजारी वजा भोन | 10 ते तैन केरी एछन पुड आंधरु ए, ताकि लहन न, ते तू तैन केरी पिठ सदा लिकोरी रख |

11 ते आंव कुन जोई कुन तैनेई ऐलहेरे लेई ठोर खाई, की झड़े कधे नैइं: पण तैन केरे झडने सैही होरी कौमण मुक्ति मैल्ही, की तैन जलन भोए | 12 ते अगर तैन केरु झडनु संसाररे लेई धन, ते तैन केरी धटी होरी कौमां केरे लेई दौलतरी वजा भोई, ते तैन केरी भरपूरी सैही केतरु न भोलहू |

गैर कौमां केरे लेई मुक्ति कलमरी मिसाल

13 आंव तुस्न होरी कौमन सैही ऐन जोताइं: की होरी कौमा केरो प्रेरताई, त अपनी सेवारी बडयाई केरताई | 14 ताकी आंव कोंची तरीके सैही अपने कुटुमे मैरां जलन करेइतां केंची एकी मुक्ति दूवेइं | 15 किजोकी तैन केरु शारु गहनू संसाररो मेलेरी वजा बनी, ते कुन तैन केरु कबूल केरु गहनू फटरन जीतू भोनेरे बराबर न भोव? 16 जैखन भंठरो पेहिलो पेइडो पवित्र ठेरो, ते पूरु सनोरु अटू भी पवित्रे: ते जैखन जील पवित्र ठेरु, त डैलडी भी पवित्रन |

17 पण अगर कोई अक डालडी टलाओडी, ते तू जंगली जैतून भोइतां तैन मां लव गास, ते जैतून जीला केरे रसेरो हिसेदार भोरो भोस | 18 ते डैलडन पुड घमण्ड न केरा: ते अगर तू घमण्ड केरस त याद रख की तू जीलन नैइं, पण जील तीं सुमभालते | 19 फिरी तू जोल्हो की डैललडी ऐलहेरे लेई टलाओडी, की आंव कलम भोई | 20 भला, तै त आविश्वासेरे वजाही सैही टलाओडी जेई, पण तू विश्वासे सैही बनरो रातस, ऐलहेरे लेई अभीमानी न भो, पण डर केर | 21 किजोकी परमेशरे असली डैलडी छेडी, त तीं भी न छडलो | 22 ऐलहेरे लेई परमेशरो रैहंम ते सखती हेर! जैना झड़े तैन पउड सखती, पण तेरे लेई रैहंम, अगर तैस मां बनरो रास, नैइं त, तू भी कटो गाल्हो | 23 ते तैना भी आविश्वासे मां न रान, त कलम केरे गहन किजोकी परमेशर फिरी तैन कलम केरते | 24 किजोकी अगर तू तैस जैतूने, जै सुभावे सैही जंगलीए कटो जेव, ते जै असलीए तैसेरे खलाफ रोडोमां लव जेव, ते इना असली जैतूने, अपने जैतून मां किजो न लाई गैलही |

सारे इस्राएलेरी मुक्ति

25 हे दूलाव, की एरु न भोए, की तुस अपनों आप अकमंद सैमझथ; ऐलहेरे लेई आंव न चैई तुस इस भेदे कैरां न वाकफ राथ, की जैखन होरी कौमां केरे लोक रोडे चारे दाखल न भोन, तांगर इस्राएलेरो अक हिंसो एरो सखत रहनोए | 26 ते ऐंचरे सैरी इस्राएलेइनी मुक्ति मैल्नीए; जैंचरे लिखोरुए, की छुटाने बालो सियोनेरां एजेलोहो | 27 ते तैन सैही मेरो ई ऐहैद भोल्लो, की आंव तैन केरे पाप दूर केरेलहो | 28 तैना सुसमाचाररे वजाही त तुशी बैरीन, पण चूनोररे वजाही सैही सियाने केरे टलारे | 29 किजोकी परमेशरे अपने वरदान सैही, ते कुजाने कैरां पत्रोव कधे न हटे | 30 किजोकी जैंचरे पेहिले तुसैही परमेशरो हुकम न थू मनोरु, पण हुना तैन केरे हुकमन मन्ने सैही तुस्न पुड रैहंम भोव | 31 तैंचरे तैनेई भी हुकम न मन्ने की तुस्न पुड जै रैहंम भोते ऐस सैही तैन पुड भी रैहंम भोलो | 32 किजोकी परमेशरे सैभन हुकम न मन्नेरे वजाही सैही बंद केरतां रखोरे ताकी तैना सब रैहंम केरन |

परमेशरेरी बडयाई

33 आहा! परमेशरेरु धन ते अकल ते ज्ञान केतरु गंभीर ए! तैसेरे खयाल केतरे रोडन, तैसेरी बत्तां केरी रोडीन |

34 परमेशरेरी अकू केने ज्ञानी या तैसेरो मंत्री कौने?

35 या केने पेहिले तैस किछ दितू जैसेरो बदलो तैस दितो गहे | 36 किजोकी तैसेरे पासे, ते तैसेरे जिरीये, ते तैसेरे लेई सब किछे: तैसेरी महिमा सदा भोती राहे: आमीन | |

परमेशरेरे सेवरी जिन्दगी

12 ऐलहेरे लेई हे दूलाव, आंव तुस्न परमेशरो रैहंम याद करेताई दरखुवास केरतां जोताई, की अपने जिस्म जीते, ते पवित्र, ते जेरो परमेशरे पसन्दैते, कुरबान केरतां चाडा; ईए तुशी आत्मिक सेवाए | 2 ते इस संसाररे जेरे न बना; पण तुशी अकू नोर्वी भोने सैही तुशो चाल चलन भी

बेदलोए, जैस सैही तुस परमेशरेरी, रोडी, ते पसन्द, ते सिद्ध मर्जी तजरबे सैही बुझते राथ | 3 किजोकी आंव तैस अनुग्रहेरे वजाही सैही जै मीं मैल्हो, तुस्न मां हर एकी सैही जोताई, की जैंचरे समझनु चाताई, तैस कैरां कोई भी अपनों आप नजादे समझे | 4 किजोकी जैंचरे इशे एकी जिसमे मां बडे अंगन, ते सैभी अंगां केरु अकां जेरु कम्म नैइं | 5 तैंचरे अस जैना हछेम, मसीह मां अक जिस्म भोइतां एकी होरेरी अंगम | 6 ते जैखन की तैस अनुग्रहेरे मुताबिक जै असन दितोरुए, असन अलग अलग वरदान मैलोरन, ते जैस भविष्यनरु वरदान मैलेहेरुए, तै विश्वासे सैही भविष्यवाणी केरे | 7 अगर सेवा केरनेरु वरदान मैलहेए, त सेवा मां लगेरो राहे, अगर कोई शिखालने बालो भोए, त शिखालने मां लगेरो राहे | 8 जै नसीहत केरने बालोए, तै नसीहत केरने मां लगेरो राए, जै अगवाई केरने बालोए, तै जोशे सैही अगवाई केरे, ते जै रैहंम केरे तै खुशी सैही रैहंम केरे |

9 प्रेम निष्कपट भोए; बुरैई सैही नफरत केरा; भलाई केरने मां लगेरे राथ | 10 भाईचारेरे प्रेमे सैही एकी होरी पुड रैहंम केरा; इजती सैही होरो एपू कैरां रोडो समझा | 11 कोशीश केरने मां आलस न केरा; आत्मिक जोशे मां भरोरे राथ; प्रभुएरी सेवा केरते राथ | 12 उमीदी मां मधन राथ; मुसीबती मां मजबूत राथ; प्रार्थना मां लगातार लगेरे राथ | 13 पवित्र लोकन जैन किछ जरूरी भोए, तैस मां तैन केरी मद्द केरा; मैमानां केरी आदर केरते राथ |

14 अपने सताने बालन बरकत देथ; बरकत देथ फिटकार न देथ | 15 आनन्द केरने बालना सैही साथी आनन्द केरा; ते लेरां देने बालन सैही साथी लेरां देथ | 16 एपू मामेहीं मेलमलाप रखा; घुमण्डी न भोथ; दीन लोकन सैही साथी संगती रखा; अपनी नजरी मां अकमन्द न भोथ | 17 बुरैयेरे बदली बुराई न केरा; जैना गल्लां सैभी केरे लेई रोडइन, तैन केरी फिकर केरा | 18 जेजू भोई सखते, सैभी मैन्हन्न सैही साथी मेल मलाप रखा | 19 हे टलारव अपनों बदलो न नेथ; पण क्रोधे भटकने देथ, किजोकी लिखोरुए, बदलो नेनो मेरु कम्मे, प्रभु जोते की बदलो आंव ए देइलो | 20 पण अगर तेरो बैरी डलाउखोरे त तैस रोडी खुवा; अगर टलाइषोरो भोए, त तैस पानी पीया; किजोकी एरु केरने सैही तू तैसेरे दोगी पुड अगारां केरो ढेर लालो | 21 बुरैई कैरां न हारा पण बुराई भलेई सैही जीता |

राजेरे लेई फर्ज

13 हर कोई मैन्हू बडे अधिकेरी केरे अधीन राए; किजोकी कोई अधिकारी एरो नैइं, जै परमेशरे तरफां न भोए; ते जैना अधिकारिन, तैना परमेशरे ठैरावरे | 2 ऐलहेरे लेई जै कोई अधिकेरी केरी खलाफत केरते, तै परमेशरेरे कानूनेरो सामनो केरते, ते सामनो केरने बाले सझा मैल्नीए | 3 किजोकी हाकिम रोडे कमेरे लेई नैइं, बुरे कमेरे लेई डरेरे वजाए; अगर तू हाकिमे कैरां निडर रहनो चातस, त रोडां कम्मा केर, ते तैसेरे पासेरां तेरी तारीफ भोल्लो; 4 किजोकी तै तेरे भलेइयेरे लेई परमेशरो सेवके | पण अगर तू बुराई केरस, त तू डर, किजोकी तैस कां तलवार बेफैदी नैइं, ते परमेशरो सेवके; किजोकी तैसेरे क्रोधेरे मुताबिक बुरु कम्म केरने बाले सजा दे | 5 पण अगर तू बुराई केरस, त तू डर, किजोकी तैस कां तलवार बेकार नैइं ते परमेशरो सेवक ए; किजोकी तैसेरे क्रोधेरे मुताबिक बुरु कम्म केरने बाले सजा दे | 6 ऐलहेरे लेई खराज भी देथ, की हकोमत केरने बाले परमेशरेरे सेवकन, ते सदा ऐसे कम्मे मां लगेरे रातन | 7 ऐलहेरे लेई हर कंचेरु हक चुकात, जैस खराज लोडे तैस खराज देथ; जैस मसहूल लोडे तैस भी देथ; जैस कैरां डरू लोडे तैस कैरां; जैसेरी इजत केररी लोडे तैसेरी इजत केरा |

एकी होरेरे लेई फर्ज

8 एपू मामेहीं प्रेमेरे इलावा होरी कोंची चीजरे कर्जदार न राथ; किजोकी जै होरन सैही प्रेम केरते, तैने व्यवस्था पूरी की | 9 किजोकी इन जनाह न केरा, कतल न केरा, चोरी न केरा, ते ऐन केरे इलावा होरो कोई भी हुकम भोए त सैरी केरी बुनीयाद इसे गल्ली मांए, की अपने पडोसी सैही अपने बराबर प्रेम केर | 10 प्रेम पडोसेरी किछ भी बुराई न केरे, ऐलहेरे लेई प्रेम रखनो व्यवस्था पूरी केरनीए |

11 ते वखत पशैनां एरु केरा, ऐलहेरे लेई की तुशे लेई निडलाई मैरां बीङ्गनेरो बेलो अवरोए, किजोकी जैस बेले असेई विश्वास कीव, तैस बेलेरे ख्याले सैहीं इशी मुक्ति नेडीए। 12 रात बडी बीती जेई, ते दिहाडो निसने बालोए; ऐलहेरे लेई असां आंधेरां कम्मा शैरां लोअरे हथयार बंधम। 13 जैचरे लोई मां शोभते, तैचरे अस सिधी चाल चलम, न कि नचने पीने, न जनाहे, ते लुचपने, लडेई, ते जलनी मां मसत भोथ। 14 बल्कि प्रभु यीशु मसीहे लाथ, ते जिसमेरी खूवैशां पूरी केनेरी कोशीश न केरा।

अपने ढलाहन पुड दोश न लाथ

14 जै विश्वासे मां कमजोरे, तैस अपने सेंगती मां आना, पण तैरेरी शकन पुड बेंस केरनेरे लेई नैइं। 2 किजोकी एकी विश्वासे, की सब किछ खानू जैइजे, पण जै विश्वासे मां कमजोरे, तै सिर्फ शागे खाते। 3 ते खाने बालो न खाने बाले घटिया समझे, ते न खाने बाले पुड दोष लाए; किजोकी परमेशरे तै कबूल कीयोरोए। 4 तू कौनस जै होरेरे नोकरे पुड दोश लातस ? तैसेरु बनोरु रानू या झडनू तैसेरे मालिके सैहीं तल्लक रखते, बल्कि तै मजबूत कीयो गालहो; किजोकी प्रभु तैस मजबूत रखते।

5 कोई त अक दिहाडी होरी कैरां बेधतां समझते: हर कोई अपने मनरे मुताबिक फेसलो केरे। 6 जै कौंची दिहाडे मनते, तै भी प्रभुएरे लेई मनते: जै कोई खाते, तै भी प्रभुएरे लेई खाते, किजोकी परमेशरेरु शुक्र केरते, ते जै न खाए, प्रभुएरे लेई न खाए ते परमेशरेरु शुक्र केरते। 7 किजोकी असन मैरां कोई न अपने लेई जीते, ते न कोई अपने लेई मरते। 8 किजोकी अगर अस जीतेम त, प्रभुएरे लेई जीतेम; ते अगर अस जीम या मरम, अस प्रभुएरेम। 9 किजोकी मसीहे ऐलहेरे लेई मरो ते जीतो भी भोव, की मरोरे ते जीतां दुइयां केरो प्रभु भोए।

10 तू अपने ढलाहे पुड किजो दोष लातस ? या तू फिरी किजो अपने ढलाहे घटिया समझतस ? अस सब परमेशरेरे आदालतरे तखतरे सामने खडे भोनेम। 11 किजोकी लिखोरुए, की प्रभु जोते, मीं अपने जानरी कसम, हर अक जैधू मीं कां टिकेलो, ते अक जबाण परमेशरो इकरार केरेहेली। 12 ते असन मैरां हर कोई परमेशरे अपनों अपनों लेखो देल्हो।

अपने ढलाहेरे लेई ठोकर नैइं बन्नू

13 ते अगरोंव जो अस एकी होरी पुड दोष न लाम, पण तुस एने थापा, की कोई भी अपने ढलाएरे लेई ठेस या ठोरारो वजा न रखे। 14 आंव जानताई, ते प्रभु यीशु कैरां मीं याकीन भोव, की कोई चीज अपने आपे सैहीं गंदी नैइं, पण जै तैस गंदी समझते, तैसेरे लेई गंदीए। 15 अगर तेरे ढलाए तेरे खाने सैहीं ठोकर लगगे, फिरी तू प्रेमेरे रिती पुड न चलस: जैसेरे लेई मसीहे मरो, त तू अपने खाने सैहीं नाश न केरे। 16 हुनी तुशे भलैइयरी निन्दा न भोए। 17 किजोकी परमेशरेरी बादशाही खाने पीनेरी नैइं; पण धर्म ते मेल मलाप, ते तै आनन्दे; 18 जै पवित्र आत्मा सैहीं भोते, जै कोई इस रिती सैहीं मसीहेरी सेवा केरते, तै परमेशरे पसन्द एइते, ते मँहन मां कबूल भोते। 19 ऐलहेरे लेई अस तैन गल्लां याद केरम जैन सैहीं मेल मलाप, ते एकी होरेरो सुधार भोए। 20 खानेरे लेई परमेशरेरु कम्म न बगाडा: सब किछ शुद्ध त आए, पण तैस मँहरे लेई बुरुए, जैस तैन खाने सैहीं ठोकर लगातीए। 21 रोडू त इने, की तू न मास खाल, ते न दाछरो रस पीस, जैस सैहीं तेरे ढलाए ठोकर लगगे। 22 तेरो जै विश्वासे, तैस परमेशरेरे सामने, अपने मने मां रख: मुबारिक तै, जै तैस गल्ली मां, जै तै ठीक समझे, अपने आपे दोषी न ठेराए। 23 पण जै शक केरतां खाते, तै सजारे काबिल भोई जेव, किजोकी तै विश्वासे सैहीं न खाए, ते जैन विश्वासे सैहीं नैइं, तै पाप ए।।

होरी केरी तरकी केरा

15 असन मजबूतन केहेरु लोडे, की कमजोरां केरी कमजोरी झैलम; न की अपनों आप खुश केरम। 2 एन मैरां हर कोई अपने पडोसी तैसेरे भलेइरे लेई लगातार खुश केरे। 3 किजोकी मसीहे भी अपनों आप खुश न केरो, पण जैचरे लिखोरुए, की तेरे निन्दा केरने बालां केरी निन्दा मीं पुड एजे। 4 जेतेरी गल्लां पेहिली लिखोरिन, तैना इशे तालीमरे लेई लिखोरिन, की

अस सबरी सैहीं पवित्र शास्त्रेरी शैनतरे जिरीए उमीद रखम। 5 ते सबर, ते शैनतरो दातो परमेशर तुस्न इन वरदान दे, की मसीह यीशु एरे मुताबिक अक मन भोथ। 6 ताकी तुस अक मन, ते अक आशी भोइतां इशे प्रभु यीशु मसीहेरे बाजी परमेशरेरी बडयाई केरा।

सैभी केरे लेई सूसमाचार

7 ऐलहेरे लेई, जैचरे मसीहे भी परमेशरेरे महिमा लेई तुस कबूल केरथ, तैचरे तुस भी एकी होरी कबूल केरा। 8 आंव जोताई, की जैना वाइदे सीयांन दितोरे थी, तैन मजबूत केरनेरे लेई, मसीह, परमेशरेरी सचुचाई हिरानेरे लेई खतनो केरोरे लोकां केरो सेवक बनो। 9 ते होरी कौमा भी रँहंमहेरे वजाही सैहीं परमेशरेरी बडयाई केरन, जैचरे लिखोरुए, की कौमी कौमी मां तेरु शुक्र केरेहो, ते तेरे नोंवेरु भजन केरेलो। 10 फिरी जोवरुए, हे सब कौमा केरे लोकव, तैसेरे लोकन सैहीं साथी आनन्द केरा। 11 ते फिरी जोवरुए, हे सब कौमा केरे लोकव, प्रभुएरी स्तुति केरा; ते हे मुलखा मुलखा केरे सब लोकव; तैसेरी बडयाई। 12 ते फिरी यशयाह जोते; की यिशैरु अक जील बांदू भोलहू ते तैस पुड होरी कौमा उमीद रेखेली। 13 परमेशर जै उमीदरो दातोए तुस्न विश्वास केरने मां सब आनन्द ते शैनति सैहीं भरे, की पवित्र आत्मरी शक्ति सैहीं तुशी उमीद बधती गाहे।

दिलेरी सैहीं लिखनेरी वजा

14 हे मेरे ढलाव, आंव एपू भी तुशे बारे मां जानताई, की तुस भी भलैई सैहीं भेरतां, ते परमेशरेरे ज्ञाने एकी होरी समझते राथ। 15 फिरी भी मीं जैखन केरखन याद करानेरे लेई तुस्न बडे दिलेरी सैहीं लिखु, इन तैस अनुग्रहेरे वजाही सैहीं भोव, जै परमेशरे मीं दितोरोए। 16 की आंव होरी कौमा केरे लेई यीशु मसीहेरो सेवक भोइतां परमेशरेरे सुसमाचारेरी सेवा याजकेरी जेरी केरी; जैस सैहीं मन्ना होरी कौमा केरु चाडोरु, पवित्र आत्मा सैहीं पवित्र कबूल कीव गाहे। 17 तैन गल्लां केरे बारे मां जैना परमेशरे सैहीं तलुक रेखतिन, यीशु मसीह मां बडयाई केरी बटताई। 18 किजोकी तैन गल्लां केरे ईलावा मीं होरी कौंची गल्लां केरे बारे मां जोनेरी दिलेरी नैइं, जैना मसीहे होरी कौमा केरे लेई वचन, ते कर्म। 19 ते निशान ते बडे बडे कममां केरे शक्ति सैहीं, ते पवित्र आत्मारी शक्ति जिरीये कीयां: इडी तगर की मीं यरुशलै मैरां देइतां चेवरे पासन इल्लुरिकुसे तगर मसीहेरो सुसमाचारेरो पूरो पूरो प्रचार कीयो। 20 पण मेरे मनरी उमगे, की जैडी जैडी यीशु मसीहेरु नोंव नैइं पुजोरु, तैडी सुसमाचार शुनेई; एरु न भोए होरेरे मुनीयादी पुड घर बनेई। 21 पण जैचरे लिखोरुए, तैचरे भोए, की जैन तैसेरो सुसमाचार नैइं पुजोरु, तैना लालहे, ते जैनेई शुनोरु तैना समझेलहे।

रोम सफरेरे लेई पौलुसेरो मनसूबो

22 ऐलहेरे लेई आंव तुसन कां एजनेरे लेई बार बार रुकोरो राव। 23 पण हुनी मीं मुलखन मां होरी ठार नैइं, ते बडे सालां केरी मीं तुस्न कां एजनेरी इछाए। 24 ऐलहेरे लेई जैखन इसपनिया गेही त तुस्न मैई एइते गेहीं किजोकी मीं उमीदे, की तैस सफरे मां तुस्न सैहीं मिली, ते जैखन तुस्न मिलने सैहीं मेरु भी किछ दिल भेरोए, ते तुस मीं किछ दूर पजाथ। 25 पण हुनी त पवित्र लोकां केरी सेवा केरनेरे लेई यरुशलैम गाताई। 26 किजोकी मकिदुनिया, ते अरखयारे लोकां केरे कंगाला केरे लेई किछ चन्दो केरा। 27 रोडू त लगु, पण तै तैन केरो कर्जदार भी आए, किजोकी होरी कौमा केरे लोक तैन केरे आत्मिक गल्लन मां शामिल भोए, ते तैन लोडे कि शारीरिक गल्लन मां तैन केरी सेवा केरन। 28 आंव इन कम पूरु केरतां ते तैन ई चन्दो सोफतां तुस्न मैई एइतां इसपानिया जो गेहीं। 29 ते आंव जानताई, की जैखन तुस्न कां एजी, त मसीहेरी पूरी बरकती सैहीं एजी।

30 ते हे ढलाव यीशु मसीहेरो जै इषो प्रभुए ते पवित्र आत्मारे प्रेम याद करेइतां, तुस्न कां बिनती केरताई, की मेरे लेई परमेशरे कां प्रार्थना केरने मां मीं सैहीं साथी मिलतां मगन राथ। 31 की आंव यहूदियारे अविशसन कैरां बेची, ते मेरी तै सेवा जै यरुशलैमेरे लेईए, पवित्र लोकन रोडी लगगे। 32 ते आंव परमेशरेरी मेरजी सैहीं आन्नदे सैहीं एजतां मीं तुस्न साथी आराम

मैल्लहे | 33 शान्ति देनेबालो परमेशर तुस्न सैभन सैहीं साथी भोए | आमीन | |

अपनू आबिवादन

16 आंव तुस्न सैहीं फीबेरे बारे मां, जै मेरी बेहीने ते किंखियारे कलीसियारी सेवकाए, बिनती केरताई | 2 की तुस जैचरे पवित्र लोकन जैइजे, तैस प्रभु मां कबूल केरा; ते जैस गल्ली मां तैस तुस्न कैरां केन्चेरी मददतरी जरूरत भोए, तैसेरी मदत केरा; किजोकी तै भी बडां केरी मतलब मेरी भी मदद केरने बाली भोवरीए | |

3 प्रिसला ते अक्किला जैना प्रभु यीशु मसीह मां मेरे मद्दगार्न, नमशकार | 4 तैनेई मेरे जानरे लेई अपनी करोड़ी रखोरी थी, सिर्फ आंव ए नैइं, बल्कि होरी कौमां सारी कलीसयां भी तैन केरु शुक्र केरतिन | 5 ते तैस कलीसिया भी नमशकार जैना तैन केरे घरे मांन | मेरे ट्लारे इपैनिनुसे भी जै मसीहेरे लेई (पेहिलो फले, नमशकार) | 6 मरियम जैसां तुशे लेई बडी मेहनत केरी, नमशकार | 7 अन्दूर्नीकुस ते यूनियासे जै मेरो रिशतेदार, ते मीं सैहीं साथी कैद भोवरो थू, ते प्रेरितन मां मशूरे, ते मीं कैरां पेहिले मसीह मां थी, नमशकार | 8 अम्पलियातुसे, जै प्रभु मां मेरो ट्लारोए, नमशकार | 9 उरबानुसे, जै मसीह मां इषो मद्दगारे, ते मेरे ट्लारो इस्तरखुसे नमशकार | 10 अपिल्लेसे जै मसीह मां रोडो निसो, नमशकार | अरिस्तुबुलुसेरे घराने जो नमशकार | 11 मेरे रिशतेदार हेरोदियोने नमशकार | नरकिस्सुसेरे खानदाने जैना लोक प्रभु मांन, तैन नमशकार | 12 त्रूफैना ते त्रूफोसा जैने प्रभु मां बडी मेहनत की, नमशकार | 13 रूफुसे जै प्रभु मां चुनोरोए, ते तैसेरी अम्मा जै मेरी भीए, दूयन नमशकार | 14 असुंकिर्तुस ते फिलगोन ते हिर्मास ते पत्रुबास ते हर्मेस ते तैन केरे सैथी ड्लाहन नमशकार | 15 फिलुलुगुस ते यूलिया ते नेर्युस ते तैसेरी बेइन, ते उलुम्पास ते तैन केरे साथी सब पवित्र लोकन नमशकार | 16 एपू मामेइं पवित्र फुमडी सैहीं नमशकार केरा तुस्न भी मसीहेरे सैरी कलीसियारे तरफां नमशकार |

आखरी हदायत

17 हुनी हे द्लाव, आंव तुस्न कां बिनती केरताई, कि जैना लोक तैस तालीमेरे खलाफ जै तुस्न मां ए, खलबली बनातन, ते ठोकर खानेरी वजा भोतन, तैन समझाथ; ते तैन कैरां दूर राथ | 18 किजोकी एरे लोक इशे प्रभु यीशु मसीहेरी नैइं, पण अपने पेटेरी सेवा केरतन; ते चिकनी चोपडी गल्लां केरतां सिधे मने बालन लोकन भटकातन | 19 तुशे हुकम मन्नेरे बारे मां सैभी लोकन पतो चलोरोए; ऐलहेरे लेई आंव तुशे बारे मां आनन्द केरताई; पर आंव इन चाताई, की तुस भलाई केरनेरे लेई अक्कमन्द बना, पण बुराई केरनेरे लेई भोले सादे बना | 20 शान्ति देने बालो परमेशर शैताने जल्दी तुशे पवन सैहीं ड्लानचालो | इशे प्रभु यीशु मसीहेरो अनुग्रह तुस्न पुड भोतो राए |

21 तीमुथियुस मेरो मद्दगारेरे, ते लूकियुस ते यासोन ते सोसिपत्रुस मेरे कुटुमिबी केरे तरफां तुस्न नमशकार | 22 मेरे चिठी लिखने बाले तिरितयुसेरु प्रभु मां नमशकार | 23 गयुसेरु जै मेरी त कलीसियारो मैमान नवाजी केरने बालोए तैसेरु तुस्न नमशकार | 24 इरास्तुस जै नगरेरो भण्डारीए, द्ला कारतुसेरु तुस्न नमशकार | |

परमेशरेरी स्तुति

25 हुनी जैना तुस मेरे सुसमाचार मतलब यीशु मसीहेरे बारेरे मुताबिक मजबूत केरी बटते, तैस भेदेरे प्रकाशेरे मुताबिक जै पेहिलो देंतो छपोरो राव | 26 पण हुनी बांदो भोइतां सनातन परमेशरेरो हुकमे सैहीं नेबी केरे किताबां केरे जिरीये सैभी कौमन जोवरोए, की तै विशवासे सैहीं हुकम मन्ने बाले भोई गहन | 27 तैए ए की बडे अक्कमन्द परमेशरेरी यीशु मसीहेरे जिरीये सदा महीमा भोती राए | आमीन | |

1 कुरिन्थियों

आबिवादन

1 पौलुसेरे तरफां जै परमेशरे मेरजी सैहीं यीशु मसीहेरो प्रेरित भोने रे लेइ कुजावरोए, ते दूलाह सोस्थिनेस तरफां | 2 परमेशरेरे तैस कलीसियारे नोंवें जै कुरिन्थुसे मांहे, तैन कैरां नोंवाँ जैना यीशु मसीह मां पवित्र कियोरेन; तैन सैभी कैरां नोंवाँ जैना हर ठैरी इशे, ते अपने प्रभु यीशुरे नोंवें सैहीं प्रार्थना केरतन |

3 इशे बाजी परमेशरे, ते प्रभु यीशु मसीहेरे तरफां तुस्न अनुग्रह, ते शान्ति मैलहती राहे |

मसीह मां बरकतां

4 आंव तुशे बारे मां अपने परमेशरेरु हर बले शुक्र केरताइं, ऐलहेरेलेइ कि परमेशरेरो इही अनुग्रह तुस्न पुड़ यीशु मसीह मां भोव | 5 की तैस मां भोइतां हर गल्ली मां मतलब सारे वचने, ते सारे ज्ञाने मां धनी कीये जे | 6 की मसीहेरी गुवाहाई तुस्न मां पक्की निसे | 7 इइही तगर की तुस्न मां कोंची वरदानेरी कम्मी न भोए, ते तुस इशो प्रभु यीशु बांदो भोणो बलगते रातथ | 8 तै तुस्न अखिरी तगर मजबूत भी केरेहेलो, की तुस इशे प्रभु यीशु मसीहेरे दिहाडे बेइलजाल भोथ | 9 परमेशर सच्चोए; जैने तुस अपने मड्डे इशे प्रभु यीशु मसीहेरे संगति मां कुजावरेथ |

कलीसिया मां अनबन

10 हे दूलाव, आंव तुस्न सैहीं यीशु मसीह जै इषो प्रभुए तैसेरे नोंवें सैहीं बिनती केताइं, की तुस सब अके गल्ल जोथ; ते तुस्न मां फिरके न भोण, पण अके मन, ते अक भोइतां राथ | 11 किजोकी मेरे दूलाव, खलोएरे खानदानेरे लोकेइं मीं तुशे बारे मां जोवरुए, की तुस्न मां लडाईं लेवरी भोणे | 12 मेरु जॉनू इने, कि तुस्न मैरां कोई त अपनो आप पौलुसेरे जोते, कोई अपुल्लोसेरो, कोई कैफेरो, कोई मसीहेरो जोते | 13 कुन मसीह बेनटोव? कुन पौलुस करुसे पुड़ चाडो जेव? या तुस्न पौलुसेरे नोंवें पुड़ बपतिस्मो मैलहो? 14 आंव परमेशरेरु शुक्र केरताइं, की क्रिस्पुस, ते गुयसेरे इलावा, मीं तुस्न मैरां केंची बपतिस्मो नैइं दितोरो | 15 की एरु न भोए, की कोई जोए, की तुस्न मेरे नोंवें सैहीं बपतिस्मो मैलहो | 16 ते मीं स्तिफानसेरे टबरे भी बपतिस्मो दितो; ऐन केरे इलावा, आंव न जैनी की मीं होरी केंची बपतिस्मो दितो | 17 किजोकी मसीहे आंव बपतिस्मो देनेरे लेई नैइं, बल्कि सुसमाचार शुनानेरे लेई भेजोरोई, ते इन भी लफसां केरे ज्ञान सैहीं नैइं, एरु न भोए की मसीहेरु क्रूस बेकार भोहे |

मसीह परमेशरेरु ज्ञान ते समर्थ ए

18 किजोकी कूसेरी कथा नाश भोने भालां केरे लेई बेवकूफीए, पण असन मुक्ति मैलने बाल केरे लेई परमेशरेरी शक्ति | 19 किजोकी लिखोरुए, की आंव जैनी केरु ज्ञान नाश केरलहो, ते समझदारां केरी समझ घटिया केरलहो | 20 कोडही राव ज्ञानवान? कोडही राव शास्त्री? कोडही इस संसारेरी बेंस? कुन परमेशरे संसारेरु ज्ञान बेवकोफी नैइं ठैरावरु? 21 किजोकी परमेशरेरे ज्ञानेरे मुताबिक संसारेरे ज्ञान सैहीं परमेशर न जानो, ते परमेशरे इन रोडू लग्गु, इस परचारेरे बेवकूफरे मुताबिक विश्वास केरने बालन मुक्ति दे | 22 यहूदी त निशान चहलन, ते यूनानी ज्ञानेरे तोपी मां आन | 23 पण अस त

तैस कुसे पुड़ चाडोरे मसीहेरो प्रचार केरतम जै यहूदी केरे लेई ठोकरारी वजा, ते होरी कौमां केरे लेई बेवकूफी | 24 पण जैना कुजवरेन कुन यहूदी, कुन यूनानी, तैन केरे लेई मसीह परमेशरेरी शक्ति ए, ते परमेशरेरु ज्ञान | 25 किजोकी परमेशरेरी बेवकूफी मैन्हू केरे ज्ञाने कैरां जादे ज्ञानवाने; ते परमेशरेरी कमजोरी मैन्हू केरे शक्ति कैरां जादे जोरे बालीए | |

26 हे दूलाव, अपने कुजानेरे बारे मां त सोचा, की न जिसमेरे मुताबिक बडे ज्ञानी, ते न बेडी शक्ति बाले, ते न मुशुर कुजाए | 27 पण परमेशरे संसारेरे बेवकूफ चुने, की ज्ञाने बालन छिथान; ते परमेशरे संसारेरे कमजोर चुने, की ताक्तबर्न शरमिनदा केरन | 28 ते परमेशरे संसारेरे नीच ते घटिया, बल्कि जैना अथी भी नैइं तैना भी चुने, की तैन जैना आन, बेकार भोण | 29 ताकि कोई प्राणी परमेशरेरे सामने घमण्ड न केरी बटे | 30 पण तैसेरे जरिये सैहीं तुस भी यीशु मसीह मांथ, जै परमेशरेरे तरफां इशे लेई ज्ञान ठेरो मतलब धर्म, ते पवित्रताइं, ते छुटकारो | 31 ताकि जैचरे लिखोरए, तैचरे भोए, की जै घमण्ड केरे तै प्रभु मां केरे | |

मसलूब मसीहेरु पैगाम

2 हे दूलाव, जैखन आंव परमेशरेरो भेद शुनातो तुस्न कां आव, त वचनेरे तैस ज्ञाने सैहीं न आव | 2 किजोकी मीं इन थापेरु थूं की तुसन मां यीशु मसीह, बल्कि सलीबी पुड़ चाडोरे मसीहेरे इलावा होरी कोंची गल्ली न जैनी | 3 ते कमजोरी ते उरे सैहीं तुस्न सैसीं साथी, ते बडो थरकतो तुस्न सैहीं साथी राव | 4 ते मेरो वचन, ते मेरे प्रचारे मां ज्ञान उगाने बैली गल्लौ नैइं; पण आत्मा, ते कुदरतो नितिजो थूं | 5 ऐलहेरे लेई की तुशो विश्वास मैन्हू केरे ज्ञाने सैहीं नैइं, पण परमेशरेरे शक्ति पुड़ भोए |

परमेशरेरु ज्ञान

6 फिरी भी अस सिद्ध लोकन ज्ञान शुनातम: पण इस संसारेरु, ते इस संसारेरे नाश भोणे बालां केरु ज्ञान नैइं | 7 पण अस परमेशरेरु तैन छपोरु ज्ञान, भेदेरे रीती पुड़ जोतम, जैन परमेशरे पेहिलू इशे महिमारे लेई ठैराव | 8 जैन इस संसारेरे हकिमन मैरां केंचे भी न जानू, किजोकी अगर जानते, त जताल्ही प्रभु सलीबी पुड़ न चाडुथे | 9 पण जैचरे लिखोरुए, की जैन न ऐछइं लाव, न कचेइं शुनू, ते जैना गल्लौ मैन्हू केरे मने मां न ईई, जैना परमेशरे अपने प्रेम केरने बालां केरे लेई तियार केरिन | 10 पण परमेशरे अपने अत्माेरे जिरिये सैहीं असन पुड़ बँदी केरी; किजोकी आत्मा सब गल्लौ, बल्कि परमेशरेरी डुगी गल्लौ ज्ञानतीए | 11 मैन्हन मैरां कौन केसेरी गल्लौ ज्ञानते, सिर्फ मैन्हरे आत्मा जै तैस मांहे? तैचरे परमेशरेरी गल्लौ भी कोई न जाने, सिर्फ पमेशरेरी आत्मा | 12 पण असन संसारेरी आत्मा नैइं मैलहोरी, पण तै आत्मा मैलहोरीए, जै परमेशरेरे तरफांए, की आस तैन गल्लन ज्ञानम, जैना परमेशरे असन दितोरिन | 13 जैना अस मैन्हू केरे ज्ञानेरी शिखैलोरी गल्लन मैरां नैइं, आत्मिक गल्लौ आत्मिक गल्लन सैहीं मलेइतां शुनातम | 14 पण जिसमानी मैन्हू परमेशरेरे आत्मरी गल्लन कबूल न केरे, किजोकी तैसेरे लेई तै बेवकूफीए, ते न तै नैनु बुझी बटे किजोकी तैन केरी परख आत्मिक रीति सैहीं भीतीए | 15 आत्मिक मैन्हू सब किछ जानते, पण तै एए केंची कैरां परखो न गाहे | 16 किजोकी प्रभुएरो मन केंने जानो, की तैस शिखाले? पण असन मां मसीहेरो मने | |

कलीसिया मां फुरके

3 हे दूलाव, आंव तुस्न सैहीं ऐंचरे सब गल्लां न केरी बटो, जैंचरे आत्मिक लोकन सैहीं; पण जैंचरे तैन सैहीं जैना मसीह मां बचेन। 2 मीं तुस्न दुद पीयांव, अन न दितू: किजोकी तुस तैन न थी खेइ बटते; बल्कि हेजू भी न खेइ बटथ। 3 किजोकी हेजू तगर भी जिसमानिथ, ऐलहेरे लेई, की जैखन तुस्न मां बैर, ते लडाइयन, त कुन तुस जिसमानी नैइ? ते मैन्हू केरी रीतन पुड न चलथ? 4 ऐलहेरे लेई अक ज़ोते, की आंव पौलुसेरोइं, ते होरो ज़ोते कि आंव अपुल्लोसेरोइं, ते कुन तुस मैन्हू नैइ?

5 अपुल्लोस कौने? ते पौलुस कौने? सिर्फ सेवक, जैन केरे जिसीये तुसैहीं विश्वास केरो, जैंचरे हर केंची प्रभुए दितो। 6 मीं लाऊं, अपुल्लोसे सगू, पण परमेशरे बडाव। 7 ऐलहेरे लेई न त लाने बालो किछे, ते न सगने बालो किछे, पण परमेशर जै बडाने बालो। 8 लाने बालो ते सगने बालो दुइये अकन; पण हर मैन्हू अपने अपनी मजदूरारो फल मैलनोए। 9 किजोकी अस परमेशरेरी मद्र केरने बालेम, तुस परमेशरेरां उडारांरथ ते परमेशरेरी रचनथ।

10 परमेशरेरे तैस अनुग्रहेरे मुताबिक, जै मीं दितोरोए, मीं अक्कमंद मिस्तरैरी जेरी मुनीयाद रखी, ते होरो तैस पुड रदो रखते; पण हर कोई हुशार राहे, की तै तैस पुड केरो रदो रखते। 11 किजोकी तैस मुनीयादेरे इलावा जै आए, तै यीशु मसीहे कोई होरी न बनेइ बटे। 12 ते अगर कोई इस मुनीयादी पुड सुनू चान्दी या कीमती घोड़ या केंडू या घास फूसरो रदो रखते। 13 त हर केंचेरु कम्म बांदू भोलहू; किजोकी तै दिहाडी तैस ज़ोल्ही; ऐलहेरे लेई अगी सैहीं साथी बांदो भोल्ही: ते तै अग हर केंचेरे कम्म परखेली की केरहूए। 14 जैसेरु कम्म तैस अगी मां रालहू, तैस मजदूरी मैल्हनीए। 15 ते अगर केंचेरे कम्म फुकोल्हू, त तैस नुकसान भोणे; पण तै एपू बचनोए पण फुकोते फुकोते।

16 कुन तुस न जानथ, की तुस परमेशरेरु मन्दरथ, ते परमेशरेरी आत्मा तुस्न मां रहतीए? 17 अगर कोई परमेशरेरे मन्दरे नाश केरेलो, त परमेशर तैस नाश केरेलो; किजोकी परमेशरेरु मन्दर पवित्रे, ते तैन तुसथ।

18 कोई अपने आपे धोखो न दे: अगर तुस्न मैरां कोई इस संसारे मां अपनो आप ज्ञानी समझे, त बेवकूफ बने; की ज्ञानी भोए। 19 किजोकी इस संसारेरु ज्ञान परमेशरे कां बेवकूफीए, जैंचरे लिखोरुए; की तै ज्ञान तैन केरे चलैकी मां फसाते। 20 ते फिरी प्रभु जैनी केरी धेमकी ज्ञानते की बेफैइदिन। 21 ऐलहेरे लेई कोई मैन्हू पुड कोई घमण्ड न केरे, किजोकी सब किछ तुशू। 22 कुन पौलुस, कुन अपुल्लोस, कुन कैफा, कुन दुनिया, कुन जीनू, कुन मरनु, कुन एजने बालो बेलो, सब किछ तुशूए। 23 ते तुस मसीहेरथ, ते मसीह परमेशरेरोए।

मसीहेरे प्रेरत

4 मैन्हू असन मसीहेरे सेवक, ते परमेशरेरे भेदां केरे भण्डारी समझन। 2 फिरी इडी भण्डैरी मां ई गल्ल हेरी गाहतीए, की वफादार निसे। 3 पण मेरे खियाले मां ई गल्ल निकडीए, की तुस या मैन्हन मैरां कोई आदालत केरने बालो मीं परखे, बल्कि आंव अपने आपे न परखी। 4 किजोकी मेरो मन मीं कौंची गल्ली मां दोषी न ठैराहे, पण इस सैहीं आंव बे इलजाम न ठैरी, किजोकी मेरो परखने बालो प्रभुए। 5 ते ज़ांतगर प्रभु न एजे, पेहिली केंचेरी आदालत न केरा: तैहे त आंधरेरी छेपोरी गल्लां लोई मां हिरालहो, ते मनां केरी छेपोरी गल्लां बैदी केरेलहो, तैखन परमेशरेरी तरफां हर केंचेरी तारीफ भोणीए। 6 हे दूलाव, मीं इन गल्लन मां तुशे लेई अपने, ते अपुल्लोसेरी बेंस, कहैनी केरे रिती पुड केररीए, ऐलहेरे लेई की तुस इशे जिरीये सैहीं शिखा, की लिखोरे कैरां अगरोंव न बधा, ते एकेरे पास ते होरेरे खिलाफ घुमण्ड न केरथ। 7 किजोकी तीं मां ते होरी मां कौन फर्क केरी बटते? ते तीं कां कुने जैन तीं (होरी कैरां) नैइ मैल्हेरु: ते तीं अगर (होरी कैरां) मैल्हेरुए, ते फिरी एरु घमण्ड किजो केरतस, की मन्नां नैइ मैल्हेरु।

8 तुस त रज़ारेथ; तुस दौलत मंद भोई जे, तुसेइ इशे बगैर बादशाही की; पण रोडू भोथू की तुस बादशाही केरेथे ते अस भी तुस्न सैहीं साथी भोथे। 9 मेरी समझी मां परमेशरे अस प्रेरत लोक सैभना पत्ती तैन लोकां केरे जेरे ठैरावरेम, जैन केरे मौतरो हुकम भोई जेवरोए; किजोकी अस संसारेरे ते

सुवर्गदूतां, ते मैन्हू केरे लेई अक तुमाशो बनोरैम। 10 अस मसीहेरे लेई बेवकूफम; पण तुस मसीह मां अक्कमंदथ: अस कमजोरम पण तुस निगरथ: तुस न इजत मैलतीए, अस बेइजत भोतम। 11 अस इस बेले तगर नियन्त्रे, ते बगैर पैने, ते णगेम, ते धके खातम, ते मारे मारे फिरतम; 12 ते अपने हथेइं सैहीं कम्म केरतां मेहनत केरतम। लोक बुरु ज़ोतन, अस बरकत देतम; तैना सतातन, अस झैलतम। 13 तैना बदनाम केरतन, अस बिनती केरतम: अस अज तगर संसारेरे कूड़ेरे जेरे, ते सब चीजां केरी खुरचनारे जेरे ठैरे।

हदायत

14 आंव तुस्न शरमिनदा केरनेरे लेई इना गल्लां नैइ लवरो लिखने, पण अपना टलारां मन्नां सैमझतां तैन खबरदार केरताई। 15 किजोकी अगर मसीह मां तुशे शिखालने बाले दश हजार भी भोथे, फिरी भी तुशे बडे बाजी नैइं, ऐलहेरे लेई की मसीह यीशु मां सूसमाचारे सैहीं आंव तुशे बाजी भोव। 16 ते आंव तुस्न कां बिनती केरताई, की मेरी जेरी चाल चला। 17 ऐलहेरे लेई मीं तीमुथियुसे जैन प्रभु मां मेरु टलारु, ते वफादार मडुए, तुस्न कां भेजोरुए, ते तै तुस्न मसीह मां मेरु चाल चलन याद करालहो, जैंचरे की आंव हर एकी ठैरी हर कलीसिया मां तालीम देताइं। 18 केतरे त एतरे फुलोरेन कि जेरो आंव तुस्न कां एजनां नैइं। 19 पण प्रभु चाहे त मीं तुस्न कां जल्दी एजनूए, ते तैन फुलोरां केरी गल्लां नैइं, पण तैन केरी शक्ति जैनेलो। 20 किजोकी परमेशरेरी बादशाही गल्लां केरी नैइं, पण शक्ति मांए। 21 तुस कुन चातथ की आंव लैठ घिनतां एजी तुस्न कां या प्यारे, ते नम्रता सैहीं?

कलीसिया मां अलग फिरके

5 इडी तगर शुन्ने मां अवरुए, की तुस्न मां जनाह भोते, मतलब एरहो जनाह जेरो होरी कौमन मां भी न भोए, की अक मैन्हू अपने बाजी केरी कौन्श रखते। 2 ते तुस दुःख त न केरथ, जैस सैहीं एरु कम्म केरने बालो तुस्न मैरां कडो गाथो, पण घुमण्ड केरतथ। 3 आंव त जिसमेरे मुताबिक दूर थू, पण आत्मारु मुताबिक तुस्न सैहीं साथी भोइतां, मन्ना की हाज़र भोइतां मीं एरु कम्म केरने बाले ई हुकम दितो। 4 की जैखन तुस, ते मेरी आत्मा, इशे प्रभु यीशुए शक्ति सैहीं साथी अकोठी भोम, त एरो मैन्हू, इशे प्रभु यीशुए नोवें सैहीं। 5 जिसमेरे नाशेरे लेई शैताने सोंफो गाहे, ताकि तैसेरी आत्माई प्रभु यीशु मसीहेरे दिहाडे मुक्ति मैल्हे।

6 तुशू घमण्ड केरनु रोडू नैइं, कि तुस न जानथ, कि थोडू जेरु खमीर पूरे संनोरे अटे अमलू केरते। 7 परानू खमीर केढतां, अपनो आप साफ कैरा: की नोवें सनोरु अटू बना; ताकि तुस अखमीरे राथ, किजोकी इषो भी फसह जै मसीहे, कुरबान भोवरोए। 8 ते एजा अस जोशे मां आनन्द मनाम, न पुराने खमीरे सैहीं न बुरेई, ते दुष्टरे खमीरे सैहीं, पण सिधीयैई, ते सचैइयरे खमीरेरे रोडी सैहीं।

9 मीं अपने चिठन मां लिखोरुए, की जनाह केरने बालां केरी संगती न केरथ। 10 इन नैइं, की तुस बिलकुल इस संसारेरे जनाह, या लालच केरने बाले, या अंधेर केरने बालन, या मूरती पुजने बालां केरी संगती न केरा; किजोकी ऐचरे तुसेइं इस संसारे मैरां निसनू पेथू। 11 मेरु ज़ोनू त इने, की अगर कोई दूलाह ज़वेइतां, जनाह केरने बाले, या लालची, या मूरती पुजने बालो, या गैई देने बालो, या पीने बालो, या अंधेर केरने बालो भोए, त तैस सैहीं साथी संगती न केरथ, बल्कि एरे मैन्हू सैहीं साथी रोडी भी न खेइयथ। 12 किजोकी मीं बेइरीयां केरी अदालत केरने सैहीं कुन कम्म? कुन तुस एंरीयां केरी अदालत न केरथ? 13 पण बेइरीयां केरी अदालत परमेशर केरते: ऐलहेरे लेई तैस बुरु कम्म केरने बाले एपू कैरां कडा। |

मसीहन मां मुकद्दमे

6 कुन तुस्न मैरां केंची ई दिलेरीए, की जैखन होरी सैहीं लडाई भोए, त फेसलरे लेई हाकमन कां गाहे; ते पवित्र लोकन कां न गाहे? 2 कुन तुस न जानथ, की पवित्र लोकेइं सांसासेरी अदालत केरेलनीए? ते अगर तुसेइं संसारेरी अदालत केरनीए, ते कुन तुसन निकडे कैरां निकडे लडैइयरो फेसलो केरनेरी काबलीत नैइं? 3 कुन तुस न जानथ, की असेइं सुवर्गदूतां

केरी अदालत केरनीए? सांसारैरी गल्लौं केरो फेसलो न केरम? 4 अगर तुसैहीं सांसारैरी गल्लौं केरो फेसलो केरनो भोए, त कुन तैने बिशालेले जैना कलीसिया मां किछ न समझे गहन। 5 आंव तुस्न छिथानेरे लेई इन जोताइ: कि सचे तुस्न मां अक भी अक्कमंद न मैल्हो, जै अपने दलांहां केरो फेसलो केरे? 6 बल्कि दलाए दलाए मां मुकदमे भोतन, ते तैना भी अविशवैसी केरे सामने।

7 पण सचे तुस्न मां बडो दोष त ईए, एपू मांमेह मुकदमे केरतथ: बल्कि अन्याय किजो न झैलथ? अपनो नुकसान कीजो न झैलथ? 8 बल्कि अन्याय केतथ, ते नुकसान पुजातथ, ते तै भी दलाहन। 9 कुन तुस न जानथ, की अन्यायी लोक परमेशरेरे बादशाइहरे बारिस नैइं भोणे? धोखो न खाथ, न हरामकार, न मूरती पूजने बाले, न आयाश, न लुच्चे, न लुंनडे बाज। 10 न चोर, न लालची, न पीने बाले, न गैई देने बाले, न अन्धेर केरने बाले परमेशरेरे बादशाइहरे बारिस भोनेन। 11 ते तुस्न मैरां केतरे एरे थी, पण तुस प्रभु यीशु मसीहरे नोवे सैहीं, ते इशे परमेशरेरे आत्माई सैहीं धोवरेथ, ते पवित्र भोए ते धर्मी ठैरे।

जिस्म परमेशरेरे महिमारे लेई

12 सब चीजां मेरे लेई जैइज त आन, पण सब चीजां फैइदेरी नैइं, सब चीजां मेरे लेई जैइज त आन, पण आंव कौंची गल्ली मां अधीन न भोइएलो। 13 खानू पेटेरे लेईए, ते पेट खानेरे लेई, पण परमेशर इस भी ते उस भी दुइयन नाश केरहेलो, पण जिसम जनाहरे लेई नैइं, बल्कि की प्रभुएरे लेईए; ते प्रभु जिसमेरे लेइए। 14 ते परमेशरे प्रभु अपने सामर्थी सैहीं जीतो केरो, ते असन भी जीतो केरेहेलो। 15 कुन तुस न जानथ, की तुशो जिसम मसीहरो अंगे? ते कुन आंव मसीहरे अंगन वेश्यारे अंग बनेइं? कधी नैइं। 16 कुन तुस न जानथ, की जै कोई वेश्याए सैहीं संगति केरते, ते तैस सैहीं अक तन भोते? किजोकी ते जोते की तैना दुइये अक तन भोल्हे। 17 ते जै प्रभुएरी संगति मां रहते, ते तैस सैहीं साथी अक आत्मा भोते। 18 जनाहे कैरां बेचतां राथ: जेतरे होरे पाप मैन्हू केरते, तैना जिसमेरे बेइरन, पण जनाह केरने बालो अपने जिसमेरे खलाफ पाप केरते। 19 कुन तुस न जानथ, की तुशो जिसम पवित्र आत्मारू मन्दरे; जै तुस्न माए, ते तुस्न परमेशरेरी तरफां मैलोरीए, ते तुस अपने नैइं? 20 किजोकी कीमत देइतां घिनोरेथ, ऐलहरे लेई अपने जिसमेरे जिरये सैहीं परमेशरेरी महिमा केरा।।

डलाहरे मुतालिक सुवाल

7 तैन गल्लौं केरे बारे मां जैना तुसेइं लिखी, इन रोडू की, मडद कौन्शी सैहीं न हुरे। 2 पण जनाहरे डरे सैहीं हर एकी मडदेरी कौन्श, ते हर कौन्शरो मुन्श भोए। 3 मुनश अपने कौन्शरू हक पुरु केरे; ते तैचरे कौन्श भी अपने मुनशरू। 4 कौन्शी अपने जिसमे पुड अधिकार नैइं; तैचरे मुनशे भी अपने जिसमे पुड अधिकार नैइं, पण कौन्शीए। 5 तुस एकी होरी कैरां अलग न भोथ; पण सिर्फ थोडे चिरेरे लेई बिसतारे सैहीं की प्रथनारे लेई फुरसत मैल्हे, ते फिरी अकोठे भोथ, की एरु न भोए, की शैतान तुस्न परखे। 6 पण जैन आंव इन जोताइ छूटे न की हुकम। 7 आंव इन चाताइ, की जेरो आंव आइं, तेरहे सब मैन्हू भोण; पण हर केंची परमेशरे कैरां अलग अलग वरदान मैलोरन, कौंची कैरहौं कौंची कैरहौं।

8 पण आंव अडलां ते बेवां केरे बारे मां जोताइ, की तैन केरे लेई तेरहू रहनू रोडूए, जैचरे आवाइं। 9 पण अगर तैना बरदाश न केरी बटन, त डला बनान, किजोकी डला बनानो मसत रहने कैरां रोडोए।

10 जैन केरो डला भोवरोए, तैन केरे लेई आंव नैइं, बल्कि प्रभु हुकम देते, की कौन्श अपने मुनशे कैरां अलग न भोए। 11 (अगर अलग भोइ गाहे, त होरो डला न बनाए; या अपने मुनशे सैहीं फिरी मेल केरे) ते मुन्श अपने कौन्शी न शारे।

12 होर्न सैहीं प्रभु नैइं, पण आंव जोताइ, अगर केंचरी कौन्श विशवास न केरे, ते तैस साथी रहने सैहीं खुश भोए, ते तै तैस न शारे। 13 ते जैस कौन्शरो मुन्श विशवासी न भोए, ते तैस साथी रहने सैहीं खुश भोए; ते मुन्शे न शारे। 14 किजोकी एरो मुन्श जै विशवास न केरे, ते कौन्शरे वजाही सैहीं

पवित्र ठैरते; ते एरी कौन्श जै विशवास न केरे, ते मुन्शरे जिंसिये पवित्र ठैरतीए, नैइं त तुशे बच्चे अशुद्ध भोथे, पण हुनी त पवित्रन। 15 पण जै मडद विशवास न रखे, अगर ते अलग भोए, त अलग भोणे देथ, ऐस हलती मां कोई दलाहे या बेइयन बन्धने मां नैइं; पण परमेशरे अस मेल मलाप केरनेरे लेई कुजवरेम। 16 किजोकी हे कौन्श, तू कुन जानतिस, कुन अपने मुन्शे मुक्ति दवेइ बटस, ते हे मडदा, तू कुन जानतस की एपनी कौन्शी मुक्ति दवेइ बटस?

परमेशरेरे कुजानेरे मुताबिक चला

17 पण जैचरे प्रभुए हर केंची बंटोरूए, ते परमेशरे हर कोई कुजवरोए; ते तेहेरो चल्ते: ते आंव सैभी क्लीसियान मां ऐंचरे ठैराताइ। 18 जैना खतनो केरे कुजवरेन; तैना खतनाहीन न बन्न: जैना खतनाहीन कुजवरेन तैना खतनो न करान। 19 न खतनो किछ चीजे, ते न खतनो रहीत, बल्कि परमेशरेरे हुकम मन्ने सब किछन। 20 हर अक जै जैचरे कुजावरोए, तैचरे राहे। 21 अगर तुस नोकरेरे हालती मां कुजवरेथ न फिकर न केरा; पण अगर तुस आजाद भोई सखतथ त एरू कम्म केरा। 22 किजोकी जैना गुलामेरे हालती मां कुजवरेन, तैना प्रभु मां आजादन: तैचरे जैना प्रभु मां आजाद कुजवरेन, तैना मसीहरे गुलामन। 23 तुस कीमत देइतां घिनोरेथ, मैन्हू केरे गुलाम न बना। 24 हे दलाव, जै जैचरे कुजवरोए, ते तैचरे प्रभु सैहीं साथी राहे।

अडलाहे ते बेवां

25 कुवैरी केरे लेई मीं प्रभु कैरां कोई हुकम नैइं मैल्हेरो, पण वफादार भोणेरे लेई जेरो रेंहें मीं पुड प्रभुए कीयो, तैसेरे मुताबिक राइ देताइ। 26 मेरी समझी मां इन रोडूए, की अज कालेरो दु:ख मसीबत हेरतां मैन्हेरू अकैलू रहनू ठीके। 27 अगर तेरी लाडीए, त तू तैस कैरां अलग भोणेरी कोशीश न केर: 28 तू डला भी केरस, त पाप नैइं; ते अगर कुवारी डलाही गाए ते कोई पाप नैइं; पण एरे लोकन जिसमानी दु:ख भोल्हो, ते आंव बचाने चाताइ। 29 हे दलाव, आंव इन जोताइ, बेलो घट केरोए, ऐलहरे लेई जैन केरी कौन्शन, तैना एरे भोन की तैन केरी कौन्शां नैइं। 30 ते लेरां देने बाले एरे भोण, मन्ना की लेरां न देंन; ते आनन्द केरने बाले एरे भोन की आनन्द न केरन; ते घिने बालेरे भोण की तैन कां किछ नैइं। 31 इस संसारे बरतने बाले एरे भोन; की संसारे न भोइ गहन, किजोकी इस संसारैरी रिती ते सुभाव बेदलोतो रहते।

32 ते आंव इन चाताइ, कि तुस्न फिक्र न भोए: अडलाव मैन्हू प्रभुएरी गल्लौं कैरी फिक्र केरते की कैचरे प्रभुए खुश केरे। 33 पण डलवरो मैन्हू संसारैरी गल्लौं कैरी फिकरी मां रहते, कि कैचरे एपनी कौन्श खुश रखे। 34 डलवरे अडलाएई मां भी भेदे, अडलाही प्रभुएरी फिकरी मां रातीए, की कैचरे अपनी आत्मा, ते जिस्म दुइये पवित्र रखे, पण डलावरी संसारेरे फिकरी मां रहतीए, की अपने मुन्शे खुश रखे। 35 ई गल्ल तुशे फैइदेरे लेई जोताइ, न की तुस्न फसानेरे लेई, बल्कि ऐलहरे लेई जैचरे लोडे तैचरे किव गहे, ताकी तुस अक मन भोइतां प्रभुएरी सेवाई मां लोगोरे राथ।

36 ते अगर कोई इन समझे की, आंव एपनी तैस कुवैरारू हक लवरोइ मारने जैसेरी जवानी लवरी दलने, त जैचरे चाहे ते केरे, इस मां पाप नैइं, ते तैसेरो डला भोणे दे। 37 पण जै मने मां मजबूत रखते, ते तैस प्रयोजन न भोए, बल्कि अपनी मर्जी पूरी केरने पुड अधिकार रखती भोए, ते अपने मने मां इन थापोरू भोए, की मीं अपनी कुवारी कुइय अडलाई रखनीए, ते रोडू केरते। 38 जै अपनी कुवैरारो डला कराते, ते रोडू केरते, ते जै न कराहे ते बडू रोडू केरते।

39 जांतगर कौंची कौन्शरो मुन्श जीतो रहते, तां तगर तैसेरे बन्धने मां भोतीए, पण जेइस तैसेरो मुन्श मेरी गाहे, जैस सैहीं चाहे डला केरी बटतीए, सिर्फ प्रभु मां। 40 पण जेरीए अगर तेरहिरी राहे, त मेरे खियाले मां बडी मुबारिक ए. ते आंव समझताइ, कि परमेशरेरी आत्मा मीं मां भी आहे।

मूरतन कां चाडोरू

8 हुनी मूरतन कां चडोरी चीजां केरे बारे मां अस जानतम, की तुसन सैभन कां ज्ञाने: ते ज्ञान घुमण्ड पैइदा केरते, पण प्रेमे सैहीं मजबूती भोतीए। 2 अगर कोई समझे, की आंव किछ जानताइ, ते जेरू जानेरू लोडे

तेरु हेजू तगर न जाने। 3 पण अगर कोई परमेशरे सैहीं प्रेम करते, ते तैस परमेशर पशानते।

4 मूरती केरे सामने चैडोरी चीजां खानेरे बारे मां अस जानतम, की मूरती संसार मां कोई चीज नैइं, ते एकेरे इलावा होरो कोई परमेशर नैइं। 5 अगर अम्ब्रे ते धेरतली पुड़ बडेन इश्रवर्ण, (जैचरे बडे इश्रवर ते बडे प्रभुन)। 6 फिरी भी इषो अके परमेशरे: मतलब बाजी जैस कैरां सैरी चीजन, ते अस तैसेरे लेई आहम, ते अके प्रभुए, मतलब यीशु मसीह जैसरे जिरिए सब चीजां भोवरिन, ते अस भी तैसेरे जिरिये सैहीं आहम।

7 पण सैभन इन ज्ञान नैइं; पण केने ते हेजू तगर मूरतन किछ समझनेरे वजाही सैहीं मूरती केरे सामने चैडोरी चीजां किछ समझतन, ते तैन केरो जमीर कमजोर भोइतां अशुद्ध भोइ गाहते। 8 खानू असन परमेशरे सैहीं न मिलाए, अगर अस न खाम, असन किछ नुकसान नैइं, ते अगर खाम त कोई फेइदो नैइं। 9 पण हुशार राथ, एरहू न भोए, की तुशी ई आजादी कमजोरां केरे लेई ठोकारी वजा बने। 10 किजोकी अगर तीं जैनी मन्दरे मां मूरतन कां चडोख खातो लाहे, ते तै कमजोर मँन्हू भोए, ते कुन तैसेरे जमीरे मां मूरती केरे सामने चैडोरी चीजां केरे खानेरी दिलेरी न भोल्ही। 11 ऐस रीति सैहीं तेरे ज्ञानेरे वजैई सैहीं तै कमजोर दूला जैसरे लेई मसीह मरो नाश भोए। 12 दूलां केरो पाप केरने सैहीं, ते तैन केरे कमजोर जमीरे दुःख पूजाने सैहीं तुस मसीहेरो पाप केरतथ। 13 इस वजाहीं सैहीं अगर खानू मेरे दूलाहेरे लेई ठोकर भोए, ते आंव कौंची तरीके सैहीं कधी मीट न खेइलो, एरु न भोए की आंव अपने दूलाहेरे लेई ठोकारो वजा बेनी।

प्रेरितेरे आधिकार ते फर्ज

9 कुन आंव आजाद नैइं? कुन आंव प्रेरित नैइं? कुन मीं यीशु जै इषो प्रभुए, नैइं लवरो, कुन तुस प्रभु मां मेरे बनावरे नैइं? 2 अगर आंव होरी केरे लेई प्रेरित नैइं, फिरी भी तुशे लेई त आइं; किजोकी तुस प्रभु मां मेरी प्रेरताई पुड़ छापथ।

3 जैना मीं परखतन, तैन केरे लेई मेरो इहे जुवाबे। 4 कुन असन खाने पीनेरु हक नैइं? 5 कुन इखतियार नैइं, कि कौंची मसीह बेइनी सैहीं इला बनाम, जैचरे होरे प्रेरित, ते प्रभुएरे दूलाआ ते कैफा केरतन? 6 या सिर्फ मीं ते बरनबासे अधिकार नैइं, की कमाई केरनी शारम। 7 को जेरो फौजी अपनू खेइतां जंग केरते? या कौन बाग लेइतां तैसेरो फल न खाए? कौन भैडां रेखतां तैन केरु दुद न पीए?

8 कुन आंव इना गल्लां मँन्हू केरी रीति पुड़ ज़ोताइं? 9 कुन व्यवस्था भी इने न ज़ोए? किजोकी मूसेरी व्यवस्था मां लिखोरुए की देइने पासे चलते बार दांतेरु आशी न बंदथ: कुन परमेशर दांतां केरी फिकर केरते? या खास केरतां इशे लेई ज़ोते। 10 हां, इशे लेई लिखोरुए, किजोकी ठीके की जोटलाने बालो उमीदी सैहीं जोटलाए, उपाने बालो उमीदी सैहीं उपाए। 11 ते असेइं तुशे लेई आत्मिक चीजां बेई, कुन बडी गल्ले, की तुशी जिसमानी चीजां फसल कटम। 12 ते अगर होरन कां ई अधिकारे, ते कुन इषो इस कैरां जादे न भोल्हो?

पण अस ऐह अधिकार इसतमाल न केरम; पण सब किछ झैलतम, की इशे जिरिये मसीहेरे सूसमाचारेरी कोई रोक न भोहे। 13 कुन तुस न जानथ की जै पवित्र चीजां केरी सेवा केरते; तै मन्दरे मैरां खाते; ते जै कुबैरनी सेवा केरते; तै कुबान गाह सैहीं शामिल भोते। 14 ऐंचरे प्रभुए ठैराऊ, की जैना लोक सूसमाचार शुनान, तैना भी जिन्दगी सूसमाचारे सैहीं गुजारन।

15 पण मीं इन मैरां कोई भी गल्ल कम्मे मां न लाई, ते मीं ऐना गल्लां ऐलहेरे लेई नैइं लिखोरी, की मेरे लेई एरु कीव गाहे, किजोकी इस कैरां त मेरु मरनू रोडूए; की कोई मेरु घमण्ड बेफेइदू ठैराहे। 16 ते अगर आंव सूसमाचार शुनेइं, त मेरु किछ घमण्ड नैइं, किजोकी इन त मेरे लेई जरुरीए, ते अगर आंव सूसमाचार न शुनेइं, त मीं पुड़ आफसोस। 17 किजोकी अगर अपनी मेरजी सैहीं इन केरताइं, त मजदूरी मैलतीए, ते अगर अपनी मेरजी सैहीं न केरी, त फिर भी भण्डारीपन मीं सौफरुए। 18 ते मेरी कोजेरी मजदूरीए? कि सूसमाचार शुनाने मां मसीहेरो सूसमाचार मुफ्त बेंटी; इडी तगर कि जै सूसमाचारे मां मेरो अधिकारे, तैस पूरो इसतमाल केरी।

19 किजोकी सैभन कैरां आजाद भोणे पुड़ भी मीं अपनों आप सैभी केरो गुलाम बनाव; की जादे कैरां जादे लोकन खिचतां ऐनही। 20 आंव यहूदी केरे लेई यहूदी बनो ताकि यहूदन खिचतां ऐनही, जैना लोक व्यवस्थारे अधीन तैन केरे लेई व्यवस्थारे अधीन न भोणे पुड़ भी अधीन भोव, की तैन जैना व्यवस्थारे अधीन तैन खिचतां ऐनही। 21 व्यवस्था हीनां केरे लेई आंव (जै परमेशरेरे व्यवस्था कैरां हीन नैइं, पण मसीहेरे व्यवस्थारे अधीनाई) व्यवस्था हीन जेरो बनो, कि व्यवस्था हीन खिचतां ऐनही। 22 आंव कमजोरां केरे लेई कमजोर बनो, कमजोरन खिची, आंव सैभी मँन्हू केरे लेई सब किछ बनो, की कौंची न कौंची तरीके सैहीं लोकन मुक्ति मैल्हो। 23 ते आंव सब किछ सूसमाचारेरे लेई केरताइं, की होरन सैहीं साथी तैसेरो हिसेदार भोइं।

मसीह दौड

24 कुन तुस न जानथ, की दौडी मां त सबी दौडतन, पण इनाम अके नेते, तुस तेरहू दौडा, की जीतथ। 25 ते हर अक पलवान हर किसमेरो परेज रखते, तै त अक शुकने बाले मुकटेरे लेई इन सब किछ केरते, पण अस त तैस मुकटेरे लेई केरतम जैन कधी नैइं शुकनू। 26 ऐलहेरे लेई आंव ऐंचरे दौडताई, पण बेठिकाने नैइं, आंव भी ऐंचरे मुकन सैहीं लडताई, पण तैसेरो जेरो नैइं जै हवाई मां लडते। 27 पण आंव अपने जिसमे भी मारताई कुटताई, ते कैबू मां केरताई; एरु न भोए की होरन प्रचार केरतां, आंव अपनों आप कौंची तरीके सैहीं निकम्मो ठैरेहीं।

इसाएलेरे इतिहारे खलाफ खबरदारी

10 हे दूलाव, आंव न चैई, की तुस इस गल्लि कैरां अनजान राथ, इशे सियाने बिदलारी हैठ थी, ते सब समुदरे पार भोए। 2 ते सैभेइं बिदलारी मां, ते समुन्द्रे मां मूसेरो बपितिस्मो नेव। 3 ते सैभेइं अके आत्मिक खुराक खाई। 4 ते सैभेइं अके आत्मिक पानी पीव, किजोकी तैना आत्मिक चडान्नी मैरां पीते थी, जै तैन सैहीं साथी साथी चलती थी; ते तै चडान मसीह थीयो। 5 पण परमेशर तैन मैरां बडन सैहीं खुश न भोव, ऐलहेरे लेई तैना जंगले मां ढेर भोए।

6 इना गल्लां इशे लेई मिसाल भोइ, की जैचरे तैनेइं लालच कीव, तैचरे अस बुरी चीजां केरु लालच न केरम। 7 ते न मूरती केरी पूजा केरने बाले बनम; जैचरे तैना केने बनोरे थी, जैचरे लिखोरुए, की लोक खाने पीने बिशे, ते दौडने खैडते उठे। 8 ते न असां जनाह केरम; जैचरे तैन मैरां केनेइं कीयो: एकी दिहाडी मां तरेई हजार मरे। 9 ते न अस प्रभु अजमाम; जैचरे तैन मैरां केनेइं अजमाव, ते तैना सपन सैहीं नाश कीये जे। 10 ते न तुस कुडकडथ, जैचरे तैन मैरां केनेइं कुडकडव, ते नाश केरने बालेरे जिरिए नाश कीये। 11 पण इना सब गल्लां, जैना तैन पुड़ बीती, मिसालारी रीति पुड़ भी: ते तै इशी हदायत भी आहे जैना अस संसाररे अखरी वक्ते मां रहतम लिखी जेइ। 12 ऐलहेरे लेई जै समझते, की आंव मजबूताइं, तै खबरदार राहे; की बिछडी न गाहे। 13 तुसन पुड़ एरी अजमैइशी नैइं आवरी, जै मँन्हू केरे झलनेरे बेइरे, तै तुसन समर्थी कैरां जादे आजमैइशी मां न गहने देल्हो, बल्कि आजमैइशी सैहीं साथी तैस मैरां कढेहेलो भी; की तुस झैल्ही भी बटतथ।

मूर्ति पूजारे खलाफ खबरदारी

14 ऐलहेरे लेई, हे मेरे टलाराव, मूरती पूजने कैरां बेंचते राथ। 15 आंव समझदार बुझतां, तुसन सैहीं ज़ोताइं: जैन आंव ज़ोताइं, तैस तुस परखा। 16 तै शुकेरो कटोरो, जैस पुड़ अस शुक्र केरतम, कुन तै मसीहेरे लेवहे सैहीं शामिल नैइं? तै रोटी जै अस टलोडतम, कुन मसीहेरी श्राखत नैइं? 17 ऐलहेरे, की अके रोटीए ते अस भी जैना बडेम, अके जिस्म: किजोकी अस सब तैसे रोटी सैहीं शामिल भोतम। 18 जैना जिसमानी भावे सैहीं इसराइलीन, तैन हेरा: कुन कुरबैनरु चाडोरु खाने बाले कुरबानगही मां शामिल नैइं? 19 फिरी आंव कुन ज़ोताइं? कि मूरतरी कुरबानी किछे, या मूरती किछे 20 नैइं, बल्कि इन, की होरी कौमां जैन चैडतिन, तैना परमेशरेरे लेई नैइं, पण दुष्ट आत्मा केरे लेई चाडतिन: ते आंव न चैही की तुस दुष्ट आत्मन सैहीं साथी शामिल भोथ। 21 तुस प्रभुएरे कटोरे, ते दुष्ट आत्मा केरे

कटोरे दुइयन मैरां न पी बटथ | 22 कुन अस प्रभु सरकातम? कुन अस तैस कैरां जादे शक्ति बालेम?

सब किछ परमेशरे महिमारे लेई

23 सब चीजां मेरे लेई जैइजन, पण सब फैदेरी नैइं: सब चीजां मेरे लेई जैइजन त आन, पण सैभी चीजां केरे लेई अस आजाद नैइं | 24 कोई अपनी भलाई न तोपे, बल्कि होरी केरी | 25 जैन किछ कस्सैई केरे दुकन्न पुड बिकते, तैन खाथ, ते जमीरेरे वजाही सैहीं किछ न पुछा | 26 किजोकी जमीन, ते तैसेरी भरपूरी प्रभुएरीए | 27 ते अविशवैसन मैरां कोई तुस्न धाम जोए, ते तुस गहनू चातथ, ते जैन किछ तुशे सामने रखू गाहे तैन खाथ, ते किछ न पूछा | 28 पण अगर कोई तुस्न सैहीं जोए, इना त कुरबैनरी चीजन, त तैस जोने बालेरे वजाहीं सैहीं, ते जमीरेरे वजाहीं न खाथ | 29 मेरो मतलब, तेरो जमीर नैइं, बल्कि तैस होरेरू | रोडू | मेरी आजादी होरी केरे खायलन सैहीं किजो परखी गहे? 30 अगर आंव शुक्र केरतां खताइं, त जैस पुड आंव शुक्र केरताइं, तैसेरे वजाहीं सैहीं मेरी बदनामी किजो भोतीए?

31 तुस चाहे खाथ, चाए पीथ, चाए जैन किछ केरा परमेशरेरी महिमारे लेई केरा | 32 तुस न यहूदी, न यूनैनी, न परमेशरेरी कलीसियारे लेई ठोकरारी वजा बना | 33 जैचरे आंव भी सैभी गल्लन मां सैभन खुशी रखताई, पण बड़ां केरो फैइदो हेताई, की तैन मुक्ति मैल्हे |

11 तुस मेरी जेरी चाल चला जैचरे आंव मसीहेरी चाल चलताइं |

आराधनाई मां दोग ढकणों

2 हे ढलाअव, आंव तुशी तारीफ केरताइं, कि सब गल्लन मां तुस मीं याद रखतथ: ते जै तालीम मीं तुसन तगर पजाइं तै बरकरार रखतथ | 3 ते आंव चाताइं, कि तुस इन जानथ, हर एके मडदेरी करोडी मसीहे: ते कौन्शरी करोडी मडदे: ते मसीहेरी करोडी परमेशरे | 4 जै मडद करोडी ढेकतां प्रार्थना या भविषवाणी केरते, तै अपने करोडारी बेइजती केरते, किजोकी तैन घुमण्डेरे बराबरे | 5 पण जै कौन्श बगैर दोग ढेकतां प्रार्थना या भविषवाणी केरतीए, तै अपने दोगेरी बेइजती केरती, किजोकी तैन घमण्ड केरनेरे बराबरे | 6 अगर कौन्श ओडनी न ओडे, त दोग भी कटे; अगर कौन्शरे लेई दोग कड्डानो शरमरी गल्ले, त ओडनी ओडे | 7 हां मडदे अपनो दोग ढकनो जैइज नैइं, किजोकी तै परमेशरेरू रूप ते महिमाए; पण कौन्श मडदेरी महिमाए! 8 किजोकी मडद कौन्शी सैहीं नैइं, बल्कि कौन्श मडदे मैरां निसोरीए | 9 ते मडद कौन्शरे लेई नैइं पण मडदेरे लेई बनावरीए | 10 ऐलहेरे लेई सुवर्गदूतां केरे वजाहीं सैहीं कौन्शरे लेई जैइजे, कि इखतियार अपने दोग पुड रखे | 11 फिरी भी प्रभु मां कौन्श बगैर मडदेरे, ते न मडद बगैर कौन्शरे बगेरे | 12 किजोकी जैचरे कौन्श मडदे मैरां, तैचरे मडद भी कौन्शी मैरांए | 13 तुस एपू सोचा, कुन कौन्शी बगैर दोग ढेकतां परमेशरे कां प्रार्थना केरनी शोभतीए? 14 कुन तुस भी न जानथ, कि अगर मडद लमो दोग रखे त तैसेरे लेई शरमे | 15 पण अगर कौन्श लमो दोग रखे; ते तैसेरे लेई शोभाए किजोकी बाल तैसेरे ढकनेरे लेई दितोरेन | 16 पण अगर कोई बेस केरनी चाहे, त इन समझे न इशी न इशे परमेशरेरी कलीसियां केरी एरी रीतए |

प्रभु भोजेरे बारे मां

(मत्ती 26 : 26 -29 ; मरकुस 14 : 22 -25 ; लूका 22 : 14 - 20)

17 पण ई हुकम देताइं, आंव तुशी तारीफ न केरी, ऐलहेरे लेई कि तुशे अकोठे भोने सैहीं भलाई नैइं, बल्कि नुकसान भोते | 18 किजोकी पेहिलू त आंव इन शुनताइं, कि जैखन तुस कलीसिया मां अकोठे भोतथ, त तुसन मां फूट भोतीए ते आंव किछ हदी तगर याकीन केताइं | 19 किजोकी तुसन मां विधर्म पक्कोए, ऐलहेरे लेई जैना लोक तुस्न मां रोडे निसतन, तैना बाँदे भोई गहनेन | 20 ते तुस जैना एकी ठैरी अकोठे भोतथ त इन प्रभु भोज खानेरे लेई नैइं | 21 किजोकी खानेरे बेले हर कोई अपनो डलाछडो पेहिलो खाते, ते कोई त नियात्रो रहते, ते कोई रजते | 22 कुन खाने पीनेरे लेई तुसन घर नैइं या परमेशरेरी कलीसियाइ तुछ समझतथ, कि जैन कां नैइं तैन छितातथ आंव तुस्न कुन जोई? कुन इस गल्ली मां तुशी तारीफ केरी? आंव तारीफ न केरी |

23 किजोकी ई गल्ल मीं कां प्रभु कैरां पुजी, ते मीं तुस्न तगर भी पुजाइं; कि प्रभु यीशुए जैस राती तै टलावाव जेव रोडी नेयी | 24 ते शुक्र केरतां टलाओडी, ते जौव; कि ई मेरो जिसमे, जै तुशे लेइए: मेरी यादी मां इन्ने केरा | 25 ते ऐंचरे दाछरो कटोरो भी नेव, ते जौव; ई कटोरो मेरे लेव्हे मां नांवो वाइदोए: जैखन भी पीथ, मेरे यादी मां इने केरा | 26 किजोकी जैखन ई रोडी खाथ, ते इस कटोरे मैरां पीथ, त प्रभुएरे मौत जातगर तै न एजे, प्रचार केरते राथ |

27 ऐलहेरे लेई जै कोई प्रभुएरे रोडी न मुनासब तरीके सैहीं खाए, या तैस कटोरे मैरां पीये, तै प्रभुएरे जान ते लेव्हे गुनागार भोल्हो | 28 ऐलहेरे लेई मैन्हू अपनो आप परखे ते ऐंचरे इस रोडी मैरां खाए, ते इस कटोरे मैरां पीये | 29 किजोकी जै खाते पीते प्रभुएरो जिसम न पिशाने, तै इस खाने पीने सैहीं एपू पुड आफत आनते | 30 ऐलहेरे लेई तुस्न मैरां बडे कमजोर ते रोगिन, ते बडे झुली भी जे | 31 अगर अस अपनो आप परखते त असन सजा न मैल्हेथी | 32 पण प्रभु असन सजा देइतां समझते ऐलहेरे लेई कि अस संसारे सैहीं साथी दोषी न भोम | 33 ऐलहेरे लेई, हे मेरे ढलाहाव, जैखन तुस खानेरे लेई अकोठे भोतथ, एकी होरी बलगा | 34 अगर कोई नियत्रो भोए, अपने घरे मां खाए जैस सैहीं तुशे अकोठे भोणे सैहीं तुसन सजा न मैल्हे: ते होरी गल्लां आंव एइतां ठीक केरेलो | |

आत्मिक वरदान

12 हे मेरे ढलाअव, आंव न चैही कि तुस आत्मिक वरदान कैरां बेखबर राथ | 2 तुस जानथ, कि तुस अविशवास थी, त लैटी मूरतन पत्ती जैचरे तुस्न चलाते थी तैचरे चलते थी | 3 ऐलहेरे आंव तुस्न हदायत देताइं कि जै कोई परमेशरेरी आत्मार अगवैही सैहीं जोते, तै न जोए, कि यीशु लानतीए; न कोई पवित्र आत्मार बगैर जोइ बटे कि यीशु प्रभुए |

4 वरदान त बडे किसमां केरन, पण आत्मा अके | 5 ते सेवा भी बडे किसमा केरी, पण प्रभु अके | 6 ते बड़ां बड़ां कम्मा भी केही किसमा केरन, पण परमेशर अके, जै सैभन मां ते सैभी किमेरो असर पैइदा केरते | 7 पण सैभी केरे फैइदो पुजानेरे लेई हर एकी आत्मरू प्रकाश दितू गहते | 8 किजोकी एकी आत्मार जिरया समझदेरारी गल्लां दिति गैतिन; ते होरी तैसे आत्मार जिरिये सैहीं ज्ञानेरी गल्लां | 9 ते कांची तैसे आत्मार जिरिये सैहीं विशवास; ते कांची तैसे आत्मार जिरिये सैहीं बझाणनेरू वरदान दितू गहते | 10 फिरी कांची बड़ां बड़ां कम्मां केरनेरी शक्ति; ते कांची भविषवाणी, ते कांची आत्मां केरी परख, ते कांची बडे किसमा केरी बोली; ते कांची बोली केरो मतलब जोनो | 11 पण इना सारां बड़ां बड़ां कम्मां तैहे आत्मा केरतीए, जैस जैन चातीए बंटतीए |

जिस्म अक अंग हछे

12 किजोकी जैचरे जिस्म त अके ते तैसेरे अंग बडेन, ते तैस एकी जिस्मेरे अंग, हछे भोणे सैहीं भी सब मिलतां अके जिसमे, तैचरे मसीह भी आहे | 13 किजोकी असेइ सैभेइ कुन यहूदी, कुन यूनानी, कुन गुलाम, कुन आजाद अके आत्मार जिरिये अक जिस्म भोणेरे लेई बपतिस्मो नेवरोए, ते असन सैभन अके आत्मा पीयाव |

14 ऐलहेरे लेई जिसमे मां अके अंग नैइं, बल्कि बडेन | 15 अगर पव जोए आंव हथ नैइं, कुन तै इस वजाही सैहीं जिस्मेरो नैइं? 16 ते अगर कन जोए; आंव अछ नैइं, ऐलहेरे लेई कि तै जिस्मेरो नैइं, त कुन तै जिस्मेरो नैइं? 17 अगर सारो जिस्म अछे भोथी त शुन्नू कोठां भोथू? 18 पण सचे परमेशरे अंग अपने मेरजी सैहीं अक अक केरतां जिस्म मां रखोरेन | 19 अगर तैना सभे अके अंग भोथे, त जिस्म कोडही भोथो? 20 पण अंग त बडेन, जिस्म अके | 21 अछ हथे सैहीं न जोई बटे, कि मीं तेरी जरूरत नैइं, ते न करोडी पवन सैहीं जोई बटतीए, कि मीं तेरी जरूरत नैइं | 22 पण जिसमेरे अंग जैना होरन कैरां कमजो लेईहोतन, बडे जरूरीन | 23 ते जिस्मेरे जैन अंगन अस अदरारे काबिल न समझम तैन अस जादे आदर देतम; ते इशे अशोभते अंग होरे भी रोडे भोतन | 24 फिरी इशे अशोभते अंग ऐसेरी जरूरत नैइं, पण परमेशरे जिस्म बनोवरोए, कि जैस अंगे घटी थी तैस भी आदर भोए | 25 ताकि जिसमे मां फूट न भोए, पण अंग एकी होरेरी बराबर फिकर केरन | 26 ऐलहेरे लेई

अगर एकी अंगे दुःख मैल्लते, त सब अंग तैस सैहीं साथी दुखी भोतन; ते अगर एकी अंगेरी बडयाइ भोतीए; त तैस साथी सब अंग आनन्द केरतन।
 27 एँचरे तुस सब मिलतां मसीहेरो जिसमथ, ते अलग अलग तैसेरे अंगथ।
 28 ते परमेशरे कलीसिया मां अलग अलग मैन्हू ठैरवरेन; पेहिलो प्रेरित, दुइयों नबी, ट्लाएईवं उसताद, फिरी बडां बडां कम्मां केरने बालो, बझाने बालो, ते रेंहम केरने बालो, ते प्रधान, ते किसमाँ किसमाँ केरी बोली जोने बालो।
 29 कुन सब प्रेरितन? कुन सब नबिन? कुन सब उसतादन? कुन सब बडां बडां कम्मां केरने बालेन? 30 कुन सैभन बझानेरु वरदान मैन्हू? कुन सैभन किसमा किसमा केरी बोली जोतन? 31 कुन सब तरजमो केरतन? तुस बडे कैरां बडे वरदानेरी धुनी मां राथ। पण आंव तुस्न होरी भी रोड़ी बत हिराताइं।

प्रेम सैभना रोड़ी बत

13 अगर आंव मैन्हू, ते सुवर्गदूतां केरी बोली जोइं, ते प्रेम न रेखी, त आंव ठनठनाने बाली पितल, ते झनझन केरने बाली झांझाइं। 2 ते अगर आंव भविषवाणी केरी सेखी, ते सैभ भेद जैनी ते, मीं इडी तगर पूरो विश्वास भोए, कि पहाड़न घासेई, पण प्रेम न रेखी, त आंव किछ भी नैइं। 3 ते अगर आंव अपनी सारी जैइदाद कंगालन देइं, या अपनो जिसम फुकनेरे लेई देइं, ते प्रेम न रेखी, त मीं किछ भी फेइदो नैइं। 4 प्रेम सबर केरने बालोए, ते रेंहम केरने बालोए; प्रेम जले न, अपनी बडीयाइ न केरे, ते फुले न। 5 तै अनरीति न चले, तै अपनी भलाइ न चाहे, झनझलाए न, बुरु न मन्ने। 6 कुकर्मए सैहीं खुश न भोहे, पण सचे सैहीं खुश भोते। 7 तै सब गल्लां झल्लते, सब गल्लां याद रखते, सब गल्लां केरी उमीद रखते, सब गल्लन मां सबर रखते। 8 प्रेम कधी न टले; भविषवैनी भॉन, त खतम, भोल्ही, बोली चेली गैनिन; ज्ञान भोए त मिटी गहनूए। 9 किजोकी इशू ज्ञान अधूरुए, ते इशी भविषवाणी अधीए। 10 पण जैखन सिद्ध एजेलो, ते अधूरु मिटी गहनूए। 11 जैखन आंव बचो थू, त बचां केरो जेरो जोतो थू, बचां केरो जेरो मन थू बचां केरी समझ थी; पण हुनी सीयानो भोवरोइं, ते बचां केरी गल्लां शैरी। 12 हुनी असन शीशे मां आँधरु लेइहोते; पण तैस बेले आमने सामने लामेले, इस बेले मेरु ज्ञान अधूरुए; पण तैस बेले रोडे चारे पिशैनेलो, जैचरे आंव पिशानोरोइं। 13 पण विश्वास, उमीद, प्रेम इनाँ ट्लाई ए रहतन, पण इन मैरां बडो प्रेमे।

भविषवाणी ते होरी होरी बोली

14 प्रेमेरे बतां चला, ते आत्मिक वरदानां केरी इछा रखा, खास केरतां इन, कि भविषवाणी केरा। 2 किजोकी, जै होरी बोली मां केरे; तै मैन्हन सैहीं नैइं, बल्कि परमेशरे सैहीं गल्लां केरते; ऐलहेरे लेई की तैसेरी कोई न समझे; किजोकी तै भेदेरी गल्लां आत्माइ मां भोइतां जोते। 3 पण जै भविषवाणी केरते, तै मैन्हन नसिहत, ते उपदेश, ते तसेलारी गल्लां जोते। 4 जै होरी होरी बोली मां जोते, तै अपनी तरकी केरते; पण जै भविषवाणी केरते, तै कलीसियारी तरकी केरते। 5 आंव चाताइं, कि तुस होरी होरी बोली मां गल्लां केरा, पण जादे इन चाताइं कि भविषवाणी केरा: किजोकी अगर होरी होरी बोली जोने बालो कलीसियारे तरेकरा लेई तरजमो न केरे त भविषवाणी केरने बालो तैस कैरां बेइताए। 6 ऐलहेरे लेई हे ढलाव, अगर आंव तुस्न कां एइतां होरी होरी बोली मां गल्लां केरी, ते प्रकाश, ते ज्ञान, या भविषवाणी, या तालीमरी गल्लां न जोई, त मीं कैरां तुस्न कुन फेइदो भोल्हो? 7 एँचरे अगर बेजान चीजा भी, जैन मैरां आवाज निसतीए जैचरे बेइषोइ, या बीन, अगर तैन केरे सुरन मां फर्क न भोए, त जैन बजाव गहते, तै केंचरे पिशानी गालहू? 8 ते अगर नइशिनेरी आवाज साफ न भोए, त लइइअरे लेई कौन तयारी केरहेलो? 9 एँचरे तुस भी अगर तुस भी जबाणी सैहीं साफ साफ गल्लां न केरथ, ते जैन किछ जोव गहते तैन केंचरे समझू गहलू? तुस त हवाइ सैहीं गल्लां केरने बाले भोए। 10 संसारे मां केत्री बोली कि न भोण, पण तैन मैरां कोई भी बेफैदी न भोल्ही। 11 ऐलहेरे लेई आंव काँची बोलारो मतलब न सैमझी, ते जोने बालेरे लेई परदेशी; ते जोने बालो मेरे लेई परदेशीए। 12 ऐलहेरे लेई तुस भी जैखन आत्मिक

वरदाना केरी धुनी मां भोथ, त एरु केरा, कि तुशे वरदानेरे तरकी सैहीं कलीसियारी तरकी भोए।

13 एँचरे जै होरी बोली जोते, तै प्रार्थना केरे, कि तैसेरो तर्जमो भी केरी बटे। 14 अगर आंव होरी बोली मां प्रार्थना केरी, त मेरी आत्मा प्रार्थना केरतीए, पण मेरी अक्क कम न दे। 15 कुन केरनू ठीके, आंव आत्मा सैहीं भी प्रार्थना केरेलो, ते अकली सैहीं भी प्रार्थना केरहेलो; आंव आत्माइ मां गीत जोइएलो, ते अकली मां भी। 16 नैइं त अगर तू आत्माइ सैहीं शुक्र केरेलो, त फिरी अजानी तेरे शुक्र पुड़ आमीन केंचरे केरहेलो? ऐलहेरेलेइ कि तै त न जाने, कि तू कुन जोतस? 17 तू त रोडे चारे शुक्र केरतस, पण होरेरे तरकी न भोए। 18 आंव अपने परमेशरेरु शुक्र केरताइं, कि आंव तुस्न सैभन कैरां जादे होरी होरी बोली केरताइं। 19 पण कलीसिया मां दश हज़ार गल्लां केरे जोनेरे केरतां इन मीं होरु भी रोडू लगते, कि होर्न शिखालनेरे लेई अकली सैहीं पंचे गल्लां जोइं।

20 हे ढलाव, तुस समझी मां बचे न बना: फिरी भी बुरैइ मां बचे बना। 21 व्यवस्था मां लिखोरुए, कि प्रभु जोते; आंव होरी बोली जोने सैहीं, ते होरी ऐशी सैहीं इन लोकन सैहीं गल्लां केरेलो फिरी भी तैना मेरी न शुनेले। 22 ऐलहेरे लेई होरी होरी बोली विषवैसी केरे लेई नैइं, बल्कि अविशवैसी केरे लेई निशाने, ते भविषवाणी अविशवैसी केरे लेई नैइं विशवैसी केरे लेई निशाने। 23 ते अगर कलीसिया एकी ठैरी अकोठी भोए, ते सब होरी होरी बोली जोन, ते कोई अनपड़ या अविशवासी लोक अन्तर एजन ते कुन तैनां तुस्न पागल न जोल्हे। 24 ते अगर सब भविषवाणी केरन, ते कोई अनपड़ या अविशवासी लोक अन्तर एजन ते सब तैस दोशी ठैराले ते परखेले। 25 ते तैसेरे मनरे भेध भांदे भोई गाल्हे, ते तै करोड़ी उन्डे कैरां परमेशरे कां झुकेलो, ते मनेलो, कि परमेशर तुसन मांहे।

बरते मां अनुशासन

26 ऐलहेरे लेई हे ढलाव कुन केरनू रोडूए? जैखन तुस अकोठे भोतथ, त हर एकेरे मने मां भजन, या उपदेश, या होरी बोली, या प्रकाश, या होरी बोलारो मतलब जोनेरे लेई: सब किछ आत्मिक तरेकेरे लेई लोडे। 27 अगर होरी होरी बोली मां गल्लां केरनी भोण, त दुइय दुइय, या जादे भोण त ट्लाई ट्लाई जनेह बैरी बैरी सैहीं जोन, ते अक मैन्हू तैसेरो मतलब जोए। 28 पण अगर मतलब जोने बालो न भोए, ते होरी होरी बोली बालो चुप राहे, ते अपने मने सैहीं, ते परमेशरे सैहीं गल्लां केरे। 29 नेबन मैरां दुइय या ट्लाई जोन, या ते बाकी लोक तैन केरे वचन परखन। 30 पण अगर होरी पुड़ जै बिशोरुए, किछ ईश्वरी प्रकाश भोए, त पेहिलो चुप भोए। 31 किजोकी तुस सब अक अक भविषवाणी केरी बटतथ ताकि सब शिखन, ते सैभन शान्ति मैल्हे। 32 ते नेबी केरी आत्मा नेबी केरे वशे मांए। 33 किजोकी परमेशर गडबड केरने बालो नैइं, पण शान्ति देने बालोए; जैचरे पवित्र लोकां केरे कलीसियन मांए। 34 काँन्शां कलीसिया मां चुप रहन, किजोकी तैन गल्लां केरनेरो हुकम नैइं: जैचरे व्यवस्था मां लिखोरु भी आए। 35 ते अगर तैना किछ शिखनू चहन, घरे अपने अपने मुन्शन पुछन, किजोकी कलीसिया मां काँन्शां केरी जादे गल्लां केरनी शरमरी गल्ले। 36 कुन तुस मैरां परमेशरेरो वचन निसोरुए? या सिर्फ तुसन तगर पुजोरुए? 37 अगर कोई मैन्हू अपनो आप नबी समझे या आत्मिक मैन्हू समझे, त इन समझे, कि जैना गल्लां आंव तुस्न लिखताइं, कि तैना प्रभुएरे हुकमन। 38 पण अगर कोई न समझे, त न समझे।

39 ते ढलाव, भविषवाणी केरनेरे धुनी मां राथ ते होरी होरी बोली केरनेरे लेई न ठाका। 40 पण सैरी गल्लां रिती ते तरीके सैहीं की गहन।

मसीहेरु जींतू भॉनू

15 हे मेरे ढलाव, आंव तुस्न तैहे सुसमाचार शुनाताइं, जै तुसेइं मनोरु भी थू ते जैस मां तुस मजबूथ भी आथ। 2 तैसे सैहीं तुसन मुक्ति भी मैल्लतीए, अगर तैस सुसमाचारे जै मीं तुस्न शुनवरो थू याद रखतथ; न त तुशो विश्वास केरनो बे फेइदो भोव।

3 एँचरे मीं सैभना पेहिले तुस्न तैहे गल्ल पुजाइ, जै मीं काँ पुजोरी थी, कि पवित्र शास्त्रेरे मुताबिक यीशु मसीह इशे पापां केरे लेई मरो 4 ते दबो जेव; ते

पवित्र शास्त्रेरे मुताबिक टलेइयों दिहाड़े जीतो भोव | 5 ते कैफा ते बहरन लेइहोव | 6 फिरी पंच शौवन साथी लेइहोव, जैन मैरां हेजू बड़े जीतन ते किछ झुलोरेन | 7 फिरी याकूबे लेइहोव फिरी सैभी प्रेरतन लेइहोव | 8 ते सैभन कैरां पत्ती मीं भी लेइहोव, कि मना अधूरे दिहाड़न मां जरमोरोई | 9 किजोकी आंव प्रेरतन मैरां सैभना निकोडोइ, बल्कि प्रेरत ज़वानेरे काबिल भी नैइं, किजोकी मीं परमेशरेरी कलीसिया सतवरी थी | 10 पण आंव जै किछ भी आइं, परमेशरेरे अनुग्रह सैहीं आहीं: ते तैसेरो अनुग्रह जै मीं पुड़ भोव, तै एरो न भोव पण मीं तैन सैभन कैरां बेद्धतां मेहनत भी की: फिरी भी इन मेरे तरफां न भोव पण परमेशरेरो अनुग्रह मीं पुड़ थू | 11 ते चाहे आंव भोइ, चाए तैना भॉन, अस इहे प्रचार केरतम, ते इसे पुड़ तुसेइं भी विश्वास केरो |

इशू जीतू भॉनू

12 ते जैखन मसीहेरो ई प्रचार कीयो गहते, कि तै मुड़दन मैरां जीतो भोव, ते तुस्न मैरां केतरे किजो ज़ोतन, कि फटरां केरी कयामत अथी नैइं ? 13 अगर फटोरां केरी कयामत नैइं, ते फिरी मसीह भी नैइं जीतो भोवरो | 14 ते अगर मसीह भी नैइं जीतो भोवरो, त फिरी इषो प्रचार केरनो भी बे फेइदोए; ते तुशो विश्वास केरनो भी बे फेइदोए | 15 बल्कि कि अस परमेशरेरे झुठे गुवाह भोए; किजोकी असेइं परमेशरेरे बारे मां ई गुवाही दितोरीए, कि तैन मसीह जीतो केरोए अगर नैइं जीतो केरोए, अगर मुड़दे जीते न भोण | 16 ते अगर मुड़दे जीते न भोण, ते फिरी मसीह भी नैइं जीतो भोवरो | 17 ते अगर मसीह नैइं जीतो भोवरो, ते तुशो विश्वास भी बे फेइदोए, ते तुस हेजू तगर अपने पापन मां फंसोरेथ | 18 बल्कि जैना मसीह मां झुलोरेन, तैना भी नाश भोए | 19 अगर अस सिर्फ इस जिन्दगी मां मसीह कैरां उमीद रखतम ते फिरी अस सैभी मैन्हन कैरां नुभागम |

20 पण सचे मसीह मुड़दन मैरां जीतो भोवरोए, ते जैना झुलोरेन, तैन मां पेहिले फल भोए | 21 किजोकी जैखन मैन्हरे ज़िरीये सैहीं मौत आई; मैनेरे ज़िरीये फटरां केरी कयामत भी आई | 22 ते जैचरे आदमे मां सब मरतन, तैचरे मसीह मां जीते भोतन | 23 पण हर केचरी एपनी एपनी बैरी सैहीं; पण पेहिलो फल मसीह; फिरी तैसेरे लोक | 24 ऐसेरां पत्ती अन्त भोणोए; तैस बेले तै सारी हकोमत ते सारो आधिकार ते समर्थरो अन्त केरतां बादशाही परमेशर बाजी केरे हथे मां सॉफेलो | 25 किजोकी जैखन तगर कि तै अपने दुशमन अपने पवन हैठ न केरे, तां तगर तैसेरी बादशाही केरनी जरूरीए | 26 सैभना आखरी जै दुशमन नाश भोणोए तै मौते | 27 किजोकी परमेशरे सब किछ तैसेरे पवन हैठ केरूए, पण जैखन तै ज़ोते कि सब किछ तैसेरे आधीन केरूए, तै एपू अलग राव | 28 ते जैखन सब किछ तैसेरे आधीन भोलू, ते मडू एपू भी तैसेरे आधीन भोलू जैने सब किछ तैसेरे आधीन केरू; ताकि सैभन मां परमेशर सब किछ भोए |

29 जै त जैना लोक फटरां केरे लेई बपतिस्मो नेतन, तैना कुन केरहेले? अगर मुड़दे जीते न भोण ते फिरी तैन केरे लेई किजो बपतिस्मो नेतन? 30 ते अस भी किजो हर बेले मुश्कली मां रहतम? 31 हे दूलाअव, मीं तैस धुमणडेरी कसम जैन आंव यीशु मसीह मां तुशे बारे मां केरताइं, कि आंव रोज मरताइं | 32 अगर आंव मैन्हू केरी रीति पुड़ इफिसुसे मां जंगली जनवरन सैहीं लडो, ते मीं कुन पैइदो भोव? अगर मुड़दे जीते न कीये गहन, ते एजा, खाम पीम, किजोकी कालां त मरनूए | 33 धोखो न खात, बूरी संगती रोड़े चाल चलने बगाड़तीए | 34 धारमिकतरे तेई उठा ते पाप न केरा; किजोकी केतरे एरेन जैना परमेशरे न ज़ान्न, आंव तुस्न छिथनेरे लेई इन ज़ोतां |

जीते भॉनेरो जिस्म

35 हुनी कोई इन ज़ोल्हो, कि मुड़दे केचरे जीते भोतन, ते केरहे जिसमे मां एइतन? 36 हे बे समझाव, जैन किछ बेइव गहते, ज़ां तगर न मरे, तां तगर जीतू न भोए | 37 ते जैन तू बेतस, ई तै जिसम नैइं जै तू बेतस तै पैइदा भोणे बालो नैइं, पण मिटने बालोए, चाहे गंव केरो, चाहे कोंची होरी अनेरो | 38 पण परमेशर तैस एपनी मेरज़रे मुताबिक जिसम देते; ते हर एकी बीजे अक खास जिसम | 39 सब जिम अकां जेरे नैइं, पण मैन्हू केरो जिसम होरोए; चलोडू केरो जिसम होरे, मछली केरो जिसम होरोए | 40 स्वर्गीये जिसमे, ते ज़मीनी

जिसम भीए: पण स्वर्गी जिसम दुइयां केरे जलाल होरु होरु जेरूए | 41 ते दिहाड़ेरु जलाल होरूए, चैदनरु जलाल होरूए, ते तारां केरु जलाल होरूए, (किजोकी तारे तारेरे जलाले मां फर्कए) |

42 मुड़दां केरु जीतू भोणू भी एरू ए | जिसम नाश भोणेरे हालती मां बेव गहते, ते अवनाशी रूप मां उठते | 43 तै बगैर अदरी सैहीं बेव गहते, ते बड़े जलाले सैहीं साथी जीतो भोते; कमज़ोरी सैहीं बेव गहते; ते कुदरुति सैहीं जीतो भोते | 44 आम जिसम बेव गहते, ते आत्मिक जिसम जीतो भोते: अगर आम जिसमे ते आत्मिक जिसम भी आह | 45 एरू लिखोरूए, कि पेहीलो मैन्हू, मतलब अदम, जीतो प्राणी बनो, त आखरी आदम, जिन्दगी देने बालो आत्मा बनो | 46 पण पेहिलो आत्मिक न थू, पण आम थीयो, ऐसेरां पत्ती आत्मिक भोव | 47 पेहिलो मैन्हू ज़मीनरो मतलबी मितरो थू, तैचरे होरे मैन्हू सुवर्ग एरोए | 48 जैचरे तै मितरो थू तैचरे होरे भी मितरे आन; ते जैचरे तै सुवर्ग एरोए तैचरे होरे भी सुवर्गरेन | 49 ते जैचरे असेइं तैसेरु रूप जै मितारो थु धारण कीव, तैचरे तैस जै स्वर्गएरोए तैसेरु रूप धारण केरेमेले |

50 हे दूलाअव, आंव इन ज़ोताइं कि मास ते लेव्ह परमेशरेरे राजेरे अधिकारी न भोइ बटे, ते न नाश भोणे बालू न नाशभोणे बालेरु अधिकारी भोइ बटे | 51 हेरा, आंव तुसन सैहीं भेदेरी गल्ल ज़ोताइं: अस सब त नैइं झुलने, पण सब बदलनेम | 52 ते इन एकी पले मां, चिप केरते नडशिगो बज़ाते भोणूए: किजोकी नडशिगो बज़ाव गहलो ते मुड़दे अवनाशी हालती मां जीते कीये गानेन, ते अस बदलनेम | 53 किजोकी जरूरीए, कि ई नाश भोणे बालो जिसम न नाश भोणे बाले जिसमे लाए, ते ई मरने बालो जिसम अमरते लाए | 54 ते जैखन ई नाश भोणे बालो न नाश भोणे बाले मां लहलो, ते ई मरने बालो अमरते लाल्हो, ताँ तगर जै वचन लिखोरूए, पूरु भोलो, कि जीतां मौत निगली |

55 हे मौत तेरी जीत कोइही राई? 56 हे मौत तेरो डस कोइही राव? तेरो डस पापे; ते पापेरी ताकत व्यवस्थाए | 57 पण परमेशरेरु शुक्र भोए, जै इशे प्रभु यीशुएरे ज़िरीये जीताते | 58 हे मेरे दलारे डूलाअव, मजबूत ते अटल राथ, ते प्रभुएरे कम्मे मां सदा बदधते राथ, किजोकी इन ज़ानतथ, कि प्रभु मां तुशी महेनत बे फेइदी नैइं | |

विशैसी केरे लेई दान

16 हुनी तैस चन्देरे बारे मां जै पवित्र लोकां केरे लेई कीव गहते, जैचरे मीं गलतियारे कलीसियान हुकम दितो, तैचरे तुस भी केरा | 2 हफतेरे पेइहीले दिहाड़े तुस्न मैरां हर कोई अपने आमदनेरे मुताबिक किछ एपू कां रखा, कि मेरे एजने पुड़ चन्दो अकोठो न केरनो पे | 3 ते जैखन आंव एजी, ते जैन तुस चहले, तैन चिठी देइतां भेइलो, कि तुशू दान यरुशलमे मां पुजान | 4 ते अगर मेरु भी गहनू जरूरी भोव, ते तैना मीं सैहीं साथी गहले |

पौलुसेरो सफरेरे बारे मां कार्यक्रम

5 ते आंव मकिदनिया मैइं भोइतां तुस्न कां एजेहलो किजोकी मीं मकिदनिया मैइं त गहनूए | 6 पण जरूरे कि तुस्न कां बिशी ते हिवतडो तुस्न कां केटी, तैन जैरां मीं गहनू भोलू, तैरां मीं पुजाथ | 7 किजोकी आंव हुना बती मां तुस्न सैहीं मुलाकात न केरनी न चैहीं; पण उमीदे, कि अगर प्रभु चाहे त किछ बेले तगर तुस्न सैहीं साथी रेइहेलो | 8 पण आंव पेन्तिकुसते तगर इफिसुस मां रानोइं | 9 किजोकी मेरे लेई अक बडी ते जरूरी बत खुलोरीए, नफरत केरने बाले बडेन |

10 अगर तीमुथियुस आव, त हेरथ, कि तै तुशे ऐडी नडर राहे; किजोकी तै मेरो जेरो प्रभुएरु कम्म केरते | 11 ऐलहेरे लेई कोई तैस घटिया न समझे, पण खुशी सैहीं तैस इरां पुजेइथ; कि मीं कां एजे; किजोकी आंव तैस लवरोइं बलगने, कि तै डूलान सैहीं साथी एजे | 12 ते दूला अपुल्लोसे सैहीं मीं बडी बिनती की कि तुस्न कां डूलान साथी गाहे; पण तैनी इस बेले गहनू न चाव, पण जैखन तैस फुरसत भोलही, तैखन एजेलो |

आखरी आदेश ते अबिबादन

13 बीझे राथ, विशवास मां मजबूत राथ, हिमत रखा, मजबूत भोथ | 14 जैन किछ केरतथ प्रेमे सैहीं केरा |

15 हे दूलाअव, तुस सितफनासेरे खानदाने ज्ञानतथ, कि तैना अखयारे पेइहिले फलन, ते पवित्र लोकाँ केरी सेवारे लेई तियार रातन | 16 आंव तुस्न कां बिनती केरताइं कि एरे लोकां केरे अधीन राथ, बल्कि कि जैना इस कम्मे मां मैनतीन ते मदद केरनेबालेन | 17 ते अस सितफनास ते फूरतूनातुस ते

अखइकुसेरे एजने सैहीं खूशइ, किजोकी तैनेइं तुशी घटी पूरी केरीए | 18 ते तैनेइं मेरी ते तुशी आत्मान चेन दितोरोए ऐलहेरे लेई एरहन मना |

19 आसियारी कलीसियां केरे तरफां तुस्न नमशकार; अकिवला ते प्रिसकारे तरफां तैन केरे घरे कलीसियाइ भी तुसन प्रभु मां हछू हछू नमशकार | 20 सैभी दूलाअन, तुस्न नमशकार: पिवत्र फुमड़ी सैहीं एपू मां मेंहीं नमशकार केरा |

21 मेरू पौलुसेरू हथेरू लिखेरू नमशकार: अगर कोई प्रभु सैहीं प्रेम न रखे तै लानती भोए | 22 इषो प्रभुएजने बालोए | 23 प्रभु यीशुएरो अनुग्रह तुस पुड़ भोतो राहे | 24 मेरो प्रेम यीशु मसीह मां तुस्न सैहीं राहे | आमीन |

2 कुरिन्थियों

अभिवादन

1 पौलुसेरे तरफाँ जै परमेशरे मेरजी सैहीं यीशु मसीहेरो प्रेरिते, ते ते दूला तीमुथियुसेरु भोंतू परमेशरेरी तैस कलीसियारे नोंवें जै कुरिन्थुस मांए; ते सारे अखयारे सब पवित्र लोकाँ करे नोंवें। 2 इशे बाजी परमेशर ते प्रभु यीशु मसीहेरे तरफाँ तुसन अनुग्रह ते शान्ति मैलहती राहे।

परमेशरेरु शुक्र केरनू

3 इशे प्रभु यीशु मसीहेरे परमेशर, ते बाजी केरु शुक्र भोए, जै रैमेरो बाजीए, ते हर किसमेरे शैनतरो परमेशर ए। 4 तै इशे सैभी दुखन मां असन शान्ति देते; ताकि अस भी तैस शैनती सैहीं जै परमेशर देते, तैन भी शान्ति देई बटम, जैना कोंची वजाही सैहीं दुखे मान। 5 किजोकी जैचरे मसीहेरे दुःख असन जादे भोतन, तैचरे इशी शान्ति भी मसीहेरे ज़िरीये जादे भोतीए। 6 अगर अस दुःख झैलतम, ते ई तुशे शैनतरे ते तुशे मुक्करे लेइ ए ते अगर असन शान्ति मैती ए, ते इन तुशे शैनतरे लेइ; जैसेरे असरे सैहीं तुस सबरी सैहीं तुस तैना दुखन झलततथ, जैना अस भी झलततथ। 7 ते इशी उमीद तुशे बारे मां मज़बूते; किजोकी अस ज्ञानतम, कि जेरे दुःख तुसन्न आन तेरी शान्तिरे भी हकदारथ।

8 हे दूलाअव, अस न चहम कि तुस इशे तैस दुखे केरां बे फिकर राथ, जै आसिया मां असन पुड़ आव, कि एरहो भारी बोझ असन पुड़ अवरो थू, जै इशी ताकती केरां बेईर थू, इडी तगर कि अस मेरी जेवरे थी। 9 बल्कि कि असेई अपने मने मां समझो थू, कि असन पुड़ मौतरो हुकम भोई जेवरो थू कि अस अपनो भरोसो न रखम, बल्कि परमेशरेरो जै मुडदन ज़ीतो करते। 10 तैने अस इतरे बडे मौती केरां बचाए, ते बचालो; ते तैस केरां इशी ई उमीदे, कि तै अगरोवं भी बचालो। 11 तुस भी मिलताँ प्रथनाई सैहीं इशी मद्द करेले, कि जैना वरदान असन बड़ाँ करे ज़िरीये मैल्लाँ, तैसेरे बडे लोक इशु भोंतू शुक्र केरन।

पौलुसेरो सफरेरे बारे मां खियाल बेदलोते

12 किजोकी अस अपने इस जमीरेरे गुवैही पुड़ घुमण्ड केरतम, संसारे मां खास केरताँ तुसन मां इषो चाल चलन परमेशरे लायिक ते पवितैई ते सचैई सैहीं थू, जै जिसमेरे ज्ञाने सैहीं नैइं, बल्कि परमेशरेरे अनुग्रह सैहीं साथी थू। 13 अस तुसन होरु किछ न लिखम, सिर्फ जैन पडतथ या मनतथ भी, मी उमीदए, कि अखीरी तगर मनते भी राले। 14 जैचरे तुसन मैराँ केत्रेई मनोरु भीए, कि अस तुशे धुमण्डेरी वजाम; तैचरे तुस भी प्रभु यीशु एरे दिहाडे इशे लेइ घमण्डेरी वजा भोल्हे।

15 ते इस भोरसे सैहीं आंव चहतो थू कि पेहिलो तुसन काँ एजी; कि तुसन अक दान मैल्हे। 16 ते तुसन मैई निसताँ मकिदुनिया गेई ते फिरी मकिदूनयाराँ तुसन काँ एजी, ते तुस मी यहूदियाएरे पासे किछ चिरेरे लेइ पुजाथ। 17 एलहेरे लेई मी जैने ई इछा कीयोरी थी कुन मी ठाठ हिराई? या जैन केरनू चाताई कुन जिसमेरे मुताबिक केरनू चाताई, कि आंव गल्ली मां हां, हां भी केरी; नैइं, नैइं भी केरी? 18 परमेशर सचो गुवाह ए, कि इशे तैस वचनए मां जै तुसन सैहीं ज़ोव हां ते नैइं दुय्ये नैइं। 19 किजोकी परमेशरेरु मड्डु यीशु मसीह जैसेरो इशे ज़िरीये मतलब मेरे ते सिलवानुस ते तीमुथियुसेरे ज़िरीये तुसन मां प्रचार भोव; तैस हां ते नैइं दुय्ये न थी; पण, तैस हां भोई। 20 किजोकी परमेशरेरे जेरे वाइदेन, तैसे मां हांए सैहीं आन: एलहेरे लेइ तैसेरे

ज़िरीये आमीन भी भोई, कि इशे ज़िरीये परमेशरेरी महिमा भोए। 21 ते जै असन तुसन सैहीं साथी मसीह मां मज़बूत केरते, ते जैना असन अभीशेख केरुए तैए परमेशरे। 22 जैने असन पुड़ छाप भी की ते साथी आत्मा इशे मने मां दिती।

23 आंव परमेशरेरु शुक्र केरताई, कि आंव हुना तगर कुरिन्थुस मां एलहेरे लेइ नैइं अवरो, कि मी तुसन पुड़ कियास एइतो थू। इन नैइं, कि अस विशवासेरे बारे मां तुसन पुड़ बादशाही केरनी चातम; पण तुसन मां मद्दगारे किजोकी तुस विश्वासे सैहीं मज़बूत रहतथ। 24 इन नैइं, कि अस विशवासेरे बारे मां तुसन पुड़ बादशाही केरनी चहतम; पण तुसन मां मद्दगारे किजोकी तुस विश्वासे सैहीं मज़बूत रातथ।

2 मी अपने मने मां इन थापेरु थऊं कि फिरी तुसन कां उदास भोइताँ न एजी। 2 किजोकी अगर आंव तुसन उदास केरी, त मी आनन्द देने बालो कौन भोल्हो, सिर्फ तैए जै मी उदास केरो ए? 3 ते मी इही गल्ल तुसन एलहेरे लेइ लिखी, कि एरु न भोए, कि मेरु एजने पुड़ जैन सैहीं आनन्द मैल्होरो लोडतो थू, आंव तैन केरां उदास भोई; किजोकी मी तुसन सैभन पुड़ इस गल्लारो भरोसोए, कि जै मेरो आनन्द ए, तैए तुशो सैरी केरो भीए। 4 बडे दुःख, ते मनेरे कष्ट सैहीं, मी बड़ाँ एँखरण सैहीं तुसन लिखोरुए, एलहेरे लेइ नैइं, कि तुस उदास भोथ, पण एलहेरे लेइ कि तैस बडे प्रेम ए बुझतथ, जै मी तुसन सैहीं ए।

अपरैदी माफी

5 ते अगर कंचे उदास केरोए, त मी नैइं बल्कि (कि तैस सैहीं साथी बडी बडायाई न केरी) किछ किछ तुस सबी उदास केरथ। 6 एरे मैन्हेरे लेइ ई सज़ा जै दूला न मैराँ बडेई दिती, बडी ए। 7 एलहेरे लेइ इस केरां इन रोडूए कि तैसेरो पाप माफ केरा; ते तसल्ली देथ, एरु न भोए कि एरो मैन्हु उदैसी मां डुबे। 8 एलहेरे लेइ आंव तुसन काँ बिनती केरताई, कि तैस अपने प्रेमरु सबूत देथ। 9 किजोकी मी एलहेरे लेइ भी लिखोरु थू, कि तुसन पेरखी, कि सब गल्लाँ मन्नेरे लेइ तियारथ, कि नैइं। 10 जैस तुस माफ केरतथ तैस आंव भी माफ केरताइ, किजोकी मी भी जैन किछ माफ कीयोरो ए, अगर केरु भोए, त तुशे वजाही सैहीं मसीहेरे ठैरी भोइताँ केरुए। 11 कि शैतानेरो असन पुड़ दावो न चले, किजोकी अस तैसेरी चलैकन केरां अनजान नैइं।

त्रआसे मां पौलुसेरी बेदिली

12 ते जैखन आंव मसीहेरो सुसमाचार, शुनाने त्रआसे मां आव, ते प्रभुए मेरे लेइ अक बत खोल्ही। 13 त मेरे मने मां चैन न भोई, एलहेरे लेइ कि मेरु दूला तितुस तैडी न थू; ते तैन केरां अलग भोइताँ आंव मकिदुनिया जेव।

मसीह मां ज़ीत ते जोश

14 पण परमेशरेरु शुक्र भोए, जै मसीह मां सदा असन ज़ीतारे जोशे मां चलाते, ते अपने ज्ञानएरे मुशक इशे ज़िरीये हर ठैरी फेलाते। 15 किजोकी अस परमेशरे काँ मुक्ति मैल्हने बालां, ते नाश भोने बालन काँ, दुय्योँ केरे लेइ मसीहेरे मुशकम। 16 केत्राँ केरे लेइ त मरनेरे लेइ गन्दी, ते केत्राँ केरे लेइ जिदगरे लेइ रोडी मुशक, ते इन गल्लाँ केरे कबिल कौन ए? 17 किजोकी अस तैन केरे जेरे नैइं, जैना परमेशरेरे वचनए मां मल्लिवट केरतन; पण मनेरी सचैई सैहीं, ते परमेशरेरे तरफाँ परमेशर हाज़र सैमझताँ मसीह मां जोतम।

नोंवे वाइदे

3 कुन फिरी अस अपनी बडयाई करेने लगम? या असन केत्राँ केरी जेरी सुपारशारी चिठी तुसन भेझनी या नेनी? 2 इशी चिठी तुसेथ, जैना इशे दिले पुड लिखोरिथ, ते तैन सब भैन्हू पशानतन ते पडतन। 3 इन बाँदू, कि तुस मसीहेरी चिठीथ, जैना असेई सेवकाँ केरी जेरी लिखी; ते जैना शैई सैहीं नैइं, पण जीते परमेशरे आत्माई सैहीं घोड़ाँ केरे तेखती पुड नैइं, बल्कि कि दिलेरे मासेरे तेखती पुड लिखोरिन।

4 अस मसीहेरे जिरिये परमेशरे पुड एरो भरोसो रखतम। 5 इन नैइं, कि अस अपने आप सैहीं इस काबलम, कि एपू कोंची गल्ले बारे मां सोची बटम; पण इशी काबलीत परमेशरे कैरां ए। 6 जैनी अस नोंवे वाइदेरे सेवक भोनेरे काबिल भी कीये, लफज्ज न सैहीं सेवक नैइं बल्कि आत्मा सैहीं; किजोकी लफस मारते, ते लफस जीताते।

7 ते अगर मौतरो ई वाइदो जैसेरो लफस जमीनी पुड घड़ोरे थी, इडी तगर जलाली भोई, कि मूसेरे तुतरे पुड घटतू भी गहतू थू, इस्राएली तैसेरे तुतरेरां तेकी न थी बटते। 8 ते आत्मरो वाइदो होरो भी जलाली किना भोल्हो? 9 किजोकी दोषी ठैराने बालो वाइदो होरो भी जलाली किना भोए? 10 ते जै जलाली थू, तै तैस जलालेरे वजाही सैहीं जै तैस कैरां बेदताँ थू, किछ जलाली न ठेरो। 11 किजोकी जैखन तै जै घटतो रहतो थू जलाली थू, त तैन जै कायम रालू, होरू भी जलाली की न भोलहू?

12 एरही उमीद रेखतां दिलेरी सैहीं जौतम। 13 ते मूसेरे जेरे नैइं, जैने अपने तुतरे पुड पडदो रखोरो थू ताकि इस्राएली तैस घटिने बैली चीजी सैहीं अन्त न लहन। 14 किजोकी तैना मतिमन्द भोए, किजोकी अज तगर पुरानो नीयम पडते बार तैन केरे दिले पुड तैए पडदो रहते; पण तै मसीह मां उठते। 15 ते अज तगर जैखन भी मूसेरी किताबाँ पैडी गैतिन, ते तैन केरे दिले पुड सदा पडदो रहते। 16 पण जैखन भी तैण केरो दिल प्रभुएरे पासे फिरेलो, तैखन तै पडदो दूर भोल्हो। 17 प्रभु त आत्मा ए: ते जैडी भी प्रभुएरो आत्माए तैडी आज्ञादीए। 18 पण जैखन इशे सैभी केरे बगैर पडदे तुतरन सैहीं प्रभुएरू प्रकाश बाँदू भोते, जैचरे शीशे मां, ते प्रभुएरे जिरिये जै आत्मा ए, अस तैए जलाली रूपे मां थोडे बदलते रहतम।

मितारे भंडन मां धन

4 एलहेरे लेइ अगर असन पुड एरी दया भोई, कि असन ई सेवा मैल्ली, ते अस दिलेरी न शारम। 2 पण असेई शरमराँ छपोराँ कम्माँ शारोरन, ते न चलैकी सैहीं चलते, ते न परमेशरेरे वचन मां मलावट केरम, पण सचे बाँदे केरतम, परमेशरेरे सामने हर भैन्हूरे जमीरे मां अपनी भलाई बिषालतम। 3 पण अगर सुसमाचारे पुड पडदोए, त ई नाश भोने बालाँ केरे लेइए। 4 ते तैन विशवास न केरने बालाँ केरे लेइ, जैन केरे अकल इस संसारेरे इशवरे कानी कियोरी ए, ताकि मसीह जै परमेशरेरू रूपए, तैसेरो जलाली सुसमाचारेरी लो तैन पुड चमके। 5 किजोकी अस अपनो नैइं, बल्कि यीशु मसीहेरो प्रचार केरतम, कि तै प्रभुए; ते अपने बारे मां इन जौतम, कि अस यीशु मसीहेरे कारण तुशे सेवकम। 6 एलहेरे लेइ कि परमेशरे, जैने जौव, कि अन्धकारे मैराँ लोई मां चमका; ते तैए इशे दिलन मां चमको, कि परमेशरेरी महीमरी पिशान यीशु मसीहेरे तुतरे प्रकाशमान भोए।

7 पण असन काँ इन धन मितारे भाण्डन मां रखोरूए, कि ई अढंगी सामर्थ असन कैरां नैइं, बल्कि परमेशरेरे पासेरां ठेरी। 8 अस च़ेवरे पासना दुःख त झल्लतम, पण मुशकली मां न पेम; परेशान त भोतम, पण न उमीद न भोम। 9 सताए त गहतम; पण शारे न गहम, बछोडे त गहतम पण नाश न भोम। 10 अस यीशु मसीहेरी मौत अपनी जानी मां हर बेले चलतम; कि यीशु एरी जिन्दगी इशे जिसमे मां बाँदी भोए। 11 किजोकी अस जीतेजी सदा यीशुएरे वजाही सैहीं मौतरे हथन मां सॉफे गहतम कि यीशुएरी जिन्दगी भी इशे नाश भोने बाले जिसमे मां बाँदी भोए। 12 मौत त असन पुड अस्सर केतीए ते जिन्दगी तुसन पुड।

13 ते ऐल्हेरे लेइ कि असन मां तैए विशवासेरी आत्मा ए, (जैसेरे बारे मां लिखोरू ए, कि मी विशवास कीयो, ऐलहेरे लेइ मीं जौव) 14 किजोकी अस

जानतम, जैने प्रभु यीशु जीतो केरो, तैए असन भी यीशु मसीह मां हिसेदार सैमझताँ जीते केरहेलो, ते तुसन सैहीं साथी अपने सामने हाजर केरहेलो। 15 किजोकी सब चीजाँ तुशे लेइन, ताकि अनुग्रह बड़ाँ केरे जिरिये जादे भोइताँ परमेशरेरी महिमारे लेइ भी बधाए। 16 ऐलहेरे लेइ अस दिलेरी न शारम; अगर इशी बेइरी इनसानयत नाश भी भोए, फिरी भी इशी एनत्रीं इनसानयत पूरे दिहैडी नवई भोतीए। 17 किजोकी इषो एकी पलेरो थोडो जेरो दुःख अनन्त महीमा पैइदा केरते। 18 ते अस त लेवहरी चीजन नैइं पण अलेइ चीजन लाते रहतम, किजोकी लवरी चीजाँ थोडे दिहाड़ाँ केरे लेइअन, पण अलेइ चीजाँ सदा बेनी रैतिन।

इशू सुवर्ग एरू घर

5 किजोकी अस जानतम, कि जैखन इषो धेतली पडाँ उरो तरपालेरू घर बछोडू गहलू त असन परमेशरे पणफाँ स्वर्गए मां अक भवन मैलनोए, जै हथेरू नैइं बल्कि अबदीए। 2 इस मां अस कर लातम, ते बडू लालच केरतम; कि अपने स्वगेरे घर लाम। 3 कि इस लेइताँ अस नगे न राम। 4 ते अस इस डेरे मां रेइताँ भोजे सैहीं देबोइताँ कर लाते रातम; किजो अस खोल्लनू न चाम, बल्कि लानू चातम, ताकि जै मरने बालोए तै जिन्दगी मां डुबे। 5 ते जैने अस इस गल्लेरे लेइ तयार केरेम तै परमेशरे, जैने असन आत्मा भी दितो रीए।

6 अस सदा हिमत रखतम ते इन जानतम; कि जाँ तगर अस जिसमे मां रातम, ताँ तर प्रभु कैरां अलगम। 7 किजोकी अस रूपे हेरताँ नैइं, विशवासे सैहीं चलतम। 8 ऐलहेरे लेइ अस हिमत केरते रातम, ते जिसमे कैरां अलग भोइताँ प्रभु साथी रानू जादे समझतम। 9 ऐलहेरे लेइ मनेरी उमंग ईए, कि चाए साथी रहम, चाए अलग रहम पण अस तैस मसन्द एइते रहम। 10 किजोकी जरूरीए, कि इषो सैभी केरो हाल मसीहेरे तखतेरे सामने खुल्ले, कि हर कोन्ची भैन्हू अपने रोडाँ बूराँ कम्माँ केरो बदलो मैल्ले जैना तैने जिसमें सैहीं कियोरण।

मसीह मां नोंवी सृष्टि

11 अस प्रभुएरो डर मेन्नाताँ अस लोकन समझातम ते परमेशरे पड इषो हाल बाँदोए; ते मेरी उमीद ईए, कि तुशे जमीरे पुड भी बाँदो भोवरो भोल्ही। 12 अस फिरी भी अपनी बडयाई तुशे सामने न केरम बल्कि अस अपने बारे मां तुसन घुमण्ड केरनेरो मोको देतम, कि तुस तैन जुवाब देई बटतथ, जैन मने पुड नैइं, बल्कि दिखवटी ग्लन पुड घुमण्ड केरतन। 13 अगर अस बे खुदम, त परमेशरे रे लेइ; ते अगर पणेजगाम त तुशे लेइ। 14 किजोकी मसीहेरो प्रेम असन मजबूर केरते; ऐलहेरे लेइ कि अस इन समझतम कि जैखन अक सैभी केरे लेइ मरो त सब मरे। 15 ते तै इस ऐन्चे सैभी केरे लेइ मरो, कि जैना जीतेन, तैना अगरोवं जो अपने लेइ न जीन पण तैसेरे लेइ जै तैन केरे लेइ मरो ते फिरी जीतो भोव। 16 ते अजरे पत्ती अस कोन्ची जिसमे मुताबिक न समझाम, ते अगर असेई भी मसीह जिसमेरे जानोरो थू फिरी भी अजरे पत्तीएरे न जानम। 17 ते अगर कोई मसीह मांए त तै नवी सृष्टीए: पुरेनी गल्लाँ बीती जेई; हरा, तैना सब नेवी भोवई जेई। 18 ते सब गल्लाँ परमेशरे ते तरफन, जैने मसीहेरे जिरिये सैहीं इषो मेलमलाप केरो कि सेवा असन दिती। 19 मलब परमेशरे मसीह मां भोइताँ एपू सैहीं साथी संसारेरो मेल मिलाप केरो, ते तैन केरी पापाँ केरो दोष तैन पुड न लव, ते तैने मेल मलापेरो वचन असन दितोरोए।

20 अस मसीहेरे राजदूतम; मन्ना कि परमेशरे इशे जिरिये समझाते: अस मसीहेरे तरफाँ बिनती केरतम, कि परमेशरे सैहीं साथी मेल मिलाप केरा। 21 जै पापे कैरां अनजान थू, तैए तैने इशे लेइ पापी ठैराव, कि अस तैस भोइताँ परमेशरेरी धार्मिकता बनम।

6 ते अस जैना तैसेरे मद्द करेने बालेम, कि परमेशरेरो अनुग्रह जै तुसन पुड भोव, बे फैइदो न राने देथ। 2 किजोकी तै त जौते, कि अपनी खुशी सैहीं सबरी मां मीं शुनी, ते मुक्करे दिहाडे मीं तेरी मद्द की: हरा, हुना तै खुशारो बेलोए; हरा, हुना तै मुक्करी दिहाडीए। 3 अस कोन्ची भी गल्ली मां काई भी मोको न देम, कि इशी सेवाई पुड काई दोष लाए। 4 पण हर गल्ली

सैहीं परमेशररे सेवकाँ करे जेरे अपने गुन्न बाँदे केरतम, बडे सबरी सैहीं, दुःख सैहीं, शारे गहने मां, मुकललन सैहीं। 5 कोड़े खाने सैहीं, कैद भोने सैहीं, हैल्लन सैहीं महैनती सैहीं बीजे बिषने सैहीं, बरत रखने सैहीं। 6 पवित्रतैई सैहीं, ज्ञाने सैहीं, सबरी सैहीं, दयाई सैहीं, पवित्र आत्मा सैहीं। 7 सचे प्रेमे सैहीं, सचे वचने सैहीं, परमेशररे समर्थी सैहीं; धार्मिकतारे हथयारन सैहीं देइने खिछडेन। 8 इजती ते बेइजती सैहीं, रोड़े नोंवें ते बुरे सैहीं, अगर गुमरा करने बालाँ करे जेरे बुझतम फिरी भी सचेम। 9 अनजाना करे जेरेम; फिरी भी मुशूरम, मरने बालाँ करे जेरेम पण हेरा जीतेम, मार खाने बालाँ करे जेरेम, पण जानी सैहीं न मैरोम। 10 दुःख करने बालाँ करे जेरेम, पण सदा आनन्द केरतम, कंगालाँ करे जेरेम, पण बडन धनी केरतम; एरेम कि असन काँ किछ भी नैइं फिरी भी सब किछ रखतम।

11 हे कुरिन्थियाँ मां रहने बालव, असेई तुसन सैहीं खुलताँ गल्लाँ केरी, इशे दिल तुशे लेई खुलेन। 12 तुशे लेइ इशे मने मां किछ तंगी नैइं, पण तुशे मन्न मां तंगीए। 13 पण आंव बचे सेमझताँ तुसन सैहीं जोताई, कि तुस भी तैसेरे बदले मां अपने मन खोला।

बुरे लोकन सैहीं शामिल नैइं भोन्नू

14 अविशवैशी करे संगती मां न गाथ, किजोकी धर्निकता ते अधर्मएरो कुन मेल जोल? या लो ते आँधारेरो कुन नातो? 15 ते मसीहेरी बलयाले सैहीं कुन लगाव ? या विश्वास करेने बालेरो विश्वास न करेने बाले सैहीं कुन तालमेल। 16 ते मूरती सैहीं परमेशररे मन्दरेरो कुन रिशतो? किजोकी अस त जीते परमेशरराँ मन्दरम; जैन्चे परमेशरे जाँव कि आंव तैन मां बेसेलो ते तैन मां चल्लो फिरेलो; ते आंव तैन केरो परमेशर भोनोई, ते तैना मेरे लोक भोले। 17 ऐलहेरे लेइ प्रभु जोते, कि तैन मराँ निसा ते अलग राथ, ते गेंदी चीजा सैहीं न हुरा, ते आंव तुसन कबूल केरेलो। 18 ते तुशे बाजी भोइलो, ते तुस मेराँ मड्डाँ ते कुय्याँ भोल्हाँ: ई सर्वशक्तिमान प्रभु परमेशररे वचने।

7 ते हे दलाराव इना वाइदे अगर असन मल्लोरेन, ते एजा, अस अपने आपेरी जिसमेरी ते आत्मारी सब गंदगी साफ केरम, ते परमेशररे डर मनेते पवित्रता सिध केरम।

पौलुसेरो आनन्द

2 असन अपने मने मां ठार देथ: असेई न केन्ची सैहीं बे इनसाफी कियोरीए, न केन्चेरु किछ बिगाड़ेरुए, ते न कोई ठगोरोए। 3 आंव तुसन बनानेरे लेइ इन नैइं लवरो जोने: किजोकी मीं इन पेइलू जावरुए, कि तुस इशे मने मांएरे बसोरेथ कि अस तुसन साथी मरने जीनेरे लेइ तयारम। 4 आंव तुसन सैहीं बडे दिलेरी सैहीं जोने लवरोई, मीं तुसन पुड़ बडू घमण्डे: आंव शेनति सैहीं भेरी जेवरोई; अपने सारे दुखन मां आंव आनन्दे सैहीं भरोरो राताई।

5 किजोकी जैखन अस मकिदुनिया मां आए, तैखन भी इशे जिसमे चैन न भोई, पण अस चेवरे पासना दुःख झल्लेते राहे, बेइर लड़ेई थी, अन्तर बडी बडी गल्लाँ थी। 6 फिरी भी कमजोरन शान्ति देने बाले परमेशरे तितुसे एजने सैहीं असन शानति दिती। 7 ते न सिर्फ तैसेरे एजने सैहीं पण तैसेरी तैस शैनति सैहीं, जै तैस तुसन कैराँ मैलती थी, ते तुशे दुःख ते मेरे लेइ तुशी धुनरी खबर असन शुनाई, जैस सैहीं होरो भी आनन्द भोव। 8 किजोकी अगर मीं अपनी चिड्डी सैहीं तुस दुखी कीये, पण तैस कैराँ पसतेई न जैन्चे पेहिलो पसतातो थू किजोकी आंव हेरताई, तैस चिड्डी सैहीं तुसन दुःख त भोव पण थोड़े चीरे लेइ थू। 9 हुनी आंव खुशई पण ऐलहेरे लेइ कि तुसन दुःख पुजो बल्कि ऐलहेरे लेइ कि तैए दुखे सैहीं तुसेई मन फिराव, किजोकी तुशो दुःख परमेशररे मेर्जई सैहीं थू, कि इशे पासराँ तुसन कोई नुकसान न पुजे। 10 किजोकी परमेशररे भगतरो दुःख एरी तोबा पैइदा केरत जैस सैहीं मुक्ति मैलती ए, फिरी तैस सैहीं पसतानू न पे: पण संसरेरो दुःख मौत पैइदा केरते। 11 ते हेरा, इसे गल्ली सैहीं तुसन परमेशररे भगतरो दुःख भोव तुसन केत्री उलझन ते जोश, उजर, रुशे, ते डरे, ते लालच, मघन, ते बदलो नेनेरो खयाल पैदा भोव तुसेई सैभी तरीके सैहीं इन सिध कीव, कि तुस इस गल्ली मां बे कसूरथ। 12 फिरी मीं जैन तुसन कां लिखोरु थू, तैन न तैसेरे वजाही

सैहीं लिखू, जेने बे इनसाफी की, ते न तैसेरे वजाही सैहीं जैस सैहीं बेइनसाफी भोई, पण ऐलहेरे लेइ कि तुशी सरगरमी जै इशे लेइ ए, तै परमेशररे सामने तुसन पुड़ बाँदी भोए। 13 ऐलहेरे लेइ असन शान्ति मैली; ते इशी इस शान्ति सैहीं तितुसेरे आनन्द सैहीं होरी भी आनन्द भोव किजोकी तैसेरो मन तुशे कारण हरो भरोए। 14 किजोकी अगर मीं तैसेरे सामने तुशे बारे मां किछ घमण्ड हिराव, त छिथोव न, पण जैन्चे असेई तुसन सैहीं सब गल्लाँ सच सच जोवरी थी, तैन्चेरे इशू घमण्ड हिरानू तितुसेरे सामने भी सच निसू। 15 ते जैखन तैस तुशो सैभी केरु आधीकारी भोनु याद एइते; किजोकी तुसेई ते थरकते थरकते तैस सैहीं मुलाकात की; तैसेरो प्रेम तुशे पासराँ होरो भी बदतो गहते। 16 आंव खुश भोताई, कि तुसन कैराँ मीं हर गल्ली मां हिमत भोतीए।

उदारताई सैहीं दान देंनु

8 हुनी मेरे दलाव, अस तुसन परमेशररे अनुग्रहेरी खबर देतम, जै मकिदुनयारे कलीयान पुड़ भोवरोए। 2 कि मसिबती मां बडे अजइमैशी मां तैन करे बडे आनन्दे ते बेडी गरीबी बधने सैहीं मुक्ति बडी बधी। 3 ते तैन करे बारे मां मेरी ई गुवाहीए, कि अपनी समर्थरे मुताबिक बल्कि समर्थी कैराँ भी जादे मने सैहीं दितू। 4 ते इस दाने मां ते पवित्र लोकाँ करे सेवाई मां हिसेदार भोनेरे अनुग्रहेरे बारे मां असन सैहीं बार बार बडी बिनती की। 5 ते जैन्चेरे असेई उमीद कीयोरी थी, तैन्चेरे नैइं, बल्कि तैनेइं प्रभूए, फिरी परमेशररे मेरजी सैहीं असन भी अपनू जेरु दितू। 6 ऐलहेरे लेइ असेई तितुस समझव, कि जैन्चेरे तैने पेइलू शुरू कीयोरु थू, तैन्चेरे इस दानेरे कम्मे भी पूरु करे। 7 जैन्चेरे हर गल्ली मां मतलब विश्वासे मां, वचने मां, ज्ञाने ते सैभी किसमेरे कोशीशी मां, ते तैस प्रेमे मां, जै असन सैहीं रखतथ, तैन्चेरे इस दानेरे कम्मे मां बदधते राथ। 8 आंव हुकमेरे तरीके पुड़ नैइं, पण होरी करे हिमतेरे लेइ ते तुशे प्रेमेरे सचेई परखनेरे लेइ जोताई। 9 तुस इशे प्रभु यीशु मसीहेरे अनुग्रह जानतथ, कि तै धनी भोइताँ भी तुशे लेइ गरीब बनो ताकि तैसेरे गरीब भोने सैहीं तुस धनी भोथ। 10 ते इस गल्ली मां मेरो विश्वासे, किजोकी तुशे लेइ रोडूए; जै एकी साले कैराँ न सिर्फ इस कम्मे करने मां, बल्कि इस गल्लेरे चहने मां भी पेहिले भोवरे थी। 11 ऐलहेरे लेइ हुनी इन कम्म पूरु कैराँ; जैन्चेरे चहलने मां तुस तियार थी, तैन्चेरे अपने अपने वजूदेरे मुताबिक पूरु भी केरा। 12 किजोकी अगर मनेरी तियारी भोए त दान तैसेरे मुताबिक कबूल भी भोते जैन तैस काँए न कि तैसेरे मुताबिक जैन तैस काँ नैइं। 13 इन नैइं कि होरी सुख ते तुसन दुःख मल्ले। 14 पण बराबर खियालन सैहीं इस बेले तुशी बडोत्री ते तैन करे घटी मां कम्मे एजे, ताकि तैन केरी बडोत्री तुशे घटी मां कम्मे एजे, कि बराबरी भोए। 15 जेने लिखोरुए, कि बडू घेरु तैसेरु जादे न निसू ते जेने थोडू घेरु तैसेरु घट न निसू।

तितुस ते तैसेरे मद्दगार

16 ते परमेशररु शुक्र भोए, जेने तुशे लेइ तैए हिम्मत तितुसए मने मां छडोरी ए। 17 कि तैन इशू समझानू मन्न बल्कि बडे हिम्मती सैहीं तुसन काँ जेवरोए। 18 ते असेई तैस सैहीं साथी ते दला भेजो जैसेरु नोंव सुसमाचारेरे बारे मां कलीसिया मां फेलोरुए। 19 ते एतरु नैइं, पण तै कलीसियाँ ठेरावरो भीए कि इस दानेरे कम्मेरे लेइ असन सैहीं साथी गाहे ते अस ई सेवा ऐलहेरे लेइ केरतम, कि प्रभूएरी महिमा भोए ते इशे मनेरी तियारी बाँदी भोए। 20 अस इस गल्ली मां हुशार रातम, कि इस मुक्ति देने बालेरे कम्मेरे बारे मां जैसेरी सेवा। 21 किजोकी गल्ल सिर्फ प्रभूएरे नजर मां रोडी नैइं बल्कि मैन्हु केरे नजरी मां रोडीए अस तैन केरी फिकर केरतम। 22 ते असेई तैस साथी अपनो दला भी भेजो, जै असेई बार बार परेखा ते बडी गल्ली मां रोडो निसो; पण हुनी तुसन पुड़ तैस बडो भरोसोए ऐलहेरे लेइ मना जादे खुशीए। 23 अगर कोई तितुसेरे बारे मां पुछे, त तै मेरो साथी, ते तुशे लेइ मेरो मद्दगार, ते अगर इशे दलाँ करे बारे मां कोई पुछे, ते तैना कलीसियाँ करे भेजोरो ते मसीहेरी महिमाए। 24 ते अपनो प्रेम ते इशू तैन घमण्ड जैन तुशे बारे मांए कलीसियाँ करे सामने तैन सिद्ध केरताँ हिराथ।

साथी - मसीही केरे लेई मद्द

9 हुनी तैस सेवारे बारे मां जै पवित्र लोकाँ केरे लेइ की गातीए, मीं तुस्न लिखनू जरूरीए। 2 किजोकी तुशे मनेरे तियैरे बारे मां जानताई, जैसे वजाही सैहीं आंव तुशे बारे मां मकिदुनयां केरे सामने घमण्ड हीराताई, कि अखयारे लोक एकी साले कैरां तियार भोवरेन, ते तुशे जोशे होरन भी जोश बनावरोए। 3 पण मीं दूला ऐलहेरे लेइ भेझे, कि असेई जैन घमण्ड तुशे बारे मां हिराव, तैना इस गल्ली मां बे फैइदे न तैरान; पण जैन्चरे मीं जोवं; तैन्चरे तुस तियार राथ। 4 एरु न भोए, कि अगर कोई मकिदुनी मीं साथी आए, ते तुस तियार न भोथ, ते कुन इस भरोसेरे वजाही सैहीं अस (इन न ज़ोम कि तुस) छिथोथ। 5 ऐलहेरे लेइ मीं दूलाअन सैहीं ई बिनती केरनी जरूरी समझी कि पेहिले तुस्न कां गहन, ते तुशे मुक्तरो फल जैसे बारे मां पेहिलो वचन दितोरो थू, तियार केरी रखन, कि ई दबावाए सैहीं नैइ बल्कि मुक्तरे फले सैहीं तियार भोए।

दान केचरें देंम

6 पण गल्ल त ईए, कि जै थोडू बेते तै कटेलो भी थोडू; ते जै हछू बेते तै हछू कटतेलो। 7 हर अक मेंहू जैन्चरे मने मां थापेरू तैन्चरे दान केरे न कुड कुड केरताँ, ते दबावे सैहीं, किजोकी परमेशर दिले सैहीं देने बालन सैहीं खुश भोते। 8 ते परमेशर हर किसमेरो अनुग्रह तुस्न देई बटते जैस सैहीं गल्ली मां ते हर बेले, सब किछ, जै तुस्न जरूरत भोए, तुसन काँ राहे, ते हर एकी रोडे कम्मरे लेइ तुस्न काँ बडू किछ भोए। 9 जैन्चरे लिखोरूए, तैने छकू, तैने कंगालन दान दितू, तैसेरो धर्म सदा रहलो। 10 जै बने बाले भीज, ते खानेरे लेइ रोडी देते तै तुस्न बीज देलो, ते तैस सैहीं फलवन्त केरेलो, ते तुशे धर्मएरे फल बधालो। 11 कि तुस हर गल्ली मां सैभी किसमेरे मुक्तरे लेइ जै इशे परमेशरेरु शुक्र केराते, शुक्र केरते राथ। 12 किजोकी सेवारे पूरे केरने सैहीं, न सिर्फ पवित्र लोकाँ केरी घटी पूरी भोतिन, पण लोकाँ केरे तरफाँ परमेशरेरु बडू शुक्र भोते। 13 किजोकी इस कैरां सबूत नेइताँ तैना परमेशरेरी महिमा बांदी केरतन, कि तुस मसीहेरो सुसमाचारे मेनताँ तैसेरे आधीन रातथ, ते तैन केरी, ते सैभी केरी मद्द केरने मुक्ति बांदी केरतथ। 14 ते तैना तुशे लेइ प्रार्थना केरतन; ते ऐलहेरे लेइ कि तुसन पुड परमेशरेरो बडो अनुग्रह, तुशू लालच केरते रातन। 15 परमेशरे तैसेरे तैस दानेरे लेइ जै समझी कैरां बेइरे, शुक्र भोए।

पौलुसेरो आधिकार

10 आंव तैए पौलुस जै तुशे सामने दीन आई, पण ठीक तुस्न पतर दिलेरी केरताई; तुस मसीहेरी नम्रता ते नरमी याद करेइताँ तुस्न काँ मिनत केरताई। 2 आंव ई बिनती केरताई, कि तुशे सामने नझक भोइताँ दिलेर न भोनु पे; जैन्चरे आंव केतरन पुड जैना असन जिसमेरे मुताबिक चलने बाले समझतन, बहादेरी हिरानेरी कोशीश केताई। 3 किजोकी अगर अस जिसमे मां चलतम फिरतम, फिरी भी जिसमेरे मुताबिक न लडम। 4 किजोकी इशी लडइरे हथयार जिमानी नैइ, पण गड बछोडनेरी लेइ परमेशरेरे जिरीए समर्थिन। 5 ते अस ख्यालन, ते हरएकी उची गल्ली, जैना परमेशरेरी पिशानेरे खलाफ उठतन, खतम केरतम; ते हरएकी खायले कैद केरतम मसीसेरो हुकम मन्ने बालो बनातम। 6 ते तियार रातम जताली तुशो हुकम मन्ने पूरो भोए, त हर अकी हुकम न मन्ने तैन बदलो मैले। 7 तुस एने गल्लन हेरतथ, जै ऐछी केरे सामने, अगर केन्ची एपू पुड ई भरोसे, कि आंव मसीहेरोई, तै इन भी जाने, कि जेरू तै मसीहेरोए, तैन्चरे अस भी आम। 8 किजोकी अगर आंव तैस अधीकारेरे बारे मां होरी भी घमण्ड हिरेई, जैन प्रभूए तुशे बगाडनेरे लेइ नैइ बल्कि बनानेरे लेइ असन हिरावरूए, त शरमिनदा न भोले। 9 इन आंव ऐलहेरे लेइ जोताई, कि चिठी केरे जिरीए डराने बालो न भोई। 10 किजोकी ज़ोतन, कि तैसेरी चिठी त गम्भीर ते असर केरने बैलिन; पण जैखन हेरतन, त तै जिसमेरी कमजोरी ते मौजूदगी मां थोडी लगतीए। 11 ते जै एरू जोते, तै ई समझ रखते, जैन्चरे ठीक इशे चिठन मां वचन, तैन्चरे तुशे सामने इशू कम्मा भी भोलाँ। 12 किजोकी असन ई

दिलेरी नैइ की अपनो आप तैन मराँ केत्रन साथी गनम, या तैन सैहीं अपनो आप मिलाम, जैना अपनी तारीफ केरतन, ते एपू मामेई तुलता एकी होरी मिलन केरताँ मूर्ख बन्तन।

13 अस हदी करा जादे कधी घमण्ड न केरम, पण तैसे हदी तगर जै परमेशरे इशे लेइ बनावरीए, ते तैस तुस भी अवरथ ते तैसेरे मुताबिक घमण्ड भी केरेले। 14 किजोकी अस एपनी हदी कैरां बेइर अपनो आप बडानो न चाम, जैन्चरे कि तुस्न तगर पुजनेरे पासे भोए त, बल्कि मसीहेरो सुसमाचार शुनाते तुस्न तगर पुजोरेम। 15 ते अस हदी कैरां जादे होरी केरे महँन्ती पुड घमण्ड न केरम; बल्कि असन उमीदे, जैन्चरे जैन्चरे तुशो विश्वास बधेलो तैन्चरे तैन्चरे अस एपनी हदरे मुताबिक तुशे वजाही सैहीं होरे भी बधमेले। 16 कि अस तुशे हदन कैरां बेइताँ सुसमाचार शुनाम, इन नैइ कि अस होरी केरे हदाँ केरे अन्तर बनोरे कम्मन पुड घमण्ड केरम। 17 पण जैना घमण्ड केरन, तैना प्रभु पुड केरन। 18 किजोकी जै अपनी बडयाई केरते, तै नैइ, पण जैसेरी बडयाई प्रभु केरते तैए कबूल केरो गालो।

पौलुस ते झूठे प्रेत

11 अगर तुस मेरी बेवकूफी झैलेथ ते केतरु रोडू भोथू; हां, मेरू झैलतथ भी। 2 किजोकी आंव तुशे बारे मां ईश्रवरये धुन लाताई, ऐलहेरे लेइ कि एकी मडदे सैहीं तुशी गल्ल लवरीए, कि तुस्न पवित्र कुवैरारे जेरे मसीह ए सोफी। 3 पण आंव डरताई कि जैन्चरे सपे एपनी चलेकी सैहीं हव्वा भटकवरी थी, तैन्चरे तुशी मन तैसेरे सिधयैई ते पवित्रतैई सैहीं जै मसीह साथी बोनीए भ्रष्ट न की गाए। 4 अगर को तुस्न कां एइताँ, कोन्ची होरी यीशु एरो प्रचार केरे, जैसेरो प्रचार असेई नैइ केरै: या कोई होरी आत्मा तुस्न मल्लतीए; जै पेहिली न थी मल्लोरी; या कोई कोई होरो सुसमाचार जै तुसेई पेहिलो न थी मन्ना, त तुशू झैलनू ठीक भोथू। 5 आंव समझताई, कि आंव कोन्ची गल्ली मां बडे कैरां बडे प्रेरितन कैरां घट नैइ। 6 अगर आंव तकरीरी मां अनाडई फिरी भी ज्ञानए मां नैइ; बल्कि असेई ई हर गल्ली मां सैभी केरे लेइ बाँदू भी केरूए।

7 कुन इस मां मीं किछ पाप कीयो; कि मीं तुस्न परमेशरेरो सुसमाचार मुखत शुनव; ते अपनो आप निकडो कीयो, कि तुस उचे भोथ? 8 मीं होरी क्लिसिया लुटी मतलब मीं तैन करां मजदूरी नैइ, ताकि तुशी सेवा केरी। 9 ते जैखन तुस्न साथी थू, ते मीं घटी भोई, ते मीं केन्ची पुड भार न दितो, किजोकी ड्लाएई, मकिदुनिया अरां मेरी घटी पूरी की: ते मीं हर गल्ली मां अपनो आप तुस्न पुड भार भोने कैरां रोको, ते रोकेलो। 10 अगर मसीएरी सचाई मीं मांए, त आखया मुलखे मां कोई मीं इस घमण्ड सैहीं न रोकेलो। 11 कोल्हेरे लेइ? कुन ऐल्हेरे लेइ कि मीं तुस्न सैहीं प्रेम नैइ रखोरो? परमेशर इन जानते।

12 पण जैन आंव केरताई, तैन केरेलो; कि जैना लोक मोको तोपतन, तैन मोको न देइलो, ताकि जैस गल्ली मां तैना घमण्ड केरतन, तैस मां तैना इशे जेरे भोन। 13 किजोकी एरे लोक झुठे प्रेरितन, ते दगो केरतां कम्म केरने बालेन, ते मसीहेरे प्रेतां केरू जेरू रूप बनाने बालेन। 14 ते ई बडी बडी गल्ल नैइ किजोकी शैतान एपू भी जलाली फरिशताँ केरू रूप बनाते। 15 ते अगर तैसेरे सेवक भी धरमी सेवकाँ केरू जेरू रूप बनातन, त कोई बडी गल्ल नैइ पण तैन केरो अन्त तैन केरे कम्मा केरे मुताबिक भोनाए।

प्रेरतेरे रूपे मां पौलुसेरो दुःख झैल्लनाँ

16 आंव फिरी जोताई, कोई मीं बेवकूफ न समझे; नैइ बेवकूफ समझताँ मीं कबूल केरे, ताकि आंव तोडू जेरू घमण्ड केरी। 17 जैन किछ आंव जोताई तैन प्रभुएरे हुकमेरे मुताबिक नैइ बल्कि बेवकूफी सैहीं जोताई। 18 जैखन की बडे लोक जिसमेरे मुताबिक घमण्ड केरतन, त आंव भी घमण्ड केरेलो। 19 तुस त समझदार भोइताँ आनन्दे सैहीं बेकूफरी बती पुड चलतथ। 20 किजोकी जैखन तुस्न कोई गुलाम बनाते, या खाते, या अपनो आप बडो बनाते, या तुशे तुतरे पुड थपुड बाते, त तुस झल्लतथ। 21 मेरू जाँनु छिथानेरे तरीके पुडए, मना कि अस कमजोर जेरे थी; पण जैस कोन्ची गल्ली मां दिलेरी केरतम (बेखूफी सैहीं जोताई) फिरी भी दिलेरी केरताई। 22 कुन तैना

इब्रानीन? आंव नैइं: कुन तैना इस्त्राएलीन? आंव नैइं: कुन तैना इब्राहीमेरे खानदाने मरन? आंव भी आई: कुन तैना मसीहेरे सेवकन? 23 (आंव पागलेरो जेरो जोताई) आंव तैन कैरां बेदधताई जादे मैनती मां: बार बार कैद भोने मां: कोडे खाने मां: बार बार मौतरे खतरन मां | 24 मीं यहूदन कैरां पन्च बार उनतल्ही उनतल्ही कोडे खाए | 25 टुलेइ बार मीं बेन्त खाए; एकी बार मीं घोडेव कीयो जेव; टुलेइ बार जिहाजां जैन पुड़ आंव चडोरो थू, टुलाउटां, अक रात दिहाड़ी मीं समुन्दरे मां कटी | 26 आंव बार बार सफरे मां; दरयां केरे खतरन मां; डैकू केरे खतरन मां; अपने ज्ञातरे खतरन मां; होरी कोरी कोमा केरे खतरन मां; जंगलेरे खतरन मां; झुठे ढूलाहां केरे खतरन मां; 27 महैनती मां ते तखलीफी मां; बार बार बींझे बिषने मां; बार बार बरत रखने मां; इलाउख टुलाइशी मां; ठण्डी मां; ते नगे हालती मां रावरोई | 28 ते होरी गल्लां जैन केरे गल्लां केरे बारे मां आंव न जोई सैभी कलीसिया केरे फिकर मीं रोज दुबातीए | 29 केसेरे कमजोरी सैहीं आंव कमजोर न भोव? केसेरे ठोकर खाने सैहीं मेरो दिल न दुखे?

30 अगर घमण्ड केरनू जरूरीए, त आंव अपनी कमजोरारी गल्लन पुड़ केरेलो | 31 प्रभु यीशु एरो परमेशर ते बाजी जै सदा मुबारिके, जानताई, कि आंव झुठ न जोई | 32 दिमशके मां अरितास राजएरे तरफां जै हाकिम थू, तैने टुलानेरे लेइ दमिशी केरे नगरे पुड़ पेरो रखोरो थू | 33 ते मीं टोकरे मां दैरारे बतां उसालो, ते तैसेरे हथे कैरां बचो |

पौलुसेरु दिव्य दर्शन ते कमजोरी

12 अगर घमण्ड केरनू त मेरे लेई ठीक नैइं पण फिरी भी केरनू पेटे; आंव प्रभुएरे दितोरे दर्शन ते प्रकाशां केरे बारे मां जोई | 2 आंव मसीह मां एकी मैन्हू जानताई, चेवधे साल भोए कि तै जैने जिसमे सैहीं, न जाने जिसमे बगैर, परमेशर जानते, एरो मैन्हू टुलाइयोव सुर्गाए तगर नेव | 3 आंव एरे मैन्हू जानताई जिसमे साथी या बगैर जिसमे परमेशर जानते | 4 कि स्वर्ग लोक मां नेव, ते एरी गल्लां जोई जैना जोनेरी नैइं; ते जैन केरु जिभी पुड़ भी आन्नू ठीक | 5 एरे मैनु पुड़ त आंव घमण्ड केरेलो, पण अपने पुड़एपनी कमजोरी केरे इलावा, अपने बारे मां घमण्ड न केरी | 6 किजोकी अगर आंव घमण्ड केरनू चैई भी त बेवकूफ न बेई, किजोकी सच जोइलो; फिरी भी रुकताई, एरु न भोए, कि जैन्चरे कोई मीं लाते, या मीं श्नुते, मीं तैस कैरां भी बेदधतां समझे | 7 ते ऐलहेरे लेइ कि आंव बडे प्रकाशां केरे वजाही सैहीं फुली न, मेरे जिसमे मां अक कन्टो डुभोरोए मतलब शैतानेरो दूत कि धूसे मारे ताकि आंव फुली न गेई | 8 इसेरे बारे मां मीं टुलाइ बार बिनती की, मीं कैरां दूर भोई गाहे | 9 ते तैने मीं सैहीं जोव, मेरो अनुग्रह तेरे लेइ सुधोए; किजोकी मेरी सामर्थ कमजोरी मां सिद्ध भोतीए; ऐलहेरे लेइ आंव अपनी कमजोरी पुड़ घमण्ड केरलो, कि मसीहेरी सामर्थ मीं पुड़ एइती राहे | 10 इस वजाही सैहीं मसीहेरे लेइ कमजोरन मां, ते बेइजतन मां, गरीबी मां, सताए गहने मां, ते मुशकलन मां, खुशई; किजोकी जैखन आंव कमजोर भोताई, तैन जोरे बालो भोताई |

कुरिन्थियों केरे लेई पौलुसेरी फिकर

11 आंव बेवकूफ त बनो पण तुसेई मजबूर कीयो: तुसेई त मेरी तारीफ केरी लोइती थी, किजोकी अगर आंव किछ भी नैइं, फिरी भी बडे कैरां बडे प्रेरतन कैरां कोन्ची कैरां घट नैइं | 12 प्रेरत केरी आलामतां भी तुशे दरमयान हर किसमेरे सबर साथी निशान्न साथी बडां बडां कम्मा, ते सामर्थएरां कम्मां हिरां | 13 तुस कोस गल्ली मां ते कलीसिया मां घट थी, सिर्फ इस मां की आंव तुस्न पुड़ अपने भार न रेखी: मेरो ई बे इनसाफ माफ केरा |

14 हेरा, आंव टुलाइयोव बार एजनेरे लेइ तियाराई, ते मीं तुसन पुड़ भार न रेखेलो; किजोकी आंव तुशी जैईदाद नैइं, बल्कि तुस्न चहताई: किजोकी बचेई अम्मा बाजी केरे लेइ धन अकोटू न लोडे करू, पण अम्मा बाजेई बचां केरे लेइ करू लोडे | 15 आंव तुशी आत्मा केरे लेइ बडी खुशी सैहीं खर्च केरेलो, बल्कि एपू भी खर्च भोइलो: कुन जैतरो जादे आंव तुस्न सैहीं प्रेम केरताई, तेतरो घेटतां तुस मीं प्रेम रखेले? 16 एरु भोई बटते, कि मीं तुसन पुड़ भार नैइं छडोरो, पण चलैकी सैहीं धोखो देइतां फसाए | 17 भला, जैना मीं तुस्न कां भेजे, कुन तैन मैरां केन्चरे जिरीये मीं दुष्टे सैहीं किछ नेव? 18 मीं तीतुस समझेइतां तैस साथी तै ढूला भेजो, त कुन तीतुस दुष्टे सैहीं किछ नेव? कुन अस एकी आत्मारे चलाने सैहीं चले?

19 तुस हेजू तगर इन समझतथ कि अस तुशे सामने उजर लवरेम केरने, अस त परमेशरे हाजर सैमझतां मसीह मां जोतम, ते हे टुलाराव, ते सब गल्लां तुशे तरेकरे लेइ जोतम | 20 किजोकी मीं डरे, कि एरु न भोए, कि जैन्चरे आंव चाताई, तैन्चरे तुस न भोथ; ते मीं भी जैन्चरे तुस मीं चातथ तेरे लाथ, कि तुस्न लडैई, फिरके, खलाफत, जलन, चोगली, अभिमान ते फसाद भोन | 21 ते मेरो परमेशर कि मेरे फिरी इडी एजने मीं पुड़ दबाव केरन ते मीं फिरी बडां केरे लेइ फिरी दुःख केरनो पे, जैनेइं पेहिलो पाप केरो थू, ते तैस गंदे कम्मे, ते जनाह, ते लुचपने सैहीं, जै तैनेइं कीयो, मन न फिराव |

आखरी हदायत

13 हुनी टुलाइयोव बार तुस्न काँ एइताई: दुइय या टुलाएई गवां केरे जबाणी सैहीं ई गल्ल पक्की केरी गाल्ही | 2 जैन्चरे जैखन दुइयोव बार तुस्न सैहीं साथी थू, ते तैन्चरे हुनी दूर राते तैन लोकन कैरां जैनेइं पेहिलो पाप केरो, ते होरे सैभी लोकन सैहीं हुनी पेहिले जोताई, कि अगर आंव फिरी एजी, त न शैरेलो | 3 तुस दलील चहतथ, कि मसीह मीं गल्लां केरते, जै तुशे लेइ कमजोर नैइं; पण तुस्न मां सामर्थ ए | 4 तै कमजोरारे वजाही सैहीं करुसे पुड़ चाडो त जेव, फिरी भी परमेशरेरे समर्थी सैहीं जीतो ए, अस भी त तैस मां कमजोरम; पण परमेशरेरी समर्थी सैहीं जै तुशे लेइए, तैस साथी जीमेले |

5 अपने आप परखा, कि विशासे मां आथ की नैइं; एपू परखा, कुन तुस्न अपने बारे मां ई पतो नैइं, कि यीशु मसीह तुस्न मां नैइं त तुस निकम्मे भोए | 6 पण मेरी उमीदे, कि तुस बुझले, कि अस निकम्मे नैइं | 7 ते अस अपने परमेशरे कां प्रार्थना केरताई, कि तुस कोई बुराई न केरा, ऐलहेरे लेइ नैइं, कि अस रोडे हेरी बटम, पण ऐलहेरे लेइ कि तुस भलाई केरा, चाए अस निकम्मे भोम | 8 किजोकी अस सचेरे खलाफ किछ न केरी बटम, पण सचेरे लेइ केरी बटतम | 9 जैखन अस कमजोरम, ते तुस ताकतबरथ, अस खुशी रहतम, ते ई प्रार्थना भी केरतम, कि तुस सिद्ध भोते राथ | 10 ऐलहेरे लेइ आंव तुशे पिठी पतर इना गल्लां लिखताई, कि मौजूद भोइतां मीं तैस आधीकारेरे मुताबिक जै प्रभुए बिगाडनेरे लेइ नैइं पण बनानेरी लेइ मीं दितोरोए, सेखती सैहीं किछ न केरनू पे |

अभिवादन

11 हे ढूलाव, खुश राथ, सिद्ध बनते राथ; हिमत रखा; मेल मिलापए सैहीं राथ, ते प्रेम ते शैनतरो दातो परमेशर तुस्न साथी भोल्लो | 12 एकी होरी पवित्र फुमडी सैहीं नमशकार केरा | 13 सभ पवित्र लोक तुस्न नमशकार केरतन | 14 प्रभु यीशु मसीहेरो अनुग्रह ते परमेशरेरो प्रेम ते पवित्र आत्मारी सन्गाती तुस्न सैभन साथी भोए |

गलातियों

अभिवादन

1 पौलुसेरे तगरपां, जै न मैंन्हू केरे तरपां, ते न मैंन्हू केरे जिरये, बल्कि यीशु मसीह ते परमेशरे जिरिये सैहीं, जैनी तै फटरन मैरां जीतो कीयो, प्रेरते। 2 ते सारे दूलाहाँ केरे तरपां, जैना मीं सैहीं साथिन; गलातियारे कलीसियारे नोंवें।

3 बाजी परमेशर, ते इशे प्रभु यीशु मसीहेरे तरपां तुस्न अनुग्रह ते शान्ति मल्लती राए। 4 तैने अपनो आप इशे पापां केरे लेई दितो, ताकि इशे परमेशर ते बाजी केरे मेरजी सैहीं इस मौजूद संसारे केरां छुटाए। 5 तैसेरी स्तूति ते बड्याई सदा भोती राए। आमीन।

कोरी होरो सुसमाचार नैइं

6 आंव हेरान भोताई, कि जैने तुस मसीहेरे अनुग्रह सैहीं कुजाए; ते तैस केरां तुस एतरी जल्दी फिरतां होरी किसमेरे सुमाचारेरे पासे झुकने लाए। 7 पण तै होरो सुसमाचा अथी नैइं: पण गल्ल ई ए, कि केत्रे एरेन, जैना तुस्न घबरातन, ते मसीहेरे सुसमाचार बगाडने चहतन। 8 पण अगर अस या कोई फरिशतो भी तुस्न कोई तैस सुसमाचारेरे इलावा जै असेईं तुस्न शुनवरोए शुनाए त लानती भोए। 9 जैन्चरे असेईं पेहिलू ज़ोवरूए, तैन्चरे आंव हुना भी जोताई, कि तैस सुसमाचारेरे इलावा जै तुसेईं कबूल करों, अगर कोई होरो सुसमाचार शुनाए, त लानती भोए। आंव मैंन्हन खुश केरताई या परमेशर? कुन आंव मैंन्हन खुशी केरनो चचाहताई?

10 अगर आंव हेजू मैंन्हन खुश केरतो राताई, त मसीहेरो दास न भोथो।

पौलुस केन्चरां प्रेरत बनो

11 हे दूलाअव, आंव तुस्न याद कराताई, कि जै सुसमाचार मीं तुस्न शुनव, ई मैंन्हू केरो जेरो नैइं। 12 किजोकी तै मीं मैत्र करं नैइं पुजोरो, ते न मीं शिखालोरो ए, पण यीशु मसीहेरे प्रकाशे सैहीं मल्लोरो ए। 13 यहूदी धर्म ए मां पेहिलो जै मेरो चाल चलन थू, तुसेईं शुनोरू ए; कि आंव परमेशरेरी कलीसियाई बडी सतातो थू, ते नाश केरतो थू। 14 ते अपने बडे कौमारे लोकन जैना मेरे जेरे थी यहूदी धर्म ए बधातो थू, ते अपने सियाना केरे रीतन मां मघन थू। 15 पण परमेशर एरही, जैने आंव मेरे अम्मारे पेटे मैरां ठैरावरो ते अपने अनुग्रह सैहीं कुजाव, 16 जैखन मर्जी भोई, कि मीं मां अपने मडू बांदू केरे कि आंव होरी कौमन मां तैसेरो सुसमाचार शुनेइं; ते मीं मासे न लेव्हे सैहीं सलाह की। 17 ते न यरुशलमे मां तैन कां जेव जैना पेहिले प्रेरत थी, पण तैखने अरबे जो चल्लो जेव: ते फिरी तैठां दमिश्के वापस आव।

18 फिरी टुलाई सालना पत्ती आंव कैफा सैहीं मिलने यरुशलमे जेव, ते परहने दिहाड़े तैडी राव। 19 पण प्रभुएरे दूला याकूबेरे इलावा प्रेरतन मैरां कोन्ची सैहीं मिलो। 20 जैना गल्ल तुस्न लिखताई, हेरा परमेशरे हाज़र सैमझतां जोताई, कि तैना झुठी नैइं। 21 इठां पत्ती आंव सूरिया ते किलिकियारे मुलखे मां आव। 22 पण यहूदियारी कलीसियाइ जैना मसीह मां थी, मेरू तुतर त कधी न थू लवरू। ते मेरे बारे मां महिमा केरती थी। 23 पण इने शुन्ते थी, कि जै असन पेहिलो स्तातो थू, तै तैसे धर्मरो सुसमाचार शुनाते, जैस पेहिलो नाश केरतो थू। 24 ते मेरे बारे मां परमेशरेरी महिमा केरते थी।

होरी प्रेरतां केरे जिरिये पौलुसे मन्जूरी

2 च़ेवदे सालना पत्ती आंव बरनबासे सैहीं साथी यरुशलमे जेव, ते तितुस भी मीं एपू साथी नेव। 2 ते मेरू गहनू परमेशरेरे प्रकाशे सैहीं भोंव: ते जै सुसमाचार आंव होरी कौमन मां प्रचार केरताई, ते मीं तैन सैहीं ज़ोव, पण अकल्ले मां जैना किछ समझे गहते थी, ताकि एरू न भोए, कि मेरी इस बेलेरी, या एगरीं दौड धूप बे फैदी भोए। 3 पण तितुस भी जै मीं साथी थू, ते जै यूनानीए; खतनो करानेरे लेई मजबूर न कीयो। 4 ते ई तैन झुठे दूलाहा केरे वजाही सैहीं भोंव, जैना छेपतां आवरे थी, कि तैस ऐजैदरी जै मसीह यीशु मां असन मैल्लोरीए, भेध नेइतां फिरी असन गुलाम बनाम। 5 तैन केरे अधीन भोनू असेईं एकी पलेरे लेई मनज़ूर न किव, ऐलहेरे लेई कि सुसमाचारेरी सचाई तुस्न मां बनोरी राए। 6 फिरी जैना लोक किछ समझे गहतन (तैना चाहे केरहे भी थी, मीं इस सैहीं किछ कम नैइं, परमेशर केन्चरी तगरफदारी न केरे) तैन केरां जैन किछ भी समझे गहते थी, मीं किछ भी हसल न भोव। 7 पण इसेरे उलट जैखन तैन हेरा, कि जैन्चरे खतनो कीयोरे लोकां केरे लेई सुसमाचारेरू कम्म पतरसे सोफू तैन्चरे खतनो न कीयोरे लोकन सुसमाचार शुनानेरू कम्म मीं पोफू। 8 (किजोकी जैस पतरसे केरां खतनो कियोरे लोकां मां प्रेरितैइयरू कम्म बडे प्रभावे सैहीं करां, तैने मीं भी होरी कौमन मां प्रभाशाली कम्म कराए) 9 ते जैखन तैस अनुग्रहेरी जै मीं मैल्लोरो थू, त याकूब, त कैफा, ते यहून्ना जैना कलीसियारे खमबे समझे गहते थी, मीं ते बरनबासे देहिनो हथ देइतां शामिल कीये, कि अस होरी कौमन कां गहम, ते तैना खतनो कीयोरन कां। 10 सिर्फ ईन ज़ोव, कि अस कंगालां केरी खबर नेम, ते इसे कम्मरे लेई आंव एपू भी कोशीश केरने लवरो थू।

पौलुसेरे जिरिये पतरसेरी खलाफत

11 पण जैखन कैफा होरी कौमन मां आव त मीं तैसेरी तुतरे पुड खलाफ की ते झाड दिती किजोकी तै दोशी थू। 12 ऐलहेरे लेई कि याकूब एरे पासरां किछ मैंन्हू केरे एजनेरे पेइले तै होरी कोमां केरे लोकन साथी खातो थू, पण जैखन तै अव, त खतनो केरेन लोकन करां डर ए सैहीं तैन करां हटो ते अलग भोवने लव। 13 ते तैस साथी होरे यहूदी भी शामिल भोए, इडी तगर कि बरनबारस भी तैन केरे संगती मां शामिल भोव। 14 पण जैखन मीं हेरू, कि तै सुसमाचारेरी सचैईं पुड सिधे न च़ल्ले, ते मीं सैभी केरे सामने कैफा सैहीं ज़ोव: कि जैखन तू यहूदी भोइतां होरी कौमा केरी ज़ेरी चाल चलतस, ते यहूदी केरी ज़ेरी नैइं त तू होरी कौमन यहूदी केरे जेरे चलनेरे लेई किजो रोकतस?

विश्वासे सैहीं धर्मी ठैहने

15 अस जैना ज़रमनेरे यहूदिम, ते पैपी केरे जेरे नैइं। 16 फिरी भी इन सैझतां कि मैंन्हू व्यवस्थारे कमन सैहीं नैइं, पण सिर्फ यीशु मसीह पुड विश्वास केरने सैहीं धर्मी भोते, असेईं एपू भी मसीह यीशु पुड विश्वास केरो, कि अस व्यवस्थारे कम्मन सैहीं नैइं पण मसीह पुड विश्वास केरने सैहीं धर्मी भोए, ऐलहेरे लेई व्यवस्थारे कम्मन सैहीं कोई धर्मी न भोलो। 17 अस जैना मसीह मां धर्मी भोने चहतम, अगर एपू पापी निसे, त कुन मसीह पापेरो सेवके? कधे नैइं। 18 किजोकी जैन किछ मीं बछोडू, अगर तैस फिरी बनेइं, त अपनो आप गुनाह गार बनाताई। 19 आंव त व्यवस्थाई सैहीं व्यवस्थारे लेई मेरी जेव, कि परमेशरेरे लेई जीई। 20 आंव मसीह साथी सलीबी पुड च़डोरोई, ते हुनी जीतो न राव, पण मसीह मीं मां जीतो ए: ते आंव जिसमे मां

हुनी जीतोई, त सिर्फ तैस विश्वासे सैहीं जीतोई, जै परमेशररे मड्डे पुडे, जैने मीं सैहीं प्रेम कीयो, ते मेरे लेई अपनो आप दितो।²¹ आंव परमेशररे अनुग्रह बे फैइदो न केरी, किजोकी व्यवस्थाई सैहीं धार्मिकता भोथी, त मसीहेरू मरनु बेफैइदू भोथु।

व्यवस्था या विश्वास

3 हे बे समझ गलीतियो, केने तुस टरे लाए? तुशे त मना तुशे सामने यीशु मसीह सलीबी पुड़ चाड़ो! ² आंव तुस्न कैरां सिर्फ इन जानू चाताई, कि तुसेई आत्मा, कुन व्यवस्थारे कम्मन सैहीं हसल केरी, या विश्वासेरे सुसमाचार सैहीं हसल की? ³ कुन तुस एरे बे समझथ, कि आत्मारो रीती पुड़ शुरू केरतथ ते जिसमेरे रीरी पुड़ खतम केरेले? ⁴ कुन तुस एतरो दुःख एरो झेलो? पण शैइद बेफैदा नैइं। ⁵ ते जै तुस्न आत्मरू दान देते ते तुस्न मां बड़ां कम्मां केरते, तै कुन व्यवस्थारां कम्मन सैहीं या विश्वासेरे सुसमाचार सैहीं एरू केरते?

⁶ इब्राहीमे त परमेशरे पुड़ विश्वास किव ते, ई तैसेरे लेई धार्मिता गनी जेई। ⁷ ते इन समझा, कि जै विश्वास केरने बालोए, तै इब्राहीमेरी सन्ताने। ⁸ ते पवित्र शास्त्रे पेहिलू बुझतां, कि परमेशर होरी कौमन विश्वासे सैहीं धर्मी बनालो, पेहिलो इब्राहीमे ई सुसमाचार शुनव, कि तीं मां सैभी कौमन बरकत मैलेली। ⁹ ते जैना विश्वास केरने बालेन, तैन विश्वासेन इब्राहीमे सैहीं साथी बरकत मैलती ए।

¹⁰ ते जैना मँन्हू व्यवस्थारे कम्मन पुड़ भरोसो रखतन, तैना सब लानती मान, किजोकी लिखोरूए, कि जै कोई व्यवस्थारे किताबी मां लिखोरी गलन मां बनोरो न राए, तै लानती ए। ¹¹ ई गल बांदी ए, कि व्यवस्थाई सैहीं परमेशरे कां कोई मँन्हू धर्मी न भोए किजोकी धर्मी मँन्हू विश्वासे सैहीं जीतो रालो। ¹² पण व्यवस्थारो विश्वासे सैहीं कोई वासतो नैइं; पण जै तैन मन्नेलो, तै तैन सैहीं जीतो रालो। ¹³ मसीहे जै इशे लेई लानती बनो, तैन अस कीमत देइतां लानती केरां छुटा ए किजोकी लिखोरूए, जै कोई काठ ए पुड़ टंगो गहलो तै लानती ए। ¹⁴ इन ऐलहेरे लेई भोव, कि इब्राहीमेरी बरकत मसीह यीशु ए जिरीये सैहीं होरी कौमन कां पुजे ते अस विश्वासे सैहीं तै आत्मा हासल केरम, जैसेरो वाइदो कीयोरोए।

व्यवस्था या आहद

¹⁵ हे ढूलाअव, आंव मँन्हू केरू जेरू जोताई, कि मँन्हू केरो बाइदो भी जै पक्को भोते, त न कोई तैस टालते ते न तैस मां किछ बधाते। ¹⁶ सेरे वाइदे इब्राहीम ए, ते तैसेरी अवलाधी दिते जे; तै इन न जोए, कि अवलाधन; जैन्चे बड़ां केरे बारे मां जोव, पण जैन्चे एके रे बारे मां कि तेरी अवलाध ई: ते तै मसीह ए। ¹⁷ पण आंव इन जानताई कि जै वाइदो परमेशर ए पेइलो पक्को केरो थू, तैस व्यवस्था चेर शौ टली सालन पत्ती न टाल ए, कि वाइदो बेफैइदो भोए। ¹⁸ किजोकी अगर मिरासत व्यवस्था सैहीं मल्लती ए, त फिरी वाइदन सैहीं नैइं, पण परमेशर वाइदे सैहीं दिते।

¹⁹ तैखन व्यवस्था किजो न दिते? तै त पापों केरे वजैई सैहीं बाइदे मां दिते, कि तैस अवलाधी एजने तगर राए, जैस वाइदे दितो रे थी, ते फरिशतां केरे जिरी ए एकी मझाते दिते। ²⁰ मझाटो त एकेरो न भोए, पण परमेशर अक ए।

व्यवस्थारो मकसद

²¹ कुन व्यवस्था कुन परमेशररे खलाफे? कधी न भोए किजोकी अगर एरी व्यवस्था दिते गाथी जै जिन्दगी देई बटेथी, ते सचे धार्मिकता व्यवस्था सैहीं भोथी। ²² पण पवित्र शास्त्रे सब पापेरे अधीन केरे, ताकि तै वाइदो जैसेरी बुनीयाद यीशु मसीह पुड़ विश्वास केरनो ए, विश्वास केरने बालां केरे लेई पूरू भोव। ²³ पण विश्वास एजने केरां पेहिले व्यवस्थाई मां इशी रखनाली भोती थी, ते तैस विश्वासे एजने तगर जै बांदो भोने बालो थू, अस तैसेरे बन्धने मां रहम। ²⁴ ऐलहेरे लेई व्यवस्था मसीह तगर पुजानेरे लेई इशी स्मभालने बाली भोई, कि अस विश्वासे सैहीं धर्मी भोम। ²⁵ पण जैखन विवास अव, त अस स्मभालने बालेरे आधीन न राए। ²⁶ किजोकी तुस सब

विश्वास केरने सैहीं जै मसीह यीशु पुड़े, परमेशररी सन्तानथ। ²⁷ ते तुस्न मैरां जेतगरेई मसीह मां बपतिस्मो नेव तैनेइं मसीह लव। ²⁸ हुनी न कोई यहूदी राव ते न कोई युनानी; न कोई गुलाम, न कोई आजाद; न कोई नर ते न कोई नारी; किजोकी तुस सब मसीह यीशु मां सब अकथ। ²⁹ ते अगर तुस मसीहेरेथ, त इब्राहीमेरी सन्तानथ, ते वाइदेरे मुताबिक वारस भी आथ।

4 आंव इन जोताई, कि वारस जाँ तगर निक्डो ए, अगर तै सैभी चीजाँ केरो मालिके, फिरी भी तैस त गुलामे मां कोई फरक नैइं। ² पण बाजी केरे ठैरावे बेले तगर सुमालने बालां ते भण्डरैन कां रहते। ³ तैन्चरे अस भी, जैखन निकडे थी, त संसाररे गलन मां पाबंद भोइतां गुलामरे हालती मां राए। ⁴ पण जैखन वखत पूरो भोव, त परमेशरे अपने मड्डू भेइलू, जै कौन्शी सैहीं जरमो, ते व्यवस्थारे आधीन जरमो। ⁵ ताकि व्यवस्थारे आधीन घिन्ने, ते असन लेपालक भोनेरी पदवी मैल्ली। ⁶ ते तुस जैना मड्डाथ, ऐलहेरे लेई परमेशररे मड्डेरी आत्मा, हे बापू हे बाजी जोए, इशे दिले मां भेइलो ए। ⁷ ऐलहेरे लेई हुनी तू गुलाम नैइं, पण मड्डुस; ते जैखन मड्डू भोव, त परमेशररे जिरीये वारस भी भोव।

गलातियों केरे लेई पौलुसेरी फिकर

⁸ ते पेइले तुस परमेशरे केरां नावाकफ भोइतां तैन केरे गुलाम थी जैना असली परमेशर नैइं। ⁹ पण हुनी तुसेई परमेशर पिशानो बल्कि परमेशरे तुस पिशाने ते तैन कमजोर ते निकेमी पेहिली गल्लां केरे पासे किजो गातथ, जैन केरे तुस दुबारा गुलाम भोने चहतथ? ¹⁰ तुस दिहाइन ते महीत्र ते खास बेले ते सालन मन्तथ। ¹¹ आंव तुशे बारे मां डरताई, कि एरू न भोए, कि जै महँनत तुशे लेई मीं करी ए बे फैइदी न भोए।

¹² हे ढूलाअव, आंव तुस्न कां बिनती केरताई, तुस मेरे जेरे भोथ: किजोकी आंव तुशो एरो जेरो भोवरोई; तुसेई मेरू किछ नैइं बगाडोरू। ¹³ पण तुस जानतथ, पेहिले पेहिले मीं जिसमेरे कमजोरारो वजाही सैहीं सुसमाचार शुनव। ¹⁴ ते तुसेई मेरी जिसमानी हालत जै तुशे अजमैशरी वजा थी घटया न समजड़ी; न तैस सैहीं तुसेई नफरत की बल्कि परमेशररे दूत एरे जेरे बल्कि मसीह यीशु ए बराबर आंव कबूल कीयो। ¹⁵ ते तै तुशी खुशी केरनी कोरां जेई? आंव तुशो शाहाताई, कि अगर भोई बटे, त तुस अपनी एछ्छी भी केदतां भी देते। ¹⁶ ते कुन तुस्न सैहीं सच जाँनेरे वजाही सैहीं आंव तुशो बेरी भोवरोई। ¹⁷ तैन तुस्न दोसत बनानो त चहतन, पण रोड़ी नीती सैहीं नैइं; बल्कि तुस्न अलग केरने चहतन, कि तुस तैने दोसत बनाथ। ¹⁸ इन भी रोडू, कि रोड़ी गलन मां हर बेले दोसत बनानेरी कोशी की गाहे, सिर्फ तैस बेले नैइं, कि जैखन आंव तुस्न सैहीं साथी राताई। ¹⁹ हे मेरे बचाव, जाँ तगर तुस्न मां मसीहेरू रूप न बने, ताँ तगर आंव तुशे लेई जरमानेरे जेरे तकालीफी मां राताई। ²⁰ मर्जी त ई भोती ए, कि हुनी तुस्न कां एइतां होरी तगरीके सैहीं जोई, किजोकी तुशे बारे मां मीं शके।

सारा ते हाजिरारी मिसाल

²¹ तुस जैना व्यवस्थारे आधीन भोने चहतथ, मीं सैहीं जोतथ, कुन व्यवस्थारी न शुनथ? ²² इन लिखोरूए, कि इब्राहीमेरां दुयइय मड्डो भोआँ; अक गुलैमनरू, ते अक जै आजाद थी तैसरू। ²³ पण जैन गुलैमनरू भोव, तैन जिसमानी रीरि सैहीं जरमू, ते जैन आजाद कौन्शां सैहीं भोव, तैन वाइदेरे मुताबिक जरमू। ²⁴ इन गलन मां कहानी ए, इना कौन्शां मना दुइय वाइदेन, अक सीनै पहाडेरु जै पुड़ गुलामे जरमतन; ते तै हाजिरा ए। ²⁵ ते हाजिरा मना अरबेरू सीनै पहाड ए, ते मौजूद यरूशलेम तैसेरे बराबरे, किजोकी जैन अज अपने बचन समेत गुलैमी मां ए। ²⁶ पण बेयोव यरूशलेम आजादे ते तैए इशी अम्मा ए। ²⁷ किजोकी लिखोरू ए, कि हे बांझ, तू जै न जास खुश भो, तीं जैस दुःख न भोए आवाज उच्ची केर, किजोकी शैरोरारी आवलाद सुहागनी केरां भी जादे। ²⁸ हे ढूलाअव, अस इझहाकेरे जेरे वाइदेरी आवलादम। ²⁹ ते जैन्चरे तैस बेले जिमेरे मुताबिक जरमोरु आत्मारो मुताबिक जरमोरु सतातो थू, तैन्चरे अज भी भोते। ³⁰ पण पवित्र शास्त्र कुन जोते? गुलैमनरी ते तैसेरे मड्डे कद, किजोकी गुलैमनरू मड्डू आजादेरे मड्डे

साथी वारस न भोल्हू।³¹ ऐलहेरे लेई हे ढ्लाअव, अस गुलाम कौन्शरे नैइं बल्कि आजाद कौन्शा म्हाम।

आजादी सुमहैलतां रखा

5 मसीह ए आजाद रानेरे लेई अस आजाद कीयोरेम; ते इस ए मां बनोरे राथ, ते फिरी गुलैमी मां न गाथ।

² हेरा, आंव पोलुस तुस्न सैहीं जोताई, कि अगर खतनो कराले, त मसीह कैरां तुस्न किछ फेइदो न भोलो। ³ फिरी भी आंव हर अकी खतनो कराने बाले जोताई, कि तैस सारी व्यवस्था मन्नी पेनी ए। ⁴ तुस जैना व्यवस्था सैहीं धर्मी भोने चहतथ, मसीह कैरां अलग ते अनुग्रह कैरां बिछडोरेथ। ⁵ किजोकी आत्मारे वजाही सैहीं, अस विश्वासे सैहीं, उमीदरे धार्मिकता बलगने लवरेम। ⁶ ते मसीह यीशु मां न खतनो, न बगैर खतनो किछ कम्म एरो ए, पण सिर्फ, जै प्रेमे सैहीं असर केरते। ⁷ तुस त रोडी दौड लवरे थी दौडने, तुस केनी रोके, कि सच्चे न मन्त्रथ। ⁸ एरी सिखर तुस कुजाने बालेरां तगरफां नैइं। ⁹ थोडू जेरू खमीर सारे सनोरे अटे खमीर केरते। ¹⁰ आंव प्रभु पुड तुशे बारे मां भरोसो रखताई, कि तुशो कोई होरो खियाल न भोए; पण जै तुस्न घबराते, तै कोई कि न भोए तैस सजा मैलनीए। ¹¹ पण हे ढ्लाअव, अगर आंव हेजू तगर खतनेरो प्रचार केरताई, त हेजू तगर स्ताव किजो गहताई; फिरी त सलीबरी ठोकर गहती राई। ¹² रोडू भोतू, कि जैना तुस्न बेचेन केरतन, तैना अलग कीये गहते।

¹³ हे ढ्लाअव, तुस आजाद भोनेरे लेई कुजवरेथ पण एरू न भोए, कि ई आजादी जिसमानी कम्मां केरे लेई मोको बने, बल्कि प्रेमे सैहीं एकी होरेरे सेवक बना। ¹⁴ किजोकी सारी व्यवस्था इसे एकी गल्ली मां पूरी भोई गहतीए, कि तू अपने पुडोसी सैहीं अपना जेरो प्रेम केर। ¹⁵ पण अगर तुस एकी होरी कटतथ ते खातथ, त खबरदार राथ, त एकी होरेरी बरबादी केरेले।

पवित्र आत्मारे जिरिये चलाने

¹⁶ पण आंव जोताई, आत्माई सैहीं चलेले, त तुस जिसमेरी खुवैशां कधी पूरी न केरेले। ¹⁷ किजोकी जिस्म आत्मारे खलाफे, ते आत्मा जिसमेरे खाफ खुवैश केरतीए, ते इना एकी होरेरे खलाफन; ऐलहेरे लेई जैना तुस केरनू चहतथ तैन केरथ। ¹⁸ ते अगर तुस आत्मारे चलाने सैहीं चलतथ त व्यवस्थारे अधीन न राए। ¹⁹ जिसमेरां कम्मां बांदन, मतलब वजनाह, गंदा कम्मां, चपलूसी। ²⁰ मूर्ती केरी पूजा, टूनो, बैर, लडाई, जलन, सरक, खलाफत, हैल्लो, विधर्म। ²¹ दुषट नशो केरनो, नाच, ते इन केरे जेरां होरां भी कम्मां, इन केरे बारे मां आंव तुस्न पेहिलू जोतां जैन्चरे पेहिलू भी जोवरूए, कि एरां कम्मां केरने बाले परमेशरेरी बैदशाहीयरो वारस नैइं भोने। ²² पण आत्मारो फल प्रेम, आनन्द, मेल, सबर, ²³ ते दया, भलाई, विश्वास, नम्रता, ते बरदाश केरनू; एरां कम्मां केरे खलाफ कोई व्यवस्था नैइं। ²⁴ ते जैना

मसीह यीशु मांन, तैनेइं जिसम तैसेरे खुवैशन सैहीं साथी सलीबी पुड चाडोरोए। ²⁵ अगर अस आत्माई सैहीं जीतेम, त आत्मरे मुताबिक चलम भी। ²⁶ अस घमण्डी भोइतां एकी होरी सैहीं न छेडम, ते न एकी होरी सैहीं जलन केरम।

एकी होरेरी फिकर केरा

6 हे ढ्लाअव, अगर कोई मैंन्हू कोन्ची पापे मां लेइहोए, त तुस जैना आत्मिकथ, बल्ले चारे सुमाला, ते अपनो भी खियाल रखा, कि तुस भी अजमैशी मां न पेथ। ² तुस एकी होरी तैसेरो भार छूवातथ, ते ऐन्चरे मसीहेरी व्यवस्था पूरी केरा। ³ किजोकी अगर कोई किछ न भोए पण फिर भी अपनो आप किछ समझे, त अपने आपे धोखो देते। ⁴ पण हर कोई अपने कम्मे परखे, ते तैखन तैस होरी केरे बारे मां नैइं पण अपने बारे मां घमण्ड केरनेरो मोको भोलो। ⁵ किजोकी हर कोई मैंन्हू अपनो भार छूलो।

⁶ जैना वचनेरी तालीम मैलतीए, तैना सब रोडी चीजन मां शिखालने बाले शामिल रखन। ⁷ धोखो न खाथ, परमेशर ठाठन मां न उडाव गाहे, किजोकी मैंन्हू जैना किछ बेते, तैने कटेलो। ⁸ किजोकी जै अपने जिसमेरे लेई बेते, तै जिसमे सैहीं विनाशेरी फसल कटेलो; ते जै आत्मारे लेई बेते, तै आत्मा सैहीं हमेशरी जिन्वारी फसल कटेलो। ⁹ अस रोडां कम्मां केरने मां हिम्मत न हारम, अगर अस ढिलले न भोम त ठीक बेले कटमेले। ¹⁰ ऐलहेरे लेई जैडी तगर मोको मल्ले सैभन सैहीं भलाई केरा; खास केरतां विश्वैसी ढ्लाअन सैहीं।

आखरी हदायत ते अभिवादन

¹¹ हेरा, मीं केरे बडे बडे लफसन मां तुस्न अपने हथे सैहीं लिखोरू ए। ¹² जेतरे लोक जिसमानी दिखावो चहतन तैना चहतन तुशो खतनो केरने लेई दबाव केरतन, सिर्फ ऐलहेरे लेई कि मसीहेरे सलीबरे वजाही सैहीं सताए गहन। ¹³ किजोकी खतनो कराने बाले एपू त, व्यवस्था पुड न चलन, पण तुशो खतनो ऐलहेरे लेई करानो चहतन, कि तुशी जिसमानी हालती पुड घमण्ड केरन। ¹⁴ पण एरू न भोए, कि आंव कोन्ची होरी गल्लरू घमण्ड केरी, सिर्फ इशे प्रभु यीशु मसीहेरे सलीबरू जैसेरी वजाही सैहीं संसार मेरी नजरी मां ते आंव संसारेरे नजरी मां सलीबी पुड चाडोरोई। ¹⁵ किजोकी न खतनो, ते न खतनो भोनो कोई चीजे, पण नोईं स्रष्टि। ¹⁶ ते जैना इस कानूने पुड चलतन ले तैन पुड, ते परमेशरेरे इस्त्राएले पुड, शान्ती ते दया भोती राए। ¹⁷ अगरोवं जो कोई मीं दुःख न दे, किजोकी आंव यीशु एरे दाघन अपने जिसमे मां फीरताई।

¹⁸ हे ढ्लाअव, इशे प्रभु यीशु मसीहेरो अनुग्रह तुशे आत्मा सैहीं साथी भोए। आमीन।

इफिसियों

1 पौलुसेरे तरफां जै परमेशेरी मेरजी सैहीं यीशु मसीहेरो प्रेरिते, तैन पवित्र ते मसीह यीशु मां विश्वासी लोकां केरे नोंवे जैना इफिसुस मां आन।
2 इशे बाजे परमेशर ते प्रभु यीशु मसीह कैरां तुस्न अनुग्रह ते शान्ति मल्लती राहे।

मसीह मां आत्मिक उमीद

3 इशे प्रभु यीशु मसीहेरे परमेशर, ते बाजी केरु शुक्र भोए, कि तैनी असन मसीह मां सुर्गएरे ठैरी सैभी किसमेरी बरकत दिती। 4 जैचरे तैने अस संसार बनानेरे पेहिली तैस मां चुने, कि अस तैस कां प्रेमे मां पवित्र ते बेइलजाम भोम। 5 ते एपनी मेरजी सैहीं अपने लेई पेहिले ठैराए, कि यीशु मसीहेरे जिरीये अस तैसेरां लेपालक मड्डां भोम। 6 कि तैसेरे अनुग्रहेरे महिमारी स्तुति भोए, जै तैने असन तैस टुलारे मां मुफ्त दितो। 7 असन तैसेरे लेव्हे सैहीं छुटकारो, मतलब पापां केरी माफी, तैस अनुग्रहेरे धनेरे मुताबिक मल्लोरीए। 8 जैन तैनी सारे ज्ञान ते समझ सैहीं साथी असन पुड़ अढंगू किव। 9 कि तैने अपनी मेरजरो भेद तैस दौलतरे मुताबिक असन जौव; जै तैने अपने आपे थापोरो थू। 10 कि वक्रत पूरो भोनेरो इनतजाम भोए, कि जैन किछ सुर्गए मां भोए, ते जैन किछ जमीनी पुड़ भोए, सब किछ मसीह मां अकोटू केरे।
11 तैसे मां जैस मां अस भी तैसेरे मेरजी सैहीं जै एपनी मर्जी सैहीं अपने मतेरे मुताबिक सब किछ केरते थी, पेहिले ठैरेइतां मीरास बने। 12 कि अस जैनेइं पेहिले मसीह पुड़ उमीद रखोरी थी, तैसेरी महिमारे स्तुतारी वजाह भोम। 13 ते तैसे मां तुस्न पुड़ भी जैखन तुसेइं सचेरो वचन शुनो, जै तुशे मुक्तरे सूसमाचारे, ते जैस पुड़ तुसेइं विश्वास केरो, वाइदो केरे पवित्र आत्मारी छाप लगी। 14 तै तैसेरे घिनोरां केरे छुटकारेरे लेई इशे जैदादारो बयानोए, कि तैसेरे महिमारी स्तुति भोए।

पौलुसेरी प्रार्थना

15 ऐलहेरे लेई, आंव भी तैस विश्वासेरी रोडी खबर शुनेइतां जै तुस्न लोकन मां प्रभु यीशु पुड़ ए, ते सब पवित्र लोकन पुड़ बादोए। 16 तुशे लेई शुक्र केरनू न शैरी, ते एपनी प्रार्थना मां तुस्न याद केरताइं। 17 कि इषो प्रभु यीशु मसीहेरो परमेशर जै महिमारो बाजीए, तुस्न एपनी पिशानी मां, ज्ञान ते प्रकाशेरी आत्मा दे। 18 ते तुशे मनेरी एछछी खुलन कि तुस बुझथ कि तैसेरे कुजाने सैहीं केरी उमीद भोतीए, ते पवित्र लोकन मां तैसेरे मीरासरे महीमारू केरु धने। 19 ते तैसेरी सामर्थ इशे पासे जैना विश्वास केरतम, केतरी महाने, तैसे शेकतरो असर तैसेरे कम्मां केरे मुताबिक। 20 जैना तैने मसीहेरे बारे मां कइयाँ कि तैस फटसन मैरां जीते केरतां सुवर्गए मां अपने देहिने पासे। 21 हर किसमेरी हकौमत, ते आधिकार, ते सामर्थ, ते प्रभुतारी, ते हर नोंवे पुड़, जैन न सिर्फ इस जहानी मां, पण एजने बाले जहानी मां भी नेव गहलू बिशालो। 22 ते सब किछ तैसेरे पवन हैठ केरु: तैनी सैभी चीजन पुड़ आधिकार बनेइतां कलीसिया दितो। 23 ई तैसेरो जिसमे, ते तैसेरी भरपूरी, जै सैभन मां सब किछ पूरू केरतीए।

मौती कैरां जिन्दगरे पासे

2 ते तैने तुस भी जीते केरे, जैना अपराधन ते पापन सैहीं मरे थी।
2 जैस मां तुस पेहिले इस संसारेरे रीति पुड़, ते अम्बरेरे आधीकैरी केरी, मतलब तैस आत्मा सैहीं चलते थी, जै हेजू भी हुकम न मन्ने बालन मां

कम्म केरतीए। 3 ऐन मां अस भी सब पेहिले अपने जिसमेरे खुवैइशन मां दिहाड़े कटते थी, ते जिसम, ते मनेरी मर्जी पूरी केरते थी, ते होरी लोकां केरे सामने र्भाव सैहीं क्रोधेरी अवलाध थी। 4 पण परमेशरे जै दयारो धनीए; अपने तैस बड़े प्रेमे सैहीं, जैस सैहीं तैने असन सैहीं प्रेम कीयो। 5 जैखन अस पापन मां मरेए थी, त अस मसीह सैहीं साथी जीते कीये; (अनुग्रहे सैहीं तुस्न मुक्ति मैल्लोरीए)। 6 ते मसीह यीशु मां तैस सैहीं साथी उठाले, ते सुर्गेरे ठारैन मां बिशाले। 7 कि तै अपने तैस दयाई सैहीं जै मसीह यीशु मां असन पुड़े, एजेने बाले बेले अनुग्रहेरू घन हिराए। 8 किजोकी विश्वासे सैहीं तुस्न मुक्ति मैल्लोरीए, ते इन तुस्न कैरां नैइं भोवरूए, बल्कि परमेशेरेरू दाने। 9 ते कम्मन सैहीं नैइं, एरु न भोए कि कोई घुमण्ड न केरे। 10 किजोकी अस तैसेरे बनावरेम; ते मसीह यीशु मां तैन रोडों कम्मां केरे लेई बनावरेम जैना परमेशरे पेहिले इशे केरनेरे लेई तियार कैरां।

मसीह मां अक

11 ऐलहेरे लेई याद केरा, कि तुस जैना जिसमानी रीति सैहीं होरी कौमन, (ते जैना लोक जिसमेरे हथन सैहीं केरे खतने बालेन, तैना तुस्न खतनो रहेयत ज़ोतन) 12 तुस लोक तैस बेले मसीह कैरां अलग ते इस्राएली मैन्हू भोने कैरां अलग केरे, ते वाइदां केरे ऐहैदन कैरां दूर थी, ते न उमीद ते संसारे मां परमेशरे कैरां दूर थी। 13 पण हुनी त मसीह यीशु मां तुस जैना दूर थी, मसीहेरे लेव्हे सैहीं नेडे भोंवरेथ। 14 किजोकी तै इषो मेले, जैने दुइये अक केरे: ते अलग केरने बाली दिवार जै मझाटे थी, डोललही। 15 ते अपने जिसमे मां बैर मतलब व्यवस्था जैसेरे हुकम कानूनरे तरीके पुड़ थी, मिटाए, कि दुइयन सैहीं एपू मां अक नवो मैन्हू पैइदा केरतां मेल कराए। 16 ते सलीबी पुड़ बैरे खतम केरतां असन सैहीं दुइयन अक नोंवों मैन्हू बनेइतां परमेशरे सैहीं मिलाए। 17 ते तैने एइतां जैना तुस दूर थी, ते तैन जैना नेडे थी, दुइयन मेल मिलापेरी रोडी खबर शुनाइं। 18 किजोकी तैसेरे जिरीये इशे दुइयां केरी पावच भोतीए। 19 ऐलहेरे लेई तुस परदेशी ते मुसाफर न राहे, पण पवित्र लोकां केरु झुण्ड, ते परमेशरेरे घरानेरे भोए। 20 ते प्रेरैस्तां ते नेबी केरी बुनीयादी पुड़ जैसेरे कुनेरेरो घोड़ यीशु मसीह एपूर, बनाए जे। 21 जैस मां सारी रचना साथी मिलतां प्रभु मां अक मन्दर बनातीए। 22 जैस मां तुस भी आत्माइं सैहीं परमेशरेरे रहनेरी ठार भोनेरे लेई साथी बनाए गहतथ।

गैर कौमन मां पौलुसेरी सेवा

3 ऐलहेरे लेई आंव पौलुस जै होरी कौमां केरे लेई मसीह यीशु मां कैदइं।
2 अगर तुसेइं परमेशरेरे तैस अनुग्रहेरे इन्तजामेरी रोडी खबर शुनोरी भोए, जै तुशे लेई मीं दितो। 3 मतलब ई, कि तै भेध मीं पुड़ प्रकाशे सैहीं बाँदो भोव, जैचरे मीं पेहिलू साफ लिखोरूए। 4 जैस सैहीं तुस पैडतां बुझी बटतथ, कि आंव मसीहेरो तै भेध कोडी तगर समझताइं। 5 ते होरी होरी बेले मैन्हनू केरी ओव्लाधी ऐंचरे न थू जोवरू, जैचरे आत्माइं सैहीं हुनी तैसेरे प्रेरतन ते नेबन पुड़ बाँदू केरू। 6 मतलब ई, कि मसीह यीशु मां सूसमाचारे सैहीं होरी कौमां केरे लोक जैइदादी मां हिसेदार, ते अक जिसम ते वाइदे मां शामिल भोन।

7 ते आंव परमेशरेरे अनुग्रह सैहीं तैस दानेरे मुताबिक, जै तैसेरे शेक्ते अस्सरे सैहीं मीं दितो, तैस सूसमाचारेरो सेवक बनो। 8 मीं पुड़ जै सब पवित्र लोकन मैरां निकड़े कैरां निकड़ोई, ई अनुग्रह भोव, कि आंव मसीहेरो कीमती घनेरो सूसमाचार शुनेइं। 9 ते सैभन पुड़ ई गल्ल बांदी केरी, कि तैस भेधेरो

इन्तजाम कुने, जै सैभी चीजाँ बनाने बाले परमेशरे मां पेहिलो देंतो छपोरोए थू।¹⁰ ताकि हुनी कलीसिया जिरीये सैहीं, परमेशरेरु आलग आलग किसमेरु ज्ञान, तैन प्रधात्र ते आधीकरन पुड़, जैना सुवर्गेरु ठैरन मां आन बांदी कीव गाहे।¹¹ तैस पेहिली मेजर मुताबिक, जै तैन इशे प्रभु यीशु मसीह मां की।¹² जैस मां असन पुड़ विश्वास रखने सैहीं दिलेरी ते भरोसे सैहीं नेड़े एजनेरो अधिकारे।¹³ एलहेरे लेई आंव बिनती केरताइ कि जैना दुःख तुशे लेई मीं पुड़ लेवरेन एजने, तैन केरे वजाही सैहीं दिलेरी न शैरी, किजोकी तैन मां तुशी महिमाए।

मसीहेरो प्रेम

¹⁴ एलहेरे लेई आंव तैस बाजी कां जैधू टेकताइ, ¹⁵ जैस सैहीं सुवर्ग ते धेरतली पुड़, हर एकी घरानेरु नोंव रखू गहते। ¹⁶ कि तै एपनी महिमारे धनेरे मुताबिक तुस्न इन दान दे, कि तुस तैसेरी आत्माइ सैहीं अपनो एनत्रिं मँन्हू मां शक्ति हसल केरतां मजबूत भोते गहथ। ¹⁷ ते विश्वासे सैहीं मसीह तुशे दिले मां राहे, कि तुस प्रेमे मां जील छेडतां मुनीयाद छेडतां। ¹⁸ सब पवित्र लोकन सैहीं रोड़े चारे समझनेरी शक्ति हसल केरा; कि तैसेरी चोड़ाई, ते लमबाई, ते ऊंचाई, ते डुघार केतरोए। ¹⁹ ते मसीहेरे तैस प्रेमे सैमझी बटतथ जै समझी केरां दूरे, कि तुस परमेशरेरी भरपूरी सैहीं भरते गाथ। ²⁰ हुनी एरी जै एरहो शक्ति बालोए, जै इशी बिनती ते समझी केरां बडू जादे कम्म केरी बटते, ते तैस सामथरे मुताबिक असन मां कम्म केरते, ²¹ कलीसिया मां, ते मसीह यीशु मां, तैसेरी महिमा पीडी केरां पीडी तगर हमेशा भोती राए। आमीन।

मसीहेरे जिसमे मां इकीजो

⁴ आंव जै प्रभु मां कैदइ तुस्न कां बिनती केरताइ, कि जैचरे तुस कुजवरे थी, तैसेरे लायिक चाल भी चला। ² सैरी दीनतां ते नम्रता सैहीं साथी, ते सब केरतां एकी होरेरी झला। ³ ते इसे कोशीशी मां राथ कि एकी आत्मा मां बन्धोरे राथ। ⁴ अके जाने, ते अके आत्माए; जैचरे तुस कुजावरे थी, इशे कुजानेरी अके उमीदे। ⁵ अके प्रभुए, अके विश्वासे, अके बपतिस्मोए। ⁶ ते सैभी केरो अके परमेशर, ते बाजीए, जै सैभना बाहे, ते सैभी केरे मझाटे, ते सैभन मांए। ⁷ पण असन मैरां एकी मसीहेरे दानेरे अनदाजे सैहीं अनुग्रह मैलते। ⁸ एलहेरे लेई तै ज़ोते, कि जैखन तै उचे पुड़ चाडो, ते कैदिन छुटेइतां पेई जेव, ते मँन्हन इनाम दितू। ⁹ (तैस चाडने सैहीं, कुन मैलते सिर्फ इन कि तै धेतेरे बुनीयें आलाके मां ओसोरो भी थू। ¹⁰ ते जै ओस्सो ई तैए जै सैरी अम्बरे केरां भी उबरो जेव, कि सब किछ भरपूर भोए। ¹¹ ते तैन केतरे नबी बनेइतां, केतरे सूसमाचार शुनाने बाले बनेइतां, ते केतरे रखवाले बनेइतां ते केतरे उसताद बनेइतां दिते। ¹² जैस सैहीं पवित्र लोक सिद्ध भोन, ते सेवारु कम्म कीव गाहें, ते मसीहेरी जान तरकी केरे। ¹³ जैखन कि अस सब विश्वास, ते परमेशरेरे मझेरी पिशानी मां अक न भोम, ते अक सिद्ध मँन्हू न भोम ते मसीहेरे कदेरे अनदाजे तगर न पुजाम। ¹⁴ ताकि अस अगरोव जो बच्चे न रहम, जैना मँन्हू केरी ठगनेरी गलां ते चलेकी सैहीं तैन केरे कोशीशी सैहीं खियालां केरी, ते तालीमरी, हर एकी बयाने सैहीं उछड़ाए, ते इरां उरा घुमाए गहते भोन। ¹⁵ बल्कि प्रेमे मां सचचैई सैहीं चलते, सैभी गलन मां तैस मां जै रोडीए, मतलब मसीह मां बधते गाथ। ¹⁶ जैस सैहीं सारी जान सैभी जोडां केरी मदी सैहीं साथी मिलतां, ते साथी जुडतां तैस अस्सरेरे मुताबिक जै सैभी हिसन सैहीं भोइतां, अपने आपे बधाते, कि तै प्रेमे मां तरकी केरतो राए।

मसीह मां नोंवी जिन्दगी

¹⁷ एलहेरे लेई आंव इन ज़ोताइ, ते प्रभु मां खबरदार केरताइ कि जैचरे होरी कौमा केरे लोक अपने मनरे बेकार मेरजी पुड़ चलतन, तुस इठा पत्ती न चला। ¹⁸ किजोकी तैन केरी अकल आंधरी भोवरीए ते तै अज्ञानतारी वजाही सैहीं तैना परमेशरेरे जिन्दगी केरां अलग भोवरेन। ¹⁹ ते तैना सुन्न भोइतां, ऐशे मां लेगी जे, कि सैभी किसमेरां गन्दां कम्मां लालचे सैहीं केरन। ²⁰ पण तुसन मसीहेरी एरी तालीम नैइ मल्लोरी। ²¹ बल्कि तुसेइ सचे तैसेरी शुनी, ते

जैचरे यीशु सचे, तैसे मां शिखाले भी जे। ²² कि तुस एगरीए चाल चलनेरे पुरानी इनसानयती जै टपलाने बैली खुवैइशँ केरे मुताबिक भरष भोई गातीए, खोल्ला। ²³ ते अपने मनरे आत्मिक सुभावे मां नोंवें बनाते गाथ। ²⁴ ते नेवी इनसानयती लाथ, जै परमेशरेरे मुतिबिक सचेरी धार्मिकता, ते पवित्रता मां बनावरेन।

²⁵ एलहेरे लेई झुठ ज़ोनू शैरतां हर कोई अपने पड़ोसी सैहीं सच ज़ोए, किजोकी अस अतमाइ मां एकी होरेरे अंगम। ²⁶ क्रोध त केरा, पण पाप न केरा: दिहाड़ो डुबने तगर तुशी सरक न राहे। ²⁷ ते शैताने मोको न देथ। ²⁸ चोरी केरने बालो फिरी चोरी न केरे; बल्कि रोडां कम्मां केरने मां मेहनत केरे; इ एलहेरे लेई जैस जरूरत भोए तैस देनेरे लेई तैस कां किछ भोए। ²⁹ कोई गन्दी गल्ल तुशे ऐशी मैरां न निसे, पण जरूरतरे लेई जैन रोडू भोए, ताकि तैस सैहीं शुन्ने बाले पुड़ अनुग्रह भोए। ³⁰ ते परमेशरेरी पवित्र आत्मा दुखी न केरा, जैस सैहीं तुस्न पुड़ छुटकारेरे दिहाड़रे लेई छाप दितोरीए। ³¹ सैभी किसमेरी टलाइठार ते सरक, ते शोर, ते निन्दा ते सारो बैर भाव सैहीं तुस दूर कीयोरेथ। ³² ते एकी होरी पुड़ दया, ते माफ केरने बाले भोथ, ते जैचरे परमेशरे मसीह मां तुशे पाप माफ कीये, तैचरे तुस भी एकी होरेरे पाप माफ केरा।

लोरी सन्तान बना

⁵ एलहेरे लेई हे टलाराव, बचाँ केरे जेरे परमेशरे कां बना। ² ते प्रेमे मां चला; जैचरे मसीहे भी तुस्न सैहीं प्रेम कीयो; ते इशे लेई अपनों आप खुशबू दार मुशकरे लेई परमेशरे कां चाडतां कुरबाण केरो। ³ ते जेरु पवित्र लोकाँ केरे लेई जरूरीए, तैचरे तुस्न मां भी जनाह, ते कौंची तरीकेरु बरू कम्म न भोए, या लालचेरे बारे मां गल्ल भी न भोए। ⁴ ते न बे शरमी, न बँसरी गलां, न मेवजेरी गलां, किजोकी इना गलां शोभन्न न, बल्कि शुक्रगुजारी भोए। ⁵ किजोकी तुस इन ज्ञानतथ, कि कौंची जनाह कार, या गन्दो मँन्हू, या लालची मँन्हेरी, जै, मूरती पूजा केरने बालोए, मसीह ते परमेशरेरे बादशही मां तैसेरो कोई हिसो नैइ। ⁶ कोई तुस्न बेकार गल्लन सैहीं धोको न दे; किजोकी इने कम्मन सैहीं परमेशरेरो क्रोध हुकम न मन्ने बालन पुड़ भटकते। ⁷ एलहेरे लेई तैन केरु साथ न रखा। ⁸ किजोकी तुस त पेहिले त आँधरु थी, पण हुनी प्रभु यीशु मां लोआथ, ते लोरे बचा केरे जेरे चला। ⁹ (किजोकी लोअरो फल सैभी किसमेरी भलाई, ते धार्मिकता, ते सचे)। ¹⁰ ते इन परखा, कि प्रभु कुन रोडू लगते। ¹¹ ते आँधारारे निष्फल कम्मन मां शामिल न भोथ, बल्कि तैन पुड़ मलामत केरा। ¹² किजोकी तैन केरां छपोरां कम्मां केरी गल्ल केरनी भी शर्मए। ¹³ पण जेतेरे कमन पुड़ मलामत केरी गहतीए तैना सब लोई सैहीं बांदां भोतन, किजोकी जै सब किछ बाँदू केरते, तै लोए। ¹⁴ एलहेरे लेई तै ज़ोते, झुलने बाला उठ ते मुडदन मैरां जीतो भो, ते मसीहेरी लो तीं पुड़ चमकेली। ¹⁵ एलहेरे लेई रोड़े चारे हेरा, कि केरी चाल चलतथ; समझदारेरां केरी जेरी की बे समझां केरी जेरी। ¹⁶ ते मोको कीमती समझा, किजोकी दिहाड़े बुरेन। ¹⁷ एलहेरे लेई समझदार बना, पण ध्याने सैहीं समझा, कि प्रभुएरी मरजी कुने? ¹⁸ ते दाछरो रस पीने मां मतवाले न भोथ, किजोकी ऐस सैहीं बदचलनी भोतीए, पण आत्मा सैहीं भेरोते राथ। ¹⁹ ते एपू मामेइं भजन ते स्तुति केरते ते आत्मिक गीत ज़ोथ, ते अपने अपने मने मां प्रभुएरे लेई गीत ते किरतन केरते राथ। ²⁰ ते सदा सैभी गलां केरे लेई प्रभु यीशु एरे नोंवें सैहीं बाजी परमेशरेरु शुक्र केरते राथ। ²¹ ते मसीहेरे डरे सैहीं एकी होरेरे अधीन राथ।

कोन्श ते मुन्श

²² हे कौन्शाव, अपने अपने मुन्शां केरे अधीन राथ, जैचरे प्रभुएरे। ²³ किजोकी कौन्श मुन्शेरी करोडीए जैचरे मसीह कलीसियारी करोडीए, ते एपू जानारो मुक्ति केरने बालोए। ²⁴ पण जैचरे कलीसिया मसीहेरे आधीने, तैचरे कौन्शां भी हर गल्ली मां अपने अपने मुन्शेरे आधीन रहन। ²⁵ हे मुन्शव, एपनी एपनी कौन्शान सैहीं प्यार रखा, जैचरे मसीहे भी कलीसिया सैहीं प्यार केरतां अपनो आप तैसेरे लेई दितो। ²⁶ कि तैसेरो

वचने सैहीं पैनेरे निहाने सैहीं साफ भोइतां पवित्र बनाए। 27 ते तैसेरी जलाली कलीसिया बनेइतां एपू कां खडी केरे, जैस मां न कोई दाग, न धबो, न कोई एरी चीज भोए, बल्कि पवित्र ते बेइलजाम भोए। 28 ऐलहेरे लेई जैइजे, कि मुन्श एपनी कौन्शी सैहीं अपने जानी बराबर प्यार रखे। जै एपनी कौन्शी सैहीं प्यार केरते, तै एपू सैहीं प्यार केरते। 29 किजोकी कोंचे कधी एपनी जानी सैहीं बैर नैइं रखारो बल्कि तैसेरी हेर गेश केरीए, जैचे मसीह भी कलीसिया सैहीं केरते। 30 ऐलहेरे लेई अस तैसेरे जानरे अंगम।

31 ऐलहेरे लेई मड़द अम्मा बाजी शैरतां अपने कौन्शी सैहीं मिलोरो रालहो। 32 ई भेध त बडोए; पण आंव मसीह ते कलीसियारे बारे मां जोताइं। 33 पण तुस्न मैरां हर कोई एपनी कौन्शी सैहीं एपू बराबर प्यार रखे, ते कौन्शी भी अपने मुन्शेरो डर मन्ने।

अम्मा बाजी ते बच्चे

6 हे बचाव, प्रभु मां अपने अम्मा बाजी केरो हुकम मन्ना, किजोकी इन जैइजे। 2 अपने अम्मा ते बाजी केरी आदर केर (ई पेहिलो हुकमे, जैस सैहीं साथी वाइदे भी आन) 3 कि तेरू भलू भोए, ते तू धरतली पुड़ बडे दिहाडे जीतो रास। 4 ते हे बचन बालव, अपने बचन न सरकाथ, पण प्रभुएरी तालीम ते हदायत देइतां, तैन केरी हेर गेश केरा।

मालिक ते गुलाम

5 हे गुलामाव, जैन लोक जिसमेरे मुताबिक तुशे मालकन, एपने मनेरे सचैई सैहीं डरते, ते थरकते, जैचरे मसीह एरो, तैचरे तैन केरो भी हुकम मन्ना। 6 ते मैन्हू खुश केरेने बालां केरी जेरे हिरानेरे लेई सेवा न केरा, पण मसीहेरे दासां केरे जेरे मने सैहीं परमेशेरेरी पूरी मेरजी पुड़ चला। 7 ते तैस सेवा मैन्हू केरी नैइं, पण प्रभुएरी बुझतां केरा। 8 किजोकी तुस जानतथ, कि जे कोई जेरू रोडू कम्म केरहेलो, चाए गुलाम भोए, चाए आजाद; तैस प्रभु कैरां तेरो फल मैल्हनोए। 9 हे मालकाव, तुस भी धेमकी शैरतां तैन सैहीं तेरो बरताव केरा, किजोकी तुस जानतथ, कि तैन केरो ते तुशो दुइयां केरो मालिक सुवर्गाए मांए, ते तैन केरी तरफदारी न केरे।

आत्मिक लड़ाई ते हथियार

10 प्रभु मां ते तैसेरी शेकरे असरे मां मजबूत बना। 11 परमेशेरे सारे हथियार बन्धा; कि तुस शैतानेरी सैरी चलैकी केरे सामने मां खडे राई बटतथ। 12 किजोकी इशी ई लड़ाई, लेव्हे या मांसे सैहीं नैइं, पण प्रधान सैहीं, ते हाकमन सैहीं, ते इस संसारेरे आंधारेरे हाकमन सैहींए, ते तैस बुरैइअरे आत्मिक फौजी सैहींए जै आसमने मां आन। 13 ऐलहेरे लेई परमेशेरे सारे हथियार बन्धा, कि तुस बुरे दिहाइन मां सामनो केरी बटतथ, ते सब किछ पूरू केरतां मजबूत राथ। 14 सचेरो पटको बन्धा, ते धारमिकतारी झिलम लेइतां। 15 ते पवन्न मां मेलेरे सुसमाचार शुनाने तियैरारे बूट लाथ। 16 ते तैन सैभन सैहीं साथी विशवासेरी ढाल घिनतां मजबूत भोथ जैस सैहीं तुस तैस दुष्टेरे सब जलते तीर हिशेई बटथ। 17 ते उधारेरी टोपी, ते आत्मारी तलवार जै परमेशेरेरो वचने, नेथ। 18 ते हर बेले ते हर किसमें सैहीं आत्मा मां प्रार्थना, ते बिनती केरते राथ, कि ऐलहेरे लेई बींझे राथ, कि सब पवित्र लोकां केरे लेई लगातार बिनती केरा। 19 ते मेरे लेई भी, कि मीं वचन शुनानेरे बेले हिमत भोए, कि आंव दिलेरी सैहीं सुस्माचारेरो भेध जोई बेडी जैसेरे लेई आंव शंगलन सैहीं बन्धोरोइ राज दूताइं। 20 ते इन भी कि आंव तैसेरे बारे मां जैचरे मीं लोडे हिमती सैहीं जोइ।

आखिरी अभिवादन

21 ते तुखिकुस जै मेरो टूलारो ढलाहे, ते प्रभु मां वफादार सेवके, कि तुस भी मेरी हालत जानथ कि आंव कोस हालती मां केंचरे राताइं। 22 तै मीं तुस्न कां ऐलहेरे लेई भेजोरोए, कि तुस इशी हालती जानथ, ते तै तुशे मन्ना मां शान्ति दे।

23 बाजी परमेशर ते प्रभु यीशु मसीह कैरां ढलान शान्ति, ते विशवासे सैहीं साथी प्रेम मैल्हने। 24 जैना इशे प्रभु यीशु मसीह सैहीं सचो प्रेम केरतन, तैन सैभन पुड़ अनुग्रह भोतो राए।

फिलिप्पियों

1 मसीह यीशु एरे दास पौलुस ते तीमुथिसेरे तरफां सैभी पवित्र लोकां केरां नांवां, जैना मसीह यीशु मां भोइतां फिलिप्पी मां रहतन, रखवालन ते सेवकन समेत | 2 इशे बाजी परमेशर ते प्रभु यीशु ए केरां तुस्न अनुग्रह ते शान्ति मैलती राए |

पौलुसेरी प्रार्थना ते शुक्र

3 आंव जैखन जैखन तुस्न याद केरताई, तैखन तैखन अपने परमेशरेरु शुक्र केरताई | 4 ते जैखन भी तुशे सैभी केरे लेई बिनती केरताई, ते सदा आनन्दे सैहीं बिनती केरताई | 5 ऐलहेरे लेई, कि तुस पहिले दिहैडे केरां अज तगर सुसमाचार फैलाने मां मीं सैहीं साथी शामिल रावरेथ | 6 ते मीं इस गल्लारो भरोसोए, कि जैने तुस्न मां रोडे कम्मेरी शुरुवात कीयोरीए, तैए तैस यीशु मसीहरे दिहाडे तगर पूरू केरेलो | 7 जैइजे, कि आंव तुस्न सैभी केरे लेई एरु सोची किजोकी तुस मेरे मने मां बसोरेथ, ते मेरे कैदे मां सुसमाचाररे लेई जुवाब ते सबूत देने मां तुस सब मीं सैहीं साथी अनुग्रहे मां मीं साथिथ | 8 इस मां परमेशर मेरो गवाहे, कि आंव मसीह यीशु एरो जेरो प्रेम केरतां तुशे सैभी केरु लालच केरताई | 9 ते आंव ई प्रार्थना केरताई, कि तुशो प्रेम ज्ञान ते सैभी किसमेरो जमीर सैहीं होरे भी बधते गाथ | 10 इडी तगर तुस रोडी केरां रोडी गल्लां टलाएरी बुझा, ते मसीहरे दिहाडे तगर सचे बनोरे राथ; ते ठोकर न खात | 11 ते तैस धार्मिकतारे फले सैहीं जै यीशु मसीहरे जिरीये भोते, भेरोते गाथ जैस सैहीं परमेशरेरी महीमा ते बडयाई भोती राए |

पौलुसेरे कैदे सैहीं सुसमाचारेरी तरकी

12 हे ढलाअव, आंव सच जोताई, कि तुस इन ज्ञाना, कि मीं पुड जै बीतोरीए, तैस सैहीं सुसमाचार एरी भी बडोतरी भी भोई | 13 इडी तगर कि कैसरी बैशहरी सारी पौज ते बाकी सारे लोकन मां इन बांदू भोव कि मसीहरे लेई कैद मां आई | 14 ते प्रभु यीशु मां जै ढलाहे, तैन मैरां बडे मेरे कैद भोनेरे वजाही सैहीं आन, हिमत केरता, परमेशरेरो वचन बे धडक भोइतां ते दिलेरी सैहीं शुनानेरी कोशीश केरतन |

15 केतरे त जलन ते लडैई सैहीं मसीहरो प्रचार केरतन ते केतरे सचे दिले सैहीं | 16 किछ त इन सैझतां कि आंव सुसमाचाररे लेई जुवाब देनेरे लेई ठेरावरोई प्रेमे सैहीं प्रचार केरताई | 17 ते किछ त सिद्धयैई सैहीं नैइ पण खलाफत सैहीं मसीहरी शुनातन, इन सैमझतां कि मेरे कैद मां मेरे लेई मसीहत पैदा केरन | 18 कुन भोव? सिर्फ इन, कि हर बतां चाए बहाने सैहीं, चाए सचैई सैहीं, मसीहरी कथा शुनाई गहतीए, ते आंव इस सैहीं खुशई, ते आनन्द भी केरेलो |

जींतू रहनू मसीह मां

19 किजोकी आंव ज्ञानताई, कि तुशी बिनती सैहीं, ते यीशु मसीहरी आत्मारे दाने सैहीं इसेरो नतीजो मेरी मुक्ति भोल्ही | 20 आंव त दिले सैहीं इन चाताई, ते ई उमीद रखताई, कि आंव कोन्ची गल्ली मां छिथोई न, पण जैन्चरे मेरी बेडी कोशीशी सैहीं मसीहरी बडाई मेरे जिसमे सीं भोती राए, तैन्चरे हुना भी भोए चाए आंव जींतो रेई या मेरी | 21 किजोकी मेरे लेई जींतू रहनू मसीह, ते मरनू फेइदोए | 22 पण अगर जिसमे मां जींतू रहनू मेरे कम्मेरे लेई फेइदेमंदे त आंव न जैनी, कि कैस चुनी | 23 किजोकी आंव दुइयां केरे मझाटे फरोरोई; दिल त चाते कि मसीह कां गेई, किजोकीबडू रोडू ए | 24 पण जिसमे मां रहनू तुशे लेई होरू भी जरूरीए | 25 ते ऐलहेरे लेई कि मीं इलहेरो भरोसोए ते आंव

ज्ञानताई कि आंव जींतो रानोई, बल्कि तुस्न सैभन सैहीं साथी रानोई जैस सैहीं तुस विशवासे मां मजबूत भोते राथ ते तैस मां खुश राथ | 26 ते जैन घमण्ड तुस मेरे बारे मां केरतथ, तैन मेरे फिरी तुस्न कां एजने सैहीं यीशु मसीह मां होरू भी बद्धे | 27 सिर्फ एतरु केरा कि तुशो चाल चलन मसीहरे सुसमाचाररे काबल भोए कि चाए आंव तुस्न एइतां हेरी, चाए न एजी, तुशे बारे मां इन शुनी, कि तुस एकी आत्मा मां मजबूत भोथ, ते अक मन भोइतां सुसमाचाररे विशवासेरे लेई केरते रातथ | 28 ते कोन्ची गल्ली मां खालफत केरने बालन केरां उराथ न ई तैन केरे लेई विनाशरो साफ निशाने, पण तुशे लेई मुक्तरो, ते ई परमेशरेरे केरां ए | 29 किजोकी मसीह पत्ती तुस्न पुड ई अनुग्रह भोव कि न सिर्फ तैस पुड विशवास केरा पण तैसेरे लेई दुःख भी झल्ला | 30 ते तुसन तैन्चरे महैनत केरनीए, जैन्चरे तुसेई मीं केरां केरते लवरीए, ते हुना भी शुनतथ, कि आंव तैन्चरे केरताई |

मसीहरी दीनता ते महानता

2 ते अगर मसीह मां किछ शान्ति ते प्रेमे सैहीं हिमत ते आत्मारी मौजूदगी, ते किछ दर्द ते दयाए | 2 ते मेरो ई आनन्द पूरो केरा कि अके मन राथ ते अके प्रेम, ते अके खियाल, ते अके सोच रखा | 3 खलाफल या झुठी बडयाइयरे लेई किछ न केरा पण नर्म भोइतां एकी होरी एपू केरां रोडो समझा | 4 हर कोई अपनी फिकर नैइ, बल्कि होरी केरी फिकर केरा | 5 जैन्चरे यीशु मसीह केरो सुभाव थू तैन्चरे तुशो भी भोए | 6 जैने परमेशरेरे बराबर भोइतां भी परमेशरेरे बराबर भोने अपने कबजे मां रखनेरी चीज न समझू | 7 बल्कि अपनो आप खाली केरो, ते गुलामेरु रूप धारण केरु, ते मैन्हू केरे बराबर भोव | 8 ते मैन्हेरे रूपे मां बांदो केरतां दीन केरो, ते इडी तगर वफादार राव, कि मौत, हां, सलीबरी मौत भी झैल्ली | 9 ऐलहेरे लेई परमेशरेरे तै बडो महान भी केरो, ते तैस तैन नांव दितू जैन सैभी नांवन केरां बडूए | 10 कि सुर्गे मां ते धरतली पुड ते धरतलरे बुने; तैना सब यीशुरे नांव पुड जैधूए टेकन | 11 बाजी परमेशरेरी महीमारे लेई हर अक जिभ मन्ने कि यीशु प्रभुए |

संसारे मां चमकनू

12 ते हे मेरे टलाारव, जैन्चरे तुस सदा हुकम मनते अवरथ, तैन्चरे हुना भी न सिर्फ मीं सैहीं साथी रेइतां पण खास केरतां जैखन आंव दूर भोताई भी उरते राथ ते थरकते एपने मुक्तरु कम्म पूरू भी केरते गाथ | 13 किजोकी परमेशरे, जैने एपनी मेरजी सैहीं तुशे मने मां इछा ते काम, दुइय ए गल्लां केरो असर पैइदा केरते | 14 सब कम्मा बगैर शकैइतां ते बगैर बेसी सैहीं केरा | 15 ताकि तुस बे इलजाम ते भोले भोइतां टारे ते हठीली लोकन मां परमेशरेरी बे इलजाम सन्तान बना, (जैन मां तुस जिन्दगरो वचन धिनतां सांसारे मां बलते दीयां केरे जेरे लेई होते राथ) 16 कि मसीहरे दिहाडे मां घमण्ड केरनेरी वजा भोए, कि न मेरु दौडनू ते न मेरी महैनत बेकार भोव | 17 ते अगर मीं तुशे विशवासेरे लेई खुरबानी या ते सेवारे लेई अपनो खून भी छखनो भी पे, त फिरी भी आंव खुशाई | 18 तैन्चरे तुस भी खुश भोथ, ते मीं साथी आनन्द केरा |

तीमुथियुस ते इपफ्रीदीतुस

19 मीं प्रभु यीशु मां उमीदे, कि आंव तीमुथियुसे तुस्न कां जल्दी भेझेलो, ताकि तुशो हाल शुनतां मीं शान्ति मैल्ले | 20 किजोकी मीं एरहे सुभावेरो कोई

नैइं, जै साफ दिले सैहीं तुशी फिकर करे। 21 किजोकी अपने फेइदो तोपतन, न कि यीशु मसीहे। 22 पण तुसेई तै परखो ते पिशानो भी, कि जैन्चरे मठाठे बाजी साथी करेते, तैन्चरे तैनी मीं सैहीं साथी सुसमाचार फैलाने मां मीं सैहीं साथी महैनत केरी। 23 ते मीं उमीदे, कि जैखन मीं पत्तो चलेलो की मेरी कुन हालत भोली, तैखन आंव तैस भेझेलो। 24 ते मीं प्रभु मां भरोसोए, कि आव एपू भी जल्दी एजेलो।

25 पण मीं इपफ्रदीतुस जै मेरो ढलाहे, ते मद्द करेने बालोए ते साथी योधो ते तुशो दूते, ते जरूरी गल्लन मां मेरी सेवा टेल करेने बालोए, तुस्न कां भेझनो जरूरी समझो। 26 किजोकी तैसेरो मन तुस्न सैभन मां लगोरो थू। एलहेरे लेई बे चैन रहतो थू किजोकी तुसेई तैसेरे बुमैरारो हाल शुनोरो थू। 27 ते सच्चे बीमार त भोवरो थू, इड़ी तगर कि मरने पुड़ थू, परमेशरे तैस पुड़ दया की; ते सिर्फ तैसे पुड़ नैइं, पण मीं पुड़ भी, कि मीं पुड़ दुःख न भोए। 28 एलहेरे लेई मीं तै भेझनेरी कोशीश केरी तुस फिरी तैस सैहीं मिलता खुश भोथ ते मेरो भी दुःख घटे। 29 एलहेरे लेई तुस प्रभु मां बड़े आनन्दे सैहीं तैस सैहीं मुलाकात केरा, ते एरों केरी आदर केरा। 30 किजोकी तैए मसीहेरे कम्मरे लेई अपनी जान खतरे मां छेडतां मरने नेडो भोवरो थू, ताकि जै तुशे पासेरी मेरी सेवा मां भोई, तै पूरी केरा।

सच्ची धार्मिकता

3 हे मेरे ढलाअव, प्रभु मां आनन्दित राथ: तैना गल्लां तुस्न बार बार लिखने मां मीं त कोई कष्ट न भोए, ते इस मां तुशी सलामतीए। 2 कुतरन कैरां हुशार राथ, तैन बुरा कम्मां केरने बालन कैरां हुशार राथ। 3 किजोकी खतने बाले त अस्सम जैना परमेशरेरे आत्मारे चलाने सैहीं चलतम ते बन्दगी केरतम ते मसीह यीशु पुड़ घमण्ड केरतम ते जिसमे पुड़ भरोसो न रखम। 4 पण आंव त जिसमे पुड़ भरोसो रेखी बटताई अगर कोन्ची होरी जिसमे पुड़ भरोसो रखनेरो वचार भोए, त आंव तैस कैरां भी जादे रेखी बटताई। 5 अठोव दिहाडे मेरो खतनो भोव, इस्राएल केरे कुटमे ते बिन्यामीनेरे गोत्रे मैरां आई; इबरेनी केरो इब्रानी; व्यवस्थारे बारे मां अगर कोई जोए त फरीसीं। 6 जोशेरे बारे मां अगर कोई जोए त कलीसियाई सताने बालो; ते अगर व्यवस्थारे धार्मिकतारे बारे मां अगर कोई जोए त बेइलजाम। 7 पण जैना जैना गल्लां मेरे फेइदेरी थी तैना मीं मसीहेरे खातर नुकसान सैमझोरिन। 8 बल्कि मीं अपने प्रभु यीशु मसीहेरे पिशानारी बडयैयरे वजाही सैहीं आंव सब गल्लां नुखसान समझताई: जैसेरे वजाही सैहीं मीं बेडी चीजा केरो नुकसान उठाव, ते तैन कूडो समझताई, जैस सैहीं आंव मसीह हसल केरी। 9 ते तैस मां भोई, न कि एपनी तैस धार्मिता सैहीं, जै व्यवस्था सैहींए, बल्कि तैस धार्मिकता सैहीं जै मसीह पुड़ विश्वास केरने सैहीं भोतीए। 10 ते आंव तैस ते तैसेरे जीती भोनेरी कुदरती, ते तैस साथी दुखन मां शामिल भोनेरो पत्तो केरी, ते तैसेरी मौतरी बराबरी हसल केरी। 11 ताकि आंव कोन्ची रीति सैहीं फटरन मैरां जीते भोनेरे पदे तगर पुजी।

निशानेरे पासे दौड़नू

12 ई मतलब नैइं, कि मीं हसल केरु, या सिद्ध भोई जेव: पण तैस चीजी हसल केरनेरे लेई दौड़ने लवरोई, जैसेरे लेई मसीह यीशुए आंव टलावरो थू। 13 हे ढलाअव, मेरु इन गुमान नैइं कि मीं टलाव: पण सिर्फ अक कम्म केरताई, कि जैना गल्लां पतरोवं रेई तैन बिसरतां, अगरई गल्लां केरे पासे गहताई। 14 निशानेरे पासे दौड़तो चलताई, ताकि कि तैन इनाम मैले, जैसेरे लेई परमेशरे आंव मसीह यीशु मां बा कुजावरोई। 15 असन मैरां जेतरे सिद्धन, ईए विचार रखा, ते अगर कोन्ची गल्लि मां तुशो होरो खियाल भोए त परमेशर तैस भी तुस्न पुड़ बांदो केरेलो। 16 इड़ी तगर पुजोरेम, तैसेरे मुताबिक चलम।

17 हे ढलाअव, तुस सब मिलतां मेरी जेरी चाल चला, ते तैन केरी पिशान रखा, जैना इस रीति पुड़ चलतन जैस एरी मिसाल तुस असन मां हेरतथ। 18 किजोकी बडे एरी चाल चलतन, जैन केरी चर्चा मीं तुस्न सैहीं बार बार की ते अज भी लेरा देई देई जोताई, कि तैना अपने चाल चलन सैहीं मसीहेरे सलीबी बेरिन। 19 तैन केरो अन्त विनाशे, तैन केरो इक्षर पेटे, तैना एपनी

श्रमरी गल्लन पुड़ घमण्ड केरतन, जमीनारी गल्लन पुड़ मन लातन। 20 पर इधो मुख सुवर्ग, ते अस एकी मुक्ति देने बाले बलगने लवरेम। 21 तैए एपनी शक्ति सैहीं तैस अस्सेरे मुताबिक जैस तैना सब चीजन अपने वशे मां केरी बटते, इशे कमजोर हीन जिसमे रू रूप बदलतां, अपने महिमारो जिसमेरे मुताबिक बनालो।

4 एलहेरे लेई हे मेरे टलारे ढलाअव, जैन मां मेरो दिल लगोरो रहते जै मेरो आनन्द ते ताज भोए, हे टलारे ढलाअव, प्रभु मां ऐन्चरे मजबूत राथ।

इलाहाँ केरी हदायत

2 आंव यूओदिया भी समझताई, ते सुन्तुखे भी, कि तै प्रभु मां अक मन रहन। 3 ते हे सच्चे मद्दगारा आंव तीं कां भी बिनती केरताई, कि तू तैन कौन्शां केरी मद्द केर, किजोकी तैनेइं मीं सैहीं साथी सुसमाचार फैलाने मां, क्लेमस ते मेरे तैन मद्द केरने बालन समेत महनत की, जैन कैरां नोंवां जिन्दगरे किताबी मां लिखोरन।

4 प्रभु मां सदा आनन्दित राथ; आंव फिरी जोताई, आनन्दित राथ। 5 तुशे नरममजाजी सैभी मैहन्न पुड़ बांदी भोए: प्रभु नेडोए। 6 कोन्ची भी गल्लारी फिकर न केरा: पण हर एकी गल्लि मां तुशी दरकावास, प्रार्थना बिनती सैहीं शुके साथी परमेशरे कां हाजर भोन। 7 तैखन परमेशरेरी शान्ति, जै समझी केरा बिलकूल बेइरे, तुशे दिलन ते तुशे खियालन मसीह यीशु मां बिलकूल मैफूज रखेली।

8 हे मेरे ढलाअव, जैना जैना गल्लां सचीन, ते जैना जैना अदरेरे काबलन, ते जैना जैना गल्लां पवित्रन, ते जैना जैना गल्लां रोडिन, ते जैना जैना गल्लां मने रोडी लगतिन, ते, जैना जैना गुण ते जैना जैना गल्लां तरीफेरी, तैन पुड़ ध्यान केरा। 9 जैना गल्लां तुसेई मीं कैरां शिखी, ते कबूल की, ते शुनी ते मीं हेरी, तैन केरो हुकम मन्ना तैखन परमेशर जै शान्ति देने बालोए तुस्न साथी भोल्हो।

दानेरे लेई शुक्र

10 आंव प्रभु मां बडो खुशई कि हुनी एतरे दिहाडन पत्ती तुशो खियाल मेरे बारे मां फिरी भोव; याकीन्न तुशे शुरूवाती मां इस एरो खियाल थू, पण तुस्न मोको न मैलो। 11 इन नैइं कि आंव अपनी कम्मारे वजाही सैहीं जोताई; किजोकी आंव इन शिखालताई कि जैस हालती मां आई, तैस मां खुश भोथ। 12 आंव नर्म भोनू भी जानताई ते बडो भोनो भी जानताई: हर एकी गल्लि ते सैभी हालतन मां रजनू, ढलाखनू ते बधनू घटनू शिकोरुए। 13 जै मीं ताकत देते तैस मां आंव सब किछ केरी बटताई।

14 फिरी भी तुसेई रोडू कीव, कि मेरे दुखे मां मीं साथी भोए। 15 ते हे फिलिप्पियो, तुस एपू भी जानतथ, कि सुसमाचार प्रचाररे शुरूवाती मां जैखन मीं मकिदुनया अगरोव गेहितां तैन तुस शारे ते कोन्ची मनडला लेने देनेरे बारे मां मद्द न की। 16 ऐन्चरे जैखन आंव थिस्सलुनीके मां थू: तैखन भी मीं मेरी घटी पूरी केरनेरे लेई एकी बार कुन बल्कि दुइय बार किछ भेझेरु थू। 17 इन नैइं कि आंव चहताई पण आंव एरो फल चहताई, जै तुशे फेइदेरे लेई बडतो गाहे। 18 मीं कां सब किछे, बल्कि आढंगू भीए: जैना तुसेई इपफ्रदीतुसेरे हथे भेजोरी थी, तैन मैल्लां रजोरोई, तै त मुशक ते कबूल केरनेरे काबल कुरबानीए, जै परमेशरे पसंदे। 19 ते मेरो परमेशर भी अपने तैस धनेरे मुताबिक जै महिमा सैहीं यीशु मसीह मां ए तुशी हर अक जरूरत पूरी केरेलो। 20 इशो परमेशर ते बाजी एरी महीमा सदा भोती राए। आमीन।

आखरी नमशकार

21 हर अक पवित्र मैन्हु जै जै यीशु मसीह मां ए तैस जो नमशकार जोथ। जै ढला मीं साथी ए तुस्न नमशकार जोते। 22 सब पवित्र लोकन, खास केरतां जैना केसरे घरानेरेन तुस्न नमशकार जोतन।

23 इशे प्रभु यीशु मसीहेरो अनुग्रह तुशी आत्माई सैहीं साथी राहे।

कुलुस्सियों

अभिवादन

1 पौलुसे तरफां, जै परमेशेरी मेरजी सैहीं मसीह यीशु एरो प्रेरिते, ते दूलाह तीमुथियुसेरे तरफां। 2 मसीह मां तैन पवित्र ते विश्वासी दूलाहां केरे नोंवे जैना कुलुसे मां रहतन।
इशे बाजी परमेशर कैरां तुस्न अनुग्रह ते शान्ति हसल भोती राए।

शुकरेरी प्रार्थना

3 अस तुशे लेई लगातार प्रार्थना केरतां अपने प्रभु यीशु मसीहेरे बाजी मतलब परमेशेरु शुक्र केरतम। 4 किजोकी असेई शुनोरु, कि मसीह यीशु पुड तुशो विश्वासे, ते सैभी पवित्र लोकन सैहीं प्रेम केरतथ। 5 तैस उमीद केरी चीजारे वजाही सैहीं जै तुशे लेई सवर्गे मां रखोरौ, जैसेरे बारे मां तुसेई तैस सुसमाचारे सचे वचने सैहीं शुनोरुए। 6 जै तुस्न कां पुजोरुए ते जैन्चरे संसारे मां भी फल आनते, ते बधतो गहते; मतलब जैस दिहैडी कैरां दँतेरु तुसेई तै शुनो, ते सचैई सैहीं परमेशेरु अनुग्रह पिशानो, तुस्न मां भी एरु केरी बटते। 7 तैसेरी तालीम तुसेई इशे टलारे मद्गारे इपफ्रास कैरां मैली, जै इशे लेई मसीहेरो वफादार सेवके। 8 तैनें तुशो प्रेमे जै आत्मा मां असन पुड बांदो केरो।

9 एलहेरे लेई जैस दिहैडी कैरां इन शुनु, अस भी तुशे लेई प्रार्थना केरने ते बिनती केरने सैहीं न चूके कि तुस सारे आत्मिक ज्ञान ते समझी सैहीं परमेशेरी मेरजरे पिशानी मां भरोतो गाथ। 10 ताकि तुशो चाल चालन प्रभुएरे लायिक भोए, ते तै सैभी किसमे सैहीं खुश भोए, ते तुस्न मां हर रोडे कम्मरो फल लग्गे, ते परमेशेरी पिशानी मां बधते गाथ। 11 ते तैसेरी महिम रे शेक्तुमुरे मुताबिक सैभी किस्मेरी शक्ति सैहीं मजबूत भोते राथ, इडी तगर कि आनन्दे सैहीं हर किसमेरे सबर ते बरदाशत हिरेई बटतथ। 12 ते बाजी केरु शुक्र केरते राथ, जैने अस इस काबल बनाए कि लोई मां पवित्र लोकन सैहीं साथी हिसेदार भोम। 13 तैने अस आंधरे मैरां छुटेइतां अपने टलारे मट्टेरे बैदशाही मां दाखल कराए। 14 जैस मां असन छुटकारो मतलब पापां केरी माफी हसल भोतीए।

मसीहेरी श्रेष्ठता ते तैसेरां कम्मां

15 तै त आलाए परमेशेरु रूप ते सैरी सृष्टि मां जेठो भोए। 16 किजोकी तैस मां सैसी चीजां पैइदा केरी, चाए आसमानेरी भोंण या जमीनेरी भोंण, लेव्हेरी भोंण या आलेही, कुन तखत भोंण, या रयासतां, कुन हकौमतां भोंण या अधीकार, सैरी चीजां तैसे सैहीं ते तैसेरे लेई बनेई। 17 ते तै सैभी चीजन मां पेहिलोए, ते सैभे चीजां तैस मां बेनी रैतिन। 18 ते तै जिसम, मतलब कलीसियारी करोडीए; तैए पेहिलोए ते फटरन मैरां जीतो भोने बालन मैरां जेठोए कि सैभी गल्लन मां तैए प्रधान भोए। 19 किजोकी बाजी इसे मां खुश भोते कि तैस मां सारी भरपूरी वास केरे। 20 ते तैसेरे सलीबी पुड बगावरे लेव्हे सैहीं मेल मलाप केरतां, सैभी चीजां केरो मेल एपू साथी केरे, चाए तैना धर्तरी भोन, चाए स्वर्गेरी भोन।

21 ते तैने हुनीपनी जिसमानी जानी मां मौती सैहीं तुशो भी मेल केरो जैना पेहिले कढोरे थी ते बुरे कम्मन सैहीं मनेरे बेरी थी। 22 ताकि तुस्न अपने कां पवित्र ते बे कसूर, ते बे इलजाम हजर केरे। 23 अगर तुस विश्वासेरे बुनीयादी पुड मजबूत राथ, ते तैस सुसमाचाररे उमीद पुड जै तुसेई शुनोरु ए न शारथ,

जैस एरो परचार अम्बरे करां बुनेई सैरी सृष्टि मां कीयो जेव; ते जैस मां पौलुस सेवक बनो।

कलीसियारो सेवक - पौलुस

24 हुनी आंव तैन दुखन सैहीं खुशाई, जैना तुशे लेई झल्लताई, ते मसीह एरी दुखां केरी घटी तैसेरे जानारे लेई, मतलब कलीसियारे लेई, अपने जिसमे मां पूरी केरताई। 25 जैसेरो आंव परमेशेरे इन्तजामेरे मुताबिक सेवक बनो, जै तुशे लेई मीं सोफो, ताकि आंव परमेशेरो वचन पूरो पूरो प्रचार केरी। 26 मतलब तैस भेदे जै जमाना ते पुशतन कैरां छपारो थू, पण हुनी तैसेरे तैन पवित्र लोकन पुड बांदो भोवरोए। 27 जैन पुड परमेशेरे बांदो केरनो चाओ, कि तैन ज्ञान भोए होरी कौमन मां तैस भेदेरी महिमारी कीमत कुने ते तै ईए, कि मसीह जै महिमारी उमीदे तुस्न मां रहते। 28 जैसेरो प्रचार केरतां अस हर एकी मैन्हु जोतम ते सारे ज्ञाने सैहीं हर एकी मैन्हु शिखालतम, कि अस हर एकी मैन्हु सिद्ध केरतां पेश केरम। 29 ते एलहेरे लेई आंव तैसेरी शेक्तेरे मुताबिक जै मीं मां समर्थी साथी असर केरतीए तन मन लेइतां मैहनत भी केरतम।

2 आंव चहताई कि तुस् जानथ, कि तुशे ते तैन केरे जैना लौदीकिया मां आन, ते तैन सैभी केरे लेई जैनेई आंव नैइ लवलो आंव केन्चरे महैनत केरताई। 2 ताकि तैन केरे मन्न मां शान्ति भोए ते तैना प्रेम सैहीं एपू मांमेई बनोरे रहन, ते तैस पूरी समझरु धन हसल केरन, बाजी परमेशेरे भेदे मतलब मसीह पिशात्र। 3 जैस मां समझरे ते ज्ञानेरे सारे भण्डदार छपोरेन। 4 इन आंव एलहेरे लेई जोताई, कि कोई मैन्हु तुस्न लालच देंने बैली चीजी सैहीं धोखो न दे। 5 किजोकी आंव अगर जिसमेरे लिहाझे सैहीं दूराई, फिरी भी आत्मिक लिहाझे सैहीं नेडोई, ते तुशे रीति सैहीं तुशी हालती ते तुशे विश्वासे मां जै मसीह यीशु मां मजबूते हेरतां खुश भोव।

मसीह मां जिन्दगरी भरपूरी

6 ते जैन्चरे तुसेई मसीह यीशु अपनो प्रभु कबूल करौए, तैन्चरे तैस मां चलते भी राथ। 7 ते तैस मां जील छडते राथ ते बधते राथ; ते जैन्चरे तुस शिखालोरेथ तैन्चरे विश्वासे मां मजबूत भोते गाथ, ते खुब शुक्र केरते राथ। 8 खबरदार राथ कि तुस कोई तैसेरे ज्ञाने ते धोखे सैहीं शिकार न केरे, जैन मैन्हु केरु रुवाजेरु ते संसारेरी पेहिली तालीमारे मुताबिके पण मसीहेरे नैइं। 9 किजोकी तैस मां ईश्वरत्वेरी सारी भरपूरी जानी मां एइतां वास केरती। 10 ते तुस तैस मां भेरोरेथ जै सैरी हकौमती ते अधिकारेरी करोडीए। 11 तैसे मां तुशो एरो खतनो भोरुए, जै हाथेरो नैइं, मतलब मसीहेरो ए खतनो, जैस सैहीं जिसमानी जान कडी गहतीए। 12 ते तैसे सैहीं साथी बपतिस्मे मां दबे जे, ते तैसे मां परमेशेरी शेक्ति पुड विश्वास केरतां, जैने तै मुडदन मैरां जीतो केरौ, तैस सैहीं साथी जीते भी भोव। 13 ते तैने तुस भी, जैना अपने पापन, ते अपने जिसमेरे खतनेरे हालती मां फटरे थी, तैस सैहीं साथी जीते भी केरे, ते इशे सब पाप माफ केरे। 14 ते विधी केरो तै लेख जै इशे नोंवे पुड ते इशे खलाफ थू मटाव; ते तैस सलीबी पुड किल देइतां दूर केरो। 15 ते तैने प्रधात्र ते अधिकैरन एपू पडां उसैलतां खुलो मुखूलो तुमाशां बनाव ते सलीबी सैहीं जय जय कार भी केरु।

16 एलहेरे लेई खानू पीनू या तीहर या नोंवीं चांदनी, या सबतां केरे बारे मां तुशो कोई फेसलो न केरो। 17 किजोकी सब एजने बैली गल्लां केरी छावे, पण असली चीजां मसीहेरिन। 18 कोई मैन्हु दीनता ते सुवर्गदूतां केरी पूजा पसन्द

केरतां तुशी दौडरे इनामे कैरां दूर न रखे। एरो मँन्हू लेवरी गल्लां मां लगोरो रहते ते एपनी जिसमानी समझी पुड़ बेफैइदो फुलते। 19 ते तैस करोडी टलेइतां न रखन जैस सैहीं सारो जिसम जोडन ते पठां केरे हफाजती सैहीं ते एकी सैहीं साथी जुडतां, परमेशरे तरफां बधतो गहते।

स्सिः सैहीं साथी जीनू ते मरनु

20 जैखन कि तुस मसीह सैहीं साथी संसारे पेहिली तालीमी सैहीं मरोरेथ, त फिरी तैन केरेजरे जैना संसारे मां जिन्दगी बीतातन मँन्हू केरे हुकम ते तालीम सैहीं 21 ते एरी तालीम मां किजो रहतथ कि इस सैहीं नैइ हूरनु, ऐन नैइ खानू, ते तैस सैहीं हथ नैइ लानो? 22 (किजोकी इना सब चीजां कम्मे मां आनते आनते नाश भोई गैली)। 23 इन गल्लन मां एपनी मेरजरी मुताबिक अपनी बनावरी भेगती सैहीं, ते दीनता, ते जिसमानी कोशीशी सैहीं ज्ञानेरु कम्म त आए, पण जिसमानी खुवैशन रोकने मां इन सैहीं किछ भी फैइदो न भोए।

3 ते जैखन तुस मसीह सैहीं साथी जीतो कीये, त सुवर्गेरी चीजां केरे तोपमो मां राथ, जैडी मसीह मौजूदे ते परमेशरे देइने पासे बिशोरोए। 2 धेरतरे नैइ पण सुवर्गेरी चीजन पुड़ धियान लाथ। 3 किजोकी तुस त मरे, ते तुशी जिंदगी मसीह सैहीं साथी परमेशरे मां छपोरुए। 4 जैखन जै इशी जिन्दगीए, बादी भोल्ही, तैखन भी तैस सैहीं साथी महिमा साथी बांदे कीये गाले।

पुरानी ते नोंवी जिन्दगी

5 ऐलहेरे लेई अपने तैन अंगन मैरी देथ, जैना धरतली पुड़ आन, मतलब जनाह, गन्दगी, बुरे खियाल, बुरी खुवैइश ते लालचे जैन मूरती पूजन बराबरे। 6 इन केरे वजाही सैहीं परमेशरे कोध हुकम न मन्ने बालन पुड़ एइते। 7 ते तुस भी, जैखन इन बुरेइन मां जिन्दगी बीताते थी, त इन केरे मुताबिक चलते भी थी। 8 पण हुनी तुस भी इन सैभन मतलब कोध, सरक, बैर, निन्दा, गैई देनी इना सब गल्लां शारा। 9 एकी होरी सैहीं झूठ न जोथ किजोकी तुसेइं पुरानी इनसानयत तैसेरे कम्मन समेत खोलोरीए। 10 ते नोंवी इनसायत लवरीए जै अपने बनाने बालेरे रूपेरे मुताबिक ज्ञान हसल केरनेरे लेई नोंवी बनातीए। 11 तैस मां न कोई यूनानी राव, न यहूदी, न बगैर खतने बालो, न जंगली, न स्कूती, न गुलाम न आज्ञादः सिर्फ मसीह सब किछ ते सैभन मांए।

12 ऐलहेरे लेई परमेशरेरें चूनैरों केरे जेरे जैना पवित्र ते टलारेन, बडी, ते दूला, ते दीनता, ते नम्रता, ते बरदाशत धारण केरा। 13 ते अगर कोंन्ची कोंन्ची पुड़ दोष देनेरी वजा भोए, त एकी होरेरी झैल्ला, ते एकी होरेरे पाप माफ केराः जैन्चरे प्रभुए तुशे पाप माफ केरे, तैन्चरे तुस भी केरा। 14 इन सैभन कैरां बा प्रेमे जै सैभन सिद्धो पटकोए बंधा। 15 ते मसीह एरी शान्ति जैसेरे लेई तुस अक जान भोनेरे लेई कुजवरे भी आथ, तुशे दिलन मां बादशाही केरे, ते तुस शुक्र केरते राथ। 16 मसीहेरे वचन अपने दिलन मां रोडे चारे बसने देथ; ते सिद्ध ज्ञाने सैहीं एकी होरी शिखाला, ते नसीहत देथ, ते अपने अपने मन्न मां अनुग्रहे साथी परमेशरेरे लेई भजन ते स्तूति ते आत्मिक गीत जोते राथ। 17 ते वचन या कम्म जैन किछ भी केरा सब यीशु एरे नव्वे सैहीं, ते तैस एरे जिरी ए बाजी परमेशर एरु शुकर केरा।

नोंवे जिन्दगरे परिवारे मां नीयम

18 हे कौन्शाव, जैन्चरे प्रभु मां जैइजे, तैन्चरे अपने अपने मुन्शां केरे अधीन राथ। 19 हे मुन्शाव, एपनी एपनी कौन्शान सैहीं प्रेम रखा, ते तैन सैहीं सखत बरताव न केरा। 20 हे बचव, सैभी गल्लन मां अपने अपने अम्मा बाजी केरो हुकम मन्ना, किजोकी प्रभु इस सैहीं खुश भोते। 21 हे बचन बालव, अपने बाचन तंग न केरा, एरु न भोए कि तैन केरो दिल टलाउटे। 22 हे सेवकाव, जैना जिसमेरे मुताबिक तुशे मालकन, सैभी गल्लन मां अपने मालकां केरो हुकम मन्ना, मँन्हन खुश केरनेरे बालां केरे जेरे हिरानेरे लेई नैइं, पण सचे मने सैहीं ते परमेशरेरे डरे सैहीं। 23 ते जैन किछ तुस केरतथ, तैन मने सैहीं केरा, इन समझतां कि मँन्हू केरे लेई नैइं पण प्रभुएरे लेई केरतथ। 24 किजोकी तुस जानतथ कि तुस्न एसेरे बदले प्रभु कैरां बदले मां मीरास मैल्लनीएः तुस प्रभु यीशु मसीहेरी सेवा केरतथ। 25 किजोकी जै बुराई केरते, तैस एपनी बुरैइयरो फल मैल्लनोए; तैडी केंचैरी तरफदारी नैइं।

4 हे मालकव, अपने अपने गुलामन सैहीं साथी इनसाफ ते ठीक ठीक बरताव केरा, इन समझतां कि सुवर्गे मां तुशो भी अक मालिके।

किछ व्यावहारे लेई सल्लाह

2 प्रार्थना मां लगोरे राथ, ते शुक्र सैहीं साथी हूशार राथ। 3 साथी इशे लेई भी प्रार्थना केरते राथ, कि परमेशर इशे लेई शुनानेरे लेई एरी बत खोले, कि अस मसीहेरे तैस भेद्वेरे बारे मां जोई बटम जैसेरे लेई आंव कैदे मां आई। 4 ते तैस बांदो केरी, जैन्चरे मीं केरौ लोडे। 5 वखत कीमती सैमझतां बेइरन साथी सैमझदैरी सैहीं बरताव केरा। 6 तुशो वचन सदा अनुग्रहे सैहीं ते एरो लूनो भोए, कि तुस्न हर एकी मँन्हू रोडे चारे जुवाब देनो एजे।

आखरी अभिवादन

7 पराये दूला ते वफादार सेवक, तुखिकुसे जै प्रभु मां मेरो मद्दगारे, मेरी सैभी गल्लन मां तुस्न जोल्हो। 8 तै मीं ऐलहेरे लेई तुस्न कां भेइयो, कि तुस्न इशी हालतरो पतो भोए ते तै तुशे दिलन शान्ति दे। 9 ते तैस सैहीं साथी उनेसिमुस भी भेइयो जै वफादार ते टलारो दूलाहे ते तुसन मैरां ए, ते तुस्न इडी तगर कीदयारी गल्लां जोल्हो। 10 अरिस्तखुर्स जै मीं सैहीं साथी कदीए, ते मरकुस जै बरनबारो दूलाहे लगते। (जैसेरे बारे मां तुस्न हुकम मैल्लोरो थू कि अगर तै तुस्न कां एजे, त तैस सैहीं रोडे चारे बरताव केरथ) 11 ते यीशु जै जो यूस्तुस जोतन, तुस्न नमशकार जोते। खतनो केरें लोकन मां सिर्फ ई ए परमेशरेरे बैशाहरे लेई मद्दगार ते मेरे शैन्तरी वजा राए। 12 इपफ्रास जै तुस्न मैरां ए, ते मसीह यीशु एरो दासे, तुस्न जो नमशकार जोते ते सदा तुशे लेई प्रार्थना केरते, ताकि कि तुस सिद्ध भोइतां पूरे विशवासे सैहीं साथी परमेशरेरे मेरजी पुड़ मजबूत राथ। 13 आंव तैसेरो गुवाही, कि तै तुशे लेई ते लौदीकया ते हियरापुलिस बालां केरे लेई बडी कोशीश केरतो रहते। 14 टलारे तबीब लूका ते देमासेरु तुस्न नमशकार। 15 लौदीकियारे दूलान ते तुमफास ते तैन केरे घरेरे कलीसियान नमशकार जोनु। 16 ते जैखन ई चिड्डी तुशे इडी पडी गाए, त एरु केरनु कि लौदीकियारे कलीसिया मां भी पडी गाए, ते तै चिड्डी जै लौदीकियारां एजे तैस तुस भी पेइथ। 17 फिरी अखिप्पुरस सैहीं जोयथ कि जै सेवा प्रभु मां तीं सोफी, तैस बडे हुशैरी सैहीं पूरी केरथ।

18 आंव पौलुस अपने हथन सैहीं नमशकार लिखताइ। मेरी शंगलन याद रखा; तुस्न पुड़ अनुग्रह भोतो राए। आमीन।

1 थिस्सलुनीकियों

अभिवादन

1 पौलुस ते सिलवानुस ते तीमुथियुसेरे तरफाँ थिस्सलुनीकियों केरे कलीसियारे नोंवे, जै इशे बाजी परमेशर, ते प्रभु यीशु मसीह मां ए : अनुग्रह ते शान्ति मैलहती राहे |

थिस्सलुनीकियों केरो विश्वास

2 अस अपने प्रार्थनान मां तुस्न याद केरतम, ते सदा तुशी सैभी केरे लेई परमेशेरुशुक्र केरतम | 3 ते अपने परमेशर, ते बाजी केरे सामने तुशे विश्वासेरां कम्मां, ते प्रेमेरी मेहनत, ते इशे प्रभु यीशु मसीह मां उमीदारे सबरी सदा याद केरताई | 4 ते हे ढूलाव, परमेशेरु टलारे लोकव अस जानतम, कि तुस चुनोरेथ | 5 किजोकी इषो सुसमाचार न सिर्फ लफसन मां पुजो बल्कि समर्थ, ते पवित्र आत्मा, ते बडे याकीने सैहीं सैहीं साथी पुजो; जैचरे तुस जानतथ, कि अस तुशे लेई तुस्न मां केरहे बनोरे थी | 6 ते तुस बडे मसीबती मां पवित्र आत्मार आनन्द सैहीं साथी वचने मैनतां इशे ते प्रभुएरी चाल चलने लाए | 7 इडी तगर कि मकिदुनिया ते अख्यारे सैभी विश्वैसी लोकां केरे लेई तुस अक मसाल बनाथ | 8 किजोकी इठां न सिर्फ मकिदुनिया, ते अखाया मां प्रभुएरो वचन शुनाव जेव, पण तुशे विश्वासेरी जै परमेशरे पुड, हर ठैरी चर्चा फेलोरीए, कि असन ज़ोनेरी ज़रूरत नैइं | 9 किजोकी तैना एपू इशे बारे मां ज़ोतन कि तुस्न कां एजनू केरु भोव; ते तुस केरे मुस्रन केरां परमेशेरु पासे फिरे ताकि ज़ीते ते सचे परमेशेरु सेवा केरथ | 10 ते तैसेरु मडू सुवर्गों एजने तगर बलगते राथ, जै तैने मुडदन मैरां ज़ीतो केरो, मतलब यीशुए, जै असन एजने बाले प्रकोपे केरां बचाते |

पौलुसेरु प्रचारेरु कम्म

2 हे ढूलाव, तुस एपू जानतथ कि मेरु तुस्न कां एजनू बे फेइदू न भोव | 2 बल्कि तुस एपू जानतथ, कि पहिले फिलिपी मां दुख झलने, ते मसीबत झलने पुड भी इशे परमेशेरु असन दिलेरी दिती, कि अस परमेशेरु सुसमाचार बडी खलाफत भोते भी तुस्न शुनाम | 3 किजोकी इशी तालीम न घमण्डे सैहीं ए न गंदगी सैहीं ए, ते न दुष्टे सैहीं | 4 पण जैचरे परमेशेरु अस इस काबल बनेइतां असन ई सुसमाचार सौफो, अस तैचरे बयान केरतम; ते आंव मैन्हन नैइं, बल्कि परमेशेरु, जै इशे मन्न परखते, खुश केरते | 5 किजोकी तुस जानतथ, कि असेई कधी चपलां केरनेरी गलां नैइं करी, ते न लालचेरे लेई बहानो केरते थी, परमेशर गवाहे | 6 ते अगर अस मसीहरे प्रेरत भोनेरे वजाही सैहीं बोझ रेखी बटते थी, फिर भी अस मैन्हन केरां आदर न चाते थी, ते तुस्न सैहीं, न होरी काँची सैहीं | 7 पण जैचरे अम्मा अपने मड्डां केरी हेरगेश केरतीए, तैचरे असेई भी तुस्न मां रेइतां रोडो सुभाव हीराव | 8 ते तैचरे अस तुशू लालच केरते, न सिर्फ परमेशेरु सुसमाचार, पण अपने अपने प्राण भी तुस्न देनेरे लेई तियार थी, एलहेरे लेई तुस इशे टलारे भोई जेवरे थी | 9 किजोकी, हे ढूलाव, तुस इशी मेहनत ते कष्टे याद रखतथ, कि असेई एलहेरे लेई रात दिहैडी कम्म काज केरतां तुस्न मां परमेशेरु सुसमाचार प्रचार केरो | 10 तुस एपू गूवाहथ: ते परमेशर भी, कि तुस्न मैरां जै विश्वास रखते अस केहीं पवित्रता, ते धार्मिकता ते बेइलजामे सैहीं राए | 11 जैचरे तुस्न पतोए, कि जैचरे बाजी अपने बचन सैहीं बताव केरते, तैचरे अस भी तुस्न मैरां हर केँची तालीम देते, ते शान्ति देते, ते समझते थी | 12 कि तुशू

चाल चलन परमेशेरु काबिल भोए, जै तुसन अपने बादशाही, ते महिमा मां कुजाते |

13 एलहेरे लेई अस भी परमेशेरु शुक्र लगातार केरतम; कि जैखन इशे ज़िरीये परमेशेरु सुसमाचार तुसन का पुजो, त तुसेइं तै मैन्हू केरो नैइं, बल्कि परमेशेरु वचन समझतां (ते सचे इन एरु ए) कबूल कीयो: ते तै तुस्न मां जै विश्वास रखतो भोए | असर केरने बालोए | 14 एलहेरे लेई तुस, हे ढूलाव, परमेशेरु तैन कलीसियां केरी जेरी चाल चलने लाए, जैना यहूदीया मां यीशु मसीह मां आन, किजोकी तुस्न भी अपने लोकन केरां एरो दुःख मल्लो, जैचरे तैन यहूदन केरां मल्लोरो थू | 15 जैनेई प्रभु यीशु ते नबी भी मारे, ते अस सताए, ते परमेशर तैन सैहीं खुश न भोव; ते तै सैभी मैन्हू केरी खलाफत केरते | 16 ते तै होरी कौमन सैहीं तैन केरे मुक्ते लेई गलां केरने सैहीं रोकते, कि सदा अपने पापां केरो पेमानों सदा भरते राण; पण तैन पुड बडो क्रोध एइते |

कलीसिया सैहीं मिलनेरे लेई अभिलाषा

17 हे ढूलाव, जैखन अस थोडे चीरेरे लेई मने मां नैइं बल्कि बांदे मां तुस्न केरां अलग भोवरे थी, ते असेई बडे लालचे सैहीं तुशू तुतर हेरनेरे लेई होरी भी जादे कोशीश की | 18 एलहेरे लेई (मतलब मीं पौलुसे) एकी बार नैइं बल्कि दुइय बार तुस्न कां एजनू चाव, पण शैतान अस रोके | 19 भला इशी उमीद, या आनन्द, या बड्यारु मुकट कुने? कुन इशे प्रभु यीशु कां तैसेरे एजनेरे बेले तुसे न भोल्हे? 20 इशी बडयाइ ते आनन्द तुसेथ |

तीमुथियुस भेइनां

3 एलहेरे लेई जैखन असेइं होरो भी न बेलगोव, ते असेइं इन ठैराव कि एथेन्से मां अकैले रेई गहम | 2 ते असेई तीमुथियुसे जै मसीहरे सुसमाचारे मां इषो ढूलाए, ते परमेशेरु सेवके, एलहेरे लेई भेइनां, कि तै तुस्न मजबूत केरे; ते तुशे विश्वासेरे बारे मां तुस्न समझाए | 3 कि कोई इन दुखां केरे वजाही सैहीं घबराए न; किजोकी तुस एपू जानतथ कि अस इन केरे लेई रखोरेम | 4 किजोकी पहिले भी, जैखन अस तुस्न कां थी, त तुस्न सैहीं ज़ोते थी, कि असेइं दुःख झलनो पेंनोए, ते एरु भोव, ते तुस जानतथ भी | 5 एहेरेलेई जैखन मीं केरां होरी न बेलगोव, त तुशे विश्वासेरो हाल ज़ात्रेरे लेई भेइनां, कि एरु न भोए, कि अजमाने बाले तुस अजमाए त न, कि इशी महैनत बेकार त न भोई |

तीमुथियुसेरे ज़िरीये समाचार मैल्हो

6 पण तीमुथियुसे जै तुस्न केरां इशे इडही एइतां तुशे विश्वासेरे ते प्रेमेरो सुसमाचार शुनव, ते इही गल्ल भी शुनाई, कि तुस सदा प्रेमे सैहीं असन याद केरतथ, ते असन हेरनेरी इछा रखतथ, जैचरे अस भी तुस्न हेरनेरी | 7 एलहेरे लेइ हे ढूलाव, असेई अपनी सारी तंगी, ते मसीबतन मां तुशे विश्वासे सैहीं असन शान्ति मल्लीए | 8 किजोकी अगर तुस प्रभु मां मजबूत राथ त अस ज़ीतेम | 9 ते जेरो आनन्द असन तुशे वजाही सैहीं अपने परमेशेरु सामने, तैसेरे बदले मां अस कोस तरीके सैहीं परमेशेरु शुक्र केरम? 10 अस रात दिहाडी अस बडी प्रार्थना केरते रहतम, कि तुशू तुतर हेरम, ते तुशे विश्वासेरी घटी पूरी केरम |

11 हुनी इशे परमेशर, ते बाजी एपू ते इशे प्रभु यीशु, तुस्न कां एजनेरे लेई इशी अगवाही केरे | 12 ते प्रभुएरु केरे, कि जैचरे अस तुस्न सैहीं प्रेम रखतम;

तेंचरे तुशो प्रेम एपू मामेइं, ते सैभी मॅन्हन सैहीं साथी बधे, ते तरकी केरते राथ।¹³ ताकि तें तुशे मने मजबूत केरे, कि जैखन इषो प्रभु यीशु अपने सब पवित्र लोकन सैहीं साथी एजे, त तें इशे परमेशर ते बाजी केरे सामने पवित्रता मां बे इलजाम ठैरालो।

जिन्दगी जै परमेशरे खुश केरे

4 हे ढलाव, अस तुस्न कां बिनती केरतम, कि तुस प्रभु यीशु मां समझतथ, कि जैचरे तुसेइं असन सैहीं लायक चाल चल्ली, ते परमेशर खुश केरनो शिखोरोए, ते जैचरे तुस चलतथ भी, तेंचरे अगरोव बधते राथ।² किजोकी तुस जानतथ, कि असेई प्रभु यीशुरे तरफां कोनां कोनां हुकम पुजाए।³ किजोकी परमेशरेरी मर्जी ईए, कि तुस पवित्र बना: मतलब जनाहे केरां बचोरे राथ।⁴ ते तुस्न मैरां हर एकी पवित्रता ते आदरी सैहीं साथी अपनो हिसो हसल केरनो जैना।⁵ ते इन कम्म खवाइशी सैहीं नैइं, ते न तैन कौमां केरे जेरे, जैना परमेशरे न पिशात्र।⁶ कि इस गल्ली मां कोई अपने ढलाहे न ठगे, ते न तैस पुड हकोमत चलाए; जैचरे कि असेइं पेहिलू तुस्न सैहीं जोवरू थू, ते खबरदारी भी दितोरी थी।⁷ किजोकी परमेशरे अस भिटे भोनेरे लेई नैइं, पण पवित्र भोनेरे लेई कुजवरेम।⁸ ऐलहेरे लेई जै घटिया समझते, तें मॅन्हन नैइं, पण परमेशरे घटिया समझते, जै अपनी पवित्र आत्मा तुस्न देते।

9 पण हे ढलाव कि प्रेमेरे बारे मां तुस्न किछ लिखनेरी जरूरत नैइं, एपू मामेइं प्रेम रखनो तुसेइं परमेशरे केरां एपू शिखोरोए।¹⁰ ते सारे मकिदुनियारे सैभी ढलान सैहीं साथी एरू केरतथ भी, पण हे ढलाव, अस तुस्न समझातम, कि होरे भी बधते गाथ।¹¹ ते जैचरे असेई तुस्न हुकम दितो, तेंचरे चुप चारे अपनू काम काज केरा, ते अपने अपने हथन सैहीं कुमाई कुमाते राथ।¹² कि बेइरीन सैहीं हुशीयेरी सैहीं बरताव केरा, ते तुस्न कोंची चीजारी घटी न भोल्ही।

यीशु एरू जींतू भौनू

13 हे ढलाव, अस चातम, कि तुस तैन केरे बारे मां जैना झुल्लन, तैन केरे बारे आं तुस अनजान राथ; एरू न भोए, कि तुस होरी केरे जेरे दुःख केरथ, जैन उमीद नैइं।¹⁴ किजोकी अगर अस याकीन केरतम, की यीशु मरो, ते जींतो भोव, त तेंचरे परमेशर तैन भी जैना यीशु मां मरे, तैस सैहीं साथी आनहेलो।¹⁵ किजोकी अस प्रभुएरे वचनेरे मुताबिक तुस्न सैहीं इन ज़ोताइं, कि जैना जीतेन, ते प्रभुएरे एजने तगर बंचोरे राल्हे, ते झुलोरेन केरां कधी अगरोव न बधेले।¹⁶ किजोकी प्रभुएपू सुवर्गएरां एजेल्हो; तैस बेले शोर ते प्रधान दूतां केरी आवाज शुनोली, ते परमेशरेरी महिमारो नइशिनो बजो गाल्हो, ते जैना मसीह मां मर्रन, तैना जीते भोनेन।¹⁷ तैखन अस जैना जीतेम जीते रानेम, ते तैन सैहीं साथी बिदलारी पुड नीये गहनेम, कि हावी मां प्रभु सैहीं मिलम, ते इस रीति सैहीं अस सदा प्रभु सैहीं साथी रहनेम।¹⁸ इन्ने गल्लन सैहीं एकी होरी तस्सली देते राथ।

दुबारां एजनेरे लेई तीयार

5 पण हे ढलाव, इसेरी जरूरत नैइं, कि वखतन ते कालां केरे बारे मां तुस्न कां किछ लिखू गाहे।² किजोकी तुस एपू ठीक जानतथ, ते जैचरे राती चोर एइते, ते तेंचरे प्रभुएरी दिहाडी एजने बालीए।³ जैखन लोक जोले, कि शान्ति, ते कोई डर नैइं, त तैन पुड अकदम विनाश एजनाए, जैचरे दोर्जीती पुड तक्रीप; ते तैना केंचरे बचेले।⁴ पण हे ढलाव, तुस त आंधरे मां नैइं, कि तें दिहाडी पुसन पुड चोरेरी जेरी एजे।⁵ किजोकी तुस सब लोअरी सन्तानथ, ते दिसारी सन्तानथ, अस न रातेरम, न अंधारेरम।⁶ ऐलहेरे लेई अस होरी केरे जेरे झूलोरे न रहम, पण बींजे रहम ते हुशार रहम।⁷ किजोकी जैना झूलोरे रहतन, तैना राती झूलतन, ते जैना नशे मां रहतन, तैना राती नशे मां भोतन।⁸ पण अस त दीसेरम, विश्वास ते प्रेमेरी झिलम लेइतां तेमुकरे उमीदारी टोपी लेइतां खबरदार रहम।⁹ किजोकी परमेशरे अस क्रोधरे लेई नैइं, पण ऐलहेरे लेई रखोरेम कि अस अपने प्रभु यीशु मसीहेरे जिरीये सैहीं मुक्ति हसल केरम।¹⁰ तें इशे लेई एंचरे मरो, कि अस चाहे बींजे भोम, या झूलोरे भोम: सब मिलतां तैस सैहीं साथी जीम।¹¹ ऐलहेरे लेई एकी होरी शान्ति देथ, ते एकी होरेरी तरकी भोनेरी जिरीयो बना, लगातार, तुस एरू केरतथ भी।

कलीसियाई तालीम

12 ते ढलाव, अस तुस्न सैहीं बिनती केरतम, कि तुस्न मां मेहनत, ते प्रभु मां तुशी अगवाही केरने बालेम, ते तुस्न तालीम देतम, तैन मन्ना।¹³ ते तैन केरे कम्मां केरे वजाही सैहीं प्रेमे सैहीं बडे आदरी सैहीं साथी काबल समझा: एपू मामेइं मेल मालपे सैहीं राथ।¹⁴ ते ढलाव, अस तुस्न समझातम, कि जैना केरे चाल चलन ठीक नैइं, तैन समझाथ, जैन केरी हिमत घटे तैन हिमत देथ, कमजोरन समहाला, सैभी केरे लेई बरदाशतथ हिराथ।¹⁵ हुशार राथ! कोई कोंची सैहीं बुरीयीयेरे बदले बुराइ न केरे; पण सदा भलाई केरनेरे लेई तियार राथ, एपू मामेइं ते सैभन सैहीं भी भलाई केरा।¹⁶ सदा खुश राथ।¹⁷ लगातार प्रार्थना केरते राथ।¹⁸ हर गल्ली मां शुक्र केरा: किजोकी तुशे लेई मसीह यीशु मां परमेशरेरी ई ए मर्जीए।¹⁹ आत्माइ न हिशाथ।²⁰ भविष्यवैणन तुछ न बुझा।²¹ सब गल्लां परखा: जैना रोडी भौन तैन अपनाथ।²² सैभी किसमेरी बुरेई केरां बचोरे राथ।

आशीर्वाद

23 शान्ति देने बालो परमेशरे एपू तुस्न पुरे तरीके सैहीं पवित्र केरे; ते तुशी आत्मा ते प्राण ते जिसम इशे प्रभु यीशु मसीहेरे एजने तगर पूरे, ते बेइलजाम रहन।²⁴ तुशो कुजाने बालो सचोए, तें एरू केरेलो।

25 ढलाव, इशे लेई प्रार्थना केरा।

26 सैभी ढलान पवित्र फुमडी देइतां नमशकार केरा।

27 आंव तुसन प्रभुएरी कसम देताइं, कि ई चिन्ही सैभी ढलाहन पेइतां शुनाइ गाहे।

28 इशे प्रभु यीशु मसीहेरो अनुग्रह तुस्न पुड भोतो राहे।

2 थिस्सलुनीकियों

अभिवादन

1 पौलुस ते सिलवानुस ते तीमुथियुसेरू तरफाँ थिस्सलुनीकियां केरे कलीसियारे नोंवें, जे इशे बाजी परमेशर ते प्रभु यीशु मसीह मांए:
2 इशे बाजी परमेशर ते प्रभु यीशु मसीह कैरां तुस्न अनुग्रह ते शान्ति मैल्लती राहे।

इन्सफेरी दिहाडी

3 हे ढ्लाव, तुशे बारे मां असेइं हर बेले परमेशररू शुक्र केरू लोडे, ते इन जरूरी भी आए, कि ऐलहेरे लेई तुशो विश्वास बडो बधतो गहते, ते तुस सैभी केरो प्रेम एपू मामेइं बडतो रहते। 4 इडी तगर की अस एपू परमेशररी कलीसिया मां तुशे बारे मां घमण्ड केरतम, कि जेतरी तंगी ते मसीबत तुस झल्लतथ, तैन सैभन मां तुशी सबर ते विश्वास बांदो भोते।
5 ई परमेशररे सचे इनसाफेरो नतीजोए; कि तुस परमेशररे बैदशाहरे काबिल भोथ। 6 किजोकी परमेशररे कां ई इनसाफे, कि जैना तुस्न दुःख देतन, तैन बदले मां दुःख दे। 7 ते तुसन जैन दुःख मैल्लते, असन सैहीं साथी चैन दे; तैस बेले कि जैखन प्रभु यीशु अपने फरिशतन सैहीं साथी, बैलती अगी मां सुवर्गों बांदो भोल्हो। 8 ते जैना परमेशररे न पिशान्न, ते इशे प्रभु यीशुरे सुसमाचारे न मन्न तैन कैरां बदलो नेलो। 9 तैना प्रभुएरे सामनेरां, ते तैसरे शंकरे सेके कैरां दूर भोइतां हमेशारे सजारे हकदार भोल्हे। 10 इन तैस दिहाडे भोल्हू, जैखन तै अपने पवित्र लोकन मां अधभुध केरनेरी वजाह भोनेरे लेई एजेलो; किजोकी तुसेइं इशी गुजाही पुड विश्वास कीयोरोए।
11 ऐलहेरे लेई अस सदा तुशे लेई प्रार्थना भी केरतम, कि इषो परमेशर तुस्न इस कुजानेरे काबल समझे, ते भलैइयरी हर अक मर्जी, ते विश्वासेरो हर एकी कम्मे समर्थी सैहीं साथी पूरू केरे। 12 कि इशे परमेशर ते प्रभु यीशु मसीहरे अनुग्रहरे मुताबिक इशे प्रभु यीशुरे नोंवें तुस्न मां महिमा मैल्लहे, ते तुस्न तैस मां।

पापेरो मडद मतलब विनाशेरो कओ

2 ढ्लाव, हुनी अपने प्रभु यीशु मसीहरे एजनेरे, ते तैस अपने अकोटे भोनेरे बारे मां तुस्न सैहीं बिनती केरताइं। 2 कि कोंची आत्मा, या वचन, या चिठ्ठन सैहीं जै कि मन्ना इशे तरफांए, इन समझतां कि प्रभुएरी दिहाडी आवरीए, तुशो मन अचानक बे डोल न भोए; ते न तुस घबराथ। 3 कोंची तरीके सैहीं कोंची भी धोखे मां न एजथ किजोकी, तै दिहाडी न एजेली, जाँतगर लोक विश्वासे न शारेले, ते तै पापेरो मडद मतलब विनाशेरो कओ बांदो न भोए। 4 जै खलाफत केरते, ते जै परमेशररे, ते जै महाने, अपने आपे तैस कैरां बडो बनाते, इडी तगर कि तै परमेशररे मन्दरे मां बिषतां अपने आप परमेशर बनाते। 5 कुन तुस्न याद नैइं, कि जैखन आंव तुस्न कां थू, त तुस्न सैहीं इना गल्लां जोतो थू? 6 तुस तैस चीजी जानतथ जैसां तै रोकरोए, कि तै अपने वकते पड बांदो भोए। 7 कीजोकी अधरमेरो भेद हेजू भी कम्म केरते, पण हेजू अक रोकने बालोए, ते जाँतगर तै दूर न भोए तैन रोकतां रखनोए। 8 तैखन तै अधर्म बांदो भोल्हो, जैस प्रभु यीशु अपने ऐशेरी फुकी सैहीं मारहेले, ते अपने एजनेरी महिमा सैहीं भसम केरहेले। 9 तैस आधर्मरू एजनु शैतानेरे कमेरे मुताबिक सैभी किसमेरी झुठी शकिती, ते निशान, ते बडॉ बडॉ कम्मन सैहीं। 10 ते नाश भोने बालां केरे लेई अधर्मेरे सैभी किसमेरे धोखे सैहीं भोल्हो; किजोकी तैनेइं सचे सैहीं प्रेमे न

कीव, जैस सैहीं तैन मुक्ति मैल्ले थी। 11 ते ऐलहेरे लेई परमेशररे तैन मां अक टपलाने बाली सामर्थई भेझेलो ताकि तैना झुठे पत्ती चलन। 12 ते जेतरे लोक सचेरू यकीन न केरन, बल्कि बुरैई सैहीं खुश भोतन, सैभन सजा मल्लनीए।

मजबूत बनेरू रहनू

13 पण ढ्लाव, ते प्रभुएरे टलारे लोकव, जरूरीए कि अस हमेशा तुशे बारे मां परमेशररे कां शुक्र केरतम रहंम, कि परमेशररे पेहिले तुस चूने; कि आत्मा सैहीं पवित्र बेन्ता, ते सचेरे ज्ञान हसल केरतां मुक्ति हसल केरथ। 14 जैसेरे लेई तैन इशे सुसमाचारे सैहीं कुजाए, कि तुस इशे प्रभु यीशु मसीहरी महिमा हसल केरथ। 15 ऐलहेरे लेई, ढ्लाव, मजबूत भोथ; ते जैना जैना गल्लां तुसेइं कुन वचन, कुन चिठ्ठीन सैहीं असन कैरां शिखी, तैन ठाम्मा। 16 इशो प्रभु यीशु मसीह एपू, ते इषो बाजी परमेशर जैने असन सैहीं प्रेम रखो, ते अनुग्रहे सैहीं अनन्त शान्ति ते बडी उमीदे। 17 तुशे मन्न मां शान्ति दे, ते तुस्न हर एकी रोडे कम्मे, ते वचने मां मजबूत केरे।

प्रार्थना केरनेरे बारे मां

3 ढ्लाव, इशे लेई प्रार्थना केरते राथ, कि प्रभुएरो वचन एरहो जल्दी फैले, ते तैस इजत मल्ले, जैचरे तुसन मां मल्ली। 2 ते अस टारे ते दुष्ट लोकन कैरां बचोरे राथ; किजोकी हर केची मां विश्वास नैइं।
3 पण प्रभु सचोए; तै तुस्न मजबूती सैहीं मजबूत केरेलो: ते तैस दुष्टे कैरां बचालो। 4 ते असन प्रभू मां तुस्न पुड भरोसोए, कि जै जै हुकम अस तुस्न देतम, तैन तुस मन्तथ, ते मन्नते राल्ले। 5 परमेशररे प्रेम ते मसीहहेरे सबरी सैहीं प्रभु तुशे मनेरी अगवाई केरे।

कम्म केरनेरे बारे मां

6 ढ्लाव, अस तुस्न अपने प्रभु यीशु मसीहरे नोंवें सैहीं हुकम देतम; कि हर कोई एरे ढ्लाहे कैरां अलग राहे, जै टारो चलते, ते जै तालीम तैन असन कैरां हसल केरी तैसेरे मुताबिक न केरे। 7 किजोकी तुस एपू जानतथ, कि केचरे इशी जेरी चाल लोडे चलोरी; किजोकी असेई तुस्न मां टारी चाल न चले। 8 ते कोंचेरी रोटी मुफत न खाइ; पण मेहनत ते कष्टे सैहीं रात दिहैडी कम्म धन्धो केरते थी, कि तुसन मां कोंची पुड भार न भोए। 9 इन नैइं, कि असन अधीकार नैइं; पण ऐलेरे लेई कि अपना आप तुशे लेई नमूनो बनाव, कि तुस इशे जेरी चाल चलथ। 10 ते जैखन अस तुस्न कां थी, तैखन भी ई हुकम तुस्न देते थी, कि अगर कोई कम्म केरनू न चाए, त रोटी भी न खाए। 11 अस शुनतम, कि केतरे लोक तुस्न मां टारी चाल चलतन; ते किछ कम्म न केरन, पण होरी केरे कम्मे मां हथ छडते। 12 अस प्रभु यीशु मसीह मां हुकम देतम ते समझतम, कि चुप चाप कम्म केरतां अपनी रोटी खान। 13 ते तुस, ढ्लाव, भलाई केरने मां हिम्मत न हारा।

14 अगर कोई इशी इस चिठ्ठीरी गल्ली न मन्ने, त तैस पुड दुष्ट रखे; ते तैस सैहीं साथी संगती न रखा, जैस सैहीं तै छिथोए; 15 फिरी भी तैस बेरी न समझा पण ढ्लाह बुझतां सखत बरताव केरा।

आखरी नमशकार

16 हुनी प्रभु जै शान्ति देने बालोए एपू तुस्न सदा ते हर किसमे सैहीं शान्ति दे: प्रभु तुस्न सैभन सैहीं साथी भोए।

17 आंव पौलुस अपने हथन सैहीं नमशकार लिखताइं: हर चिठी मां मेरी ई
ए निशानीए: आंव ऐंचरे लिखताइ। 18 इशे प्रभु यीशु मसीहेरो अनुग्रह तुसन
सैभन पुड़ भोतो राए।

1 तीमुथियुस

1 पौलुसेरे तरफाँ जै इशे मुक्ति देने बाले परमेशर, ते इशी उमीद मसीह यीशुएरे हुकमे सैहीं यीशु मसीहेरो प्रेरिते। 2 तीमुथियुसेरे नोवें जैन विश्वासे मां मेरु सचू मड्डूए, बाजी परमेशर, ते इशे प्रभु यीशु मसीहेरे तरफाँ तुस्न अनुग्रह ते दया, ते शान्ति मैल्हती राहे।

झूठी तालीम देने बालां केरे खलाफ खबरदारी

3 जैरे मीं मकिदुनिया गहांते तीं समझवरू थूं, कि इफिसुसे मां रेहीतां किछन हुकम दे, कि होरी किसमेरी तालीम न दें। 4 ते तैना एरी कहेंन ते वंशाबेलारी गल्लन पुड मन न लान, जैन सैहीं बेंस भोतीए; ते परमेशरेरे तैस इनतजामेरे मुताबिक नैइं, जै विश्वासे सैहींए; तैचरे फिरी भी जोताइं। 5 हुकमेरो मकसद इहे, कि साफ मने, ते रोडे जमीरे, ते बगैर दुष्टेरे विश्वासे सैहीं हमदर्दी पैइदा भोए। 6 इन केरे इलावा केतरे लोक फिरतां बकवासेरे पासे टेपलोए। 7 ते व्यवस्थारे उसताद त बंनू चहतन, पण जैना गल्लों जोतन, ते जैन केरो दावो केरतन तैन एपनू भी न समझन।

8 पण अस ज्ञानतम, कि अगर कोई व्यवस्थाइ व्यवस्थारे तरीके पुड कम्मे मां आन्हें त तै भी रोडीए। 9 इन सैमझतां कि व्यवस्था धर्मी मैन्हरे लेइ नैइं, पण अधर्मी, हुकम न मन्ने बालां, ते अपवित्रां, ते भिटन, ते अम्मा बैपू केरे कातलां, खून करने बालां। 10 जनाह करने बालां, पुरुषगैमी, मैन्हन बेचबालां, झूठ जौने बालां, ते झूठी कसम खाने बालां, ते इन केरे इलावा रोडी तालीमरी खालाफत करने बालां केरे लेइ ठैरावरीए। 11 इही परमधन्य परमेशरेरी महिमारे सूसमाचाररे मुताबिके, जै मीं सोंफोरोए।

अनुग्रहरे लेइ शुक्र

12 ते आंव अपने प्रभु मसीह यीशुएरू, जैने मीं ताकत दितोरीए, शुकर केरताइं; कि तैने आंव वफादार सैमझतां अपनी सेवारे लेइ ठैरावरोइं। 13 आंव त पैहिलो निन्दा करने बालो, ते सताने बालो, ते अन्धेर करने बालो थूं; फिरी भी मीं पुड अनुग्रह भोव, किजोकी मीं अनजान, ते बेसमझ भोइतां इन कम्मा कीयोरा थीं। 14 ते इशे प्रभुएरो अनुग्रह तैस विश्वास, ते प्रेमे सैहीं साथी जै मसीह यीशु मांए, बडो भोव। 15 इही गल्ल सचे, ते हर किसमे सैहीं मन्ने काबले, कि मसीह यीशु पैपी लोकन मुक्ति देने इस सांसारे मां आव, जैन मैरां आंव सैभना बडो थूं। 16 पण मीं पुड ऐलहेरे लेइ रेहेंम भोव, कि मीं सैभन कैरां बड्डे पैपन मैरां यीशु मसीहे अपनी पूरी बरदाशत हिराइ, कि जैना लोक तैस पुड हमेशरी जिन्दगरे लेइ विश्वास करहेले, तैन केरे लेइ आंव अक नमूनां बैनी। 17 हुनी सनातन बादशाह, मतलब नाश न भौने बाले आधबुध परमेशरेरी आदर, ते महिमा सदा भोती राहे। आमीन।

18 हे मड्डा तीमुथियुस, तैन भविष्यवैनी केरे मुताबिक जैना पेहिली तेरे बारे मां कीयोरी थी, आंव इही हुकम सोंफताइं, कि तू तैन केरे मुताबिक रोडे चारे लडाइ लडतो रह। 19 ते विश्वास ते तैस रोडे जमीरे टलेइतां रह जैसेरे दूर करने सैहीं बडां केरु विश्वासेरू जिहाज डूबी गहते। 20 तैने मां हुमिनियुस ते सिकन्दरे जैना मीं शैताने सोंफोरेन, कि तैना निन्दा केरनी न शिखन।

आराधनारे बारे मां

2 हुनी आंव सैभन कैरां पेहिली इही तालीम देताइं, कि बिनती, ते प्रार्थना, ते दरखवास, सैभी मैन्हू केरे लेइ की गहन। 2 बादशाह ते सैभी उचे पदे बालां केरे लेइ ऐलहेरे लेइ, कि अस आरामे ते चैनी सैहीं सारी

भक्ति, ते सुखे सैहीं जिन्दगी गुजारम। 3 इन इशे मुक्ति देने बाले परमेशरे पसंद एइते। 4 तै इन चहते, कि सैभी मैन्हन मुक्ति मैल्ह; ते तैना सचे रोडे चारे पिशन्न। 5 किजोकी परमेशर अके: ते परमेशर ते मैन्हू केरे मड्डाटे अके दरमयानीए, मतलब यीशु मसीह जै मैन्हूए 6 जैने अपनो आप सैभी केरे छुटकारेरे लेइ दितो; ताकि तैसेरी गुवाही ठीक वक्ते पुड दितो गाहे। 7 आंव सच ज़ोताइं, झूठ न जोई, कि आंव इसे मकसदे सैहीं प्रचारक, ते प्रेरत ते होरी कौमा केरे लेइ विश्वास, ते सचेरी तालीम देने बालो भोव।

8 आंव चाताइं, कि मड्ड हर ठैरी बगैर सरकां; ते बगैर बेंसी सैहीं पवित्र हथ खडे केरतां प्रार्थना केरे। 9 तैचरे कौशां भी इजतदार लिकडा लेइतां, ते प्रहेजे सैहीं अपनो आप सजेइतां; न कि दोग बनाने, ते सुन्ने, ते मोती, ते कीमती लिकडन सैहीं। 10 पण रोडे कम्मन सैहीं। 11 ते कौन्शेइं चुपचाप भोइतां शिखोरू लोडे। 12 ते आंव ज़ोताइं, कि कौन्शा न शिखाले, ते न मड्डे पुड हुकम चलाए बल्कि चुपचाप राहे। 13 किजोकी पेहिलो आदम, तैसेरे पत्ती हव्वा बनाई। 14 ते आदम न टेपलोव, बल्कि कौन्श टेपलोई। 15 फिरी भी बच्चे जरमने सैहीं मुक्ति हसल केरेली, अगर संयम ते प्रहेजे सैहीं साथी विश्वास, ते प्रेम, ते पवित्रतैई मां मजबूत राहे।

कलीसियाई मां खास

3 इही गल्ल सचे, ते जै अध्यक्ष भोनो चाहे, त तै रोडे कम्मेरी इच्छा रखते। 2 ते जै अध्यक्ष बनू चाहे, तै बे इलजाम भोए, ते एकी कौन्शारो मुन्श भोए, संयमी भोए, ते परहेज करने बालो भोए, ते तैसेरो सुभाव रोडो भोए, ते ट्लानहाँ केरी आदर करने बालो भोहे, ते शिखालनेरे काबिल भोए। 3 पीने बालो या मार पीट करने बालो न लोडे; बल्कि सिद्ध भोए, ते न लडाई करने बालो भोए, ते न लालची भोए। 4 अपने घेरो रोडे चारे बन्दो बसत करने बालो भोए, ते बाल बचन रोडे चारे आधीन रखतो भोए। 5 जैखन अगर कोई अपने घेरो बन्दो बसत केरनो न ज्ञानतो भोए, ते परमेशरेरी कलीसियारी हेरगेश कैचरे केरहेलो? 6 फिरी इन की नोंवो चेलो न भोए, एरू न भोए, कि अभिनमान केरतां शैतानेरी जैरी तैस सजा मैल्ह। 7 ते बेइरीयन मां भी तैसेरू रोडू नोंव भोए; एरू न भोए कि घटिया भोइतां शैतानेरे फदे मां फसे।

कलीसिया मां सेवक

8 तैचरे सेवक भी गम्भीर लोडन, दुइय रंगी, ते पीने बाले, ते धटया कुमायरे लालची न भोन। 9 पण विश्वासेरे भेदे साफ जमीरे सैहीं रोडे चारे रखन। 10 ते इन भी पेहिले कि परखे गहन, तैखन अगर बे इलजाम निसन, ते फिरी सेवकेरू कम्म केरन। 11 ऐन्चरे कौन्शां भी गम्भीर लोडन; दोष लाने बैली न भोन, पण रोडे सुभावे बैली, ते सैभी गल्लन मां वफादार भोन। 12 सेवक एकी कौन्शरो मुन्श लोडे, ते मड्डां ते अपने घेरो रोडो चारे इन्तजाम केरनो ज्ञानते भोए। 13 किजोकी सेवकेरू कम्म रोडे चारे केरी बटन, ते रोडी पदवी ते तैस विश्वासे मां, जै यीशु मसीहे पुडे, बडी दिलेरी हसल केरी बटन।

महान बादशाही

14 आंव तीं काँ जल्दी एजनेरी उमीद रखने पुड भी इना गल्लों ऐल्हेरे लेइ लिखताइं। 15 कि अगर मीं चिइर लगे, त तू बुझस, कि परमेशरेरू घर, जै जीते परमेशरेरी कलीसियाए, ते जै सचेरो खमबोए, ते बुनीयादे; तैस मां केरहो बतावे केरों लोडे। 16 ते इस मां शक नैइं, कि भेतरु बेध गम्भीर;

मतलब तै जै जिसमे मां बांदो भोव, आत्मा मां धर्मी भोव, सुवर्गदूतन लेइहोव, होरी कौमन मां तैसेरो प्रचार भोव, संसारे मां तैस पुड़ विश्वास केरो, ते महिमा मां उबरे नैव |

झूठे उस्ताद

4 पण आत्मा साफ जाते, कि एजने बाले वकते मां केतरे लोक भटकाने बैली आत्मा, ते दुष्ट आत्मा केरी तालीमी पुड़ मन लेइतां विश्वासे कैरां भैटकी गहनेन | 2 इन तैन झूठे मँन्हू केरे वजाही सैहीं भोनूए, जैन केरो जमीर जैचरे ताते लँहे सैहीं कोशोरूए | 3 जैना डुला बनानो ठाकेल्हे, ते खानेरी किछ चीजन केरां दूर रानेरो हुकम देल्हे; जैना परमेशरे ऐल्हेरे लेई बनेवरिन की विश्वासी, ते सच पिशात्रे बाले तैन शुक्र केरतां खान | 4 किजोकी परमेशरेरी बनावरी हर चीज रोडीए: ते कोई चीज इनकार केरने काबल नैइ; पण इन की शुक्र केरतां खाई गाहे | 5 किजोकी परमेशरेरे वचने, ते प्रार्थनाइ सैहीं साफ भातीए |

मसीह यीशु एरो रोडो सेवक

6 अगर तू दूलाहन इना गल्लां याद करातो राल्हो, त यीशु मसीहेरो रोडो सेवक भोल्लो: ते विश्वास ते तैस रोडी तालीमरी गल्लन सैहीं, जैना तू मन्तो अवरोस, तेरी हेरगेश भाती राल्हो | 7 पण गेंदी ते बुडी केरी जेरी कहैत्र केरां अलग रह; ते भगतरे लेई साधना केर | 8 किजोकी जिसमानी साधनाइ सैहीं घट फेइदो भाते, पण भगती सैभी गल्लां केरे लेई फेइदे मन्दे, किजोकी इस बेले, ते एजने बाले बेलरी जिन्दगरे लेइ भी इसे मां वादोए | 9 ते इही गल्ल सच, ते हर तरीके सैहीं मन्त्रे काबले | 10 किजोकी अस मेहनत ते कोशीश ऐल्हेरे लेई केरतम, कि इशी उमीद तैस जीते पमेशरे पुडे; जै सैभी मँन्हू केरो, ते खास केरतां विश्वास केरने बालन मुक्ति देने बालोए |

11 इन गल्लां केरो हुकम दे, ते शिखालतो रह | 12 कोई तेरी जवानी घटिया न समझे; पण वचन, ते चाल चलन, ते प्रेम, ते विश्वास, ते पवित्रतैई मां विश्वास केरने बालां केरे लेई नमूनो बन | 13 जांतगर आंव न एजी, तांतगर पड़ने ते तालीम देने, ते शिखालने मां मघन रह | 14 तैस वरदाने केरां बे खबर न रह जैन तीं बज्जुगां केरे हथ रखते बेले मैल्हेरू थू | 15 तैन गल्लन सोचतो रा, ते तैन मां अपनू ध्यान लेइतां रख, ताकि तेरी तरकी सैभन पुड़ बांदी भोए | 16 अपनी ते अपने तालीमरी रखवाली केर | इन गल्लन पुड़ मजबूत रह, किजोकी एरू केरतो राल्हो, त तू अपने, ते अपने शुत्रे बालां केरे लेई भी मुक्तिरी वजह भोल्लो |

विश्वेसी केरे लेई जिमेदारी

5 कोंची बडे न धमका; पण तैस बाजी बुझतां समझा, जवावन दूला सैझतां; बुडी कौन्शन अम्मा सैझतां | 2 ते जवान कौन्शन पूरी पवित्रतैई सैहीं बेइन सैझतां समझा |

3 तैना बेवा जैना सचे बेवान तैन केरी आदर केर | 4 ते अगर कोंची बेवारां मझां या पोट्लाडां या धियोडां भोन, ते तैना पेहिले अपने घराने सैहीं साथी भगतरो बर्ताव केरनो, ते अपने अम्मा बाजन तैन केरू हक देंनू शिखन, किजोकी इन परमेशरे पसंद एइते | 5 जै सचे बेवाए, ते तैसेरो कोइ नैइ; तै परमेशरे पुड़ भरोसो रखतीए, ते रात दिहैडी बिनती, ते प्रार्थनाइ मां मघन रहतीए | 6 पण जै बुरे कम्मन मां लगोरिए, तै जीती मैरी जेई | 7 इन गल्लां केरो भी हुकम दे, कि तैना बे इलजाम रहन | 8 पण अगर कोई अपनां केरी, ते खास केरतां अपने घरानेरी फिकर न केरे, ते तै विश्वासे केरां मुकोरोरोए, ते जै विश्वास न केरे तैस केरां बुरो बनोरोए |

9 तैसे बेवरू नौव लिखू गाहे, जै शठ सालणा घट न भोए, ते एकी मुन्शेरी लाडी रावरी भोए | 10 ते रोडे कम्मन मां मशूर भोए, जैसा बच्चां केरी हेरगेश केरी भोए; परदेशी केरी सेवा केरी भोए, पवित्र लोकां केरे पाव धोवरे भोन, दुखी केरी मद्र केरी भोहे, ते हर एकी रोडे कम्मे मां मन लवरो भोए | 11 पण जवान बेवां केरां नौवां न लिख, किजोकी जैखन तैना मसीहेरी खलाफत केरतां बुरे खयालन मां गैतिन, त डुला बनानो चैतिन | 12 ते दोषी भोतिन, किजोकी तैनेई अपनो पेहितो विश्वास शारोरोए | 13 ऐंचरे तैना घरे घरे

फिरतां आलसी भोनू शिखतिन, ते सिर्फ आलसी नैइ, पण बकबक केरती रैइतन, ते होरी केरे कम्मन मां हथ छेडतिन, ते न जैइज गल्लां ज़ोतिन | 14 ऐल्हेरे लेई आंव इन चहताई, कि जवान बेवां डुला बनान; ते बचे ज्ञान ते घरबार सुमालन, ते कोंची खलाफत केरने बाले बदनाम केरनेरो मोको न देंन | 15 किजोकी किछ त डुला बनेइतां शैताने पती भोवरिन | 16 अगर कोंची विश्वास केरने बालेरी काँ बेवां भोन, त तैए तैन केरी मद्र केरे, कि कलीसिया पुड़ भार न भोए, ताकि तै तैन केरी मद्र केरी बटे, जैना सचे बेवान |

17 जैना रोज रोडो इन्तजाम केरतन, खास केरतां तैना वचन शुनाने, ते शिखालने मां मेहनत केरतन, दुगने आदरेरे काबल समझे गहन | 18 किजोकी पवित्र शास्त्र जाते, कि तू जोट्लोरे दाँतेरू आशी न बेन्धां किजोकी मजदूर अपने मजदूरारो हकदार | 19 कोई दोष कोंची बज्जुगए लव गाहे, त बगैर दुइय या ट्लाई शाहातां केरे बगैर न शुन | 20 पाप केरने बाले सैभी केरे सामने समझा, ताकि होरे लोक भी डरन | 21 परमेशर ते मसीह यीशु, ते चुनोरे फरिशते हाजर सैझतां आंव तीं खबरदार केरताई, कि तू दिल खोल्लतां मन्न, ते कोई कम्म तरफदैरी सैहीं न केर | 22 कोंची पुड़ जल्दी हथ न रख, ते होरी केरे पापन मां शामिल न भो: अपनो आप पवित्र बनोरो रख |

23 अग्रोवं जो पानी न पी, पण अपने पेटेरे, ते अपने बार बार बिमार भोनेरे लेई थोडो थोडो दाछारो रस भी कम्मे मां आन |

24 केतरे मँन्हू केरे पाप बांदे भोई गहतन, ते आदालतारे लेई पेहिले पुजतन, पण केतरां केरे पतरो रहतन | 25 तैचरे केतरां रोडां कम्मां बांदां भोतन, ते जैना एरां न भोन, तैना भी छेपी न बटन |

6 जैतरे दास करजे हठन, तैना अपने मालकिन बडी आदरारे काबल समझे गहन; ताकि परमेशरेरे नौवेंरी, ते कलीसियारी निन्दा न भोए | 2 ते जेतरे मालिक विश्वास केरतन, ऐन दूलाह भोनेरे वजाही सैहीं घटिया न समझे गहन; बल्कि तैन केरी होरी सेवा केरन, किजोकी इस सैहीं फेइदो नेने बाले विश्वासी ते प्रेमीन: इन गल्लां केरी तालीम दे ते समझातो रह |

झूठे उस्ताद ते दौलतरू लालच

3 अगर कोई होरी किसमेरी तालीम देते; ते खेरी गल्लन, मतलब इशे प्रभु यीशु मसीहेरी गल्लां, ते तैस तालीमी न मन्त्रे, जै भगतरे मुताबिके | 4 त तै अभीमानी भोवरोए, ते किछ न जाने, बल्कि तैस बेंस ते लफसन पुड़ तर्क केरनेरो रोगे, जैन सैहीं जलन, ते लडैई, ते निन्दारी गल्लां, ते बुरी बुरी शक | 5 ते तैन मँन्हन मां बेफेइदी लडैई पैइदा भोतिन, जैन केरी अकल बिगडोरीए, ते सचे केरां दूरन, जैना समझतन कि भगती कुमाई केरनेरो दुवारे | 6 पण सचे सैहीं भगती बडी कमाइए | 7 ते न असेई संसारे मां किछ आनोरू, ते न किछ नैही बटम | 8 ते अगर असन कां किछ खाने पीने ते लाने जो भोए, ते इसे मां खुश रहम | 9 पण जै धनी भोनो चाहे, तै एरी अजमैइश, ते फंदे ते बडे बे फेइदे ते नुकसान देने बैली खुबाइशन मां फसतन, जैना मँन्हन बगैडतन, ते नाश भोनेरे समुदर मां डोबितन | 10 किजोकी रुपेइयां केरू लालच सैभी किसमेरे बुरैइअरू जीले, जैस हसल केरनेरे खुवाइशी सैहीं केतरे विश्वासे केरां भटकतां अपनो आप बडे किसमा केरे गम्मेरी वजा बनावरीए |

तीमुथियुसे बिस्तार

11 पण परमेशरेरे मँन्हां, तू इन गल्लन केरां नश; ते धर्म, भगती, विश्वास, प्रेम, ते नम्रतारे पती लग | 12 विश्वासेरो रोडो घोल केर; ते तैस हमेशा रहने बैली जिन्दगी पुड़ कबजो केर, जैसेरे लेई तू कुजावरोस, ते बडे गवाहन सैहीं साथी रोडो अंगीकार केरो थू | 13 आंव तीं परमेशरे जै सैभन जीतो रखते, ते मसीह यीशुए गवाह केरतां पुन्तियुस पिलातुसेरे सामने जैनी रोडो इकरार कीयो, ई हुकम देताई | 14 कि तू इशे प्रभु यीशु मसीहेरे बांदे भोने तगर इस हुकमे साफ ते बेइलजाम रख | 15 जैस ते ठीक वक्ते मां हिराल्हो, जै प्रमप्रधान ते एकी हाकम ते बादशाहां केरो बादशाह, ते प्रभुं केरो प्रभुए | 16 ते अमरता सिर्फ तैसेरीए, ते तै तैस नूरे मां रहते, ते न तै कोंची मँन्हें लवरोए, ते न कधी हेरी बटते: तैसेरी तारीफ ते बादशाही सदा रहाली | आमीन |

17 इस संसारेरे दौलत मंदन हुकम दे, कि तैना घमण्डी न भोन ते चंचल धने पुड़ उमीद न रखन, पण परमेशरे पुड़ जै इशे सुखेरे लेई अढांगू देते |

18 ते भलाई केर, ते रोडे कम्मन मां धनी बन, ते शिखालने मां ते मद्द करेने मां तियार रहन। 19 ते अगरोव जो रोडी मुनियद रखन, कि सच्चे जिन्दगी पुड कबजो केरन।

20 हे तीमुथियुस इस इमानती हफाजती सैहीं रख ते जैस ज्ञाने ज्ञान ज़ोनू भी ठीक नैइ, तैसेरे गंदे बकवास ते खलाफरी गल्लन कैरां दूर रह। 21 केतरे इस ज्ञानेरो इकरार केरतां, विश्वासे कैरां भटकोरेन। तुस्न पुड अनुग्रह भोतो राहे।

2 तीमुथियुस

अभिवादन

1 पौलुसेरे तरफां जै तैस जिन्दगरे वरदानेरे मुताबिक, जै मसीह यीशु मांए, परमेशरेरी मेरजी सैहीं मसीह यीशु एरो प्रेरिताई। 2 टूलारे मट्टे तीमुथियुसेरे नोंवें: बाजी परमेशर, ते इशे प्रभु यीशु मसीहेरे तरफां तुस्न अनुग्रह ते दया ते शान्ति मैलती राहे।

धनियावाद ते प्रोतसान

3 जैस परमेशरेरी सेवा आंव अपने बाप दादां केरे रीति पुड़ साफ दिले सैहीं केरताइं, तैसेरु शुक्र भोए, कि आंव अपनी प्रार्थनान मां तीं याद रखताइं। 4 ते तेरे ऐंखरु केरी खबर घिन्तां रात दिहाडी तीं सैहीं मिलनेरी इछा रखताइं कि आनन्दे सैहीं भरी गेई। 5 ते मीं तेरे तैस सच्चे विश्वासेरी याद आई, जै पेहिलो तेरे नैनी लोइस, ते तेरी अम्मा यूनीकी मां थू, ते मीं याकीन भोव, कि तीं मां भी आहे। 6 ऐलहेरे लेई आंव तीं याद कराताइं, कि तू परमेशरेरे तैस वरदाने जैन मेरे हथ रखने सैहीं तीं मैल्लोरु थू चमका। 7 किजोकी परमेशरे असन डरनेरी नैइं पण सामर्थ, ते प्रेम, ते सबरेरी आत्मा दितोरीए।

8 ऐलहेरे लेई इशे प्रभुएरे गुवाही सैहीं, ते मीं कैरां जै आंव तैसेरो कैदइं, छिथोथ न, पण परमेशरेरे सामर्थेरे मुताबिक सुसमाचारेरे लेई मीं सैहीं साथी दुःख झैल। 9 जैने असन मुक्ति दिती, ते पवित्र कुजाने सैहीं कुजाए, ते इन इशे कम्पन सैहीं नैइं; पण अपनी मेरजी सैहीं ते तैस अनुग्रहेरे मुताबिक जै मसीह यीशु मां पेहिलो असन पुड़ भोव। 10 पण हुनी इशे मुक्ति देने बाले यीशु मसीहेरे बांदो भोने सैहीं प्राकशित भोव, जैने मौत नाश की, ते जिन्दगी ते अमरता तैस सुसमाचारे सैहीं प्रकाशतमान की। 11 जैसेरे लेई आंव प्रचारक, ते प्रेरित, ते तालीम देने बालो भोव। 12 ऐलहेरे लेई आंव इना दुःख भी झैलताइं, पण शरमेई न, किजोकी आंव जैसेरु याकिन केरताइं, जानताइं; ते मीं याकीने, कि ते मेरे विश्वासेरी तैस दिहाडे रखवाली केरी बटते। 13 जैना रोडी गल्लां तीं मीं कैरां शुनी तैन तैस विश्वासे ते प्रेमे सैहीं साथी जै यीशु मसीह मांए, अपनो नमूनो बनेइतां रखा। 14 ते पवित्र आत्मा सैहीं जै असन मां बसोरोए, इस रोडी ईमानतरी रखवाली केर।

15 तू जानतस, कि आसिया बाले सब मीं कैरां दूर भोवरेन, जैन मां फूगिलुस ते हिरमुगिनेसे। 16 उनेसिफुरुसेरे घराने पुड़ प्रभु दया केरे, किजोकी तैने बडे बार मेरो दिल ठंडो केरो, ते मेरी शंगलन सैहीं शरमौव न। 17 पण जैखन ते रोमा मां आव, त बडे कोशीशी सैहीं तोपतां मीं सैहीं मुलाकात केरी। 18 (प्रभु केरे, कि तैस दिहाडे प्रभु तैस पुड़ दया केरे)। ते जै सेवा तैने इफिसुसे मां कीयोरीए तैन भी रोडे चारे जानतस।

मसीह यीशु एरो स्वामिभक्त सिपाहि

2 ऐलहेरे लेई मेरे मट्टा, तू तैस अनुग्रहे सैहीं जै मसीह यीशु मांए, मजबूत भोतो गा। 2 ते जैना गल्लां तीं बडे शाहातां केरे सामने मीं कैरां शुनोरी थी, तैना विश्वास केरने बाले मँहन सोंफ; जैना होरेन भी शिखालनेरे काबिल भोन। 3 मसीह यीशुएरे रोडे सिपेईरे जेरो मीं सैहीं साथी दुःख झैल। 4 जैखन कोई सिपेई लडाई पुड़ गहते, ते ऐलहेरे लेई कि अपने भरती केरने बाले खुश केरे, अपनो आप सांसारेरे कम्पन मां न फंसाए। 5 फिरी आखाडे मां घुल्लने बालो अगर कानूनेरे मुताबिक न घुल्ले त तैस ताज न मल्ले। 6 जै जमीनदार मेहनत केरते, फलेरो हिसो पेहिलो तैस्से लोडे मैल्लोरो। 7 जैन आंव जोताइं, तैस पुड़ ध्यान दे, ते प्रभु तीं सैभी गल्लां केरी समझ देल्लो।

8 यीशु मसीहे याद रख, जै दाऊदेरे खानदैनी मैरां भोव, ते फटरन मैरां जीतो भोव; ते इन मेरे सुसमाचारेरे मुताबिके। 9 जैसेरे लेई आंव कुकेरमीं केरो जेरो दुःख झैलताइं, इडी तगर कि कैदे मांई; पण परमेशरेरो वचन कैदी नैइं। 10 ऐलहेरे लेई आंव चूनोरे लोकां केरे लेई सब किछ झैलताइं, कि तैना भी तैस मुक्ति जै यीशु मसीह मां हमेशा रहने बाली महिमा सैहीं साथी हसल केरन। 11 ई गल्ल सच्चे, कि अगर अस तैस सैहीं साथी मरे त तैस साथी जीते भी भोमेले। 12 अगर अस सबरी सैहीं झैलते रहले, त तैस सैहीं साथी बादशाही भी केरमेले: अगर अस तैसेरो इनकार केरमेले त तै भी इषो इनकार केरेलो। 13 अगर अस बे वफा भी भोम त तै फिरी भी वफाद बनोरो रहलो, किजोकी तै एपू अपनो इनकार न केरेलो।

महीर कारीगिर

14 इन गल्लां तैन याद करा, ते प्रभुएरे सामने खबरदार केर, कि लफसन पुड़ बेंस न केरन, जैन सैहीं किछ फेइदो न भोए; बल्कि शुन्ने बाले बिगडतन। 15 अपनो आप परमेशरेरो कबूल केरो, ते एरु कम्म केरने बालो ठैरानेरी कोशीश केर, जै शरमिनदो न भोए, ते जै सच्चेरे वचने ठीक तरीके सैहीं कम्मे मां आने। 16 पण गेंगी बेंसी कैरां बचोरो रा; किजोकी एरे लोक होरी भी अभगीतां मां बधते गहतन। 17 ते तैन केरो वचन शडरे जखमेरो जेरो फेलतो गहलो: ते हुमिनयुस ते फिलेतुस तैन मरान। 18 जै इन जोइतां की कयामत भोवरीए सच्चे कैरां दूर भोई गहतन, ते केतरां केरो विश्वास ऊलटो पूलटो भोते। 19 फिरी भी परमेशरेरी पक्की मुनीयाद बनोरी रातीए, ते तैस पुड़ ई छाप लगेरीए, कि प्रभु अपन पिशानते; ते जै कोई परमेशरेरु नोंव गिनते, ते अधर्म कैरां बांचोरो रहते।

20 बडे घरे मां सिफ सौने चैदरां बांडा न भोन, लेखडारां ते मितरां भी भोतन; किछ आदरेरे, ते किछ आनदरे लेई। 21 अगर कोई अपनो आप इन कैरां साफ केरे, त तैन आदरारु भाण्ड, ते पवत्र ठेरेलू; मालकेरे कम्मे एजेलू, ते हर रोडे कम्मेरे लेई तियार भोल्लहू। 22 जुवैनरी खवाइशन कैरां नश; ते जैना साफ मने सैहीं प्रभुएरु नोंव घिनतन, तैन सैहीं साथी धर्म, ते प्रेम, ते मेल मलापेरो पीछो केर। 23 पण बेवकूफी, ते बेफेइदी गल्लन कैरां अलग रा; किजोकी तू जानतस, कि तैन सैहीं लडाई भोतिन। 24 ते परमेशरेरो दास लडाको न लोडे, पण सैभन सैहीं साथी नरमी केरे, ते तालीम देंनेरे लायिक, ते सबर केरने बालो भोए। 25 ते खलाफत केरने बालन नेरमी सैहीं समझे, कुन पतो परमेशर तैन मन फिरानेरो मोको दे, कि तैना भी सच्चे पिशात्र। 26 ते असेइं तैसेरी मर्जी पूरी केरनेरे लेई हुशार भोइतां शैतानेरे जाले कैरां छुटन।

आखरी दिहाइन मां अधर्म

3 पण इन याद रख, कि आखरी दिहाइन मां बुरो वकत एजनोंए। 2 किजोकी मँन्हू मतलबी, लालची, चोगली लाने बाले, अभिमानी, निन्दा केरने बाले, अम्मा बैपू केरु जॉनू न शुन्ने बाले, शुक्र न केरने बाले, अपवित्र। 3 सच्चे प्रेमे कैरां खाली, सखत मने बाले, दोष लाने बाले, बरदाश न केरने बाले, सखत, रोडेरे बेरी। 4 दगो केरने बाले, डीठ, ते परमेशरेरे नैइं बल्कि ऐशेरे चहने बाले भोले। 5 तैना भगतारु रूप त बनाले पण, तैसेरी शेक्ति न मन्नेले; एरन कैरां दूर रेइयां। 6 ऐन्ने मां तैना लोकन, जैना घर्ण मां पोले पवेइं इइतन, ते बदचलन कौन्शां वशे मां केरतन, जैना पापे सैहीं देबोरितां हर किसमेरी खुवैइशन मान। 7 ते सदा शिखती त रैतिन, पण सच्चे पिशानी

तगर कधी न पुजन। 8 ते जैस सैहीं यत्रेस ते यम्ब्रेसे मूसेरी खलाफत कीयोरी थी, तैचरे इना भी सचेरी खलाफत केरतन; इना त एरे मँन्हून, जैन केरी बुधी भ्रष्ट भोवरीए, ते तैना विश्वासेरे बारे मां निकम्मेन। 9 पर तैना इस कैरां अगरोव न बेधी बटन, किजोकी तैन केरे अज्ञानता सैभी मँन्हन पुड़ बांदी भोवरीए, तैचरे इन केरी भी भोई गहली।

तीमुथियुसे खास हदायत

10 पण तीं तालीम, चाल चलन, मर्जी, विश्वास, बरदाश केरनू, प्रेम, सबर, ते सताए गहने, ते दुःख झैलने मां मेरू साथ दितू। 11 ते एरे दुखन मां भी जैना अन्ताकिया ते इकुनियुम, ते लुस्त्रा मां मीं पुड़ आवरे थी, ते होरी दुखन मां भी, पण परमेशरे आव तैन सैभन मैरां छुटव। 12 पण जेतेरे मसीह यीशु मां भेगती सैहीं साथी जिन्दगी बीतानी चहतन तैना सब सताए गहनेन। 13 ते दुष्ट, ते टपलाने बाले धोखो देते, ते धोखो खाते, बिगाड़ते गहले। 14 पण तू इन गल्लन पुड़ जैना तीं शिखोरीन, ते जैन केरू याकीन करी थू, इन बुझतां मजबूत बनो रा; कि तीं तैना कोन लोकन कैरां शिखोरी थी। 15 ते बचपनेरो तू पवित्र शास्त्रो ज्ञाने बालोस, जै मीं मसीह पुड़ विश्वास केरने सैहीं मुक्ति हसल केरनेरे लेई अकलमंद बनेई बटते। 16 हर अक पवित्र शास्त्र परमेशरेरे अगवैही सैहीं लिखोरू, ते तालीम देंने, ते समझाने, सुधारने, ते धार्मिकतारी तालीम देनेरे लेई फेदामदे। 17 ताकि परमेशरेरो मँन्हू सिद्ध बने, ते हर एकी रोड़े कम्मेरे लेई तियार भोए।

4 परमेशर ते मसीह यीशु हाजर केरता, जै जीते ते फटोरों केरी आदालत केरेलो, ते तैसेरे बांदे भोने, ते बाशाही याद करेइतां आव तीं खबरदार केरताइं। 2 कि तू वचन प्रचार केर; वकत बे वकते तियार रा, हर किसमेरी बरदाशत, ते तालीमी सैहीं साथी खबरदार, ते डांट, ते समझा। 3 किजोकी एरो बेलो एजनोए, कि लोक रोडी तालीम न झैली बटेले पण कन्ना केरे कैनारे वजाही सैहीं अपनी खुवैइशां केरे मुताबिक अपने लेई बडे तालीम देंने बाले बनाले। 4 ते अपने कन सचे कैरां फरेइतां ते कहैन्न पुड़ लालहे। 5 पण तू सैभी गल्लन मां हुशार रा, सुसमाचार प्रचार केर, ते अपनी सेवा पूरी केर।

6 किजोकी हुनी आव अर्घेरो जेरो उलटाने बालोइं, ते मेरे गहनेरो बेलो आवरोए। 7 मीं रोड़ो घोल केरो मीं अपनी दौड़ पूरी केरी, मीं विश्वासेरी रखवाली केरीए। 8 अगरोव जो मेरे लेई धर्मरू तैन मुकट रखोरूए, जैस सैहीं प्रभु, जै धर्मी, ते आदालत केरने बालोए, मीं तैस दिहाडे देलो ते मींए नैइं, बल्कि तैन सैभन भी, जैना तैसेरू बांदू भोनु टलारू समझतन।

खास बिसतार

9 मीं कां जल्दी एजनेरी कोशीश केर। 10 किजोकी देमासे इन सांसार टलारू सैमझतां आव शारो, ते थिस्सलूनीया ए चलो जेव, ते क्रेसकेंस गलितिया ए ते तीतुस दलमतिया ए चलो जेव। 11 सिर्फ लूका मीं सैहीं साथीए: मरकुसे साथी आन; किजोकी सेवारे लेई तै मेरे बडे कम्मेरोए। 12 तुखिकुस मीं इफिसुसे भेझोरोए। 13 जै बागा मां त्रोआसे मां मरकुसेरे तैड़ी रखोरूए, जैखन तू अव, त तैस ते किताबां खास केरतां तोमार ऐना। 14 सिकन्दर ठठेरे मीं सैहीं बडी बुराई कीयोरीए, प्रभु तैस तैसेरे कम्मां केरे मुताबिक बदलो देलो। 15 तू भी तैस कैरां हुशार रा, किजोकी तैने इशे गल्लां केरी बडी खलाफत की। 16 मेरे पेहिले जुवाब देनेरे बले केंचे मेरू साथ न दितू, बल्कि सैरेइं आव शारो: ऐल्हेरो तैन लेखो देनो पेलहो। 17 पण प्रभु मेरो मद्दगार राव, ते मीं हिमत दिती: ताकि मेरे जिरिये पूरो पूरो प्रचार भोए, ते सब होरी कोम्मां केरे लोक शुन्न; ते आव शेररे ऐशी मेरां छुटावरोइं। 18 ते प्रभु मीं हर एकी बुरे कम्मे कैरां छुटाए, ते अपने सुवर्गेरी बैदशाही मां हफ़ाजत केरतां पुजालो: तैसेरी महिमा सदा भोती राहे। आमीन।

आखरी अभिवादन

19 प्रिसका ते अकिवलाए, ते अनेसिफुरुसेरे घराने नमशकास। 20 इरास्तुस कुरिन्थुसे मां रेई जेव, ते त्रुफिमस मीं मीलेतुसे मां बीमार शारोरोए। 21 हीवतडेरे पेहिले एजनेरी कोशीश केर: ते यूबलुस, ते पुदेस, ते लीनुस ते क्लौदिया, ते सैभी दल्लां केरू तीं नमशकार। 22 प्रभु तेरी आत्मा सैहीं साथी राहे: तुस्न सैभन पुड़ अनुग्रह भोतो राए।

तीतुस

अभिवादन

1 पौलुसरे तरफां जै परमेशरेरो दास ते यीशु मसीहेरो प्रेरते, परमेशरेरे चूनोरे लोकां केरे विश्वास, ते तैस सचरे पिशानानेरे मुताबिक जै भगतारे मुताबिके। 2 तैस हमेशारे जिन्दगरे उमीदी पुड, जैसेरो वाइदो परमेशरे जै झूठ न जोए पेहिलो देंतेरो कीयोरोगे। 3 पण ठीक वक्ते पुड अपना वचन तैस प्रचारे सैहीं बांदो केरो, जै इशे मुक्ति देंने बाले परमेशरेरे हुकमेरे मुताबिक मीं सोंफोरोगे।

4 तीतुसरे नोंवे जैन विश्वासे सैहीं मेरु सचू मड्डुए: बाजी परमेशर ते इशे मुक्ति देंने बाले प्रभु यीशु मसीहेरे तरफां अनुग्रह ते शान्ति भोती राए।

क्रेते मां तीतुसेरु कम्म

5 मीं तू ऐलहेरे लेई करेते मां शारोरो थू, कि तू बाकी रेवरी गलन सुधारस, ते मेरे हुकमेरे मुताबिक नगरे नगरे मां बजुर्ग चुनस। 6 जैना बेइलजाम ते एकी एकी कौन्शरे मुन्श भॉन, जैन केरां मड्डां विश्वास केरतां भॉन, जैन पुड एशपर्सती ते हुकम न मन्नेरो दोष न भोगे। 7 किजोकी रखवालो परमेशरेरो भण्डारी भोने सैहीं बे इलजाम लोडे; न हठी, न सेरकलो, न पीने बालो, न मार पीट केरने बालो, ते न घटिया कुमैइयरो लालची। 8 पण महैमानां केरी आदर केरने बालो, भलाई चहने बालो, बरदाश केरने बालो, आदालत केरने बालो, पवित्र ते झैलने बालो भोगे। 9 ते वफादार, वचनेरे मुताबिक बनोरो रह, कि रोड़ी तालीमी सैहीं शिखैली बटे; ते बेंस केरने बालां केरु आशी भी बंद केरी बटे।

10 किजोकी बडे लोक बे फैइदी बेंस केरने ते धोखो देंने बालेन; खास केरतां तैना जैन केरो खतनो भोवरोए। 11 ऐन केरु आशी बंद केरु लोडे: इना लोक नीच कुमैइयरे लेई बे पैइदी गल्लां शिखैलतां घरां केरां घरां बिगाडतन। 12 तैने मौरां एके मँन्हें जै तैने केरो नबीए, जोवरुए, कि क्रेती लोक सदा झूठे, दुष्ट जनवर ते आलसी पेटू भोतन। 13 ई गुवाही सचीए, ऐलहेरे लेई तैन खबरदार केर, कि तैना विश्वासे मां पक्के भोन। 14 ते तैना यहूदी केरी कथा कहैन्न ते तैन मँन्हू केरे हुकम्मन पुड मन न लान, जैना सच्रे केरां भटकतन। 15 शुद्ध लोकां केरे लेई सब चीजां शुद्धन, पण गंदे, ते विश्वास न केरने बालां केरे लेई किछ भी शुद्ध नैइं: बल्कि तैन केरी अक्क ते जमीर दुइये गंदेन। 16 तैना जोतन, कि अस परमेशरे जानतम: पण अपने कम्मन सैहीं तैसेरो इनकार केरतन, किजोकी तैना भिटे, ते हुकम न मन्ने बालेन: ते कौंची रोडे कमेरे लायिक नैइं।

आचरणेरे लेई रोड़ी तालीम

2 पण तू एरी गल्लां जो, जैना रोड़ी तालीमारे काबलन। 2 मतलब बुडडे मड्ड, प्रहेज केरने बाले, ते समझदार ते संयमी भॉन, ते तैन केरो विश्वास ते प्रेम, ते सबर पक्की भोगे। 3 एँचरे बुडडी कौन्शां केरो चाल चालन भी पवित्र लोकां केरो जेरो भोगे, दोष लाने बैली, ते पीने बैली नैइं; पण रोड़ी गल्लां शिखालने बैली भॉन। 4 ताकि तैना जवान कौन्शन खबरदार केरती रहन, कि अपने मुन्शन ते बचन सैहीं प्यार केरन। 5 ते बरदाशत केरने बैली, पवित्र, घरेरो कारोबार केरने बैली, भलाई केरने बैली ते अपने अपने मुन्शां केरे आधीन रहने बैली भॉन, ताकि परमेशरेरे वचनेरी बदनामी न भोगे।

6 एँचरे जुवान मड्डन भी समझेइतां, कि संयमी भॉन। 7 सैभी गल्लन मां अपना आप रोडे कम्मन मां नमूनो बना: तेरी तालीमी मां सफाई, ते

समझदारी भोगे। 8 ते एरी खराई भोगे, कि कोई तैस बूरी न जोई बटे; जैस सैहीं असन कोई भी दोष न हेरतां छिथोन।

9 गुलामन समझा, कि अपने अपने मालकां केरे अधीन रहन; ते सैभी गल्लन मां तैन खुश रखन, ते तैन उलटो जुवाब न देन। 10 चोरी न केरन; पण सैभी किसमे सैहीं पूरे विश्वासी निसन, कि तैना सैभी गल्लन मां इशे मुक्ति देंने बाले परमेशरेरी तालीमरी शोभा बधान।

11 किजोकी परमेशरेरो अनुग्रह बांदोए, जै सैभी मँन्हू केरे मुक्तरी वजाहे। 12 ते असन खबरदार केरते, कि अस अभेगती ते सांसारेरे खुवैइशन मां मन बेदलतां इस युगे मां संयम, ते धर्म ते भेगती सैहीं जिन्दगी बीताम। 13 ते बडे उमीदी मतलब अपने महान परमेशर, ते मुक्ति देने बाले यीशु मसीहेरी महीमा बांदी भोने बलगतरे रहन। 14 जैने अपनो आप इशे लेई दितो, कि असन हर किसमेरे अधर्म केरां छुटाए, ते खास केरतां अपने लेई अक एरी कौम बनाए जै भला कम्मा केरे।

15 पूरे अधीकारे सैहीं इना गल्लां जो, ते समझा ते शिखालतो रा: कोई तीं घटया न समझे।

मसीह चाल चलन

3 लोकन याद करा, कि हाकिमां, ते अधिकैरी केरे आधीन रहन, ते तैन केरो हुकम मन्ने, ते हर एकी रोडे कम्मरे लेई तियार रहन। 2 कौंची बदनाम न केरन; लडाके न भॉन: पण नर्म सुभावेरे भॉन, ते सैभी मँन्हन सैहीं साथी बेडी नेरमी सैहीं रहन। 3 किजोकी अस भी पेहिले, बे अकल, ते हुकम न मन्ने बाले, ते धोखो खाने बाले, ते रंगा रंगा केरी खूवैशन ते एशेरे गुलैमी मां थी, ते बैर, ते जलन रखने मां जिन्दगी बीताते थी, ते भिटे, ते एकी हारी सैहीं बैर रखते थी। 4 जैखन इषो मुक्ति देंने बालेरी कृपा, ते मँन्हन पुड तैसेरो प्रेम बांदो भोव। 5 त तैन असन मुक्ति दिती: ते इन रोडे कम्मन सैहीं नैइं, जैना असेई एपु पुड अपने दयारे मुताबिक, नोंवे जरमेरे निहान, ते पवित्र आत्मा सैहीं असन नावे बनाने सैहीं। 6 जै तैन इशे मुक्ति देंने बाले यीशु मसीहेरे जिरीये सैहीं असन पुड आढंगी उलटाई। 7 जैस सैहीं अस तैसेरे अनुग्रह सैहीं धर्मां भोतम, हमेशारे जिन्दगरे उमीदी सैहीं वारस भी बनम।

8 ई गल्ल सचूये, ते आंव चहताई, कि तू इना गल्लां केरे बारे मां दिलेरी सैहीं जोस ऐलहेरे लेई जैनेइ परमेशरेरु याकीन केरु, तैना भले भले कम्मन मां लगेरो रहनेरो ध्यान रखन: ते मँन्हू केरे फैइदेरिन। 9 पण बेवकूफां केरी बेंसी, नसबनामा, ते बैर ते खलाफत, ते तैन लडाइन सैहीं, जैना व्यवस्थारे बारे मां भॉन बांचोरो रा; किजोकी तैना बेफल ते बे फैइदेन। 10 कौंची पखेण्डी एकी दुइय बार समझा ते अलग केर। 11 इन बुझतां कि एरो मँन्हू टेपलोव, ते अपनो आप दोषी बनेइतां पाप केरतो रहते।

खास हदायत ते अभिवादन

12 जैखन आंव तुस्न अरतिमास या तुखिकुसे भेइरी, त मीं कां निकुपुलिस एजनेरी कोशीश केरां: किजोकी मीं तैडीए हिवतडो कटनो थापोरोए। 13 जेनास व्यवस्थापक ते अपुलोसे कोशीश केरतां पुजा, ते हेर, कि तैन कौंची चीजरी घटी न भोगे। 14 ते इशे लोक भी जरूरतन पूरी केरनेरे लेई रोडे कम्मन मां लगेरु रहनू शिखन ताकि बे फल न रहन।

15 मेरे सैभी सैथी केरु नमशकार, ते जै विश्वासेरे वजाही सैहीं असन सैहीं प्रेम केरतन, तैन नमसकार। तुस्न सैभन पुड अनुग्रह भोतो राए।

फिलेमोन

अभिवादन

1 पौलुसेरे तरफां जै यीशु मसीहेरो कैदीए, ते दूलाह तीमुथियुसेरे तरफां इशे टूलारे मद्दगार फिलेमोन | 2 ते बेहिन अफफिया, ते इशे सैथी सिपाही अरखिप्पुस, ते फिलेमोनेरे घरेरे कलीसियारे नोंवें | 3 इशे बाजी परमेशर, ते प्रभु यीशु मसीहेरे तरफां तुस्न अनुग्रह ते शान्ति मैल्लती राहे |

फिलेमोनेरो प्रेम ते विश्वास

4 आंव तेरे तैस प्रमे ते विश्वासेरी मुशूरी शुनतां, जै सैभी पवित्र लोकन सैहीं साथी ते प्रभु यीशु मसीह पुड़े | 5 हमेशा परमेशरेरु शुक्र करताइ; ते अपने प्रार्थना मां भी ती याद करताइं | 6 कि तेरे विश्वासे मां शामिल भौनु तुशी सैरी भलाइयरे पिशानी मां मसीहेरे लेई असर करने बाले भोथ | 7 किजोकी ओ दूलाह, मीं तेरे प्रेमे सैहीं बडो आनन्द, ते शान्ति मैल्ली, ऐलहेरे लेई, कि तेरे ज़िरीये पवित्र लोकां केरे मन हरे भरे भोवरेन |

अनेसिमुसेरे लेई दरखुवास

8 ऐलहेरे लेई अगर मीं मसीह मां बडी दिलेरी त आए, कि जै गल्ल ठीके, तैसेरो हुकम तीं देइ | 9 फिरी भी मीं बड्डे पौलुसे जै हुनी मसीह यीशुएरे लेई कैदी आई, इन होरु भी रोडू लगते कि प्रेमे सैहीं बिनती केरी | 10 आंव अपने बच्चे अनेसिमुसेरे लेई जै मेरे कैदे मां जरमोरोए तीं काँ बिनती करताइं | 11 तै त पेहिलो कैची कम्मेरो न थू, पण हुनी तेरे त मेरे दुइयां केरे बडे कम्मेरोए | 12 तैस्से मतलब जै मेरे दिलेरो टुकडोए, मीं तै तीं कां भेजोरोए | 13 तैस आंव

एपू कां रखनो चहतो थू, कि तेरो भौतो इस कैदे मां जै सुसमाचारेरे वजैही सैहीं, मेरी सेवा केरे | 14 पण मीं तेरी मैरजी बगैर किछ भी केरनु न चाव कि तेरी ई क्रपा दबावे सैहीं नैइं आनन्दे सैहीं भोए |

15 किजोकी कुन बुझे तै तीं सैहीं किछ दिहाडे ऐंचरे अलग भोव कि हमेशा तेरे नेडे राहे | 16 पण इठौं पत्ती गुलामेरे ज़ेरो नैइं, बल्कि गुलामे कैरां भी रोडो, मतलब दूलाहेरो ज़ेरो राहे जै जिसमें मां भी ते खास केरतां प्रभु मां भी मेरो टूलारो भोए | 17 अगर तू मीं शामिल समझतस, त तैस इस किसमे सैहीं कबूल केर जैंचरे मीं | 18 ते अगर तैने किछ तेरो नुकसान कीयोरोए, या तैस कां किछ तेरुए, त मेरे नोंवें पुड़ लिख | 19 आंव पौलुस अपने हथन सैहीं लिखताइं, कि आंव एपू भेरेलो; ते ऐसेरे ज़ोनेरी कोई जरूरत नैइं, कि मेरो करजो जै तीं पुड़े तै तूएस | 20 दूलाह ई आनन्द मीं प्रभु मां तीं कैरां मैल्लो: मसीह मां मेरो दिल हरो भरो केरे |

21 आंव तेरे वफादार भौनेरो भरोसो रखतां, तीं लिखताइं ते इन जानताइं, कि जैन किछ आंव ज़ोताइं, तू तैस कैरां बडू जादे केरहेलो | 22 ते इन भी, कि मेरे लेई उतरनेरी ठार तियार रख; मीं उमीदे, कि तुशी प्रार्थनान सैहीं आंव तुस्न देइं गेहीलो |

आखरी अभिवादन

23 इपफ्रास जै मसीह यीशु मां मीं सैहीं साथी कैदीए | 24 ते मरकुस ते अरिस्तर्खुस ते देमास, ते लूका जै मेरो मद्दगारे इन केरु तीं नमशकार | 25 इशे प्रभु यीशु मसीहेरो अनुग्रह तुशे आत्मा पुड़ भोतो राहे | आमीन |

इब्रानियों

1 पुरांने जमाने मां परमेशरे इशे बुजरगन सैहीं थोडू थोडू ते अलग अलग किस्मे सैहीं नेबी केरे ज़िरीये गल्लाँ की। 2 इन दिहाड़ां केरे अखीरी मां असन सैहीं मड्डेरे ज़िरीये सैहीं गल्लाँ की, जै तैनी सैरी चीजां केरो बारस ठैराव ते तैसेरे ज़िरीये सारी स्रष्टि बनाई। 3 ते परमेशरेरी महिमारो प्रकाश, ते जोहोरातां केरो जैरो, अपने कुदरुतरे वचनेरे ज़िरीये सैहीं संभालते: तै असन पापण केरां धोइतां उच्चे ठैरी परमेशरेरे देहीने पासे बिशो। 4 ते फरिशतन केरां एत्रो सियानो भोव, जैत्रु ब्रकत नोवें परमेशरे तैस हिस्सेरे बराबर दितेरु थुं।

परमेशर- मड्डेरी श्रष्टता

5 किजोकी फरिशतन मैरां तैनी कैखन कैस सैहीं जोव, की तु मेरु मड्डुस ते अज तु मीं सैहीं पैइदा भोव? ते फिरी इन, कि आंव तैसेरो बाजी भोइलो, ते तैन मेरु मड्डु भोल्हू? 6 ते जैखन तै अपने पैहीले मड्डे सांसारो मां फिरी आंन्हते, त जोते, कि परमेशरेरे सब फरीशते तैसका मथो टेकेल्हे। 7 ते सुवर्गदूतां केरे बारे मां इन जोते, तै अपने दूतन हवा, ते अपने सेवकन बलती अग बनाते। 8 पण मड्डेरे बारे मां जोते, कि हे परमेशर तेरो तखत सदा तग्र राहेलो: तेरे बैशाहरी सोटी इनसाफेरी सोटीए। 9 तीं धर्मी सैहीं प्रेम कीयो: ते अधरमी सैहीं बैर; एलहेरे लेई तेरो परमेशर तेरे सैथन केरां जादे खुशारे तेले सैहीं तु मस्हा कियो। 10 ते तै इन भी जोते, हे प्रभु, तीं शुरु मां जमीनरी मुनीयाद रखी, ते सुर्ग तेरे हथां केरी कारी गिरीए। 11 तैन सभ किछ खतम भोई गहनुए; पण तु सदा एंचरे राहेलो: ते तैना सब लिगडां केरे जैरां पुराना भोई गहनेण। 12 ते तु तैन चादरारो जैरो पलैटेल्हो, ते तैना लिगडां केरे जैरां बेदलोई गाहेले: पण तु ना बेदलोस: ते तैरी जिदगी कधी खतम न भोए। 13 ते फ्रिशतन मैरां तैनी कैससैहीं किताली जोव, कि तू मेरे देहीने पासे बिश, जां तग्र आंव तेरे दुशमन तेरे पांवां केरी चौवकी न बनेई? 14 कुन तैना सभ फ्रिशते सेवा केरने बैली रुहां नैई: जैना मुक्ति मैल्हे बालां केरी सेवा केरनेरे लेई भेजी गैहीचन?

2 एलहेरे लेई, जैना गल्लाँ असेइं शुनोरीन, तैन पुड असेइं होरो भी दिल लेईतां खियाल रखोरो लोडते: कौसकोई एरहु न भोए, की असां रुडतां तैन केरां दुर चले गहंम। 2 किजोकी जै वचन फ्रिशतां केरे ज़िरीये शुनाव जेवरो थु: जैखन तैस जरुरी करार दितो जेव, ते तैसेरी खलाफ वरजी केरने बालन किछ सजहा मैल्ही। 3 ते एतरी बैडी मुक्ति केरां दुर रैहीतां असां कैन्चरे बेंची सखतम? किजोकी इस मुक्तरु बियांन पैहीले परमेशरे एपु कियेरुए: ते जैनेइं तैन शुनु, तैनेइं तैसेरी सचाई असन पुड साबत कमाई। 4 ते साथी परमेशर एपनी मेरजरे मुताबक अजीब अजीब कम्मा केरे निशान ते चमतकार हेराते: ते पाबित्र आत्मारो ज़िरीये सैहीं एपु भी गुचाही देते।

इषो मुक्ति देनें बालो

5 असली मां, जैस एजने बैली दुनियारो ज़िक्र असां केरने लोरेंम: तैसमां परमेशरे फ्रिशते राजे नैई रखोरे। 6 बल्के केंचे कौसकोई एन जोवरुए: इनसान कुन चिजे, जैसेरो तु खियाल केरतस: या तैसेरी औचलाध कुंने, जैसेरो तु पतो धिनस? 7 तीं तै फ्रिशतन केरां थोडो जैरो घट बनाव, ते ईजतरु ताज तैस लुवांव। 8 तीं हर चिज तैसेरे पांवन हैठ रखी, जैखन सभ किछ इनसानेरे अखतियारे मां कियुं जेव ता, एरसैहीं एन जैहीर भोव, की परमेशरे कोई चिज बाकी न रखी, जै तैसेरे अखतियारे मां न कियोरी भोए, पण असां हुन्ना तग्र सैरी चिजां तैसेरे अखतियारे मां न लहंम। 9 पण असां यीशु लहतम, जै फ्रिशतन केरां किछ थोडो जैरो घट थु, ताके तै परमेशरेरे

फजले सैहीं हर इनसानेरे लेई अपनी जान दे: किजोकी यीशुए मौवतरो दुख ब्रदाष कियो, एलहेरलेई तैस महीमा ते ईजतरु ताज दितु जेव। 10 जै सैरी चिजन बनते ते तैन सम्हलते: तैन परमेशरे पसंद आव, की जैखन तै हछे मड्डन मेम्हाई मां दाखल केरे, ता तैन्केरी मुखत्रो बांनी यीशुएरे दुखां केरे ज़िरीये मुकंमल केरे। 11 किजोकी पाक केरने बाले ते पाक भोनें बालां केरो बाजी अकै: एलहेरलेई तै तैन जो दूला ज़ोनें केरां न श्रमाए। 12 पण तै ज़ोते: की आंव अपने दूलांन मां तेरे नोवैरु बियांन केरेल्हो: ते किलीयाई मां तेरे नोवैरु गीत जौईल्हो। 13 ते फिरी एन की, आंव तैस पुड भरोसो केरेल्हो: ते फिरी एन की, हेर आंव तैन मड्डन सैहीं साथी भोनोंइ: जैना परमेशरे मीं दितोरन।

14 जैचरे एना मड्डां लैव्वे ते मासे बाले इनसांन, तै एपु भी तैन केरो जैरो लैव्वे ते मासे बालो इनसांन बेंनतां एपनी मौवतरे वसिले सैहीं मौवतरे मालके येनी शैताने तबाह बरबाद केरे। 15 ते तैना जैना मौवतरे डरे सैहीं सैरी उमरी मौवतरी गुलैमी मां फसोरेन, तैन छुटाए। 16 हकिकत ता एहे की तै फ्रिशतां केरो नैई बल्के अब्रहामेरी औवलाधरु साथ देते। 17 एहे वजाहे की यीशुएरु हर लिहाजे सैहीं अपने दूलां केरु जैरु बन्नु जरुरी थुं की तै प्रभु परमेशरेरी सेवा केरनेरे सिलस्ले मां अक त्रम दिल ते दियांनतदार सरदार काहींन बने: ते तैन्केरे पापां केरो हिसाब एपु दे। 18 ते खासकेरतां यीशुए एपु आजमैईशरो मुकाबलो कियो: एलहेरलेई तै तैनकेरी भी मदत केरी सखते, जैना आजमैईशरो मुकाबलो केरतन। |

यीशु मूसा केरां बड्डो

3 ते मेरे पाबित्र दूलाव, तुस सुर्गेरी धांमी मां शामलथ, ते बड्डे काहिंन यीशुएरां हेरा: जै ईशे लेई भेजोरोए, ते जैसेरो असां ईकरार केरतम। 2 जैचरे मुसो परमेशरेरे सारे घरे मां दियांनतदार थु, तैचरे तै अपने रखने बालां केरे हक्के मां भी दियांनतदार थु। 3 पण घर बनानेबालो घरे केरां जादे ईजतरु लैईक समझो गहते: तैचरे यीशु भी मुसै केरां जादे ईजतरु लैईक समझो जेव। 4 किजोकी हर घरेरो कोई न कोई बनाने बालो जरुर भोते, पण सब किछ बनाने बालो तै परमेशरे। 5 मुसो ता परमेशरेरो सेवक भोनेरे सिलस्ले सैहीं परमेशरेरे घरे मां दियांनतदार राहु: ताके तैन गल्लाँ केरी गुवाही दे, जैना बादे मां सचे भोने जेई थी। 6 पण मसीह मड्डु भोनेरे सिलस्ले सैहीं परमेशरेरे घरेरो मुखतियारे: ते तैसेरु घर असां लोकम, श्रत एने की असां तैस दलेरी ते उमिदी मजबुत रखम, जैस पुड असां भरोसो केरतम।

अविश्वासेरे लेई हदायत

7 बसा पाबित्र आत्मारो हुकमेरे मुताबक, अगर अज तुस तैसेरी आवाज शुंनथ।

8 त तुस अपने दिले सखत न केरथ: जैचरे बियाबांने मां आजमैईशरे मौके खलाफब्रजी केरतां कियेरु थुं।

9 तैडी तुशे बौव दादे आंव अजमाव: ते मेरु ईमतिहांन धिन्नु चाहुं हालां की चैल्ही सालन तग्र तैना मेरां कम्मा हेरते राहे।

10 एलहेरलेई आंव तैस पिडी केरां नाराज भोव: ते मीं ज़ोव, की तैनकेरे दिल हमेशां टेपलॉते रहतन ते तैना मेरी बत्तरे बाकम न भोनें।

11 एलहेरलेई मीं एपनी स्रकी पुड कसम खाई: की तैस ठैरी दाखल न भोई सखन: जैडी मीं तैन आराम देनेरो वैहीदो कियोरो थु। 12 मेरे दूलाव खबरदार भोथ: तुसन मैरां कैसकेरो दिल एतरो बुरो ते बेईमान न भोए, की तै जिते

परमेशरे केरां मुडी गाहे | 13 पण हर रोज ज़ेईस तग्र अज़्जेरी दिहाडी ज़ोतन, एकी होरी समझाते रहथ: ताके तुसन मैरां कोई भी मैन्हू सखत दिल न भोई गाहे | 14 किजोकी असां म्ही मां शामल भौवरंम: पण एन ज़ुरुरीए की, ज़ै भरोसो असां शुरु मां केरते राहे तैस पुड अखिरी तग्र पक्के चारे मजबुत रहंम | 15 ज़ैचरे ज़ोतन की, अगर अज़ तुस तैसेरी आवाज़ शूनथ त तुस अपने दिले सखत न केरथ: ज़ैचरे बियाबांने मां आजमैईशरे मौके खलाफ़ज़ी केरतां कियेरु थुं | 16 तैना कौन थिये: ज़ैनेइं परमेशरेरी आवाज़ शूनतां भी खलाफ़ज़ी की? कुन तैना सभ तैडी ना थिये ज़ैना मुसैरी निग्रैनी मां इस्से मैरां बेईर निसारे थिये? 17 तैना कौन थिये: ज़ैन केरां परमेशर चैल्ही साल नाराज़ राहु? कुन तैन लोकन केरां नैइं: ज़ैनेइं पाप कियो ते तैनकेरी लाशां बियाबांने मां रेही जेई? 18 ते तैनकेरे बारे मां परमेशरे कसम खेईतां ज़ोव: की तैना तैस ठैरी दाखल न भोल्हे, ज़ैडी मीं तैन आरम देंनेरो वैहीदो कियोरो थु कुन तैना नैइं ज़ैनेइं हुकम न थु मन्नोरो? 19 बसा, असां हेरतम की तैना विश्वास न केरनेरी वजाही सैहीं तैडी दाखिल न भोई बटे |

परमेशरेरे लोकां केरो विश्वास

4 बसा ज़ैखन परमेशरेरो एह वैहीदोए की असां तैसेरे आरामे मां दाखल भोई सखतम, ते अज़ तग्र एंचरंम, ते असेइं खब्रदार राहेरु लोडते: कौसकोई एरहु न भोए: तुसन मैरां कोई तैसमां दाखल भोने केरां एरहो रेही गाहे | 2 ज़ैचरे तैन लोकेइं खुशखब्री शूनी, तैचरे असेइं लोकेइं भी खुशखब्री शूनी: पण ज़ै पैगांम तैनेइं शूनो, तै तैनकेरे लेई बैफैईदो साबत भोव, किजोकी तैनेइं तै विश्वास केरतां न थु शूनोरो | 3 पण असेइं ज़ैनेइं विश्वास केरतं तै पैगांम शूनोरोए परमेशरेरे आरामे मां दाखल भोतम ज़ैचरे तैनी ज़ोव, मीं अपने क्रोधे मां कसम खाई, एना तैस ठैरी दाखल न भोल्हे, ज़ैडी मीं तैन आराम देंनेरो वैहीदो कियोरो थु: हालां की दुनिया बनानेरे बाद तैसेरां कम्मा पुरां भोई जेवरां थियां | 4 तैनी सत्तोवं दिहैडारे बारे मां कौसकोई एंचरे ज़ोवरु थुं, परमेशरे अपना सभ कम्मा फारग केरतां सत्तोवं दिहाडे आराम कियो | 5 ते फिरी तैस्से ठैरी तै ज़ोते, एना तैस ठैरी दाखल न भोई बटेल्हे, ज़ैडी मीं तैन आराम देंनेरो वैहीदो कियोरो थु | 6 तैना ज़ैनेइं शुरु मां ईही खुशखब्री शूनी, तैनेइं अपने न मन्नोरी वजाही सैहीं दाखल न भोई बटे पण किछ हेजु भी दाखल भोई सखतन | 7 ते एहे वजाहे की परमेशर फिरी अक दिहाडी ठैराते, ज़ैस जो अज़ैरी दिहाडी ज़ोतन" ते बेडी मुदतारां बाद तै दाऊदेरी किताबी मां ज़ोते, ज़ैचरे पैहीले ज़िक्क भोई जेवरुए की, अगर अज़ तुस तैसेरी आवाज़ शूनथ ता अपनो दिल सखत न केरथ | 8 अगर यीशुए तैन आराम दितोरो भोथो: त प्रभु परमेशर तैसेरां बाद एक्की होरी दिहैडारो ज़िक्क न थु केरनो | 9 ते एलहेरलेई परमेशरे लोकां केरे लेई सबतेरो आराम बाकिए | 10 किजोकी ज़ै कोई परमेशरेरे आरामे मां दाखल भोते ता तै परमेशरेरां ज़ैरां अपने कम्मन पुरे केरतां आराम केरते | 11 एलहेरलेई एजा अस भी तैस आरामे मां दाखल भोनेरी कौशीश केरम, ताके कोई भी मैन्हू तैनकेरो ज़ैरो हुकम न मेन्तां बिछडी न गाहे | 12 किजोकी परमेशरेरु वचन ज़ितु ते सचुए, ते हर दोधैरी तलवारी केरां भी जादे तेजे, एडी तग्र की जान ते रुहु डलाठ डलाठ ते गुरदे गुरदे वारां पार चिरतां निसते ते दिलेरे खियाल ते मैन्हेंरो ईरादो भी जानते | 13 दुनियारी कोई भी चिज़ परमेशरेरी नज़री केरां छप्पोरी नैइं, ते ज़ैसेरे तुत्रे अग्र अस लोकेइं हिसाब देंनोए, ते तैसेरे तुत्रे अग्र हर कोई चिज़ खुल्ही ते बगैर पडदे रहचे |

बड्डो महायाजक

14 बसा ज़ैखन ईशो अक बडो सरदार काहींने, ज़ै अम्ब्रे म्मेहीं निसतां जेव, येनी परमेशरेरु मड्डु यीशु त एजा अस अपने विश्वासे पुड मजबुत रहंम | 15 किजोकी ईशो सरदार काहींने एरहो नैइं ज़ै इशी कमज़री मां ईशो हमद्रद न भोई सखे, तै सैभी गल्लन मां ईशो ज़ैरो अज़माव जेव, पण बगैर पापे राहु | 16 एलहेरलेई असां परमेशरेरे ब्रकतरे तखते अग्र दिलेरे बेंनतां च़लम, ताके तै असंन पुड रेहंम केरे, ते अस तैसेरी ब्रकत हासल केरम: ज़ै ज़रुरतरे मोके ईशे कम्म एजे |

5 किजोकी हर सरदार काहींन मैन्न मैरां चुनो गहते, ताके तै परमेशरे सैहीं तलक रखने बैली गल्लन मां लोकां केरी सरब्राही केरे, येनी च़डतल ते पापां केरी कुबानी पैश केरे | 2 ते तै बैसमझ, ते टेपलोरे लोकन नेरमी सैहीं बरताव केरी बटते किजोकी तै एपू भी कमज़ोरी मां रहते | 3 एहे वजाहे की लोकां केरे पापण सैहीं साथी साथी तैस अपने पाफपां केरी वजाही सैहीं भी कुबैनी पैश केरनी पैईचन | 4 कोई मैन्हू एह ईज़त अपने आप हासल न केरी सखे, जां तग्र तै हारुनेरो ज़ैरो परमेशरेरी तरफां कुजाव न गाहे | 5 तैचरे मसहीए भी सरदार काहींन भोनेरी ईज़त अपने आपे एपु नेइं दितोरी: बल्के परमेशरे तैससैहीं ज़ोव, तु मेरु मड्डुस" तु अज़ मीं केरां पैईदा भुं | एलहेरलेई तै एकी होरी ठैरी भी ज़ोते, तु मल्लक सिदकेरो ज़ैरो अखिरी तग्र काहींनस | 6 एलहेरलेई तै एकी होरी ठैरी भी ज़ोते, तु मल्लक सिदकेरो ज़ैरो अखिरी तग्र काहींनस | 7 यीशुए एकी मैनेरी ज़ैरी ज़िदगी गुज़ारनेरे दिहाडन मां फुकैरी फुकैरी ते लेरां देई देई परमेशरे का दुवा मगी, ते मिनत की, की ज़ै तैस मौवती केरां बचैई सखतो थु: ते परमेशरेरो ज़ैरो रेहंम केरनेरी वजाही सैहीं तैसेरी फरयाद शूनी जेई | 8 ते मड्डु भोईतां भी तैनी दुख झैलतां भी हुकम मन्नो शिखो | 9 ते तैसमां सचो बेंनतां तैन सैभी केरे लेई मुखत्रो ज़िरयो बनो: ज़ैना तैसेरे हुकमेरी पेरवी केरतन | 10 ते तैस परमेशरेरी तरफां मलकसिदकेरे त्रीकेरो ज़ैरो खताब दितो जेव |

विश्वासे केरां भटकनेरो नतीजो

11 एस बारे मां असेइं बडु किछ ज़ोनुएं: पण तुसेइं समझनु मुशकले, एलहेरलेई की तुसां ऊकडु शूनतथ | 12 द्रासले मां अज़ तग्र तुस गुरु बनोरे लोडते थिये: पण हुन्ना ता ज़ुरुरत ता ईस गल्लरीए की कोई मैनु तुसन परमेशरेरे सुस्माचारेरी गल्लां शुरु केरां देंती फिरी शिखाले शुरी रौंटी खानेरे बजाहे तुसन ता दुध पिनेरी ज़ुरुरत भोवरीए | 13 किजोकी ज़ै दुध पिते, तै बचो भोते, तैस परमेशरेरे बचनेरो पतो ना भोए | 14 पण शुरी रौंटी ता बडे मड्डां केरे लेई भोचे: ज़ैना अपने तज़बे सैहीं एत्रे लैईक भोवेरे भोतन की रोडे ता बुरे मां फ़क सैमझी सखन |

6 1 एलहेरलेई एजा अस मसहीएरे बारे मां शुरुआती तालिमीं गल्लां छेडतां सिधे अग्रोहु च़लम, ते एरही शुरुआती तालीम फिरी शुरु केरनेरी कौशीश केरम, मसलण मौवतरे पासे नैने बाले कंमन केरां तोबा केरनी ते परमेशरे पुड भरोसो रखनो | 2 अलग अलग बपतिसमं मन्ने: मस्हा केरनेरे लेई दौंगे पुड तेल मल्लो, ते मोड्डां केरी कियामत ते अखिरारी आदालत | 3 अगर प्रभु परमेशर चाहे ता असां ईन गल्लन केरां एग्रीं तालिमरे पासे कदम रखम | 4 अगर तैना लोक ज़ैनेकेरे दिल परमेशरेरी लोई सैहीं रौशन भोवरेन: ते ज़ैनेइं असमानी ब्रकतारो मजौ च़खोरोए, ज़ैन पाबित्र आत्मा मैलहोरीए | 5 ज़ैनी परमेशरेरी रोडे बचनेरी ते एजने बैली दुनियारी ताकतरो सुवाद च़खोरोए | 6 अपने विश्वासे केरां अगर दुर भोई गहंन ता तैना फिरी तोबा केरनेरे पासे आन्हने ठिक नेइं: किजोकी तैना परमेशरेरे मड्डे एपनी ईस बुरी हरकती सैहीं दुबारे सलेबी पुड टेंगतां तैसेरी जोईतां बैजती केरतन | 7 ज़ै ज़मीन झैडी सैहीं लगातार सिजती रहचे तै ज़मीन जिमदारन रोडी फसल देचे, तै प्रभु परमेशरेरी तरफां ब्रकत मैल्चे | 8 अगर तैस ज़मिनी मां कन्टे ते झल्लां लगतां रहंन ता तै कोन्वी कमेरी ना भोए, ते तैस फिटकार सैमझतां लुशी फुकी छडतन |

9 औ मेरे ट्लारे ट्लाव: अगर असां एरही गल्लां ज़ोतम फिरभी असंन पुरो भरोसोए कि तुस एन केरां भी जादे मुखती देंने बैली गल्लां केरे हकदारथ | 10 एलहेरलेई की प्रभु परमेशर एतरो बैईनसाफ नेइं की ज़ै तुशु कम ते पियार बिसी गाहे ज़ै तुसेइं तैसेरे लेई ते तैसेरे लोक केरी सेवा केरनेरे ज़िरीये बांदी की ते हुंना भी केरने लोरेथ | 11 अस बडे खुशीम की तुसन मैरां हर कोई एंचरे कौशीश केरतो राहे ताके तुशी ऊमिद पुरी भोई सखे | 12 असंन तुशु सुस्त भोनु मंनज़ुर नेइं बल्के अस ता एन चहतम की तुस तैन लोकां केरे ज़ैरे बनथ, ज़ैना अपने विश्वासेरे ते सबारे ज़िरीये प्रभु परमेशरेरी वैहीधेरी ब्रकतां केरे बारस भोतन |

परमेशरेरो अटल वाइदो

13 जैखन प्रभु परमेशरे अब्रहामे सैहीं वैहीदो कियो ता कसम केरत कियो, किजोकी प्भु परमेशरे कैरां कोई बडो नेइ, एलहेरलेई तैनी अपने नोवेंरी कसम कमाई। 14 ते ज़ाँवः" अंव तीं सचे ब्रकत देल्हो ते तेरी बडी औवलाध भोल्ही"। 15 एंचरे सब्र केरतां अब्रहामे वैहीदो कियोरी ब्रकत हासल की। 16 मैनु ता एणु कैरां बडां केरी कसम केरतन ते एंचरे कसम केरतां हर गल्ल पक्की भोचे ते कोंची गल्लारी हाल हुजत बाकी ना राहे। 17 ता जैखन प्रभु परमेशरे एन चाहुं की तैन लोकन जैन सैहीं तैनी वैहीदो कियोरो थु तैन पुरु याकीन भोए की तै अपने वैहीदे कैरां कधी मुडने बालो नेइ ते तैनी कसम केरतां एस गल्लारी तसदिक की। 18 एलहेरलेई प्रभु परमेशरेरो वैहीदो ते परमेशरेरी कसम दुई एरही चिज़न, जैना कधे बेदलोने बैली नेइ ते एन केरे बारे मां परमेशरेरु जो झुठ जाँनु भी ठिक नेइ: एलहेरलेई अस जैना दौवडता तैसेरे सहारे मां एवरंम बेडी हिमती सैहीं तैस ऊमिदी जै ईशे सामने अपने कबजे मां एंन्हीं सखतम। 19 एह ऊमीद ईशी जानरे लेई अक एरही रौंटीए जै सचे ते कने पक्कीए तै असमानेरे पडदेरे अंत्र पबित्र ठैरी तग पुजी गहते। 20 जैडी यिथु ईशे लेई असंन कैरां पैहीले दाखल भोवरोए ते हमेशारे लेई मलक सिदकेरे त्रीकेरो काहींन मुक़ा कियोरोए।

मलिकिसक याजक

7 ईही मलकसिदक सालमेंरो बादशाहा ते परमेशरेरो काहींन थु, जैखन अब्रहामे किछ बादशैही खतम केरतां एजी राहोरो थु ता मलकसिदके तैसेरी बडी आदर की ते तैस ब्रकत दिती। 2 अब्रहामे तैस अपने माले समेत दशशॉव हिस्सो भी दितो, ते खास केरतां मलकसिदकेरो मतलब भोते, ध्रमरो बादशाहा" किजोकी तै फिरी सालमेंरो बादशाहे एलहेरलेई तैसेरे नोवें सैहीं तैस जो सचो बादशाहा जाँव गहते। 3 तै बौवरे बगैर थु ते हैईयरे बगैर थु, तैसेरो कोई कुरसी नामां नेइ, ना तैसेरी ऊम्रारी शुरुआते ते ना जिंदगरो आखरे, तै प्रभु परमेशरेरे मट्टेरो जैरोए ते तै हमेशारे लेई काहींने। 4 हुंनी खियाल केरा की एह कैरी बुजुर्ग हसती थी जैनी कौमरे बुजुर्गे येंनी अब्रहामे अपने माले समेत दशशॉव हिस्सो दितो। 5 ते तैना जैना बनी लैवन मैरां रखे गहते थिये, तैन हुकम दितो जेवरोए की तैना एपनी कौमी येंनी अपने दलानं कैरां शैरितरे मुताबक दशशॉव हिस्सो नैन हालां की तैना भी अब्रहामेरी औवलाधी मैरन। 6 पण जैनकेरी कौम लैवन कैरां भी अलग थी तैनी अब्रहामे कैरां दशशॉव हिस्सो नियो ते जैससैहीं वैहीदो कियो जेवरो थु तैस ब्रकत दिती। 7 निकडे बडे कैरां ब्रकत मैल्चे एसमां शक नेइ। 8 ईडी ता मरने बाले मैनु दशशॉव हिस्सो नैतन पण तैडी ता तैहे दशशॉव हिस्सो नैते जैसेरे बारे मां एह गुवाही दिती गहचे की तै जिंतोए। 9 ब्लके अस ज़ोई सखतम की लावी भी जै दशशॉव हिस्सो नैते अब्रहामेरे जिरीये दशशॉव हिस्सो दितो। 10 एलहेरलेई की जैस मोक मलकसिदके अब्रहामेरी आदर कियोरी थी ता तै येंनी लावी हेजु अपने बाजेरे जिसमे मां थु।

मलिकिसदक केरे बदले होरो याजक

11 अगर बनी लैवी केरे त्रिकेरी कहांनीत जैसेरे वजाही सैहीं तैस कौमी शैरीत दिती जेवरी थी, ता लोकन पक्के बनेई सखती थी, ता फिरी हारुनेरे त्रिकेरी कहांनीतरे बजाहे मलकसिदकेरे त्रिकेरे काहींन बन्नेरी कुन ज़रुरत थी? 12 किजोकी जैखन कहांनीत बेदलोई जेई ता शैरीतरु बेदलोनु भी ज़रुरीए। 13 जैसेरे ज़ोने सैहीं एना गल्लां ज़ोई गैहीचन की तै एकी होरी खानदेंनी मैरां थु ते तैस खानदेंनेरे केंचे भी मडदे कधे सुखनरी ठैरी सेवा ना थी कमेवरी। 14 ता एन बांदुए कि ईशौ प्रभु परमेशर युहुदरे गोदले मैरां थु ता मुसै एस फिकेरी कहांनीतरे बारे मां कोई ज़िक्र नेइ कियोरो। 15 ता एस्सैहीं होरु भी सच साबत भोते की मलकसिदकेरो जैरो अक होरो भी कहींन एजी गहते। 16 जै जिसमांनी शैरीतरे हिसाबे पुड नेइ ब्लके जै एरी ताकती बैली शकली पुड भोए जै आमर भोए। 17 किजोकी एह गुवाहि दिती जेवरीए की तु मलकसिदकेरे त्रीकेरो अखिरी तग कहींनस। 18 एलहेरलेई तै पुरांनो हुकम कमजोर भोनेरे वजाही सैहीं वडैही छड्डो। 19 किजोकी शैरीतां कोई भी चिज

पकी नेइ कियोरी: ते तैसेरी ठैरी असंन अक होरी ऊमीद दितोरीए ते एसेरे जिरीये सैहीं असां प्रभु परमेशरेरे नेडे गैही सखतम। 20 ते एसेरे अलावा प्रभु परमेशरेरी कसम भी आहे किजोकी होरे कहींन ता कसमरे बगैर रखोरे थिये। 21 पण यीशु कसमी सैहीं साथी तैसेरो भोतो कहींन रखो जेव जैससैहीं तैनी ज़ाँवः परमेशरे कसम खेवरीए ते तै तैस टलोडेल्हो नन्ना: की तु आखिरी तग कहींनस। 22 एलहेरलेई यीशु अक बडी बडी जमानत देंने बालो टिको। 23 तैना कहींन मौवतरे बाद रेही ना थिये सखते एलहेरलेई तैना हछे रखते थिये। 24 पण यीशु आखिरी तग रहने बालो कहींने ते एलहेरलेई तैसेरी ठैरी होरो कोई कहींन ना रखो गाहे। 25 एलहेरलेई जैना लोक तैसेरे जिरीये सैहीं परमेशरे का एइतन तै तैन पूरी पूरी मुखती देई बटते, किजो कि तै तैन केरे लेई बिनती केरनेरे लेई हमेशां जिंतोए। 26 असंन एरे जैरे सरदार कहींनेरी ज़रुरते जै पबित्र ते झुठो ना भोए ते जै पापे कैरं दुर भोए जै पापन कैरां आलग ते अम्ब्रे कैरां भी ऊचो कियोरो भोए। 27 होरी कहींना कैरो जैरो ना भोए की तैस भी पैहीले अपने पापां कैरे लेई ते फिरी अपने लोकां केरे पापां केरे लेई रोज़ कुर्बेनी चाडनेरी ज़रुरत पै: तैनी ता अपनो आप कुर्बान केरतां एकी बार एरही कुर्बानी चाडी जै हमेशारे लेई बडीए। 28 शैरीतरे मुताबक ता कमजोर मैत्र सरदार कहींन रखते थिये पण परमेशरे शैरितरे बाद कसम खेईतां अपने बचने सैहीं अपने मट्टे कहींन रखते जै हमेशारे लेई पक्को कियोरोए।

यीशु इषो महायाजक

8 जैना गल्लां हुन्ना तग ज़ोई तैन मां बडी गल्ल एहे की ईशौ एरहो सरदार कहींने जै अम्ब्रे मां प्रभु परमेशरेरे देहींने पासे बिशोरोए। 2 ते तैस पबित्र ठैरी सेवा केरते जै केंचे मैने नेइ ब्लके प्रभु परमेशरे अपने खास एहेदे पुड खडो कियोरोए। 3 किजोकी हर सरदार कहींन ते कुर्बेनी चडतल चाडनेरे लेई रखो गहते, एलहेरे लेई ज़रुरी थु, कि ईशे सरदार कहींने का भी पैश केरनेरे लेई किछ भोए। 4 अगर तै ज़मिनी पुड भोथो ता कधे कोई कहींन ना थु भोन्नो किजोकी ईडी शैरीतरे मुताबक चडतल चहडनेरे लेई कहींन ईडीन। 5 तैना तैस पबित्र ठैरी सेवा केरतन जैना असमानेरी पबित्रेरी नकल ते तैसेरो एकसे: एहे वजाहे की जैखन मुसौ अक तैम्बु बनानेरी तियेरी मां थु ता प्रभु परमेशरे तैस हदैईत की कि हेर जै जलाल मीं तीं पहाडे पुड हेरेवरो थु तैसेरे हिसाबे सैहीं तु सैरी चिज़ां बना। 6 पण हुंनी यीशुए अक बडी बडी कहांनित मैल्होरीए जै तैस्से दरजेरी जैरी बडी बडीए जै तैनी प्रभु परमेशरेरे लोकां केरे मुझाटे अक ईक्रार कियो ते तै ईक्रार बडे वैहीदां केरे लेई थु। 7 किजोकी अगर पैहीले ईक्रारे मां कोई खांमी ना भोथी ता होरो ईक्रार केरनेरी कोई ज़रुरत ना थी भोनी। 8 पण प्रभु परमेशर तैन लोकां केरे एब हेरतां जोते: तक्का प्रभु परमेशर जोते कि तैना दिहाडे एजी राहोरेन, की अंव ईस्त्राएलेरे घराने ते युहुदरे घराने सैहीं अक नोवों ईक्रार केरेल्हो। 9 एह तैस ईक्रारेरो जैरो ना भोलो जै मीं तैनकेरे बौव दादन सैहीं तैस दिहैडी ईक्रार कियोरो थु जैखन मीं मिस्त्रे मैरां तैन कडनेरे लेई तैनकेरो हथ ठमोरो थु, प्रभु परमेशर जोते की तैना मेरे तैस ईक्रारेरे भी वफादार ना राहे एलहेरलेई मीं भी तैनकेरी कोई परवहा ना कमाई। 10 प्रभु परमेशर जोते की जै ईक्रार अंव ईस्त्राएलेरे घराने सैहीं तैस मोक केरेल्हो ते एहे की अंव अपने कानुन तैनकेरे दमाके मां छेडेल्हो ते तैनकेरे दिले पुड लिखतां छेडेल्हो ते अंव तैनकेरो परमेशर भोलो ते तै मेरी कौम भोली। 11 ते केंची एह ज़रुरत ना भोली की अपने मुलखे मां या अपने दलानं एह तालिम ना देल्हे की परमेशरे पशांना, किजोकी निकडे कैरां ते बड्डे तग सभ मीं पशांनेल्हे। 12 एलहेरलेई अंव तैनकेरी गैलती माफ केरेल्हो ते तैनकेरे पापन फिरी कधे याद ना केरेल्हो। 13 जैखन प्रभु परमेशरे नोवें ईक्रारेरो ज़िक्र कमाव ता पैहीले जो पुरांनो ज़ाँव ते जै चिज पुरांनी ते चरोक्नी भोचे तै लूशी शैडी गहचे।

पार्थिव तम्बू मां सेवा

9 फ़ज केरा की पैहीले क़ाररे मुताबक भी परमेशरेरी सतुती आराधना केरनेरे कानुन थिये ते मैनेरी बनेवरी सतुती आराधना केरनेरी अक ठार भी थी। 2 येंनी अक खंमो बनेवरो थु तैसेरे दुई हिस्से थिये पैहीले हिस्से

मां अक दियो ते मेज ते चैंडोरी रौडी रेखोरी भोती थी: तैस हिस्से जो पबित्र घर जोते थिये। 3 होरी हिस्से मां पड़दे पुतोरं तै जिगा थी तैस हिस्से जो पबित्र ठार जोते थिये। 4 एसमां सौत्रेरो अगर दान ते एहेदेरो सुंदुख थु जै सौत्रे सैहीं जडोरो थु: तैस सुंदुखे मां मन भरतां अक सौत्रेरो भांड प्रतबानं थुं ते कंने हारुनेरी सोटी तैस फुडु लगोरां थियां ते होरी तैना दुई सलेटां जैन पुड दश हुकम लिखोरे थिये। 5 एस सुंदुखे पुड क्रोबी येनी फ्रिशते बनोरे थिये जैना प्रभु परमेशरेरी महीमारे निशांन थिये जैना बैली केरी ठैरी सैईयो केरते थिये, एन गल्लाँ केरु बियांन केरनु हुंनी जरूरी नेइं। 6 एन चिजां केरे एस त्रिके सैहीं तियार भोनेरे बाद कहींन खेमे मां हर बखत तैडी रहते थिये ताके आराधना सतुत्री रसंन पुरी केरन। 7 पण होरी हिस्से मां सरदर कहींन साले मां एक्की बार गहतो थु ते तैभी खुंन घिनतां ताके एपनी ते अपने टब्रेरी गेलती केरे लेई चहडे। 8 एस सैहीं पबित्र आत्मारो एह ईही ईशारो थु की जां तग्र पैहीलो खेमो आहे ता पबित्र ठैरी गहनेरी बत्त बंदे। 9 एह खेमो अजैरी जमिनरे लेई अक मसाले एस्सैहीं एन जैहीर भोते की जै भोग ते कुर्बेनी तैडी चहडते थिये तैस्सैहीं आराधना सतुती केरने बालां केरो विश्वास ते जमीर रोडे चारे पक्को ना थु भोई सखतो। 10 तैनकेरो तलक सिर्फ खाने पिने ते जिसमेरी रसंनन जैचरे निहांन देंनो ते सुन्ती केरनी थु, एना जिसमेरां कम्मन जैना सिर्फ तैस मोके तग्रन जां तग्र की प्रभु परमेशरेरी तरफां तैनकेरे लेई कोई हुकमेरो जमानो ना एजे।

मसीहरे लेव्हेरी शक्ति

11 पण मस्ही रोडी केरां रोडी ब्रकतां केरो कहींन बेनतां एवरोए जै हुंन्ना माजुदे ते तै जैस खेमे मां सेवा केरते जै बडो बडो ते पक्कोए ते मैनेरे हथेरो बनोरो भोए येनी तै ईस दुनियारो नेइं। 12 ते गब्बां ते गोरु केरो लैहु नेइं ब्लके अपनो लैहु देईतां एकी फेरे पबित्र ठैरी दाखल भोव ते असंन एरही मुखती दिती जै आखीए। 13 किजोकी जैखन थोवां ते दांतां केरो लैहु ते बेछी केरी मांजन गंदे लोकन पुड छिडकतां जिसमांनी त्रीके पबित्र मन्ने गहते थिये। 14 ते मस्हीए एरही अजली रुहुअरे जिरिये सैहीं अपनो आप प्रभु परमेशरे का बगैर पापेरी त्रीके सैहीं कुर्बानी पैश की ते तैसेरो लैहु ता ईशे जमीरे एरहे कम्मा केरे लेई होरो भी जादे पबित्र केरेलहो जैन केरो तलक मौवती सैहींए ताके अस जिते परमेशरेरी आराधना केरम।

15 एहे वजाहे की प्रभु परमेशरे अपनी टलेरी दुनीया मुझाटे रेखतां तैसेरे जिरिये सैहीं अक नोवाँ ईक्रार केरेलहो ताके परशररेरे कुजेवरे लोक परमेशरेरे वैहीदेरे मुताबक आखीरे जेईदात हासल केरन 16 किजोकी बसीधरे सिल्सले मां बसीध देने बालेरी मौवत साबत भोनी जरूरीए। 17 एलहेरलेई बसिध देमेने बालेरे जिते दम्मे तग्र कोई अंमल ना भोए: तैसेरे मरनेरे बाद तैस बसिधरो जिक्र भोते। 18 एहे वजाहे की पैहीलो इक्रार भी बगैर लैहुएरे नेइं कियोरो। 19 एलहेरलेई जैखन मुसे सैरी कौमी शैरितरो अक अक हुकम शुनाव ता तैनी थोवां ते बछड़ां केरो लैहु पैनी मां मिलेईतां पियाव, ते फिरी लाल ऊन्ना ते अक मुशकी बाली फुडोवेरी डालडी एन्हतां तै लैहु शैरीतरे किताबी ते सैरी लोकन पुड छिडको। 20 ते जौवं की एह ईक्रारेरो लैहुए ते एसेरो हुकम प्रभु परमेशरे तुशे लेई दितोरोए। 21 एलहेरलेई तैनी खेमे पुड ते आराधनारी सैरी चिजन पुड लैहु छिडको। 22 ते शैरीतरे मुताबक तक्रिबन सैरी सैरी चिजां लैहुए सैहीं पबित्र की गैहीचन ते जां तग्र लैहु ना बगाव गाहे तां तग्र पाप भी माफ ना भोए।

मसीहरे कुर्बेनी सैहीं पाप माफ

23 बस्सा जैखन एकी पासे एन जरूरी थुं की एना चिजा जैना असमानी नकली पुडन एरही कुर्बेनी सैहीं पबित्र की गहन ते होरी पसे बडु जरूरी थुं की एपु असमानी चिजां तैनकेरी रोडी कुर्बेनी केरे जिरिये सैहीं पबित्र की गहन। 24 किजोकी मस्ही मैनेरे बनेवरे घरे मां जैन सचे पबित्र घरेरी नकले, दाखल नेइं भोवरो, ब्लके अम्ब्रे मां दाखल भोव जैडी तै ईशे लेई प्रभु परमेशरे का हाजरे। 25 युहुदी केरो सरदार कहींन पबित्र घरे मां हर साल होरी केरो येनी जानब्रां केरो लैहु नैईतां गहते, पण मस्ही अपने आपे बार बार कुर्बान केरनेरे लेई ना गाहे। 26 वरना दुनियारे शुरु केरं लेईतां हुंन्ना तग्र तैस बार बार दुख

झैल्लो ना पै। 27 ते जैचरे सैहीं मैनेरु मरनु ते एकी बा आदालतरु भोनु पक्कोए। 28 तैचरे सैहीं मस्हीए भी बडे लोकां केरे पाप सैल्लां गहनेरे लेई एक्की बार कुर्बान भोईतां होरी फेरे पापां केरी कुर्बानी देंनेरे लेई नेइं ब्लके तैन मुखती देंनेरे लेई एजेल्हो, जैना तैसेरे इन्तजारे मांह।

सिद्ध कुरबानी

10 किजोकी शैरित आंइदरे लेई सिर्फ रोडी चिजां केरो अक एकसे ते ना तैनकेरी असली शकले, एलहेरलेई एकी किसमेरी कुर्बेनी जैना हर साल दिती गैहीचन तैना परमेशरे का एजने बालन कथे भी पख साफ ना केरी सखन। 2 अगर केरी सैखेथी ता तैनकेरी दितोरी कुर्बेनी मनजुर ना भौथी? एलहेरलेई की अगर आराधना सतुती केरने बाले सचे रोडे चारे पाक साफ भोथे ता तैनकेरो जमीर तैन पापी ना बनाथो। 3 पण तैना कुर्बेनी हर साल तैन याद करेईचन की तैना पापीण। 4 एलहेरलेई दांतां केरो ते थोवां केरो लैहु पापे दुर ना केरी बटे। 5 ता जैखन मसही दुनियाई मां अव ता तैनी जौवं: ती कुर्बानी ते चडतल पसंद ना की ब्लके तीं मेरे लेई अक जान तियार की। 6 तु खुशारी कुर्बेनी सैहीं ते गैलतरी सुखनी सैहीं खुशी ना भौव। 7 तैखन मीं जौवं: हेर अंव ईडीहीं जैचरे पाबित्र किताबी मां लिखेरुए: की तेरी ब्रजी पुरी केरी। 8 पैहीले ता तै जौते" ती कुर्बेनी ते चडतल ते खुशारी कुर्बेनी ते गैलतरी सुखना पसंद ना की ते ना तैन सैहीं तु खुशी भौव" हाला की एना कुर्बेनी शैरीतरे मुताबक दिती गैहीचन। 9 फिरी तै एन जौते: हैर" अंव तीं का हाज्राई ताके तेरी मर्जी पुरी केरी: एचरे तै पैहीले ऊढाते ताके होरी तैस ठैरी रेखीं। 10 एस मेज्रारो मतलबे एहे की असां यीशु मसहीएरे एकी बार कुर्बान भोने सैहीं पाबित्र भौवरंम।

11 हर काहींन खडे भौइतां रोजाना अपने धर्मेरी सेवा केरतो रहते, ते एकी किसमेरी कुर्बेनी रोज देंतो रहते, जैना पापे कथे भी दुर ना केरी सखन। 12 पण मसही पापां केरे लेई एकी बार कुर्बानी देइतां परमेशरेरे देहीने पासे गैहीतां बिशी जेव। 13 ते तै तैइसोकोनो देंतो बलगने लोरोए की तैसेरे दुशमन तैसेरे पांवां केरी धुड बन्न। 14 किजोकी तैनी पाबित्र भोने बाले एकी कुर्बेनी सैहीं हमेशारे लेई पाबित्र कियोरेन। 15 पाबित्र आत्मा भी ईशे लेई गुवाही देंते एन जोचे: पैहीले ता एन की। 16 परमेशर एन जौते: की जै श्रत अंव तैन दिहैडना बाद अपने लोकन सैहीं केरेलहो, तै एहे की अंव अपने काणुन तैनकेरे दिले मां छेडेल्हो ते तैनकेरे दिमागे मां लिखतां छेडेल्हो। 17 ते फिरी एन भी की अंव तैनकेरे पाप ते तैनकेरी गैलती कथे भी याद ना केरेलहो। 18 बस्सा जैखन अगर तैनकेरे पापां केरी माफी भोई जेई ता फिरी कुर्बेनीर कुन जरूरीए?

परमेशरेरे नेडे गन्हू

19 एलहेरलेई मेरे द्वावल जैखन असंन यीशुएरे खुने सैहीं तैस नोवीं जिते बत्तां पाबित्र घरे मां दाखल भोनेरी हिंमते। 20 जै तैनी पडदे मा येनी अपने जिसमे मां ईशे लेई रेखोरीए। 21 ते तै ईओ एत्रो बडो काहींने जै प्रभु परमेशरेरे घरेरो मुखतियारे। 22 ता एजा अस अपने सचे ते पुरे दिलेरे विश्वासे सैहीं एरहो दिल जै खुनेरे तैप्पेई पापेरे एसासे सैहीं पाबित्र कियोरेन ते एरहो जिसम नैईतां जै साफ पैनी सैहीं धौवरोए, परमेशरे का नैम। 23 ते अस एपनी उमिदरो ईक्रार रोडे चारे टलेईतां रखम किजोकी जैनी असंन सैहीं वैहिदो कियोरोए तै सचौए। 24 ते अस अपने पियार मुहाबती मां ते रोडां कम्मा केरनेरी सल्ला देने मां एकी होरेरो लिहाज भी केरम। 25 ते एकी ठैरी अकोतु भोनु ना शारम जैचरे होरे लोक केरतन ब्लके अस एकी होरी समझाम: तुस जैस हिसाबे सैहीं परमेशरे दुबारे एजनेरी दिहैडी नेडोते लहतथ तैस्से हिसाबे सैहीं जादे एन गल्लन पुड अमल भी केरते रहथ।

26 किजोकी अगर अस सचेरी पशांन बुझनेरां बाद जैनी बुझतां पाप केरम ता पापां केरे लेई कोई कुर्बानी बकैया ना रही। 27 हां: रोज अदालतरी सजह बलगनेरो उर ते तै अगरी सजह बाकीए जै परमेशरेरे दुशमन खेई छेडेल्हो। 28 जैखन मुसैरी शैरितरी खलाफ ब्रजी केरने बाले दुई या टलाई मैनु केरी गुवैहीयरी बेरेहेंमी सैहीं कल्ल कियो गहते। 29 ता तै कैत्री बैडी सजहारे लैईक भौलो, जैनी परमेशरेरे मडैरो कल्ल कियो, वैहिदेरे खुनेरो जैस्सैहीं तै पाबित्र

भोवरो थु, तै ना पाक बुझो ते बर्कत देने बैली पाबित्र आत्मारी बेजती की |
30 किजोकी अस ज्ञानतम, तैनी जौवरु थुं, बदलो घिन्नो मेरु कम्मे, बदलो
अंव ऐपु दैईल्हो, ते फिरी एन की अंव अपने लोकां केरी आदालत केरेल्हो |
31 जिंते परमेशरेरे हथन मां गहंनु बडी खत्रनाक गल्ले |

32 पण तैना पैहिले दिहाड़े याद केरा जैखन तुसन लौ मैल्ही ते बेडी
मुशकलातां केरो दैटतां मुकाबलोइ कियो | 33 येनी कधै ता तुसां लोकेरे लांन
तांना केरी मुसिबती सैहीं लोकेइं तुशौ तमाशौ बनाव ते कधी तुसेइं लोकेरी
मुसिबत बरदाशत केरती लही ते तुसेइं तैनकेरु साथ दिनु | 34 तुसेइं कैदन
सैहीं हमदर्दी की ते अपनो माल भी लुडानो खुशी सैहीं कुबुल कियो, किजोकी
तुस ज्ञानते थिये कि अक बडी बडी खास मलकियत तुसन का माजुदे |
35 पण तुस हिंमत ना हैरथ, किजोकी तैसेरो फल बडो बडोए | 36 तुसेइं बेडी
सब्री सैहीं कम कियेरु लौड़ते ताके तुस परमेशरेरी प्रजी पुरी केरतां तै चिज
हासल केरी सखथ जैसेरो तैनी वैहियो कियोरोए | 37 किजोकि हुनी थौडु चिर
बाकिये, की एजने बालो एजेल्हो ते चिर ना लाल्हो | 38 मेरो धर्मो मैनु
विशवासे सैहीं जिंते राहेल्हो अगर तै मेरु साथ छेडी दे ता मेरो दिल तैस्सैहीं
खुशी ना भोल्हो | 39 पण अस साथ छडने बाले नेइं कि अस मुकी गहंम,
ब्लके अस विशवास केरने बालैम ताके ईशी जान सलांमत राहे |

विश्वासेरी मिसाल

11 विशवास ऊमिद कियोरी चिजां केरु यकिने ते अलैही चिजां केरु
सबुते | 2 तैस विशवासेरे वजाही सैहीं ईशै बुजुर्गां केरे हके मां गुवाही
दिती जेवरीए | 3 विशवासे सैहीं असां बुझी सखतम की सारु सनसार
परमेशरेरे हुकमे सैहीं बनेरुए: एन नेइं की जैन किछ नजरी एईते तैन लैहोरी
चिजन सैहीं बनेरुए |

4 विशवासे सैहीं हाबले केइंने केरां रोडी कुर्बानी परमेशरे जो दिती: जैसेरी
वजाही सैहीं तैसेरी चडतल परमेशरे कुबुल केरतां तैसेरे धर्मो भोनेरी गुवाही
दिती ते अगर हाबल मैरी भी जेवरोए ता भी तै विशवासेरे जिये सैहीं हुना
तगर गल्लां केरतोए | 5 विशवासे सैहीं हांनुक अपनी मौवती केरां पैहिलो ऊब्रो
नियो ते तैसेरो पत्तो ना चलो: किजोकी परमेशरे तै ऊब्रो नियोरो थु: तैसेरे
ऊब्रे गहंने केरां पैहिले तैसेरे हक्के मां गुवाही दितोरी थी कि तै परमेशरे
ट्लारोए | 6 किजोकी विशवासेरे बगैर परमेशरे खुशी एजनु रोडु ना लगे:
बस्सा रोडु एने की परमेशरे का गहंने बालो विशवास केरे की परमेशर सामने
ते तै अपने तौपने बालन फल देते | 7 विशवासे सैहीं नुहे तैन गल्लां केरे बारे मां
जैना एजने बाले मौके मां भोनी बितनी थी परमेशरेरे तरफां हुकम मैल्लां
परमेशरेरे पियारे सैहीं तैस पुड अमल कियुं ते अक किशती बनाई जैसमां
तैसेरु सारु टब्र बंचु: एन केरने सैहीं तैनी सारी दुनिया मुर्जम बनाई ते एपु
तैस धमेरो बारस बनो जै विशवासे सैहीं हासल भोचे |

8 विशवासे सैहीं जैखन अब्रहाम कुजेवरो थु ता तै परमेशरेरो हुकम मैन्तां
तैस जगाई चलो जेव जै बादे मां तैस हिस्सेरी ठैरी मैल्ले बाली थी: हालां की
तै एन भी ना थु ज्ञानतो की अंव कौरां चलोरोइं | 9 विशवासेरे जिये सैहीं तै
परमेशरेरे कियोरे वैहीदेरे मुताबक तैस मुलखे मां परदेशी केरो जैरो गैहितां
बस्सो ते ईजहाक ते याकुबे समेत, जै तैन सैहीं साथी जैना तैस वैहिदेरे
बारस थिये तैम्बु मां रहंने लगे | 10 किजोकी अब्रहाम तै खुबसुरत शहरेरो
ऊमिदवार थु जैसेरो घडने ते बनाने बलो परमेशर थु | 11 विशवासे सैहीं
सारा दोजिंती भोनेरी ताकत भुई, हालां की तै ऊप्रारे हिसाबे सैहीं बचो
ज्ञानेरे काबल ना थी राहोरी: सारा एन याकिन थुं की वैहियो केरने बालो
परमेशर अपनो वैहियो पुरो केरेल्हो | 12 बस्सा अक एरहो मैनु जै मुडदो जैरो
थु अम्ब्रेरे तारां केरे ते समुदरेरी रेतारे बराबर एत्री हछी औवलाध पैदा भुई |

13 एना सभ लोक विशवास केरते मैरी जे ते तैन वैहिधेरी कोई चिज ना
मैल्ही बटी: पण दुररां तैन हेरी हेरतां खुशी भोते राहे ते ईकार केरते राहे की
अस जमिनी पुड परदेशी ते मुशाफ्रम | 14 जैना एरही गल्लां जोतन तैन सैहीं
एन साबत भोते की तैना अज तग्र अपने मुलखेरी तलाशी महंन | 15 अगर
तैना अपने छडोरे मुलखेरो खियाल रखते भौथे ता तैन वापस गहंनेरो मोको
भी थु | 16 पण असलिती मां तैना एकी रोडे असमनी मुलखेरे हकदार थिये:

एलहेरलेई प्रभु परमेशर तैनकेरो परमेशर जौने कैरां ना शरमाए: एलहेरलेई
तैनी तैनकेरे लेई अक शहर तियार कियो |

17 विशवासे सैहीं अब्रहामे अपने इमतिहानेरे मोके ईजहाकेरी कुर्बानी देने
केरां ना टलो जै तैनी परमेशरेरे वैहिदे कुबुल केरने बद मैलहोरो थु, तैस्से
आकैल्हे मड्डे कुर्बान केरने जो तियार भौई जेव | 18 हालां की परमेशरे
तैस्सैहीं जौवरु थुं, की ईजहाकेरी औवलाधी सैहीं तेरी औवलाधरु नोवं
राहेलु | 19 अब्रहामे यिकीन थुं की परमेशर मां मुडदन जिंते केरनेरी कुदरुत
रखते: एलहेरलेई तैनी अपने जिये सैहीं ईजहाक फिरी जिंते कियो |
20 विशवासे सैहीं ईजहाके अपने दुईये मड्डन याकुबे ते ईसुए तैनकेरे एजने
बाले बारे मां ब्रकतरी दुवा दिती | 21 विशवासे सैहीं याकुबे युसफैरे दुईये मड्डन
ब्रकत दिती ते पनी सोटरो सहारे सैहीं मथौ टको | 22 विशवासे सैहीं युसफै
मरते बार अपने बनी ईस्राएलन मुलख मिस्रे मैरां गहंनेरे बारे मां जौवरु थुं, ते
एपनी हैडी केरे बारे मां जौवरु थुं |

23 विशवासे सैहीं मूसैरे हाज बोव्वेइं तैसेरे जूमनेरां पत्ती टलाई महिन्न तग्र
छपैइंतां रखो, किजोकी तैनेइं हेरु की तै बचो हेरनो बडो खुब सुरते, ते तैन
बादशाहेरे हुकमेरो डर ना राहु | 24 विशवासे सैहीं मूसै बड्डे भौईतां फेरोनेरी
कुईयरु मड्डु बन्ने केरां ईनकार कमाव | 25 पापेरे थौड़े दिहाड़े आन्देरे गुजारनेरे
बजाहे तैनी परमेशरेरे लोकन सैहीं साथी मिलतां दुख झैल्नो रोडो समझो |
26 तैनी मसहीएरे लेई दुख झैल्नो मिस्रेरे खजांन केरां जादे दौवलत समझो,
किजोकी तैसेरी नजर फल मैल्ले पुड थी | 27 विशवासे सैहीं तैनी बादशाहेरी
सक्रो डर ना कियो, ब्लके मुलख मिस्रे छेडी दितां: एलहेरलेई की तैनी
आलाऊ परमेशरेरे भरोसे पुड टिकोरो राहु | 28 विशवासे सैहीं तैनी बेड्डी
दिहैडारी रौट्टी खाने ते लैहु छिडकने पुड अमल कियुं ताके पैहिलां मड्डां मारने
बालो फ्रिशतो बनी ईस्राएलेरे पैहिले मड्डन हथ ना लाए | 29 विशवासे सैहीं
बनी ईस्राएल लाल समुंदरे म्महेइं एंचरे लंघे जैचरे शुकोरी बत्तां पार निस्से:
पण जैखन मिस्रेइं तैड्डां पार लंघनेरी कौशिश की ता तैना डुबतां मैरी जे |
30 विशवासे सैहीं यरिहो शहरेरे डंख ईस्रेएली केरे सत दिहैडन तग्र तैनकेरे
चोवरे पासन फिरनेरे बाद डुली जेई | 31 विशवासे सैहीं रहाब बुरे खिया केरां
मरने केरं बेची जेई, किजोकी तैनी ईस्रेएलन बिशने जो ठार दितोरी थी |

32 होरु हुनी कुन जौइ? ऐत्री फूरसत हुना कोडीए की जदौन, बुरक,
सेमसुन, अखया, दावद, ते सेमियुल ते होरी नेबी केरो जाल शुनेइं? 33 तैनेइं
विशवासे सैहीं राज हासल कियुं, ते धमेरु कम कियुं ते वैहियो कियोरी चिजां
हासल की ते ड्लाघां केरु आशी बंद कियुं | 34 अग्गी केरां भी बंचे ते तलवारी
केरां भी बंचे: कमजोरी मां भी निग्र राहे ते जंगी मां भी बहादर निस्सै दुशमना
केरी फौवजरु तुत्र मोडु | 35 कौन्शन अपने मुओरे बचारे जिमत मैल्हे, किछ
मार खांते खांते मैरी जे पण छुटनु मन्जुर ना कियुं ताके तैन मौवतेरे बाद अक
रोडी जिदगी मैल्हे | 36 किछ हसते मजाक केरते राहे, किछेइं कोडे खाए, ते
किछ शंगलन सैहीं बंधे ते जैल्ही मां छडे | 37 तैना जखमी किये ते आरे सैहीं
चिरे, ते तलवारी सैहीं मारे जे: भैड्डां छैल्ली केरी खाडी डैबतां गुलांमी मुसिबत
ते बुरयाई झैलते झैलते फिरते राहे | 38 दुनिया तैनकेरे काबल ना थी: तैना
जंगलन ते पहाडन ते कूडन मां ते जमिनरे नालन खोलन म्महेइं एरहे हंठते
थिये |

39 तैन सैभी केरे विशवासेरे वजाही सैहीं तैनकेरे हक्के मां रोडी गुवाही दिती
जेई पण तैन वैहिदेरी कोई चिज ना मैल्ही | 40 किजोकी परमेशरे पैहिले ईशे
लेई अक रोडी चिज सोचतां रखोरी थी ता तैना लोक ईशे बगैर पक्के मजबुत
ना किये गहंन |

बाजी परमेशरेरे जिये ताड़ना

12 एलहेरलेई जैखन शहादतां केरे एत्रे बडे घांने असां घेरोरंम ता अस
भी सैरी रकावटां ते तैस पापे जै असंन सुग्रमे मां दुख देते दुर केरम,
ते तैस दौवडी जै असेइं दौवडनीए बल्लै सैहीं दौवडम | 2 ऐजा अस विशवासे
मां पाबित्र केरने बालोए यीशु पुड नज्रु रखम जैनी तैस खुशारे लेई जै तैसेरी
नज्री मां थु, बेजत्री परवहा ना की, ब्लके सलेबरो दुख झैल्नो ते परमेशरेरे
तखतेरे देहिने पासे गैहीतां बिशौ |

3 तुस एस गल्ली पुड खियाल केरा, की जैनी पैपी केरी तरफां केतरो दुख झैलो, ताके बेदिल भोईतां हिंमत ना हैरीं। 4 तुसेइं पापे सैहीं लड़ते लड़ते हेजु तग्र एत्रो मुकाबलो नेइं कियोरो कि तुसेइं अपने परांन दितोरे भॉन। 5 ते तुसेइं तैन समझानु बिस्त्री छड्डु, की जैसमां तुसन जो मट्टां जोईतां कुजेवरे थिये, की ओ मेरे मट्टाव परमेशरेरें हुकमे एरहे ना समझा। 6 किजोकी जैस्सैहीं परमेशर पियार करते तैस डरांता भी रहते, ते जैस तै अपनु मट्टु बनाते तैस सोटेइं भी बहते। 7 एह हदैईत तुशे समझनेरे लेईए: एस बल्हे सैहीं ब्रदाशत केरा: परमेशर तुसन अपना मट्टां सेमझतां बरताव करते, किजोकी तैन कोन जैरु मट्टुए जैस तैसेरो जैस तैसेरो बाजी समझाए नत्रा? 8 पण अगर तुसन समझांव ना गाहे जां की सैभन समझांव गहते ता तुस गैर ओवलाध भॉनेथ ना की अपना मट्टां। 9 ऐसेरे अलावा जैखन ईशे जिसमांनी बाजी समझाते रहते थिये ते अस तैनकेरी ईजत करते राहे ता कुन रुहां केरो बाजी येनी परमेशरेरी जादे ईजत ना केरन ताके ज़िंते रहन। 10 ईशी जानरे बाजी ता थोड़े दिहाडां केरे लेई एपनी समझरे मुताबक असंन समझाते रहते थिये: पण परमेशर ईशे फैईदेरे लेई असंन समझाते ताके असां तैसेरी पाबित्रतैई मां शामल भॉम। 11 एस मां शक नेइं की जैखन केंची हदैईत की गहचे ता तै खुशी नेइं बलके बडु बुरु बुझते, पण जैखन तै बल्हे बल्हे पक्को भोई गहते ता तै बादे मां ध्रमी बेनतां चेंनरो फल मैल्ले।

तालीम ते हदायत

12 बस्सा एपनी कमजोर पैखड़ी ते कमजोर जैन्धु सिधां केरा। 13 ते अपने पांवन सिधी बत्तां चलाथ ताके टोटे आरामे सैहीं चलन ते तैन आराम मैल्ले। 14 सैभन सैहीं मिलते जुलते रहथ, ते तै पाबित्रताई हासल केरनेरी हर बखत कौशिश केरा जैसेरे बगैर कोई परमेशरे ना लैही बटे। 15 खबरदार एरहु ना भोए कि कोई मैनु परमेशरेरी दियाई केरां खाली रैही गाहे, एरहु ना भोए कि कोई टलीटु जिल लगे ते तुसन परेशान केरे ते होरे लोक भी भिटे भोई गहन। 16 ते ना कोई मैनु तुसन मां हेरांमी भोए, जैन्चरे, ईसुपेरो जैरो दुनियारो बने, जैनी थौड़ी जैरी नियामतरे लेई अपने बड्डे बन्नेरु हक बेचतां छड्डु। 17 किजोकी तुस ज्ञानतथ की बादे मां जैखन तैनी तै ब्रकत हासल केरनेरी कौशिश की ता ना मैल्ले: तैस अपनी नियत बदलनेरो मोको ना मैल्ले हालांमकी तै लेरां देई देई तैस तोप्नेरी कौशिश केरतो राहु। 18 तुस तैस पहाडे का नेडे नेइं एवरे, जैस्सैहीं हरनु ज़रुरी थुं: तैन पहाड अग्गी सैहीं फुकोतु थुं ते आंधगुबारा ते बडो तौफान थु। 19 तैडी नरशिगेरी शोर ते बचन शुनाने बालेरी एरही आवाज शुनोती थी की जैखन लोकेंड तै आवाज शुंनी ता मिनत केरने लगे की असंन सैहीं होरो बचन ना कियो गाहे। 20 एलहेरलेई की तैनेइं तै हुकम बरदाशत ना केरी बटो की अगर कोई जानबुर भी एस पहाडे सैहीं हुरेल्हो ता तै भसंम भोई गाहेलो। 21 तै नज्जारे एतरो खत्रनाक थु की मुसै जांव: अंव डरने ते कम्बने लोरोइं। 22 बलके तुस सुरगेरे पहाडे ज़िंते परमेशरेरे शहरे येनी अम्ब्रेरे युरोशलमे मां लखेइं फ्रिशतन का एवरेथ। 23 हां तुस परमेशरेरी पैहिली जमात येनी किलीसयाई मां एवरेथ: एना तैना लोकन जैन केरां नोवां अम्बरे मां लिखोरन तुसां परमेशरे का एवरेथ: जै सैभी केरो जैज्जे: धरमी केरी रुहुन का एवरेथ, येनी तैन का जैना पाबित्र कियोरेन। 24 तुस नोवें वैहिदेरे मुझाटे खास यीशु" ते तैसेरे छिड़कोरे खुंने का एवरेथ, ते तै खुंन जै हाबलेरे बारे मां बेडी रोडी गल्लां जोते। 25 खबरदार तुस तैसेरो: जै तुसन सैहीं बचन केरने लोरोए ईनकार ना केरथ किजोकी जैनेइं जमिनी पुड हदैईत केरने बलेरो ईनकार कियो तैना ना बंचे ता अगर अस अम्ब्रेरे हदैईत केरने बलेरो ईनकार केरमेल्हे ता केंचरे बंचमेल्हे? 26 तैखन तैसेरी आवाजी सैहीं जमिन हिली जेई पण तैनी ईही वैहिदो कियोरोए कि एक्की फेरे पक्को, जमिने नेइं बलके अम्ब्रे भी हिलेहिलो। 27 तैसेरु एक्की फेरे फिरी" जोने सैहीं साफ पतो लगते की पैईदा कियोरी चिजां जैना हिलचन तैना खतम भॉनिण ताके जैना हिलन नत्रा तैना रैनिण। 28 जैडी असंन तै बादशाही मैल्ले लोरीए जै हिलनेरी नेइं ता एजा अस तैसेरु

शुकर केरमते हिंमत केरम कि अस परमेशरेरी भगती परमेशरेरे डरे सैहीं केरी बटम। 29 किजोकी ईशो परमेशर भसंम केरने बली अग्गे।

मसीह जिन्दगी जीनेरी हदायत

13 एकी होरी सैहीं दलां केरी जैरी मुहाबत केरते रहथ। 2 मुशाफ्रां केरी सेवा केरनी ना बिसरा, किजोकी एरहु ना केरने सैहीं किछेइं अन्जांने फ्रिशतां केरी खातरदारी कियोरीए। 3 कैदन याद रखा किजोकी तुस एपु भी तैन सैहीं साथी कैदथ, ते जैन सैहीं बैइमांनी कि गहचे तैन भी याद रखा, किजोकी तुस एपु भी तैन सैहीं साथी बैइमंनरे शकार बनतथ। 4 डला केरने सैभी लोकन मां ईजतरी गल समझी गाहे ते बछांन जन्हाएरे दाघे केरां पाबित्र राहे: किजोकी परमेशर हेरेमी केरी ते जन्हाकारां केरी आदालत केरेल्हो। 5 तुशो सुभाव लालची ना भोए ते जैतर तुसन का आहे तैस्से पुड गुजारे केराकिजोकी परमेशरे एपु एन जोवरुए की अंव तीं केरां कधे भी दुर ना भोइल्हो: ते ना कधे शैरेल्हो। 6 एलहेरलेई अस पुरे यकिने सैहीं जोई सखतम की परमेशर मेरो मद्दत केरने बालोए, अंव डेरी नत्रा ईनसांन मेरु कुन बगौड़ी सखते।

7 अपने पैदरण याद रखा जैनेइं तुसन परमेशरेरु बचन शुंनेवरुए: खियाल केरा की तैना कैरी जिंदगी गुजैरतां चले जे, ते तैन केरो जैरो विशवास तुस भी हासल केरा। 8 यीशु मसही कालां ते अज्र बलके आखिरी तगर अक्कां जैरोए। 9 एरहे एरहे अजिब अजिब तालिमी कैरं ना टेप्लोइयथ: रोडु एत्रे की तुशो दिल परमेशरेरे फजले सैहीं निगर राहे ना की एरहो प्रहेज जैसेरे खाने बालेइं कोई रुहांनी फैईदो ना मैल्ले। 10 ईशी अक एरही ठारे जैना तैम्बु मां सेवा केरतन तैन काहींन खानेरी कोई ईजाजत नेइं। 11 किजोकी सरदार काहींन जैन जनबरां केरो लैहु पाबित्र ठेरी घरे मां पापेर बदले नैतो थु तैनकेरो बाकी जिसम तैम्बु केरां बेईर फुकते थिये। 12 ऐलहेरलेई, यीशुए भी लोकन एपु अपने लैवे सैहीं पवित्र केरनेरे लेई दारे केरां बेइर दु:ख झेल्लो। 13 एलहेरलेई: एजा अस भी यीशुएरी बेजती एपु पुड नैहितां तैम्बु केरां बेईर तैस का गहंम। 14 किजोकी ईडी ईशो कोई हमेशरे लेई रहने बालो कोई शहर नेइं, बलके अस एकी एजने बाले शहरेरी तलशी मांहम। 15 एलहेरलेई असां यीशुएरे ज़िरीये सैहीं अपनी तारिफरी कुर्बानी परमेशरे का पैश केरतम, जै तैसेरे नोवेंरो ईकरार केरने बाले औठां केरो फले। 16 भलयाई केरनी ते मुखती ना बिस्नाथ किजोकी परमेशर एरही जैरी कुर्बानी सुखाते।

17 अपने गुरु केरो हुकम मन्नेरे अधिनताई मां रहियथ, किजोकी तैना तुशे लोकां केरे रुहांनी फैईदेरे लेई बेपरवहा भोईतां सेवा केरतन: तैनेइं एस सेवारो हिसाब परमेशरे देनो भोलो: अगर तैना अपनु कम खुशी सैहीं केरेल्हे ता तुसन फैईदो भोलो, पण अगर तैस कम्मेरी तकलिफ बुझेल्हे ता कोई फैईदो ना भोलो। 18 ईशे लेई प्राथना केरते रहियथ: असंन विशवासे की ईशो दिल साफे ते अस हर हिसाबे सैहीं नेक निती सैहीं जिंदगी गुजारनी चहत्तम। 19 आंव तुसन का ज़ोवले हथ केरताइं की प्राथना केरते रहथ, की अंव फिरी लूशी तुसन का एर्जी सैखीं।

20 परमेशर विशवासेरु अक बगतु पानीएं: तैन अखिरारे वैहिदेरे खुंनेरे ज़िरीये सैहीं भैदां केरे रोडे पुहाल येनी यीशु मुडदन मेरां ज़ितो केरतां ऊब्रो नियो। 21 तैहे परमेशर तुसन हर रोडे कम्मे मां ध्रमी बनाए ताके तुस तैसेरी म्रजी पुरी केरी बटथ ते जैन किछ तैसेरी नज़ी मां रोडुए तै तैन यीशु मसहीएरे ज़िरीये सैहीं असंन मां भी पैईदा केरे: तैसेरी सतुती सदा तगर भौती राहे: आमीन"।

22 मेरे दलाव: अंव तुसन का ज़ोवले हथ केरताइं की मेरी समझानेरी गल्लां रोडे चारे शुंनथ: जैना मी तुशे लेई बेडी ज़रुरी लिखोरिन। 23 ताके तुसन पत्तो लगे की ईशो दला तिमोथिस छुटोरोए: अगर तै अव ता अस दुईये तुसन सैहीं मिलमेल्हे।

24 अपने सैभी विशवैसन ते सैभी पाबित्र लोकन जो, जेये मसही" जोईयथ आतालिया बालेइं तुसन जो जेये मसही ज़ोवरुए।

25 तुसन सैभन पुड परमेशरेरी दिया भौती राहे, आमीन।

याकूब

अभिवादन

1 परमेश्वरे ते प्रभु यीशु मसीहेरे दास याकूबेरे तरफां तैन बाहरे गोत्रन जैना तितर बितर भोइतां रहतन नमशकार पुजे |

विश्वास ते अकलमंदी

2 हे मेरे दूलाहव, जैखन तुस अलग अलग किसमां केरी अजमाइशन मां पेथ, त इस खुशरी गल्ल समझा, 3 इन बुझतां की, कि तुशे वीश्वासेरे परखे गहने सैहीं सबर पैइदा भोते | 4 पण सबरी अपनू पूरू कम्म केरने देथ, कि तुस पूरे, ते सिद्ध भोते गाथ, ते तुस्न मां कोंची गल्लारी घटी न भोए |

5 पण अगर तुस्न मैरां कोंची अकलरी घटी भोए, त परमेश्वरे कैरां मग्गे, जै बगैर मलामती सैहीं देते; तैस दिती गहली | 6 पण विश्वासे सैहीं मग्गे, ते किछ शक न केरे; किजोकी शक केरने बालो समुन्द्रे लैरां केरो जेरोए, जैना हवाई सैहीं हिल्लती ते उछडतन | 7 एरो मँन्हू इन न समझे, कि मीं प्रभु कैरां किछ मैल्हेलू | 8 ई मँन्हू दूमत्रोए ते एपनी सैरी गल्लन मां चंचल |

गरीबी ते अमीरी

9 ते दीन दूलाह अपने बेडी पेदवरू घमण्ड केरे | 10 ते धनी एपनी घटिया हालती पुड ऐलहेरे लेई घासेरे फूडोवेंरो गहतो रहलो | 11 किजोकी दिहाडो निसनेरी बडी धुप पेतीए, ते घासे शुकाते, ते तैसेरू फूडोवें झैडी गहते, ते तैसेरी शोभा गहती रहतीए |

परख ते लालच

12 मुबारीके तै मँन्हू, जै अजमैइशी मां मजबूत रहते; किजोकी तै रोडो निसतां जिन्दगरू तैन ताज हसल केरहेलो, जैसेरो वाइदो प्रभुए अपने प्रेम रखने बालन सैहीं कीयोरोए | 13 जैखन कोंचेरी अजमैइश भोए, त तै इन न जोए, कि मेरी अजमायश परमेश्वरेरी तरफां भोतीए; न त बुरी गल्लन सैहीं परमेश्वरेरी अजमैइश भोई बटती ए, ते न तै बुरी गल्लन सैहीं अजमैइश केरते | 14 पण हर कोई एपनी खुवैइशन मां खिचतां, ते फेंसतां अजमैइशी मां गहते | 15 ते फिरी खुवैइश दोजोती भोइतां पाप पैइदा केरतीए, ते जैखन पाप बतेद्धे त मौत पैइदा केरते | 16 हे मेरे दूलाहव, धोखो न खाथ | 17 किजोकी हर रोडू वरदान, ते हर रोडू दान बाओँए, ते लोअरे बाजी केरे तरफां मैल्हते, जैस मां न त कोई बदलाव भोई बटते, ते न अदल बदलेरे वजाही सैहीं तैस पुड कोई सैयो पेइ बटते | 18 तैने एपनी मेरजी सैहीं अस सचेरे वचने सैहीं पैइदा केरे, ताकि अस तैसेरी बनेवरी चीजन मैरां एकी किसमेरे फल भोम |

शुन्नू ते केरनू

19 मेरे टलारे दूलाहव, ई गल्ल तुस जानतथ: ऐलहेरे लेई हर कोई मँन्हू शुन्नरे लेई हुशियार ते जौने मां पतरोंव भोए, ते सरकी मां ढिल्लो भोए | 20 किजोकी मँन्हू केरी सरक परमेश्वरेरे धार्मिकता जै परमेश्वर चाते न दे | 21 ऐलहेरे लेई सारी गंदगी ते बैर भाव की बडोतरी दूर केरतां, तैस वचने नम्रता सैहीं कबूल केरे, जै दिले मां बेव जेव, ते जै तुशे प्राणन मुक्ति देई बटते | 22 पण वचने पुड चलने बाला बना, ते सिर्फ शुन्ने बाले नैइं; जैना अपने आपे धोखो देतन | 23 किजोकी जै वचन शुन्ने बालो भोए, ते तैस पुड चलने बालो न भोए, त तै तैस मँन्हेरो जेरोए जै अपनू तुतर शीशे मां हेरते | 24 ऐलहेरे लेई कि तै अपनो

आप हेरतां चलो गहते, ते तैखने बिसरते कि आंव करों थू | 25 पण जै मँन्हू ऐजैदरी सिद्ध व्यवस्था पुड ध्यान केरतो रहते, तै अपने कम्मे मां बरकत हसल केरहेलो कि शुनतां नैइं पण तैचरे कम्म केरते | 26 अगर कोई अपनो आप भगत समझे, ते अपनी जबानी पुड लगाम न लाए, पण अपने दिले धोखो दे, ताकि तैसेरी भगती बेफैदीए | 27 इशे परमेश्वर ते बाजीएरे नेडे साफ ते रोडी भगती ई ए, कि बे सहारां ते बेवां केरे मसीबती मां तैन केरी खबर नहेम, ते अपनो आप संसारे कैरां निष्कलंक रखम |

फिरकेरे खलाफ हदायत

2 दूलाव, इषो महिमा बालो प्रभु यीशु मसीहेरे विश्वास तुस्न मां रोडे चारे भोए | 2 किजोकी अगर अक मँन्हू सुन्नेरे छाल्ले ते रोडो लिकडां लेइतां तुशे झुन्डे मां एजे ते अक गरीब भी गदां लिकडां लेइतां एजे | 3 ते तैस रोडे लिकडन बालेरू तुतर हेरतां जोथ तू बेडी रोडी ठैरी बिश; ते तैस गरीबे सैहीं जोथ, कि तू इडी खडो रा, या मेरे पव्वन कां बिश | 4 त कुन तुसेइं भेद भाव न करों, ते रोडे चारे इनसाफ केरने बाले न भोए? 5 मेरे टलारे दूलाव शुना; कुन परमेश्वरे दुनयारे गरीब न चुने, कि विश्वासे मां धनी भौन, ते तैस बादशारे अधीकारी भौन, जैसेरो वाइदो तैने तैन सैहीं करों, जैना तैस सैहीं प्रेम रखतन | 6 पण तुसेइं तैस गरीबेरी बे इजती की: कुन धनी लोक तुस्न पुड दबाव न रखन? ते कुन तैना तुस्न आदालन मां घसीटी घसीटी न नेन? 7 कुन तैना तैस रोडे नोवैरी निन्दा न केरन जैसेरे तुस्न जो जोतन? 8 फिरी भी तुस पवित्र शास्त्रेरे मुताबिक, कि तू अपने पडोसी सैहीं अपनों जेरो प्रेम रख, सचे तैस व्यवस्था पूरी केरतो भोए, त रोडू केरतो भोए | 9 पण अगर तुस तरफदारी केरतथ, त पाप केरतथ; ते व्यवस्था तुसन पापी जोतीए | 10 किजोकी अगर कोई सैरी व्यवस्था पुड चल्हते, ते एकी गल्ली पुड न चेल्ली बटो त तै सैभी गल्लन मां दोशी भोते | 11 ऐलहेरे लेई कि जैने इन जोव, कि तू जनाह न केरां, तैने इन भी जोव, तू खून न केरां ऐलहेरे लेई अगर तीं जनाह न करों, पण खून करों फिरी भी तू व्यवस्था पुड चल्हने बालो न भोव | 12 तुस तैन लोकां केरे जेरे नैइं, ते कम्म भी केरा, जैन केरो इन्साफ ऐजैदरे व्यवस्था मुताबिक भोल्हो | 13 हे दूलाव, जैने दया न कीव, तैसेरो इन्साफ बगैर दयाई सैहीं भोल्हो: दया इन्साफे कैरां भारी भोते |

विश्वास ते कम्म

14 हे मेरे दूलाव, अगर कोई जोए कि मीं विश्वासे; पण कम्म न केरतो भोए, त तैस सैहीं कुन पैइदो? कुन एरो विश्वास तैस मुक्ति देई बटते? 15 अगर कोई दूला या बेहिन नगी भोए, ते तैन रोज खानेरी घटी भोए | 16 ते तुस्न मैरां कोई तैन सैहीं जोए, खुशी सैहीं गहत, तुस गर्म राथ, ते रजा; पण जैना चीजां जिसमेरे लेई जरूरिन तैना तैस न दे, त कुन पैइदो? 17 तैचरे विश्वास भी, अगर कम्मे सैहीं न भोए, त अपने सुभावे मां मरों ए |

18 बल्कि कोई जोई बटते कि तीं विश्वासे, ते आंव कम्म केरताइं: अपनों विश्वास मीं कर्म बगैर हीरा; ते आंव अपनों विश्वास कम्मन सैहीं तीं हिरालो | 19 तीं विश्वासे कि अके परमेश्वरे: तू रोडू केरतस: दुष्ट आत्मा भी विश्वास रखतिन, ते थेरकतिन | 20 पण हे निकम्म मँन्हू तू इन न जानस, कि कम्म बगैर विश्वास मरोंए | 21 जैखन इषो बाजी अब्राहीमे अपनू मडू वेदी पुड चाडू, त कुन तै कम्मन सैहीं धर्मी न भोव? 22 ते तीं हेरू कि विश्वासे तैसेरे कम्मन सैहीं साथी असर करोंए ते कम्मन सैहीं विश्वास सिद्ध भोव | 23 ते पवित्र शास्त्रेरो ई वचन पूरो भोव, कि अब्राहीमे परमेश्वरे पुड विश्वास कीयो,

ते तै तैसेरे लेई धार्मिकता गणों जेव, ते तै परमेशेरो दोसत भोव। 24 ते तुसेइ हेरु कि मैंन्हू सिर्फ विश्वास सैहीं नैइं, बल्कि कम्मन सैहीं भी धर्मी भोवरोए। 25 तेंचरे राहाब वेश्यां भी जैखन जसूस अपने घर्मे मां रखे, ते होरी बत्ता भेजे, त कुन कम्मन सैहीं धर्मी न भोई? 26 ते जेंचरे जिस्म आत्मा बगैर मर्रोए तेंचरे विश्वास भी कम्मन बगैर मर्रोए।

जिब वशे मां केरनी

3 हे मेरे दूलाव, तुस्न मैरां बडे उसताद न भॉन, किजोकी तुस्न पतोए, कि अस उसताद जादे सजारे हकदार भॉनेम। 2 ऐलहेरे लेई कि अस बडे बार गेलती केरतम: जै जॉने मां गलती न केरे; तैए रोडो मैंन्हूए; ते सारे जिसमे पुड लगाम लेई बटते। 3 जैखन अस अपनों आप कैबू मां केरनेरे लेई घोडॉं केरे ऐशी मां लगाम लातम, त अस तैन केरो सारो जिसम भी फेरी सखम। 4 हेरा, जिहाज भी, अगर बडॉं भोतन, ते तेज हवाई सैहीं चलाए गहतन, फिरी भी एकी निकडी पतवारी सैहीं मांझी अपने मेरजी सैहीं फिराते। 5 तेंचरे जिभ भी, अगर अक निकडो अंगे, ते बडी बडी शेखी मारतीए: तक्का, थोडी जेरी अग्गी सैहीं केतरे बडे बडे जंगले मां अग लाई गहतीए। 6 जिभ भी अक अग्गे: जिभ इशे अंगन मां शरारथरो अक जहानें, ते सैरी जानी पुड कलंक लातीए, ते जिन्दगी दुनिया मां अग लातीए, ते नरकेरी अग्गी सैहीं फुकी बटतीए। 7 किजोकी किसमां केरे जंगली जनवर, चडोलू, ते रंगने बाले जीप जन्तू ते दरीयारे जानवर त इन्साननेरे हथे एजी बटतन ते आवरे भी आन। 8 पण जिभी मैंन्हन मैरां कोई भी वशे मां न केरी बटे; तै अक एरी बलाए जै कधे रुके न; तै प्राण नेने बैली बिशे सैहीं भेरताए। 9 इसे सैहीं अस प्रभु ते बाजी केरी तारीफ केरतम; ते इसे सैहीं मैंन्हू, जै परमेशेरे रूपे मां पैइदा भोवरोए श्राप देतम। 10 एकी ऐशी सैहीं शुक्र ते श्राप निसतन। 11 हे मेरे दूलाह, एरु न लोडे भोवरु। 12 कुन नागेरे एकी ऐशी सैहीं मिठू पानी ते लूनू पानी निसी बटते? हे मेरे दूलाव, कुन अंजीरेरे बूटे मां जैतून, या दाछी मां अंजीर लेगी बटतन? तेंचरे लूनो नाग भी मिठू पानी न केढी बटे।

स्वर्गो ज्ञान

13 तुस्न मैरां ज्ञायानी ते समझदार कौने? जै एरो भोए तै अपने कम्मन रोडे चाल चलने सैहीं तैस नम्रता सैहीं साथी बांदो केरे जै ज्ञायाने सैहीं पैइदा भोतीए। 14 पण अगर तुस अपने अपने मने मां सखत जलन, ते खलाफत रखतथ, त सचेरे खलाफ न केरथ, ते न झूठ जोथ। 15 इन ज्ञान तैन नैइं, जैन बां आवरुए बल्कि संसरेरुए, ते जिसमानी, ते शैतानीए। 16 ऐलहेरे लेई कि जैडी जलन, ते खलाफत भोतीए, तैडी फसाद ते हर बरू कम्म भोते। 17 पण जैन ज्ञान बाँ एइते तैन पेहिलू, त पवित्र भोते फिरी मिलनसार, हलीम ते तरबियत पज्जिर ते दया, ते रोडे फलन सैहीं लद्वोरु ते तरफदारी ते दुशटे बगैर भोते। 18 ते मिलाप केराने बालां केरे लेई धार्मिकतारो फल मेल मलापे सैहीं साथी बेव गहते।

संसारे सैहीं दोसती

4 तुस्न मां लडाई ते झगडे कोठॉं आए? कुन तैन खुवैइशन सैहीं नैइं जैना तुशे अंगन मां लेइतिन? 2 तुस खुशवैइश रखतथ, ते तुस्न मैलहे न: त तुस खून ते जलन केरतथ, ते किछ हसल न केरी बटतथ; तुस झगडते, ते लडतथ; तुस्न ऐलहेरे लेई मैलहे न, कि तुस मगतथ। 3 तुस मगतथ ते मैलहे न, ऐलहेरे लेई बूरी इछा सैहीं मगतथ, ताकि अपने एशे मां खर्च केरथ। 4 हे जनाह केरने बैलव, कुन तुस न जानथ, कि दुनयाई सैहीं दोसती रखनी परमेशेरे सैहीं बैर केरनोए जै कोई संसारेरो दोसत भॉनो चहते, तै अपनों आप परमेशेरो बेरी बनाते। 5 कुन तुस इन समझतथ, कि पवित्र शास्त्र बे फैइदू जोते, जै आत्मा तैन असन मां छडी, कुन तै एरी खुवैइश केरते, जैसेरो फल जलन भोए? 6 तै त होरो भी अनुग्रह देते; ऐलहेरे लेई इन लिखोरुए, कि परमेशेरे अभीमान केरने बालन सैहीं बैर केरते, पण दीन्न पुड अनुग्रह केरते। 7 ऐलहेरे लेई परमेशेरे अधीन भोथ; ते शैतानेरो सामनो केरा, त तै तुस्न कैरां दूर नशेलो। 8 परमेशेरे नेडे गाथ, त तै तुशे नेडे एजेलो: हे

पेपव, अपने हथ साफ केरा; ते हे दूमन्न बाले लोकव अपने दिलन पवित्र केरा। 9 दुखी भोथ, ते शोग केरा, तै लेरॉं देथ: तुशी हासी शोगे मां, ते तुशी खुशी उदसी मां बेदलोए। 10 प्रभुएरे सामने दीन बना, त तै तुस्न उचे केरेलो।

दूलाव पुड दोष लागों

11 हे दूलाव, एकी होरेरी बदनामी न केरा, जै अपने दूलाहेरी बदनामी केरते, या अपने दूलाए पुड दोष लाते, तै व्यवस्थारी बदनामी केरते, ते व्यवस्था पुड दोष लाते; ते अगर तू व्यवस्था पुड दोष लातस, त तू व्यवस्था पुड चलने बालो न भोव, पण तैसेरो हाकिम भोव। 12 व्यवस्था देने बालो ते हाकिम त अके, जै बचाने ते नाश केरनेरी समर्थए; तू कौनस, जै अपने पडोसी पुड दोष लातस?

घमण्डेरे खलाफ खबरदारी

13 तुस जैना इन जोतथ, कि अज या कालॉं अस कोंची होरी नगरे मां गेहितां अक साल बीतामेले, ते बुपार केरतां फैइदो उठामेले। 14 ते इन न जानथ कि कालॉं कुन भोलू: शुना त, तुशी जिन्दगी कुने? तुस त भाखेरे जेरेथ, जै थोडे चीरे लेइहोते, ते फिरी गैइब भोते। 15 इसेरे बदले तुसेइं इन जोवरु लोडे, अगर प्रभु चाए, त अस जीते रहमेले, ते या तैन कम्म भी केरमेले। 16 पण हुनी तुस ख्यालन पुड घमण्ड केरतथ; एरु सब घमण्ड बरू ए। 17 ऐलहेरे लेई जै कोई भलाई केरनी जानते ते न केरे, तैसेरे लेई ई पाप।

दौलतमंदां केरे खलाफ खबरदारी

5 हे दौलतमंदव शुना त; तुस अपने एजने बाले दुखेरे लेई चिंदा मारा, ते लेरां देथ। 2 तुशू धन बिगडू ते तुशे लीकडन कीडे लग्गे। 3 तुशे सोत्रे चेंदी मोरचो लग्गे; ते ई मोरचो तुस्न गुवाही देलो, ते अगरो जेरो तुशू मास खालो: तुसेइं आखीरी युगे मां धन अकोदू कीव। 4 तक्का, जैन मुजूरुइं तुषॉं उडारां कड्डॉं, तैन करीं तै मजदूरी जै तुसेइं धोखो देइतां नैही चिन्डॉं मारने लवरीए, ते फसल कटने बालां करीं फरयाद फौजरे परमेशेरे कन्न तगर पुजोरीए। 5 तुस धेरती पुड एशपरस्ती मां लागोरे राए, ते मजे लुटने; तुसेइं अपने मन जबा भॉनेरे दिहाडे मोटे ताजे कीये। 6 तुसेइं धर्मी दोषी बनेइतां मारो; तै तुशे सामनो न केरे।

दुखे मां सबर

7 ते हे दूलाव, प्रभुएरे एजने तगर बलगते राथ, हेरा जमीनदार कीमती पैइदावारे कीमती फलेरे उमीदरो पेहिली ते आखरी झैडी भॉने तगर बलगोरुए। 8 तुस भी बलगा, ते अपने दिले मजबूत केरा, किजोकी प्रभुएरु एजनु नैडूए। 9 हे दूलाव, एकी होरी पुड दोष न लाथ ताकि तुस्न पुड भी दोष न लग्गे, हाकिम दारे पुड खडोए। 10 हे दूलाव, जैन नेबेइं प्रभुएरे नोवें सैहीं गल्लां करीं, तैन सबर केरनेरो अक नमून समझा। 11 हे दूलाव, अस बल्लगने बालन मुबारिक जोतम: तुसेइं अय्युबेरे सबरारे बारे मां शुनोरु ए, ते प्रभु कैरां तैसेरो जै प्रतिफल भोव तैन भी बुझू, जैस सैहीं प्रभुएरो बडी महरबानी ते दया बांदो भोते।

12 पण हे मेरे दूलाव, सैभन कैरां बडी गल्ल ई ए, कि कसम न खाथ; न सुवर्गएरी न धेरतरी, पण तुशी गल्ल बात हां एरी हां, ते नां एरी नां भोए, कि तुस्न सजा न मैलहे।

प्रर्थनारी शक्ति

13 अगर तुस्न मां कोई दुखी भोए, त तै प्रार्थना केरे: अगर खुश भोए, त स्तुतरां भजना जोए। 14 अगर तुस्न मां कोई रोगी भोए, त कलीसियारे बज्जुगन कुजाए, ते तैना प्रभुएरे नोवें सैहीं तैस पुड तेल मेल्लां तैसेरे लेई प्रार्थना केरन। 15 ते विश्वासेरी प्रार्थनाई सैहीं रोगी बेची गहलो ते प्रभु तैस खडो केरेलो; ते अगर तैन पाप कीयोरे भॉन, ते तैन केरी भी माफी भोल्ही। 16 ऐलहेरे लेई तुस एकी होरे सामने अपने अपने पाप मन्ना; ते एकी होरेरे लेई

प्रार्थना केरा, जैस सैहीं बेझोथ; धर्मी मेंन्हेरे प्रार्थनारे असरे सैहीं बडू किछ भोई बटते।¹⁷ एलिय्याह भी इषो जेरो दुःख सुख झेलने बालो मेंन्हू थू; ते तैने बडे जोशे सैहीं प्रार्थना की; कि झैडी न भोए; ते सडे ट्लाई साल झैडी न भोई।¹⁸ फिरी तैने प्रार्थना की, त अम्बरेरां झैडी भोई, ते धेरती पूड पैइदावार भोई।

¹⁹ हे मेरे ढूलाव, अगर तुस्न मैरां कोई सचेरी बत्ती कैरां टेपलोए, ते कोई तैस फिरी आने।²⁰ ते तै इन बुझे, कि जै कोई कोंची भटकोरे पैपी फिरी आने, तै एकी पणाने मौती कैरां बचालो, ते तैन केरे पापन पुड पड़दो रखते।

1 पतरस

अभीवादन

1 पतरसेरू भोंतू जै यीशु मसीहेरो प्रेरते, तैन परदेसी केरे नोंवें, जैना पुन्तुस, गलतिया, कप्पदुकिया, आसिया, ते बिथुनिया मां तित्तर बिचर भोइतां रहतन। 2 ते बाजी परमेशरे अगरों एरे ज्ञानेरे मुताबिक, आत्मा पवित्र केरने सैहीं हुकम मन्ना, ते यीशु मसीहेरे लेव्हेरे छिडके गहने लेई चूनोरेथ। तुस्न सदा अनुग्रह ते शान्ति मैल्लती गाहे।

अक जीती उमीद

3 इशे प्रभु यीशु मसीह एरे परमेशर ते बाजी केरु शुक्र भोए, जैने यीशु मसीह फटरन मरां जीतो केरने सैहीं, अपने बडे दयाई सैहीं असन जीती उमीदरे लेई नाँवों जन्म दिवू। 4 मतलब अक खतम न भोने बालू: ते बे दाग, ते अक बडी मीरासारे लेई। 5 जै तुशे लेई सुवर्ग ए मां रखोरी ए, जैसेरी हफाजत परमेशरेरे सामर्थी सैहीं, विशवासेरे जिरीये तैस मुकरे लेई, जै एजने बाले वखते मां बांदी भोने बाली ए, की गहती राए। 6 ते ऐलहेरे लेई तुस खुश भोतथ, अगर जरूरी ए कि किछ दिहाडन तगर अलग अलग किसमेरी अजमैइशाँ केरे वजाही सैहीं उदास भोतथ। 7 ते इन ऐलहेरे लेई ए कि तुशो परखोरो विशवास, जै अग्गी सैहीं तावरो नाश भोने बाले कैरां भी जादे कीमती ए, यीशु मसीहेरे बांदे भोने पुड़ तारीफ, ते महिमा, ते आदरेरी वजा भोलो। 8 तैस सैहीं तुस बगैर लेइतां प्रेम केरतथ, ते हुनी त तैस पुड़ बगैर हेरने विशवास केरतां एरे खुश ते मगन भोतथ, जै बयाने कैरां बेइरे ते महिमा सैहीं भरोरे। 9 ते अपने विशवासेरो फल मतलब आत्मा केरी मुक्ति हसल केरतथ।

10 इसे मुकरे बारे मां तैन नेबेई बडू तोपतां; ते जांचपड ताल की, जैनेई तैस अनुग्रहेरे बारे मां जै तुस्न पुड़ भोने थू भविष्याणी कीयोरी थी। 11 तैनेई इस गल्लरी खोज की, कि मसीहेरी आत्मा जै तैन मां थी, ते पेहिले मसीहेरे दुखाँ ते तैसेराँ पत्ती भोने बाली महिमारी गुवाही दितोरी थी, तै कोण ते केरे बेले ते इशारो केरतो थू। 12 तैन पुड़ इन बांदू केरु, कि तै अपनी नैही बल्कि तुशी सेवारे लेई इना गल्लाँ जोते थी, जैन केरे बारे मां हुनी तुस्न तैन केरे जिरीये मैल्लू जैनेई पवित्र आत्माेरे जिरीए जै सुवर्गए मां भेइतां: तुस्न सूसमाचार शुनव, ते इन गल्लन फ्रीशतन भी ध्याने सैहीं हेरनेरी इछा रखतन।

पवित्र जिन्दगी जीनेरी बुलाहट

13 ऐलहेरे लेई अपनी अपनी अकलरी कमर बँद्धतां, ते हुशार भोइतां तैस अनुग्रहेरी पूरी उमीद रखा, जै यीशु मसीहेरे बांदे भोनेरे बेले तुस्न मैल्लने बालोए। 14 ते हुकम मन्ने बाले बचाँ केरे जेरे एपनी अज्ञानतारे बेले पुरैनी खुवैइशाँ केरे ताबा न भोथ। 15 पर जैनचरे तुशो कुजाने बालो पवित्र, तैनचरे तुस भी अपने सारे चाल चलने मां पवित्र बना। 16 किजोकी लिखोरुए कि पवित्र बना, किजोकी आंव पवित्र आई। 17 ते जैखन तुस, हे बाजी जोइतां प्रार्थना केरतथ, जै बगैर तरफदेरी सैहीं हर एके कम्मा केरे मुताबिक इन्साफ केरते, त अपने परदेशी भोनेरो वखत उरे सैहीं बीताथ। 18 किजोकी तुस जानतथ, कि तुशो निकम्मा चाल चलन बाप दादन कैरां चलतो आवरोए तैस सैहीं तुशो छुटकारो चान्दी या सुन्ने सैहीं न भोवरो। 19 पण बे इलजाम ते निष्कलंक गबडरे मतलब मसीहेरे कीमती लेव्वे सैहीं भोव। 20 तैसेरू ज्ञान त सांसाररे बन्नेरे पेहिलू जानू जेवरु थू, पण हुनी इस आखरी युगे मां तुशे लेई बांदू भोव। 21 जै तैसेरे जिरीये परमेशरे पुड़ विशवास केरतो भोए, जैन तै

मुडदन मैरां जीतो कीयो, ते महिमा दिती; कि तुशो विश्वास ते उमीद परमेशरे पुड़ भोए।

22 सो जैखन कि तुसेई भाईचारेरी बगैर दुष्टेरे प्यारेरे लेई सचे मन्ने सैहीं अपने मन पवित्र केरण, त तन मन लेइतां एकी होरी सैहीं जादे प्रेम रखा। 23 किजोकी तुसेई नाश भोने बाले सैहीं नैइ पण जैन नाश न भोए तैस बीजे सैहीं परमेशरेरे जीते ते सदा रहने बाले वचने सैहीं नाँवें जन्म नेवरुए। 24 किजोकी हर कोई प्राणी घासेरो जेरोए, ते तैसेरी सारी सोभा घासेरे फूडोवं एरी जेरीए: घास शुकी गाते, ते फूडोवं झेडी गहते। 25 पण प्रभुएरो वचन सदा बनोरो रालो: ते ई ए सुसमाचारेरो वचनेजै तुस्न शुनवरो थू।

जीतो घोड़ ते पवित्र लोक

2 ऐलहेरे लेई सब किसमेरो बैर भाव ते दुष्ट ते जलन ते बदनामी दूर केरतां। 2 नावे जरमोरे बचाँ केरे जेरे खालस दूदेरे इछा केरा, ताकि तैसेरे जिरीये मुक्ति हसल केरनेरे लेई बडते गाथ। 3 अगर तुसेई प्रभुएरे दयारो सुवाद चखोरो ए।

4 तैस कां एइतां, जै मैन्हेइ त निकमों ठेराव, पण परमेशरेरे नेडे चूनोरो, ते कीमती जीतो घोड़ ए। 5 तुस भी जीते घोड़ाँ केरे जेरे आत्मिक घर बन्ते गाथ, जैन याजकाँ केरे पवित्र लोक बनेइतां, एरी आत्मिक कुरबैनी चैडाँ, जै यीशु मसीहेरे परमेशर कबूल भोन। 6 ऐलहेरे लेई पवित्र शास्त्रे मां भी आवरुए, कि तक्का, आंव सिय्योने मां अक कूनरो खास ते चूनोरो ते कीमती घोड़ रखताई: ते जै तैस पुड़ विश्वास केरेलो, तै कोन्ची तरीके सैहीं श्रमिनदो न भोलो। 7 तुशे लेई जै विश्वास केरतो भोए, तै कीमती ए, पण तैन केरे लेई जै विश्वास न केरे; जै घोड़ राज मिस्त्रेई निकम्मा ठेरावरो थू, तैए कूनरो खास घोड़ भोव। 8 ते ठोकर खानेरो घोड़ ते ठोकर खानेरी चिड्डान भोव: किजोकी तै त वचने न मेनतां ठोकर खाते ते ऐलहेरे लेई तै ठेरावरो भी ए। 9 पण तुस अक चुनोरी नसल, ते राज-पदधारी याजकाँ केरु समाज, ते पवित्र लोक, ते (परमेशरेरे) खास लोकथ, ऐलहेरे लेई कि जैन तुस आँधारे मैरां अपने बडे लोई मां कुजाए, तैसेरे गुण बांदे केरा। 10 तुस पेहिले किछ भी न थी, पण हुनी परमेशरेरी प्रजा; तुस्न पुड़ दया न थी भोवरी, पण हुनी दया भोवरी ए।

मसीह जिमेदारी

11 हे ट्लाराव आंव तुस्न कां बिनती केरताई कि तुस अपनों आप पर्देशी ते मुसाफर सैमझतां तैन दुनीयारी खुवाशन कैरां बचोरे राथ। 12 होरी कौमन मां तुशो चाल चलन रोडो भोए; ऐलहेरे लेई जैन जैन गल्लन मां तैना तुस्न कुकर्मी सैमझतां बदनाम केरतन, तैना तुशाँ रोडाँ कम्मा हेरतां; तैन केरे वजाही सैहीं परमेशरेरी बडयाई केरन।

परमेशरेरे दास

13 प्रभुएरे लेई मैन्हु केरे हर एकी इनतजमेरे अधीन राथ, बादशाहरे ऐलहेरे लेई कि तै सैभनां बडो ए। 14 ते हाकिमां केरे ऐलहेरे लेई, किजोकी तै गंदाँ कम्मां केरने बालन सजा देने, ते रोडाँ कम्मां केरने बालाँ केरी तारीफ केरनेरे लेई भेजोरोए। 15 किजोकी परमेशरेरी मर्जी ई ए, कि तुस रोडाँ कम्मां केरतां बे समझ लोकां केरी अज्ञानतारी गल्लाँ बन्द केरथ। 16 ते अपनों आप आजाद सैमझा पण अपनी इस ऐजेदी बुरे कम्मां केरे लेई इसतमाल न केरा, पण

अपनों आप परमेश्वरों दास सैमझतां चला। 17 सैभी केरी आदर केरा, दूलाहन सैहीं प्रेम केरा, परमेश्वरें केरां डरा, बादशाहीरे इजत केरा।

मसीह इषो नमूनों

18 हे सेवकव, हर किसरे डरे सैहीं अपने मालकां केरे आधीन राथ, न सिर्फ रोड़न, ते नमरन सैहीं, बल्कि सखतां केरे भी। 19 किजोकी अगर कोई परमेश्वरों खयाल केरे बे इन्साफे सैहीं दुःख झैलते, त इन रोड़ु ए। 20 किजोकी अगर तुसेइं गुनाह केरतां धके खाए ते सबर केरी त तैस मां कुन बडीयायरी गल्ल? पण अगर रोड़ां कम्मां केरतां दुःख उठातथ त सबर केरतथ त इन परमेश्वरें रोड़ु लगते। 21 ते तुस ऐलहेरे लेई कुजवरेथ किजोकी मसीह भी तुशे लेई दुःख झैलतां, तुस्न अक नमूनों दितोरोए, कि तुस भी तैसेरे पावां केरे निशान पुड चलतथ। 22 न त तैने पाप करों, ते न तैसेरे ऐशेरां कोई गंदी गल्ल निसी। 23 तै गैई शुनतां गैई न थू देतो, ते दुःख झैलतां कोन्ची धमकी न थू देतो, पण अपनों आप सचे इन्साफ केरने बालेरे हथन मां सांफतो थू। 24 तै एपू इशे पापन एपू पुड नैइतां सलीबी पुड चाडो जैस सैहीं अस पापां केरे लेई मेरतां धार्मिकतारे जिन्दगी बीतामः तैसेरे मार खाने सैहीं तुस बेझोए। 25 किजोकी तुस पेहिले भेटकती भैडां केरे जेरे थी, पण हुनी प्राणा केरे रखवाले ते नेगेबाणे कां आवरेथ।

मुन्श ते कौन्श

3 हे कौन्शव, तुस भी अपने मुन्शां केरे आधीन राथ। 2 ऐलहेरे लेई अगर इन मां कोई एरो भोए जै वचने न मनतो, भोए, फिरी भी तुशे डरे सैहीं पवित्र चाल चलने हेरतां बगैर वचने एपनी एपनी कुवांशां केरे चाल चलने सैहीं कीचोई गहन। 3 ते तुशी सजावट दिखावेरी न भोए, मलब दोग बुन्नो, ते सुन्नेरे गेहने, या किसमा किसमा केरां लिकडां लाना। 4 बल्कि तुशी छपोरी ते अकेली इन्सानयत, नम्रता ते मनेरी दीनतारी नाश न भोने बाली सजावटी सैहीं सजोरी राए, किजोकी परमेश्वरेंरी नजरी मां इसेरी कीमते। 5 ते पेहिले जुमाने मां पवित्र कौन्शां भी, जैना परमेश्वरें पुड उमीद रेखती थी, अपनों आप इस तरीके सैहीं सजैती ते अपने अपने मुन्शां केरे आधीन रैती थी। 6 जैन्चरे सारा इब्राहीमेरे हुकमे मां रेइतां ते तैस जो सूवामी जोती थीः ते तुस भी अगर भलाई केरथ, ते कोन्ची किसमेरे डरे सैहीं न डरथ त तैसेरी कूर्यां ठेरी। 7 तैन्चरे हे मुन्शव, तुस भी समझदारी सैहीं कौन्शन सैहीं जिन्दगी बीताथ ते कौन्श कमजोर समझतां तैसेरी आदर केरा, इन सैमझतां कि अस दुइये जिन्दगरे वरदानेरे हक दारम, जैस सैहीं तुशी प्रार्थना न रुकन।

भलाई केरनेरे वजाही सैहीं सताव

8 ते सभे अक मन ते हमदेरदी ते भाईचारेरे प्रेम रखने बाले, ते दया केरने बाले, ते नम्र बना। 9 बुरैईरू बदले बुराई न केरा, न गैई केरे बदले गैई न देथ; पण इसेरे बदले बरकत देथः किजोकी तुसद बरकतारे बारिस भोनेरे लेई कुजावरेथ। 10 किजोकी जै कोई जिन्दगरी इछा रेखते, तै अपनी जवान बुरैई, ते अपने ओठन बुरी गल्लन केरां दूर रखे। 11 तै बुरैईयरू साथ शारे, ते मेल मलाप तोपे, ते तैसेरी कोशीशी मां लगोरो राहे। 12 किजोकी प्रभुएरी एछी धर्मी मँन्न पुड लेगोरी रहितन, ते तैसेरे कन तैन केरे प्रार्थनान पुड लगोरे रहतन, पण बुराई केरने बाले परमेश्वरें नजरी मां रहतन।

13 ते अगर तुस भलाई केरने मां लगोरे राथ त फिरी तुशे बुराई केरने बालो कौने? 14 ते अगर तुस धर्मेरे वजाही सैहीं दुःख झैलतथ, त मुबारकथ; पण तैन केरे डराने केरां न डरा, ते न धबराथ। 15 पण मसीहे प्रभु सैमझतां अपने अपने मन्न मां पवित्र समझा, ते जै कोई तुस्न तुशे उमीदरे बारे मां किछ पुछे, त तैस जुवाब देंनेरे लेई सदा तियार राथ, पण नम्रता ते डरे सैहीं। 16 ते जमीर भी साफ रखा, ऐलहेरे लेई कि जैन गल्लां केरे बारे मां तैना, जैना तुशे रोड़े मसीही चालचलनेरी बे इजती केरतन छिथोन। 17 किजोकी अगर परमेश्वरेंरी ई ए मर्जी भोए, कि तुस भलाई केरनेरे वजाही सैहीं दुःख झैलता, ते इन बुराई केरनेरे वजाही केरां दुःख झैलने केरां रोड़ु ए। 18 ऐलहेरे लेई कि मसीहे भी, मतलब आधेरमई लेई धरमे पापां केरे वजाही सैहीं एकी बार दुःख झैलतो, ताकि असन परमेश्वरें कां पुजाएः तै जिसमेरे लिहाजे सैहीं त मारो जेव,

पण आत्मारे लिहाजे सैहीं जीतो केरो। 19 तैसे मां तैने गेहितां कैदी आत्मान भी प्रचार केरें। 20 जैनेई तैस बीते वखते मां हुकम न मन्नो जैखन नूहेरे दिहाडन मां सबर केरतां ठैराव, ते तै जिहाज बनाने लवरो थू, जैस मां बिषतां थोडे लोक मतलब आठ प्राणी पैनी सैहीं बचे। 21 ते तैसे पैनीर कहानी भी, मतलब बपतिस्मो, यीशु मसीहेरे जीते भोने सैहीं, हुनी तुस्न बचाते; (तैस सैहीं जिसमेरो मेल दूर केरनेरो मतलब नैई, पण साफ जमीरे सैहीं परमेश्वरें आधीन भोनेरो मतलब ए)। 22 तै सुवर्ग पुड गेहितां परमेश्वरें देहिने पासे बिशो; ते फरिशतन ते अधीकारी ते सामर्थी तैसेरे अधीन कीये जेवरेन।

बेदलोरी जिन्दगी

4 सो जैखन मसीहे जिसमे मां भोइतां दुःख झैलतो त तुस भी तैसेरी मर्जी धारण केरतां हथियार बन्धा किजोकी जैने जिसमे मां दुःख झैलतो, तै पापे केरां छुटो। 2 ताकि अगरोंव जो अपनू बचोरी जिन्दगी मँन्हू केरे खुवैइशां केरे मुताबिक नैइं बल्कि परमेश्वरेंरी मेरजरे मुताबिक बीताथ। 3 किजोकी होरी कौमा केरे मेरजारे मुताबिक कम्म केरनू, ते चपलूसारी बुरी खुवैइशन, शराब पीनी, नचनू, पीनू, ते भिटी मूरती पूजा मां जैडी तगर ऐसेई पहिलो वखत बरबाद कीयो, तैडी बडू भोव। 4 इस सैहीं तैना हेरान भोतन, कि तुस एरे भारी लुचपने मां तैन केरू साथ न देथ, ते ऐलहेरे लेई तैना बरू भलू जोतन। 5 पण तैना तैस जे जीतां ते मरें करों इन्साफ केरनेरे लेई तियारे, लेखो देनोए। 6 किजोकी फटरन भी सुसमाचार ऐलहेरे लेई शुनव, कि जिसमें मां त मँन्हू केरे मुताबिक तैन केरें इन्साफ भोए, पण आत्मा मां तैना परमेश्वरें मुताबिक जीते रहन।

परमेश्वरें रोड़े भण्डारी

7 सैभी गल्लां केरो अन्त जल्दी भोने बालो ए; ऐलहेरे लेई बरदाश केरने बाले भोइतां प्रार्थनारे लेई तियार राथ। 8 ते सैभन केरां रोडी गल्ल ई ए, कि होरन सैहीं जादे प्रेम रखा; किजोकी प्रेम तैन केरे पापन छुपाते। 9 बगैर बडकने एकी होरेरी मेजबानी केरा। 10 जैस जैन वरदान मैल्लोरु ए, तै तैस परमेश्वरेंरे अलग अलग अनुग्रह रोड़े खजाचेरे जेरे एकी होरेरी सेवा केरा। 11 अगर कोई जोए, त एरू जोए, मन्ना कि परमेश्वरेंरो वचने; अगर कोई केरे; त तैस शक्ति सैहीं केरे की जै परमेश्वरें देते; जैस सैहीं सैभी गल्लन मां यीशु मसीहेरे जिरीए, परमेश्वरेंरी महिमा बांटी भोएः महिमा ते बादशाही सदा तैसेरीए। आमीन।

मसीहेरे दुःखन मां शामिल भौनु

12 ट्लारव, जै दुखां केरी अग तुस्न परखनेरे लेई तुस्न मां भटकोरीए, इस सैहीं इन समझतां हेरान न भोथ कि कोई आजीब गल्ल तुस्न पुड बीतने लवरीए। 13 पण जैन्चरे जैन्चरे मसीहेरे दुखन मां शामिल भोतथ, खुश भोथ, जैस सैहीं तैसेरी महिमा बांटी भोती ए एपू भी खुश ते मघन भोथ। 14 फिरी अगर मसीहेरे नोवेरे लेई तुशी निन्दा भोतीए, त मुबारकथ; किजोकी महिमारे आत्मा, जै परमेश्वरेंरो आत्मा ए, तुस्न पुड सैयो केरे। 15 तुस्न मैरां कोई मँन्हू खूनी ते चोर, या कुकर्मी भोने, या होरी कौमन मां हथ छेइतां दुःख न उठाए। 16 पण अगर मसीह भोने सैहीं दुःख उठाते, त शरमाए न, पण इस गल्लेरे लेई परमेश्वरेंरी महिमा केरे। 17 किजोकी तै बेलो एजी आवरो ए, कि पेहिलो परमेश्वरेंरे लोकां केरी आदालत की गाए, ते आदालतरी शुरुवात असन केरां भोए त तैन केरो कुन अन्त भोल्लो जैना परमेश्वरेंरे सूसमाचारे न मन्न। 18 ते अगर धर्मी मँन्हू बडी मुशकली सैहीं मुक्ति हसल केरे, ते जैना भगती न केरन, ते पापीन तैन केरो कुन हाल भोल्लो? 19 ऐलहेरे लेई परमेश्वरेंरी मेजरे मुताबिक दुःख झैलते, तै भलाई केरते, अपने अपने प्रानन वफादार बनाने बालेरे हथन मां सांफे।

बजुर्गन ते चुनोरन बिसतार

5 तुस्न मैरां जैना मजुरगन, आंव तैन केरो जेरो बजुर्ग ते मसीहेरे दुखां केरो गुवाह ते बांटी भोने बाली महिमा मां शामिल भोइतां तैन इन समझताई। 2 कि परमेश्वरेंरे तैस जैथेरी, जैन तुस्न मां ए हेरगेश केरा; ते इन

दबावे सैहीं नैइं, पण परमेशेरी मेरजारे मुताबिक आनन्दे सैहीं, ते नीच कूमैइयरे लेई नैइं, पण मन लेइतां।³ ते जैना लोक तुस्न सोंफे तैन पुड़ हकोमत न केरा, बल्कि झुण्डेरे लेई अक नमूनों बना।⁴ ते जैखन बडो रखवालो बांदो भोल्हो, त तुस्न महिमारू ताज मैल्ले, जैन टलकनेरू नैइं।⁵ हे जवानव, तुस भी बज्जुगाँ केरे अधीन राथ, बल्कि तुस सब एकी होरेरी सेवारे लेई दीनताई सैहीं मज बांधतां राथ, किजोकी परमेशर अभिमैनी केरो सामनो केरते, पण दीन पुड़ अनुग्रह केरते।⁶ ऐलहेरे लेई परमेशेरे ताकबर हथे हैठ दीनता सैहीं राथ, जैस सैहीं तै तुस्न ठीक वक्ते पुड़ बड़ाए।⁷ ते अपनी सारी फिकर तैस पुड़ छडा, किजोकी तैस तुशी फिकरे।⁸ खबरदार राथ, ते बींझे राथ, किजोकी तुशी खलाफत केरने बालो गर्जने बाले शेरेरो जेरो इस तोपी मां रहते, कि कैस छिन्दतां खाए।⁹ विश्वासे मां मजबूत भोइतां, ते इन सैमझतां तैसेरो सामनो केरा, कि तुशे द्ला जैना संसारे मां आन, एरो दुःख

झैल्लतन।¹⁰ हुनी परमेशर जै सारे अनुग्रहेरो दातो ए, जैने तुस्न मसीह मां अपनी सदा रहने बाली महिमारे लेई कुजवरेथ, तुशे थोड़े चीरेरे लेई दुःख झैल्लनेरे पत्ती तुस्न सिद्ध ते मजबूत ते ज़ोरे बालो केरेलो।¹¹ तैसेरी बादशाही सदा राए। आमीन।

आखिरी अभिवादन

¹² मीं सिलवानुसेरे हथे, जैस मां वफादार द्लाह समझतांइ, खास लिखतां तुस्न समझाताइ ते ई गुवाही दिती कि परमेशेरो सचो अनुग्रह ई ए, इसे मां बनोरेथ।¹³ जैना बाबुल मां तुशे जेरे चूनोरे लोकन, तै ते मेरू मड्डु मरकुस तुस्न नमशकार ज़ोते।¹⁴ प्रेमे सैहीं फुमडी देइं देइतां एकी होरी नमशकार केरा। तुस्न सैभन जैना मसीह मांथ शान्ति मैलती राए।

2 पतरस

अभिवादन

1 शमोनन पतरसेरे तरफाँ जै यीशु मसीहेरो दास ते प्रेरिते, तैन लोकन जैन केरे नोंवे जैनेई इशे परमेशर ते मुक्ति देने बाले यीशु मसीहेरी धार्मिकता सैहीं इषो जेरो कीमती विश्वास हासल करौए |
2 परमेशरेरे ते इशे प्रभु यीशु एरी पिशानी सैहीं अनुग्रह ते शान्ति तुस्न मैल्लती राए |

ईश्वरीये बुलाहट ते चुनाव

3 किजोकी तैसेरी सामथाँ सब किछ जैन जिन्दगी ते भेगती सैहीं रिश्तो रखते, असन तैसेरी पिशान सैहीं दितोरुए, जैन असन अपनी महिमा ते रोडे गुणना केरे मुताबिक कुजवरम | 4 जैस सैहीं असन कीमती ते बडे बडे वाइदे दितोरन: ताकि इन केरे जिरीए तुस तैस गेंदगी केरां छुटतां जै संसारे मां बूरी खुवैइशन सैहीं भोतीए, ईश्वरये सुभावे मां शामिल भोथ | 5 ते ऐलहेरे लेई तुस सब किसमेरी कोशीश केरतां, अपने विश्वासे पुड़ रोडे गुण, ते रोडे गुणन पुड़ समझ | 6 ते समझी पुड़ परहेज, ते परहेज पुड़ सबर, ते सबरे पुड़ भगती | 7 ते भेगती पुड़ भाइचारेरो प्रेम, ते भाईचारेरे प्रेमे पुड़ प्रेम बधाते गाथ | 8 किजोकी इना गल्लाँ तुस्न मां इस बेले रहन, त तुस्न इशे प्रभु यीशु मसीहे मां निकमे ते बे फल न भौने देली | 9 ते जैस मां इना गल्लाँ न भौन, तै कानोए, ते धट लहते, ते अपने पुराने पापन केरां साफ भौनु बिसरोरोए | 10 ऐलहेरे लेई दूलाव, अपने कुजाने पुड़, ते चुनोरे गहनेरे लेई सिद्ध केरनेरी रोडे चारे कोशीश केरते गाथ, किजोकी अगर एरू केरेले, त कभी ठोकर न खाले | 11 बल्कि इस रीति सैहीं तुस इशे प्रभु ते मुक्ति देने बाले यीशु मसीहेरे सदारे रहने बैले बैदशाही मां बडी आदरी सैहीं साथी तैस मां दाखल भोथ |

पतरसेरो आखीरी बेलो

12 ऐलहेरे लेई अगर तुस इना गल्लाँ ज्ञानतथ, ते जै सचो वचन तुस्न मैल्लोरोए, तैस मां बनोरे राथ, फिरी भी आंव तुस्न इन गल्लाँ याद करानेरे लेई सदा तियार रालो | 13 ते आंव अपने लेई इन रोडू समझताई, कि जाँ तगर आंव इस डेरे मांई, ताँ तगर तुस्न याद करेइतां उभारतो रेई | 14 किजोकी ज्ञानताई, कि मसीहेरे वचनेरे मुताबिक मेरो डेरो झड़नेरो बेलो जल्दी एजने बालोए | 15 ऐलहेरे लेई आंव एरी कोशीश केरताई, कि मेरे गहनेरे पत्ती तुस इन सैभी गल्लन सदा याद केरते राथ |

मसीहेरे महिमाई एछेइं लहाने बाले गवाह

16 किजोकि जैखन असेईं तुस्न अपने प्रभु यीशु मसीहेरी समर्थ, ते एजनेरो समाचार दितोरो थू त तै चलेकी बनेवरी कहैनी केरे मुताबिक पीछो नैइं कीयोरो, बल्कि असेईं एपू तै लावरो थू | 17 कि तैने बाजी परमेशरे केरां आदर, ते महिमा हसल केरी जैखन तैस बडे महिमा मैरां आवाज आई कि इन मेरू दलारू महुए जैस सैहीं आंव खुशाई | 18 ते जैखन तैस सैहीं साथी पवित्र पहाडे पुड़ थी, त सुवर्गोँ ई ए आवाज शुन्नी | 19 ते असन कां जै नेबी केरो वचने, तै इस गल्ली सैहीं मजबूत ठेरोरोए ते तुस इन रोडू केरतथ, कि इन सैमझतां तैस पुड़ ध्यान केरतथ, कि तै अक दयाए, जै तै आधरी ठैरी मां तैस बेले तगर लो देतो रहते जाँतगर दलाडोकलोए न, ते झेरो तारो तुशे मत्र पुड़ चमके | 20 पण पेहिलू इन समझे कि पवित्र शास्त्रेरी कोई गल्ल अपने सोचारे मुताबिक पूरी न भोए | 21 किजोकी कोई भी भविष्याणी मैन्हू केरे

मेरजी सैहीं न भोए पण भगत लोक पवित्र आत्मा मां भोइतां परमेशरेरे तरफां जाँते थी |

झूठे उसताद

2 ते जैन्चरे तैन लोकन मां झूठे नबी थी तैन्चरे तुस्न मां भी झूठे उसताद भोल्ले, जैन असली मां खाने बाले पखड ते तैस मालकेरु जैन घीनोरेन इनकार केरेले ते अपनों आपे जल्दी विनाशेरे हवाले केरेले | 2 ते बडे तैन केरे जेरे बदचलनी केरेले, जैन केरे वजाही सैहीं सेची बत्तरी निन्दा भोतीए | 3 ते तैन लालचेरे लेई गल्लाँ बनेइतां तुस्न अपने फेइदेरे लेई वजा बनाले, ते जै सजाहरो हुकम तैन पुड़ पेहिलो भोवरोए, तैसेरे एजने मां किछ भी चिर नैइं, ते तैन केरो विनाश बलगतोए | 4 किजोकी जैखन परमेशरे तैना फरिश्ते न बकशे जैनेई पाप कीयो, पण नरके मां भेइतां आधारे कुण्डे मां छडे, ताकि आदालतरे दिहाडी तगर बंद रहन | 5 ते पेहिले जूगेरे संसार भी बखशू, बल्कि बूरे संसारे पुड़ तोफान भेइतां धमेरे प्रचारक नूहे समेत अठ मैन्हू बचाए | 6 ते सदोम ते अमोरारे नगरां केरे वनाशेरी सजा दिती, कि तैन भस्म केरतां माँजनी मां मिलाए ताकि एजने बाले भगतीहीन लोकां केरे तालीमारे लेई अक कहानी भोए | 7 ते धर्मी लूते जै बुरे लोकां केरे गंदे चाल चलने सैहीं बडो दुखी थू छुटकारो दितो | 8 (किजोकी तै धर्मी तैन मां रहतो, ते तैन केरां बुरां कम्मां हेरी हेरी, ते शुनी शुनी, रोज अपने सचे मने पीड़तो थू) | 9 त प्रभुएरे भगतन अजमैइशी मैरां कढने ते बुरे लोकन आदालतरे दिहैडी तगर सजाहरी हालती मां रखनो भी जानते | 10 खास केरतां तैन जैना गेंदी सोचन पत्ती जिसमेरे मुताबिक चलतन, ते हकौमती घटया समझतन: ते ढीठ, ते हठी, ते उचे पेदवी बाले बरू भलू जाँने केरां न डरन | 11 फिरी भी फरिश्ते जैना शेखती ते समर्थां मां तैन केरां बडेन, प्रभुएरे सामने प्रभुएरे सामने बरू भलू जोइतां दोष लातन | 12 पर इना मैनु बे समझ जानवरां केरे जेरन, जैना दलाने ते मारे गानेरे लेई पैइदा भोवरेन; ते जैन गल्लन ज्ञान न, तैन केरे बारे मां होरन बरू भलू जाँते, तै अपने जलनी मां एपू फुकोले | 13 होरी केरु बरू केरनेरे बजाए तैन केरु एपू बरू भोल्लू: तैन भर दूपान एश केरनो रोडो लगते; ई कलंक ते दोश ए जैन तुस्न साथी खाते पीतेन, त एपनी तरफाँ प्रेम धाम केरतां हेश केरतन | 14 तैना चंचल मत्र बालन भटकातन; जैन केरे मने लालच केरनेरी आदत भोवरी, तैना लानतरी आवलाधन | 15 तैन असिद्धी बत्ती शैरतां बटके, ते बओरेरे मट्टे बिलामेरी बत्तां चलोरेन; जैन बुरैइरो मजदूरी रोडी समझी | 16 पण तैसेरे पापेरे बारे मां हदायत की, ईडी तगर कि बेजबान गदही मैन्हू केरे बोली सैहीं तै नबी तैसेरे पागल पने केरां रोको |

17 इन लोक काने खूआन, ते तोफानेरी बिदलारन, तैन केरे लेई सदा रहने बालो अन्धकार रखोरोए | 18 तैना बे फेइदी गल्लाँ केरी बद चलेनेरां कम्मन सैहीं, तैन लोकन जिसमानी खुवैइशन मां फसांतन, जैना भटकोरेन मैरां मसां निसने लवरे थी | 19 तैना तैन आजाद भौनेरो वाइदो त देतन, पण एपू बुरैइरे गुलाम्मन, किजोकी जै मैन्हू जैस केरां हारो तै तैसेरो गुलाम बनते | 20 ते जैखन तै प्रभु ते मुक्ति देने बाले प्रभु यीशु मसीहेरी पिशानी सैहीं संसारेरे अलग अलग किसमाँ केरी गेंदगी केरां बाचे, त फिरी तैन केरो हाल पेहिले केरां भी बुरो भोव | 21 किजोकी धमेरे बत्तां न गहनू तैन केरे लेई इस केरां रोडू भोथू, कि तै तैनेई इन जैनतां, तैस पवित्र हुकमे केरां फिरी गहतन, जै तैन सौफोरो थू, तैन पुड़ ई कहावत ठीक एइतीए | 22 कि कुतराँ अपने उतारेरे पासे ते निहावरी सूरनी चिकरी मां फिरी गहतीए |

प्रभुएरी एजनेरी दिहाड़ी

3 हे ट्लारव, हुनी आंव तुस्न इन दुइयोवं बार लिखताई, ते दुइयन मां याद करेइतां तुशे साफ मने उभारताई। 2 कि तुस तैन गल्लन, जैना पवित्र नेबेई पेहिले ज़ोरिन ते प्रभु, ते मुक्ति देंने बालेरो हुकम याद केरा, जैना तुशे प्रेरतां केरे ज़िरीए दितोरेन। 3 ते पेहिलू इन ज़ाना, कि आखरी दिहाड़न हासी मज़ाक बनाने बाले एजनेन, जैना अपने खियालॉ केरे मुताबिक चलेले। 4 ते ज़ोले, तैसेरो एजनेरो वाइदो कोरां जेव? किजोकी ज़ेइसेरे बाप दादे झुल्ले, सब किछ तेरहू ए,, जैन्चरे स्रष्टिरे बेले थू? 5 तैना त जैनी बुझतां इन बिसरी जे, कि परमेशरेरे वचनेरे ज़िरीए सैहीं आसमान पेहिलू देंतेरु अज़ तगर एरु ए, ते धरती भी पैनी मैरां बनोरीए ते पैनी मांए। 6 इनां केरे ज़िरीए तैस जुगेरु संसार पैनी सैहीं डुबतां नाश भोव। 7 अजेरे जुमानेरु आसमान ते ज़मीन तैसे वचनेरे ज़िरीए रखोरेन, की जीते कीये गहन; ते तै भगती हीन मँन्हू केरी आदालत ते नाश भोनेरे लेई एकी दिहाड़े तगर एरहे रखन।

8 हे ट्लारव, ई अक गल्ल तुस्न कैरां छुपोरी न राए, कि प्रभुएरी नज़री मां अक दिहाड़ी हज़ार सालन बराबरे। 9 प्रभु अपने वाइदन मां ठड न लाए, जैन्चरे की लोक समझतन; पण तुशे बारे मां सबर केरते, ते न चाए, कि कोई नाश भोए, बल्कि इन कि सैभन मन बदलनेरो मोको दे। 10 पण प्रभुएरी दिहाड़ी चोरेरी ज़ेरी एजनीए, तैस दिहाड़े आसमान बडे ज़ोरे सैहीं नाश भी भोल्, ते आसमनेरी चीज़ॉ हीवेरी ज़ेरी गेलेली, ते ज़मीन ते तैस पुड़ॉ सब

कम्मां फुकोलां। 11 त ज़ैखन कि इना सब चीज़ॉ, इस रीति सैहीं गल्लने बैलिन, त तुस्न पवित्र चाल चलन ते भगती मां केरु भोवरु लोडे। 12 ते परमेशरेरे तैस दिहैड़ी कँन्चरे बल्लगोरो लोडे, ते तैसेरे जल्दी एजनेरे लेई केरी कोशीश केरी लोडे; जैसेरे वजाही सैहीं आसमान अग्गी सैहीं गलेलू, ते आसमानेरे गुण बडे गेरमी सैहीं गल्ले। 13 पण तैसेरे वाइदेरे मुताबिक अस नोवे आसमानेरे ते नोवे ज़मीनारे पासे हेरतम ज़ैन मां धर्मिकता रहली।

बींझे ते हुशार राथ

14 ऐलहेरे लेई, हे ट्लारव, ज़ैखन कि तुस इन गल्लॉ केरी आस हेरतथ त कोशीश केरा कि तुस शैनती सैहीं तैसेरे सामने निष्कलंक ते बे इलज़ाम ठैरथ। 15 ते इशे प्रभुएरे सबरी मुक्ति समझा, जैन्चरे इशे ट्लारे ढला पौलुसे भी तैस ज़ानेरे मुताबिक ज़ैन तैस मैल्लू, तुस्न लिखू। 16 तैन्चरे तैने एपनी सब चिठन मां भी इन गल्लॉ केरे बारे मां ज़ाव, ज़ैन मां केतरी गल्लॉ एरिन, ज़ैन केरु समझनू मुश्किले, ते अनपड़ ते चंचल लोक तैन केरे आर्थन भी पवित्र शास्त्रेरी गल्लॉ केरी ज़ेरी खिच खच केरतां अपने नाश भोनेरी वजा बनातन। 17 ऐलहेरे लेई हे ट्लारव तुस पेहिले इन गल्लन ज़ैनतां हुशार राथ, ताकि बूरे लोकां केरे गल्लॉ केरे पासे फिरतां मज़बूती शारन। 18 पण इशे प्रभु, ते मुक्ति देंने बाले यीशु मसीहेरे अनुग्रह ते पिशानी मां बधते गाथ। तैसेरी महिमा हुन्ना भी भोए, ते सदा भोती राए। आमीन।

1 यूहन्ना

जिन्दगरो वचन

1 तैस जिन्दगरे वचनेरे बारे मां जै पेहिलो थू, जै असेइं शुनो, ते जै अपनी एछेइं सैहीं लाव, बल्कि जै असेहीं रोड़े चारे लाव; ते तैस सैहीं अपने हथ लाए। 2 (ई जिन्दगी बाँदी भोई, ते असेइं लाई, ते तैसेरी गुवाही देतम, ते तुस्न तैस हमेशारे जिन्दगरो समाचार देतम, जै बाजी सैहीं साथी थी, ते असन पुड़ बाँदी भोई)। 3 जैन किछ असेइं हेरु ते शुनू तैसेरी खबर तुस्न भी देतम, ऐलेहेरे लेई कि तुस भी असन सैहीं साथी शामिल भोथ; ते इशी ई शामलीत बाजी सैहीं साथी, ते तैसेरे मड्डे यीशु मसीह साथीए। 4 ते इना गल्लां अस ऐलहेरे लेई लिखतम, कि इशी खुशी पूरी भोए।

लोई मां चलनू

5 जै खबर असेइं तैस कैरां शुनी, ते तुस्न शुनातम, तै इहे; कि परमेशार लोए: तैस मां किछ भी आँधरु नैइं। 6 अगर अस जोम, कि तैस सैहीं साथी इशी शामलीत, ते फिरी आँधरे मां चलतम, त अस झूठे: ते सच्चे पुड़ न चलतम। 7 पण अगर जैचरे तै लोई मां; तैचरे अस भी लोई मां चलतम, त एकि होरी सैहीं रोड़े रहतम; ते तैसेरे मड्डेरो लेव्ह असन सैभी पापन कैरां साफ केरते। 8 अगर अस जोम, कि असन मां कोई पाप नैइं, त अपने आपे धोखो देतम: ते असन मां सच्चे नैइं। 9 अगर अस अपने पाप मन्तम, त तै इशे पाप माफ केरने, ते असन सैभी अधर्म कैरां साफ केरने मां वफादार ते धर्मीए। 10 अगर अस जोम कि असेहीं पाप नैइं कियोरो, त तैस झूठो ठैरातम, ते तैसेरो वचन असन मां नैइं।

मसीह इषो मद्गार

2 हे बच्चव, आंव इना गल्लां तुस्न ऐलहेरे लेई लिखताइं, कि तुस पाप न केरा; ते अगर कोई पाप केरे, त बाजी कां इषो अक मद् केरने बालोए, मलतब धर्मी यीशु मसीह। 2 तै इशे पापां केरो कफारोए: ते सिर्फ इषो नैइं, बल्कि सैरी दुनियारे पापां केरो भी। 3 अगर अस तैसेरे हुकमन मन्तम, त इस सैहीं अस समझे गहले कि अस तैस जानतम। 4 जै कोई इन जोते, कि आंव तैस जानताइं, ते तैसेरे हुकमन न मन्ने, तै झूठोए; ते तैस मां सच्चे नैइं। 5 पण जै तैसेरे वचने पुड़ चलते, तैस मां सच्चे परमेशारे प्रेम सिद्ध भोवरोए: असन इस सैहीं पतो चलते, कि अस तैस मां। 6 कोई इन जोते, कि आंव तैस मां बनोरो रहताइं, तैने तैचरे चलोरु लोड़े जैचरे तै चलतो थू।

नोंवो हुकम

7 ट्लारव, आंव तुस्न कोई नोंवो हुकम न लिखी, पण तैए पुरानो हुकम जे पेहिलो तुस्न मैल्लो; ई पुरानो हुकम तैए वचने, जै तुसेइं शुनो। 8 फिरी आंव तुशे लेई नोंवो हुकम लिखताइं; ते ई त तैस मां, ते तुस्न मां सचाइ ठैरतीए; किजोकी आन्धकार मिटतो गहते ते सचेरी लो चमकने लवरीए। 9 जै इन जोते, कि आंव लोई मां; ते अपने दलाहे सैहीं बैर रखते, तै हेजू तगर आँधरे मां। 10 जै अपने दलाए सैहीं प्रेम रखते, तै लोई मां, ते ठोकर न खेइ बटे। 11 पण जै कोई अपने दलाहे सैहीं बैर रखते, तै आँधरे मां, ते आँधरे मां चलते; ते न जाने, कि कोरां गहते, किजोकि आँधरे तैसेरी एछी कैनी केररि।

12 हे दलाव, आंव तुस्न ऐलहेरे लेई लिखताइं, कि तैसेरे नोंवो सैहीं तुशे पाप माफ भोए। 13 ट्लारव, आंव तुस्न ऐलहेरे लेई लिखताइं, कि जै पेहिले

कैरां ए, तुस तैस जानथ: हे जवानव, आंव तुस्न ऐलहेरे लेई लिखताइं, कि तुसेइं बाजी पिशानो। 14 हे सीयानव, आंव तुस्न ऐलहेरे लेई लिखताइं, कि जै पेहिलोए तुसेइं पिशानो: हे जुवानव, आंव तुस्न ऐलहेरे लेई लिखताइं, कि तुस मजबूतथ, ते परमेशारे वचन तुस्न मां, ते तुस तैस दुष्टे कैरां ज़ीते।

संसारे सैहीं प्रेम न केरा

15 तुस न संसारे सैहीं, ते न संसारेरी कोंची चीजी सैहीं प्रेम रखो: अगर कोई संसारे सैहीं प्रेम रखते, त तैस मां बाजी केरो प्रेम नैइं। 16 किजोकि जैन किछ संसारे मां, मतलब जिसमेरी खुवाइश, ते एछी केरी खुवाइश ते जिन्दगरु गुमण्ड, तैन बाजी केरे तरफां नैइं पण संसारे तरफां। 17 ते संसार ते तैसेरी खुवाइश दुइये मिटती गैतिन, पण जै परमेशारे मेरजी पुड़ चलते, तै सदा बनोरो रालो।

मसीहेरी खलाफत केरने बालो

18 हे मड्डव, ई आखरी बेलोए, ते जैचरे तुसेइं शुनोरुए, कि मसीहेरी खलाफत केरने बालो एजने बालोए, तैसेरे मुताबिक बडे मसीहेरी खलाफत केरने बाले उठोरन; इस सैहीं अस जानतम, कि ई आखरी बेलोए। 19 तैना निस्से त असने मैरां, पण असन मैरां न थी; किजोकि अगर असन मैरां भोथे, त असन सैहीं साथी राथे, पण निसे ऐलहेरे लेई कि इन बांदू भोए कि तैना सब असन मैरां नैइं। 20 ते तुशू जैन पवित्रे तरफां अभिषेक भोरुए, ते तुस सब किछ जानतथ। 21 मी तुस्न ऐलहेरे लेई नैइं लिखोरु, कि तुस सच्चे न जानथ, पण ऐलहेरे लेई, कि तैस जानतथ, ते ऐलहेरे लेई कोई झूठ, सच्चे कैरां नैइं। 22 झूठो कौने? सिर्फ तै, जै यीशुएरो मसीह भोनेरो इन्कार केरते; ते मसीहेरी खलाफत केरते, जै बाजी, ते मड्डेरो इन्कार केरते। 23 जै मड्डेरो इन्कार केरते तैस कां बाजी भी नैइं: जै मड्डे मन्तते, तैस कां बाजी भीए। 24 जैन किछ तुसेइं पेहिलू शुनू; तैने तुस्न मां बनोरु राए: अगर तैन तुस्न मां बनोरु राए, त तुस भी मड्डे मा, ते बाजी मां बनोरे रहले। 25 ते जैसेरो तैने वाइदो केरोए तैए हमेशारी जिन्दगीए।

26 मी इना गल्लां तैन केरे बारे मां लिखी, जैना तुस्न भटकातन। 27 ते तुशू तैन अभिषेक, जैन तैसेरे तरफां केरु ए, तुस्न मां बनोरु रहते; ते तुस्न ऐलहेरी जरूरत नैइं, कि कोई तुस्न शिखाले, बल्कि जैचरे तैन अभिषेक जैन तैसेरे तरफां केरु ए तुस्न सब गल्लां शिखालते, ते इन सच्चे, ते झूठ नैइं: ते जैचरे तैने तुस्न शिखालोरुए, तैचरे तुस तैस मां बनोरे राथ।

परमेशरेरी संतान

28 ते हे बच्चव, तैस मां बनोरे राथ; कि जैखन इन बांदू भोए, ते अस तैसेरे एजने पुड़ तैसेरे सामने शरमिनदे न भोम। 29 अगर तुस जानतथ, कि तैए धर्मीए, त इन भी जानतथ, कि जै रोडां कम्मां केरते, तै तैस सैहीं पैइदा भोरोए।

3 हेरा बाजेइं असन सैहीं केरहो प्रेम कियो, कि अस परमेशरेरी सन्ताम भोम, ते अस अहम भी: ऐलहेरे लेई संसार असन न जाने, किजोकि तैनी तै भी न जानो। 2 हे ट्लारव, हुनी अस परमेशरेरी सन्ताम, ते हेजू तगर इन बांदू नैइं भोवरु, कि अस केरे भोनेम! इन जानतम, कि जैखन तै बांदो भोल्हो त अस भी तैसेरे जेरे भोमेले, किजोकि तैस तेरहे लहमेले जेरो तै आए। 3 ते जै तैस पुड़ ई उमीद रखते, तै अपनों आप तेरहो पवित्र केरते, जेरो तै पवित्रे।

4 जै पाप करते, तै व्यवस्थारी खालाफत करते; ते पाप त व्यवस्थारे खलाफते। 5 ते तुस जानतथ, कि तै ऐलहेरे लेई बांदो भोवरोए, कि पापन हारे; ते तैसेरे सुभावे मां पाप नैइं। 6 जै तैस मां बनोरो रहते, तै पाप न केरे: जै पाप करते, तैने तै न लवरोए, ते न तैस जानते। 7 हे बच्चव, केंचेरे धोखे मां न एजाथ; जै रोडां कम्मां करते, तैए तैसेरो जेरहो धर्मीए। 8 जै पाप करते, तै शैतानेरे तरफांए, किजोकि शैतान शुरुवाती कैरां पाप केरतो आवरोए: परमेशरेरु मड्डू ऐलहेरे लेई बांदू भोव, कि शैतानेरे कम्पन खतम केरे। 9 जै परमेशरे सैहीं पैइदा भोरोए तै पाप न केरी बटे; किजोकि तैसेरु बीज तैस मां बनोरु रहते: ते तै पाप केरी न बटे, किजोकि परमेशरे सैहीं जरमोरो थू। 10 इसे सैहीं परमेशरेरी सन्तान, ते शैतानेरी सन्तान पिशैनोतीए; जै रोडां कम्मां न केरे, तै परमेशरे सैहीं नैइं, ते न तै, जै अपने द्लाहा सैहीं प्रेम न रखे।

एको होरी सैहीं प्रेम रखा

11 किजोकि जै खबर तुसेइं पेहिली शुनी, तै ई ए, कि अस एक होरी सैहीं प्रेम रखम। 12 ते कैनेरे जेरे न बनम, जै तैस दुष्टे सैहीं थू, ते जैने अपनों द्लाहा मारो: ते तै कोस वजाही सैहीं मारो? ऐलहेरे लेई कि तैसेरां कम्मां बुरां थीयां, ते तैसे द्लाहां कम्मां रोडां थीयां।

13 हे द्लाव, अगर संसार तुस्न सैहीं बैर करते त हेराण न भोथ। 14 अस जानतम, कि अस मौती कैरां पार भोइतां जिन्दगी मां दाखल भोवरेम; किजोकि अस द्लाहन सैहीं प्रेम रखतम: जै प्रेम न रखे, तै मौतरे हालती मांए। 15 जै अपने द्लाहा सैहीं बैर करते, तै खुनीए; ते तुस जानतथ, कि कौंची खूनी मां हमेशारी जिन्दगी न राहे। 16 असेइं प्रेम इसे सैहीं जानो, कि तैने इशे लेई अपने प्राण दिते; ते इशो भी द्लाहां केरे लेई जान देंनी फर्जए। 17 पण जैस कां संसारेरी जैइदाद भोए, ते तै अपने गरीब द्लाहा हेरतां तैस पुड तरस खानो न चाहे, त तैस मां परमेशरेरो प्रेम केंचरे भोई बटते? 18 हे बच्चव, अस वचन ते जुबानी सैहीं नैइं, पण कम्पन ते सच्चे सैहीं भी प्रेम केरम।

परमेशरे कां दिलेरी

19 इसे सैहीं अस जानमेले, कि अस सचेरेम; ते जैस गल्ली मां इषो मन असन दोष लाए, तैसेरे बारे मां अस तैसेरे सामने अपने अपने मन्न मजबूट केरी बटम। 20 किजोकि परमेशर इशे मने कैरां बडोए; ते सब किछ जानते। 21 हे ट्लारव, अगर इषो मन असन दोश न दे, त असन परमेशरेरे सामने दिलेरी भोतीए। 22 ते जैन किछ अस मगतम, तैन असन तैस कैरां मैल्लते; किजोकि अस तैसेरे हुकम मन्तम; ते जैन तैस पसन्दे तैन केरतम। 23 ते तैसेरो हुकम ईए कि अस तैसेरे मड्डे यीशु मसीहेरे नोंवें पुड विश्वास केरम ते जैचरे तैने असन हुकम दितो तैसेरे मुताबिक एकी होरी सैहीं प्रेम रखम। 24 ते जै तैसेरे हुकम मन्ते, तै तैस मां, ते तै तैन मां बनोरो रहते: ते इसे सैहीं, मतलब तैस आत्मा सैहीं जै तैने असन दितोरोए, अस जानतम, कि तै असन मां बनोरो रहते।

आत्मान परखा

4 ट्लारव, हर एक आत्मारु याकिन न केरा: बल्कि आत्माइ अजमाथ कि तै परमेशरेरी तरफांए कि नैइं; किजोकि बडे झूठे नबी संसारे मां निसोरेन। 2 परमेशरेरी आत्मा तुस इस रीति सैहीं पिशैनी बटतथ, कि जै आत्मा इन मन्ने, कि यीशु मसीह जिसमे मां आवरोए तै परमेशरेरे तरफांए। 3 ते जै आत्मा यीशु न मन्ने, तै परमेशरेरे तरफां नैइं; ते तैए मसीहेरी खलाफत केरने बाली आत्माए; तैसेरे बारे मां तुसेइं शुनोरु; कि तै एजने बालीए: ते अज भी संसारे मांए। 4 हे बच्चव, तुस परमेशरेरेथ: ते तुस तैन पुड जीतोरेथ; किजोकि जै तुस्न मांए तै तैस कैरां बडोए जै संसारे मांए। 5 तैना संसारेरेन, ऐलहेरे लेई तैना संसारेरी गल्लां जोतन, ते संसार तैन केरी शुन्ते। 6 अस परमेशरेरेम: जै परमेशर जानते, तै इशी शुन्ते; जै परमेशरे न जाने तै इशी न शुने; ऐलहेरे लेई अस सचेरी आत्मा ते टपलाने बाली आत्मा पिशनतम।

परमेशर प्रेमे

7 हे ट्लारव, अस एकी होरी सैहीं प्रेम केरम; किजोकि प्रेम परमेशरे सैहींए: ते जै कोई प्रेम केरते, तै परमेशरे सैहीं पैइदा भोवरोए; ते परमेशरे जानते। 8 जै प्रेम न रखे, तै परमेशरे न जाने, किजोकि परमेशर प्रेमे। 9 जै प्रेम परमेशरे असन सैहीं रखते, तै इस सैहीं बांदो भोव, कि परमेशरे अपनू ट्लारु मड्डू संसारे मां भेड्डू, कि असन तैसेरे जिरये जिन्दगी मैल्ले। 10 प्रेम इस सैहीं नैइं असेइं परमेशरे सैहीं प्रेम कियो; पण इस मांए, कि तैने असन सैहीं केरो; ते इशे पापां केरे लेई अपनू मड्डू दितू। 11 हे ट्लारव, जैखन परमेशरे असन सैहीं एरहो प्रेम कियो, त अस भी एकी होरी सैहीं प्रेम रखम। 12 परमेशर कधी केंचे नैइं लवरो; अगर अस एपू मांमेइं प्रेम रखम, त परमेशर असन मां रहते; ते तैसेरो प्रेम असन मां सिद्ध भोवरोए।

13 इस सैहीं अस जानतम, कि अस तैस मां रहतम, ते तै असन मां; किजोकि तैने असन अपने आत्मा दित्ती। 14 ते असेहीं हेरु भी, ते गुवाही भी दित्ती, कि बाजेइं मड्डू दुनियाइं मां मुक्ति देने बालो कैरतां भेड्डोरोए। 15 जै इन मन्ते, कि यीशु परमेशरेरु मड्डूए: परमेशर तैस मां बनोरो रहते, ते तै परमेशरे मांए। 16 ते जै प्रेम परमेशर असन सैहीं रखते, तै असेहीं जानो, ते असन तैसेरु याकिने; परमेशर प्रेमे: जै प्रेमे मां बनोरो रहते; ते परमेशर तैस मां बनोरो रहते। 17 इसे सैहीं प्रेम सिद्ध भोव, कि असन इन्साफेरे दिहेई दिलेरी भोए; किजोकि जेरो तै आहे, तेरे अस भी संसार मां अहम। 18 प्रेमे मां डर न भोए, बल्कि सिद्ध प्रेम डरे दूर केरते, किजोकी डरेरो रिशरो सजाई सैहीं भोते, ते जै डरते, तै प्रेमे मां सिद्ध नैइं। 19 अस ऐलहेरे लेई प्रेम केरतम, कि पेहिलो तैने असन सैहीं प्रेम कियो। 20 अगर कोई जोए, कि आंव परमेशरे सैहीं प्रेम रखताइं; ते अपने द्लाहा सैहीं बैर रखे; तै झूठोए: किजोकि जै अपने द्लाहा सैहीं जै तैने लवरोए प्रेम न रखे, त परमेशरे सैहीं भी जै तैने लवरो नैइं, प्रेम न रेखी बटे। 21 ते तैस कैरां असन ई हुकम मैल्लते, कि जै अपने परमेशरे सैहीं प्रेम रखते, तै अपने द्लाहा सैहीं भी प्रेम रखे।

5 जैसेरो ई विश्वासे कि यीशु ही मसीहे, तै परमेशर सैहीं पैइदा भोवरोए, ते जै पैइदा केरने बाले सैहीं प्रेम केरते, तै तैस सैहीं भी प्रेम रखते, जै तैस सैहीं पैइदा भोवरो ए। 2 जैखन अस परमेशरे सैहीं प्रेम रखतम, ते तैसेरे हुकमन मन्नतम, त इस सैहीं अस जानतम, कि परमेशरेरी सन्तान सैहीं प्रेम रखतम। 3 ते परमेशरेरो प्रेम ई ए, कि अस तैसेरे हुकमन मन्नतम; ते तैसेरे हुकम मुशकिलन नैइं। 4 किजोकि जै परमेशरे सैहीं पैइदा भोवरोए तै संसारे पुड जीते, ते तै जीत जैस सैहीं जीत भोतीए तै इषो विश्वासे। 5 संसारे पुड जीत हसल केरने बालो कौने, सिर्फ तै जैसेरो ई विश्वासे, कि यीशु, परमेशरेरु मड्डूए।

यीशु मसीहेरे बारे मां गुवाही

6 ईए तै, जै पैनी ते खूनेरे जिरिए आवरो थू; मतलब यीशु मसीह, तै न सिर्फ पैनी सैहीं, बल्कि पैनी ते खूने दुइयां केरे जिरिए आवरो थू। 7 ते जै गुवाही देते, तै आत्माए; किजोकि आत्मा सच्चे। 8 ते गुवाही देने बाले ट्लाडान; आत्मा, ते पानी, ते खून; ते ट्लाडियां केरी आके गल्ले। 9 जैखन अस मैन्हु केरी गुवाही मन्तम, त परमेशरेरी गुवाही त तैस कैरां भी बडीए, कि तैने अपने मड्डेरे बारे मां गुवाही दित्ती। 10 जै परमेशरेरे मड्डे पुड विश्वास केरते, तै अपने आपे मां ई गुवाही रखते; जैने परमेशरेरु याकिन न केरु, तैने तै झूठो ठेराव; किजोकि तैने तैस गुवाही पुड विश्वास न कियो, जै परमेशरे अपने मड्डेरे बारे मां दितोरीए। 11 ते तै गुवाही ई ए, कि परमेशरे असन हमेशारी जिन्दगी दित्ती: ते ई जिन्दगी तैसेरे मड्डे मांए। 12 जैस कां मड्डूए, तैस कां जिन्दगीए: ते जैस कां परमेशरेरु मड्डू नैइं, तैस कां जिन्दगी भी नैइं।

हमेशारी जिन्दगी

13 मीं तुस्न, जै परमेशरेरे मड्डेरे नोंवें पुड विश्वास केरतो भोए, ऐलहेरे लेई लिखताइ; कि तुस्न पतो लगे, कि हमेशारी जिन्दगी तुशीए। 14 ते असन तैसेरे सामने ई दिलेरी भोतीए, तै ई ए; कि अगर अस तैसेरे मेरजी सैहीं मगतम, त तै इशी शुनते। 15 ते अगर अस जानतम, कि जैन किछ अस

मगतम, तैन मैल्लते। 16 अगर कोई अपने दुलाहे कोई एरो पाप केरतो लाए, जैसेरो फल मौत न भोए, त बिनती केरे, ते परमेशर तैस तैन केरे लेई, जैनेइं एरो पाप कियोरोए जैसेरो फल मौत नैइं, जिन्दगी देल्हो, पाप एरहो भी भोतेए जैसेरो फल मौत नैइं: ऐसेरे बारे मां आंव प्रार्थना केरनेरे बारे मां न जोई।
 17 सैभी किसमेरी बूराई त पापे पण एरो भी पापे, जैरेरो फल मौत नैइं।
 18 अस जानतम, कि जै परमेशरे सैहीं पैइदा भोवरोए, तै पाप न केरे; पण जै

परमेशरे सैहीं पैइदा भोवरोए: ते दुष्ट तैस सैहीं हूरी न बटे। 19 अस जानतम, कि अस परमेशरे सैहीं अहम, ते सारु संसार तैस दुष्टेरे कबजे मांए। 20 ते इन भी जानतम, कि परमेशरेरु मड्डु आवरुए, ते तैने असन समझ दितोरीए, कि अस सच्चे पिशानम, ते अस तैस मां जै सच्चे मांए, मतलब तैसेरे मड्डे यीशु मसीह मां रहतम: सच्चो परमेशर ते हमेशारी जिन्दगी ई ए। 21 हे बच्चव, अपनों आप मूरतन कैरां बचेइतां रखा।

2 यूहन्ना

अभिवादन

1 मेरे बजुर्गे तरफां तैस चूनोरी बीबी, ते तैसेरे मड्डां केरे नोंवें जैन सैहीं आंव तैस सचैईरे वजाही सैहीं सचो प्रेम रखताइं। 2 जै असन मां मजबूत रहतीए, ते सदा असन सैहीं साथी अटल रालही। 3 बाजी परमेशर, ते बाजी केरु मड्डू यीशु मसीहेरे तरफां अनुग्रह, ते दया, ते शान्ति, सचकच, ते प्रेमे सैहीं असन साथी रहले।

सच्च ते प्रेम

4 आंव बडो खुश भोव, कि मीं तेरे केतरे मड्डन तैस हुकमेरे मुताबिक, जै असन बाजी केरे तरफां मैल्लोरो थू सच्चे पुड़ चल्लते लाहे। 5 हुनी हे बीबी, आंव तीं कोई नोंवों हुकम न देइं, पण तैए पेहिलो देंतेरो असन कांए लिखताइं; ते तीं कां बिनती केरताइं, कि अस एकी होरी सैहीं प्रेम रखनो। 6 ते प्रेम ई ए कि अस तैसेरे हुकमां केरे मुताबिक चलम: ई तैए पुरानो हुकमे, जै तुस पेहिलो देंतेरो तुसेइं शुनोरोए ते तुसेइं इस पुड़ चल्लोरु भी लोड़े।

7 किजोकी बड़े एरे टपलाने बाले निसोरेन, जैना इन न मन्न, कि यीशु मसीह जिसमे मां भोइतां आव: टपलाने बाले मसीहेरी खलाफत केरने बाले इनान। 8 अपने बारे मां हुशार राथ; कि जै मेहनत असेइं की, तैस तुस न बगाडा: बल्कि तैसेरो पूरा फल हसल केरा। 9 जै अगरोंव बधते, ते मसीहेरी तालीमी मां बनोरो न राहे, तैस कां परमेशर नैइं: जै तैसेरी तालीमी मां मजबूत रहते, तैस कां बाजी भी आए ते मड्डू भी। 10 अगर कोई तुस्न कां एजे, ते ईए तालीम न दे, तैस न त घरे मां एजने देतथ, ते न नमशकार केरा। 11 किजोकी जै कोई एरे मैन्हू नमशकार केरते, तै तैसेरे बूरे कम्मन मां शामिल भोते।

आखरी अभिवादन

12 मीं बेडी गल्लां तुस्न लिखन्न, पण काकल ते शैही सैहीं न लिखनी चैहीं; पण मीं उमीदे, कि आंव तुस्न कां एजेहेलो, ते सामने भोइतां गल्लां केरेलो: जैस सैहीं तुशी खुशी पूरी भोए। 13 तेरी चूनोरी बेइहिनारां मड्डां तीं नमशकार जोतन।

3 यूहन्ना

अभिवादन

1 मेरे बजुगरे तरफां टूलारे गायुसेरे नोंवें, जैस सैहीं आंव सच्चे प्रेम केरताई। 2 टूलारा, मेरी ई प्रार्थनाए; कि जैन्चरे तू आत्मिक तरकी केरी रवरोस, तैन्चरे तू सैभी गल्लन मां तरकी केरतो रह। 3 किजोकी जैखन टूलाहे एइतां, तेरे तैस सच्चेरी गुवाही दिती, जैस पुड़ तू सच्चे चलतस, त आंव बडो खुश भोव। 4 मीं इस केरां बेद्धतां होरी कोई खुशी नैइं, कि आंव शुनी, कि मैरां मट्टां सच्चे पुड़ चलतन।

गयुसेरी तारीफ

5 हे टूलारा, जैन किछ तू तैन टूलाहन सैहीं साथी केरतस, जैना परदेशी भी आन, रोड़ी नीति सैहीं केरतन। 6 तैनेइं बडे लोकां केरे सामने तेरी गुवाही दितोरी थी: अगर तू तैन इस तरीके सैहीं भेइलो जैस तरीके सैहीं परमेशरेरे लोकां केरे लेई जैइजे त रोड़ु भोलहू। 7 किजोकी तैना तैसेरे नोंवें लेई निसोरेन, ते होरी कौमन केरां किछ न नेन। 8 ऐलहेरे लेई एरां केरी इजत केरनी इषो फर्जए, जैस सैहीं अस भी सच्चेरे हके मां तैन केरे मद्द केरने बालेम।

दियुत्रिफेस ते दिमेत्रियुस

9 मीं कलीसियाइ किछ लिखोरु थू: पण दियुत्रिफेस जै तैन मैरां बडो बन्नो चहते, असन कबूल न केरे। 10 ते जैखन आंव एजहेलो, त तैसेरे कम्मां केरी जैना तै केरी रावरोए याद करेइलो, कि तै इशे बारे मां बुरी बुरी गल्लां केरते, ते टूलाहन कबूल न केरे, ते तैन जैना कबूल केरने चहतन, तैन भी ठाकते: ते कलीसिया मैरां कढतन।

11 टूलारव, बुरैई पत्ती नैइं बल्कि भलैई पत्ती चल्ला, जै भलाई केरते तै परमेशरेरे तरफांए; पण जै बुराई केरते, तैन परमेशर नैइं लवरो। 12 देमेत्रियुसेरे बारे मां सैभेइं सच्चे भी एपू गुवाही दिती: ते असेइं भी गुवाही दितोरीए, ते तू जानतस, कि इशी गुवाही स्वीए।

आखरी अभिवादन

13 मीं तीं बडु लिखनू त थू: पण शैही ते कलमी सैहीं लिखनू न चैइं। 14 पण मीं उमीदे कि तीं सैहीं जल्दी मुलाकत केरेलो: तैखन अस आमने सामने गल्लां केरमेले। तीं शान्ति मल्लती राहे। 15 इठेरे दोस्त तीं नमशकार जौतन, ऐठेरे दोस्तन नोंव घिन्तां नमशकार जौइयां।

यहूदा

अभिवादन

1 यहूदेरे तरफां जै यीशु मसीहेरो दास, ते याकूबेरो दूलाहे, तैन कुजवरे लोकां केरे नोंवें जैना बाजी केरे ट्लारे ते यीशु मसीह हफाजती मां आन | 2 दया ते शान्ति ते प्रेम तुस्न पुड़ बड़ो भोतो राहे |

झूठे गुवाह

3 हे ट्लारव, जैखन आंव तैस मुक्तेरे बारे मां बड़ी मिनती सैहीं कोशीश केरने लावरो थू, जैस मां अस सब शामलम; ते मीं तुस्न समझानू जरूरी समझू कि तैस विश्वासेरे लेई बड़ी कोशीश केरा, जै पवित्र लोकन एकी बार सोंफारोरो थू | 4 किजोकी एतरे लोक चुपचारे असन मां मिलोरेन, जैन केरे लेई इस सजारे बारे मां पेहिलू लिखोरू थू; इन भगती न केरने बाले, ते इशे परमेशरेरे अनुग्रहे लुचपने मां बदलने बालेन, ते इशे मालिके ते प्रभु यीशु मसीहेरो इनकार केरतन |

5 पण अगर तुसेइं सब गल्लां एकी बार जैनोरिन, फिरी भी आंव तुस्न इना गल्लां याद करैनी चहताइं, कि प्रभुए अक कुल मिसर मुलखेरे छटानेरां पत्ती विश्वास न केरने बाले नाश केरे | 6 फिरी जैना फरिशते अपने पदे पुड़ बनोरे न राहे बल्कि अपनो विश्वास शारो, तैने तैना भी तैस दिहैडी तगर जेइस आदालत भोनीए तैइस तगर आँधरे मां जै सदारे लेईए रखोरेन | 7 जैस रीति सैहीं सदोम ते अमोरा ते तैन केरे आसे पासेरे नगर, जैना इन केरे जेरे कूकमी भोवरे थी, ते होरी जिसमे पत्ती लगेरे थी; हमेशरे अगरी सजाइं मां गैहितां अक कहानी भोवरेन |

8 तैन्चरे इना लोक भी अपने बेइमैनी मां अपनों जिसम गंदो केरतन, ते हकोमती घटया समझतन; ते उचे पदे बाले लोकन बुरु भलू जेतन | 9 पण प्रधान फरिशते मीकाईले, जैखन मूसेरे लाशारे बारे मां बेंस केरतो थू, ते तैस बुरु भलू जोइतां दोष लानेरी जुरत न की; पण इन जोंव, कि प्रभु तीं डाँटे | 10 पण इना लोक जैन गल्लां केरे बारे मां न जान्न, तैने बुरु भलू जेतन; पण जैन गल्लन बे अक्क जानवरां केरे जेरे न जान्न, तैने मां अपनों आप नाश केरतन | 11 तैन पुड़ अफसोस! किजोकी तैना कैनेरी जेरी चाल चले, ते मजदूरे लेई बलिलामेरे जेरे भरष्ट भोए; ते करोहेरे जेरे खलाफत केरतां नाश

भोवरेन | 12 इना तुशे प्रेमे मां धामन मां तुस्न सैहीं साथी खातन पीतन, समुन्दरेरी छेपोरी शफडां केरे जेरेन, ते बे धडक अपनू पेट भरने बाले रखवालेन; तैना बगौर पैंने बिदलान; जैन हवा उडारतीए; शेरेरे बे फल बुटन, जैना दुइये बार मरेंन; ते जीलना उखड़ोरेन | 13 इना समुंदरे लैराँ केरे जेरेन, जैना अपने बेशरमरी शैमफ उछड़ेतिन, जैन केरे लेई हमेशा आँधारू रहते |

14 ते हनोके भी तैन केरे लेई जै आदमेरे सतोंव पीड़ी मां थू, इन केरे बारे मां ई भिक्वाणी की, कि हेरा, प्रभु अपने लखेई पवित्रन सैहीं साथी आव | 15 कि सैभी केरो इन्साफ केरे, ते सैभी भगतीहीन तैन केरे सैभी बुरा कम्मां केरे बारे मां, जैना तैनेइं भगतीहीन भोइतां कीयोरेन, ते तैन सब सखत गल्लां केरे बारे मां जैना भगतीहीन पैपेइं तैन केरे बारे मां जोई दोषी भोए | 16 इना त बक बक, ते शकायत केरने बालेन, ते अपने खुवैइशां केरे मुताबिक चल्लने बालेन; ते अपने जुबानी सैहीं घमण्डेरी गल्लां केरने बालेन; ते तैना लालचरे लेई लेवरी गल्लां केरी बडयाई केरतन |

खबरदारी ते तालीम

17 पण हे ट्लारव, तुस तैन गल्लन याद रखा; जैना गल्लां इशे प्रभु यीशु मसीहेरे प्रेरतेइं पेहिलू जोरूए | 18 तैन तुस्न सैहीं जेतो थी, कि अखरी दिहाइन मां एरे ठठठे केरने बाले भोनेन, जैना अपने गंदे खयालां केरे मुताबिक चलहेले | 19 इना त तैन्न; जैना हल्लो मचातन; इना जिसमानी लोकन, जैन मां आत्मा नैइं | 20 पण हे ट्लारव अपने अति पवित्र विश्वासे मां अपनी तरकी केरते ते पवित्र आत्मा मां प्रार्थना केरते | 21 अपने आपे परमेशरेरे प्रेमे मां बनोरे रखा; ते हमेशरे जिन्दगरे लेई इशे प्रभु यीशु मसीहेरे दयारी उमीद हेरते राथ | 22 तैन पुड़ जैना शकी मान दया केरा | 23 ते बड़न अग्गी मैरां कडा, ते बड़न पुड़ डरे सैहीं दया केरा; बल्कि तैस लिकड़े सैहीं नफरत केरा, जैन जिसमेरे ज़िरीए गंदू भोवरूए |

24 हुनी जै तुस्न ठोकर खाने कैरां बचेई बटते, ते अपने महीमारी भरपूरे सामने मगन ते बे इलजाम केरतां खडो केरी बटते | 25 तैस एकी परमेशर इषो मुक्ति देंने बालेरी महिमा, ते अजमत, ते हकोमत, ते अधिकार, इशे प्रभु यीशु मसीहेरे ज़िरीए जैन्चरे पेहिलू देंतेरोए, हुन्ना भी भोतए, ते हमेशा राए | आमीन |

मुकाशफो

सते कलीसियां केरु अभिवादन

1 यीशु मसीहेरो मुकाशफो जै तैस परमेशरे ऐलहेरे लेई दितोरोए, कि अपने दासन तैना गल्लाँ, जैन केरु जल्दी भोनू जरुरीए, हिराए: ते तैनी अपनों फरिश्तो भेज्जतां तैसेरे ज़िरीये अपने दास यहून्ना ज़ोव। 2 जैन परमेशरेरे वचन ते यीशु मसीहेरी गुवाही, मतलब जैन किछ तैने लवरु थू तैसेरे गुवाही दिती। 3 मुबारिके तै जै इस भविष्यवैनरी किताबी पड़े, ते जै शुनते ते इस मां लिखोरी गल्लन मन्नते, किजोकी वख्त नेडो आवरोए। 4 यहून्नारे तरफां आसियारी सत कलीसियाँ केरे नोंवें: तैसेरु भोंतू जै आए, ते जै थू, ते जै एजने बालोए; ते तैन सत आत्माँ केरु भोंतू, जैना तैसेरे तखतेरे सामनेन। 5 ते यीशु मसीहेरे तरफाँ, जै वफादार गुवाह ते फटरण मैरां जीतो भोने बालो जेठो, ते ज़मीनरे बादशाहां केरो हाकिमें, तुस्न अनुग्रह ते शान्ति मैल्लती राए: जै असन सैहीं प्रेम रखते, ते जैने अपने लेव्हे सैहीं अस पापन केरां छुटाए। 6 ते अस बादशा ते अपने बाजी परमेशरेरे लेई याजक भी बनाए; तैसेरी महिमा ते हकोमत सदा राए। अमीन। 7 हेरा; तै बिदलारी सैहीं साथी एजने बालोए; ते हर अक अछ तैस हेरेली, बल्कि जैनेई तै सतावरो थू, तैना भी तै लाल्हे, ते धरतरे सारे कुल छाती पीटेले। हां। अमीन। 8 प्रभु परमेशर तै जै आहे, ते जै थू, ते जै एजने बालोए; जै बड़ो शक्ति बाल ए: इन जोंते, कि आंवे अल्फा ते ओमेगाई।

यूहन्ना मसीहेरु दर्शन भोनू

9 आंव यहून्ना तुशो ढला, ते यीशुएरे मसीबती, ते बादशाही, ते सबरी मां तुस्न सैहीं साथी शामलाई, परमेशरेरे वचन, ते यीशु एरी गुवाही एरे वजही सैहीं पतमुस नोंवें टैपू पुड़ थू। 10 कि आंव प्रभुएरे दिहैडी आत्मा मां आव, ते एपू पतर नडशिगेरी आवाज इन जोंते शुनी। 11 कि जैन किछ तू लातस, तैस किताबी मां लिखतां सते क्लीसियान कां भेज्ज, मतलब इफिसुस ते स्मुरना, ते पिरगमुन, ते थुआतिरा, ते सरदीस, ते फिलेदिलफिया, ते लोदीकिया मां।

12 ते मीं तै जै मीं सैहीं गल्लाँ केरने लावरो थू; तैस हेरनेरे लेई तक्कू; ते पतरांव फिरतां मीं सुन्नेरे सत दीये लाए। 13 ते तैन दीयां केरे मज्जाटे मैन्हेरे मड्डे जेरो एक मड्ड लाव, जैस पवन तगर लिक्डौं थी, ते छैती पुड़ सुन्नेरो फटको बंधोरो थू। 14 तैसेरी करोडी ते बाल छिती उन्नी बल्कि हीवे केरां जादे उजले थी; ते तैसेरी एछी अगरी जेरी थी। 15 ते तैसेरे पाव रोडे पितलेरे जेरे थी मन्ना जैन्चरे भेठी मां तपावरे भोन; तैसेरी आवाज बडे पैनरी जेरी थी। 16 ते तै अपने देहिने हाथे मां सत तारे घिनतां थू: ते तैसेरे मुखे सैहीं दुइय धारण बाली तलवार निसती थी; तैसेरु तुतर एरु चमकतू थू, जैन्चरे दिहाडो भर धुपू पुड़ चमकते। 17 जैखन मीं तै लाव, त तैसेरे पाववन पुड़ मुडदो जेरो पेव ते तैने मीं पुड़ अपनों देहिने हथ रखतां इन ज़ोव, कि न डर; आंव ते पहिलो ते आखरी ते ज़ीतोई। 18 आंव मरों थू, ते हुनी तक्का; आंव सदा ज़ीतोई; ते मोती ते पातालेरी चैबी मीं कांन। 19 ऐलहेरे लेई जैना गल्लाँ तूई हेरी ते जैना गल्लाँ भोई रावस्नि; ते जैना इठाँ बाद भोने बैलिन, तैना सब लिख। 20 मतलब तैन सत ताराँ केरो भेद्ध जैना तीं मेरे देहिने हथे मां हेरोरे थी, ते तैन सत सुन्नेरे दीयां केरो भेद्ध: ते सत तारे सत कलीसियां केरे दूतन, ते तैना सत दीये सत कलीसियान।

इफिसुसे बिसतार

2 इफिसुसेरी कलीसियारे दूते इन लिख, कि जै सते तारे अपने देहिने हथे मां घिनतां फिरते, ते सुन्नेरे सत दीयां केरे मज्जाटे फिरते, तै इन जोंते कि। 2 आंव तेरां कम्मां, ते मेहनहत, ते तेरु सबर जानताइं; ते इन भी, कि तू बुरे लोकन हेरी न बटस; ते जैना अपनों आप प्रेरत जोंतन, ते आन नैइं, तैना तीं परखे ते तैना झूठे निस्से। 3 ते तू सन्न केरतस, ते मेरे लेई दु:ख झैल्लते झैल्लते थको न। 4 पण मीं तेरे खलाफ इन ज़ोनू ए कि तीं अपनों पहिलो प्रेम शारोरोए। 5 खयाल केर, कि तू कोठाँ बिछडो, ते मन फिरा ते पहिलू जेरु कम्म केर; ते अगर तू मन न फिरालो, त आंव तीं काँ एइताँ तेरो दीयो तैस ठाराँ पुटेलो। 6 पण हां तीं मां ई गल्ल त आए, कि तू नीकुलइयां केरे कम्मन सैहीं नफरत केरतस, जैन सैहीं आंव भी केरताई। जैसेरे कन भोण, तै शुने कि आत्मा कलीसियान सैहीं कुन ज़ोते। 7 जैस कन भोण, तै शुने कि आत्मा कलीसिया सैहीं कुन ज़ोते: जै ज़ीते, आंव तैस, तैस जिन्दगारे बुटे मैरां जै परमेशरेरे सुवर्ग लोके मांए, फल खानेरे लेई देइलो।

स्मुरनाए बिसतार

8 ते स्मुरनारे कलीसियारे दूते इन लिख, कि, जै पहिलो ते आखरीए; जै मरों थू ते हुनी ज़ीतो भोवरोए, तै इन जोंते कि। 9 आंव तेरे मसीबती ते तेरी गरीबी जानताइं; (पण तू धनीस); ते जैना लोक अपनो आप यहूदी ज़ोतन ते आन नैइं, पण शैताने सैहीं साथी शामिल भोने बालेन, तैन केरी निन्दा भी जानताइं। 10 जैना दु:ख तीं झैल्लने पैनन, तैन केरे लेइ न डर: किजोकी तक्का, शैतान तुस्न मैरां केतरेन कैद केरने पुड़ए; ताकि तुस परखे गाथ; ते तुस्न दश दिहाडन तगर दु:ख झैल्लनो भोल्हो: जान देने तगर वफादार राथ; त आंव तीं जिन्दगरु मुकट देहिलो। 11 जैसेरे कण भोण, तै शुने कि आत्मा कलीसियान सैहीं कुन ज़ोते: जै ज़ीते, तैस दुइयोवं मौती सैहीं नुकसान न पुजेलो।

पिरमुने बितार

12 ते पिरगमुनेरी कलीसियारे दूते इन लिख, कि, जैस कां दुइय धारण बाली ते तिखी तलवारे, तै इन ज़ोते, कि। 13 आंव इन जानताइं, कि तू तैडी रहतस जैडी शैतानेरो तखते, ते मेरे नोंवें पुड़ बनोरो रहतस; ते मीं पुड़ विश्वास केरने सैहीं तैन दिहाडन मां भी पतरावं न हटो जैन मैरां मेरो वफादार गुवाह अन्तिपास, तुस्न मां तैस ठैरी पुड़ मारो जेव जैडी शैतान रहते। 14 पण मीं तेरे खलाफ किछ गल्लां ज़ोनीन, किजोकी तेरे इडी किछ त एरहन जैना बिलामेरी तालीमी मन्तण, जैनी बच्चन इसाली केरे सामने ठोरारी वजा रखनू शिखालू, कि तैना मूरतन पुड़ रखोरी चीजां खान ते ज़नाह केरन। 15 तैचरे तेरे ऐडी भी केतरे लोक एरेन, जैना नीकुलइयां केरी तालीम मन्तन। 16 ते मन फिरा, नैई त आंव तीं कां जल्दी एजतां, अपने एशेरे तलवारी सैहीं तैन साथी मैरेलो। 17 जैसेरे कण भोन, तै शुने कि आत्मा कलीसियान सैहीं कुन ज़ोते; जै ज़ीते तैस आंव छपोरो मन्ना देइलो, ते तैस अक छितो घोड़ भी देइलो; ते तैस घोड़े पुड़ अक नोंव लिखोरु भोल्हू, जैस तैसेरे हसल केरने बालेरे इलावा होरो कोई न ज़ानेलो। 18 ते थूआतीरारी कलीसियारे दूते इन लिख कि, परमेशरेरु मड्डू जैसेरी एछी अगरी जेरिन, ते जैसेरे पाव कीमती पीतलारे जेरेन, तै इन ज़ोनेते, कि। 19 आंव तेरे कम्मन जानताइं, ते प्रेम, ते विश्वास, ते सेवा, ते सबरी जानताइं, ते इन भी कि तेराँ

आखरी कम्मां पेहिले कम्मन कैरां बेद्धतन। 20 पण मीं तेरे खलाफ इन जोनूए, कि तू तैस कौन्शी इजेबेल रहने देतस; जै अपनों आप नबी जोतीए, ते मेरे दासन जनाह केरने, ते मूरती कां चाडोरू खानू शिखैलतां टपलातीए। 21 मीं तैस मन फिरानेरे लेई मोको दितो, पण तैसा अपने जनाह सैहीं मन न फिरानो चाव। 22 हेरा, आंव तैस खटी पुड रखताइं; ते जै तैस सैहीं जनाह केरेलो अगर तैना भी तैसेरे कम्मन सैहीं मन न फिराले त तैन बडे मसीबती मां छेडेलो। 23 ते आंव तैसेरे बच्चन मैरेलो; ते तैखन सब कलीसियां बुझेली कि दिल ते मनरो परखने बालो आंवेइं; ते आंव तुस्न मां हर एकी तैसेरे कम्मां केरे मुताबिक बदलो देइलो। 24 पण तुस थूआतिरारे बाकी लोकन सैहीं, जैतरें इस तालीमी न मन्न, ते तैन गल्लन शैतानेरी डुगी गल्लां जोतन न जात्र, इन जोताइं, कि आंव तुस्न पुड होरो बोज न रेखी। 25 पण हां, जैन तींकां ए तैस मेरे एजने तर ठेमतां रख। 26 जै जीते, ते मेरे कम्मां केरे मुताबिक आखरी तगर केरतो राए, आंव तैस कोमा कोमारे लोकन पुड आधीकार देहिलो। 27 ते तै लूहरे राजदण्डे सैहीं तैन पुड बादशाही केरेलो, जैस तरीके सैहीं कूमहार मितारां भांडां चकनाचूर भोतन: जैन्चरे मीं भी एरो आधीकार अपने बाजी कैरां हसल केरोए। 28 ते आंव तैस झेझरो तारो देहिलो। जैसेरे कन भोंण, तै शुन्ने कि आत्मा कलीसियान सैहीं कुन जोते। 29 जैसेरे कन भोंण, तै शुन्ने कि आत्मा कलीसियान सैहीं कुन जोते।

सरदीसे बिसतार

3 ते सरदीसरी कलीसियारे दूते लिख, कि, जैस कां परमेशरेरी सत आत्मान ते सत तारेन, इन जोते कि आंव तेरे कम्मन जानताइं, कि तींझो जीतो जोतन, पण आस मरों। 2 बींझो रा, ते तैन चीजन जैना रेवरिन, ते जैना मिटने बैली थी, तैन मजबूत केर; किजोकी मीं तू कौन्ची मां अपने परमेशरे कां पूरो न लाव। 3 याद रख, कि तीं केरी तालीम मैलोरी थी तीं ते शुनोरी थी, ते तैस मां बनोरो रा, ते मन फिरा: ते अगर तू बींझो न रालो, त आंव चोरेरो जेरो एजेलो ते तू कधे न जानेलो, कि आंव कोस घेडी तीं पुड एजी। 4 पण हां, सरदीसे मां किछ लोकन, जैनेई अपनां लिकडां गंदां नैइं केरों, तैन छितां लिकडां लेइतां मीं सैहीं साथी घुमले किजोकी तैना इस काबलन। 5 जै जीते, तैस इसे तरीके सैहीं छितां लिकडां लवां गहलां, ते आंव तैसेरू नांव जिन्दगारे किताबी मैरां कौन्ची रीति सैहीं न केढेलो, पण तैसेरू नांव अपने बाजी ते फरिशतां केरे सामने घिनेलो। 6 जैसेरे कन भोंण, तै शुने कि आत्मा कलीसियान सैहीं कुन जोते।

फिलदिलया बिसतार

7 ते फिलदीपयारे कलीसियारे दूते इन लिख, कि जै पवित्र ते सच्चे, ते दाऊदेरी चाबी रखते, जैसेरे खोल्लेरे कोई बंद न केरी बटे ते जैसेरे बंद केरें कोई खोल्लेरे न बटे, तै इन जोते कि। 8 आंव तेरे कम्मन जानताइं, (हेर, मीं तेरे सामने अक बत खोरोरीए, जैस कोई बंद न केरी बटे) कि तेरी सामर्थ थोडीए, ते तीं मेरो वचन मनोरोए ते मेरे नांवेरो इन्कार नैइं कीयोरो। 9 हेर, आंव शैतानेरी तैन सभा बालन तेरे कबजे मां केरेलो जैना यहूदी बनोरेन, पण आन नैइं, बल्कि झूठ जोतन हेर, आंव एरू केरेलो, कि तैना एइतां तेरे पावन कां एइतां झुकेले, ते इन जानेले, कि मीं तीं सैहीं प्रेम रखोरोए। 10 तीं मेरे सबरारो वचन ठेमोरोए, ऐलहेरे लेई आंव भी तीं अजमैइशरे बले बचेइलो, जै धेरतली पुड राने बालन पुड परखनेरे लेई सारे संसारे पुड एजने बाली ए। 11 आंव जल्दी एजने बालोई; जैन किछ तीं कांए, तैस ठेमतां रख, कि कोई तेरू ताज न थसोडे। 12 जै जीते, तैस आंव अपने परमेशरेरे मन्देरे मां अक खम्भो बनेइलो; ते तै कधी फिरी बेइर न निसेलो; ते आंव अपने परमेशरेरू नांव, ते अपने परमेशरेरे नगर, मतलब नांवें यरूशलेमेरू नांव, जैन मेरे परमेशरेरे सुवर्गए पुडां एजने बालूए ते अपनू नांवू नांव तैस पुड लिखेलो। 13 जैसेरे कन भोंण, तै शुने कि आत्मा कलीसियान सैहीं कुन जोते।

लौदीकियाई बिसतार

14 ते लौदीकियारी क्लीसियारे दूते इन लिख, कि, जै आमीन, ते वफादारे, ते सच्चे गुवाहे, ते परमेशरेरी स्रष्टिरी वजाए, तै इन जोते। 15 कि आंव तेरे

कम्मन जानताइं कि तू न ठंडोस ते न त्तओस: रोडू भोथू कि तू ठंडो या त्तओ भोथो। 16 ते ऐलहेरे लेई तू निघोस, ते न ठंडोस ते न त्तओस, आंव तीं अपने ऐशी मैरां थुकने बालोई। 17 तू जैन जोतस, कि आंव धनीं, ते धनी भोवरोइं, ते मीं कौन्ची चीजरी घटी नैइं, ते इन न जानस, कि तू बदकीसमत ते तुच्छ ते कंगाल ते कांनो, ते नगोस। 18 ऐलहेरे लेई आंव तीं सलाह देताइं, कि अग्गी मां तौरू सुनू मीं कैरां ने, कि धनी भोव; ते छितां लिकडां ने, कि तीं अपने नग्गे पणोरी शर्म न भोए; ते अपने एछी केरे लांनेरे लेई कजल ने, कि तू लास। 19 आंव जैन जैन सैहीं प्रेम रखताइं, तैन सैभन डांताइं ते तैन केरी ताडना केरताइं, ऐलहेरे लेई सरगर्म भो, ते मन फिरा। 20 हेर, आंव दार लवरो बजाने; अगर कोई मेरी आवाज शुनतां दार खोल्ले, त आंव अन्तर एइतां तैस सैहीं साथी खेइलो, ते तै मीं सैहीं साथी। 21 जै जीते, आंव तैस एपू सैहीं साथी अपने तखते पुड बिशैलेलो, जैन्चरे आंव भी जीत हसल केरतां अपने बाजी केरे तखते पुड बिशो। 22 जैसेरे कन भोंण तै शुने कि आत्मा क्लीसियान सैहीं कुन जोते।

स्वर्गें मां आराधना

4 इन गल्लां केरे पत्ती मीं नजर की, ते कुन हेरताइं कि सुवर्गए मां अक दार खुल्लोरूए; ते जै पेहिलो मीं एपू सैहीं नडशिनगेरे आवाजी सैहीं साथी गल्लां केरतो शुनोरो थू, तैए जोते, कि इडी बा एई: ते आंव तीं हीरेइलो, जैन केरू इन गल्लां केरे पत्ती पूरू भोनू जरूरी ए। 2 ते तैखने आंव आत्मा मां आव; ते कुन हेरताइं, कि अक तखतते सुवर्गए मां, ते तैस पुड कोई बिशोरोए। 3 ते जै तैस पुड बिशोरोए, तै यशब ते मानिकेरो जेरो लेइहोते, ते तैस तखते पुड चेवरे पासन मरकतेरू जेरू अक धनुष लेहीहोते। 4 ते तैस तखतेरे चेवरे पासन चोबही तखत थी; ते इन तखतन पुड चोबही बजुर्ग छितां लिकडां लेइतां बिशोरेन, ते तैन केरे दोगन पुड सुन्नेरे ताजन। 5 ते तैस तखते मां बिजली ते गुडने ते तखतेरे सामने अगरे सत दीये बल्लने लवरे थी, इन परमेशरेरी सत आत्मान। 6 ते तैस तखतेरे सामने मन्नां शीशेरो समुन्द्र बिल्लोरेरो जेरोए, ते तखतेरे मज्जाटेते तखतेरे चेवरे पासन जानदारन, जैन केरे अग्रोवं पतरोवं एछ एछीन। 7 पेहिलो जानदार शेरोरो जेरोए, ते दुइयोवं जानदरेरू तुतर बछड़ेरू जेरूए, ते ट्लाएइयों जानदारेरू तुतर मँहेरू जेरू थू, ते चेवरोवं जानदार उडरने बाले उकाबेरो जेरोए। 8 ते चेवरे जानदारां केरे शा शा फंगान, ते चेवरे पासन, अन्तर एछी एछीन; ते रात दिहैडी बगैर आरामे इन जोते रहतन, कि पवित्र, पवित्र, प्रभु परमेशर, सर्वशखतीमान, जै थू, ते जै आए, ते जै एजने बालो ए। 9 जैखन तैना जानदार तैसेरी जै तखते पुड बिशोरोए, ते जै सदा जीतोए, महिमा ते आदर ते शुक्र केरेलो। 10 तैखन चोबही तखतन पुड बिशने बाले तैस कां मथो टेकेले, ते तैस जै सदा जीतोए मथो टेकेले; ते अपना अपना तजां तखतेरे सामने इन जोइतां रखेले। 11 कि हे प्रभु, ते परमेशर, तूए महिमा, ते आदर, ते समर्थरे काबलस; किजोकी तींए सब चीजां बनेई ते तैना तेरी मेरजी सैहीं थी, ते बनेई जेई।

मुहरबन्द किताब ते गबडू

5 ते जै तखते पुड बिशोरो थू, मीं तैसेरे देहिने हथे मां अक किताब लाही, जै अन्तर बेइर लिखोरी थी, ते तै सत मोहरां लेइतां बन्द केरी थी। 2 फिरी मीं अक जोरे बालो फरिशतो लाव जै जोरे सैहीं ई प्रचार केरतो थू कि इस किताबारे खोल्लने ते इसेरी मोहरां टलोडनेरे काबल कौने? 3 ते सुवर्गए मां, ते धेरतली पुड, न धेरतारे बुन कोई तैस किताबी खोल्लने, या तैस पुड नजर केरनेरे काबल न मैल्लो। 4 ते आंव जोरे जोरे सैहीं लेरां देंने लव, किजोकी तैस किताबारे खोल्लनेरे, या तैस पुड नजर केरनेरे काबल कोई न मैल्लो। 5 तैखन तैन बजुर्गन मैरां एके मीं सैहीं जांव, लेरां न दे, तक, यहूदेरे गोत्रेरो तै शेर, जै दाऊदेरे खानदाने मैरांए, तैस किताबी खोल्लनेरे ते तैसी सते मोहरां टलोडनेरे लेई जीतोरोए। 6 ते तैस तखते, ते चेवरे जानदारन ते तैन बजुर्गन मां, मन्ना अक मारोरू गबडू लाव: तैसेरां सत शिनां ते सत एछी थी; इना परमेशरेरी सते आत्मान, जैना सैरी धेरतली पुड भेझोरिन। 7 तैने तैसेरे देहिने हथे सैहीं जै तखते पुड बिशोरो थू, तै किताब नैही, 8 ते जैखन तैन किताब नैही, त ते चेवरे जानदार ते चोबही बजुर्ग तैस गबडेरे सामने झूके; ते

हर केंचरे हथे मां बर्बत ते धूपे सैहीं भरोरे सुनेरे कटोरे थी, इन त पवित्र लोकां केरी प्रार्थनान। 9 त तैना इन नोंवू गीत जौने लागे, कि तू इस किताबी नेने, ते तैसेरी मोहरां खोलनेरे काबलस; किजोकी तीं मेरतां अपने लेव्हे सैहीं हर एकी कुले, बोली, ते लोक, ते जाती मैरां परमेशरेरे लेई लोक धिन्नोरे।

10 ते तैन इशे परमेशरेरे लेई बादशाह ते याजक बनाए; ते तैना जमीनी पुड बादशाही केरतन। 11 ते जैखन मीं हेरू, त तैस तखते ते तैन जानवर ते तैन बजुगाँ केरे चेवरे पासन बडे फरिशतां केरी आवाज शुनी, जैन केरी गीनती लखई करोड़ेई थी। 12 ते तैना जोरे सैहीं जोते थी, कि मरोरू गबडू समर्थ, ते धन, ते ज्ञान, ते शक्ति, ते आदर, ते महिमा, ते शुकरेरे काबले। 13 फिरी मीं सुवर्गए मां, ते धेरतली पुड, ते धेरतलरे बुन, ते समुदरेरी सब चीजाँ, ते सब किछ जैन तैन मांए, इन जोते शुनु, कि जै तखते पुड बिशोरोए, तैसेरू, ते गबडेरू शुक, ते आदर, ते महिमा, ते बादशाही, सदा राए। 14 ते चेवरे जानदारई आमीन जोव, ते बजुगई मथो टेका।

सत मुहोरां खोलनी

6 फिरी मीं लाव, कि गबडे तैन सत मोहरन मैरां अक खोल्ली; ते तैन चेवरे जानदारन मैरां एकेरी गुडनेरी जेरी आवाज शुनी, कि एई। 2 ते मीं नजर की, ते हेरू, अक छितो घोडोए, ते तैसेरो सुवार धनुष घिनतांए: ते तैस अक मुकट दितू, ते तै जौती निसो कि होरी भी जौत हसल केरे।

3 ते जैखन दुइयोवं मोहर खोल्ली, त मीं होरी जानदरे इन जोते शुनु, कि एई। 4 फिरी अक होरो घोडो निस्सो, जै लाल रंगेरो थू: ते तैसेरे सूवारे ई आधीकर दितो, कि धेरतली पुडों मेल सव्हे, ताकि लोक एकी होरी मारन; ते तैस अक बडी तलवार दितो। 5 ते जैखन तैने टलाइव मोहर खोल्ली, त मीं टललाइव जानदरे इन जोते शुनु, कि एई: ते मीं तक्कू, ते हेरा, अक कालो घोडोए; 6 ते मीं तैन चेवरे जानदरन मां अक गल्ल इही जोते शुनो, कि दीनेरो गेवह, ते दीनारेरे टलाई सेर जो, ते तेल, ते दाछोरो रसेरो नुकसान न केरथ।

7 ते जैखन तैने चेरोंव मोहर खोल्ली, त मीं चेरोंव जानदारैरी आवाज इन जोते शुनी, कि एई। 8 ते मीं नजर केरी, ते हेरा, अक हेइदलो घोडोए; तैसेरे सूवारेरू नोंव मौते: ते पताल तैस पत्ती पत्तीए ते तैन धरतारे चेरोंव हिस्से पुड ई अधीकार दितो जेव, कि तलवार, ते काल, ते मरी, ते धेरतलरे जानवराँ केरे जिरीए लोकन मारे।

9 ते जैखन तैने पन्चोव मोहर खोल्ली, त मीं कुरबाण गाह कैरां बुन आत्मा लेही, जैना परमेशरेरे वचनरेरे वजाही सैहीं, ते तैस गुवाहारे वजाही सैहीं जै तैनेई दितोरी थी। 10 ते तैनेई बडे जोरे सैहीं हक देइतां जौव, हे पवित्र, ते सच; तू केइस तगर इशो इन्साफ न केरेलो? ते धेरतलरे रहने बालन सैहीं इशे लेव्हेरो बदलो केइस नहेलो? 11 ते तैन सैभन छितां लिकडों दितो, ते तैन सैहीं जौव, कि थोडे चीरेरे लेई आराम केरा, जौ तगर तुशे संगी दास, ते दूलाह, जैना तुशे जेरे मारे गहनेन, तैन केरी भी गिनती भी पूरी न भोए।

12 ते जैखन शेइओवं मोहर खोल्ली, त मीं हेरू, कि अह बडो भुन्जल आंव; ते दिहडो कमलेरो जेरो भोव, ते चाँदनी पूरी लेव भोई। 13 ते अम्बररे तारे धेरतली डाँ झडे जैन्चरे बडी एँदही सैहीं अंजीरेरे बूटे मैरां कच्चे फल झडतन। 14 ते अम्बर एरू घिशकू, जैन्चरे पटलोवं पलेटोते; ते हर अक पहाड, ते टैपू, अपने अपने ठाराँ घिशको। 15 ते धेरतलरे बादशाह, ते प्रधान, ते सरदार, ते धनी ते समर्थ लोक, ते हर अक दास, ते हर अक आजाद पहाडों कुडन मां, ते शफडन मां छपे। 16 ते पहाडों, ते शफडन सैहीं जौने लाए, कि असन पुड झडा; ते ऐन तैसेरे ऐशी सैहीं जै तखते पुड बिशोरोए ते गबडरे सरकी कैरां छूपा। 17 किजोकी तैन केरे सरकी सैहीं खतरनाक दिहाडी पुजी, हुनी कौन रेई बटते?

इसाएलेरे 1,44,000 लोक

7 इसेरां पत्ती मीं धेरतलरे चेवरे कून्न पुड चेवर फरिशते खडो लाए, ते धेरतारे चेवरे हावान ठेमतां थी ताकि धेरतली, या समुद्र, या कोन्ची बूटे पुड, हावा न चले। 2 फिरी मीं अक फरिशतो जीते परमेशरेरी मोहर घिनतां पूरबेराँ उबरे एइतो लाव; ते तैने चेरे फरिशतन सैहीं जैनेई धेरतलरे ते समुन्दरेरो नुकसान केरनेरे लेई अधीकार दितोरो थू, जोरे सैहीं जौव। 3 जौ

तगर अस अपने परमेशरेरे दासाँ केरे कूपाए पुड मोहर न लाए, तैखन तगर धेरतली ते समुन्द्रे ते बुटन नुकसान न पूजानो। 4 ते जैन पुड मोहर की जेई, मीं तैन केरी गिनती शुनी, कि इस्राएलेरी खानदानेरे गोत्रन मैरां अक लख चुरतैली हजारन पुड मोहर की जेई। 5 यहूदारे गोत्रन मैरां बहरे हजारन पुड मोहर लाई; रुबेनेरे गोत्रे मैरां बहरे हजारन पुड; गादेरे गोत्रे मैरां बहरे हजारन पुड। 6 आशेरेरे गोत्रे मैरां बहरे हजारन पुड; नपताललेरे गोत्रे मैरां बहरे हजारन पुड; मनशिशेरे गोत्रे मैरां बहरे हजारन पुड। 7 शमौनेरे गोत्रे मैरां बहरे हजारन पुड; लेवेरे गोत्रे मैरां बहरे हजारन पुड; इस्सकारेरे गोत्रे मैरां बहरे हजारन पुड। 8 ज़बूलूनेरे गोत्रे मैरां बहरे हजारन पुड; यूसुफेरे गोत्रे मैरां बहरे हजारन पुड मोहर लेई जेई।

अक बडी भीड

9 इसेरां पत्ती मीं नजर की, ते हेरू, हर अक कौम, ते कुल, ते लोक ते बोली मैरां अक बडी भीड, जैस कोई गेनी न थू बटतो छितां लिकडों लेहितां, ते अपने हथन मां खजूरेरी डैलडी घिनतां तखतेरे सामने गबडरे सामनी थी खडी लाही। 10 ते बडे जोरे सैहीं जौती थी, कि मुक्तेरे लेई इशे परमेशरेरू; जै तखते पुड बिशोरोए, ते गबडेरू जय जयकार भोए। 11 ते सारे फरिशते, तैस तखते ते बजुगाँ ते चेवरे जानदार चेवरे पासन खडे लाए, फिरी तै तखतेरे सामने तुतेरे भारे तैस कां पे; ते परमेशरे कां मथो टेकर्ताँ जौव, अमीन। 12 इशे परमेशरेरी स्तुति, ते महिमा, ते ज्ञान, ते शुक ते आदर, ते समर्थ, ते शक्ति सदा बनोरी राए। आमीन।

13 इन गल्लन पुड बजुगन मैरां एके मीं सैहीं जौव; इना छितां लिकडों लेइतां कौन्न? ते कोठाँ आवरेन? 14 मीं तैस सैहीं जौव; हे मालिक, तूए जानतस: तैने मीं सैहीं जौव; इना तैनान, जैना तैस बडे मसीबती मैरां निसारेन; तैनेई अपना लिकडों गबडरे लेव्हे सैहीं भोइतां छितां केरण। 15 ऐलहेरे लेई परमेशरेरे तखतेरे सामनेन, ते तैसेरे मन्दरे मां रात दिहैडी तैसेरी सेवा केरतन; ते जै तखते पुड बिशोरोए, तै तैन पुड अपनां तम्बू रखेलो। 16 ते तैना फिरी दूलाउखारे ते टलाइषोरे न भोल्ह: ते तैन पुड न धुप, न कोई गर्मी पेती। 17 किजोकी गबडू जैन तखतेरे मझाटे, तैन केरी रखवाली केरेलू: ते तैन जिन्दरेरे पैनी कां नेल्हू, ते परमेशर तैन केरे एछी केराँ सब एँखरू पूँछेलो।

सतोंव मोहर ते सोनेरू धूप दान

8 ते जैखन तैने सतोंव मोहर खोल्ली, त सुवर्गए मां आधे घंटे तगर खामोशी राई। 2 ते मीं तैन सते फरिशतन जैना परमेशरेरे सामने खडे थी, लाए, ते तैन सत नडशीगे दिते जे।

3 फिरी एकी होरी फरिशते सुनेरू धूपदान घिनतां आव, ते कुरबाणगाह कां जेव; ते तैस बडो धूप दितो, कि सैभी पवित्र लोकां केरी प्रार्थनान सैहीं साथी तैस सुनेरे वेदी पुड जै तखतेरे सामने चाडे। 4 ते तैस धूपेरो तू पवित्र लोकां केरी प्रार्थनान सैहीं साथी फरिशताँ केरे हथे सैहीं परमेशरेरे सामने पुजो। 5 ते फरिशते धूपदान नेइतां तैस मां कुरबाणगाहरी अग्न भरी, ते धेतली पुड छडी, ते गुडने ते आवाज ते बिजली ते बुन्जल भोने लाए।

सत नडशिनगे

6 ते तैना सते फरिशते जैन कां सत नडशीनगे थी, बजानेरे लेई तियार भोए।

7 पहिले फरिशते नडशिनगां बजाव, ते लेव्हे सैहीं मिलोरी आन; ते अग्न पेइदा भोई, ते धेरतली पुड शारी; ते धेरतली टलाइन मैरां अक हिस्सो फुकोई, ते बुट भी अक तीयाही फुकोए, ते सब नीलो घास भी फुकोव।

8 ते दुइयोवं फरिशते नडशिनगां बजाव, मन्ना अग्नी सैहीं फुकोतू पहाड समुन्दरे मां शारू; ते समुन्द्र अक तीहाई लेव्हे भोव। 9 ते समुन्द्ररो अक तीहाई बनवरे जानवर मेरी जे, ते अक तीहाई जिहाज तुबा भोए।

10 ते टलाइयोवं फरिशते नडशिनगो बजाव, ते अक बडो तारो मसालारो जेरो बलतो थू, सुवर्ग एराँ टलाउटो, ते दरया अक तीहाई पुड, ते पैत्र पुड

पेव | 11 ते तैस तारेरू नोंव नागदोनाए, ते अक तीहाई पैनी नागदोना जेरू ट्लाइटू भोंव, ते बडे मँन्हू तैस पैनेरे ट्लाइटू भोने सैहीं मेरी जे |

12 चैवरोव फरिशते नडशिनगो बजाव, ते दिहाडो अक तीहाई, ते चैदानारी अक तीहाई ते तारां केरी अक तीहाई पुड हलचल पेई, इडी तगर कि तैन केरो अक तीहाई आंधारो भोव ते दीहैडरी एकी तीहैई मां लो न राई, ते तैन्चरे राती मां भी |

13 ते जैखन मीं हेरू, त अम्बरेरे मझाटे अक उकाब उडरते ते जोरे सैहीं इन जोते शुनु, कि तैन ट्लाई फरिशतां केरे नडशिनगोरे आवाजारे वजाही सैहीं जैना बजाने हेजू बाकीन, धरतली रहने बालन पुड हाय! हाय!हाय!

9 ते जैखन पन्चोव फरिशते नडशिनगो बजाव, त मीं सुवर्गएरां धरतली पुड अक तारो झडतो लाव, ते तैस अथाह कुण्डेरी चाबी दिती | 2 ते तैने अथाह कुण्ड खोल्लू, ते कुण्डे मँरां एकी भेटारो जेरो तू निसो, ते कुण्डेरे तूए सैहीं दिहाडो ते हवा आंधरी भोई | 3 ते तैस तूए मँरां धरतली पुड टिटॉं निसां, ते तैन धरतलरे बिचू केरी जेरी ताकत दिती जेई | 4 ते तैन सैहीं जॉव, कि न धरतलरे घासे, न कौन्ची नीलारे, न कौन्ची बुटे नुकसान पुजान, सिर्फ तैन मँन्हन जैन केरे कूपाए पुड परमेशरेरी मोहर नैई | 5 ते तैन मारनेरे लेई नैई, पण पन्च महीननन तगर लोकन दुःख देंनेरो अधिकार दितो: ते तैन केरो दुःख एरो थू, जैन्चरे बिचू केरे डस मारने सैहीं मैत्र भोते | 6 तैन दिहाडन मँन्हू मौत तोपेले, ते न मैलेली; ते मरनेरी कोशीश केरेले, ते मौत तैन कैरां नशेली | 7 ते तैन टिटॉं केरी शकल तैन घोडॉं केरी जेरी थी, ते तैन केरे दोगन पुड मन्ना सुनेरां मुकटां थी; ते तैन कैरां आशी मँन्हू कैरां जेरां थी | 8 ते तैन केरे बाल कौन्शां केरे जेरे, ते दंत शेरां केरे जेरे थी | 9 ते तैन लूहेरी जेरी झीलम लवरी थी, ते तैनेरे फंगां केरी आवाज एरही थी जैन्चरे रथां केरी ते लडैई मां दौडते बडे घोडॉं केरी | 10 ते तैन कैरां पूछडॉं बिचू केरां जेरां थी, ते तैन मां डस थू, ते तैन पन्च महीनन तगर मँन्हन दुःख पुजांनेरी ताकत थी, ते तैन केरे पूछडन मां थी | 11 अथाह कुण्डेरे दूते तैन पुड बादशाह थू, तैसेरू नोंव इब्रानी मां अबधोन, ते यूनैनी मां अपुल्लहोन ए |

12 पेहिली आफत बीती जेई, हेरा इटां पत्ती दुइयोव आफत भोने बालीए |

13 ते जैखन शेडोव फरिशते नडशिनगो बजाव ते जै कुरबाणगाह परमेशरेरे सामने, तैसेरे शिनगन मँरां एरी आबाज शुनी | 14 मन्ना शेडोव फरिशते जैस कां नडशिनगो थू जौने लवरोए कि तैन चैवर फरिशतन जैना बडे दरया ए फुराते कां बन्दरोए, खोल्लू | 15 ते तैना चैवेरे दूत खोल्लोरे थी जैना तैस घेडी, ते दिहाडे, ते महीने, ते सालेरे लेई मँन्हू केरे अक तीहाई मारने सैहीं कीयोरे थी | 16 ते फेवजी केरे सवारां केरी गीनती बी करोड थी शुनी | 17 ते मीं इस दरशने मां घोडे ते तैन केरे एरे सवार लेइहोए, जैन केरी झिल्लमा अग, ते सुनबल, ते घन्धकेरी जेरी थी, ते तैन घोडॉं केरी करोडी शेरां केरे करोडी केरी जेरी थी: ते तैन केरे ऐशेरां अग, ते तू ते घन्धक निसती थी | 18 इन ट्लाई आफतन मँरां; मतलब अग, ते तू, ते घन्धके सैहीं जैसेरे ऐशी मँरां निसती थी; मँन्हू केरे ट्लाई हीस्से मेरी जे | 19 किजोकी तैन घोडॉं केरी ताकत तैन केरे ऐशी, ते तैन केरे पुछडॉं सप्पां केरां जेरां थी, ते तैन केरे पूछडॉं केरी करोडी थी, ते तैन सैहीं तैना दुःख भी पुजाते थी | 20 ते होरे मँन्हन जैना तैन आफतन सैहीं न थी मरें, ते अपने हथां केरे कम्मन सैहीं मन न फीराव, दुष्टातमां केरी, ते सुन्ने, ते पितल, ते घोड, ते कैडू केरी मूरतन केरी पूजा न केरन, जैना न लहन, न शुन्न, न चेली बटन | 21 ते जैना खून, ते टूनो, ते जनाह, ते घोरी, तैनेई कीयोरी थी, तैन कैरां मन न फीराव |

फरिशते ते निकडी किताब

10 फिरी मीं अक होरो ताकतबर फरिशतो बिदलार पलेटतां सुवर्ग एरां लाव, तैसेरे दोगे पुड धुनक थी: ते तैसेरू आशी दिहाडेरू जेरू ते तैसेरे पाव अगारे खमबेरे जेरे थी | 2 ते तैसेरे हथे मां अक निकडी किताब खोलोरी थी; तैने अपनों देहिनी पाव समुन्द्रे पुड रखो, ते खिशडो धरतली पुड रखो | 3 ते बडे जोरे सैहीं तैन चिन्ड मारी, जैन्चरे शेर गर्जते; ते जैखन तैन जोरे सैहीं चीन्ड मारी गर्जने सैहीं आवाज शुनोई | 4 ते जैखन सतोव गर्जनेरी आवाज शुनोई, त आंव लिखने बालो थू, ते मीं सुवर्गएरां ई आवाज शुनी, कि जैना गल्लां गरजनेरी शूनोरिन, तैन छेपारी रख, ते न लिख | 5 ते जै

फरिशतो मीं समुन्द्रे ते धरतली पुड खडो लावरो थू: तैने अपनों देहिनी हथ सुवर्गरे पासे उठव | 6 ते जै सदा ज्रीतो रालो, ते जैने सुवर्ग ते जैन चिछ तैस माए, ते धरतली ते जैन किछ तैस पुडे, ते समुन्द्रे ते जैन किछ तैस माए बनारूए, तैसेरी कसम खेइतां जॉव, हुनी त हारी ठाड न भोल्ही | 7 बल्कि सते सुवर्ग दूतां केरे आवाज देंनेरे दिहाडन मां जैखन तैन नडशिनगो बजाने बाले भोले, त परमेशरेरो छपोरे, मतलब तैस सूसमाचारेरे मुताबिक जै तैन अपने दास नेबन दितो पूरो भोल्हो | 8 ते जैस आवाज केरने बाले सुवर्गएरां जोते शुनोरो थू, ते फिरी मीं सैहीं साथी गल्लां केरने लाव; कि गा, जै फरिशतो समुन्द्रे ते धरतली पुड खडोए, तैसेरे हथे मँरां खुलोरी किताब नैई | 9 ते मीं फरिशते कां गेइतां जॉव, ई निकडी किताब मीं दे; ते तैने मीं सैहीं जॉव खा, ते ई तेरे पेटे ट्लाइटू ती न केरेली, पण तेरे ऐशी मैछी कैरां भी मिठी लगेली | 10 ते मीं ते निकडी किताब तैस फरिशतेरे कैरां नेइतां खाई, ते मेरे ऐशी मां मैछेरी जेरी मिठी लगी, पण जैखन मीं ते खाई, ते तैस सैहीं मेरू पेट ट्लाइटू भोंव | 11 तैखन मीं सैहीं इन जॉव, कि तीं बडे लोकन, ते कौमन, ते बोलन, ते बादशाहन पुड, फिरी भविष्वाणी केरनी भोल्ही |

दुइये गवाह

11 ते मीं सोटेरू जेरू अक कैडोव दितू, ते केन्चे जॉव; उठ परमेशरेरे मन्दरे ते कुरबाणगाह, ते तैस मां भजन केरने बालन नाप | 2 ते मन्दरेरे बेइर अंगने शार; तैस न नाप, किजोकी तैन होरी कोमां केरे लेई दितोरूए, ते तै पवित्र नगरे बतैल्ही महीनन तगर तुबा केरे | 3 ते आंव अपने दुइये गुवाहन ई आधीकार देहिलो, कि टाट पलेटतां अक हजार दुइय शौ शत दिहाडन तगर भविष्वाणी केरन |

4 इन तैना जैतूनेरे बूटन, ते दुइय दीवटन जैना धरतलरे पभुरे सामने खडे रहतन | 5 ते अगर कोई तैन नुकसान पुजानो चाहे, त तैन केरे ऐशी मँरां अग निसतां तैन केरे दुशमन भस्म केरतीए, ते अगर कोई तैन नुकसान पुजानो चाहे, त जरूर इस तरीके सैहीं मारे गाले | 6 तैन अधीकारे, कि अम्बरे बन्द केरन, कि तैन केरे भविष्पदूवैनेरे दिहाडन मां झैडी न भोए, ते तैन सैभी पैनी पुड अधीकारे, कि तैस लेव्ह बनान, ते जैखन चान धरतली पुड हर किसमेरी आफत आन्न | 7 ते जैखन तैना अपनी गुवाही देले, त तैए हेवान जै अथाह कुण्डे मँरां निसेलो, तैन सैहीं लेडतां तैन ज्रीतेलो ते मारेलो | 8 ते तैन केरी लाशां तैस बडे नगरेरे चौके मां रैली, जैन आत्मिक तोरे पुड सदोम ते मिसरे, जैडी तैन केरो प्रभु भी सलीबी पुड चाडोरो थू | 9 ते सब लोकेई, ते कुलेई, ते बोली, ते कौमन मँरां लोक तैन केरी लाशां सडे ट्लाई दिहाडन तगर हेरते राले, ते तैन केरी लाशन कबरी मां रखने न देले | 10 ते धरतलरे रहने बाले, तैन केरे मारने सैहीं खुश ते मघन भोल्हे, ते तैन केरे हेरने बालन पुड बडो डर भोल्हो | 11 ते सडे ट्लाई दिहैडना पत्ती परमेशरेरे तरफां जिन्दगरी आत्मा तैस मां जेई, ते तै अपने पवन पुड खडो भोव | 12 ते तैन स्वर्गएरां अक बडी आवाज शुनोई, कि इडी बा एई; इन शुन्तां बिदलारी पुड सूवार भोइतां अपने दुशमन्न हेरते हेरते सुवर्ग पुड चैडी जेव | 13 फिरी तैसे घेडी अक बडो भुन्जल आव, ते नगरेरो दशोव हिंसो झडो; ते तैस भुन्जले सैहीं सत हजा मँन्हू मरे, ते होरे डरे, ते स्वर्गरे परमेशरेरी महिमा केरी |

14 दुइयोव आफत भीती जेई, हेरा, ट्लाइयोव आफत एजने बालीए |

सातोव नडशिनगो

15 ते जैखन सतोव दूते नडशिनगो बजाव, त स्वर्ग मँरां इस बारेरी बडी बडी आवाज भोने लाई कि दुनयारी बादशाही इशे प्रभुएरीए, ते तैसेरे मसीहेरू भोई जेव | 16 ते तै सदा बादशाही केरेलो, ते चोव्ही बजुर्ग जैना परमेशरेरे सामने अपने अपने तखते पुड बिशोरे थी, परमेशरे कां मथो टेकतां | 17 इन जौने लाए, कि हे सर्वशखतीमान प्रभु परमेशर, जै आए, ते जै थू, अस तेरू शुक्र केरतम, कि तू अपने बडे बडन कम्मन मां बादशाही की | 18 ते होरी कोमेई क्रोध कीयो, ते तेरे प्रकोप आव ते तै बेलो एजी अवरोए, मर्रां केरी आदालत की गाए, ते तेरे दास नेबी ते पवित्र लोकन ते तैन निकडे बडन जैना तेरे नोंवें कैरां डरतन, बदलो दितो गहलो, ते धरतरे बिगाडने बाले नाश कीये गहन |

19 ते परमेशरू जैन मन्दर स्वर्ग मांए, तैन खोलू जेव, ते तैसेरे मन्दरे मां सन्दूक लेइहोव, ते बिजली ते आवाज ते गुडने ते भुन्जल भोए, ते बडी बडी आन पेई।

कौन्श ते अजगर

12 फिरी स्वर्ग मां अक बडो निशान दितो, मतलब अक कौन्श जैसां दिहाडो पलैटोरो थू, ते चाँदनी तैसेरे पवन हठ थी, ते तैसेरे दोगे पुड बहरे तारां केरु मुकट थू। 2 ते तै दो जीती भोई, ते चिन्डां मारती थी; किजोकी तैस बचो ज्ञानेरी तकालीफ थी। 3 ते अक होरो निशान स्वर्ग मां लेइहोव, ते हेरा; अक बडो लाल अंजीर थू जैसेरी सत करोडी ते दश शिनां थी, ते तैसेरे दोगन पुड सत राज मुकट थी। 4 ते तैसेरे पुछडे अम्बरे तारां केरी अक तीहाई धरतली पुड आनी, ते तै अजगर तैस कौन्शरे सामने जै दोजीती थी, खडो भोव, कि जैखन तै बचो जाए तैसेरे बच्चे खाए। 5 ते तैसां मडू जाऊँ जैन लूहेरे डंडे सैहीं कौमन पुड हकोमत केरेने पुड थू। ते तैसेरो बचो परमेशरूरे तखते तगर पुजव। 6 ते ई कौन्श जंले जो नशथी, जैडी परमेशरूरे तरफाँ तैसेरे लेई अक ठार तियार कोयोरी थी, कि तैडी तै अक हजार दुइय शओ शट दिहाडन तगर पाली गाए।

7 फिरी स्वर्ग पुड लडाई भोई, मीकाईल ते तैसेरे फरिशते अजगरे सैहीं लडने निस्से, ते अजगर ते तैसेरे दूतन सैहीं लडे। 8 पण जीती न बटे, ते स्वर्ग मां तैन केरे लेई फिरी ठार न राई। 9 ते तै बडो अजगर मतलब पूरानो सप, जै इब्लीस ते शैताने, ते सारे संसारो भटकाने बालोए, धरतलीपु ड झडो; ते तैसेरे दूत तैस सैहीं साथी झडे। 10 फिरी मीं स्वर्गों ई बडो शब्द एइतो शुनो, कि हुनी परमेशरूरी मुक्ति, ते शक्ति, ते बादशाई, ते तैसेरे मसीहेरो आधीकार बांदो भोव; किजोकी इशे दूलाहन दोष लाने बालो, जै रात दिहैडी इशे परमेशरूरे सामने तैन पुड दोष लातो थू। 11 ते तै गबडेर लेव्हेरे वजाही सैहीं, ते अपने गुवाही एरे वचनेरे वजाही सैहीं, तैस पुड जीते, ते तैनेई अपने प्राण ट्लारे न समझे, इडी तगर की मौत भी झैली। 12 ऐलहेरे लेई, हे आसमानव, ते तैन मां रहने बालव मगन भोथ; हे धरतली, ते समुन्द्र, तुसन पुड अफसोस! किजोकी शैतान बडे क्रोधे सैहीं तुस्न कां एजने बालोए, किजोकी तै जानते, कि तैसेरो थोडो बेलो रवरोए।

13 ते जैखन अजगरे हेरु, कि आंव धरतली पुड शारोई, त तैस कौन्शी जै मडू जाती थी, सताई। 14 ते तैस कौन्शी बडे उकाबेरां फंगां दितां, कि सपेकरां उडरतां जंगले मां तैस ठैरी पुजी, जैडी तै एकी वखते, ते वखतन, ते अधे वखते तगर पाली गाहे। 15 ते सप्पे तैस कौन्शी पत्ती अपने ऐशी सैहीं दरयारु जेरु पानी शारु, कि तैस इस दरयाए सैहीं रूडए। 16 पण धरतलां तैस कौन्शरी मद्द की, ते अपनू आशी खोल्लतां तैस दरयाए जै अजगरे अपने ऐशी सैहीं रूडारी थी, पीय। 17 ते अजगर कौन्शी जो सेरकोव, ते तैसेरी बाकी आवलाध जै परमेशरूरे हुकमन मन्नतीए, ते यीशु एरी गुवाही देने पुड मजबूते, लडनी जेव। 18 ते तै समुन्द्रे रेती पुड खडो भोव।

दूइय जानदार

13 ते मीं अक जनवर समुन्द्रे मेरां निसतो लाव, जैसेरां दश शिनगां ते सत करोडी थी; तैने शिन्गन पुड दश राजमुकट ते तैसेरे दोगन पुड परमेशरूरी निन्दारां नोवां लिखोरु थीयां। 2 ते जै हेवान मीं लाव, तै डलागेरो जेरो थू; ते तैसेरे पाव इछेरे जेरे थी; ते तैने अजगरे अपनी शक्ति, ते अपने तखते, ते बडो अधीकार तैस दितो। 3 ते मीं तैसेरे करोडन मेरां एकी पुड अक एरो जखम हेरो, मन्ना तै मरने पुडे; फिरी तैसेरो प्राण तैस जखमे केरां रोडो भोव, ते सारे धरतलरे लोक तैस हेवाने पत्ती हेरान भोइतां चले। 4 ते तैनेई अजगरेरी पूजा की, किजोकी तैने हेवाने अपनां अधीकार दितोरो थू ते इन जोइतां कि, इस हेवानेरो जेरो कौने।

5 कौन तैस सैहीं लेडी बटते ते बडी गल्ल जौने; ते निन्दा केरनेरे लेई तैने तैस अक आशी दितू, ते तैस बेतैली महीन तगर कम्म केरनेरो अधिकार दितो जेव। 6 ते तैने परमेशरूरी निन्दा केरनेरे लेई आशी खोल्ल, कि तैसेरे नोवें, ते तैसेरे तम्बू मतलब सुवर्गे रहने बालां केरी निन्दा केरे। 7 ते तैस ई अधीकार दितो जेव, कि पवित्र लोकन सैहीं लडे, ते तैन केरां जीते, ते तैस

सैहीं हर कुल, ते लोक, ते बोली, ते कोमी पुड अधीकार दितो जेव। 8 ते धरतलरे तैना सब रहने बाले जैन केरां नोवां तैस गबडेर जिन्दगरे किताबी मां नैइ लिखोरॉ, जैना संसार बनानेरे बले केरां मारे जे तैस हेवानेरी पूजा केरेले। 9 जैन केरे कन भोण तैना शुन्न।

10 जैना कैद भोनेन, तैना कैद भोल्हे, जैना तलवारी सैहीं मरेलो, जरूरीए ते तलवारी सैहीं मरेलो, पवित्र लोकां केरी सबर ते विश्वास इसे मां ए।

11 फिरी मीं अक होरो हेवान धरतली पुडॉ निसतो लाव, तैसेरे गबडेर जेरां दुइय शिनगां थी, ते तै अजगरेरो जेरो जौतो थू। 12 ते ई तैस पेहिले हेवानेरो सारो अधीकार तैसेरे सामने कम्मे मां आनतो थू, ते धरतली ते तैसेरे सब रहने बालन सैहीं तैस पेहिले हेवानेरो जखम ठीक भोवरो थू, पूजा केरतो थू। 13 ते तै बडे बडे निशान हीरातो थू, इडी तगर कि मँहू केरे सामने स्वर्गों धरतली पुड अग भेइतो थू। 14 ते तैन निशाना केरे वजाही सैहीं जैना तैस हेवानेरे सामने हिरानेरो अधीकार तैस दितोरो थू, कि धरतलरे रहने बालन सैहीं जौतो थू, कि जैस हेवाने तलवार लगेरी थी, तै जीतो भोवरोए, तैसेरी मूती बनाथ। 15 ते तैस हेवानेरी मूरती मां आत्मा छडनेरो अधीकार दितोरो थू; ते जेतरे लोक तैस हेवानेरी पूजा केरन, तैन माराए। 16 ते तैन निकडे, बडे, दवलतमंद, गरीब, आजाद, गुलाम सब देहिने हथे या तैन केरे कुपाए पुड अक अक मोहर लाई। 17 कि तैसेरे इलावा जैस पुड छाप मतलब तैस हेवानेरु नोव या तैस नोवेरो अंक भोए, ते कोई लेन देन न केरी बटे। 18 ज्ञान इसे मां ए, जैस अक भोए, तै इस हेवानेरो अंक जमा केरे, किजोकी मँहेरो अंके, ते तैसेरो अंक षासौ छटे।

गबडू ते तैसेरे लोक

14 फिरी मीं नजर की, ते लाव, तैन गबडू सीय्योन पहाडे पुड खडू, ते तैस सैहीं साथी अक लख चुरतैली हजार मँहून, जैन केरे कुपाए पुड तैसेरु ते तैसेरे बाजेरु नोव लिखोरुए। 2 ते स्वर्गों एरी आवाज शुनोई, जै बडे पैनेरी ते बडे गुडनेरी जेरी आवाज थी, ते जै आवाज मीं शुनी; तै एरी; मन्ना बरबत बाजाने बालो बजातो भोए। 3 ते तै तखतेरे सामने ते चेवरे जानदारन ते बजुरां केरे सामने मन्ना, इन नोवू गीत जौने लवरे थी, ते तैन अक लख चुरतैली हजार मँहू केरे इलावा धरतली पीडॉ घिनोरे थी, कोई तैन केरे इलावा गीत न शिखी बटतो थू। 4 इना तैन्न, जैना कौन्शन सैहीं गंदे नैइ भोवरे, पण कुवारेन: इना तैन्न, जैना गबडे पत्ती चलतन, इना त परमेशरूरे लेई पेहिले फल भोनेरे लेई मँहन मेरां घिने जेवरेन। 5 ते तैन केरे ऐशरां कधी झूठ न निसोरु, ते बे इलजामन।

ट्लाई फरिशते

6 फिरी मीं अक होरो फरिशतो अम्ब्रेरे मझाटे उडरतो लाव जैस कां धरतली पुड रहने बालां केरी हर अक कौम ते कुल, ते बोली, ते लोकन शुनानेरे लेई सनातन सूसमाचार थू। 7 ते तैने बडे ज़ोरे सैहीं जौव, परमेशरे केरां डरा; ते तैसेरी बडयाई केरा; किजोकी तैसेरो इन्साफ केरनेरो बेलो पुजोरोए, ते तैरु भजन केरा, जैने स्वर्ग ते धरतली ते समुन्द्र ते पैनेरे नाग बनवरेन। 8 फिरी इसेरां पत्ती अक होरो फरिशतो इन जौतो आव, कि झडू, तैन बाबूल नगर झडू जैने अपने जनाहेरे गेंदी श्राबी सैहीं कौमन पीयाई।

9 फिरी इनकेरां पत्ती अक होरो फरिशतो बडे आवाजी सैहीं इन जौतो आव, कि जै कोई इस हेवाने ते तैसेरी मूरतरी पूजा केरे, ते अपने कुपाए या अपने हथे पुड तैसेरी छाप लाए। 10 त तै परमेशरूरो परकोपेरी तै खालस मैह जै तैसेरे सरकारे कटोरे मां छडोरीए, पीलो ते पवित्र फरिशतां केरे सामने, ते गबडेर सामने अग ते गन्धकेरे दुखे मां छडेलो। 11 ते तैन केरे दुखेरो तू सदा उठतो रहलो, ते जै तैस हेवाने ते तैसेरे मूरतरी पूजा केरते, ते जै तैसेरे नोवेरी छाप नेते, तैन रात दिहैडी चैन न मैलेली।

12 पवित्र लोकां केरु सबर इसे मांए, जै परमेशरूरे हुकमन मन्नते, ते यीशु पुड विश्वास रखतन।

13 ते मीं स्वर्गों ई आवाज शुनी, कि लिख; जैना मुडदे प्रभु मां मरतन, तैना मुबारकन, आत्मा जौते, हां किजोकी तैना अपने मेहनती केरां आराम हसल केरेले, ते तैन केरां कम्मां तैन सैहीं साथी भोतन।

कटाई

14 ते मीं नज़र की, ते हेरु, अक उजली बिदलारे, ते तैस बिदलारी पुड़ मँहेरु मड्डेरो ज़ेरो कोई बिशोरोए, जैसरे दोगे पुड़ सुनेरु मुकट ते हथे मां तिखी डलातीए। 15 फिरी अक होरो फरिशते मन्दरे मँस निसतां, तैस सैहीं ज़ै बिदलारी पुड़ बिशोरो थू, बडे ज़ोरे सैहीं ज़ाँव, कि अपनी डलाती च़ल्ला ते किजोकी कटनेरो बेलो आवरोए। 16 ते ज़ै बिदलारी पुड़ बिशोरो थू, तैने धेरतली पुड़ अपनी डलाती लाई, ते धेरतलरी फसल केटोई।

17 फिरी एकी होरो फरिशतो तैस मन्दरे मँसो, ज़ै स्वर्ग मांए, ते तैस कां भी तिखी डलाती थी। 18 फिरी एकी होरे फिशते ज़ैस अग्गी पुड़ आधीकार थू, कुरबैनारे ठैरारां निसो, ते ज़ैस कां तिखी डलाती थी, तैस सैहीं ज़ोरे सैहीं ज़ाँव; अपने तिखे डलाएइती लेइतां धेरतलरी दाछ कटी; किजोकी तैसेरी दाछ पकोरीए। 19 ते तैस फरिशते धेरतली पुड़ अपनी डलाती रखी, ते धेरतलरे दाछारे फल केटतां, अपने परमेशरे परकूपेरे बडे रसेरे कुण्ड मां छडी। 20 ते नगरेरे बेइर तैस रसेरे कुण्डे मां दाछ ड़लाएन्ची, ते रस कुण्डे मँस एतरो लेव्ह निसो कि घोड़ां केरे लगामी तगर मुजो, ते शौ कोस तगर रुड़ो।

आखरी विपेतन सैहीं साथी फरिशते

15 फिरी मीं स्वर्ग मां अक बडो ते अडंगो निशान लाव, मतलब सत फरिशते ज़ैन कां सते आखरी आफतां थी, किजोकी तैन केरे भोने पुड़ परमेशरेरो परकोपेरो अखरे।

2 ते मीं अग्गी सैहीं मिलोरोए शींशेलो एरो ज़ेरो समुन्द्र लाव, ते ज़ै तैस हेवाने पुड़, ते तैसेरी मूरती पुड़, ते तैसेरे नोवेरो अंके पुड़ ज़ींतोरो थू, तैन तैस शीशेरे समुन्द्रे नेडे परमेशरेरे बरबे घिनतां खडे लाए। 3 ते तै परमेशरेरे दास मूसेरु गीत, ते गबडेरु गीत ज़ोते थी, कि हे सर्वशखमान प्रभु परमेशर, तेरां कम्मां, बडों बडन, हे युगे युगेरी बादशाही, तेरी चाल ठीक ते सचीए। 4 हे प्रभु, कौन तीं केरां डरेलो ते तेरे नोवेरी महिमा न केरेलो? किजोकी तू सिर्फ तू ए पवित्रस, ते सैरी कौमां तीं कां एइतां तेरे सामने मथो टेकेली, किजोकी तेरे इन्साफेरु कम्म बांदू भोवरुए।

5 ते इटां पत्ती मीं लाव, कि स्वर्ग मां गुवैईअरो तम्बू खोल्लो जेव। 6 ते तैना सत्ते फरिशते ज़ैन कां सत्ते आफतां थी, साफ ते चमकती मणि लेइतां छैती पुड़ सुनेरो कपडो बेंदधतां मन्दरे मँसो निस्सो। 7 ते तैन च़ेवरे जानदरन मँस एके सत्ते फरिशतन परमेशरेरे, ज़ै सदा ज़ींतोए, प्रकोपे सैहीं भरोरे सत सुनोरे कटोरे दिते। 8 ते परमेशरेरी महिमा, ते तैसेरे समर्थेरे वजाही सैहीं मन्दर तूए सैहीं भरोव ते ज़ैखन तगर तैन सत्ते फरिशतेई सते आफतां खतम केरी, तैखन तगर कोई मन्दरे मां न गेई बटे।

परमेशरे सरकारे सत कटोरे

16 फिरी मीं मन्दरे मां कोई ज़ोरे सैहीं तैन सत फरिशतन सैहीं जोतो शुनो कि गाथ, परमेशरेरे परकोपेरे सते कटोरे धेरतली पुड़ उलटाथ।

2 ते पेहिले गेहितां अपनों कटोरे धेरतली पुड़ उलटव। ते तैन मँहू केरे ज़ैन पुड़ हेवानेरी छाप थी, ते ज़ैना तैसेरी मूरतरी पूजा केरते थी, एकी किसमेरो बुरो ते दुःख देंने बालो फोड़ो निस्सो।

3 ते दुइयोवे अपनों कटोरो समुन्दरे पुड़ उलटव, ते तै फटरां केरे लेव्हरो ज़ेरो बनो, ते समुन्दरे मां हर कोई जानदार मरो।

4 ते ट़लाइयोवे अपनों कटोरो दरयात्र, ते पैनेरे नागन पुड़ उलटव, ते तै लेव्ह बन्नो। 5 ते मीं पैनेरे फरिशते केरां इन ज़ोते शुनु, कि हे पवित्र, ज़ै आए, ते ज़ै थू, तू इन्साफ केरने बालोस ते तीं ई इन्साफ कीयो।

6 किजोकी तैनेई पवित्र लोकन, ते नेबी केरो लेव्ह बगावरो थू, ते तीं तैन लेव्ह पीयोव; किजोकी तैना इस काबलन। 7 फिरी मीं कुरबाण गाह केरां ई आवाज़ शुनी, कि हां सर्वशखतिमान प्रभु परमेशर, तेरे फेसले ठीक ते सचेन।

8 ते च़ेवरोंवे अपनों कटोरो दिहाड़े पुड़ उलटव, ते तैस मँहन अग्गी सैहीं फुकनेरो अधीकार दितो जेव। 9 ते मँहू बडे सेके सैहीं फुकोए, ते परमेशरेरे

नोवेरी ज़ैस इन आफतन पुड़ आधीकारे, निन्दा की ते तैसेरी महिमा केरनेरे लेई मन न फिरव।

10 ते पंचोवें अपनों कटोरो तैस हेवानेरे तखते पुड़ उलटव ते तैसेरी बेंदशाही पुड़ आंध्ररु भोवं; ते लोक दुखे सैहीं मरे ते अपनी अपनी ज़िब चापने लाए। 11 ते अपने दुखे ते फोड़ां केरे वजाही सैहीं स्वर्गेरे परमेशरेरी निन्दा की; ते अपने अपने कम्मन सैहीं मन न फिरव।

12 ते शेइयोव फरिशते अपनो कटोरो बडे दरया फुराते पुड़ उलटव ते तैसेरु पानी शुकी जेव कि पूर्वरे पासेरे बादशाहां केरे लेई बत तियार भोई। 13 ते मीं तैस अजगरेरे ऐशी सैहीं, ते तैस हेवानेरे ऐशी सैहीं ते तैस नेबेरे ऐशी मँस ट़लाई दुष्ट आत्मान भी मँहू केरे रूपे मां निस्ते लाए। 14 ई निशान हिराने बाली दुष्ट आत्माए, ज़ै सारे संसारेरे बादशान केरां निसतां ऐलहेरे लेई गातीए, कि तैन सर्वशखतीमान परमेशर केरां बडे दिहैडरे केरे लेई अकोठे केरन। 15 हेर, आंव च़ोरेरो ज़ेरो एजताई; मुबारिके तै, ज़ै बीड़ो रहते, ते अपने लिकडन सुमालते, कि नग्गो न फिरे, ते लोक तैसेरु नग्गु पण न लान। 16 ते तैनेई तैना तैस ठैरी अकोठे कीये, ज़ै इबरानी मां हर-मगिदोने।

17 ते सतोव ए अपनों कटोरो हवाई पुड़ उलटव, ते मन्दरेरे तखते पुड़ां ई बडी आवाज़ शुनोई, कि भोई जेव। 18 फिरी बिजली, ते आवाज़, ते गुड़ने, ते अक एतरो बडो भुन्जल भोव, कि ज़ैसैरे मँहू इस धेरतलीपु ड पैइदा भोवरेन, तेइसेरो अज तगर एरो भुन्जल कधी नैइ भोवरो। 19 ते तैस बडे नगरेरे ट़लाई टुकडे भोए, ते कौमां कौमां केरे लोक केरे नगर झडे, ते बडे बाबुलेरी याद परमेशरे कान भोई, कि तै अपने क्रोधेरी मां तैस पीयाई। 20 ते हर अक टैपू अपनी ठैरारां घिशको; ते पहाड़ां केरो पत्तो न लग्गो। 21 ते अन्ब्रेरां मँहन पुड़ मन मन अहन पेई, ते ऐलहेरे लेई कि ई आफत बडी भारी थी, लोकेइं आनारी आफतरे वजाही सैहीं परमेशरेरी निन्दा की।

बडी वेशया

17 ते ज़ैन सत फरिशतन कां तैना सत कटोरे थी, तैन मँस एइतां एके मीं सैहीं ज़ाँव कि इरां ई, आंव तीं तैस बडे वेशयारी सज़ा हराताई, ज़ै बडे पैन्न पुड़ बिशोरीए। 2 ज़ैस सैहीं धेरतलरे बादशाहेइ ज़नाह कीयो, ते धेरतली पुड़ रहने बाले तैसेरे ज़नाहेरे शराबी सैहीं मसत भोवरे थी। 3 तैखन तैना आंव आत्मां मां जंगले मां घिनतां जेव, ते मीं किरिमजी हेवाने पुड़ ज़ै निन्दारे नोवन सैहीं छापरो थू, ते ज़ैसेरी सत करोडी ते दश शिंगां थी, अक कौन्श बिशोरी लाई। 4 ई कौन्श बेंजनी, ते किरिमजी, लिकडां लाती थी, ते सुनेरे ते कीमती मेनी ते मोतन सैहीं सज़ोरी थी, ते तैस सैहीं साथी, ते तैसेरे हथे मां अक सुनेरो कटोरो थू ज़ै गेंदी चीज़न सैहीं तैस ज़नाहेरी गेंगी चीज़न सैहीं भरो थू। 5 ते तैसेरे कुपाए पुड़ इन नोव लिखोरु थू, भेद-बडो धेरतलरी वेशयान ते गेंदी चीज़ां केरी अम्मा। 6 ते मीं तै कौन्श पवित्र लोकां केरो लेव्ह ते यीशु एरे गुवाहां केरो व्ह पीने सैहीं मसत लेइतां हेरु ते तैस लेइतां हेरान भोव।

7 तैने फरिशते मीं ज़ाँव; तू किजो हेरान भोव? आंव इस कौन्शी, ते तैस हेवानेरो, ज़ैस पुड़ तै सुवारे, ते ज़ैसेरी सत करोडी ते दश शिनगन, तीं सैहीं भेद जोताई। 8 ज़ै हेवान तीं लाव, ई पेहिलो थू, पण हुनी न भोई बटे, ते अथाह कुंडेरां निसतां विनाशे मां जेव, ते धेरतलरे रहने बाले ज़ैन केरां नोवां संसार बनानेरे बले जिन्दगरे किताबी मां लिखोरां नैइ, इस हेवानेरी ई हालत हेरतां, कि पेहिली थी, ते हुनी नैइ; ते फिरी एजेलो, हेरान भोल्हो। 9 तैस अकलारे लेई ज़ैस मां ज़ान ए, ई ए मोकोए, तैना सत पहाड़न, ज़ैन पुड़ तै कौन्श बिशोरीए। 10 ते तैना सत बादशाह भी आन, पंच्व त भोए, ते अक हेजू ए; ते अक हेजू नैइ, ते ज़ैखन एजेलो, त किजो च़िरे तगर तैसेरु भी जरूरीए। 11 ते ज़ै हेवान पेहिलो थू, ते हुना नैइ, ते एपू अठोवें; ते तैन सत्तन पैइदा भोव, ते विनाश मां जेव। 12 ते ज़ैना दश शिनगां तीं हेरां तैना दश बादशान; ज़ैनेइ हेजू तगर बादशाही हसल नैइ केरी; पण तैस हेवाने सेही साथी एकी घेडरे लेई बादशां केरे लेई आधीकार हासल केरो। 13 इना सब अक मन भोल्हे, ते तैना अपने अपने शक्ति ते अधीकार तैस हेवाने देले। 14 इना गबडे सैहीं लड़ाले, ते गबडू तैन पुड़ ज़ीत हसल केरेलू; किजोकी तै बादशां केरो

बादशा: ते जैना कुजावरेन, ते चुनोरेन, ते विश्वासी तैस सैहीं साथीन, तैना भी जीतेले।

15 फिरी तैने मीं सैहीं जोंव, कि जैन पानी तीं लाव, जैन पुड तै वेश्या बिशोरीए, तैना लोक, ते भीड ते कौमां, ते बोलिन। 16 ते जैना दश शिंगन तीं, तैना ते हेवान तैस सैहीं बैर रखेले, ते तैस मजबूर ते नगी केरेले; ते तैसेरु मास खाले, ते तैस अग्गी मां फुकेले। 17 किजोकी परमेशर तैन केरे मने मां इन छडेले, कि तैना तैसेरी मर्जी पूरी केरेले; ते जाँ तगर परमेशरेरो वचन पूरो न भोए, तैखन तगर अक मन भोइतां अपनी बादशाही हेवाने देन। 18 ते तै कौन्श, जैन तीं हेरोरु ए तैन बडू नगरे, जै धेरतलरे बादशान पुड बादशाही केरते।

बेबीलोनेरु झडू

18 इठाँ पत्ती मीं अक फरिशतो स्वर्गे मौरां ओसतो लाव, जैसेरो बडो अधीकार थू; ते धेरतली तैसेरे सेके सैहीं बली। 2 तैन ज़ोरे सैहीं जोंव, कि डुलू बाबुलेरी शैहर डुलू: ते दुष्ट आत्मा केरे रहनेरी ठार, ते हर एकी दुष्ट आत्मारो अडो, ते एकी दुष्ट ते भिते चडोलोवेरो अडो भोई जेव। 3 किजोकी तैसेरे जनाहेरी बुरी शराबी सैहीं सब कौमां झेडी, ते धेरतलरे बादशाहेइँ तैस सैहीं जनाह कीयो; ते धेरतलरे बुपारी तैसेरे हेशेरे वजाही सैहीं धनवान भोवरेन। 4 फिरी मीं स्वर्गरां कोई होरी आवाज शुनी, कि हे मेरे लोकव, तैस मौरां निसा, कि तुस तैसेरे पापन मां शामिल न भोथ, ते तैसेरी आफतन मौरां कोई तुसन पुड न पे। 5 किजोकी तैसेरे पाप सुवर्गे तगर पुजोरेन, ते तैसेरो आधर्म परमेशरे याद आवरोए। 6 जैन्चरे तैन तुसन दितू, तैन्चरे तुस भी तैस भरा, ते तैसेरे कम्मां केरे मुताबिक तैस दुइय हिस्से देथ, जैस कटोरे मां तैन भरू थू तैसे मां तैसेरे लेई भरा। 7 जैतरी तैन अपनी बडयाई की, ते एशपर्सती की; तेतरी तैस पीडा, ते दु:ख देथ, किजोकी तै अपने मने मां ज़ोतीए, आंव रानई, बेवा नैइं; ते दुखे मां कधे न गेहिली। 8 ऐलहेरे लेई एकी दिहेडी मां तैस पुड आफतां एजेली, मतलब मौत, ते दु:ख, ते काल, ते तै अग्गी मां भसम केरी गाली, किजोकी तैसेरो इन्साफ केरने बालो प्रभु परमेशर शिख्तमाने। 9 ते धेरतलरे बादशाहेइँ तैस सैहीं जनाह, ते एश कीयो, जैखन तैसेरे फुकोनेरो तू लल्हे, त तैसेरे लेई लेरां देले, ते छाती पीटेले। 10 ते तैसेरी पीडारे डरके मारे दूर खडे भोइतां ज़ोले, हे बडे नगर, बाबुल! हे मजबूत नगर, हाय! हाय! एकी सैइती मां तीं सज़ा मैली। 11 ते धेरतलरे बुपारी तैसेरे लेई लेरां देले ते मिनत केरेले किजोकी हूनी इन केरो माल कोई न धिनेलो। 12 मतलब सुन्नू, चांदी, जुवाहर, मोती, ते मलमल, ते बैजनी, ते रेशमी, ते किरिमजी लिकडां, ते किसमेरी किसमेरी खुशबूदार चीजां, लकडी, ते हथीदंतेरी हर किसमेरी चीजां, ते कीमती लकडी, ते पीतल, ते लूहां, ते संगमरमरेरे किसमा किसमा केरी चीजां। 13 ते दारचीनी, मसाले, धूप, इत्र, लोबान, मैह, तेल, मेदो, गेहों, बछी, दांत, भैड, छेल्ली, धोडे, रथ, ते गुलाम, ते मँन्हू केरे प्राण। 14 हुनी मेरो पसंद फल तीं कैरां गहोतो राए; ते स्वादिष्ट ते रोडी चीजां तीं कैरा दूर भोवरिन, ते फिरी तैना कधे न मैलेली। 15 इन चीजन सैहीं बुपारी जैना तैसेरे बदौलत भोवरे थी, तैसेरी दुखेरे उरे सैहीं दूर खडे भोल्हे, ते लेरां ते तडफते ज़ोले। 16 हाय! हाय! इन बडू शैहर जैन मलमल, ते भैजनी, ते किरिमजी लिकडां लेइतां थी, ते सुनु, ते जुवाहर ते मोतन सैहीं सज़ोरु थू, 17 एकी सैइती मां तैसेरु एरु धन बरबाद भोव: ते सब मांझी, ते मुसाफर, ते मल्लाह, ते जेतरे समुन्दरे कैरां डरते थी, सारे दूर खडे भोए। 18 ते तैसेरे फुकोनेरो तू लेइतां ज़ोरे सैहीं ज़ोने लाए, कौन जेरु शहर इस बडे शहरेरु जेरु ए? 19 ते अपने अपने दोगे पुड धूड मल्लेले, ते लेरां देते ते करलाते चिंटां मैरतां ज़ोने लाए, कि हाय! हाय! इन बडू शहर जैसेरी ज़ेदारे दौलत समुन्दरेरां सब ज़िहाजन बाले सब धनी भोवरे थी एकी सैइती मां उजडे। 20 हे स्वर्ग, ते हे पवित्र लोकाव, ते प्रेरितव, ते नेबव, तैस पुड आनन्द केरा, किजोकी परमेशरे इन्साफ केरतां तैस तुशो बदलो दितोरोए। 21 फिरी एकी ताकतबर स्वर्ग दूते बडे चेकारे पाठेरु ज़ेरो अक घोड छूवो, ते इन ज़ोइतां समुन्दरे मां शारो, कि बडू शहर बाबूल ऐन्चरे बछोडू गहलू, ते फिरी कधे तैसेरो पतो न मैलेलो। 22 ते बरबत बजाने बाले, ते बजने, ते बेइशोई बजाने बाले, ते नडशिनगां बजाने बालां केरी आवाज

फिरी तीं कधी न शुनोली, ते फिरी कौन्ची पेशेरो करीगिर तीं मां न मैलेलो; ते चक्की चलनेरी आवाज तीं कधे न शुनोली। 23 ते दीयेरी लो फिरी तीं मां न बलेली ते लाडे ते लैडारी आवाज कधे न शुनोली; किजोकी तेरे बुपारी धेरतली पुड प्रधान थी, ते तेरे टूने सैहीं सब कौमां टपलोवरी थी। 24 ते नेबी ते पवित्र लोकन, ते धेरतली पुड सब मारोरां केरो लेव्ह तैसे मां ए।

19 इठां पत्ती मीं मन्ना बडी भीड उचे आवाजी सैहीं इन ज़ोते शुनी, कि हल्लिलूय्याह! मुक्ति, ते महिमा, ते सामर्थ इशे परमेशरेरीए। 2 किजोकी तैसेरे फेसले सच्चे ते ठीकन, ऐलहेरे लेई कि तैन तैस बेडी वेश्यारो जै अपने जनाहे सैहीं धेरतली भ्रष्ट केरती थी, इन्साफ केरो, ते तैस कैरां अपने दासां केरो बदलो नेवरोए। 3 फिरी दुइयोवं बार तैनैइँ हल्लिलूय्याह! ज़ाँव: ते तैसेरे फुकोनेरो तू सदा उठतो रालो। 4 ते चोब्ही बजुरगेइँ ते च़ेवरे जानदारैइँ परमेशरे कां मथो टेको; जै तखते पुड बिशारो थू, ते ज़ाँव, हल्लिलूय्याह!

गबडेरो ड़लाह

5 ते तैखते मौरां अक आवाज निस्सी, कि इशे परमेशरे कैरां सब डरने बाले दासेइँ, कुन निकडे, कुन बडे, तुस सब तैसेरी तारीफ केरा। 6 फिरी मीं बडी भिडारी, ते बडे पैनेरी आवाज शुनी, ते गुडनेरी ज़ेरी आवाज शुनी, कि हल्लिलूय्याह! कि प्रभू इषो परमेशर, सर्वशखतीमान बादशाही केरते। 7 एजा अस आनिन्दत ते मगन भोम, ते तैसेरी स्तूति केरम; किजोकी गबडेरो ड़ला पुजोरोए: ते तैसेरे लैडां अपनो आप तियार केरोए। 8 ते तैस साफ ते चमकदार महीन मल्ब मलमल लानेरो अधीकार दितो, किजोकी तैस महीन मलमलेरो मतलब पवित्र लोकां कैरां धर्मोरां कम्मन। 9 ते तैन मीं सैहीं जोंव, इन लिख, कि मुबारीके तैना, जैना गबडेरे ड़लाएरे धामी मां कुजवरेन; फिरी तैन मीं सैहीं जोंव, इना वचन परमेशरेरे सच्चे वचन। 10 ते आंव तैस कां मथो टेकनेरे लेई तैसेरे पवन पुड पेव; तैन मीं सैहीं जोंव हेर; एरु न केर, आंव तेरो ते तेरे साथी केरो साथी दासाई, जैना यीशु एरी गुवाही देने पुड मजबूतन, परमेशरे काँ झुक; किजोकी यीशु एरी गुवाही भविष्यवैनी आत्माए।

छिते घोडेरो सवार

11 फिरी मीं स्वर्ग खुल्लू लाव; ते लाताई कि अक छितो घोडोए; ते तैस पुड अक सुवारे, जै वफादार, ते जैस जो सचो ज़ोतन; ते तै धरमे सैहीं इन्साफ ते लडाई केरते। 12 तैसेरे ऐछी अगरे मूरां केरी जेरिन; ते तैसेरे दोगे पुड बडां राज मुकटन; ते तैसेरु अक नाँव लिखोरुए, जैस तैसेरे इलावा होरो कोई न ज़ाने। 13 तै लेव्हें मां ड़बोरे लिकडां लेइतां, तैसेरु नाँव परमेशरेरो वचने। 14 ते स्वर्गेरी फौज छिते घोडे पुड सुवारे; ते छिते ते साफ मलमल लेइतां तैस पत्ती पत्तीन। 15 ते कौमी कौमी मारनेरे लेई तैसेरे ऐशी सैहीं अक तिरखी तलवार निसतीए, ते तै लूहेरो सोटे सैहीं तैन पुड बादशाही केरेलो, ते तै सर्वशखतीमान परमेशर, ते बडे परकोपेरी गजबनाकेरी मैई सैहीं दाछ द़लाऐन्चेलो। 16 ते तैसेरां लिकडन ते जाँघई पुड इन नाँव लिखोरुए, "बादशां केरो बादशाह प्रभु केरो प्रभु"। 17 फिरी मीं अक फरिशतो दिहाडे पुड खडो लाव, ते तैन बेडी आवाजी अम्ब्रे मां उडने बाले चडोलन सैहीं जोंव, एजा परमेशरेरे बडे धामी मां शामिल भोनेरे लेई अकोठे भोथ। 18 जैस सैहीं तुस बादशाहां केरु मास, ते सरदारां केरु मास, ते ताकतबर मँन्हू केरु मास, ते धोडां केरु, ते तैन केरे सवारां केरु मास, ते कुन आज़ाद, कुन गुलाम, कुन निकडे, कुन बडे, सैभी लोकां केरु मास खाथ। 19 फिरी मीं तैस हेवाने ते धेरतलरे बादशाह तैन केरी पौजन तैस धोडेरे सवार, ते तैसेरेरी फौजी सैहीं लडनेरे लेई अकोठो लाव। 20 ते तै हेवान ते तैस सैहीं साथी ते झूठो नबी ट़लाव, जैन तैसेरे सामने एरो निशान हीरावरो थू, जैसेरे ज़िरीए तैन तैना टपलाए, जैनैइँ तैस हेवानेरी छाप नेवरी थी, ते जैना तैसेरी मूतरी पूजा केरते थी, इन दुइये जीते जी तैस अगरे ड़ैले मां जै गन्धके सैहीं बल्लतीए, छडेलो। 21 ते बाकी लोक तैस घोडेरे सवारेरी तलवारी

सैहीं जै तैसेरे ऐशी मैरां निस्सती थी, मारे जे; ते चडोलू तैसेरे मासे सैहीं रजां |

हजार सालां केरी बादशाही

20 फिरी मीं अक फरिशतो स्वर्गेरॉ एइतो लाव; जैसेरे हथे मां अथाह कुण्डेरी चाबी, ते अक बडी शंगल थी | 2 ते तैने तैस अजगर, मतलब पुराने सपे, जै इब्लीस ते शैतानइ; टलाएइतां हजार सालेरे लेई बन्धो | 3 ते तै अथाह कुण्डे मां शैरतां बन्द केरो ते तैस पुड़ मोहर लई; कि तै हजार साल पूरे भोने तगर कौमां कौमां केरे लोकन फिरी न भटकाए; इसेरां पत्ती जरुरे, कि थोड़े चीरेरे लेई खोल्लो गाए |

4 फिरी मीं तखत लाए, ते तैन पुड़ लोक बिशोरेन; ते तैन इन्साफ केरनेरो आधीकार दितो; ते तैन केरी आत्मा भी लेई, जैन केरी करोडी यीशु मसीहेरी गुवाही देने ते परमेशरे वचनेरे वजाही सैहीं केटी जेवरी थी, ते जैनेई तैस हेवानेरी, ते न तैसेरे मूरतरी पूजा कीयो थी, न तैसेरी छाप अपने कुपाए, ते हथन पुड़ लवावरी थी; तैना जीते भोइतां मसीह सैहीं साथी हजार सालन तगर बादशाही केरते राले | 5 ते जाँ तगर इना हजार साल पूरे न भोए तां तगर बाकी मरेरे न जीते भोए; ई त पेहिली कयामते | 6 मुबारक ते पवित्रे तै, जै पेहिलो इस कयामती मां शामिल भोए, एरेन पुड़ दूइयोवं मौती पुड़ कोई भी आधीकार नई, पण तैना परमेशर, ते मसीहेरे याजक भोल्हे, ते तैस सैहीं साथी हजार साल बादशाही केरेले |

शैतानेरो विनाश

7 ते जैखन हजार साल पूरे भोले; ते शैतान कैदे मैरां छुटव गालो | 8 ते तैन कौमन जैना धेरतलरे चेरवे पासन भोल्ही; मतलब जूज ते माज्जेरे गिनती समुन्दरेरे रेती बराबर भोल्ही, टेपलेइतां अकोठे केरनेरे लेई निसेलो | 9 ते तैना सैरी धेरतली पुड़ फेलेती; ते पवित्र लोकां केरी छव ते ट्लारु शहरे घेरेले: ते अग्न स्वर्गां तैन भस्म केरेली | 10 ते तैन केरो गुमरा केरने बालो शैतान अग्न, ते गन्धकेरे डल्हे मां, जैस मां तै हेवान, ते झूठो नबी भी भोल्हो, तैस मां शारो गहलो, ते तै रात दिहैडी सदा दुखे मां रालो |

बडो छितो तखत ते आखरी इन्साफ

11 फिरी मीं अक बडो छितो तखत ते तैस जै तैस पुड़ बिशोरो थू लाव, जैसेरे सामनेरां धरतली ते अम्बर नशू, ते तैन केरे लेई ठार न मैल्ली | 12 फिरी मीं निकडे बडे फटरे तखतेरे सामने खडे लाए, ते किताबां खोल्ली जेई; ते फिरी अक होरी किताब खोल्ली; मतलब ज़िन्दगरी किताब खोल्ली; ते जैन्चरे तैन किताबन मां लिखोरु थू, तैन केरे कम्मां केरे मुताबिक फटरां केरो इन्साफ केरो | 13 ते समुन्दरे तैना फटरे मैन्हु दिते जैना तैस मां थी, ते मौतां ते पताले जैना तैस मां थी दिते; ते तैन मैरां हर एकी तैन केरे कम्मां केरे मुताबिक तैन केरी आदालत केरी | 14 ते मौत ते पाताल भी अगरे डल्हे मां शारनेन; ई अगरो डल्हे त दुइयोवं मौत त दुइयोवं मौते | 15 ते जैसेरु नोंव ज़िन्दगरे किताबी मां लिखोरु न मैलेलू, तै अगरे डल्हे मां शारो जेव |

नोंवू आसमान ते नावीं ज़मीन

21 फिरी मीं नोंवू आसमान ते नोंवी धेरतली लाई, किजो पेहिलू आसमान, ते पेहिली धरतली गहती रावरी थी, ते समुन्दर भी न राव | 2 फिरी मीं पवित्र नगर नोंवे यरुशलमे स्वर्गेरां एइतू लाव, ते तैन तै लैडारु जेरु थू, जै अपने मुनशेले लेई तियार भोवरी भोए | 3 फिरी मीं तखत मैरां कोई उची आवाजी सैहीं इन ज्रोते शुनु, कि तक, परमेशरेरो डेरो मैन्हन मांए; तै तैन सैहजीं साथी डेरो केरेलो, ते तैना तैसेरे लोक भोल्हे, ते परमेशर एपू तैन सैहीं साथी राल्हो; ते तैन केरो परमेशर भोल्हो | 4 ते तै तैन केरे ऐछी कैरां सब ऐंखरु पूंछेलो; ते तैठां पत्ती मौत न रहली, ते न दुःख, न मातम, न मसीबत रहली; पेहिली गल्लां बीती जेई |

5 ते जै तखते पुड़ बिशोरो थू, तैन ज़ोव, कि तक, आंव सब किछ नोंवों केरेताई: फिरी तैन ज़ोव, कि लिख, किजोकी इना वचन विशवासेरे काबिल ते सचेन | 6 फिरी तैन मीं सैहीं ज़ोव, इना गल्लां पूरी भोई, आंव अलफा ते

ओमिगा, पेहिलो ते आखरी: आंव टलाइषोरे ज़िन्दगरे पैनेरे नागन मैरां मुखत देइलो | 7 जै जीत हसल केरे, तैए इन चीजां केरो बार्स भोल्हो; ते आंव तैसेरो परमेशर भोल्हो, ते तैन मेरु महु भोल्हू | 8 पण डरपोक, ते विश्वास न केरने बाले, भिटे, ते खूनी, ते जनाह केरने बाले, ते जैदू केरने बाले, मूरती केरी पूजा केरने बाले, ते सब झूठां केरो हिस्सो तैस डल्हे मां मैलेलो, जै अग्नी ते गन्धकी सैहीं बलती राल्हो; ई दुइयोवं मौते |

नोंवू यरुशलमे

9 फिरी जैना सत फरिशतेइं नेडे एइतां सत आखरी आफतन सैहीं भरोरे कटोरे थी, तैन मैरां अक मीं कां एइतां, ते मीं सैहीं गल्लां केरते ज़ोव; इरां एई: तीं आंव लाडेरी मतलब गबडेरी लाडी हीरेई | 10 ते तैन आंव आत्माई मां, एकी बडे ते उचे पहाडे पुड़ नेव, ते पवत्र नगर यरुशलमे स्वर्गेरां परमेशरे कैरां एइतो हीरव | 11 परमेशरेरी महिमा तैस मां थी, ते तैसेरी लो बडे कीमती घोडा, मतलब बिल्लोरेरे जेरे यशबेरी जेरी साफ | 12 ते तैसेरी शहरपनाह बडी उची थी, ते तैसेरां बहरे दारां ते दारन पुड़ बहरे फरिशते थी; ते तैन पुड़ इस्त्राएली केरे बहरे गोत्रां केरां नोंवां लिखोरां थी | 13 पूर्वरे पासे ट्लार्ई, उत्तरेरे पासे ट्लार्ई दारां, दखिनेरे पासे ट्लार्ई दारां, ते पश्चिमेरे पासे ट्लार्ई दारां थीयां | 14 ते नगरेरी शहरपनाहेरी बहरे मुनीयादां थी, ते तैन पुड़ गबडेरे बहरे प्रेरितां कैरां बहरे नोंवां लिखोरां थी | 15 ते जै मीं सैहीं गल्लां केरतो थू, तैस कां नगर, ते तैसेरे दारन ते तैसेरे शहरपनाई नापनेरे लेई अक सुन्नेरो गज थू | 16 ते तैन नगर चेरवे पासन थू, ते तैसेरी लम्बाई चोडाइअरे बराबर थी, ते तैन तैस गजे सैहीं नगर नापू, त सडे सत शओ कोस निसी: ते तैसेरी लमबाई, ते चोडाई, ते ऊंचाई बराबर थी | 17 ते तैन तैसेरी शहरपनाह मैन्हु केरे, मतलब फरिशतेरे नापी सैहीं नापू, त अक शौ चुरतैली हजार हथ निसी | 18 ते तै शहरपनाहे यशबेरी थी, ते नगरेरे चोखे सुनेरु थऊं, जैन साफ शीशेरु भोए | 19 ते तैस नगरेरी मुनीयादां हर किसमेरी कीमती घोडन सैहीं सजावरी थी, पेहिली मुनीयाद यशबेरी थी, दुइयोवं नीलमणि एरी, ट्लार्ईओवं रातारे दीयेरी, चेरवोवं जमुदेरी | 20 पन्चोवं मोदेकेरी, षेइओवं माणिक्येरी, सतोवं पीतमिनेरी, अठोवं पेरोजेरी, नावोवं पुखराजेरी, दशोवं लहसनिरी, यारोवं धप्रकान्तेरी, बारोवं याकूतेरी | 21 ते बहरे दारां, बहरे मोती केरां थी; अक अक दार, एकी एकी मोती सैहीं बनोरु थू; ते नगरेरी सडक साफ शीशेरी जेरी खालस सुनेरी थी |

22 ते मीं तैस मां कोई मन्दर न लाव, किजोकी सर्वशखतीमान प्रभु परमेशर, ते गबडू तैसेरु मन्दरे | 23 ते तै नगरे मां दिहाडो ते चांदनैरे लोआरी जरुरत नई, किजोकी परमेशरेरे तेजे सैहीं तैस मां लो भोई रावरीए, ते गबडू तैसेरो दीयोए | 24 ते कौमां कौमां केरे लोक तैसेरी लोई मां चलेले फीरेले, ते धेरतलरे बादशाह अपने अपने तेजेरु सामान तैस मां आनेले | 25 ते तैसेरां दारां दिसां कधे बंद न भोलां, ते रात तैडी न भोल्ही | 26 ते लोक कौमां कौमां केरी शान, ते इजतारु सामान तैस मां आनेले | 27 ते तैस मां कोई गंदी चीज या गंदू कम्म केरने बालो, या झूठ बनाने, कौन्वी भी तरीके सैहीं अन्तर न गालो; पण सिर्फ तैना लोक जैन केरां नोंवां गबडेरे ज़िन्दगरे किताबी मां लिखोरां भोल्हां |

22 फिरी तैन मीं बिल्लोरेरे जेरो अक चमकतो दरिया हीराव, जै परमेशरेरे ते गबडेरे तखतेकै रां निसतां तैस नगरेरे सडकी तगर मज़ामेई निसतो थू | 2 ते दरयारे इस पास; ते तैस पार, ज़िन्दगरो बुट थू; तैस मां बारे किसमां केरे फल लगते थी, ते तै हर महीने फलतो थू; ते तैस बुटेरे पट्लान सैहीं कौमां कौमां केरे लोक बेझोते थी | 3 ते फिरी लानत न भोल्ही ते परमेशर, ते गबडेरो तखत तैस नगरे मां भोल्हो, ते तैसेरे दास तैसेरी सेवा केरेले | 4 ते तैसेरु तुतर हेरेले, ते तैसेरु नोंव तैन केरे तुतर पुड़ लिखोरु भोल्हू | 5 ते फिरी रात न भोल्ही, ते तैन दीयो ते दिहाडेरी जरुरत न भोल्ही, किजोकी प्रभु परमेशर तैन लो देलो: ते तैना सदा बादशाही केरेले, किजोकी प्रभु परमेशर तैन लो देलो |

यीशु एरु दुबारा एजनू

6 फिरी तैने मीं सैहीं ज़ोंव, इना गल्लां सची ते हकन, ते प्रभु जै नेबी केरे आत्मां केरो परमेशरे, तैने अपने फरिशते ऐलहेरे लेई भेङ्गे, कि अपने दासन तैना गल्लां जैन केरु जल्दी भौनू जरूरीए हीराए।

7 हेर, आंव जल्दी एजने बालोई; मुबारिके तै, जै इस किताबरे भविष्यवैत्रे गल्लन मन्नते।

8 आंव तैए यहूनाई, जै इना गल्लां शुन्ततो, ते लहतो थू, ते जैखन मीं शुनू, ते हेरु, त जै फरिशतो मीं इना गल्लां हिरातो थू, आंव तैस कां मथो टेकने लाव। 9 ते तैने मीं सैहीं ज़ोंव, हेर, एरु न केर; किजोकी आंव तेरो, ते तेरे दूलाहां नेबी ते इस किताबरी गल्लां केरे मन्ने बालां केरो संगी दासाई; परमेशरे कां झुक।

10 फिरी तैने मीं सैहीं ज़ोंव, इस किताबरे भविष्यवैनारे गल्लन बंद न केर; किजोकी वखत नेड़ोए। 11 जै बुरु केरते, तै बुरु केरतो राए; ते जै गंदोए, तै गंदो बनोरो राए; ते जै धमी, तै धर्मी बनोरो राए; ते जै पवित्रे तै पवित्र बनोरो राए। 12 हेर, आंव जल्दी एजने बालोई; हर एकेरे कम्मरे मुताबिक बदलो दें.नेरे लेई फल मीं कां। 13 आंव अलफा ते ओमिगाई, पेहिलो ते आखरी, शुरुवात ते आखराई।

14 मुबारिके तै, जै अपना लिकड़ा धोते, किजोकी तैन ज़िन्दगरे बुटे कां एजनेरो आधीक मैल्लनोए, ते तै दारां केरे बतां गेहितां नगरे मां दाखल

भोलहो। 15 पण कुत्राँ, ते जैद केरने बाले, ते जनाह केरने बाले, ते खून केरने बाले ते मूरती केरी पूजा केरने बाले, ते हर कोई झूठेरो चाने बालो, ते बनाने बालो बेइर रालो।

16 मीं यीशुए अपने फरिशतो ऐलहेरे लेई भेङ्गे, कि तुस्न अगर कलीसिया मां इन गल्लां केरे बारे मां गुवाही दे: आंव दाउदेरु मूल, ते वंश, ते झेझरो चमकतो तारोई।

17 ते आत्मा, ते लाड़ी दुइये ज़ोतिन, एई; ते शुने बाले भी ज़ोंन, कि एई; ते जै ट्लाइशोरो भोए, तै एजे ते जै कोई चाए ज़िन्दगरु पानी मुफ्त ने।

अछो रुतबो

18 आंव हेर एकी जै इस किताबरी भविष्यवैनरी गल्लां शुन्नतेम गुवाही देताइं, कि अगर कोई मैंहू इन गल्लन मैरां किछ बधाए, त परमेशर तैन आफतन जैना इस किताबी मां लिखोरिन, तैस देल्हो। 19 ते अगर कोई इस भविष्यवैनरी किताबरी किछ गल्लां कडे, त परमेशर तैस ज़िन्दरे बूटे ते पवित्र नगरे मैरां जैसेरे बारे मां इस किताबी मांए, तैसेरो हिसो कडेलो।

20 जै इन गल्लां केरी गुवाही देते, तै इन ज़ोते, हां जल्दी एजने बालोए। आमीन। 21 हे प्रभु यीशु एई। प्रभु यीशुएरो अनुग्रह पवित्र लोकन सैहीं साथी राए। आमीन।